


भड्लाई बाइबलि



The Holy Bible in the Bhadrawahi Language (bhd) of India

भड्लाई बाइबिल

The Holy Bible in the Bhadrawahi Language (bhd) of India

Copyright © 2020 The Love Fellowship

Language: भद्रवाही (Bhadrawahi)

Contributor: The Love Fellowship

Read and download Bible and several other Christian materials in various formats :
www.freebiblesindia.in

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-06

PDF generated using Haiola and XeLaTeX on 25 Aug 2024 from source files dated 7 Apr 2023
7f6d55d1-b322-5b69-99bd-e0641d0d9871

Contents

मत्ती	1
मरकुस	56
लूका	97
यूहन्ना	154
प्ररितां	195
रोमियो	246
1 कुरिन्थियों	268
2 कुरिन्थियों	291
गलातियों	305
इफिसियों	313
फिलिप्पियों	321
कुलुस्सियों	326
1 थिस्सलुनीकियों	331
2 थिस्सलुनीकियों	336
1 तीमुथियुस	339
2 तीमुथियुस	346
तीतुस	351
फिलेमोन	354
इब्रानियों	356
याकूब	373
1 पतरस	379
2 पतरस	386
1 यूहन्ना	391
2 यूहन्ना	397
3 यूहन्ना	398
यहूदा	399
प्रकाशित	401

मत्ती

ॐॐॐॐ ॐॐॐॐॐॐ ॐॐॐॐॐॐ

(ॐॐॐॐ 3:23-38)

1 अब्राहमेरी औलादी मरां दाऊद राज्ञो थियो, दाऊद राज्ञेरी औलादी मरां यीशु मसीह थियो। यीशु मसीहेरे दादे-पडदादां केरां नंवां इना आन।

2 अब्राहमेरू मट्टू इसहाक थियूं, इसहाकेरू याकूब, याकूबेरां मट्टां यहूदा ते तैसेरे दूला थियो।

3 यहूदा ते तामारेरां मट्टां परेस ते जेरह थियां, परेसेरू मट्टू हेस्रोण, हेस्रोनेरू एराम,

4 ते एरामेरू अम्मीनादाब, अम्मीनादाबेरू नहशोन, नहशोनेरू सलमोन,

5 ते सलमोन ते तैसेरी कुआन्श राहाबेरू मट्टू बोआज थियूं, ते बोआज ते तैसेरी कुआन्श रूतरू ओबेद, ओबेदेरू यिशै,

6 ते यिशैरू मट्टू दाऊद राज्ञो थियो, दाऊद राज्ञेरू मट्टू सुलैमान तैस कुआन्शी सेइं पैदा भोव, जै पैदली ऊरिय्याहरी कुआन्श थी।

7 सुलैमानेरू रहबाम, रहबामेरू अबिय्याह, अबिय्याहेरू आसा,

8 ते आसारू यहोशाफात, यहोशाफातेरू योराम, ते योरामेरे खानदानेरे मरां उज्जियाह पैदा भोव।

9 उज्जियाह रू योताम, योतामेरू आहाज, आहाजेरू हिजकिय्याह,

10 ते हिजकिय्याहेरू मनशशे, मनशशेरू आमोन, आमोनेरू मट्टू योशिय्याह थियूं

11 ते योशिय्याहेरां पोदलडां यकुन्याह ते तैसेरे दूला थियो, जैना गिरफतार भोइतां बाबेलेरी गुलैमी मां गानेरे वक्ते मां जर्मोरां थियां।

12 गिरफतार भोइतां बाबेलेरी गुलैमी मां गानेरे पत्ती यकुन्याहेरू शालतियेल ते शालतियेलेरू जरूबाबेल,

13 ते जरूबाबेलेरू अबीहूद, अबीहूदेरू एलयाकीम, एलयाकीमेरू अजोर,

14 ते अजोरेरू सादोक, सादोकेरू अखीम, अखीमेरू एलीहूद

15 ते एलीहूदेरू एलीआजर, एलीआजारेरू मत्तान, मत्तानेरू याकूब,

16 ते याकूबेरू यूसुफ, ते यूसुफ मरियमरो मुन्श थियो, ते मरियमरू मट्टू यीशु आए, जैस जो मसीह ज़ोतन।

17 एन्चरे अब्राहमे करां दाऊद राज्ञे तगर च़ेवधे पीडी भोइ, ते दाऊद राज्ञे करां यहूदी केरे गिरफतार भोइतां बाबेलेरी गुलैमी मां गाने तगर च़ेवधे पीडी भोइ, ते गिरफतार भोइतां बाबेले मां गाने करां देइतां यीशु मसीह तगर च़ेवधे पीडी भोइ।

ॐॐॐॐॐ ॐॐॐॐ

(ॐॐॐॐ 1:26-38; 2:1-7)

18 यीशु मसीहेरू ज़र्म एन्चरे सेइं भोवं, कि ज़ैखन तैसेरी अम्मा मरियमरी कुडमाइ यूसुफ नंवे एक्की मैन्हु सेइं भोरी थी, त तैन केरे इला भोने करां पेइले मरियम पवित्तर आत्मारै शेक्ति सेइं दोज्जीती भोइ।

19 तैसारो मुन्श यूसुफ ज़ै धर्मी मैन्हु थियो, तै तैस वदनाम केरनि न थियो चातो। तैनी चुपच़ारे इन सोचू, कि मीं एस सेइं इला नई बनानो।

20 हेजू ते एन सोचने लोरो थियो, त प्रभुएरे एक्की स्वर्गदूते तैस सेइं सुपने मां एइतां ज़ोवं, “हे यूसुफ! तू ज़ै दाऊदेरे खानदाने मरां आस, तू मरियम अपनि कुआन्श बनाने करां न डर, किजोकि ज़ैन तैसारै पेटे मां आए तैन पवित्तर आत्मारै तरफां आए।

21 तैस मट्टू भोनूए, ते तू तैसेरू नवं ‘थीशु’ रेखां, किजोकि तैए अपने लोकन तैन केरे पापन करां मुक्ति देलो।”

22 एन सब किछ एल्हेरेलेइ भोवं, कि जैना वचन प्रभुए यशयाह नेबेरे जिरिये ज़ोरे थिये पूरे भोए कि,

23 “हेरा, अक अडलाई कुई पेटे भारी भोली, ते तैस अक मट्टू भोलू, ते लोक तैस जो इम्मानुएल जोले” जेसेरो मतलब ई आए, परमेशर असन सेइं साथी आए ।

24 तैखन यूसुफ निडलारां बीडो त तैनी परमेशरेरे स्वर्गदूतेरू ज़ोनु मन्नु, ते मरियमी सेइं ड्ला वनाव ते अपने घरे आनी ।

25 पन ज़ातगर तैस मट्टू न भोवं तांतगर तै तैस सेइं साथी न झुल्लो ते ज़ैखन तैस मट्टू भोवं त यूसुफे तैस मट्टेरू नवं यीशु रखवू ।

2

XX

1 हेरोदेस राज़रे ज़माने मां ज़ेइस यहूदिया इलाकेरे बैतलहम नगर मां यीशु पैदा भोव, त पूर्वरां किछ जोष्टी लोक यरूशलेम नगरे मां आए ।

2 ते तैना लोकन पुच्छने लगगे, “यहूदी लोकां केरो राज़ो ज़ै ज़र्मोरोए तै कोडि आए? किजोकि असेईं पूरवे मां तैसेरो तारो लोरोए, ते आस तैस कां मथ्यो टेकने ओरेम ।”

3 ज़ैखन हेरोदेस राज़े ए गल शुनी, त हेरोदेस राज़ो ते कने यरूशलेम नगरेरे सारे लोक घबराए ।

4 ते हेरोदेस, यहूदी लोकां केरे प्रधान याजक ते शास्त्री लोक अकोट्टे केरतां तैन पुच्छने लगगो, “मसीह कोडि पैदा भोरो लोडे?”

5 तैनेईं तैस सेइं ज़ोवं, “यहूदिया इलाकेरे बैतलहम नगरे मां,” किजोकि (बडे पेडले) मीका नेवे एन्चरे लिखोरूए, कि परमेशरे ज़ोवं,

6 “हे बैतलहम नगर, तू ज़ैन यहूदिया इलाके मां आस, यहूदियारे इलाकन मां तू बडू खास नगर आस, किजोकि तीं मरां अक एरो हाकिम निसेलो ज़ै मेरे लोक इस्राएलेरी रखवाली केरलो”

7 ज़ैखन हेरोदेस राज़े एन शुनु, त तैनी जोष्टी चुपचारे कुजेइतां तैन करां तारो निसनेरे ठीक वक्तोरे बारे मां पतो कियो ।

8 ते तैनी जोष्टी एन ज़ोइतां बैतलहम नगरे जो भेजे, कि “गाथ, ते तैस बच्चेरे बारे मां रोडेचारे पतो केरा ते ज़ैखन तुसन पतो लगगे, त (वापस एइतां) मीं भी पतो देइयथ ताके अवं भी तैस कां गेइतां मथ्यो टेकी ।”

9 तैना जोष्टी (हेरोदेस) राज़ेरी गल शुन्तां (यरूशलेम नगरेरां) चले जे । ते अकदम तै तारो, ज़ै तैनेईं पूरवे मां लोरो थियो, तैन अग़री-अग़री चलो ते तैस घरेरे बा रुको ज़ैडी तैन मट्टू थियूं ।

10 ज़ैखन तैनेईं तै तारो लव, त तैना बडे खुश भोए ।

11 तैखन तैना घरे अन्तर जे ते तैन मट्टू तैसेरी अम्मा मरियमी कां लाव ते तैस मट्टे कां मथ्यो टेको । तैखन तैनेईं अपने-अपने खज़ानेरे झोले खोलतां सोन्नु, लोवान ते मुर्न तैस कां च़ादू ।

12 जोष्टी केरे तैट्टां निसनेरां पत्ती, तैन सुपने मां ए बिस्तार मैल्लो कि वापस हेरोदेसे कां न गेइयथ । एल्हेरेलेइ तैना वापस कोन्ची होरि वत्तां अपने मुलखे जो चले जे ।

XX

13 जोष्टी केरे गानेरां पत्ती, अचानक प्रभुएरो अक स्वर्गदूत यूसुफे सुपने मां मैल्लो ते ज़ोने लगगो, “उठ, बच्चो ते तैसेरी अम्मा नेइतां मिस्र मुलखे जो नश्र । ते मेरे ज़ोने तगर तैडी रेइयां, किजोकि हेरोदेस राज़ो बच्चे तोप्तां मारने चाते ।”

14 यूसुफ निडलारां उठो ते मट्टू ते तैसेरी अम्मा साथी नेइतां रातो-रात मिस्र मुलखे जो चलो जेव ।

15 हेरोदेसेरे मरने तगर यूसुफ तैडी राव, ताके प्रभुएरू तैन वचन पूरू भोए, ज़ैन होशे नेवे लिखोरू थियूं, “मीं मिस्र मुलखे मरां अपनू मट्टू कुजाव ।”

॥॥॥॥॥ ॥॥॥॥ ॥॥॥॥॥॥ ॥॥॥॥ ॥॥॥॥

16 जैखन हेरोदेस जोष्टी करे धोखे बैजरो पतो लगी, त तैस बड़ी सरक आई। तैनी अपने मैन्हु भेजतां, जैन गल्लां केरो पतो तैस जोष्टन करां मैल्लोरो थियो, तैनी बैतलहम नगरे ते तैसेरे आसेपासेरे इलाकन मां सिपाही भेजतां सारां मट्टां, जैना दूई सालां केरां या दूई सालन करां निकड़ां थियां मां।

17 जैखन एन भोव, त तैखन तैन वचन पूरू भोवं, जैन यिर्मयाह नेबे ज़ोरू थियू। तैनी ज़ोवं,

18 “रामाह नगर मां बेड़ि लेरां ते मातमेरि आवाज शूनोई, राहेल अपने बच्चां केरे लेइ लेरां देने लोरी, तैसारो दिल ठंडो न भोए, किजोकि तैसेरे बच्चे मेरि जोरन।”

॥॥॥॥ ॥ ॥॥॥॥॥ ॥॥॥॥ ॥॥॥॥ ॥॥॥॥ ॥॥॥॥ ॥॥॥॥ ॥॥॥॥

19 हेरोदेसेरी मौतारां पत्ती, जैखन यूसुफ मिस्र मुल्खे मां थियो, त अचानक प्रभुएरो स्वर्गदूत तैस सुपने मां लेइहोव ते तैस सेइं ज़ोने लगी,

20 “उठ, बच्चो ते कने तैसेरी अम्मा साथी नेइतां इस्राएल मुलखे जो वापस ज़लो गा, किजोकि जैना लोक बच्चे मारने चाते थिये, तैना मेरि जोरन।”

21 फिरी यूसुफ निइलारां बीझो, ते बच्चो ते तैसेरी अम्मा साथी एन्तां इस्राएल मुलखे जो वापस अव।

22 पन जैखन यूसुफे एन शूनू कि अरखिलाउस अपने बाजी हेरोदेसेरी ठैरी यहूदिया इलाके पुड़ राज़ केरने लगगोरो, त तै तैड़ी गाने करां डरो। एल्हेरेलेइ जैखन यूसुफे सुपने मां परमेशेरो बिस्तार मैल्लो, त तै गलील इलाके जो ज़लो जेव।

23 ते तैड़ी पुजतां तै नासरत नंब्वेरे नगर मां राने लगी, ताके तैन वचन पूरू भोए, जैन परमेशेरे अपने नेबी केरे ज़िरिये ज़ोरो थियू। तैनेई ज़ोवं, “तैस जो नासरी ज़ोले।”

3

॥॥॥॥॥ ॥॥॥॥॥॥॥ ॥॥॥॥॥॥॥ ॥॥॥॥॥॥ ॥॥ ॥॥॥॥ ॥॥॥॥ ॥॥॥॥॥

(॥॥॥॥॥ 1:1-8; ॥॥॥॥ 3:1-18; ॥॥॥॥॥॥ 1:6-8,15-34)

1 तैन दिहाइन मां यूहन्ना नंब्वेरो मैन्हु, जै बपतिस्मो देनेबालो थियो, यहूदिया इलाकेरे सुनसान ठैरी मां अव। तै लोकन जैना तैस कां एइते थिये, तैन ई प्रचार केरतो थियो,

2 “अपने पापन करां मनफिराथ, किजोकि स्वर्गेरू राज़ नेडे ओरूए!”

3 ई तैए ज़ेसेरे बारे मां यशायाह नेबे एन ज़ोरू थियू,

“कोई सुनसान ठैरी मां लोकन, जैना तैस कां गातन, तैन उच्ची आवाजी सेइं ज़ोलो कि ‘तुसन कां प्रभु एजनेबालो आए, एल्हेरेलेइ तैसेरी बत तियार केरा ते कने तैसेरेलेइ सड़कां सिद्धी केरा।’ (यानी, प्रभुएरे लेइ तुस अपने दिल साफ केरा)”

4 यूहन्ना आम लिगड़ां लातो थियो जैना लिगड़ां ऊँटेरे बालन सेइं बनोरां थियां। तै अपनि कमरी पुड़ चमड़ेरू मज़ बंधतो थियो। ते तै टिट्टां त कने जंगलेरू माछ्छी खातो थियो।

5 तैखन यरूशलेम नगरेरे बड़े लोक ते यहूदिया इलाकेरे बड़े लोक ते यरदन दरियारे आसे-पासेरे इलाकन मरां लोक यूहन्नारी गल्लां शूननेरे लेइ तैस कां एइते थिये।

6 ते तैनेई अपने पाप मेन्तां यूहन्ना करां यरदन दरियाए मां बपतिस्मो नीयो।

7 पन जैखन तैनी हेरू कि बड़े फरीसी ते सद्की लोक बपतिस्मो नेनेरे लेइ तैस कां एजने लोरेन, त तैनी तैन सेइं ज़ोवं, “तुस ज़ेहरीले सप्पेरे ज़ेरे बुरे आथ! तुसन केनि ज़ोवं कि, एजनेबाले परमेशेरे कोपे करां नशशा?”

8 सज़ाई करां बच्चनेरे लेइ तैना कम्मां केरा, जैन सेइं पतो लगगे तुसेईं सच्चे पापन करां मन फिरावरोए।

9 ते अपने-अपने दिले मां एन न सोचा कि 'अब्राहम इशो वाजी आए' (परमेशर तुशुशे पाप सिर्फ एल्हेरेलेइ माफ़ न केरेलो कि तुस अब्राहमेरी औलाद आथ), किजोकि अवं तुसन सेइं ज़ोताई कि परमेशर इन घोड़न मरां भी अब्राहमेरे लेइ औलाद पैदा केरि सकते!

10 ते हुन्ना त बुट्टां केरे ज़ीलन पुड़ परमेशरेरो मैक्कुर ख़खोरोए, एल्हेरेलेइ ज़ै कोई तैस बुट्टेरो ज़ेरो भोते, ज़ै रोड़ो फल न दे, तै कटनोए ते अग्गी मां छुड़नोए।

11 अवं त तुसन पैनी सेइं बपतिस्मो देताई किजोकि तुसेईं मनफिरोरोए, पन मसीह ज़ै मेरे बाद एजनेबालोए, तै मीं केरां भी महान आए। अवं त तैसेरो गुलाम भोनेरे काबल भी नई कि तैसेरे बूट छुई। तै तुसन पवित्र आत्माई सेइं ते अग्गी सेइं बपतिस्मो देलो (ज़ैना मन फिरान, तैनन्)।

12 तैसेरू छुज्ज तैसेरे हथ्थे मां आए ते तै खलाइ रोड़ेचारे साफ़ केरेलो*, तै गेहुं अपने कोठारे मां रखेलो, पन झाझी तैस अग्गी मां फुकेलो ज़ै कधे न हिशुशे। (एल्हेरेलेइ पापन करां मनफिराथ नई त परमेशर तुसन सज़ा देलो)।”

ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂ, ⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂ 1:9-11; ⓂⓂⓂⓂ 3:21-22; ⓂⓂⓂⓂⓂⓂ 1:31-34)

13 तैस मौके यीशु गलील इलाके मरां यरदन दरियारे बन्ने पुड़ यूहन्ना कां अव, ताके तैस करां बपतिस्मो ने।

14 पन यूहन्ना, यीशु जो इन ज़ोइतां रोकने लगो, “मीं तीं करां बपतिस्मो नीयोरो लोड़ते, फिरी किजो तू मीं करां बपतिस्मो नेने ओरोस?”

15 पन यीशुए तैस ईं जुवाब दित्तो, “हुनी तू एन्चरे भोने दे, किजोकि †एन्चरे केरतां अस तैन केरतम ज़ैन परमेशर चाते।” तैखन यूहन्ना तैसेरी गल मन्नी।

16 ते यीशु ज़ैखन बपतिस्मो नेइतां पैनी मरां बेइर अव, त तैस मौके हेरा अम्बर खुल्ली ज़ोवं। ते तैनी पवित्र आत्मा कबूतरेरी शकली मां एप्पू पुड़ एइती लाई।

17 ते तैखन हेरा अम्बरे मरां ए आवाज आई (त यीशुएरे बारे मां ज़ोवं), “एन मेरू ट्लारू मट्टू, अवं एस पुड़ बड़ो खुश आई।”

4

ⓂⓂⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂ 1:12-13; ⓂⓂⓂⓂ 4:1-13)

1 तैल्ला पत्ती, पवित्र आत्मा यीशु सुनसान ठैरी मां नीयो, ताके शैतान तैसेरी अज़मैइश केरे।

2 40 दिहाड़े ते 40 रातन किछ न खानेरां पत्ती तैस दलुख लगगी।

3 त तैखन शैताने ज़ैस जो अज़माने वालो भी ज़ोतन, तैस कां एइतां ज़ोवं, “अगर तू परमेशेरू मट्टू आस, त इन घोड़न जो हुक्म देइतां साबत केर, कि एना रोट्टी बनन् ताके तू खेइ सकस।”

4 यीशुए तैस जुवाब दित्तो, “अवं न केरेलो किजोकि परमेशेरी किताबी मां लिखोरूए, मैन्हु सिर्फ रोट्टेईं सेइं ज़ींतो न राए,

बल्के तै हर गल मन्ने सेइं ज़ींतो राते, ज़ै परमेशर ज़ोते।”

5 फिरी शैताने तै पवित्र नगर यरूशलेमे मां नीयो ते मन्देरेरी उच्ची छम्पी पुड़ नेइतां खड़ो कियो।

6 तैखन तैनी यीशु सेइं ज़ोवं, “अगर तू हकीकत मां परमेशेरू मट्टू आस त इट्टां बिछुड़तां साबत केर, किजोकि पवित्रशास्त्रे मां लिखोरूए, तै तेरे लेइ अपने स्वर्गदूतन हुक्म देलो, ते तैना तीं अपने हथ्थन मां टलाले, ताके तेरे पावन केन्ची घोड़न सेइं टोकर न लगगे।”

* 3:12 मतलब, कि परमेशर सारे लोकन इन्साफ़ केरनेरे लेइ त कने जेन्चरे अक किसान गेहुं करां झाझ अलग केरते, तेन्चरे बुरे लोकन करां धर्मी लोकन अलग केरनेरे लेइ तियार आए। † 3:15 मूल भाषाई मां: ज़रूरी आए कि अस सारी धार्मिकता एन्चरे सेइं पूरी केरम

7 यीशुए तैस सेइं ज़ोवं, “(नई, अवं छाल न मारेलो, किजोकि) परमेशेरी किताबी मां एन भी लिखोरूए, तू परभु अपने परमेशे अजमेइतां इन साबत केरनेरी कोशिश न केर कि तै अपने वादे पूरे केरते या नई।”

8 तैखन शैताने, यीशु एक्की बड़े उच्चे पहाड़े पुड़ नीयो, ते तैड़ी दुनियारां सारां राज्जां ते तैन केरि धन दौलत तैस हिराई।

9 तैखन तैनी यीशु सेइं ज़ोवं, “अगर तू मीं कां मथ्यो टेकस ते मेरी आराधना केरस, त अवं इन सब किछ तीं देलो।”

10 यीशुए तैस जो ज़ोवं, “हे शैतान! दूर भो, किजोकि परमेशेरी किताबी मां लिखोरूए, तू सिर्फ परभु अपने परमेशे कां मथ्यो टेक ते तैसेरी आराधना केर!”

11 तैखन शैतान तैस करां ज़लो जेव, ते अकदम किछ स्वर्गदूत यीशु कां एइतां तैसेरी सेवा केरने लगगे।

Matthew 1:14-15; Matthew 4:14-15,31

12 एक्सां केन्चे यीशु जो ज़ोवं, कि यूहन्ना जै बपतिस्मो देनेवालो थियो, कैद कियोरोए त यीशु यहूदिया इलाकेरां, गलील इलाके मां वापस अव।

13 ते नासरत नगर शैरतां कफरनहूम नगरे मां राने लगो, जैन समुन्दरेरे बन्ने पुड़ आए, जैड़ी जबूलून ते कने नप्ताली गोदलेरे लोक राते थिये।

14 ताके तैन वचन जैन यशायाह नेवे ज़ोरू थियूं पूरू भोए, तैनी ज़ोवं,

15 “जैना लोक जबूलून ते नप्ताली गोत्रां केरे इलाके मां आन, जैना गलील समुन्दरेरे नेड़े यरदन दरियारे उस पार, गलील इलाके मां आन, जैड़ी गैर यहूदी लोक भी रातन,

16 (तैना लोक) जैना पापेरे आंधरे मां बिशशोरेन, तेनेई बडडी लौ लई। ते लौ तैन पुड़ चमकी जैना हमेशारे मौतारे आंधरेरे मुलखे मां बिशशोरेन।”

17 तेइसेरू देंतू यीशुए परमेशेरी खबर लोकन शुनानेरी सेवा शुरू की। तैनी लोकन ज़ोवं, “अपने पापन करां मनफिराथ, किजोकि स्वर्गेरू राज नेड़े ओरूए।”

Matthew 1:16-20; Matthew 5:1-11; Matthew 1:35-42

18 एक्सां जैखन यीशु गलील समुन्दरेरे बन्ने ज़लोरो थियो, त तैनी दई मैन्हु लाए जैना मेछली टलानेवाले थिये। तैना मेछली टलानेरे लेइ समुन्दरे मां ज़ाल छेड्डी राओरे थिये। तैन मरां एक्केरू नवं शमोन, जैस जो पतरस भी ज़ोतन, ते तैसेरो दूला ज़ेसेरू नवं अन्दिरयास थियूं।

19 यीशुए तैन सेइं ज़ोवं, “एज्जा मेरे चले बना। अवं तुसन शिखालेलो कि केन्चरां होरे मैन्हु मेरे चले बनानेन।”

20 तैना अकदम अपना ज़ालां छेडतां यीशु पत्ती ज़ले जे।

21 ते तैना तैट्टां थोड़े ज़ेरे अगगर जे, त यीशुए होरे दई दूला, यानी याकूब त कने तैसेरो दूला यूहन्ना अपने बाजी जब्दी सेइं साथी किशती मां लाए। तैना किशती मां ज़ालां ठीक केरने लगगेरे थिये। यीशुए तैना भी कुजाए (कि तैना तैसेरे चले बनन)।

22 ते तैना भी तैखने किशती ते अपने बाजी तैड़ी ज़ेरे छेडतां यीशु सेइं साथी ज़ले जे।

Matthew 6:17-19

23 तैल्ला पत्ती, यीशु सारे गलील इलाके मां हंठतो फिरतो राव । तै तैन केरे परार्थना घरन मां लोकन शिक्षा देतो राव ते परमेशेरे राज्जेरी खुशखबरी शुनातो राव । ते तै लोकां केरि हर किसमेरी बिमैरी ते कमजोरी दूर केरतो राव ।

24 यीशुएरे बारे मां ई खबर सारे सीरिया इलाके मां मुशूर भोइ जेई । एसेरे वजाई सेइं, ज़ैडी कोन्वी तै जेव, तैडी लोक सेब्बी बिमारन ज़ैना हर किसमेरी बिमैरी ते तकलीफन मां फसोरे थिये, ते ज़ैन लोकन पुइ भूतां केरो सायो थियो, ते ज़ैना मिरगरे रोगी थिये, ते ज़ैना अधरंगरे रोगी थिये, तैना यीशु कां आने ते यीशुए तैना सारे बज्झाए ।

25 एसेरे वजाई सेइं मैन्हु केरि बडी भीड़ यीशु पत्ती चली । तैना लोक गलील, दिकापुलिस* इलाकां केरे, यरूशलेम नगरेरे, यहूदिया इलाकेरे, ते यरदन दरियारे पैरी पारेरे इलाकां केरां ओरे थिये ।

5

~~~~~

1 यीशु तैना हच्छे लोक लेइतां एक्की पहैडी पुइ चलो जेव, ते ज़ैखन तै शिखालनेरे लेइ विशशो त तैसेरे चेले तैस कां आए ।

2 तैखन यीशु तैन लोकन शिक्षा देने लगो,

~~~~~  
(~~~~~ 6:20-23)

3 “परमेशर तैन लोकन बरकत देते, ज़ैना ज़ानतन कि तैन परमेशेरी ज़रूते, किजोकि तै तैन पुइ राज़ केरेलो ।

4 परमेशर तैन लोकन बरकत देते, ज़ैना दुखी आन, किजोकि परमेशर तैन तस्सली देलो ।

5 परमेशर तैन लोकन बरकत देते ज़ैना नम्र आन,

किजोकि परमेशर तैन, तैना सैरी बरकतां देलो ज़ैन केरो तैनी वादो कियोरोए ।

6 परमेशर तैन लोकन बरकत देते, ज़ैना परमेशेरी नज़री मां रोडी गल्लां केरनेरी बडी इच्छा रखतन, (जेन्चरे कोई दलुखोरो खाने पीनेरी इच्छा रखते)

तैन परमेशर अपनि मेज़ी पुइ चलनेरे लेइ शक्ति देते ।

7 परमेशर तैन लोकन बरकत देते, ज़ैना दया केरतन, किजोकि परमेशर भी तैन पुइ दया केरेलो ।

8 परमेशर तैन लोकन बरकत देते, ज़ैन केरे मन साफ आन,

किजोकि तैन परमेशर दर्शन देलो ।

9 परमेशर तैन लोकन बरकत देते, ज़ैना शैनतरां कम्मां केरतन,

किजोकि तैन जो परमेशेरे बच्चे जोले ।

10 परमेशर तैन लोकन बरकत देते, ज़ैना परमेशेरी नज़री मां रोडि गल्लां केरनेरे वजाई सेइं सताए गातन,

किजोकि परमेशर तैन पुइ राज़ केरते ।”

11 “परमेशर तुसन बरकत देलो, ज़ैखन लोक तुसन मेरे चेलो भोनेरे वाजाई सेइं तुशशी तुहीन केरन ते स्तान ते झूट जोइतां हर किसमेरी बुरी गल्लां तुशशे बारे मां ज़ोन ।

12 तैखन तुस खुशी रेइयथ ते मघन भोइयथ, किजोकि परमेशेरे ज़ैन इनाम स्वर्गे मां तुशशे लेइ रख्खेरूए तैन बडू बडूए, किजोकि लोकेई बडे पेइले तैना नबी भी एन्चरे सतोर थिये ।”

~~~~~  
(~~~~~ 9:50; ~~~~~ 9:34-35)

\* 4:25 दिकापुलिस: इडी दिकापुलिसेरो मतलब दश नगर ।

13 “तुस इस दुनियारे लोकां केरे लेइ लूनेरे ज़ेरे आथ, पन अगर लूनेरो स्वाद चेलि गाए, त फिरी दुवारां केन्चरे तैसेरो स्वाद वापस आनेले? फिरी तैन कोन्ची कम्मरू न राए, सुवाए बेइरोवं शारनेरां ते लोकां केरे पावेइं सेइं दलेन्चोनेरां।”

14 “तुस इस दुनियारे लोकां केरे लेइ लोअरे ज़ेरे आथ। ज़ैन नगर पहाड़े पुड़ बसते तैन कधे भी छेप्पी न सके।

15 लोक बलतो दीयो हेटी मां न रखन, पन तैस उच्ची ठैरी रखतन ताके धरेरे सैरी मैनन् लौ पुज्जे।

16 ते एन्चरे तुशशी लौ मैन्हु केरे सामने एरी चमके, ताके तैना तुशशां रोडां कम्मां हेरतां तुशशे स्वर्गेरे बाजेरी तारीफ़ केरन।”

~~~~~

17 “एन न बुझथ कि अवं मूसरो कानून या नेबी केरे किताबन मां लिखोरी गल्लां रद केरने ओरोई। अवं तैन रद केरने नई बल्के पूरी केरने ओरोई।

18 किजोकि अवं तुसन सेइं सञ्ज ज़ोताई, कि ज़ां तगर धरती त अम्बर खतम न भोए, तांतगर परमेशेरे कानूने मरां अक मातरा या बिंदी भी न टलेली, ज़ां तगर सब किछ् लिखोरू पूरू न भोए।

19 एल्हेरेलेइ ज़ै कोई इन निकडे करां निकडे हुक्मन मरां केन्ची एक्की ज़ेरे टलोइते ते होरन भी एन्ने केरनू शिखालते, ते स्वर्गेरे राज्जे मां सेब्बन करां निकडो भोलो, पन ज़ै तैन हुक्मन पुड़ अमल केरते ते होरन भी एन हुक्मन पुड़ च़लनेरे बारे मां शिखालते त तै स्वर्गेरे राज्जे मां बड्डो भोलो।

20 किजोकि अवं तुसन सेइं ज़ोताई कि ज़ां तगर तुस शास्त्री ते फरीसी लोकन करां रोडे च़ारे कानूने न मन्नेले, तांतगर तुस स्वर्गेरे राज्जे मां दाखल न भोइ सकतथ।”

~~~~~

21 “तुसेईं शुनेरू थियू कि परमेशेरे इशशे दादे-पड़दादन सेइं ज़ोरू थियू, खून नई केरनो, ते ज़ै खून केरेलो त तैस आदालत सज़ा देली।”

22 पन मेरू ज़ोनू एने कि ज़ै कोई अपने दलाए पुड़ क्रोध केरते, परमेशर तैसेरो इन्साफ़ केरेलो, ते ज़ै कोई अपने दलाए जो निकम्मो ज़ोते त तैस भी महासभा मां जुवाब देनो पेनोए, ते ज़ै कोई अपने दलाए जो ‘बेवकूफ’ ज़ोलो त परमेशर तैस नरकेरे अगारी सज़ा देलो।

23 एल्हेरेलेइ अगर तू अपनि च़दतल मन्दरे मां आनस, ते तैडी तीं याद एज्जे कि मीं अपने दलाए सेइं किछ् गिलोए।

24 त तू अपनि च़दतल बलिदान च़ादनेरि ठैरी पुड़ छेडतां पेइले अपने दलाए सेइं मेल-मलाप केरां, फिरी अपनि च़दतल च़ैदां।

25 अगर कोई मैन्हु तीं पुड़ दाओ केरतां तीं आदालती मां नेनो चाते, त तू बत्तां तैस सेइं मेल-मिलाप केरां न त तैनी तू हाकिमे कां खडो केरनोस, ते तैनी तू सिपैहीएरे हवाले केरनोस ते सिपैहिए तू कैद केरतां छडनोस।

26 अवं तुसन सेइं सञ्ज ज़ोताई कि ज़ां तगर तू पाई-पाई न देलो त तांतगर तैट्टां छुट्टी न सकेलो।”

~~~~~

27 “तुसेईं शुनेरू थियू, कि ई हुक्म दित्तोरी थियो, ‘बदमाशी नई केरनि।’

28 पन अवं तुसन इन भी ज़ोताई कि ज़ै कोई केन्ची कुआन्शी पुड़ गेन्दी नज़रां सेइं तकते, तैनी अपने दिले मां पेइली तैस सेइं बदमाशी केरि छड्डी।

29 अगर तेरी देइनी अछ् तीं पाप केरनेरे लेइ ठोकर खुवाए, त तैस केदतां शार, किजोकि तेरी पूरी जान नरके मां छड्डे गाने करां तेरे लेइ एन्ने रोडूए कि तेरी जानी मरां अक अंग नाश भोए

30 अगर तेरो देइनो हथ तीं पाप केरनेरे लेइ ठोकर खुवाए त तैस केदतां शार, किजोकि तेरी पूरी जान नरकेरी अग्गी मां गाने करां तेरे लेइ एन्ने रोडूए कि तेरी जानी मरां अक अंग नाश भोए।”

॥॥॥॥ ॥॥॥॥॥॥॥॥ ॥॥॥॥ ॥॥ ॥॥॥॥॥॥ ॥॥॥॥॥
(॥॥॥॥ 19:9; ॥॥॥॥ 10:11-12; ॥॥॥॥ 16:18)

31 “एन भी ज़ोरू थियूं, ज़ै कोई अपनि कुआन्श शारे त एन ज़रूरीए कि फारख्ती लिखतां हावाले केरे।”

32 पन अवं तुसन सेइं ज़ोताई, कि ज़ै कोई अपने कुआन्शी बदमैशरे अलावा होरि केन्ची गल्लीन पुड़ फारख्ती दे, त तैस केरां बदमैशी केरवाते। ते ज़ै कोई तैस शैरोरी कुआन्शी सेइं ड़ला बनाते, त तै भी तैस सेइं बदमाशी केरते।”

॥॥॥॥ ॥॥ ॥॥॥॥॥॥॥ ॥॥॥॥ ॥॥ ॥॥॥॥॥॥ ॥॥॥॥

33 “तुसेईं शुनोरू, कि ईं हुकम दित्तोरो थियो, झूठी कसम नईं केरनि, पन कसम प्रभुएरे लेइ पूरी केरथ।”

34 पन अवं तुसन सेइं ज़ोताई कि कधे कसम न केरथ, न स्वर्गेरी, किजोकि तै परमेशरेरो तखत आए।

35 न ज़मीनारी किजोकि परमेशर तैड़ी पाव रखते, ते न यरूशलेम नगरेरी किजोकि तैन महा राजां करू नगर आए।

36 ते न अपने दोगेरी कसम केरथ, किजोकि तुस अपनो अक बाल भी छित्तो या कालो न केरि सकतथ।

37 पन हांएरी ठैरी हाँ ते नाएरी ठैरी न ज़ोथ, किजोकि ज़ैन किछ एस करां जादे तैन बुरैईं यानी शैतानेरे पासेरां आए।”

॥॥॥॥ ॥॥॥॥॥ ॥॥॥॥ ॥॥ ॥॥॥॥ ॥॥॥॥॥॥॥ ॥॥॥॥
(॥॥॥॥ 6:29-30)

38 “तुसेईं शुनोरूए, कि मूसेरे कानूने मां लिखोरूए, कि अछ्छरे बदले अछ्छ ते दंतरे बदले दंत।

39 पन अवं तुसन सेइं ज़ोताई कि, बुरे मैन्हु करां बदलो न नेइयथ। अगर कोई तेरे देइनी खैखोड़ी पुड़ थप्पड़ बालो त तू बाएं पासो भी तैसेरे पासे रेख्वां।

40 ते अगर कोई मुकदमो केरतां तेरी कमीज़ नेनी चाए त तू कोट भी तैसेरे हवाले केरां।

41 ते अगर कोई सिपाई तीं भारो छूने अक मील नेने चाए त तू दूईं मील गेइयां।

42 ज़ै कोई तीं करां किछ मग्गे, तैस दे। ते ज़ै कोई तीं करां ओधार मग्गे त तुत्तर न फिरेइयां।”

॥॥॥॥॥॥॥ ॥॥॥॥ ॥॥॥॥॥ ॥॥॥॥॥॥॥॥ ॥॥॥॥ ॥॥ ॥॥॥॥॥॥॥
(॥॥॥॥ 6:27-28,32-36)

43 “तुसेईं शुनोरूए, कि मूसेरे कानूने मां लिखोरूए, कि ‘अपने पड़ोसी सेइं अपनो ज़ेरो प्यार केरथ ते दुश्मने सेइं वैर रेखथ।’

44 पन अवं तुसन सेइं ज़ोताई, कि अपने दुश्मन सेइं प्यार केरा, ते ज़ैना तुसन सतातन तैन केरे लेइ प्रार्थना केरा।

45 ज़ैस सेइं तुस अपने स्वर्गेरे बाजी केरे बच्चे बेनि सकतथ, ज़ै अपनो दिहाड़ो अपने रोड़े लोकन पुड़ चमकाते ते बुरे लोकन पुड़ भी, ते धेर्मी लोकन पुड़ झड़ो देते ते बुरे लोकन पुड़ भी।

46 किजोकि अगर तुस तैन्ने लोकन सेइं प्यार केरथ ज़ैना तुसन सेइं प्यार केरतन त तुसन कुन इनाम मैलेलू? कुन चुंगी धिन्ने बाले भी एन्ने न केरन?”

47 “ते अगर तुस सिर्फ अपने दूलान जो नमस्कार ज़ोथ, त तुस होरन करां जादे कुन केरतथ? कुन गैर कौमां केरे लोक ज़ैना परमेशरेरे कानूने न मनन् तैना भी एरू न केरन?

48 तुसन तैन लोकन सेइं प्यार केनेरी ज़रूरत आए, ज़ैना तुसन सेइं प्यार न केरन, एन्चरां तुस सिद्ध भोले ज़ेन्चरे स्वर्गे मां रानेबालो तुप्रशो बाजी सिद्ध आए।”

6

॥॥॥॥॥॥॥॥ ॥॥॥॥ ॥॥॥॥॥॥॥॥॥ ॥॥॥॥ ॥॥ ॥॥॥॥॥॥॥ ॥॥॥॥॥॥॥ ॥॥॥॥

19 “एप्पू जेई धरती पुड दौलत अकोट्टी न केरा, ज़ैडी कीडे खातन ते मौरच्चो लेगतां नाश करते, ते चोर तुशू घर टलोडतां चोरी करतन।

20 बल्के रोडू करतां अपने लेइ स्वर्गे मां दौलत अकोट्टी केरा ज़ैडी न कीडो लगगे, ते न मोरच्चो लगगे ते न चोर चोरी केरेले।

21 किजोकि ज़ैडी तेरी दौलत भोली, तैडी तेरो दिल भी लगगेलो।”

ॐॐॐ ॐॐॐॐ ॐॐ ॐॐ

(ॐॐॐ 11:34-36)

22 “अच्छ जानेरे लेइ दीयेरी ज़ेरि आए, एल्हेरेलेइ अगर तेरी अच्छ रोडी साफ आए, त तेरी सारी जान लौ भोली।

23 अगर तेरी अच्छ खराब आए, त सारी जानी मां आंधरू भोलू। बस अगर ज़ै लौ तीं मां आए तै आंधरू बेनि गाए, त तैन केतरू आंधरू भोलू!”

ॐॐॐॐॐॐॐ ॐॐॐ ॐॐॐ ॐ ॐॐॐॐॐ ॐॐॐॐॐ ॐॐॐॐॐ ॐ ॐॐॐॐ

(ॐॐॐ 16:13; 12:22-31)

24 “कोई मैन्हु दूई मालिकां केरि सेवा एक्की वक्ते मां न केरि सके। न त एक्की सेइं दुश्मनी केरेलो ते होरि सेइं प्यार केरेलो, या एक्केरो बेनतां रालो त होरि न सुखालो। तुस परमेशेरी ते दौलतरी, दुइयां केरि सेवा न केरि सकतथ।

25 एल्हेरेलेइ अवं तुसन सेइं ज़ोताई, कि तुस अपने जिन्दगरी ज़रूरतां केरे लेइ फिक्र न केरा, कि तुस कुन खाले या कुन पीले, ते न अपने जानारी कि कुन लामेले। कुन प्राण रोट्टी करां ते जान लिगडे करां बेधतां नई!”

26 “अम्बेरे चुडोल्लन हेरा! तैना न किछ बेन, ते न किछ कट्टन, ते न अकोट्टे करतां रखन, फिरी भी तुशुओ स्वर्गेरो बाजी तैन खाने जो देते ते तैन केरि हेरगेश करते। कुन तुशुशी कदर तैन करां जादे नई?”

27 तुसन मां एरो कौन आए, ज़ै फिक्र करतां अपनि उमर अक घडी भी बधैई सकते?”

28 “ते लिगडेरे लेइ किजो फिक्र करतथ? जंगले मां सोसनेरां फूडू हेरा कि तैना केन्चरे बेडोतन, न तैना मेहनत केरन, ते न तैना लिगडां बनान।

29 फिर भी अवं तुसन सेइं ज़ोताई कि राज़ो सुलैमाने भी अपने सारे धन दौलतरे वावजूद भी तैन केरां ज़ेरां लिगडां न लां।

30 एल्हेरेलेइ ज़ैखन परमेशर मैइदानेरो घास, ज़ै अज आए ते कालां लौवने मां फुकनोए, एरी खूबसूरती देते, त हे घट विश्वासे बाले लोकव, कुन तै तुसन लिगड न देलो?

31 एल्हेरेलेइ तुस फिक्र करतां एन न जोइयथ, कि कुन खामेले, या कुन पीमेले, या कुन लामेले?”

32 किजोकि गैर कौमां एन गल्लां केरि फिक्री मां रइचन। ते तुशुओ स्वर्गेरो बाजी ज़ानते, कि तुसन कोनां-कोनां चीजां केरि ज़रूरत आए। एल्हेरेलेइ तुस कोन्ची चीजरी फिक्र न केरा।

33 पन पेडले तुस अपने आपे परमेशेरे राज़ेरे लेइ अर्पण केरा, ते तैन कम केरा ज़ैन परमेशेरी नज़री मां रोडू भोते, त इना सैरी चीजां भी तुसन मैल्ली गैली।

34 एल्हेरेलेइ कालेरे बारे मां फिक्र न केरथ, किजोकि कालेरी दिहाडी अपने लेइ एप्पू फिक्र आनेली। अज्जेरे लेइ अज़ेरो दुख सुद्धोए।”

7

ॐॐॐ ॐॐॐ ॐॐ ॐॐ ॐॐॐ

(ॐॐॐ 6:37-38,41-42)

1 “केन्ची पुड दोष न लेइयथ, तुसन भी दोष न लगगेलो।

2 किजोकि ज़ेन्चरे तुस होरि पुड दोष लाएले, तेन्चरे परमेशर भी तुशुओ इन्साफ केरेलो। ज़ेन्चरे तुस होरि लोकन सेइं बर्ताव करतथ, तेन्चरे परमेशर तुसन सेइं बर्ताव केरेलो।”

3 “तू अपने ढलाएरी एच्छी मां कूडो किजो तकतां, पन तेरी एच्छी मां त नग आए, ते तैसेरो तू खियाल भी न केरस?

4 ज़द तेरी एच्छी मां नग आए, त तू कौस ऐशी सेइं अपने ढलाए जो ज़ोई सकतां कि, 'एई, अवं तेरी एच्छी मरां कूडो केडडी!' ”

5 हे पाखंडी! पेडले अपने एच्छी मरां नग कढ, ते फिरी अपने ढलाएरी एच्छी मरां रोडे चारे तेकतां कूडो केडडी सकतस ।”

6 “जैना लोक परमेशेरे वचन शन्नू न चान, तैन न शुनाथ । अगर तुस एन्चरे केरेले, त पवित्र चीज़ कुतरन कां छडनेरे बराबर ते कने मोती सूरन कां छडनेरे बराबर भोले, कि तैना तैन पव्वन हैठ इलन्चन ते वेदलोइतां तुसन पुड हमलो केरेले ।”

~~~~~

(~~~~~ 11:9-13)

7 “परमेशेरे करां मग्गा, त तुसन दितू गालू । ते तोप्पा, त तुसन मैल्ली गालू । ते दार गुडकाथ, त तुशशे लेइ खोल्लू गालू ।

8 किजोकि ज़ै कोई मगते तै हासिल केरते, ते ज़ै कोई तोपते तैस मैल्ली गाते, ते ज़ै कोई दार गुडकाते त तैसेरेलेइ खोल्लू गालू ।

9 तुसन मां एरो कौन आए, कि अगर तैसेरू मट्ठू रोट्टी मग्गे, त तै तैस घोड दे?

10 या अगर मच्छली मग्गे, त तैस सप दे?

11 ते तुस बुरे भोनेरे वावजूद भी अपने मट्ठन रोडी चीज़ां देनी ज्ञानतथ, त तुशशो स्वर्गेरो बाजी तुसन रोडी चीज़ां कि न देलो, ज़ैना तैस करां मगतन?

12 ज़ेरू तुस चातथ कि लोक तुसन सेइं केरन, तुस भी तैन सेइं तेरहु केरा, किजोकि मूसेरे कानूनेरी त कने नेबी केरि लिखोरी शिक्षा ईए आए ।”

~~~~~

(~~~~~ 13:24)

13 “तुस परमेशेरे राज़े मां सिर्फ सुन्कडे दारेरां वत्तां गेइ सकतथ । किजोकि तैन दार चौडू, ते तै बत बडी खुल्ली आए ज़ै नाशेरे पासे गाचे, ते तैस वत्तां गानेबाले बडे आन ।

14 किजोकि तैन दार सोंकडू आए, ते तै बत असुखती आए, ज़ै हमेशेरे जिन्दगरे पासे गाचे, ते तेरहां गानेबाले थोडे आन ।”

~~~~~

(~~~~~ 6:43-44,46; 13:25-27)

15 “झूटे नेबन करां खबरदार रेइयथ, ज़ैना तुसन कां भैडडां केरे रूपे मां एइतन पन असली मां तैना मारने वालां गिदां भोतन ।

16 तुस तैन केरे कम्मन सेइं तैन पिशानेले, कुन लोक झल्लन सैहीयेरां दाछ कढतन ते करेरी सैहीयेरां फैगू टलोइतन?

17 एन्हेरेलेइ हर एककी रोडे बुट्टे रोडो फल लगते, ते हर एककी बुरे बुट्टे बुरो फल लगते ।

18 रोडे बुट्टे बुरो फल न लगगे, ते न बुरे बुट्टे रोडो फल लगगे ।

19 ते ज़ैस बुट्टे रोडो फल न लगगे तै केटतां अग्गी मां फुकतां छडतन, तेन्चरे झूटे नेबन भी सज़ा मैलेली ।

20 बस्सा, तुस तैन केरे कम्मन सेइं तैन पिशानेले ।”

21 ‘मीजो, हे प्रभु, हे प्रभु,’ ज़ोनेबाले सारे मैन्हू स्वर्गेरे राज़े मां दाखल न भोले, पन ज़ै, मेरे स्वर्गेरे बाजी केरे मेज़ीं पुड च़लने बालोए तै ज़रूर दाखल भोले ।

22 इन्साफेरे दिहाड़ी बड़े लोक मीं सेइं ज़ोले कि, 'हे प्रभु, हे प्रभु,' कुन असेईं तेरे नंव्वे सेइं भविष्यवाणी नईं कियोरी? ते तेरे नंव्वे सेइं भूतां नईं कढोरां ते तेरे नंव्वे सेइं बड़े चमत्कार नईं हेरेवरे?

23 तैखन अवं तैन जो साफ ज़ोलो, 'अवं तुसन कधे न ज़ैनी, ओ बुरां कम्मां केरने बालाव, मेरे तुत्तर अगरां दूर भोध।' ”

**ॐ ॐॐॐॐ ॐॐॐ ॐॐॐ ॐॐॐॐॐ, ॐॐॐॐॐॐॐ ॐॐ ॐॐॐॐॐॐॐ**  
(ॐॐॐॐ 6:47-49)

24 “एल्हेरेलेइ ज़ै मेरी गल्लां शुनते ते तैन पुइ अमल केरते त तै तैस अक्लमन्द मैनेरो ज़ेरो भोलो, ज़ैनी अपनू घर शफड़ी पुइ बनेवरुए।

25 झड़ी लगगी ते हड़ाई आईं ते अंधगुबारी भोइ ते तैस घरे पुइ पुज़ी, पन तैन घर न डुल्लू, किजोकि तैसेरी मुनीयाद पेक्की शफड़ी पुइ कढोरी थी।

26 पन ज़ै मेरी गल्लां शुनते ते तैन पुइ अमल न केरे, त तै तैस बेवकूफ मैनेरो ज़ेरोए भोलो, ज़ैनी अपनू घर रेती पुइ बनेवरु थियूं।

27 झड़ी लगगी ते हड़ाई आईं अंधगुबारी भोइ ते तैस घरे कां पुज़ी ते तैन घर डुल्ली ज़ोवं ते बरवाद भोवं।”

28 ज़ैखन यीशुए एना सैरी गल्लां शुनेइतां झैड़ी, त सारे लोक तैसेरी शिक्षा शुन्तां हैरान भोए।

29 किजोकि यीशु तैन शास्त्री लोकां केरि ज़ेरि नईं, बल्के अधिकारे सेइं शिक्षा देतो थियो।

## 8

**ॐॐॐ ॐॐॐॐॐ**  
(ॐॐॐॐ 1:40-45; ॐॐॐॐ 5:12-16)

1 ज़ैखन तै पहैड़ी पुड़ां उन्डो अव, त बड़े लोक तैस पत्पती च़ले।

2 तैखन एक्की कोढ़े यीशु कां ज़ैन्धु केरे भारे विशतां तैस कां मिन्नत केरतां ज़ोवं, “हे प्रभु अगर तू चास त मेरू कोढ़ बज्झेईं सकतस।”

3 यीशुए तैस पुइ हथ रेखतां ज़ोवं, “अवं चाताईं, तू बज्झेस।” ते तै कोढ़ी तैखने साफ भोइ जेव।

4 यीशुए तैस सेइं ज़ोवं, “हेर, एस गल्लेरे बारे मां केन्ची सेइं किछ न ज़ोइयां। बल्के अपनो आप याजक हिरा। तैल्ला पत्ती, तू अपने बेज्झेनेरे वजाई सेइं च़ढतल च़ाद, ज़ेसेरे बारे मां मूसा नेबे कानूने मां हुक्म दित्तोरोए, ताके लोकन पतो च़ले कि तू बेज्झेरोस।”

**ॐॐॐॐ ॐॐॐॐॐॐॐॐॐ ॐॐॐॐ ॐॐॐ ॐॐॐॐॐॐॐ**  
(ॐॐॐॐ 7:1-10)

5 ज़ैखन यीशु कफरनहूम नगर मां अव त अक रोमी सूबेदार ज़ै 100 सिपेहिन केरो अफसर थियो, तैनी यीशु कां एइतां बिनती की।

6 “हे प्रभु, मेरो नौकर अधरंगेरो मरीज़ घरे बिमार भोरोए, तै च़लनेरे काबल नईं, ते तै बेड़ि तकलीफी मां आए।”

7 तैनी तैस सेइं ज़ोवं, “अवं एज्जेलो ते तैस बज्झेइलो।”

8 सूबेदार\* ज़ोने लगो, हे प्रभु अवं एस काबल नईं कि तू मेरे घरे मां एज्जी सकस; पन तू अगर सिर्फ़ ज़वाना सेइं ज़ोस त मेरो नौकर बेज्झेलो।

9 किजोकि अवं भी केन्चेरे अधिकारे मां कम केरताईं, ते सिपाही मेरे अधीन आन, ते ज़ैखन एक्की जो ज़ोताईं कि गा, त तै गाते ते होरि जो ज़ोतां एईं, त तै एइते, ते अपने सेवके जो ज़ोताईं इन कम केर त तै केरते।

\* 8:8 सूबेदार: ए यहूदी नईं थियो एल्हेरेलेइ तै ज़ोने लगगोरो थियो अवं इस काबल नईं।

10 यीशु एन शुन्तां हैरान रेइ जेव, ते एप्पू पत्ती च़लने वाले मैनन सेइं ज़ोने लगगे, “अवं तुसन सेइं सन्न ज़ोताई, कि मीं इस्राएल मुलखे मां इस गैर यहूदी मैनेरो ज़ेरो मैन्हु नईं लोवरो ज़ै मीं पुइ एतुरो विश्वास केरे।”

11 अवं तुसन सेइं ज़ोताई कि बडे गैर कौमां केरे लोक पूर्वरां ते पछ्मेरां एइतां अब्राहमे, इसहाक ते याकूबे सेइं साथी परमेशेरे राज़ेरी धामी मां शामिल भोले।

12 पन इस्राएली लोक बेइर आंधरे मां छ़ड्डे गाले ज़ैड़ी तैना लेरां देते ते दंत च़ापते राले।

13 ते यीशुए तैस सूबेदारे सेइं ज़ोवं, “घरे जो गा, ज़ेरो तेरो विश्वासे तेरे लेइ तेरहु भोलू,” ते तैखने तैसेरो नौकर बेज्झोइ जेव।

ⓂⓂⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 1:29-34; ⓂⓂⓂⓂⓂ 4:38-41)

14 ज़ैखन यीशु पतरसेरे घरे जेव, त तैनी हेरू, कि पतरसेरी शिखी बड़ो भुखारे, ते तै लेटोरी थी।

15 तैनी तैसारा हथ टलातो ते अकदम तैसारा भुखार उतरी जेव, ते तै खड़ी उट्टतां तैसेरी सेवा केरने लगगी।

16 ज़ैखन इलोझ भोइ त लोकेईं बडे बिमार, ज़ैन पुइ भूतां केरो सायो थियो तैस कां आने, ते तैनी तैना भूतां अपने वचने सेइं कढां, ते सारे बिमार बज्झाए।

17 ताके यशायाह नेबेरी ज़ोरी तै गल पूरी भोए कि, “तैनी एप्पू इश्शी कमज़ोरी हटेइ ते इश्शी बिमैरी भी मुकेइ।”

ⓂⓂⓂⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 9:57-62)

18 यीशुए अपने च़ेवरे पासन मैन्हु केरि भीइ लेइतां अपने चलन, गलील समुन्दरे पार गानेरो हुक्म दित्तो।

19 ज़ैखन तैना पार गानेरी तियारी केरने लगगे, त तैखन अक शास्त्री मैन्हु तैस कां एइतां ज़ोने लगगे, “गुरू, तू ज़ेरहां भी गालो त अवं तीं पत्ती च़ललेलो।”

20 यीशुए तैस जो ज़ोवं, “लौई केरि कूढां, ते अम्बेरेरे चुड़ोल्लू केरे आले भोतन, पन मैनेरे मट्टे यानी मीं कां कोई ठार नईं ज़ैड़ी अवं झुल्लनी सेक्खी।”

21 चलन मरां एक्के होरे तैस सेइं ज़ोवं, “हे प्रभु, मीं घरे गानेरी अज़ाज़त दे, मेरे बाजेरे मरनेरां बाद अवं तैस देवतां एज्जेलो ते फिरी तीं पत्ती च़ललेलो।”

22 यीशुए तैस जो ज़ोवं, “तू मेरो चेलो वन ते मीं पत्ती च़ल, ते ज़ैना लोक आत्मिक तरीके सेइं मरेंन तैन अपने मैन्हु मरने बलगने दे।”

ⓂⓂⓂⓂ ⓂⓂⓂⓂⓂ ⓂⓂⓂⓂⓂ

(ⓂⓂⓂⓂⓂ 4:35-41; ⓂⓂⓂⓂⓂ 8:22-25)

23 ज़ैखन यीशु किशती मां च़ढो त तैसेरे चले भी तैस सेइं साथी च़ले।

24 ते अचानक समुन्दरे मां अक बड़ो तूफान अव ते किशती छ़लहेईं सेइं छ़पने लगगी ते यीशु तैस मां झुल्लोरो थियो।

25 तैखन चलेईं ते बीझेइतां तैस सेइं ज़ोवं, “हे प्रभु, असन बच़ा! अस त डुबने लोरेम!”

26 तैनी तैन सेइं ज़ोवं, “हे घट विश्वासे बालाव, तुस किजो डरतथ?” तैखन तैनी खडे उट्टतां तूफान त समुन्दर डांटो, तैखने तूफान रुकी जेव त समुन्दर बडे शांत भोव।

27 लोक हैरान भोइतां ज़ोने लगगे, “ए मैन्हु कौन आए कि तूफान त समुन्दर भी एसेरो हुक्म मन्तन!”

ⓂⓂⓂ ⓂⓂⓂⓂⓂⓂⓂ ⓂⓂⓂ ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂⓂⓂⓂⓂⓂⓂⓂ

(ⓂⓂⓂⓂⓂ 5:1-20; ⓂⓂⓂⓂⓂ 8:26-39)



28. जैखन तै गलील समुन्दरेरे पार, गिरासेनी इलाके मां पुजो, त दई मैन्हु जैन पुड़ भूतां केरो सैयो थियो कवरन मांमेइं यीशु कां मिलने आए। तैना एतरे निग्गर थिये, कि कोई भी तैस बत्तां निस्सी न थियो बटतो।

29. तैना ज़ोर-ज़ोरे चिन्डां मारने लगगे ते ज़ोने लगगे, हे परमेशेरा मट्टां, तीं असन सेइं कुन कम्मे? कुन तू वक्ते करां पेइले असन नरके मां छुडने ओरोस?

30. तैन केरां दूर सूरां केरो अक बड़ो धान चरने लोरो थियो।

31. भूतेईं यीशु कां मिनत केरतां ज़ोवं, “अगर तू असन कढने चातस त उन सूरां केरे धाने मांजो भेज्ज।”

32. तैखन यीशुए ज़ोवं, “गाथ,” तैना भूतां तैट्टां निस्तां तैन सूरां केरे धाने मां जेआं, ते सूरां केरो सारो धान उछुडतो-उछुडतो डैल्ले मां गेइतां सारे सूर मेरि जे।

33. तैखन सूरां केरे चारनेबालेईं एन हेरू, त तैना डेरि जे, ते तैनेईं नगरेरे लोकन सेइं सारो बिस्तार दित्तो, ते ज़ैन पुड़ भूतां केरो सैयो थियो तैन केरो हाल भी शुनाव।

34. तैस नगरेरे सारे लोक यीशु सेइं मिलनेरे लेइ आए ते यीशु लेइतां लोक मिनत केरतां ज़ोने लगगे, इशे इलाके मरां चलो गा।

## 9

~~~~~  
 (~~~~~ 2:1-12; ~~~~~ 5:17-26)

1. फिरी यीशु किशती मां च्चेदतां दरियाए पार जो जेव, ते अपने नगर मां अव।

2. ते हेरा, किछु मैनेईं अक अधरंगी मैन्हु खट्टी पुड़ छुइतां तैस कां आनो, जैखन यीशुए तैन केरो विश्वास हेरो, त तैस अधरंगी मैन्हु जो ज़ोवं, “मट्टा, गा हिम्मत रख, तेरे पाप माफ़ भोए।”

3. एस गल्ली पुड़ किछु शास्त्री एप्पू मांमेइं ज़ोने लगगे, “ए त परमेशेरी तुहीन केरते!”

4. यीशुए तैन केरि मनेरी गल्लां बुझतां तैन जो ज़ोवं, “तुस अपने-अपने मने मां एन्चरां किजो सोचने लगगेरेथ?

5. एन ज़ोनू कुन सुखतुए कि गा ‘तेरे पाप माफ़ भोए,’ या एन ज़ोनू कि ‘उठ, ते च़ल फिर?’

6. पन अवं किछु करनेबालोईं, ज़ैस सेइं तुसेईं बुझनूए कि मैनेरे मट्टे (यानी मीं) धेरती पुड़ लोकां केरे पाप माफ़ केनेरो अधिकार आए। तैखन तैनी तैस अधरंगी मैन्हु जो ज़ोवं, “अपनि खट छुइतां अपने घरजो च़लो गा।”

7. ते अधरंगी मैन्हु तैखने अपनि खट छुइतां घरजो च़लो जेव।

8. लोक एन हेरतां डेरि जे ते परमेशेरी बड़याईं केने लगगे, कि ज़ैनी मैन्हु एतरो अधिकार दित्तोरोए।

~~~~~  
 (~~~~~ 2:13-17; ~~~~~ 5:27-32)

9. ज़ैखन यीशु तैट्टां अग्रोवं च़लो त तैनी अक मत्ती नंखेरो मैन्हु, चुंगी नेनेबालो दफ़तेरे मां विश्शोरो लाव, ते यीशुए तैस जो ज़ोवं, “तू मीं पत्ती च़ल।” तै तैखने यीशु पत्ती च़लो।

10. ते ज़ैखन यीशु अपने च़ेलेरे घरे गेइतां रोट्टी खाने विश्शो ज़ेसेरू नवं मत्ती थियू, त बड़े चुंगी नेनेबाले ते पापी मैन्हु\* भी आए ते यीशु त तैसेरे चलन सेइं साथी रोट्टी खाने विश्शे।

11. ज़ैखन फरीसी लोकेईं एन हेरू, त तैनेईं तैसेरे चलन पुच्छू, “तुशो गुरू चुंगी धिन्ने बाले ते पैपी लोकन सेइं साथी रोट्टी किजो खाते?”

12. एन शुन्तां यीशुए तैन मिसाल देइतां ज़ोवं, “सझर लोकन डाक्टरेरी ज़रूरत न भोए, पन बिमारन भोचें।”

\* 9:10 पापी मैन्हु: लोक तैन केरे बारे मां सोचते थी कि एना पापिन।



???? ? ? ? ? ? ? ? ? ? ?

32 जैखन तैना बेइर चलोरोर थिये, त लोकेई अक मैन्हु जै गल्लां न थियो केरि बटतो, किजोकि तैस पुइ भूतेरो सैयो थियो, तै तैनेई यीशु कां आनो ।

33 ते जैखन भूतेरो सैयो तैस मेरां कढो, त लट्टो गल्लां केरने लगो, लोक बडे हैरान भोइजेइ ते जोने लगगे, असेई एरो जेरो माजरो इस्राएले मां पेइले कधे नई लाहोरो ।

34 पन फरीसी लोक जोने लगगे, “ए त भूतां केरे गुरेरी मदी सेइं भूतां कढते ।”

?? ? ? ? ? ? ? ? ? ? ?

35 यीशु त कने तैसेरे चले गलील इलाकेरे इलोव्वन ते नगरन मां ते प्रार्थना घरन मां जे । ते तै शिक्षा देतो राव, ते परमेशेरेरे राज्जेरी खुशखबरी शुनातो राव, ते लोकां केरि हर किसमेरी बिमारी ते कमजोरी दूर केरतो राव ।

36 जैखन तैनी बडे लोक लाए ए तैस तैन लोकन पुइ बडो तरस अव, किजोकि तैना तैन भैड्डां केरे जेरे थिये जैन केरो कोई पुहाल न भोए, तैन केरो बडो बुरो हाल थियो ते तैना टेपलोरे थिये ।

37 तैखन यीशुए अपने चलन सेइं ज़ोवं, “पकोरी फसलरे जेरे बडे लोक तियार आन जैना परमेशेरेरे वचने पुइ विश्वास केरनू चातन, पन कम केरनेवाले थोडे आन जैना तैन परमेशेरे राज्जेरे बारे मां जोन ।

38 एल्हेरेलेइ तुस फसलरे मालिके कां प्रार्थना केरा कि तै जादे कम केरनेवाले भेजे, कि तैना लोकन परमेशेरेरे राज्जेरे बारे मां जोन ।”

## 10

?????? 12 ???? ?

(?????? 3:13-19; ???? 6:12-16)

1 फिरी यीशुए अपने 12 चले एप्पू कां कुजाए, ते तैन भूतां केरो सैयो कढनेरो ते हर बिमारी ते तकलीफ दूर केरनेरो अधिकार दित्तो ।

2 12 परेरितां केरां नव्वां इना आन, शमौन जैस जो पतरस ज़ोतन ते तैसेरो दूला अन्दरयास, जब्दरू मट्टू याकूब ते कने तैसेरो दूला यूहन्ना,

3 फिलिप्पुस, बरतुल्मै, थोमा, ते मत्ती चुंगी घिन्ने वालो, हलफईरू मट्टू याकूब, ते तदै ।

4 शमौन कनानी, ते यहूदा इस्करियोती जैनी ते दलुवेवरो भी थियो ।

12 ???? ? ? ? ? ? ? ? ? ? ?

(?????? 6:7-13; ???? 9:1-6; 10:4-12)

5 एन 12 यीशुए एन ज़ोइतां भेजे, “गैर कौमां केरे पासे न गेइयथ, ते कने सामरी लोकां केरे केन्वी नगर मां न गेइयथ ।

6 बल्के इस्राएलेरे घरानेरी हेरोरि भैड्डन कां गेइयथ ।

7 ते चलते-चलते, एन ज़ोते गेइयथ कि स्वर्गेरू राज नडे ओरूए ।

8 बिमारन बज्जेइयथ, मुइदन जीते केरथ, कोदी केरू कोद साफ केरथ, ते भूतां केरो सैयो केदथ, तुसन एन सब किछ मुफ्त मैलोए ते मुफ्त देइयथ ।

9 ते साथी सोन्नु, चाँदी ते पेंडसे न रेखथ ।

10 ते न बत्तारे लेइ झोलो नेइयथ ते न दूई-दूई लिगडां, ते न बूट ते न सोटी, किजोकि मज्जदूर अपनि मज्जदूरारो हकदार भोते ।”

11 “जैखन तुस केन्वी नगर या इलोव्वे मां गाथ त तुस एरे मैनेरो पतो केरथ, कि कौन अतबारेरे काबल? तैट्टां ज़ां तगर गानेरो वक्त न एज्जे त तांतगर तैडी तैस्से कां रेइयथ ।

12 ते घरे मां अन्तर गांते बार तैन जो शान्ति देइयथ ।”

13 “अगर तैन घर तुशशे काबल भोलू त शान्ति पुज्जेली, ते अगर तैन घर तुशशे काबल न भोलू त तुशशी शान्ति तुसन पुइ वापस एज्जेली ।

14 जै तुसन कबूल न केरे ते तुशशी गल न मन्ने त तैस घरे या नगर मरां बेइरोवं गांते वार अपने पावां केरि धूड तैडी झैइथ ।”

15 “अवं तुसन सेइं सन्न जोताई कि इन्साफेरे दिहाडे तैस नगरेरो हाल सदोम ते अमोरा नगरां केरे हाले करां भी जादे बुरो भोलो ।”

????????????????

(???? 13:9-13; ???? 21:12-17)

16 “हेरा, अवं तुसन भैइडां केरे गिदन मां भेजने लोरोई, एल्हेरेलेइ तुस सप्पां केरे जेरे हुशार ते कबूतरां केरे जेरे सादे बनथ ।

17 मैन्न करां हुशार रेइयथ तैना तुसन ट्लेइतां सभान मां पैश केरेले ते प्रार्थना घरन मां तुसन कोडां केरि मार दुवाले ।

18 ते तुसन मेरी वजाई सेइं गवर्नरन ते कने राजन कां हाज्र केरेले, ताके तुस तैन मां ते गैर कौमन मां मेरे गवाह बनथ ।

19 पन जैखन तैना ट्लेवेइतां हावाले केरेले, त तुस फिकर न केरथ, कि अस कुन जोमेले ते केन्त्रे जोमेले, किजोकि जैन किछ ज़ोनू भोलू तैखने अवं तुसन जोइलो ।

20 किजोकि जोने बाले तुस नई, बल्के पवित् आत्मा भोलो जै तुशशे स्वर्गेरे वाजी परमेशेरे तरफां आए ।”

21 “दूला, दूलाए ते वाजी मट्टे मारनेरे लेइ सॉफेले, ते मट्टां अपने अम्मा वाजी केरे खलाफ भोइतां तैन माराले ।

22 मेरे नंवेरो वजाई सेइं सब लोक तुसन सेइं वैर केरेले, पन जै आखरी तगर वरदाशत केरेलो तैस्से मुक्ति मैलेली ।

23 जैखन लोक तुसन एककी नगर मां सताले, त होरि नगर मांजो नेशशी गेइयथ, अवं तुसन सेइं सन्न जोताई कि एस करां पेइले तुस इस्राएलेरे सैरी नगरन मां तुशशू सफर पूरू न भोलू, त अवं मैनेरू मट्टू एज्जी गालू ।”

24 “चेलो अपने गुरू करां बड्डो न भोए, ते न नौकर अपने मालिके करां ।

25 चेलेरे लेइ त एन्ने बड्डुए कि तै अपने गुरेरो जेरो भोए, ते नौकरेरे लेइ एन्ने बड्डुए कि तै अपने मालिकेरे बराबर भोए, अगर तैनेई मालिके जो शैतान ज़ोवं, त तैसेरे घरेबालन जो केतूरू ज़ोनूए !”

???? ???? ???? ???? ???? ???? ?

(???? 12:2-7)

26 “तुस तैन करां न डेरथ, किजोकि कोई चीज छप्पोरी नई, जै खोल्ली न गाली, ते कोई भेद छप्पोरो न रालो, बल्के सारो भेद बांदो भोलो ।

27 जैन किछ अवं तुसन सेइं आंधरे मां जोताई, तुस तैन दीसां जोइयथ, ते जैन किछ तुशशे कन्ने पत्र बल्हे सेइं शुनावं गाते, तुस लाए पुड गेइतां तैसेरो प्रचार केरथ ।

28 तुस तैन करां न डेरथ जैना जानी त मारतन, पन आत्मा न मैरी बटन, परमेशेरे करां डरा, जै आत्माई ते जानी दुइने नरके मां नाश केरि बटते ।

29 कुन एककी सिकेरी दूई च़ड़ोली न बिकन? फिरी भी तुशशो बाजेरे मेरजरे बगैर तैन मरां अक भी धेरती पुड न झैडी बटन ।

30 परमेशर तुशशे हर गल्लरी फिकर केरते इडी तगर तुशशे दोगेरे बाल भी गन्नोरेन ।

31 एल्हेरेलेइ डरा न, तुशशी कदर बेडि च़ड़ोलन करां भी बडी जादे ।”

???? ???? ???? ???? ???? ???? ?

(???? 12:8-9)

32 “जैना लोक, मैन्हु केरे सामने मेरो इकारा केरतन कि तैना मेरे चेलेन, त अवं भी अपने स्वर्गेरो वाजी केरे सामने तैन केरो इकारा केरेलो, कि तैना मेरे चेलेन ।

33 पन ज़ैना लोक, मैन्हु केरे सामने इन ज़ोने करां डरेले, कि तैना मेरे चलेन, त अवं भी तैन केरो अपने स्वर्गोरो बाजेरे सामने इन्कार केरेलो, कि एना मेरे चले नई।”

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ  
(ⓂⓂⓂⓂⓂ 12:51-53; 14:26-27)

34 “इन न सैमझथ कि अवं धेरती पुड़ एल्हेरेलेइ ओरोई लोक मेल मिलापे सेइं रान, पन मेरू एजन् लोकरन एप्पू मांमेइं लड़नेरी वजा भोइ, मेल मलाप नई।

35 अवं एल्हेरेलेइ ओरोई कि मट्टे बाजी करां ते कुइये अम्मा करां ते नुशी शिखी करां अलग केरि।

36 मैनेरे दुश्मन त तैसेरे अपने घरेरे लोक भोनेन।”

37 ज़ै कोई अम्मा या बाजी मीं करां जादे ट्लारे समझते, तै मेरो चेलो बन्नेरे काबल नई ते ज़ै कोई मट्टे या कुइये मीं करां जादे समझते, तै भी मेरो चेलो बन्नेरे काबल नई।

38 ज़ै कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ तियार नई, त तै भी मेरो चेलो बन्नेरे काबल नई।

39 ज़ै कोई मरने करां बन्ननेरे लेइ मेरो इन्कार केरेलो, त तैन हमेशारी जिन्दगी न मैलेली। पन ज़ै मीं पुड़ विश्वास केरनेरे वजाई सेइं अपने जान देनेरे लेइ भी तियार भोलो, त तैस हमेशारी जिन्दगी मैलेली।

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ  
(ⓂⓂⓂⓂⓂ 9:41)

40 “ज़ैना तुसन कबूल केरतन, तैना मीं कबूल केरतन, ज़ैना मीं कबूल केरतन, तैना सिर्फ मीं नई, पन तैना परमेशरे भी कबूल केरतन, ज़ैनी अवं इड़ी भेजोरोई।”

41 “ज़ै नेबन, नबी सेमझतां कबूल केरेलो, परमेशर तैस नेबी केरे बराबर इनाम देलो, ते ज़ै धेर्मी मैन्हु धर्मी सेमझतां कबूल केरते, परमेशर तैस धेर्मी बराबर इनाम देलो।

42 ज़ै कोई इन निकड़न मरां एक्की मेरो चेलो बुझतां सिर्फ अक कटोरो ठंढू पानी पियालो, अवं तुसन सेइं सन्न ज़ोताई तैस पक्कू इनाम मैलनू आए।”

## 11

ⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂⓂ  
(ⓂⓂⓂⓂⓂ 7:18-35)

1 ज़ैसन यीशुए अपने 12 चेलन हुक्म दित्तो, त तै तैट्टां चलो जेव, ताके चेलां केरे नगरन मां गेइतां शिक्षा दे ते परचार केरे।

2 यहन्ना नेवे कैदखाने मां मसीहेरे कम्मां केरे बारे मां शुन्तां तैस कां अपने चले इन पुच्छने भेजे।

3 “तैनी तैन सेइं ज़ोवं, एजनेबालो मसीह तू आस, जेसेरे बारे मां परमेशरे वादो कियोरोए, या आस केन्ची होरि बलगम?”

4 यीशुए तैन जुवाब दित्तो, “ज़ैन किछ् तुस शुन्तन ते लातथ तैन गेइतां यहन्ना सेइं ज़ोथ।

5 कि काने लातन, ते टोन्टे च़लतन, ते कोदी केरू कोढ़ शुद्ध भोते, ते टोँऊने शुन्तन, ते मुइदे ज़ीते भोतन, ते गरीबन खुशखबरी शुनाई गातीए

6 परमेशर तैस बरकत देते, ज़ै मीं पुड़ शक न केरे।”

7 ज़ैसन यहन्नारे चले तैट्टां च़ले जे, त यीशु लोकन सेइं यहन्नारे बारे मां ज़ोने लगो, “तुस सुनसान ठैरी कुन हेरने जोरे थिये? कुन हवाई सेइं हिलते निरैठरे डाले?

8 त फिरी होरू कुन हेरने जोरे थिये? माघां लिगड़ां लेइतां कोई? हेरा ज़ैन माघां लिगड़ां लेइतां भोतन तैना महलन मां रातन।

9 फिरी तुस कुन हेरने जोरे थिये? कुन कोई नेबी? हाँ पन अवं तुसन सेइं ज़ोताई कि नेबी करां भी बड्डे हेरने जोरे थिये।

10 ई तैए यूहन्ना आए ज़ेसेरे बारे मां परमेशर पवित्रशास्त्रे मां ज़ोते,  
कि हेरा, 'अवं अपने बिस्तार देनेबालो तीं अग्री भेजताई,  
जै तेरे लेइ बत तियार केरेलो ।' ”

11 अवं तुसन सेइं सच्च ज़ोताई, कि ज़ै कुआन्शन करां ज़रमोरोए तैन मां यूहन्ना बपतिस्मो देनेबाले  
करां कोई बड्डो नईं भोरो, पन ज़ै स्वर्गेरे राज़े मां निकडे करां निकडोए तै तैस करां भी बड्डोए ।

12 यूहन्ना बपतिस्मो देनेबालेरे दिहाड़न करां अज़ तगर प्रचार भोइ रावरोए, ते स्वर्गेरू राज़  
जल्दी बधने लोरूए, पन बडे निग्गर लोक तैस पुड़ हमलो केरतन ।

13 सारे नेबी केरे लेख, ते मूसरो कानून यूहन्ना तगर भविष्यवाणी केरते राए ।

14 अगर तुस चाथ ते मन्थ, एलिव्याह ज़ेसेरे बारे मां नेबेईं ज़ोरू थियूं, कि ते एजनेबालो थियो  
तै ईए ।

15 ज़ै कोई समझनू चाते, तै ध्याने सेइं शुने ते समझे ।

16 “अवं इस ज़मानेरे लोकां केरि मिसाल केस सेइं देईं, इना तैन मट्टां केरे ज़ेरेन ज़ैना बज़ारन  
मां बिश्तां अपने दोसन सेइं शिकैयत केरतन,

17 कि असेईं तुश्शे लेइ बाज़ो बज़ाव, ते तुस न नञ्चे, ते असेईं शौग कियो ते तुसेईं छाती न  
पिट्टी ।

18 किजोकि यूहन्ना बपतिस्मो देनेबालो\* जादे तर बरत रखतो थियो, ते शराब न थियो पीतो, ते  
तैना तैस जो ज़ोतन कि एस पुड़ भूतेरो सैयो आए ।

19 ते मैनेरू मट्टू यानी अवं खातो पीतो अव, हेरा, ते तैना ज़ोतन पेटू ते शराबी मैन्हु ते चुंगी  
नेनेबाले ते पापी लोकां केरो दोस्त, पन अक्लमन्द कौने तैसेरे कम्मेईं सेइं पतो ज़लते ।”

XXXXXXXXXX XXXX XXXXX

(XXXX 10:13-15)

20 तैखन यीशु फिरी तैन नगरन मां गेइतां तैट्टेरे लोकन झिड़कतां ज़ोने लगो, ज़ैन मां तैनी  
चमत्कार कियोरे थी, पन तैनेईं अपने पापन करां मन न फिराव ।

21 हे खुराजीन नगरेरे लोकव! तुसन पुड़ अफ़सोस, हे बैतसैदा नगरेरे लोकव तुसन पुड़ अफ़सोस,  
कि ज़ैना चमत्कार तुसन मां किये, अगर एना चमत्कार सूर ते सैदा नगरन मां कियोरे भोथे, त तैन  
लोकेईं केइसेरे देतेरी टाट पलेटतां ते मांज़नी मां बिश्तां† अपने पापन करां मनफिरावरो भोथो ।

22 पन अवं तुसन सेइं ज़ोताई, कि इन्साफेरे दिहाड़े परमेशर, ज़ै सज़ा सूर ते सैदा नगरां केरे लोकन  
देलो, तुश्शी सज़ा तैस करां भी जादे भोली ।

23 ते हे कफ़रनहूम नगरेरे लोकव, कुन तुस सोचतथ कि स्वर्गे मां तुश्शी आदर भोनीए! नईं तुस  
त नरके गाले ज़ैड़ी पापी लोकन सज़ा मैलेली! किजोकि ज़ैना चमत्कार तुसन मां किये, अगर मीं  
एना सदोम नगरे मां कियोरे भोथे त सदोम नगर अज़ तगर भी भोनू थियूं ।

24 पन अवं तुसन ज़ोतां कि इन्साफेरे दिहाड़े परमेशर ज़ै सज़ा सदोम नगरेरे लोकन देलो, तुश्शी  
सज़ा तैस करां भी जादे भोली ।”

XXXX XXX XXXXX XXXXX XXXX XXX XXXX

(XXXX 10:21-22)

25 तैखन यीशुए ज़ोवं, “हे बाज़ी, स्वर्ग ते धेरतरे प्रभु, अवं तेरू शुकर केरतां कि तीं एना गल्लां  
अक्लमन्द ते समझदार लोकन करां छपेइतां रेख्खी ते तैन लोकन पुड़ वैदी की, ज़ैना निकके बच्चां  
केरे ज़ेरे आन ।

26 हां, हे बाज़ी तीं एन्ने रोड़ लग्गू ।

\* 11:18 यूहन्ना: हन्ना टिटां ते जंगली माछी खातो थियो । † 11:21 टाट पलेटतां ते मांज़नी मां बिश्तां: बडे पेइले लोक  
टाट पलेटतां ते मांज़नी मां बिश्तां अपने पापन करां मन फिराते थी ।

27 “मेरे बाजेई सब किछु मेरे सुपुर्द कियोरूए; कोई होरो मट्टे‡ न जाने, सिर्फ बाजी जानते; कोई बाजी‡ न जाने सिर्फ मट्टू जानते, या तै मैन्हु बाजी जानते जैस पुड़ मट्टू बांदो करने चाए।

28 “हे मेहनत करनेवाले\* लोकव, ते भारे सेई थकोर लोकव मीं कां एज्जा; अवं तुसन आराम देइलो।

29 मेरे अधीन एन्चरे भोथ जेन्चरे दांत जुंए हैठ भोते, ते जैन किछु अवं तुसन शिखलताई तैस शिखा, किजोकि अवं शरीफ आई ते दिलेरो नमूर आई ते तुशुशी जानी आराम मैलेलो।

30 जै भार अवं तुसन देइलो तै पोल्लोए, तुस तैस आरामे सेई छुई सकतथ।”

## 12

~~~~~

(~~~~~ 2:23-28; ~~~~~ 6:1-5)

1 यीशु आरामेरे दिहाड़े ऊडारन मामेइं एक्की बत्तां ज़लोरे थियो, ते तैसेरे चेलन दलुख लगगी, ते तैना शिल्लां टलोइतां खाने लगगे।

2 फरीसी लोकेई एन लेइतां यीशु सेइं ज़ोवं, “तक! तेरे चले तैन कम करने लोरेन जैन आरामेरे दिहाड़े केरनू जेइज नई।”

3 यीशुए तैन जुवाब दित्तो, “कुन तुसेई पवित्रशास्त्रे मां कथे नई पढ़ेरू कि जेइस इशुसे पूर्वज दाऊद राजो त तैसेरे साथी दलुखोरे थिये त तैनेई कुन कियेरू थियूं?

4 ते केन्चरे परमेशेरे घरे मां जेव, ते जैना ज़ेदोरी रोटी थी तैटटां एन्तां एप्पू भी खेइ, ते अपने सैधन भी दित्ती, ते तैनेई भी खेइ हालांकी तैना रोटी खैनी तैन केरे लेइ जेइज थी, तैना सिर्फ याजक खेइ सकते थिये।

5 या तुसेई मूसेरो कानूने मां एन भी नई पढ़ेरू, कि याजक मन्दरे मां आरामेरे दिहाड़ेरी विधि न मन्ने पुड़ भी बेकसूर भोतन।

6 एन अवं तुसन सेइं ज़ोताई कि इड़ी तैए, जै मन्दरे करां भी बड़ोए।

7 अगर तुस एल्हेरो मतलब जानेथे कि, अवं बलिदान नई बल्के दया पसंद केरताई, त तुस बेकसूर कुसुरवार न बनाथे।

8 किजोकि मैनेरू मट्टू यानी अवं आरामेरे दिहाड़ेरो भी प्रभु आई।”

~~~~~

(~~~~~ 3:1-6; ~~~~~ 6:6-11)

9 यीशु तैटटां निस्तां तैन केरे प्रार्थना घरे मां जेव।

10 तैड़ी अक मैन्हु थियो, जेसेरो हथ शुक्कोरो थियो, तैनेई यीशु दोष लानेरे वहाने सेइं तैस पुच्छू, “कुन आरामेरे दिहाड़े कोई बझानो जेइजे?”

11 तैनी तैन जो ज़ोवं, “तुसन मरां कौने, जेसेरी अक्के भैड भोए, ते तै आरामेरे दिहाड़े गत्ते मांजो बिछड़े, त तुस कुन तैस तैटटां बेइर न कढेले?”

12 मैनेरी कीमत त भैडी करां केतुरी जादे! एल्हेरेलेइ आरामेरे दिहाड़े रोडू कम केरनू जेइजे।”

13 तैखन यीशुए तैस मैन्हु जो ज़ोवं, “अपनो हथ अग्रोवं केर।” तैनी मैने अपनो हथ अग्रोवं कियो, ते अकदम तैसेरो हथ बेज्जोव।

14 तैखन फरीसी लोक बेइर गेइतां तैसेरी खलाफ साजिश केरने लगगे, कि एस केन्चरे मारम?

~~~~~

15 इन बुझतां यीशु तैटटां ज़लो जेव। ते बड़े लोक तैस पत्ती ज़ले, ते तैनी तैना सब बज्झाए।

16 ते तैनी तैना खबरदार किये, कि मेरे बारे मां केन्ची सेइं न ज़ोइयथ।

17 ताके यशायाह नेबेरी ज़ोरी तै गल पूरी भोए:

- 18 “हेरा ई मेरो सेवके जै मीं चुनोरोए, ई मेरो ट्लारोए जैस पुड़ मेरो दिल खुशे, अवं अपनि आत्मा तैस पुड़ छुडेले, ते तै गैर कौमन मां गेइतां इन्साफेरी खबर शुनालो ।
- 19 तै न लड़ाई केरेलो, ते न शौर,
ते बज़ारन मां कोई तैसेरी आवाज़ न शुनेलो ।
- 20 ते ए दलेन्चोरे निरैठरे डाले न टलोडेलो,
ते न बलतो दीयो हिशाहो जां तगर इन्साफ भारी न भोए ।
- 21 ते तैसेरे नव्वे पुड़ गैर कौमां उमीद रेखेली ।”

ⓂⓂⓂⓂ ⓂⓂ ⓂⓂⓂⓂⓂⓂ

(ⓂⓂⓂⓂ 3:20-30; ⓂⓂⓂⓂ 11:14-23)

- 22 तैखन लोकेई अक मैन्हु यीशु कां आनो जै कानो ते लट्टो थियो ते तैस पुड़ भूतेरो सैयो थियो, ते तैनेई तैस कां आनो, तैनी तै ठीक कियो, ते तै लहने लगो ते गल्लां भी करने लगो ।
- 23 एन हेरतां लोक हैरान भोइतां जोने लगगे, “कुन एन दाऊदेरू मट्टए?”
- 24 पन फरीसी लोकेई एन शुन्तां ज़ोवं, “ए त भूतां केरे प्रधान शैतानेरी मट्टी सेइं भूतां केरो सैयो कढते ।”
- 25 यीशुए तैन केरे मन्नां केरे खियाल ज़ैनतां तैन सेइं ज़ोवं, “जैस राज़े मां फूट पेचे, तैन राज़ बनोरू न रेइ सके, ते केन्वी नगर या खानदाने मां फूट पेचे, तैन भी बनोरू न राए ।
- 26 अग़र शैतान एप्पू अपने भूतां कढे, त तै अपनो मुखालफ एप्पू भुओ, त फिरी तैसेरू राज़ केन्चरे बनोरू रेइ सकते?
- 27 अग़र अवं शैतानेरी मट्टी सेइं भूतां केरो सैयो कढताई त तुश्रशे अपने मैन्हु केसेरी मट्टी सेइं कढतन? तैन्ना तुश्रशो हाकिम भोले ।
- 28 पन अग़र अवं परमेशेरी आत्माे मट्टी सेइं भूतां केरो सैयो कढताई त परमेशेरू राज़ तुश्रशे नेडे पुज़ोरूए ।
- 29 या कोई मैन्हु केन्वी ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, ज़ांतगर कि तै पेइले तैस ज़ोरेबाले मैन्हु बेंधी न छुड्डे । तैखन तै तैस ज़ोरेबाले मैनेरो माल लुट्टी सकते ।
- 30 ज़ै मीं सेइं साथी नई तै मेरे खलाफ, ते ज़ै मीं सेइं साथी नई तै अकोट्टू न केरे ते इरां उरां बिटलते ।
- 31 एल्हेरेलेइ अवं तुसन सेइं ज़ोताई कि, मैन्हु केरे सारे पाप ते तुहीन माफ़ भोली, पन पवित्र आत्माेरी तुहीन माफ़ न भोली ।
- 32 ज़ै कोई मैनेरे मट्टेरे खलाफ किच्छ ज़ोलो, त तैसेरो ए पाप माफ़ कियो गालो, पन ज़ै पवित्र आत्माेरी तुहीन केरे, त तैस मैन्हु न इस दुनियाई मां माफ़ भोलू ते न एजने बैली दुनियाई मां माफ़ भोलू ।”

ⓂⓂⓂ ⓂⓂ ⓂⓂⓂⓂⓂⓂ ⓂⓂ

(ⓂⓂⓂⓂ 6:43-45)

- 33 “अग़र बुट रोडे, त तैसेरे फल भी रोडो भोलो, अग़र बुट बुरोए त तैसेरे फल भी बुरो भोलो, किजोकि बुट अपने फले सेइं पिशैनाते ।
- 34 तुस ज़हरीले सपेरे बच्चवां केरे बुरे भोइतां रोडी गल केन्चरे ज़ोई सकतथ? किजोकि ज़ैन दिले मां भोते तैन्ने ज़बानी पुड़ एइते ।
- 35 रोडो मैन्हु दिलेरे रोडे खज़ाने मरां रोडी गल्लां कढते, ते बुरो मैन्हु बुरे दिलेरे बुरे खज़ाने मरां बुरी गल्लां कढते (दिल खज़ानेरो ज़ोरोए) ।
- 36 अवं तुसन सेइं ज़ोतां, कि ज़ैना-ज़ैना निक्केमी गल्लां मैन्हु ज़ोले, इन्साफेरे दिहाडे लोकन अपनि हर एककी तैस गल्लरो हिसाब देनो भोलो ।
- 37 किजोकि तू अपने गल्लेई सेइं धर्मी ते अपने गल्लेई सेइं दोषी भोलो ।”

☞☞☞☞☞ ☞☞☞☞☞☞☞☞ ☞☞☞☞
 (☞☞☞☞☞ 8:11-12; ☞☞☞☞☞ 11:29-32)

38 इस पुड़ किछ् शास्त्री ते फरीसी लोकेई तैस सेइं ज़ोवं, “हे गुरू अस तीं करां कोई निशान हेरनो चातम।”

39 तैनी तैन जुवाव दित्तो, “इस ज़मानेरे बुरे ते बदमाश लोक निशान हेरनो चातन, पन तैन योना नेबेरे निशानेरे अलावा होरो कोई निशान न दित्तो गालो।

40 जेन्चरे योना नबी ट्लाई दिहाड़े ते ट्लाई रातन मेछ्लरे पेटे मां राव, तेन्चरे मैनेरू मट्टू यानी अवं भी ट्लाई दिहाड़े ते ट्लाई रातन ज़मीनी मां रालो।

41 नीनवरे लोक इन्साफेरे दिहाड़े इस ज़मानेरे लोकन सेइं साथी खड़े भोइतां एन दोषी बनाले, एल्हेरेलेइ कि तैनेई योनारो प्रचार शुन्तां पापन करां मन फिराव, ते हेरा इड़ी तैए, ज़ै योना करां भी बड्डोए, पन तुसेईं पापन करां मन फिरानो न चाव।

42 दक्षिणेरी रानी इन्साफेरे दिहाड़े इस ज़मानेरे लोकन सेइं साथी खड़ी भोइतां दोषी बनाली, किजोकि तै बड़े दूरेरां सुलेमान राजेरू ज्ञान शुन्नेरे लेइ ओरी थी, पन हेरा इड़ी तैए, ज़ै सुलेमाने करां भी बड्डोए।”

☞☞☞☞☞ ☞☞☞☞☞ ☞☞☞☞ ☞☞☞☞
 (☞☞☞☞☞ 11:24-26)

43 “ज़ैखन केन्ची मैन्हु मरां भूतां केरो सैयो निसते, त तै अपने आरामेरे लेइ बेरान ठारां हंठते, पन ज़ैखन तैस ठार न मैल्ले।

44 तैखन ज़ोते, कि अवं वापस अपने तैस्से घरे मां गाताई ज़ैस मरां निसोरो आई, ते ज़ैखन तै वापस एइते, त तैस तैन घरे खाली, धोवेरु ते साफ सुथरु सज्जो-सजेवरु मैलते।

45 तैखन तैन गाते ते सत बुरां भूतां एप्पू सेइं साथी आनते, ते तैन सब तैस मां रहतन, ते तैस मैनेरो हाल पेइले हाले करां भी जादे बुरो केरतन, तेन्चरे इस ज़मानेरे बुरे लोकां केरो हाल भी एरो भोनाए।”

☞☞☞☞☞ ☞☞☞☞☞ ☞☞☞☞ ☞☞☞☞
 (☞☞☞☞☞ 3:31-35; ☞☞☞☞☞ 8:19-21)

46 ज़ैखन तै मैनन सेइं गल्लां केरने लोरो थियो, त तैसेरी अम्मा ते कने तैसेरे दूला खड़े थी, तैना तैस सेइं गल्लां केरनि चाते थिये।

47 केन्चे गोइतां तैस सेइं ज़ोवं, “बेइर तेरी अम्मा ते दूला खड़े आन, तैना तीं सेइं गल केरनि चातन।”

48 एन शुन्तां तैनी पतो देनेबाले जो ज़ोवं, “कौने मेरी अम्मा, ते कौन मेरे दूला?”

49 ते अपने चेलां केरे पासे हथ अग्रोवं केरतां ज़ोवं, “हेरा मेरी अम्मा, ते मेरे दूला इना आन।

50 किजोकि ज़ै कोई मेरे स्वगेरे बाजेरी मेर्जी पुड़ चलते तैए मेरो दूला ते मेरी बेइन्न्, ते मेरी अम्मा आए।”

13

☞☞☞ ☞☞☞☞☞☞☞☞☞☞☞ ☞☞☞☞☞
 (☞☞☞☞☞ 4:1-9; ☞☞☞☞☞ 8:4-8)

1 तैस दिहाड़े यीशु घेरं निस्सो, ते गलील समुन्दरेरे बन्ने पुड़ गोइतां बिश्शो।

2 तैसेरे च़ेवरे पासन लोकां केरि एतरी भीड़ अकोट्टी भोइ, ते तै एककी किशती मां च़दो ते बिश्शी जेव, ताके तै सेब्भी लोकन परमेशेरी गल्लां केरि शिक्षा देइ सके, ते सारे लोक बन्ने पुड़ खड़े राए।

3 तैखन तैनी तैन सेइं कहैनी केरे तरीके सेइं वेड़ि गल्लां ज़ोई, “एक्सां अक वीज वेनेबालो वीज वेने जो ज़ेव।

4 वीज बते बार किछ्, वीज बत्तेरे इलेखी बिछ्ड़ू त चुड़ोल्लेई एइतां तैन वीज चुनु।

5 किछ् वीज घोइनबाली ज़मीनी पुड़ बिछ्ड़ू, ज़ेड़ी तैस डुग्धी मित्ती न मेलनेरे वजाई सेइं तैन लूशी उग्गू ते बूटो लगो।

6 पन ज़ैखन दिहाड़ो निस्सो, त तै निकडो बूटो फुक्कोई जेव । ज़ील न छूडडनेरे वजाई सेइं शुक्की जेव ।

7 ते किछ बीज कटां केरे झैल्लन मां बिछडू । ज़ैखन तैड़ी बूटो लगो, त कटां केरे झैल्लेई भी वेडोइतां ते बूटो दवेइ छडडो ।

8 पन ज़ैन रोड़ी ज़मीनी मां बिछडू, त तैस फल भी लगो केन्ची शौव गुणा केन्ची शठ गुणा, ते केन्ची टली गुणा ।

9 ज़ै कोई समझनू चाते, तै ध्याने सेइं शुने ते समझे ।”

Matthew 13:4-12; 13:23-30
(*Matthew 4:10-12; 8:9-10*)

10 चेलेई यीशु कां एइतां पुच्छू, “तू लोकन सेइं कहैनी केरे तरीके सेइं गल्लां किजो केरतां?”

11 तैने जुवाब दित्तो, “तुसन त स्वर्गेरे राज़ेरे भेदां केरि समझ दित्तोरीए” पन होरि लोकन नई ।

12 किजोकि ज़ैस कां परमेशेरी मर्जी समझनेरी इच्छा आए, तैस परमेशर जादे समझ देलो । पन ज़ैस कां परमेशेरी मर्जी समझनेरी इच्छा नई, तैस केरां, थोड़ी जेरि समझ, ज़ै तैस कां आए, तै भी नी गाली ।

13 अवं तैन सेइं एल्हेरेलेइ कहैन्न मां गल्लां केरतां, कि तैन, तैना बार-बार शुनेले, पन मेरी गल न समझेले ।

14 तैन केरे बारे मां यशयाह नेबेरी भविष्यवाणी पूरी भोतीए,

“तुस कन्नेई सेइं त शुनेले पन समझेले न, तुस एछछन सेइं त लाएले पन पिशैनी न सकेले ।”

15 “किजोकि एना लोकां केरे दिलन पुड़ चरभी भेरोरीए,

ते एना कन्न सेइं उकडु शुन्तन, ते एनेई अपनि एछछी तुमोरिन,

एरू न भोए कि तैना एछछेई सेइं लहन,

ते कन्नेई सेइं शुन्न ते दिले सेइं समझन,

ते मेरे पासे फिरन ते अवं तैन बज्झेई ।”

16 “पन तुशरी एछछी धन आन, कि तुस लातथ ते तुशसे कन्न धन आन किजोकि तुस शुन्तन ।

17 अवं तुसन सेइं सन्न ज़ोताई, कि बड़े नेवी ते धेरमी लोकेई चाव कि ज़ैन गल्लां तुस हेरतथ तैना हेरन, पन न हेरी बेटि, ते ज़ैना गल्लां तुस शुन्तन शुन्न, पन न शुनी बेटि ।”

Matthew 13:13-20; 13:31-35
(*Matthew 4:13-20; 8:11-15*)

18 “हूनी तुस बीज बेनेबालेरी कहैनरो मतलब शुना ।

19 बीज बेनेबालो तै आए, ज़ै परमेशेरी गल्लां लोकन शुनाते । ज़ैना मैन्हु परमेशेरी गल्लां शुन्तन, तैन मरां किछ लोक तैस बत्तेरे ज़ेरे आन, जेड़ी बीज बिछडते । तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशेरी गल्लां केडडी छडते ।

20 ते ज़ैन घोड़नबाली ज़मीनी मां वेवं, एना तैना आन, ज़ैना खुशी सेइं वचन शुन्तन कबूल केरतन ।

21 पन एप्पू मां ज़ील न रखनेरे वजाई सेइं तैन थोड़े दिहाड़ी केरूए, ते ज़ैखन वचनेरे वजाई सेइं तैन पुड़ मुसीबत या जुलम भोते त तैखने ठोकर खातन ।

22 होरे किछ लोक ज़ैना परमेशेरी गल्लां शुन्तन, तैना तैस कटां केरे झैल्लां केरे ज़मीनेरे ज़ेरे आन । पन दुनियारो फिकर ते दौलतरे वजाई सेइं धोखो खातन, ते तैना बेफल रेइ गाते ।

23 ज़ैन रोड़ि ज़मीनी मां वेवं, एन तैना लोकन ज़ैना वचन शुन्तन ते समझतन, ते तैस फल भी लगते कोन्ची शौव गुणा कोन्ची शठ गुणा, ते केन्ची टलही गुणा ।”

Matthew 13:23-30

24 यीशुए तैन अक होरि मिसाल देइतां ज़ोवं, “स्वर्गेरू राज़ तैस मैनेरू ज़ेरूए ज़ैनी अपने ऊडारे मां रोडू बीज़ बेवं।

25 पन ज़ैखन लोक झुलोरो थियो, त तैसेरे दुश्मने एइतां तैसेरे ऊडारे मां गेहुं केरे बीजे मामेइं जंगली बीज़ बेवं।

26 ज़ैखन पट्लां ते शिल्लां लगां लगने त तै जंगली डाल भी साथी लगगो।

27 मालिकेरे नौकरेई एइतां तैस सेइं ज़ोवं, हे मालिक, कुन तीं अपने ऊडारे मां रोडू बीज़ न थियूं बेवरू, फिरी जंगली तैस मां कोट्टां अव?”

28 तैनी तैन सेइं ज़ोवं, एन केन्वी दुश्मनेरू कम्मे, नौकरेई पुच्छू कुन तू चातस, कि अस गेइतां तैन पुट्टी छडम?

29 पन तैनी ज़ोवं नन्ना, एरू न भोए कि तैस सेइं साथी तुस गेहुं भी पुटथ।

30 फसल लुन्ने तगर दुइये साथी बेडोने देथ, ते लुनते वार अव एप्पू लुन्ने बालन सेइं ज़ोइलो, कि पेइले जंगली बीज़ लुन्तां अग्गी मां फुकनेरे लेइ अकोट्टू केरा, ते फिरी तुस गेहुं मेरे कोठारे मां जम्हां केरतां रख्वा।”

?????? ??????? ??????

(????? 4:30-32; ????? 13:18-19)

31 तैनी तैन अक होरि मिसाल देइतां ज़ोवं, “स्वर्गेरू राज़ शेरीएरे बीजेरू ज़ेरू आए, ज़ैन एक्के मैने आनु ते अपने ऊडारे मां बेवं।

32 एन बीज़ सेब्भी बीज़न करां निक्कु भोते, पन ज़ैखन तैन बीज़ बेव गाते, त तैन उगतां सारे निक्के-निक्के बुट्टन केरां बड्डू भोते। ते एरो बुट्ट बनते इडी तगर कि अम्बेरां चुडोल्लू भी तैस पुइ विशतन।”

?????? ?????

(????? 13:20-21)

33 तैनी तैन अक होरि मिसाल देइतां ज़ोवं, “स्वर्गेरू राज़ अम्लटेरू ज़ेरूए, ज़ैन केन्वी कुआन्शां आनु, ते हछे अट्टे मां मलाव ते सारू अट्टू खमीर बेनि ज़ोवं।”

?????? ????? ???????

(????? 4:33-34)

34 एन सैरी गल्लां यीशुए तैन लोकन मिसाल देइतां शुनातो थियो, ते मिसाल देनेरे बगैर तै तैन किछ न थियो शुनातो।

35 ताके तैन वचन ज़ैन नेवे ज़ोवरो थियूं पूरू भोए, “अवं कहैनी केरे लेइ अपनि ज़बान खोल्लेलो, ते तैना गल्लां ज़ोइलो ज़ैना दुनिया वन्ने करां पेइली छेप्पोरी थी।”

?????? ??????? ?????

36 तैखन यीशु लोकन करां अलग भोइतां घरजो अव, ते तैसेरे चलेई तैस कां एइतां ज़ोवं, “तू असन ऊडारेरे जंगली बीजेरी कहैनरो मतलब समझा।”

37 तैनी तैन जुवाव दित्तो, “रोडू बीज़ बेनेबालो मैनेरू मट्टूए।

38 ऊडार ई दुनियाए, ते रोडू बीज़ राज़ हासिल केरनेवाले लोक, ते जंगली बीज़ शैतानेरे लोक आन।

39 ते तै दुश्मन ज़ैनी तैन बेवरू थियूं तै शैताने, लुन्नेरो मतलब इस दुनियारो अन्त भोनोए, ते लुन्ने बाले स्वर्गदूतन।

40 ज़ेन्त्रेरे जंगली बीजेरे ग्लेव अकोट्टे केरतां अग्गी मां फुकतन, तेन्त्रेरे इस दुनियारो अन्त भोनोए।

41 मैनेरू मट्टू अपने स्वर्गदूतन भेजेरू, ते तैन केरे राज़े मां ठोकरारी वजा ते बुरां कम्मां केरनेबालन अकोट्टे केरेले।

42 ते तैन अगगारे कुण्डे मां छुडले, जैडी तैना लोक लेरां देते ते दंत चापते राले ।

43 तेइस धर्मी लोक अपने बाजी केरे राऊजे मां दिहाडेरें जेरें चमकेले । जै कोई समझनू चाते, तै ध्याने सेइं शुने ते समझे ।”

XXXXXXXXXXXXXXXXXXXX

44 “स्वगेरू राज तैस दालतरू जेरू ए, जै एककी ऊडारे मां दबोरी थी, जै एककी मैने तोप्पी, ते तैस मैल्ली भी, ते फिरी तैने छुपेइतां छुडी ते खुशी सेइं अपनू सब किछ बेचतां तैन ऊडार घिनु ।

XXXXXX XXXX

45 “स्वगेरू राज तैस बुपैरेरू जेरू ए, जै कीमती मोती तोपतो थियो ।

46 जैखन तैस अक कीमती मोती मैल्लो, त तैनी अपनू सब किछ बेचतां तै मोती घिनो ।

XXXXXXXX XXXX

47 “स्वगेरू राज तैस मेछली जालेरू जेरू ए, जैन समुन्दरे मां छुडू ते तैस मां हर किसमेरी मेछली लेगी ।

48 ते जैखन जाल भेरोई ज़ोवं त झिरेई जाल खिचतां कनारे पुड आनू, ते बिशतां रोडी-रोडी मेछली टोकरन मां रेख्खी ते बुरी-बुरी मेछली शैरी छैडी ।

49 हुनियारे अन्ते मां भी एरू भोनू ए, स्वगदूतेई एइतां दुष्ट लोक, धेर्मी लोकन करां अलग केरनेन ।

50 ते तैना अगारी भेठी मां छुडनेन तैडी लेरां ते दंत चापने भोले ।

XXXXXXXX XX XXXXXXXX XXXXXXXX

51 “कुन तुसेई एन सेरी गल्लां समझी?” तैनेई ज़ोवं, “हाँ” असेई सेमझी ।

52 फिरी यीशुए तैन सेइं ज़ोवं, “हर अक शास्त्री जै स्वगरे राऊजेरो चेलो बनोरोए एककी एरे मुकान मालिकेरो जेरोहे, जै अपने खजाने मरां नब्वीं ते पुरैनी चीजां कढते ।”

XXXXXXXX XXXX XXX XXXXXXXXXXXX XXXXX

(XXXXXXXX 6:1-6; XXXXX 4:16-30)

53 जैखन यीशुए एना सब कहैनी शुनेई त तै तैट्टां अग्रोवं ज़लो जेव ।

54 ते अपने नगर मां एइतां तैट्टेरे पुरार्थना घरे मां गेइतां शिक्षा देने लगे, ते लोक तैसेरी शिक्षा शुन्तां हैरान भोए ते ज़ोने लगे: “ए अकल बुधी ते एना चमत्कार एस कोट्टां हासिल भोए ।

55 एन त तैस टलखानेरू मटटू आए ते एसेरे अम्मरू नवं मरियम ते एसेरे ढलां केरू नवं याकूब, यूसुफ, शमौन ते कने यहूदा आन,

56 ते एसेरी सब बेइनां इशे इडी रेइचन, फिरी एसमां ई काबलीत कोट्टां आई?”

57 एन्चरे तैन लोकेई इन्कार कियो । पन यीशुए तैन सेइं ज़ोवं, “नबी अपने नगर मां ते अपने घरेरे अलावा होरि कोन्ची ठारी बेइजत न भोए ।”

58 ते तैने तैडी तैन केरे विश्वास न केरनेरे वजाई सेइं जादे चमत्कार न हिराए ।

14

XX

(XXXXXXXX 6:14-29; XXXXX 9:7-9)

1 जेइस हेरोदेस जै मुलखेरे जेवरोवं हिस्से पुड हकोमत केरतो थियो, तैनी यीशुएरे बारे मां शुनू ।

2 तैनी अपने नौकरन सेइं ज़ोवं, “ए यहून्ना आए जै वपतिस्मो देनेबालोए, ए मुड्डन मरां ज़ीतो भोरोए, एल्हेरेलेइ तै चमत्कार हिराते ।”

3 किजोकि हेरोदेसे अपने ढलाए फिलिप्पुसेरी कुआन्श हेरोदियासेरी वजाई सेइं यहून्ना टलेइतां बन्धोवरो ते कैदखाने मां छुडोरो थियो ।

4 किजोकि यहून्ना हेरोदेस सेइं ज़ोरू थियू, कि ए रखनी तेरे लेइ जेइज नई ।

5 ते हेरोदेस तैस कत्ल केरनो चातो थियो, पन लोकन करां डरतो थियो, किजोकि लोक तैस नबी मन्ते थिये ।

6 पन ज़ैखन हेरोदेसेरी जर्म दिहैड़ी आई, त हेरोदियासेरे कुइयां मेहमाना केरे सामने नेच्रतां हेरोदेस खुश कियोरो थियो।

7 एह्तेरेलेइ तैनी वादो कियोरो थियो, “कि ज़ैन किछ तू मग्गेली, अव तीं तैन्ने देलो।”

8 तैसां अपने अम्मारे शिखालने पुइ ज़ोवं, “मीजेई यूहन्ना बपतिस्मो देनेबालेरी क्रोडी थाले मां मग।”

9 राजे बडो अफ़सोस भोव, पन अपने मेहमाना केरे सामने ते कसम खानेरी वजाई सेइं हुक्म दित्तो कि देथ।

10 ते तैनी कैदखाने मां लोक भेज़तां यूहन्नारी क्रोडी कटाई।

11 ते तैसेरी क्रोडी थाले मां रेखतां कुइये कां दित्ती, ते तै अपनि अम्मा कां घिन्तां जेई।

12 तैखन तैसेरे चले आए, ते तैनेई तैसेरी लाश नेइतां देवतां छुडी ते गेइतां यीशुए पतो दित्तो।

500

(**6:30-44**; **9:10-17**; **6:1-14**)

13 ज़ैखन यीशुए एन शुनु, त तै किशतरे ज़िरिये अकन्ती ठारी जो च़लो जेव, ते लोक एन शुन्तां नगर नगरेरे पैदल तैस पत्ती च़ले जे।

14 ज़ैखन यीशु किशती मरां ओस्सो त तैनी बडे लोक पतोरं एइते जाए, ते तैस तैन पुइ बडो तरस अव, ते तैनी तैन केरे बिमार लोक बज्झाए।

15 ज़ैखन इलोझ भोइ, त यीशुएरे च़ेलेई तैस कां एइतां ज़ोवं, “ई सुनसान ठार आए, त च़िर भी बडू भोरू आए। ते एन लोकन भेज़ी छुड ते कोस्कोई इलोव्वन मां गेइतां किछ खाने जो घिन्न।”

16 यीशुए तैन सेइं ज़ोवं, “एना भेज़ने ज़रूरी नई! तुस्से एन किछ खाने जो देथ।”

17 च़ेलेई तैस सेइं ज़ोवं, “इडी असन कां पंच रोट्टी ते दूई मेछली केरे अलावा होरू किछ नई।”

18 तैनी ज़ोवं, “तैन इरां मीं कां आनां।”

19 तैखन यीशुए लोकन घासे पुइ उन्डे विशनेरे लेइ ज़ोवं, ते पंच रोट्टी ते दूई मेछली हथ्ये मां रेख्की, ते अम्बरेरे पासे तेकतां शुकर कियूं, ते रोट्टी टलोड़ी-टलोड़ी अपने च़ेलन कां दित्ती, ते च़ेलेई तैन लोकन दित्ती।

20 ते सारे मेन्हु खेइतां रेज्जी जे। तैल्ला पत्ती, यीशुएरे च़ेलेई बच़ोरे टुकड़न सेइं 12 टोकरी भेरि।

21 रोट्टी खानबाले लोकां केरि तैधात कुआन्शां ते बच्चां केरे अलावा कोई 5000 मइद थियो।

500

(**6:45-52**; **6:15-21**)

22 तैल्ला पत्ती, यीशुए अपने च़ेलन हुक्म दित्तो कि, तुस किशती मां च़ेइतां मीं केरां पेइले समुन्दरेरे उस पार जो गाथ ते अव एन लोकन वापस भेज़तां एइताई।

23 लोकन भेज़नेरे पत्ती, यीशु तैट्टां निस्तां नेडे एक्की पहैड़ी पुइ प्रार्थना केनेरे लेइ जेव। ते इलोझी तै अकैल्लो थियो।

24 तैखन किशती बन्ने करां दूर पुजोरी थी, किजोकि एग़रोवरां बडी तेज़ हवा च़लोरी थी।

25 ते लगभग ज़ेज्जोरे च़ेवरे बजेई ज़ैखन हेजू आंधरू थियूं, यीशु समुन्दरेरे पैनी पुइ च़लतां अपने च़ेलन कां अव।

26 ज़ैखन च़ेलेई यीशु समुन्दरे पुइ च़लतो लाव त तैना डेरि जे, तैनेई बुझू, “ए भूत ओरोए,” ते डेरतां च़िन्डां लगगे मारने।

27 यीशुए तैखने तैन सेइं रोडेच़ारे गल्लां की ते ज़ोवं, “हिम्मत रख्वा डरा नन्ना, अव आई।”

28 पतरसे तैस जुवाब दित्तो, “हे प्रभु अगर तू आस, त मीं भी हुक्म दे ते अव भी पैनी पुइ च़लतो तीं कां एज्जी।”

29 तैनी ज़ोवं, “एई!” तैखन पतरस किशती मरां ओस्तां यीशु कां गानेरे लेइ पैनी पुइ मेइं च़लने लगो।

30 पन तेज़ हावी सेइं छेल्ली च़लने लेग्गी ते तै डेरि जेव, ते डुबने लगो तैखन तैनी च़िन्डां मैरतां ज़ोवं, “हे प्रभु मीं बच्चा।”

31 यीशुए लूशी अपने हथ्ये सेइं झफ देइतां पतरस ट्लातो, ते तैस सेइं ज़ोवं, “हे घट भरोसे वाला तीं किजो शक की?”

32 ज़ैखन तैना किशती मां विशशे ते हवां रुकी जेईं।

33 तैखन ज़ैना किशती मां विशशारे थिये, त तैनेईं तैस कां मथ्यो टेको ते ज़ोने लगगे, “तू सच्चरे परमेशेरू मट्टूस।”

Matthew 15:12-14
(Matthew 6:53-56)

34 ज़ैखन तैना गलील समुन्दर पार केरतां गन्नेसरत नव्वेरे जगाई पुड़ पुज्जे।

35 त तैट्टेरे लोकेईं यीशु पिशानो ते आसेपासेरे इलाके मां खबर दिती, ते सारे बिमार तैस कां आने।

36 ते तैनेईं यीशु सेइं मिन्त करते थिये कि, तैन तैसेरे लिगइन सेइं हुरने दे। ते ज़ेत्रेइं तैसेरे लिगइन सेइं हथ लाव तैना सब बेज्जोए।

15

Matthew 15:15-20
(Matthew 7:1-13)

1 तैखन किछ फरीसी ते किछ शास्त्री लोक यरूशलेम नगरे मरां यीशु कां आए ते ज़ोने लगगे।

2 “तेरे चेले बुज्जगां केरि रसमरे खलाफ किजो चलतन, तैना रोट्टी खाने करां पेइले हथ न धोन?”

3 तैनी तैन जुवाव दित्तो, “तुस किजो अपने रसमन सेइं परमेशेरो हुक्म टलोइतथ?”

4 किजोकि परमेशेरे ज़ोरूए, कि अपने हाज बव्वेरी इज्जत केरा, ते ज़ै कोई अपने हाज बव्वे जो बुरू ज़ोलो तै मारो गालो।

5 पन तुस ज़ोतथ, कि ज़ै कोई बाजी या अम्मा सेइं ज़ोए कि, मीं करां ज़ै किछ मद्दत तुसन मैल्ली सकती थी, तै पेइली बलिदान भोरीए, यानी परमेशेरे जो चढतल चाढोरीए

6 त तै अपने बाजी केरि इज्जत न केरे, एन्चरे तुस अपने रसमन सेइं परमेशेरो हुक्म टलोइतथ।

7 हे पाखंडी लोकव, यशायाह नेबे तुशशे बारे मां ई भविष्यवाणी ठीक कियोरीए,

8 एना लोक ऐशी सेइं त मेरी बड़ी तारीफ़ केरतन,

पन एन केरे दिल मीं करां बड़े दूर आन।

9 एना लोक बेफैइदी मेरी आराधना केरतन,

किजोकि एना मैन्हु केरे हुक्मां केरि शिक्षा देतन।”

Matthew 15:21-23
(Matthew 7:14-23)

10 फिरी मैन्हु एप्पू कां कुजेइतां ज़ोवं, “शुना, ते समझा।

11 ज़ै चीज ऐशी मां गाचे तैस सेइं मैन्हु ज़ुट्टो न भोए, पन ज़ैन तैसेरे ऐशी मरां बेइरोवं निस्ते, तैन्ने तैस ज़ुट्टो केरते।”

12 तैखन चलेईं यीशु कां एइतां ज़ोवं, “कुन तू ज़ानतस कि फरीसी लोकेईं ए गल शुन्तां ठोकर खाइ?”

13 तैनी जुवाव दित्तो, “ज़ै बुट मेरे स्वर्गेरि वाजे नईं लोरो तै ज़ीलना पुटतां छुडनोए।

14 तैन केरि परवाह न केरा, तैन काने बत हिराने बालेन, अगर अक कानो होरि काने बत हिराए, त तैना दुइये गढे मां बिछुड़ेले।”

15 एन शुन्तां पतरसे ज़ोवं, “ए मिसाल असन समझा।”

16 यीशुए ज़ोवं, “कुन तुस हेजू भी बेसमझाथ?”

17 “कुन तुस न ज़ानथ, कि ज़ैन किछ ऐशी मां गाते तैन पेटे मां गाते, ते फिरी पेटे मरां बेइर निस्ते?”

18 पन ज़ैन किछु मैनेरे अन्तरेरां निस्ते, तैन दिले मरां निसते, तैन्ने मैन्हु जुटो करेते?

19 किजोकि बुरे खियाल, कल्ल केरनो, अड्लाए देइने गलत कम केरनू, बदमाशी, चोरी, झूठी गवाही देनी, ते तुहीन दिले मरां निसचे ।

20 एन एरी गल्लन ज़ैना मैन्हु जुटो केरचन, पन हथ धोने बगैर रोट्टी खाने सेइं मैन्हु जुटो न भोए ।”

मत्ती 7:24-30

21 यीशु तैट्ठां ज़लो जेव, ते सूर ते सैदारे आसेपासेरे इलाकेरे नेडे अव ।

22 तैस इलाकेरी अक कनानी कुआन्श यीशु कां आई, ते चिन्डां मैरतां ज़ोने लगगी, “हे प्रभु दाऊदेरा मट्ठां, मीं पुड़ दया केर, मेरी कुइये पुड़ भूतेरो सैयोए, तैन भूत तैस बडू सताते ।”

23 पन यीशुए कोई जुवाब न दित्तो, तैसेरे चले नेडे एइतां तैस कां मिनत केरने लगगे, “एस भेज, किजोकि ए चिन्डां मारचे ते इश्शो पीछो न छुडे ।”

24 तैनी जुवाब दित्तो, “अवं इस्राएलेरी हेरोरि भैड्डां केरे अलावा होरि कोन्ची कां नई भेजोरो ।”

25 पन तै कुआन्श आई, ते तैस कां मथ्यो टेकतां ज़ोने लगगी, “हे प्रभु मेरी मदत केर ।”

26 तैनी जुवाब दित्तो, “बच्चा* केरि रोट्टी नेइतां कुतरन देनी ठीक नई ।”

27 तैसां ज़ावं “सच्चे प्रभु, पन ज़ैन टुक्के मालिकेरी मेज्जे पुडेरां बिछुडतन तैना कुतरां भी खातन ।”

28 यीशुए तैस जुवाब दित्तो, “ए कुआन्श तेरो विश्वास बडोए, जेरू तू चातिस तेरे लेइ तेरहु भोए” ते तैसारी कुई तैखने बेज्जोइ जेई ।

मत्ती 7:24-30

29 यीशु तैट्ठां निस्तां गलील समुन्दरेर वन्ने पुड़ अव, तैखन तै एक्की पहाड़े पुड़ गेइतां बिश्शी जेव ।

30 ते बडे लोकां केरि भीड़ तैस कां आई, तैन लोकेई एप्पू सेइं साथी टोंटे, काने, लट्टे, डोंडे ते होरे काई एरे ज़ेरे मैन्हु साथी आने, ते तैसेरे पावन कां छुड्डे, ते तैनी तैना सब बज्जाए ।

31 ज़ैखन लोकेई हेरू कि लट्टे गल्लां केरतन कमज़ोर तकडे भोतन, टोंटे ज़लतन ते काने लातन त तैना बडे हैरान भोइ जे ते इस्राएलेरे परमेशेरी तारीफ़ केरने लगगे ।

मत्ती 4:00

(मत्ती 8:1-10)

32 यीशुए अपने चले कुजेइतां तैन सेइं ज़ावं, “मीं एन लोकन पुड़ बडो तरस एइते, एना मैन्हु टलेइ दिहैडी केरे देंते बराबर मीं सेइं साथिन, ते एन कां खाने जो किछु भी नई । अवं एन नियन्ने भेजने न चैई, कोस्कोई एरू न भोए कि एना बत्ती मां रेड गान ।”

33 तैसेरे चलेई तैस जुवाब दित्तो “अस इस सुनसान ठैरी मां एतरे लोकां केरे लेइ रोट्टी कोट्टां आनम, ज़ैना सेब्भी केरे लेइ पूरी भोन?”

34 यीशुए पुच्छू, “तुसन कां केतरी रोट्टी आन?” तैनेई ज़ावं, “सत रोट्टिन ते किछु निक्की मेछली भी आन ।”

35 तैखन तैनी लोकन ज़मीनी पुड़ बिश्नेरे लेइ ज़ावं ।

36 ते यीशुए तैना सत रोट्टी ते मेछली टलेइ, ते परमेशेरू शुक्र केरतां टलोडी, ते अपने चलन कां दित्ती ते चलेई तैना मैनन् दित्ती ।

37 सारे मैन्हु रोट्टी खेइतां रेज्जी जे । तैल्ला पत्ती, यीशुएरे चलेई मेछली त कने रोट्टी केरे बच्चोरे टुक्डन मरां सत टोकरे भेरतां सल्ले ।

38 रोट्टी खाने बालां केरि तैधात कुआन्शां ते बच्चां केरे अलावा 4000 मडद थिये ।

* 15:26 बच्चां; बच्चां केरो मतलब इड़ी यहूदी लोकन कुतरां केरो मतलब गैर कौमां केरे लोकन ।

39 तैखन तैने तैना सब लोक भेजे ते एप्पू किशती मां ज़ेद्धतां मगदन इलाके जो ज़लो जेव ।

16

⚬⚬⚬⚬ ⚬⚬ ⚬⚬⚬⚬ ⚬⚬⚬⚬ ⚬⚬⚬⚬ ⚬⚬⚬⚬ ⚬⚬⚬⚬⚬⚬⚬⚬⚬ ⚬⚬⚬⚬ ⚬⚬⚬⚬
(⚬⚬⚬⚬⚬) 8:11-13; ⚬⚬⚬⚬⚬) 12:54-56)

1 किछ् फरीसी ते किछ् सद्की लोक यीशु कां आए, “ते तैस अज़मानेरे लेइ तैस सेइं ज़ोवं, असन कोई अम्बरेरो निशान हिरा ।”

2 तैनी तैन जुवाब दित्तो, “ज़ैखन इलोझ भोतीए त तुस ज़ोतथ कि मौसम रोड़ोए किजोकि अम्बर लाले ।

3 ते झेझां ज़ोतथ कि अज़ आँधी एजनीए किजोकि अम्बर लाले ते बिदलारे, तुस अम्बर हेरतां अंदाज़ो लेइता ज़ोतथ, पन ज़मानेरो निशान न पिशैनी सकतथ!

4 इस ज़मानेरे बुरे ते बदमाशी केरनेवाले लोक निशान मगतन, पन तैन योना नेबेरे अलावा होरो कोई निशान न दित्तो गालो ।” यीशु तैन शैरतां ज़लो जेव ।

⚬⚬⚬⚬ ⚬⚬ ⚬⚬⚬⚬ ⚬⚬⚬⚬ ⚬⚬⚬⚬ ⚬⚬⚬⚬⚬⚬⚬⚬⚬ ⚬⚬⚬⚬ ⚬⚬⚬⚬
(⚬⚬⚬⚬⚬) 8:14-21)

5 ते यीशुएरे चेले समुन्दरे पार पुज़ी जे, पन तैनेईं रोट्टी साथी नेनी बिसरोरी थी ।

6 यीशुए तैन सेइं ज़ोवं, “खबरदार फरीसी ते कने सद्की लोकां केरे खमीरे करां हुशार रेइयथ ।”

7 तैना एप्पू मांमेइं गलवात केरने लगगे, “असेईं रोट्टी नईं आनोरी, एल्हेरेलेइ तै एरू ज़ोने लोरोए ।”

8 एन ज़ैनतां, यीशुए ज़ोवं, “हे घट विश्वैसव, तुस एप्पू मांमेइं किजो सोची राओरथ, कि असन कां रोट्टी नईं?

9 कुन तुसन याद नईं? ज़ताली मीं 5000 मैन्हु केरे लेइ पंज़ रोट्टी दलोइतां दित्तोरी थी, त तुसेईं बादे मां बच्चोरी रोट्टी केरे केतरे टोकरे भेरतां सल्लोरे थिये?

10 ते तैन 4000 मैन्हु केरे लेइ सत रोट्टी ते टुकां केरि केतरी टोकरी सैल्लोरी थी?

11 तुस की न समझथ, कि मीं तुसन रोट्टी केरे लेइ न थियूं ज़ोरू? पन फरीसी ते कने सद्की लोकां केरे खमीरे करां हुशार रेइयथ ।”

12 तैखन तैन केरि समझी मां अव, कि तैनी रोट्टी केरे लेइ नईं, बल्के फरीसी ते कने सद्की लोकां केरे खमीर यानी शिक्षाईं करां हुशार रानेरे लेइ ज़ोरू थियूं ।

⚬⚬⚬⚬ ⚬⚬⚬⚬ ⚬⚬⚬⚬ ⚬⚬⚬⚬ ⚬⚬⚬⚬ ⚬⚬⚬⚬
(⚬⚬⚬⚬⚬) 8:27-30; ⚬⚬⚬⚬⚬) 9:18-21)

13 ज़ैखन यीशु केसरिया फिलिप्पी इलाके मां अव, त तैनी अपने चलन पुच्छ्छ्: “मैनेरू मट्टू कौने, लोक एस बारे मां कुन ज़ोतन?”

14 चेलेईं ज़ोवं, “किछ् ज़ोतन यूहन्ना बपतिस्मो देनेबालोए, किछ् ज़ोतन एलिप्याह, ते किछ् ज़ोतन यिमंयाह नबी ते किछ् ज़ोतन नेबन मरां कोई अक आए ।”

15 यीशुए तैन पुच्छ्छ्छ्, “पन तुस मेरे बारे मां कुन सोचतथ कि अवं कौन आईं?”

16 शमौन पतरसे जुवाब दित्तो, “तू ज़ीते परमेशेरू मट्टू मसीह आस ।”

17 यीशुए ज़ोवं, “ए शमौन योनारे मट्टां तू धन आस, किजोकि ए गल मासे या खूने नईं बल्के मेरे स्वर्गेरि बाजे तीं पुड़ बांदी कियोरीए ।

18 ते अवं तीं सेइं ज़ोताईं, तू पतरस आस ते अवं इस पक्के घोड़े पुड़ अपनि कलीसिया बनेइलो ते पातालेरां दारां तैस पुड़ अस्सर न केरि बटेलां ।

19 अवं अपने स्वर्गेरि राज़ेरी चेवी तीं देइलो, ते ज़ैन किछ् तुस ज़मीनी पुड़ बंधेले तैन स्वर्गे मां बंधोलू, ते ज़ैन किछ् तू ज़मीनी पुड़ खोल्लेलो तैन सब किछ् स्वर्गे मां खुल्लेलू ।”

20 तैखन यीशुए चलन जो ज़ोवं, ए गल केन्वी सेइं न ज़ोइयथ कि अवं मसीह आईं ।

२२२२२२ २२२२ २२२२ २२२ २२२ २२२२ २२२२२२२२२२२२ २२२२२२
(२२२२२२ 8:31-33; २२२२२ 9:22)

21 एसेरे बाद यीशुए अपने चलन ज़ोने लगो कि, “तैसेरू यरूशलैम नगरे मां गानू ज़रूरीए ताके यहूदी लोकां केरे बुजुर्गन, प्रधान याजकन ते शास्त्री लोकां केरे हथेईं तै बड़ो दुःख झैल्ले, ते मारो गाए ते तै ट्लेइयोंवं दिहाड़े फिरी ज़ीतो भोलो।”

22 पतरस तैस अलग नेइतां झिड़कने लगो, “हे प्रभु, परमेशर न केरे, तीं सेईं एरू कधे न भोलू।”

23 यीशुए मुड़तां पतरसे सेईं ज़ोवं, “हे शैतान, मीं करां दूर भो, तू मीं करां पाप करानेरी कोशिश कराने लोरोस। किजोकि तू ज़ेन्वरे परमेशर सोचते तेन्वरे नई बल्के ज़ेन्वरे मैन्हु सोचन तेन्वरे सोचतस।”

२२२२२२ २२२२२ २२२२२२२ २२२२
(२२२२२२ 8:34; 9:1; २२२२२ 9:23-27)

24 तैखन यीशुए अपने चलन सेईं ज़ोवं, “अगर कोई मीं पत्ती एज्जो चाते त तै अपने आपेरो इन्कार केरे, ते अपनू कूरुस छुड़तां मीं पत्ती चले।”

25 “किजोकि ज़ै कोई अपनि जान बचानी चालो, त तै तैस गुवालो, ते ज़ै अपनि जान मेरे लेइ गुवालो, त तै तैस हासिल केरेलो।

26 अगर कोई सारी दुनिया हासिल केरे, ते अपने हमेशारे ज़िन्दगी गुवाए, त तैस कुन फैइदो भोलो? या मैन्हु हमेशारे ज़िन्दगरे बदले कुन देलो?

27 किजोकि ज़ैखन मैनेरू मटटू अपने वाजेरी महिमाईं मां अपने स्वर्गदूतन सेईं साथी एज्जेलू, तैखन तै हर केन्वी तैन केरे कियारे कम्मां केरो फल देलो।

28 अवं तुसन सेईं सन्न ज़ोतईं कि ज़ैना इडी खड़े आन, ज़ां तगर मैनेरे मटटे अपने राज्जे मां एइते न लाएले, तांतगर न मरेले।”

17

२२२२२२ २२२२ २२२२२२२ २२२ २२२२२२
(२२२२२२ 9:2-13; २२२२२ 9:28-36)

1 शेइ दिहाड़ना बाद, यीशु अपने चले पतरस, याकूब त तैसेरे दूला यूहन्ना सेईं साथी एक्की पहाड़े पुड़ जेव, जेडी कोई भी न थियो।

2 तैडी तैन केरे सामने तैसेरी शकल बेदलोईं जेईं, तैसेरू तुत्तर दिहाड़ेरू ज़ेरू चमकने लगू ते तैसेरां लिगड़ां लोअरां ज़ेरां छित्तां भुआं।

3 तैखन तैनेईं मूसा ते एलिय्याह नबी यीशु सेईं गल्लां केगते लाए।

4 पतरसे यीशु सेईं ज़ोवं, “हे प्रभु इश्शु इडी रानू रोडूए, अगर तू चातस त आस ट्लाईं डेरे बनाम, अक तेरे लेइ ते अक मूसेरे लेइ ते अक एलिय्याहरे लेइ।”

5 ते ए गल ज़ोईं राहोरो थियो, अक बड़ी चमकती बिदलार तैन पुड़ एइतां रुकी, ते तैस बिदलारी मरां ई आवाज़ आई, “एन मेरू ट्लारू मटटूए, ज़ैस पुड़ अवं खुश आई, एसेरी शुना।”

6 चले एन शुन्तां तुत्तेरे भारे बिछड़े ते बड़ डेरि जे।

7 पन यीशुए एइतां तैन सेईं हथ लाव, ते ज़ोवं, “उठा, डरा नन्ना।”

8 ज़ैखन तैनेईं चेवरे पासन तक्कु, त यीशुएरे अलावा होरो कोई न लाव।

9 ज़ैखन तैना तैस पहाड़े पुड़ेरां उन्दे ओरे थियो, त यीशुए तैन ई हुक्म दित्तो, ज़ैन किछ् तुसेईं लाहेरूए, “ज़ां तगर मैनेरू मटटू मुड़दन मरां ज़ीतू न भोए तांतगर केन्वी सेईं न ज़ोइयथ।”

10 तैसेरे चलेईं तैस पुच्छू, “शास्त्री किजो ज़ोतन कि मसीहरे एज्जेनरां पेइले, एलिय्याह नेबेरू दुनियाईं मां एज्जू ज़रूरी आए?”

11 तैनी जुवाव दित्तो, “एलिय्याह ज़रूर एज्जेलो ते सब किछ् बहाल केरेलो।

- 12 पन अवं तुसन सेइं ज़ोतई कि 'एलिय्याह' त पेइले ओरोए, पन लोकेई तैन पिशानो, पन ज़ैन चाऊ तैस सेइं तैन्ने कियूं, एन्चरे मैनेरू मट्टू भी तैन केरे हथ्यन सेइं दुःख भोगेलो।”
- 13 तैखन चलेई बुझू कि असन सेइं यूहन्ना बपतिस्मो देनेबालेरे बारे मां ज़ोने लोरोए।

ॐॐॐॐ ॐॐ ॐॐॐॐ ॐॐॐॐ ॐॐॐ ॐॐ ॐॐॐॐॐॐ ॐॐॐ ॐॐॐॐ
(ॐॐॐॐ 9:14-29; ॐॐॐ 9:37-43)

14 ज़ैखन तैना हछे मैन्हु केरि बड़ी भीड़ी कां पुजे, त अक मैन्हु तैस कां अव, ते ज़ैधू केरे भारे विश्तां ज़ोने लगे।

15 “हे प्रभु मेरे मट्टे पुड़ दया केर, तैस मिरगरी वजाई सेइं दौवरे एइतन, ते तैस बडो दुखे, ते बार-बार अग्गी मां ते बार-बार पैनी मांजो खिरकते।

16 मी तैन तेरे चलन कां आनोरू थियूं, पन तैनेई तैन ठीक न केरि बट्ट।”

17 यीशुए ज़ोवं, “हे घट विश्वावैसव ते ढीठ लोकव, अवं केइस तगर तुसन सेइं साथी भोनोई, केइस तगर तुशशी झेलतो रेइलो? तै मीं कां आनां।”

18 तैखन यीशुए तैन भूत झिडकू, ते तैस पुड़ां सैयो निस्सी जेव, ते तैन मट्टू तैखने ठीक भोइ ज़ोवं।

19 तैखन चलेई अकैल्ले ज़ेरे यीशु कां गेइतां पुच्छू, “अस तैस मट्टे मरां भूतेरो सायो की न केइडी सके?”

20 तैनी तैन सेइं ज़ोवं, “अपने घट विश्वासेरे वजाई सेइं, अवं तुसन सेइं सन्न ज़ोताई, अगर तुशशो विश्वास शरीएरे ग्लेवे ज़ेतरो भी भोए, त तुस उस पहाड़े जो ज़ोले कि, ‘इट्ठां निस्तां उड़ी गा,’ त तैन गालू, ते तुशशे लेइ कोई भी गल असुखती न भोली।

21 पन इस किसमेरां भूतां प्रार्थना ते बरते बगैर न निस्सन।”

ॐॐॐ ॐॐॐॐ ॐॐॐ ॐॐ ॐॐॐॐॐॐ ॐॐॐॐॐ ॐॐॐॐॐॐॐॐॐॐ
(ॐॐॐॐ 9:30-32; ॐॐॐ 9:43-45)

22 ज़ैखन तैना गलीले मां थी, त यीशुए तैन सेइं ज़ोवं, “मैनेरू मट्टू भी मैन्हु केरे हवाले कियूं गालू।

23 तैना तैस मारेले, ते तैन ट्लेइयोवं दिहाड़े फिरी ज़ीतो भोलू।” चले एन शुन्तां बड़े परेशान भोए।

ॐॐॐॐॐॐॐ ॐॐॐॐ ॐॐ ॐॐॐॐ

24 ज़ैखन तैना कफरनहूम नगर मां पुजे, त प्रार्थना घरेरे लेइ चुंगी घिन्ने बाले पतरसे कां एइतां पुच्छू, “कुन तुशशो गुरू प्रार्थना घरेरी चुंगी न दे?”

25 तैनी ज़ुवाब दितो, “हाँ देते।” ज़ैखन पतरस घरे मां पुजो त यीशुए तैसेरे पुच्छनेरे पेइले तैस सेइं ज़ोवं, “हे शमौन तू कुन समझतस? दुनियारे राजे कोन लोकन करां चुंगी घिन्तन अपने बच्चन करां या होरि लोकन करां?”

26 पतरसे तैस सेइं ज़ोवं, “होरन करां।” यीशुए तैस सेइं ज़ोवं, “त मट्टां बरी भोइ जेआं।

27 फिरी भी एल्हेरेलेइ कि अस तैन ठोकर न देम, तू समुन्दरे पुड़ गेइतां कंटो लेइतां मेछली टलेइयां, ते ज़ै मेछली पेइली लगगेली, तैसारू आशी खोल्लां, ते तीं अक सिक्को मैलनोए, ते तै सिक्को नेइतां मेरी ते अपनि चुंगी देइयां।”

18

ॐॐॐ ॐॐॐ ॐॐॐॐॐॐ ॐॐॐॐॐॐॐॐ ॐॐॐॐॐ ॐॐ ॐॐॐॐ ॐॐॐ
(ॐॐॐॐ 9:33-37; ॐॐॐ 9:46-48)

1 तैखन चले यीशु कां आए ते पुच्छने लगगे, “स्वर्गेर राजे मां सेब्बन करां बड्डो कौने?”

2 तैनी अक निकड़ा बच्चो एप्पू कां कुजाव, ते मझाटे खड़ी कियो।

3 ते ज़ोने लागो, “अवं तुसन सेइं सन्न ज़ोताई, कि तुस अपनो आप बेदलतां निकडे बच्चेरो ज़ेरे न बनथ, त तुस स्वर्गेरे राज्जे मां कधी दाखल न भोले।

4 ज़ै कोई अपनो आप इस बच्चेरो ज़ेरो निकडो बनालो, त तै स्वर्गेरे राज्जे मां बड्डो भोलो।

5 ते ज़ै कोई एरे ज़ेरे निकडे बच्चे मेरे नव्ये सेइं कबूल करते, त तै मीं कबूल करते।”

(***** 9:42-48; ***** 17:1-2)

6 “ज़ै कोई इन निकडन मरां ज़ैना मीं पुड विश्वास केरतन एक्केरे लेइ ठोकर बने, त तैसेरेलेइ एन्ने रोड् आए कि बडे द्वालाटोरो द्वालेइटोल तैसेरे गल्ले उन्डो दंदेइतां डुघे समुन्दरे मां डोबतां छुडोरो लोडते।

7 ठोकरां केरि वजाई सेइं दुनियाई पुड अफ़सोस! ठोकरां लेग्गनी त ज़रुरन पन, अफ़सोस तैस मैन्हु पुड ज़ेसेरी वजाई सेइं ठोकर लग्गतीए।

8 अगर तेरो हथ या तेरो पाव तेरे लेइ ठोकरारो ज़िरयो बनते, त तू तैस केटतां छुड, किजोकि तेरू टोट्टु या कानू बेनतां ज़िन्दगी मां दाखल भोनू रोड्ए, ते तेरे दुइये हथ पाव सथे भोने सेइं अगर तू हमेशारी अग्गी मां गास त तैल्ला केरतां तू टोट्टो या कानो बेनतां रोडोस।

9 अगर तेरी अछ् तेरे लेइ ठोकरां वजा बनती, त तू तैस केढतां शैरी छुड, कानू भोइतां ज़िन्दगी मां दाखल भोनू तेरे लेइ रोड्ए, कि दुइये एछ्छी भोने सेइं तू नरकेरी अग्गी मां गास त तैल्ला रोडोस।”

(***** 15:3-7)

10 “हेरा इन निक्के चेलन मरां तुस केन्ची घटिया न बुझा, अवं तुसन सेइं ज़ोताई कि तैन केरे स्वर्गदूत हर वक्त स्वर्गे मां मेरे बाजी केरे हज़ूरी मां रातन।

11 (किजोकि मैनेरू मट्टू यानी अवं हेरोरे लोकन बच्चने ओरोई।)

12 तुश्शो खियाल कुने? कि केसकोई कां 100 भैड्डां भोन, ते तैस मरां अक हेरोए, त कुन तै नडेनुवं भैड्डां ज़ैडी खतरो न भोए तैडी छुडतां, तैस हेरोरि न तोपेलो?

13 ते अगर एरू भोए, तैस तै मैल्ले, त अवं तुसन सेइं सच्च ज़ोताई कि तै तैना नडेनुवं केरे लेइ एतरी खुशी न मनालो, ते तैस एक्की भैडारे लेइ जादे खुशी बनालो।

14 एन्चरे तुश्शो बाजी ज़ै स्वर्गे मांए, तै एन न चाए कि एन निकन मरां भी कोई नाश न भोए।”

15 “अगर कोई मीं पुड विश्वास केरनेवालो द्वाला तीं सेइं बुराई करते, त तू अकैल्ले मां तैस समझा, अगर तै तेरी गल शुने, त तीं तै वापस परमेशेरे कां आनो।

16 अगर तै तेरी गल न शुने, त तू एप्पू सेइं साथी अक या दूई मैन्हु नेइयां, किजोकि मूसेरे कानूनेरे मुताबिक हर शिकैइतरी मां दूई या द्वालाई मैन्हु गवाह भोतन।

17 अगर तै तैन केरि भी न शुने, त तू कलीसियारे लोकन सेइं ज़ो, अगर तै कलीसियारे लोकां केरि भी न शुने, त तू तैस सेइं एरो बर्ताव केर ज़ेन्चरां तै गैर कौमरो भोए या चुंगी धिन्ने वालो भोए।”

18 “अवं तुसन सेइं सन्न ज़ोताई, ज़ैन किछ् तुस ज़मीनी पुड बंधेले त समझा कि स्वर्गे पुड बंधोलू, ते ज़ैन किछ् तुस ज़मीनी पुड खोल्लेले ते तैन स्वर्गे मां खुल्लेलू।

19 फिरी अवं तुसन सेइं सन्न ज़ोताई, कि अगर तुसन मरां दूई ज़ने धेरेती पुड अक मन भोइतां कोन्ची मसलेरे हल कढनेरे लेइ परमेशेरे करां ज़ै स्वर्गे मां आए महत मगन, त तै तैन केरि महत ज़रूर केरलो।

20 किजोकि ज़ैडी दूई या द्वालाई मैन्हु, मेरे नव्ये सेइं परमेशेरे करां महत मगनेरे लेइ अकोट्टे भोतन, अवं तैडी तैन केरि महत केरनेरे लेइ तैन मां भोइताई।”

11 तैखन पतरसे यीशु कां एइतां पुञ्छू, “परभु अगर कोई तीं पुइ विश्वास केरनेवालो, मीं सेइं बुराई केरतो राए, त अवं केतरे बार तैस माफ़ केरि? कुन सत बार?”

12 यीशुए जुवाब दित्तो, “अवं तीं सेइं इन न ज़ोई सत बार, बल्के सत्तरे सत्तर बार माफ़ करां (यानी लगातार माफ़ केरतू रानू)।

13 बस्सा अवं तुसन सेइं इन ज़ोताई, स्वर्गेरू राज़ तैस राज़ेरू ज़ेरू आए, ज़ैनी सोचू कि अवं अपने नौकरन करां हिसाब धिनी।

14 ज़ैखन तै हिसाब धिन्ने लगो, त अक मैन्हु तैस कां हाज़र कियो, ज़ै दश हज़ार सोन्नेरे सिक्कां केरे तोड़ां* केरो कर्ज़दार थियो।

15 तैस कां कर्ज़ो मुकाने जो किछ न थियू, राज़े हुक्म दित्तो, एसेरे बाल बच्चे ते कुआन्श ते ज़ैन किछ भी आए सब बेचतां कर्ज़ो उसुल केरा।

16 पन तै नौकर ज़ोवले हथ केरतां मालिके कां मिनत केरतां ज़ोने लगो, ‘मीं किछ मौको दे, ते अवं तेरो सारो कर्ज़ो मुकालो।’

17 मालिके तैस नौकरे पुइ बड़ो तरस अव, ते तैनी तै छैडी दित्तो ते तैसेरो कर्ज़ो भी माफ़ कियो।”

18 “पन ज़ैखन तै नौकर तैट्टां चलो जेव, त तैस अक एरो नौकर मैल्लो, ज़ै तैसेरो साथी थियो, ते तैस तैनी 100 दीनार† दित्तोरे थियो, तैनी तै गलेरां टलाव ते ज़ोने लगो, ‘मेरो कर्ज़ो कढ।’

19 तैसेरो साथी नौकर तैस्से कां मिनत केरने लगो, मीं किछ मौको दे ते अवं तेरो सारो कर्ज़ो मुकालो।

20 पन तैनी तैसेरी अक गल भी न शुनी, ते तैनी तै देपतां छुड्डो कि ज़ां तगर कर्ज़ो न देस तांतगर दप्पोरो रा।

21 ज़ैखन होरि नौकरेई एन शुनू, त तैना बड़े परेशान भोए, ते मालिके कां गेइतां सारो हाल शुनाव।

22 तैखन मालिके तै अपने नौकर कुजेइतां ज़ोवं, ‘ओ बेईमान नौकरा मीं तेरो सारो कर्ज़ो माफ़ कियो, किजोकि तीं मीं कां छुदे कियोरे थियो।

23 कुन तेरे लेइ ज़रूरी न थियू, कि ज़ेन्चरे मीं तीं पुइ दया केरतां तेरो कर्ज़ो माफ़ कियो, तेन्चरे तू भी अपने सैथन पुइ दया केरतां तैन केरो कर्ज़ो माफ़ केरेथो?”

24 मालिके सरक आई, ते तैनी तै नौकर सज़ा देनेवालां केरे हवाले कियो, कि ज़ां तगर मेरो सारो कर्ज़ो न दे तांतगर दप्पोरो भोए।

25 “एन्चरे अगर तुसन मरां हर कोई, तैस मैन्हु ज़ै मीं पुइ विश्वास केरते दिले सेइं माफ़ न केरे त मेरो स्वर्गेरे बाजी यानी परमेशर भी तुसन सेइं एन्चरे पैश एज्जेलो।”

19

????????? ???? ???? ???? ???? ????
(????? 10:1-12)

1 ज़ैखन यीशुए एन गल्लां ज़ोई छैडी, त तै गलीले मरां गेइतां यरदन दरियारे पार यहूदिया इलाके मां चलो अव।

2 बड़े लोक यीशु पत्ती चले जे, ते यीशुए तैना तैडी बज्झाए।

3 तैखन फरीसी लोकेई यीशु कां एइतां तैस अजमानेरे लेइ पुञ्छू, “कुन मैन्हु अपनि कुआन्श केन्ची भी वजाई सेइं फारस्की देनी जेइजे?”

4 तैनी जुवाब दित्तो, “कुन तुसेईं नई पढेरू कि ज़ैने तैना बनां तैनी शुरु करां मइद ते कुआन्श बनेवरां थियां।

5 एल्हेरेलेइ मइद अपने हाज बव्ये करां कनारे बिशतां अपनि कुआन्शी सेइं साथी रालो, ते तैना दुइये अक जान भोलां।’

* 18:24 तोड़ां: अक तोड़ां 15 सालां केरे मज़ारे बराबर भोती थी † 18:28 100 दीनार शौब दिहेई केरू मज़दूरी।

6 एल्हेरेलेइ हुनी तैना परमेशेरी नजरी मां दई नई, पन अक्के आन । एल्हेरेलेइ जैना परमेशेरे जोडोरेन, तैनन् कोई मैन्हु अलग न केरे!”

7 तैनेई तैस पुच्छ, “फिरी मूसे ए हुक्म किजो दित्तो कि फारख्ती लिखतां छैडी देथ?”

8 तैनी तैन सेइ ज़ोवं, “मूसे तुशे सखत दिलेरी वजाई सेइ अपनि कुआन्शन छडनेरो हुक्म दित्तोरो थियो, पन शुरू करां एन न थियूं।

9 अवं तुसन सेइ सत्र ज़ोताई, कि ज़ै कोई अपनि कुआन्शी बदमैशेरे अलावा कोन्ची होरि गल्ली पुड़ फारख्ती दे, ते ते केन्ची होरि सेइ इला बनाते, त ते (एप्पू) बदमाशी केरते । ते ज़ै तैस शैरोरी कुआन्शी सेइ इला बनाते, त तै भी बदमाशी केरते।”

10 चलेई यीशु सेइ ज़ोवं, “अगर मड़द ते कुआन्शारे रिशतेरो ई हाले त इला न लोडे बनोरो।”

11 यीशुए तैन सेइ ज़ोवं, “ए गल सब कबूल न केरि बटन, सिर्फ तैना ज़ैन परमेशेर ई काबलीत दित्तोरीए।

12 किछ त जर्मनेरे हिजडे भोतन ते किछन लोक बनातन, ते किछ एरे भी आन, कि ज़ैन स्वर्गेरि राज्जेरे लेइ इला न बनान, ते ज़ैना इना गल्लां सेमझी सकतन तैना समझन।”

~~~~~

(~~~~~ 10:13-16; ~~~~~ 18:15-17)

13 तैखन लोकेई बच्चे यीशु कां आने, कि तैन पुड़ हथ रेखतां प्रार्थना केरे, पन चलेई तैना लोक झिड़के।

14 यीशुए ज़ोवं, “बच्चे मीं कां एजने देथ, तैन न टाका, किजोकि स्वर्गेरू राज एरां केरूए।”

15 ते तै बच्चन पुड़ हथ रेखतां तैटटां अग्रोवं चलो जेव।

~~~~~

(~~~~~ 10:17-31; ~~~~~ 18:18-30)

16 हेरा, अक मैन्हु यीशु कां अवं ते पुच्छने लगो, “हे गुरू अवं कुन भलू कम केरि, कि हमेशारी जिन्दगी हासिल केरि?”

17 यीशुए तैस सेइ ज़ोवं, “तू मीं भलैइये बारे मां किजो पुच्छतस? परमेशेरे अलावा होरो कोई भी रोडो नई, पन अगर तू हमेशारी जिन्दगी हासिल केरनि चातस त हुक्म मनन।”

18 तैनी ज़ोवं, “कोन हुक्मन पुड़?” यीशुए ज़ोवं, “खून नई केरनो, बदमाशी नई केरनि, चोरी नई केरनि, झूठी गवाही नई देनी,

19 अपने हाज बच्चां केरि सेवा केर, अपने पड़ोसी सेइ अपने बराबर प्यार केर।”

20 तैनी जवाने जुवाब दित्तो, “एना सब हुक्म अवं बचपनेरो मन्तो ओरोई। हुनी मीं मां को कमीए?”

21 यीशुए तैस सेइ ज़ोवं, “अगर तू सिद्ध भोनू चातस, त गा ज़ैन किछ तीं कां आए तैन बेचतां गरीब मैनन् दे, तैखन तीं स्वर्गे मां खजानो मैलेलो। ते एइतां मीं पत्ती च़ल।”

22 पन तैनी जवाने ए गल शुनी, त बड़ो उदास भोइतां च़लो जेव, किजोकि तै बड़ो अमीर थियो।

23 तैखन यीशुए अपने चेलन सेइ ज़ोवं, “अवं तुसन सेइ सत्र ज़ोताई कि अमीर मैनेरू स्वर्गेरि राज्जे मां दाखल भोनू मुशकले।

24 फिरी अवं तुसन सेइ ज़ोताई, परमेशेरे राज्जे मां अमीर मैनेरू दाखल भोने केरां ऊंटेरू सांधनेरे पाए मरां निस्नू सुख्खू आए!”

25 एन शुन्तां चलेई हैरान भोइतां ज़ोवं, “फिरी कसेरी मुक्ति भोइ बटतीए।”

26 यीशुए तैन केरे पासे तेकतां ज़ोवं, “मैनन् करां त एन न भोइ सके पन परमेशेरे करां सब किछ भोइ बटते।”

27 एस पुड़ पतरस ज़ोने लगो, “हेर अस सब किछ शैरतां तीं पत्ती च़लोरेम ते असन कुन मैलनूए?”

28 यीशुए तैन सेइं ज़ोवं, “अवं तुसन सेइं सन्न ज़ोताई, कि नंब्वे दुनियाई मां ज़ैखन अवं मैनेरू मट्टू अपने महिमारे तखते पुड़ बिशेलू, त तुस भी मीं पत्ती चलने वाले 12 तखतन पुड़ बिशतां इसराएलेरे 12 गोत्रां केरो इन्साफ केरेले।

29 ते ज़ैनी केन्चे अपना घरां ते दला या बेइन या हाज या बव या बच्चे या ऊडारां छुड्डोरेन, तैस 100 गुणा फल मैलेलो, ते हमेशारी जिन्दगरी विरासत मैलेली।

30 पन बड़े मैन्हू ज़ैना हुन्ना पेइले आन, तैना वादे मां पत्रोवं भोनेन। त ज़ैना हुन्ना पत्रोवं आन, तैना वादे मां पेइले भोनेन।”

20

CHAPTER 20

1 “स्वर्गरू राज तैस ज़िमदारू ज़ेरूए ज़ै झेझां उट्टतां ते अपने दाछरी बागी मां मज़दूर कम्मे लाए।

2 तैनी अक दीनार* रोज़ मुजुरी देनेरे लेइ तैना बागी मां भेजे।

3 फिरी नौ बजेइं बेइर गेइतां तैनी बज़ारे मां काई लोक बेकार खड़े लाए।

4 तैनी तैन सेइं ज़ोवं, ‘तुस भी मेरी बागी मां गाथ, ते ज़ैन किछ जेइज भोलू अवं तुसन देलो।’ तैना कम्मे पुड़ जो जे।

5 फिरी तैनी दुपहरेईं ते टलेइ बज़न तगर एन्ने कियूं।

6 पंचे बजेइं तैनी बेइर निस्तां किछ होरे लोक भी खड़खड़े लेइतां तैन पुच्छू, ‘तुस झेझेरे देंते किजो खेड़ोरेथ?’ तैनेईं जुवाव दित्तो, ‘अस केन्चे कम्मे नईं लोरे।’

7 तैनी तैन सेइं ज़ोवं, ‘तुस भी मेरे बागी मां गाथ ते कम केरा।’”

8 “ड्लोझी तैनी बागोरे मालिके अपने मुन्शी सेइं ज़ोवं कि, ‘पेइले लगगोरे मज़दूर ते पत्ती कम्मे लगगोरे मज़दूर सेबन अक-अक दीनार दिहाड़ी दे।’

9 ज़ैना पंचे बजेइं ओरे थिये, तैन भी अक दीनार पूरी दिहाड़ी मैल्ली।

10 ज़ैना मज़दूर झेझां कम्मे लगगोरे थिये तैन केरि बारी आई त तैनेईं सोचू कि असन जादे मैलनेन, पन तैन भी अक-अक दीनार मैल्लो।

11 ज़ैखन दिहाड़ी मैल्ली, त तैस मालिकेरे बारे मां तैना एप्पू मांमेइं बुराईं करेने लगगे।

12 ‘पत्ती लोरे मज़दूरैईं सिर्फ अक बेन्टो कम कियोरूए, ते तीं तैन भी असन बराबर ज़ैनेईं सैरी दिहैड़ी कम कियां मुजुरी दिती।’

13 तैनी तैन मरां एककी जुवाव दित्तो, ‘दोस्त मीं तीं सेइं कोई बेइन्साफी नईं कियोरी, कुन मीं तीं सेइं अक दीनार दिहैड़ी गल न थी कियोरी?’

14 एन्हरेलेइ ज़ै तेरी मज़दूरीए तै टला ते चलो गा, ए मेरी मर्जीए कि वादे मां लगगोरे मज़दूर भी एत्रे दईं।

15 कुन मीं ए अधिकार नईं कि अपने माले मरां ज़ैन चैईं तैन केरि? तू मीं पुड़ एन्हरेलेइ ज़लतस कि अवं खुल्ले दिले सेइं देने वालोईं?’

16 एन्हरेलेइ बड़े मैन्हू ज़ैना हुन्ना पेइले आन, तैना वादे मां पत्रोवं भोनेन, ते ज़ैना हुन्ना पत्रोवं आन, तैना वादे मां पेइले भोनेन।”

CHAPTER 20

(**CHAPTER 10:32-34; CHAPTER 18:31-34**)

17 यरूशलेम नगरे जो गांते बार यीशुए अपने 12 चलन अलग नेइतां तैन सेइं ज़ोवं, कि तैस सेइं कुन भोने वालूए।

18 ‘हेरा, अस यरूशलेम नगरे जो चलोरेम, मैनेरू मट्टू प्रधान याजकां ते शास्त्री लोकां केरे हवाले कियूं गालू, ते तैना तैस मारनेरे काबल ठैरेले।

* 20:2 दीनार एककी दिहैड़ी मज़दूरी।

19 तैस गैर कौमां केरे हवाले केरेले, तैना मैनेरे मट्ठेरी यानी मेरी हासी बनाले, ते तैस कोडे बाहेले, ते फिरी तैस कुरूसे पुड चाढेले, ते अवं दलेइयोवं दिहाडे फिरी ज़ीतो भोलो ।”

????? ?????? ?????

(????? 10:35-45)

20 तैखन जब्दी नंव्वेरे मैनेरां मट्ठां केरि अम्मा अपने मट्ठन सेइं साथी यीशु कां आई, ते तैस कां मिनत केरने लाई ते तैस करां किछ् मगने लग्गी ।

21 तैने तैस पुच्छ्, “तीं कुन लोडते?” तैसां ज़ोवं, “वचन दे, कि मेरां इन्ना मट्ठां तेरे राज्जे मरां अक तेरे देइने पासे त होरू तेरे बाएं पासे विग्रशन ।”

22 पन यीशुए तैन सेइं ज़ोवं, “तुस न ज़ानथ कि कुन मगने लग्गोरेथ! ज़ेन्व्वेरे दुख अवं झलने बालोई, कुन तुस झेल्ली सकतथ? तैनेईं जुवाव दित्तो, हाँ झेल्ली सकतम ।”

23 तैनी तैन सेइं ज़ोवं, “तुस मेरे ज़ेरो दुःख झललेले, पन एन मेरू कम नईं कि एककी देइने पासे ते होरि बाएं पासे विशैली, ए ठार ज़ेसेरे लेइ मेरे बाजेरे तरफां रखोरीए तै तैसेरे लेइए ।”

24 एन शुन्तां होरि दश चलेईं तैन दूईं हलान पुड नराज्ज भोइ जे ।

25 यीशुए अपने सारे चले नेडे कुजेइतां, तैन सेइं ज़ोवं, “होरि कौमां केरे प्रधान अपने लोकन पुड राज्ज केरतन, ते तैन केरे मालिक तैन पुड अधिकार रखतन ।

26 पन तुसन मां एरू न लोडे भोरू, बल्के तुसन मां ज़े बड्डो वन्नो चाते, तै सेब्भी केरो सेवक बने ।

27 ज़ै कोई तुसन मां प्रधान वन्नू चाए, तै सेब्भी केरो गुलाम बने,

28 ज़ेन्व्वेरे कि मैनेरू मट्ठू एल्हेरेलेइ नईं ओरूए कि कोई तैसेरी सेवा केरे, बल्के एल्हेरेलेइ कि सेवा केरे, ते अपनि जान बडे लोकां केरे छुटकारेरे लेइ दे ।”

????? ?????? ?????

(????? 10:46-52; ????? 18:35-43)

29 ज़ैखन यीशु त तैसेरे चले यरीहो नगरे मरां ज़लोरे थिये, त बडे लोक तैस पत्पती ज़ले ।

30 दूईं काने बत्ती मां विग्रशारे थिये, तैनेईं एन शुनू कि यीशु इस बत्तां ज़लोरोए, त तैना चिन्डां मारने लग्गे, “हे प्रभु दाऊदेरा मट्ठां असन पुड दया केर ।”

31 लोक तैन झिडकने ते ज़ोने लग्गे कि चुप राथ, पन तैना मना चिन्डां मारने लग्गे, “हे प्रभु, दाऊदेरा मट्ठां असन पुड दया केर ।”

32 तैखन यीशु खेडोव ते तैन कुजेइतां पुच्छ्ने लग्गे, “तुस कुन चातस अवं तुग्रशे लेइ केरि?”

33 तैन कानेईं जुवाव दित्तो, “हे प्रभु अस चातम कि इग्रशी एच्छ्छन लौ एज्जे ।”

34 यीशुए तैन पुड बड्डो तरस अव, ते तैनी तैन केरे एच्छ्छन पुड हथ रख्खो ते तैना लहने लग्गे, ते दुइये काने यीशु पत्ती ज़ले जे ।

21

????? ?????? ?????

(????? 11:1-11; ????? 19:28-40; ????? 12:12-19)

1 ज़ैखन यीशु ते कने तैसेरे चले यरूशलेम नगररे नेडे पुजे, त यीशुए ज़ैतून पहाडे पुड बैतफगे मरां अपने दूईं चले एन ज़ोइतां अग्रोवं भेजे ।

2 “अपने सामने उस इलव्वे मां गाथ, ते तैड़ी पुजले, त तुसन अक गधी बंधोरी मैलनिये, ते तैस साथी तैसेरो वच्चो भी भोनोए, तैस खोलतां इड़ी मीं कां आनां ।”

3 अगर तुसन कोई पुच्छ्छे, त तुस ज़ोइयथ, कि प्रभुए एसेरी ज़रूरत आए, ते तै लूशी तैस वापस भेजेलो ।

4 इन सब किछ् एल्हेरेलेइ भोवं, कि नेबे ज़ैन वचन ज़ोरू थियूं, तैन पूरू भोवं,

5 “सिय्योनेरे कुइये सेइं ज़ोथ,

कि तेरो राज्ञो तीं कां ओरोए,
ते तै बडो हलीमी ते तै गैधी पुड च्चेढतां ओरोए,
बल्के गधेरे बच्चे पुड ।”

6 चले चले जे ते जेन्चरे यीशुए ज़ोरू थियुं, तैनेई तेन्चरे कियुं ।

7 तैनेई तै गधी ते तैसारो बच्चो आनो, ते तैन पुड अपना लिगडां छडां, ते यीशु तैस पुड च्चेढतां चलो ।

8 बडे लोकेई अपना लिगडां बत्ती मां विछ्ठां, ते किछ्छेई बुट्टा केरे डाल केटतां बत्ती मामेई छुडोरे थिये ।

9 ते तैना लोक जैना यीशु सेइं साथी अगरी-अगरी ते पत्ती-पत्ती चलोरे थिये, तैना नहरे देते थिये, “दाऊदरे मट्ठेरी होशाना (तारीफ़), धने तै, जै प्रभुएरे नंवे सेइं एइते, स्वर्गें मां होशाना* ।”

10 जैखन यीशु यरूशलेम नगरे मां पुजो, त सारे नगर मां हलचल मेजि जेई, ते लोक ज़ोने लगगे, “ए कौने?”

11 लोकेई ज़ोवं, “ई गलीलेरे नासरत नगरेरो नबी यीशुए ।”

Matthew 11:15-19; 19:45-48; 21:23-22)

(*Matthew 11:15-19; 19:45-48; 21:23-22)*

12 यीशुए परमेशेरे मन्देरे अंगने मां गोइतां, जैना बुपारी बुपार केरते थिये सब तैट्ठां कडे, तैनी सुनारां केरि दुकान ते कबूतर बेचने बालां केरि ठारां टलोडी ।

13 ते तैनी ज़ोवं, “लिखोरूए कि मेरे मन्देरे जो प्रार्थना केरनेरू घर ज़ोले, पन तुसेई त ए डैकू केरो अड्डो बनेवरोए ।”

14 तैखन काने ते टोटे मन्देरे मां यीशु कां आए, ते तैनी तैना सब बज्झाए ।

15 पन जैखन मन्देरे प्रधान याजक ते शास्त्री लोक एना कम्मां जैना तैनी कियां, ते मट्टन मन्देरे मां दाऊदरी औलादरी होशाना (तारीफ़) ज़ोते लाए, तैन बड्डी सरक आई ।

16 ते तैस सेइं ज़ोने लगगे, “तू शुन्ने लोरोस कि एना कुन ज़ोने लोरेन?” यीशुए तैन सेइं ज़ोवं, “हाँ अवं शुन्ने लोरोई, तुसेई कधे नई पढेरू कि, तीं मट्टन ते दुद्ध पीते बच्चन करां भी तीं अपनि पूरी तारीफ़ कमाई?”

17 तैखन तै तैन शेरतां नगरे बेइरोवं चलो जेव, ते बैतनिय्याह नगरे मां जेव ते तैडी रात गुज्जारी ।

Matthew 11:12-14,20-24)

(*Matthew 11:12-14,20-24)*

18 झेझां जैखन यीशु नगरे मांजो वापस ओरो थियो, त तैस दलुख लगगी ।

19 बत्तारे इलेखी अक फ़ेगोरो बूट लाव ते तैस कां जेव, ते पट्लां केरे अलावा तैस पुड किछ्छ न लाव, तैनेई तैस जो ज़ोवं, “कधे भी तीं पुड फल न लग्गेलो ते तैखने तै बूट शुक्की जेव ।”

20 एन हेरतां चले हैरान भोइतां पुच्छ्छन लगगे, “ई फ़ेगोरो बूट अकदम केन्चरे शुक्की जोरोए?”

21 यीशुए जुवाब दित्तो, “अवं तुसन सेइं सच्च ज़ोताई कि अगर तुस विश्वास रखथ, ते शक न केरथ, जैन फ़ेगोरे बूटे सेइं भोवं तैन तुस भी केरि सकतथ, बल्के उस पहाडे जो ज़ोले कि इट्ठां उखडतां समुन्दरे मां गा, त तैन्ने भोलू ।”

22 अगर तुशुओ विश्वास पक्कोए त जैन किछ्छ तुस प्रार्थनाई मां मग्गोले, तैन तुसन मैल्ली गालू?

Matthew 11:27-33; 20:1-8)

(*Matthew 11:27-33; 20:1-8)*

23 यीशु मन्देरे मां शिक्षा देने लोरो थियो, त प्रधान याजक, ते लोकां केरे बुजुर्गेई तैस पुच्छ्छ, तू एन कम कसेरे अधिकारे सेइं केरतस? ते तीं एन कम कैनी दित्तोरोए?

* 21:9 होशाना मतलब बचाथ

24 यीशुए तैन जुवाब दित्तो, “अवं भी तुसन अक गल पुछ्ततई, अगर तुस तैसेरो जुवाब देले, त अवं भी ज़ोडलो कि अवं एन कम कसरे अधिकारे सेइं केरताई।

25 यूहन्नारो बपतिस्मो कोट्टां थियो? स्वर्गेर तरफां थियो, या की इन्सानेरी तरफां थियो? तैना एप्पू मामेइं गलवात केरने लग्गे, कि अगर अस ज़ोतम कि, स्वर्गेर तरफां थियो, त फिरी तैनी ज़ोनूए कि फिरी तुसेईं तैसेरू याकीन की नईं कियेरू?

26 पन अगर अस ज़ोतम कि, ‘इन्सानेरी तरफां थियो,’ त लोकां केरो भी डरे किजोकि लोक यूहन्ना नवी मन्त्ते थिये।”

27 एल्हेरेलेइ, तैनेईं यीशुए जुवाब दित्तो, “अस किछ् न ज़ानम।” तैनी भी तैन सेइं ज़ोवं, “अवं भी तुसन सेइं न ज़ोईं कि अवं इन कम्मां कसरे अधिकारे सेइं केरताई।”

~~~~~

28 पन तुस इस मिसालेर बारे मां कुन सोचतथ? केन्वी मैनेरां दूईं मट्टां थियां, तैनी बड्डे मट्टे कां गेइतां ज़ोवं, “अज़ दाछ्छरी बागी मां गा ते कम केर।”

29 तैनी जुवाब दित्तो, “अवं न गेईं।” पन वादे मां पशतेइतां ज़लो जेव।

30 फिरी बाजे होरि मट्टे कां भी गेइतां एन्ने ज़ोवं, तैनी जुवाब दित्तो, “अच्छा खरी गाताई।” पन जेव नन्ना।

31 “एन दुइने मरां केनि अपने बाजेरो हुकम मन्तो?” तैनेईं जुवाब दित्तो बड्डे हुकम मन्तो, यीशुए तैन सेइं ज़ोवं, कि अवं तुसन सेइं सत्र ज़ोताई, कि चुंगी धिन्ने बाले ते बदचलन कुआन्शां तुसन करां पेइले परमेशेरे राज़ मां दाखल भोली।

32 अवं इन ज़ोताई, यूहन्ना बपतिस्मो देनेबाले तुसन ज़ोवं, कि धार्मिकतारी ज़िन्दगी केन्चरां ज़ीनीए पन तुसेईं तैसेरू विश्वास न कियो, पन चुंगी धिन्ने बाले ते बदचलन कुआन्शेईं तैसेरू विश्वास कियुं, एन हेरतां भी तुसेईं पापन करां मन न फिराव ते तैस पुड़ विश्वास न कियो।

~~~~~

(~~~~~ 12:1-12; ~~~~~ 20:9-19)

33 अक होरि मिसाल शुना, एक्की ज़मीनदारो अक दाछ्छरी बाग लाई ते तैसेरे च़ेवरे पासन बाड़ दित्तो, ते दाछ्छारो रस कढनेरे लेइ अक हौवज़ बनावं, ते तैस बागरी हेरगेश केरनेरे लेइ अक उच्चवी कूड़ी बनाई ते फिरी तै काशत केरनेबालन ठेके पुड़ देइतां कोन्च दूर परदेशे जो ज़लो जेव।

34 ज़ैखन दाछ्छ टलोइनेरो मौको अव त तैनी अपनो हिस्सो नेनेरे लेइ अपने नौकर तैन ठेकेदारन कां भेजे।

35 ते ठेकेदारइं तैसेरे नौकर कोई झूसो कुटो कोई मारो ते केन्वी जेईं घोडेईं दित्ती।

36 फिरी तैनी होरे नौकर भेजे ज़ैना पेइलन करां जादे थिये, पन ठेकेदारइं तैन सेइं भी तेरहो ज़ेरो सलूख कियो।

37 आखकार तैनी अपनू मट्टू तैन कां भेजे, ते सोचू कि मेरे मट्टेरो त लिहाज़ केरेले।

38 “पन ज़ैखन ठेकेदारइं तैसेरू मट्टू लाव, त तैना एप्पू मामेइं मुशारो केरने लग्गे, कि एज्जा एस सेवां मारम ते एसेरी बागी पुड़ कब्ज़ो केरम।”

39 “तैखन तैनेईं तैन मट्टू टलाव ते बागारे बेइर शेरी छ्छ्इइ।

40 एल्हेरेलेइ ज़ैखन बागरो मालिक एप्पू एज्जेलो, त तैन ठेकेदारन सेइं केरो सलूख केरेलो?”

41 तैनेईं जुवाब दित्तो, तै तैन बुरन, बुरे तरीके सेइं मेरतां बागरो ठेको होरि ठेकेदारन देलो, ज़ैना मौके पुड़ तैसेरो हिस्सो तैस देन।

42 यीशुए तैन सेइं ज़ोवं, “तुसेईं पवित्रशास्त्रे मां कधे नईं पढ़ेरू,

ज़ै घोड़ मिस्त्रेईं रद्दी कियोरो थियो,

तैए कूनेरो घोड़ भोलो,

एन कम परमेशेरे कियेरूए,

ते इश्शी नज़री मां एन आजीब आए?”

43 एल्हरेलेइ अवं तुसन सेइं ज़ोताई, कि परमेशेरू राज़ तुसन करां निव गालू, ते एरी कौमी कां दिन्तू गालू ज़ै वक्ते पुड़ तैस फल दे ।

44 ते ज़ै कोई इस घोड़े पुड़ बिछड़ेलो त तैसेरे टुकड़े-टुकड़े भोइ गाले, पन ज़ै एस उन्ढो बिछड़ेलो त तैस पइतां छुड़ेले ।

45 परधान याजक ते फरीसी लोकेई यीशुएरी ए मसाल शुन्तां सेमझी जे, कि यीशु एन गल्लां इशे बारे मां ज़ोने लोरोए ।

46 तैनेई यीशु टलानो चाव, पन लोकन करां डरते थिये किजोकि तैना यीशु नबी मन्ते थिये ।

22

~~~~~

(~~~~~ 14:15-24)

1 यीशु फिरी मसाल देइतां ज़ोने लगे ।

2 “स्वर्गेरू राज़ एक्की राज़ेरू ज़ेरूए, ज़ैनी अपने मट्टेरे इला बनाव ।

3 ते अपने नौकर भेजे कि तैना लोकन ज़ैन जेई इलाएरी धाम बनोरी थी, तैन कुजान पन तैना न आए ।

4 तैखन तैनी अपने नौकर एन ज़ोइतां भेजे, कि ज़ैन जेई इलाएरी धाम बनेवरीए, तैन ज़ोथ, रोट्टी बनोरीए ते मीं बडे-बडे जानवर कट्टोरन, ते सब किछ तियार भोरूए, ते इलाएरी धामी मां शामिल भोथ ।

5 पन तैनेई ध्यान न दिन्तू ते कोई परवाह न की, कोई अपने ऊडारे मां च़लो जेव, ते कोई अपने कारोबारे मां लगे ते कोई कोरां च़लो जेव ।

6 किछेई तैसेरे नौकर टलेइतां तैन तैना बेइजत किये, ते जानां भी मैरी छुड़े ।

7 ज़ैखन राजे एन शुनू त राज़े बड़ी सरक आई, ते तैनी अपनि फौज भेजतां तैना कातली मैरी छुड़े ते तैन करां नगरां फुके ।

8 तैखन तैनी अपने नौकरन सेइं ज़ोवं, इलाएरी धाम तियार आए, पन ज़ैन कुजारे थिये तैन एस काबल नई ।

9 एल्हरेलेइ तुस हर पासे गाथ ते ज़ेत्तरे तुसन मैलतन, तैना सब इरां कुजाथ ।

10 तैखन तैना नौकर च़ले जे ते हर पासे गोइतां ज़ेत्तरे खरे बुरे तैन मैल्ले, सब अकोट्टे इलाए मां आने ते मेहमानेइं सेइं घर भरतां भोवं ।

11 “ते राज़ो मेहमान सेइं मिलने अन्तर अव, त तैसेरी नज़र एक्की मैन्हु पुड़ पेईं ज़ै इलाए मां इलेरां लिगड़ां लेइतां न थियो ओरो ।”

12 राज़े तैस पुच्छे, हे दोस्त, तू इलाएरे लिगड़न मां की नई ओरो? पन तैने किछ न ज़ोवं ।

13 “एस गल्ली पुड़ राज़े अपने नौकरन सेइं ज़ोवं, एसेरे हथ पाव बंधतां बेइर आंधरे मां छुड़ा ज़ैड़ी ए लेरां दंतो राए, ते दंत चापतो राए ।”

14 किजोकि परमेशेरू हमेशारे ज़िन्दगरे लेइ त बडे कुजारेन पन चुनोरे थोडेन ।”

~~~~~

(~~~~~ 12:13-17; ~~~~~ 20:20-26)

15 तैखन फरीसी लोक तैट्टां च़ले जे, ते एप्पू मामेइं मुशोरो करेने लगगे एस केन्बरे गल्लन मां फसाम ।

16 एल्हरेलेइ तैनेई अपने किछ च़ले हेरोदेस राज़ेरे लोकन सेइं साथी यीशु कां भेजे, ते तैनेई ज़ोवं, “हे गुरू अस ज़ानतम कि तू सच्चोस, ते परमेशेरी बत सच्चैइं सेइं शिखालतस ते कोन्वेरी परवाह न करस किजोकि तू मैन्हु करू तुतर हेरतां गल्लां न करस ।

17 एल्हरेलेइ असन ज़ो, तू कुन सोचतस? महाराजे जो चुंगी देनी जेइजे की नई?”

18 यीशु तैन केरि चाल सेमझतां ज़ोवं, “हे पाखंडी लोकव मीं किजो अजमातथ?

19 ज़ै सिको चुंगरे लेइ देतथ तैस मीं हिराथ, तैनेई अक दीनार तैस कां आनो ।

20 यीशुए तैन पुच्छू, इस पुड़ कसेरी शकल ते कसेरू नव लिखोरूए?”

21 तैनेई जुवाब दित्तो महारजेरू, तैखन तैनी तैन सेइं ज़ोव, “जैन महारारजेरूए तैन महारजे जो देथ, ते जैन परमेशेरूए तैन परमेशेर जो देथ ।”

22 तैना एन शुन्तां हैरान रेइजे, ते तैस तैड़ी छेइतां चले जे ।

~~~~~

(~~~~~ 12:18-27; ~~~~~ 20:27-40)

23 तेस्से दिहेड़ी किछ् सद्की लोक जैना ज़ोते थिये कि मरनेरां बाद कोई ज़ीतो नई भोनो, तैनेई तैस पुच्छू,

24 “हे गुरू मूसे ज़ोरूए कि, ‘अगर कोई मैन्हु बेऔलाद मेरि गाए, त तैसेरो दूला तैसेरी कुआन्शी सेइं इला बनाए ताके अपने दूलाएरे लेइ औलाद पैदा केरे ।’

25 इश्शे इड़ी सत दूला थिये, पेइले इला बनेइतां मेरि जेव, तैस औलाद न थी तैनी अपनि कुआन्श अपने दूलाएरे लेइ छेइडी दित्ती ।

26 ए वजा आए तैसेरे दुइयोवं ते टलेइयोवं भी एन्चरे कियू बल्के सत्ते दूलान सेइं एन्ने भोतू राऊ ।

27 आखकार तै कुआन्श भी मेरि जेई ।

28 हुनी ज़ो तै कुआन्श मुइदन मरां ज़ीते भोनेरे दिहाइ तैन सत्ते दूलान मरां कसेरी कुआन्श भोली? किजोकि तै सेब्मी केरि कुआन्श बनोरी थी ।”

29 यीशुए तैन जुवाब दित्तो, “तुस न पवित्रशास्त्र ते न परमेशेरी शक्ति ज्ञानथ, ते एस्से वजाई सेइं तुस टपलोरथ ।

30 किजोकि ज़ीते भोनेरां पत्ती तैना इला न बनाले, पन तैना स्वर्गें मां परमेशेरे स्वर्गदूतां केरे ज़ेरे भोनेन ।”

31 “पन मुइदन मरां ज़ीते भोनेरे वारे मां कुन तुसेईं इन वचन नई पढेरू जैन परमेशर तुसन सेइं ज़ोवं,

32 ‘अवं अब्राहमेरो परमेशर, ते इसहाकेरो परमेशर ते याकूबेरो परमेशर आई?’ तै मुवोरां केरो नई बल्के ज़ीतां केरो परमेशर ।”

33 लोक तैसेरी ए शिक्षा शुन्तां हैरान रेइजे ।

~~~~~

(~~~~~ 12:28-34; ~~~~~ 10:25-28)

34 जैखन फरीसी लोकेई एन शुनू कि तैनी सद्की केरू आशी बंद कियोरूए, त तैना तैस कां सब अकोट्टे भोए ।

35 तैन मरां अक शास्त्री तैस अज़मानेरे लेइ यीशुए पुच्छू ।

36 “हे गुरू, मूसेरे कानूने मां सेब्बन करां बड्डो हुक्म कौ आए?”

37 तैनी ज़ोवं, “तू परमेशेर अपने प्रभु सेइं अपने सारे दिले सेइं ते अपनि सैरी जानी सेइं ते अपनि सैरी अक्ली सेइं प्यार केरा ।

38 सेब्बन करां बड्डो ते खास हुक्म ईए ।

39 एसेरो ज़ेरो ईए, ‘अपने पड़ोसी सेइं अपने बराबर प्यार केर ।’

40 इन्ना दूई हुक्म मूसेरे कानून ते नेबी केरो आधारे ।”

~~~~~

(~~~~~ 12:35-37; ~~~~~ 20:41-44)

41 जैखन फरीसी लोक भी तैड़ी जम्हां भोइजेइ, त यीशुए तैन पुच्छू ।

42 “मसीहेरे वारे मां तुश्शो कुन खियाले, कि तैन कसेरू मट्टूए?” तैनेई जुवाब दित्तो, “दाऊदेरू मट्टू ।”

43 यीशुए तैन सेइं ज़ोवं, “फिरी दाऊद आत्माई मां तैस जो प्रभु किजो ज़ोते?”

- 44 “प्रभुए मेरे प्रभु सेइं ज़ोवं, मेरे देइने पासे बिश ज़ां तगर अवं तेरे दुश्मन तेरे पावन हैठ न दलेन्चेई ।
- 45 बस्सा, अगर दाऊद तैस जो प्रभु ज़ोते त तैन तैसेरू मटटू केन्चरे सेइं भोइ सकते?”
- 46 तैन मरां केन्चे भी एक्की गल्लरो जुवाब न देइ बटो । पन तैस वक्तेरे बाद फिरी कोन्ची तैस पुच्छनेरी हिम्मत न भोइ ।

## 23

[\[मत्ती 23:1-12\]](#) [\[मत्ती 23:13-28\]](#) [\[मत्ती 23:29-36\]](#) [\[मत्ती 23:37-39\]](#) [\[मत्ती 23:40-46\]](#) [\[मत्ती 23:47-52\]](#) [\[मत्ती 23:53-59\]](#)

([\[मत्ती 12:38-39\]](#); [\[मत्ती 11:43,46\]](#); [\[मत्ती 20:45,46\]](#))

- 1 तैखन यीशुए बड़े लोकन सेइं ते अपने चलन सेइं एन ज़ोवं ।
- 2 “शास्त्री ते फरीसी लोक मूसेरो कानून समझाने बालेन ।
- 3 एल्हेरेलेइ ज़ैन किछ तैना तुसन ज़ोतन तैन तुस केरा ते मेन्ना, पन तैन केरां ज़ेरां कम्मां न केरा, किजोकि तैना ज़ोने त ज़ोतन पन केरन नन्ना ।
- 4 तैना अपने मेर्जी सेइं कानून बनातन ज़ैना लोकां केरे लेइ मन्ने मुशकिल भोतन, पन एप्पू अपने कानूने मन्नेरी कोशिश भी न केरन ।
- 5 तैना ज़ैन किछ केरतन सिर्फ मैनन् हिरानेरे लेइ केरतन, तैना अपने कुपाए ते पैखड़न पुड़ पवित्रशास्त्रेरे वचन लिखतां बड़डे-बड़डे जन्त्रां केरे ज़ेरे बन्धतन, ते अपने चोगन पुड़ लम्मो गुच्छा लातन (ताके लोक समझन तैना बड़े धर्मी आन) ।
- 6 तैना धामन मां खास टैरी बिशनू चातन, ते प्रार्थना घरे मां खास कुर्सन पुड़ बिशनू चातन ।
- 7 ते तैना चातन कि लोक तैनन् जो बज़ारन मां नमस्कार ज़ोन, ते तैनन् जो गुरू ज़ोन ।
- 8 पन तुस अपने आपे जो गुरू न ज़ुवेइयथ, किजोकि तुशशो अक्के गुरू आए, ते तुस सब दलां केरे ज़ेरे बराबर आथ ।
- 9 ते दुनियाई मां केन्ची जो (आत्मिक) बाजी न ज़ोइयथ, किजोकि तुशशो अक्के बाजी आए ज़ै स्वर्गे मां आए ।
- 10 ते न केन्ची जो मालिक ज़ोइयथ किजोकि तुशशो अक्के मालिके ज़ै मसीह आए ।
- 11 पन ज़ै तुसन मां बड़डो भोनू चाते, त तै तुशशो सेवक बने ।
- 12 ते ज़ै कोई अपनो आप बड़डो बनानेरी कोशिश करते, त तै निकड़ो बनाव गालो, ते ज़ै कोई अपनो आप निकड़ो बनाते त तै बड़डो बनाव गालो ।”

[\[मत्ती 23:1-12\]](#) [\[मत्ती 23:13-28\]](#) [\[मत्ती 23:29-36\]](#) [\[मत्ती 23:37-39\]](#) [\[मत्ती 23:40-46\]](#) [\[मत्ती 23:47-52\]](#) [\[मत्ती 23:53-59\]](#)

([\[मत्ती 12:40\]](#); [\[मत्ती 11:39-42,44,52\]](#); [\[मत्ती 20:27\]](#))

- 13 तैखन यीशुए ज़ोवं, “हे पाखंडी शास्त्री ते फरीसी लोकव, तुसन पुड़ अफ़सोस, किजोकि तुस स्वर्गेरे राज़े मां लोकन दाखल भोने न देथ, किजोकि न तुस एप्पू दाखल भोथ, ते न होरन दाखल भोने देथ ।
- 14 हे पाखंडी शास्त्री ते फरीसी लोकव तुसन पुड़ अफ़सोस, तुस विधवा कुआन्शां केरे घरन लुटतथ, ते लोकन हिरानेरे लेइ लेम्मी-लेम्मी प्रार्थना केरतथ, तुसन जादे सज़ा मैलेली ।”
- 15 “हे पाखंडी शास्त्री ते फरीसी लोकव, तुसन पुड़ अफ़सोस! तुस अक मैन्हु अपने धर्मे मां आन्नेरे लेइ बड़े दूर-दूर गातथ, ते ज़ैखन तै तुशशी शिक्षा मन्ते त तैस एप्पू करां दुगनो नरके मां गानेरे काबल बनातथ ।”
- 16 “हे बत हिराने बाले कानाव, तुसन पुड़ अफ़सोस, कि तुस ज़ोतथ कि अगर कोई मन्दरेरी कसम केरे त कोई हज़ं नई, पन अगर मन्दरेरे सोन्नेरी कसम केरे, त तैसेरी कसमारो पाबंद भोलो ।
- 17 हे बेवकूफ ते कानाव, बड़ड़ कुन आए सोन्नु या मन्दर, ज़ेसेरी वजाई सेइं सोन्नु पवित्र समझू गाते?”

18 “तुस ज़ोतथ कि अगर कोई बलिदान ज़ादनेरे ठारारी कसम केरे, त कोई हज़ नई, पन ज़ैदोरी चीज़री कसम केरे त तैसेरो पाबंद भोलो।

19 हे कानाव! बड्डू कुन आए, ज़ादोरी चीज़ या बलिदान ज़ादनेरे ठार ज़ेसेरी वजाई सेई ज़ादोरी चीज़ पवितर समझी गाचे?

20 अगर ज़ै कोई बलिदान ज़ादनेरे ठारारी कसम करते, त तै सेबी ज़ैदोरी चीज़ां केरि कसम करते।

21 ज़ै कोई मन्देरी कसम करते त तै मन्देरे मां रानेबाले परमेशेरी कसम करते।

22 ते ज़ै कोई स्वगेरी कसम करते, तै परमेशेरे तखतेरी ते तैस पुड़ बिशने बालेरी कसम करते।”

23 “हे पाखंडी शास्त्री ते फरीसी लोकव, तुसन पुड़ अफ़सोस, तुस पुतनेरो ते सॉफ़ेरो ते ज़ीरेरो दशोवं हिस्सो त देतथ, पन मुसेरे कानूनेरी खास गल्लां ज़ेन्चरे इन्साफ़ केरनो, दया केरनि ते ईमानदार भोनू शारोरूए, ज़रूरी धियूं तुस एन भी केरते राथे ते तैन भी न शारेथे।

24 हे बत हिराने बाले कानाव! तुस मशशे त छानतथ पन सथ्थो ऊँट निगलतथ।”\*

25 “हे पाखंडी शास्त्री ते फरीसी लोकव, तुसन पुड़ अफ़सोस, तुस कटोरो ते कने थाली बेडरमेई खूब मांजतथ पन अन्तरेमेई लालच ते बे सबरीए भेरताए।”

26 “हे काने फरीसाव पेडले कटोरो ते थाली अन्तरेमेई मांज्रा, ते फिरी बेडरमेई भी साफ़ भोए।”

27 “हे पाखंडी शास्त्री ते फरीसी लोकव तुसन पुड़ अफ़सोस, तुस तैन कवरां केरे ज़ेरेथ ज़ैन बेडरमेई त सफ़ैदीए ते बेड़ि रोड़ी लेहीयोचन, पन अन्तरेमेई मुड़दां केरि हड्डी ते सब किसमेरी गेन्दगी सेई भेरतन।

28 एन्चरे तुस बेडरमेई लोकन बडे धर्मी लेइयोतथ, पन अन्तरेमेई दुनियारे पाखंडे ते अधर्मे सेई भेरतथ।”

~~~~~

(~~~~~ 11:47-51)

29 “हे पाखंडी शास्त्री ते फरीसी लोकव तुसन पुड़ अफ़सोस, किजोकि तुस नेबी केरे आसथान सजातथ ते धर्मी लोकां केरि कवरां बनातथ।

30 ते ज़ोतथ कि, ‘अगर अस अपने दादे-पड़दादां केरे ज़माने मां भोथे त नेबन मारने मां तैन केरू साथ न देथे।’

31 एन्चरे तुस एप्पू मन्तथ कि तुस नेबी केरे कल्ल केरनेबालां केरि औलादी मरां आथ।

32 हुनी तुस अपने दादे-पड़दादां केरे पापेरे घडो भरते राथ।”

33 “हे ज़हरीले सप्पां केरे ज़ेरे बच्चाव! तुस नरकेरी सजाई करां केन्चरे बच्चेले?

34 एल्हेरेलेइ हेरा अवं नेबन ते अकलमन्दन ते शास्त्री लोकन तुसन कां भेजताई, तुस तैन मरां किछन कल्ल केरेले, ते किछन करूसे पुड़ ज़ादले, ते किछन अपने प्रार्थना घरे मां कोडेई सेई बाले, ते नगरे-नगरे मां तैन मारनेरे लेइ तैन पत्ती लगगोरे राले।

35 एल्हेरेलेइ सारे धर्मी केरो कल्ल ज़ै इस धेरती पुड़ भोरोए, तैन केरि सज़ा तुसन पुड़ एज्जे, धर्मी हाबिलेरे कल्ले करां लेइतां, ते बिरक्याहरे मट्टे जकर्याहरे कल्ले तगर ज़ै तुसेई मन्देरे ते बलिदान केरनेरे ठारारे मज़ाटे मन्देरे अंगने मां कल्ल कियोरो थियो।

36 अवं तुसन सेई सज़ ज़ोताई कि इस ज़मानेरे लोकन एना सैरी गल्लां केरे सज़ा मैलनी।”

~~~~~

(~~~~~ 13:34-35)

37 फिरी यीशुए ज़ोवं, “हे यरूशलेम नगरेरे लोकव, हे यरूशलेम नगरेरे लोकव, तुसेई केतरे नबी कल्ल किये ज़ैना बडे पेडले तुसन कां आए, ते ज़ैना तुसन कां भेजे तुसेई तैन घोडेई बेई, मीं बडे वार सोचू कि तेरे बच्चन अकोट्टे केरि ज़ेन्चरे कुकड़ी अपने बच्चन अपने फंगन हैट रखचे पन तुस राज़ी न भोए।

\* 23:24 तैना लोक कानूनेरी निक्की-निक्की गल्लां बडे ध्याने सेई मन्ते थिये ज़ेन्चरे किछ पीनेरी चीज़न मरां मशशे छान्ते, पन तैना परमेशेरे खास हुक्म न थिये मन्ते। तैन ऊँट निगलनेरू ज़ेरू आए।

38 हेरा तुशू घर तुशू लेइ बेरान भोइ गाते ।

39 किजोकि अवं तुसन सेइं सत्र ज़ोताई, कि तुस मीं हुन्ना करां तैस दिहाडे तगर कधे न लेईं सकेले, जांतगर मेरे बारे मां इन न ज़ोले, तैसेरी तारीफ़ भोए ज़ै प्रभुएरे अधिकारे सेइं एइते । ”

## 24

*Matthew 24:1-2; Matthew 21:5-6*

1 ज़ैखन यीशु मन्दरे मरां निस्तां च़लोरो थियो, ते तैसेरे चले तैस कां आए, ताके तैस मन्दरेरे रोड़े-रोड़े भवन हिरान ।

2 तैनी तैन सेइं ज़ोवं, “कुन तुस एन सब किछ् हेरने लोरेथ? अवं तुसन सेइं सत्र ज़ोताई कि इडी कोई घोडे पुड़ घोड़ बाकी न रालो, ज़ै बछ्छोड़ो न गालो ।”

*Matthew 21:7-19*

3 ज़ैखन तै ज़ैतून पहाड़े पुड़ बिशोरो थियो, त तैसेरे चले अलग ज़ेरे तैस कां एइतां तैस सेइं ज़ोने लगगे, “असन ज़ो कि एन गल्लां केइस भोनिन? ते तेरे एजनेरो ते दुनियारो अन्त भोनेरो कुन निशान भोनेए?”

4 यीशुए तैन जुवाब दित्तो, “खबरदार राथ, कोई तुसन न टपलाए!

5 किजोकि बड़े मेरे नंवे सेइं एजनेन ते तैनेईं ज़ोनूए कि, ‘अवं मसीह आई,’ ते तैनेईं बड़े लोक टपलानेन ।

6 तुस लड़ाई ते लडैईं केरि अफवाह शुनेले, खबरदार डेरथ नन्ना, किजोकि एन गल्लां ज़रूरी भोनिन, पन तैस वक्ते खातमों नईं भोनों ।

7 किजोकि कौमी पुड़ कौम, ते राज्जे पुड़ राज चढ़हाईं केरेलू, ते ठारी-ठारी काल पेलो, ते भुंजल एज्जले ।

8 मुसीबतां केरि शुरुआत भी एन्ने गल्लेईं सेइं भोनीए ।

9 तैखन ज़ैना तुशू खलाफन तैना तुसन टलेइतां बड़ी सखत सज़ा देले, ते कल्ल केरेले, ते मीं पुड़ विश्वास केरनेरे वजाईं सेइं, सैरी कौमां केरे लोक तुसन सेइं बैर रखेले ।

10 तैखन बड़े लोक मीं पुड़ विश्वास केरनो शारेले, एक्की होरि टलुवाले, ते एप्पू मामेइं भी बैर रखेले ।

11 ते बड़े झूटे नवीं दुनियाईं मां निसनेन ते बड़े लोक टपलानेन ।

12 अधर्म बधने सेइं बड़े लोक एप्पू मामेइं प्यार केरनो शारेले ।

13 पन ज़ै कोई आखरी दम्मं तगर मीं पुड़ विश्वास केरेलो, त तैस्से मुक्ति मैलनीए ।

14 ते परमेशेरे राज्जेरी ईं खुशखबरी दुनियारे हर पासे शुनाईं गाली, ताके सैरी कौमां केरे लोकन मौको मैले कि तैना इस कबूल केरन, तैखन दुनियारो खातमों भोलो ।”

*Matthew 24:13-14; Matthew 21:20-24*

15 “ज़ैखन तुस तैस उज्जाने वाली भिट्टी चीज़ी, ज़ेसेरे बारे मां दानिय्येल नेवे ज़ोरू थियू, पवित्तर ठैरी खड़ी लाएले, (त पढ़नेवालो भी समझे) ।

16 कि ज़ैना तैस मौके यहूदिया इलाके मां भोले तैना पहाड़न पुड़ जो नश्शन ।

17 ते ज़ैना लाए पुड़ भोन त तैना कोई चीज़ नेने अन्तर न एजन ।

18 ते ज़ै मैन्हु ऊडारे मां भोलो, त तै लिंगड़ां नेने अन्तर न एज्जे ।”

19 तैन दिहाड़न मां ज़ैना दोज़ीती त दुद्ध पियाती कुआन्श भोली, तैन केरे लेइ अफ़सोस!

20 ते प्रार्थना केरा कि तुसन हिवतडे या आरामेरी दिहाड़ी नश्शन न पे ।

21 किजोकि तेइस एतरी बड्डी मुसीबत भोली, जेरि दुनियारे शुरू करां अज तगर नई ओरी, ते न कधी एज्जेली ।

22 अगर तैन दिहाड़ां केरि तैधात घटेवरी न भोथी, त कोई प्राणी न थियो बच्चानो, पन चुनोरां केरे लेइ तैना दिहाड़े घटेवरेन ।

23 अगर कोई तुसन सेइं जोए कि, 'तक्का, मसीह इड़ी आए! या उड़ी आए!' त तुस विश्वास न केरथ ।"

24 "किजोकि झूठे मसीह ते झूठे नबी दुनियाई मां निसनेन, ते तैनेई निशान ते बड्डे-बड्डे चमत्कार हिरानेन, ते भोइसखे त चुनोरे लोक भी टेपलोनेन ।

25 हेरा, मीं तुसन सैरी गल्लां भोनेरे पेइले जोरिन ।

26 अगर कोई तुसन सेइं जोए कि, 'हेरा तै जंगले मांए,' त तुस बेइर न गेइयथ; हेरा, तै घरे मांए,' त तुस विश्वास न केरथ ।"

27 "किजोकि जेन्चरे बिजली पूर्वोरां, पछमें तगर चमकतीए एन्चरे मैनेरू मट्टू भी एज्जेलू ।"

28 "जैड़ी जिगग भोते तैड़ी इल्लां जम्हां भोइचन ।"

~~~~~

(~~~~~ 13:24-27; ~~~~~ 21:25-28)

29 "तैन दिहाड़ना बाद दिहाड़ो कालो भोइ गालो, त चाँदनी लौ न देली, त कने अम्बेरां तारे बिछड़ने लगगेले, त अम्बेरी सैरी शेक्ति हिलेइ गेली ।

30 तैखन मैनेरे मट्टेरो निशान अम्बेरे मां लेइहोनेओ, ते दुनियारी सैरी कौमां छाती पिट्टेली, ते मैनेरू मट्टू अम्बेरे मरां बिदलारी पुड़ बेइं शेक्ति ते महिमा सेइं एइते लाएले ।

31 ते तै अपने स्वर्गदूत ते नइंशिगेरी बड़ी आवाजी सेइं साथी भेज्जेलो, ते तैसेरे चुनोरे लोकन च़ेवरे पासन अम्बेरे एक्की पासेरां होरिं पासे तगर सेब्बन जम्हां केरेले ।"

~~~~~

(~~~~~ 13:28-31; ~~~~~ 21:29-33)

32 "फ़ेगेरे वुटे करां ई सबक शिखा, जेरे तैसेरे डाल नर्म भोतन ते पट्लां निसतन त तुस बुझतथ कि गेमेंरो मौसम एजनेवालो आए ।

33 एसेरो ज़ेरो, ज़ैखन तुस एना गल्लां, ज़ैना मीं ज़ोई, भोते हेरेले, त तुस बुज्झी छड़डा कि मैनेरू मट्टू, यानी अवं बड़े नेड़े पुज्जोरोई ।

34 अवं तुसन सेइं सत्र ज़ोताई, कि ज़ां तगर एन सब किछ्छ पूरू न भोए, तांतगर एस पीड़रो खातमां न भोलो ।

35 अम्बर ते धरती टेली गाली पन मेरी गल्लां कधे न टेलेली ।"

~~~~~

(~~~~~ 13:32-37; ~~~~~ 17:26-30,34-36)

36 "मेरे वापस एजनेरे दिहाड़ेरे बारे मां, या तैस वक्तेरे बारे मां कोई भी न ज़ाने कि तै कताली भोलो, स्वर्गेरे स्वर्गदूते भी न ज़ानन् त कने परमेशेरेरू मट्टू यानी अवं भी न ज़ैनी, पन सिर्फ मेरो बाजी परमेशर ज़ानते ।

37 जेन्चरे नूहेरे ज़माने मां भोरू थियूं, तेन्चरे मैनेरे मट्टेरे एजनेरे वक्ते भोनूए ।

38 किजोकि तूफान एजने करां पेइले भी लोक खाते पीते थिये, ते इला भी बनाते थिये, ते नूहेरे किशती मां गाने तगर एन सब किछ्छ भोतू राऊं ।

39 तैन पतो भी न थियो कि कुन भोने बालूए, इड़ी तगर कि तूफान अव ते तैनी सब किछ्छ रुड़ेइतां नेव, ते मैनेरे मट्टेरू यानी मेरू एज्जनु भी एरू भोनूए ।

40 तैखन ऊडारे मां दूई मैन्हू कम करते भोले ते अक नीयो गालो, ते दुइयोवं तैड़ी रालो ।

41 ते दूई कुआन्शां ढलाट पिती भोली त अक नी गाली ते होरिं तैड़ी राली ।

42 तुस बीझ्जे राथ किजोकि तुस न ज़ानथ कि तुशो प्रभु कइस एजनेओ ।

43 पन याद रखा, अगर घरेरे मालिके पतो भोए कि चोर कताली एजानो, त तै वींझे विशेथो ते अपने घरे चोरी न भोने देथो ।

44 एल्हरेलेइ तुस भी तियार राथ, किजोकि ज़ैखन तुसन शक भी नई भोनी त मैनेरू मट्टू यानी अवं एज्जी गानोई ।”

⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡
(⚡⚡⚡ 12:41-48)

45 “ईमानदार ते अक्लमन्द नौकर तैसेरो ज़ेरोए, ज़ेसेरो मालिक तैस अपने नौकरन पुड़ पुछ्छो गन्ने रखे ताके ते तैन मौके पुड़ रोटी दे, ते फिरी दूर सफरे पुड़ गाए ।”

46 “तै नौकर धने ज़ेसेरो मालिक एइतां तैस करां एरू ज़ेरू करतो लाए ।”

47 अवं तुसन सेइ सन्न ज़ोताई कि ते मालिक अपने घरेरो सारो अधिकार तैसेरे सुपुर्द करेलो ।

48 “पन अगर ते बुरो नौकर अपने दिले मां एन ज़ोए कि मेरे मालिकेरे एजने हेजू बडू चिरे ।

49 ते अपने सैथन मारने कुटने ते शरैपण सेइ खाए ते पीए ।

50 त तैसेरो मालिक कोस्कोई एरी दिहैड़ी एज्जे ज़ेइस तैस नौकरे उमीदे न भोए, ते तैसेरो मालिक वापस एज्जी गाए ।

51 ते मालिक तैस पक्की सज़ा देलो, ते तैसेरो हिस्सो पाखंडी लोकन सेइ साथी भोलो, ज़ैड़ी लेरां देनी ते दंत च़ापने भोले ।”

25

⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡

1 तैखन यीशुए अपने चलन सेइ ज़ोवं, ज़ैखन मैनेरू मट्टू यानी अवं वापस एज्जेलो तैस मौके स्वर्गेरू राज तैन दश अइलैई कुइयां केरू ज़ेरू भोलू, ज़ैना अपनि मिसालां बैलतां लाड़े सेइ मिलनेरे लेइ निस्सी ।

2 तैन मां पंच बेवकूफ थी, पन पंच अक्लमन्द थी ।

3 ज़ैना बेवकूफ थी तैनेई मिसालां त नी, पन होरो तेल साथी न नीयो ।

4 “पन ज़ैना अक्लमन्द थी तैनेई मिसालां केरे अलावा कुप्पन मां होरो तेल भी साथी नीयो ।”

5 लाड़ो एजने च़िर लगगू, ते तैना सब बलगते-बलगते डिगरी लेइ देने, ते झुल्लती जेई ।

6 “अध्धी रात भोइ त शौर मञ्जी कि लाड़ो ओरोए, ते तैस सेइ मिलनेरे लेइ एज्जा ।

7 तैखन सैरी अइलैई कुइयां वींझी, ते अपनि-अपनि मिसालां ठीक करने लेगि ।

8 बेवकूफ कुइयेई अक्लमन्द अइलैई कुइयन सेइ ज़ोवं, ‘अपने तेले मरां थोड़ो ज़ेरो तेल असन भी देथ, किजोकि इश्शी मिसालां हिश्शने लोरिन ।’

9 पन अक्लमन्देई जुवाब दित्तो, ‘असन कां एतरो तेल नई, कि इश्शे लेइ ते तुश्शे लेइ पूरो भोए, तुस एरू केरा कि बेचनेबालन करां आनां ।’

10 ज़ैखन तैना तेल धिन्ने च़ेलोरि थी त तैतरे मां लाड़ो पुजी जेव, ते ज़ैना तियार थी, तैना लाड़े सेइ साथी अन्तर इलाएरे घरे मां च़ेलि जेई, ते दार बंद केरतां छ़डू ।

11 बादे मां तैना होरि अइलैई कुइयां भी वापस पुजी ते लाड़े जो ज़ोने लेगि, ‘परभु! परभु!’ इश्शे लेइ दार खोल्ल ।

12 पन तैनी जुवाब दित्तो, ‘अवं तुसन सेइ सन्न ज़ोताई, अवं तुसन न ज़ैनी ।’

13 एल्हरेलेइ खबरदार राथ, किजोकि तुस मेरे वापस एजनेरे दिहाड़ेरे बारे मां न ज़ानथ ।”

⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡⚡
(⚡⚡⚡ 19:11-27)

14 ज़ैखन मैनेरू मट्टू यानी अवं वापस एज्जेलो त स्वर्गेरू राज तैस मैनेरो ज़ेरू भोनूए, ज़ै दूर मुलखे जेव, तैनी अपने नौकर कुजाए ते सारी दौलत तैन दित्ती, ते तैन ज़ोवं एस दौलती सेइ होरि भी कमाई केरा ।

15 “तैनी एक्की पंच तोड़े दित्ते होरि दूई तोड़े दित्ते, ते एक्की अक्के तोड़ो* दित्तो, हर एक्की तैसेरे काबलीतरे मुताबिक दित्ते, ते एप्पू होरि मुलखे जो चलो जेव ।”

16 ज़ैस नौकरे पंच तोड़े मैलारे थिये, तैनी गेइतां कारोबार केरतां पंच तोड़े होरे कमाणे ।

17 एन्चरे ज़ैस नौकरे दूई तोड़े मैल्लोरे, तैनी दूई होरे कमाणे ।

18 पन ज़ैस नौकरे अक तोड़ो मैल्लोरे थियो, तैनी मिन्ती घेइतां मालिकेरी रकम छुपेइतां छुडी ।

19 बड़े च्चिरां पत्ती तैसेरो मालिक वापस अव, ते नौकरन सेइं हिसाब केरने लगो कि तैनेई तैन तोड़ां केरू कुन कियूं ।

20 “ज़ैस नौकरे पंच तोड़े मैल्लोरे थिये, तैनी गेइतां पंच होरे तोड़े हाज़र कमाणे ते ज़ोने लगो, हे मालिक तीं पंच तोड़े दित्तोरे, ते हेर मीं पंच तोड़े होरे कमाणे ।”

21 मालिके तैस सेइं ज़ोवं, “शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइं कम कमाव, अवं तीं बेडि चीज़ां केरो मुख्तियार बनालो, ते अपने मालिकेरी खुशी मां शामिल भो ।”

22 ते ज़ैस दूई तोड़े मैल्लोरे थिये, तै भी अव ते ज़ोने लगो, “हे मालिक तीं मीं दूई तोड़े दित्तोरे थिये, ते हेर मीं दूई तोड़े होरे कमाणे ।”

23 मालिके तैस सेइं ज़ोवं, “शाबाश ईमानदार नौकरा तीं थोड़ी ज़ेरि रकमी पुड़ इमानदेरी सेइं कम कमाव, अवं तीं बेडि चीज़ां केरो मुख्तियार बनालो, ते अपने मालिकेरी खुशी मां शामिल भो ।”

24 ते ज़ैस अक तोड़ो मैल्लोरे थियो, त तै भी हाज़र भोव ते ज़ोने लगो, “हे मालिक अवं ज़ानतो थियो तू बड़ो सखत मैन्हु आस, तू तैस मैनेरो ज़ेरोस ज़ैनी ऊडारे मां फसल नई बेवरी ते तै तैट्ठां फसल कटते ।”

25 एल्हेरेलेइ अवं डरो कि अगर अवं तेरी दौलत हिरेइलो त तू मीं सज़ा देलो, तांए तेरी दौलत मीं ज़मीनी मां देवतां छुडी, हेर, “तेरी दौलत ई आए ।”


26 तैसेरे मालिके जुवाब दित्तो, हे दुष्ट ते निकम्मे नौकरा अगर तीं पतो थियो, कि अवं तैस मैनेरो ज़ेरोई ज़ैनी ज़ैस ऊडारे मां नई बेवरू त तैट्ठां कटते ।

27 त तीं एन लोडतू थियूं कियोरू, कि मेरी दौलत शौकारां केरे हवाले केरस, तैखन अवं वापस एइतां अपनि दौलत सूते समेत उसुल केरयो ।

28 हुनी एन केरा कि एस करां तै तोड़ो नेइतां तैस देथ ज़ैस कां दश तोड़ेन ।

29 एल्हेरेलेइ ज़ैस कां परमेशेरी मर्ज़ी समझनेरी इच्छा आए, तैस परमेशर जादे समझ देलो । पन ज़ैस कां परमेशेरी मर्ज़ी समझनेरी इच्छा नई, तैस केरां, थोड़ी ज़ेरि समझ ज़ै तैस कां आए, तै भी नी गाली ।

30 ते एस निकम्मे नौकरे आंधरे मां छुड़डा, ज़ैडी ए लेरा देंतो ते दंत चापतो राए ।



31 ज़ैखन मैनेरू मट्टू यानी अवं, अपने महिमा मां अपने स्वर्गदूतन सेइं साथी एज्जेलो त अपने महिमारे तखते पुड़ बिशतां लोकन पुड़ राज़ केरलो ।

32 सैरी कौमां मीं कां अकोट्टी भोली, ते धर्मी लोक बुरे लोकन करां अलग किये गानेन, ज़ेन्चरे पुहाल भैडन, छेल्लन मरां अलग केरते ।

33 ते अवं धर्मी लोकन सेइं ज़ैना मेरे देइने पासे भोले, ते बुरे लोकन ज़ैना मेरे बांए पासे भोले ।

34 तैखन राज़ो यानी अवं अपने देइने पासेरे लोकन सेइं ज़ोलो, “एज्जा मेरे बाजरे धन लोकव इन राज़, ज़ैन दुनियारे शुरू मां तुश्शे लेइ तियार कियोरूए ।

35 किजोकि अवं नियन्तो थियो, ते तुसेईं मीं रोट्टी खुवाई, अवं ट्लिशोरो थियो, ते तुसेईं मीं पानी पियावं अवं परदेशी थियो, ते तुसेईं अवं अपने घरे मां कुजाव ।

36 अवं नग्गो थियो, ते तुसेईं मीं लिगडां दित्तां, ते अवं बिमार थियो, ते तुसेईं मेरी हेरगेश की अवं कैद थियो, ते तुस मीं मिलने आए ।”

* 25:15 तोड़ो: अक तोड़ो परहने सालां केरि कुमैयारे बराबर थियो ।

37 तैखन तैना धर्मी मैनन ज़ोलो, “हे प्रभु असेई कैखन तू नियन्नो लाव, ते असेई तीं रोट्टी खुवाई या तू ट्लिशोरो थियो, ते असेई तीं पानी पियांव।”

38 असेई कैखन परदेशी सेमझतां तू अपने घरे मां रख्खो, या तू नग्गो थियो, ते असेई तीं लिगड़ां दित्तां?

39 ते अस कताली तीं बिमार या कैद लेइतां तीं सेइ मिलने आए?

40 तैखन राज़ो यानी अवं जुवाब देलो, “कि अवं तुसन सेइ सज़ ज़ोताई कि ज़ैखन तुसेई इन लोकन सेइ ज़ैनेई मीं पुड़ विश्वास कियो एक्की सेइ भी एरो बताव कियो त एन बुझा कि एन तुसेई मीं सेइ कियूं।”

41 तैखन तै बांए पासे बालन सेइ ज़ोलो, “हे लानती लोकव मेरे तुत्तरे अगरां तैस हमेशारी बैलती अग्गी मांजो गाथ, ज़ै परमेशेरे, शैतान त कने शैतानेरे दूतां केरे लेइ तियार कियोरीए।

42 एन्हैरेलेइ ज़ैखन अवं नियन्नो थियो, ते तुसेई मीं रोट्टी न खुवाई अवं ट्लिशोरो थियो, ते तुसेई मीं पानी न पियांव।

43 अवं परदेशी थियो, ते तुसेई अवं अपने घरे मां न रख्खो, अवं नग्गो थियो, ते तुसेई मीं लिगड़ां न दित्तां, ते अवं बिमार ते कैद थियो, ते तुस मीं सेइ मिलने न आए।”

44 तैखन तैना लोक भी ज़ोलो, “हे प्रभु असेई कताली तू नियन्नो या ते ट्लिशोरो या परदेशी ते नग्गो या बिमार या कैद लाव ते असेई तेरी सेवा न की?”

45 तैखन अवं अपने बांए पासेरे लोकन जुवाब देलो, “अवं तुसन सेइ सज़ ज़ोताई कि ज़ैखन तुसेई मेरे इन निकड़े करां निकड़े लोकन पुड़ ज़ैना मीं पुड़ विश्वास केरतन एक्की सेइ भी एरो ज़ेरो बताव कियो त एन बुझा कि एन मीं सेइ कियूं।

46 एन्हैरेलेइ एन लोकन हमेशेरे लेइ सज़ा भोली, पन धर्मी लोकन हमेशारी ज़िन्दगी मैलेली।”

26

?????? ???? ??????

(????? 14:1-2; ???? 22:1-2; ?????? 11:45-53)

1 ज़ैखन यीशुए एन गल्लां की, त तै अपने चलन सेइ ज़ोने लगो।

2 “तुसन पत्तोए कि दई दिहैइना बाद फ़सह तिहारे, ते मैनेरू मट्टू क़रूसे पुड़ ज़ादनेरे लेइ ट्लुवाव गाए।”

3 तैखन प्रधान याजक ते कौमेरे बुज़ुर्ग कैफा महायाजकेरे अंगने मां अकोट्टे भोए।

4 ते तैनेई सल्लाह की, कि यीशु थोखे सेइ टलेइतां मैरी छडम।

5 पन तैना ज़ोते थी, कि फ़सह तिहारेरे मौके पुड़ नई, एरू न भोए कि लोक हंगामो केरन।

???????????? ?????????? ??? ????????? ????????? ?????????

(????? 14:3-9; ?????? 12:1-8)

6 तैस मौके यीशु बैतनिय्याह इलव्वें मां शमौन कोदरो घरे मां थियो।

7 ते अक कुआन्श शंखमरमरी भांडे मां इत्र घिन्तां यीशु कां आई, तैखन तै रोट्टी खानेरे लेइ विशोरो थियो, त तैसेरे दोग्गे पुड़ तै इत्र उलटाव।

8 चले एन लेइतां बड़े नाराज़ भोए ते ज़ोने लग्गे, “कि ए किजो बराबर कियो?”

9 अगर ए बेचोरो भोथो, त बड़ी कीमत मैलनी थी, ज़ै गरीबन बेन्टतां देखे।

10 यीशुए एन शुन्तां तैन सेइ ज़ोवं, “तुस एस कुआन्शी किजो तंग केरने लोरेथ? एसां त मीं सेइ रोड़ कियोरूए।

11 गरीब त हमेशा तुसन सेइ साथी भोनेन, पन अवं तुसन सेइ साथी हमेशा नई भोनो।

12 तैसां मेरी जानी पुड़ ज़ै ई इत्र उलटावरोए, तैसां मेरे दबनेरे लेइ कियोरू।

13 अवं तुसन सेइ सज़ ज़ोताई, कि सेरी दुनियाई मां ज़ैड़ी भी खुशखबरी शुनाई गाली, तैड़ी तैसेरी यादगैरी मां एस गल्लेरे बारे मां भी ज़ोवं गालू।”

????? ?????????????? ?????????

(????? 14:10-11; ????? 22:3-6)

14 फिरी 12 चेलन मरां अक ज़सेरू नव यहूदा इस्करियोती थियूं, प्रधान याजकन कां जेव ते ज़ोवं ।

15 “अगर अवं यीशु तुसन दलुवेइं, त तुस मीं कुन देले? तैनेईं तैस दलाही चेंदरे सिके दित्ते ।

16 ते तै तेइसेरो तै ठीक मौके बलगने लगो कि यीशु केन्त्रे सेइं दलुवाए ।”

????? ????? ????? ????? ?????????????? ????? ???

(????? 14:12-21; ????? 22:7-13,21-23; ????????? 13:21-30)

17 “अखमीरी रोट्टारे तिहारेरी पेइली दिहाड़ी चेले यीशु कां एइतां पुच्छने लगगे कि, तू फ़सह तिहारेरी रोट्टी कोडि खानी चातस, ताके अस गेइतां तियारी केरम?”

18 तैनी ज़ोवं, “नगर मां अक फ़लानो मैनुए, ते तुस तैस कां गाथ ते तैस ज़ोथ, कि गुरू ज़ोने लगगोरोए, मेरो वक्त नेडे पुज़ोरोए ते अवं अपने चेलन सेइं साथी फ़सह तेरे घरे मां मनेइलो ।”

19 बस्सा ज़ेरो यीशुए अपने चेलन हुकम दित्तोरो थियो, तैनेईं तेन्त्रे फ़सह तिहारेरी रोट्टी तियार की ।

20 ज़ैखन इलोइ भोइ त यीशु 12 चेलन सेइं साथी रोट्टी खाने बिशो ।

21 ते रोट्टी खांते बार यीशुए तैन सेइं ज़ोवं, “अवं तुसन सेइं सत्र ज़ोताई कि तुसन मरां अक मीं दलुवालो ।”

22 “एन शुन्तां तैना सारे चेले उदास भोए, तैना बैरी-बैरी सेइं तैस पुच्छने लगगे, हे प्रभु कुन अर्वें त नईं?”

23 तैनी जुवाब दित्तो, “ज़ैनी मीं सेइं साथी थैली मां हथ छुडोरोए, तैए मीं दलुवालो ।

24 मैनेरे मट्टेरे लेइ त ज़ेरू तैसेरे बारे मां लिखोरूए तैस सेइं तेरहु कियूं गाते, पन अफ़सोस तैस मैनु पुइ ज़ेसेरी वजाई सेइं तैन दलुवाव जेव, तैसेरेलेइ एन्ने रोडू थियूं कि तै ज़मोरो न भोथो ।

25 तैखन दलुवानेवालो यहूदा ज़ोने लगो, हे गुरू अर्वें त नईं? तैनी तैस सेइं ज़ोवं, तीं एप्पू ज़ोवं ।”

????? ???

(????? 14:22-26; ????? 22:14-20; 1 ?????????????? 11:23-25)

26 खांते बार यीशुए रोट्टी दलाती, ते बरकत मेगतां दलोड़ी, ते चेलन कां देइतां ज़ोवं यांथ खाथ ई मेरी जाने ।

27 फिरी यीशुए दाछरे रसेरो कटोरो दलातो, ते परमेशेरू शुक्र केरतां चेलन कां दित्तो ते ज़ोवं, “यांथ तुस सब इस मरां पीया ।

28 किजोकि ई मेरे नव्वे करारे मां मेरो तै खूने ज़ै बडां केरे पापां केरि मैफारे लेइ दित्तो गाते ।

29 अवं तुसन सेइं ज़ोताई, कि अवं दाछारो ई रस फिरी कधे न पियेलो ज़ां तगर परमेशेरे राज़े मां तुसन सेइं साथी नव्वो न पीं ।”

30 तैल्ला पत्ती, यीशु त कने तैसेरे चेले परमेशेरू भजन ज़ोइतां, यरूशलेम नगरेरे बेइर ज़ैतून नव्वेरे पहैड़ी पुइ ज़ली जे ।

????????? ?????????????? ??????????????

(????? 14:27-31; ????? 22:31-34; ????????? 13:36-38)

31 तैखन यीशुए तैन सेइं ज़ोवं, “तुस अजे राती मेरी वजाई सेइं ठोकर खाले, किजोकि लिखोरूए, ‘अवं पुहाले मारेलो ते धनेरी भैइडां तितर-बितर भोली ।’

32 पन अवं ज़ींतो भोइतां तुसन करां पेइले गलील इलाके मां गेइलो ।”

33 पतरसे तैस सेइं ज़ोवं, “अगर सारे तेरी वजाई सेइं ठोकर खान त खान, पन अवं तेरे बारे मां कधी ठोकर न खेइलो ।”

34 यीशुए तैस सेइं ज़ोवं, “अवं तुसन सेइं सन्न ज़ोताई कि अज़ राती कुकड़ बांग देने करां पेइले तू मेरो टलाई बार इन्कार केरेलो।”

35 पन पतरसे ज़ोवं, “अगर तीं साथी मीं मरनू भी पे, त तांभी अवं तेरो इन्कार न केरेलो ते सैरी चलेई भी एन्ने ज़ोवं।”

XXXXXXXXXXXXXXXXXXXX

(XXXXXXXX 14:32-42; XXXXXX 22:39-46)

36 तैखन यीशु अपने चेलन सेइं साथी एककी ठैरी पुज़ो, ज़ैस ठारारू नवं गतसमनी थियूं, ते तै अपने चेलन सेइं ज़ोने लगो, तुस इड़ी बिश्शा, ते तांतगर अवं उड़ी अगर गेइतां प्रार्थना केरताई।

37 तैनी पतरस ते जेब्दरां दुइये मट्टां साथी नियां, ते तैड़ी तै बड़े परेशान भोने त कने घबराने लगो।

38 फिरी यीशु तैन सेइं, इस दुखेरे वजाई सेइं मेरे प्राण निसने लोरेन इड़ी बिश्शोरे राथ ते बींझे राथ।

39 फिरी थोड़ो ज़ेरे अगर गेइतां तल्ले मां मथ्यो टेकतां खिरको ते प्रार्थना की, “हे बाजी अगर भोइसखे त ई कटोरो मीं करां टेली गाए, फिरी भी ज़ैन अवं चाताई तैन नई बल्के ज़ैन तू चातस तैन्ने भोए।”

40 फिरी तै चेलन कां वापस अवं ते तैना झुलोरे लाए, ते तैने पतरसे सेइं ज़ोवं, “कुन तुस अक घड़ी भी मीं सेइं साथी बींझे न बिश्शी सके?”

41 बींझे बिश्शा ते प्रार्थना केरते राथ ताके तुस अज़मैइशी मां न राथ, आत्मा त तियारे पन जान कमजोरे।

42 यीशुए फिरी जेव, ते ई प्रार्थना की, “हे मेरे बाजी ई दुखेरो कटोरो मेरे पीने बगैर टेली न सखे, त तेरी मर्ज़ी पूरी भोए।”

43 तैखन तै चेलन कां एइतां तैना फिरी झुलोरे लाए, किजोकि तैन केरि एछ्छी ओंइले सेइं गिरकी भोरी थी।

44 तै तैन तैड़ी छेइतां च़लो जेव, ते फिरी तैए प्रार्थना केरने लगो ज़ै पेइली कियोरी थी।

45 तैसेरां बाद तै चेलन कां वापस अवं, ते तैन सेइं ज़ोने लगो, “हुनी झुलोरे राथ ते आराम केरा, हेरा तै मौको नेडे पुज़ोरोए, ते मैनेरू मट्टू पापी लोकां केरे हवाले कियूं गाते।

46 उटा, च़लम। हेरा! मीं टलुवानेबालो नेडे पुज़्जी जोरोए!”

XXXXXXXXXXXXXXXXXXXX

(XXXXXXXX 14:43-50; XXXXXX 22:47-53; XXXXXXXX 18:3-12)

47 तै एना गल्लां ज़ोने लोरो थियो, त यहूदा ज़ै 12 चेलन मरां थियो तैड़ी पुज़ो, तैस सेइं साथी बड़े मैन्हु थिये ज़ैना तलवारां ते लट्टां घिन्तां ओरे थिये तैना प्रधान याजकन ते कौमेरे बुज़ुर्ग लोकेई भेजोरे थिये।

48 तैसेरे टलुवाने बाले तैन ई निशान दित्तोरो थियो, कि ज़ैस अवं फुम्मड़ी देइलो त तैए, ते तुस तैस टलेइयथ।

49 ते तैखन यहूदा, यीशु कां एइतां ज़ोवं, हे गुरू नमस्कार, ते एइतां तैस फुम्मड़ी दित्ती।

50 यीशुए तैस सेइं ज़ोवं, हे मेरे दोस्ता ज़ैस कम्मेरे लेइ तू ओरोस तैन कम केर, तैखन लोकेई एगरोइतां यीशु पुड़ हथ रखे ते टलाव।

51 यीशुएरे सैथन मरां एक्के अपनि तलवार कढी, ते महायाजकेरे नौकरे पुड़ बाई ते तैसेरो कन्न कटो।

52 तैखन यीशुए तैस जो ज़ोवं, तलवारी मियांने मां रख किजोकि ज़ैना तलवार च़लातन तैना तलवारी सेइं मार गाले।

53 “कुन तू न ज़ानस अवं अपने बाजी करां मिनत केरि सकताई तै हुन्ना स्वर्गदूतां केरि 12 फौवजां बल्के तैस करां भी जादे भेजते।

54 पन फिरी तैना पवित्रशास्त्रेरी गल्लां केन्चरे पूरी भोनिन ज़ैन केरू पूरू भोनू ज़रूरीए?”

55 तैखन यीशुए तैन हछे लोकन सेइ ज़ोवं, “अवं कुन कोई डैकू आई ते तुस मींजो डांग सोटे ते तलवारां टलेइतां मीं टलाने ओरेथ? अवं त रोज़ मन्दरे मां बिशतां शिक्षा देतो थियो ते तैखन तुसेई अवं नई टलातोरो?”

56 पन एन सब किछ् एल्हेरेलेइ भोवं, कि पवित्तर बचने मां नेबी केरि लिखोरी गल्लां पूरी भोन, तैखन सारे चले तैस तैड़ी छेइतां चले जे।”

ⓂⓂⓂⓂⓂⓂ ⓂⓂⓂ ⓂⓂⓂⓂ

(ⓂⓂⓂⓂⓂⓂ 14:53-65; ⓂⓂⓂⓂ 22:54-55,63-71; ⓂⓂⓂⓂⓂⓂⓂ 18:13-14,19-24)

57 ते यीशु टलानेवाले तैस महायाजक कैफा कां घिन्तां जे, ज़ैड़ी तैना शास्त्री ते बुजुर्ग अकोट्टे भोरे थिये।

58 ते पतरस भी दूरेरां देंतो पत्पती तैस महायाजके अंगनेरे तगर जेव, ते तैड़ी पेरहेदारन सेइ साथी बिशतां यीशुएरो अन्त लोरो थियो हेरने कि कुन केरतन।

59 प्रधान याजक ते कने सारी महासभा यीशुएरे खलाफ गवाही तोपनेरी कोशिश केरि राओरे थिये, कि ज़ैस सेइ यीशु कल्ल कियो गाए।

60 पन कोई गवाह न मैल्लो, हालांकी बडे झूठे गवाह भी पैश भोए, आखकार दूई गवाह पैश भोए।

61 ते ज़ोने लगगे, एनी ज़ोरू कि “अवं परमेशेरू घर डोलतां टलेइ दिहाइन मां फिरि खडू केरि सकताई।”

62 तैखन महायाजक खडो भोइतां यीशु पुच्छने लगगे, “कुन तू कोई जुवाब न देस, इना लोक तेरे खलाफ कुन गवाही देतन?”

63 पन यीशु चुप राव, “तैखन महायाजक फिरि पुच्छने लगगे, तीं ज़ीते परमेशेरी कसम भोए कि असन ज़ो, कि तू परमेशेरू मट्टू मसीह आस?”

64 यीशुए जुवाब दित्तो, तीं एप्पू ज़ोई छडू ते हुनी अवं भी ज़ोताई कि अज्जेरे बाद तुस मैनेरे मट्टे परमेशेरे देइने पासे बिशारे लाएले, ते अम्बरे पुड बिदलारी मां एइते लाएले।”

65 तैखन महायाजके अपना लिगाड़ां छिंदा, ते ज़ोने लगगे, एनी परमेशेरी तुहीन कियोरीए हुनी असन केन्वी गवाहेरी ज़रूरत नई, तुसेई हुन्ना एसेरू झूठ शुनेरूए।

66 तुशशी कुन राईए? तैनेई जुवाब दित्तो ए कतलेरे काबल आए?

67 तैखन तैनेई तैसेरे तुत्तरे पुड थुकू ते तैस घुसेइं ते होरेई थप्पड मैरतां ज़ोवं।

68 “हे मसीह अगर तू नबी आस त भविष्यवाणी केर ते ज़ो, तीं केनि बाहोरिए?”

ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂⓂ 14:66-72; ⓂⓂⓂⓂ 22:56-62; ⓂⓂⓂⓂⓂⓂⓂ 18:15-18,25-27)

69 पतरस बेइर अंगने मां बिशोरो थियो, ते अक नौकरानी तैस कां आई ते ज़ोने लगगी कि तू भी यीशु गलीली सेइ साथी थियो।

70 तैनी सेब्मी केरे सामने इन्कार कियो ते ज़ोवं, “मीं नई पतो तू कुन लोरिस ज़ोने?”

71 तैखन पतरस बेइर फाटकेरे पासे जेव, त अक होरि नौकरानी तैस लेइतां तैन सेइं ज़ैन तैड़ी थी ज़ोने लाई, ई मैन्हु भी नासरतेरे यीशु सेइं साथी थियो।”

72 पन तैनी सेब्मी केरे सामने कसम केरतां इन्कार कियो, ते ज़ोवं, अवं एस मैन्हु सैइयां न ज़ैनी।

73 थोडे चिरेरां पत्ती तैना लोक ज़ैना तैड़ी खडखडे थिये, पतरसे कां आए ते ज़ोने लगगे, सच्चे तू भी तैन्ने मरां अक आस, किजोकि तेरी बोली सेइं बुझोते कि तू तैसेरो साथिस।

74 तैखन ते तैस जो गैई देइतां ज़ोने लगगे, ते कसम केरतां ज़ोने लगगे, “अवं एस मैन्हु सैइयां न ज़ैनी।” तैखन कुकडे बांग दित्ती।

75 पतरसे तैखन यीशुएरी ते गल याद आई, ज़ै तैनी ज़ोरी थी कि कुकड़ेरे बांग देने करां पेइले तू टलेइ बार मेरो इन्कार केरलो, ते पतरस बेइर गेइतां हुस्बुकैइं-हुस्बुकैइं लेरां देने लगगे।

27

॥॥॥॥॥॥॥॥॥ ॥॥॥॥ ॥॥॥॥

(॥॥॥॥॥ 15:1; ॥॥॥॥ 23:1-2; ॥॥॥॥॥॥ 18:28-32)

- 1 झेझ भोते सारे लोक ते प्रधान याजक, ते कोमरे बुजुर्गई मुशोरो कियो कि यीशुएरे कल्ल केरनेरो फेसलो कियो।
2 ते यीशु बेंधतां नीयो, ते रोमी गवर्नर पिलातुसे कां नीयो।

॥॥॥॥ ॥॥॥॥॥ ॥॥॥॥॥

(॥॥॥॥॥॥ 1:18-19)

- 3 जैखन यहूदा जैनी यीशु टलुवेवरो धियो तैस एसास भोव, कि यीशु मुर्जम बनोरोए त तैनी बडू पशतावं, ते तैना चेंदरे टलही सिक्के प्रधान याजक ते बुजुर्गन कां वापस आने।
4 ते ज़ोने लगो, “मीं पाप कियो, कि अक बेकसूर मैन्हू, मारने लेइ टलुवाव,” ते तैना ज़ोने लगो, “असन कुने? तू ज्ञान ते तेरू कम ज्ञाने।”
5 तैखन यहूदा तैना सिक्के मन्दरेरे अंगने मां शैरतां छडे, ते तैट्ठां गोइतां अपने आपे फांसी दित्ती।
6 प्रधान याजकेई तैना सिक्के सल्ले, ते ज़ोने लगो, “इन सिक्के इशे कानूनेरे मुताबिक मन्दरेरे खजाने मां रखने जेइज नई, किजोकि ए कोन्वी मैन्हू मारनेरी कीमते।”
7 एल्हेरेलेइ तैनेई मुशोरो केरतां तैस रकमी सेइं कुम्हारे करां अक ऊडार घिन्नु, ताके परदेशी केरे लेइ कबरास्तान बनावं गाए।
8 तांए त अज तगर भी तैस ऊडारे जो खूनेरू ऊडार ज़ोतन।
9 तैखन तै गल पूरी भोइ जै यिमयाह नेवे ज़ोरी थी, कि तैनेई तैसेरी पूरी कीमत चेंदरे टलही सिक्के निये, ए कीमत इस्राएलेरे लोकेई कियोरी थी।
10 ते तैन चेंदरे टलही सिक्केइं सेइं कुम्हारेरू ऊडार घिन्ने जो दिते जेन्चरे प्रभुए मीं हुकम दित्तोरो धियो।

॥॥॥॥॥॥ ॥॥॥॥ ॥॥॥॥ ॥॥॥॥॥॥॥॥

(॥॥॥॥॥ 15:2-5; ॥॥॥॥ 23:3-5; ॥॥॥॥॥॥ 18:33-38)

- 11 जैखन यीशु हाकिमेरे तुत्तरे अगर खडो धियो, ते हाकिम तैस पुच्छ, “तू यहूदी केरो राज़ोस?” यीशुए जुवाब दित्तो, “तू एप्पू ज़ोने लोरोस।”
12 ते जैखन प्रधान याजक ते बुजुर्ग तैस पुइ इलजाम लाने लोरे धिये त यीशुए कोई जुवाब न दित्तो।
13 तैखन पिलातुसे यीशु सेइं ज़ोवं, “हेर एना तेरे खलाफ केत्री गवाहई लोरेन देने तू शुन्तस की नई।”
14 पन यीशुए तैस एक्की गल्लारो भी जुवाब न दित्तो; ते इडी तगर कि हाकिम बडो हैरान भोइ जेव।

॥॥॥॥ ॥॥॥॥॥ ॥॥॥॥॥

(॥॥॥॥॥ 15:6-15; ॥॥॥॥ 23:13-25; ॥॥॥॥॥॥ 18:39; 19:16)

- 15 ते हाकिमेरो अक दस्तूर धियो, कि फ़सह तिहाररे मौके पुइ अक कैदी ज़ैस लोक चाते धिये तैस हथरां छडतो धियो।
16 तैस मौके तैन केरो अक बडो मुशूर कैदी धियो, जेसेरू नवं वरअब्बा धियूं।
17 जैखन तैना लोक पिलातुसे कां जम्हां भोए, त पिलातुसे तैन पुच्छ, “तुस कुन चातथ, अवं केस हथरां छेइडी? वरअब्बा कि यीशु ज़ैस जो मसीह ज़ोतन?”
18 किजोकि ते ज्ञानतो धियो, कि तैनेई सिर्फ जलनी सेइं ते टलुवोरोए।

19 ज़ैखन तै आदालतरी तखते पुड़ बिशरो थियो, त तैसेरी कुआन्शां तैस जो समाद भेजोरो थियो, “कि तू एस रोड़े मैनेरे बारे मां किछ न करां, किजोकि मीं अज राती एसेरी वजाई सेइं सुपने मां बड़ो दुःख भोरोए।”

20 पन प्रधान याजकेईं ते बुजुर्ग लोकेईं लोक बमकाए, कि तैना पिलातुसे करां बरअब्बा हथरां छुडन ते यीशु मारन।

21 ज़ैखन हाकिमे तैन लोकन पुच्छ, “कि तुस एन दुईन मरां केस चातथ, अवं तैस हथरां छेइडी,” तैन लोकेईं ज़ोवं, “बरअब्बा।”

22 पिलातुसे तैन पुच्छ, “फिरी अवं यीशु ज़ैस जो मसीह ज़ोतन तैस सेइं कुन केरि?” सब लोक ज़ोने लगगे “एस क़रूसे पुड़ चाढ़।”

23 हाकिमे ज़ोवं किजो? “एनी कुन बुराई कियोरीए? पन तैना मना ज़ोरे-ज़ोरे ज़ोने लगगे कि एस क़रूसे पुड़ चाढ़।”

24 ज़ैखन पिलातुसे हेरू कि किछ भी बन्ने बालू नई बल्के उलटो फसाद भोने बालोए, त तैनी पानी मेगतां तैन मैन्हु केरे सामने हथ धोए ते ज़ोवं, “कि अवं एस एक्की धेर्मी मैनेरे खूने करां बरी भोइताई, तुसे ज़ांना।”

25 ते सारे लोकेईं जुवाब दित्तो, “एसेरो खून असन पुड़ ते इश्शी औलादी पुड़ भोए।”

26 तैखन पिलातुसे बरअब्बा हथरां छुइडो, ते यीशुए कोड़े बावैहीतां तैन केरे हवाले कियो, ताके तैना तैस क़रूसे पुड़ चाढ़न।

~~~~~

(~~~~~ 15:16-20; ~~~~~ 19:2,3)

27 ते तैखन हाकिमेरे सिपैहीयेइं यीशु महलेरे अंगने मां नेइतां सारे फौजरे सिपाही यीशुएरे चुफरतां जम्हां भोए।

28 तैनेईं तैसेरां लिगडां खोल्लां ते तैस अक लाल रंगेरो चोगो लुवाव।

29 फिरी कंटां केरू ताज तैसेरे दोगगे पुड़ रखव, ते तैसेरे देइने हथ्ये मां अक निरैठरी लैट दित्ती, ते तैस कां मथ्यो टेकतां तैसेरी हासी बनाने लगगे, ते ज़ोने लगगे, “हे यहूदी केरे राजा नमस्कार।”

30 तैना तैस पुड़ थुकते ते सोटी सेइं तैसेरे दोगगे पुड़ बाते थिये।

31 ज़ैखन तैनेईं तैसेरो मज़ाक बनाव, त तैसेरो चोगो खोल्लो, ते फिरी तैस तैसेरां लिगडां लुवां ते तैट्टां चले, ताके तैस क़रूसे पुड़ चाढ़न।

~~~~~

(~~~~~ 15:21-32; ~~~~~ 23:26-43; ~~~~~ 19:17-27)

32 ज़ैखन तैना तैट्टां चलोरे थिये, त तैन शमौन कुरेनी नंब्वेरो अक मैन्हु मैल्लो, तैन लोकेईं ते दलातो ताके यीशुएरू क़रूस छुइतां चलाए।

33 ते यीशु गुलगुता नंब्वेरी ठेरी पुजे, ज़ेसेरो मतलबे खोपड़ारी ठार।

34 तैड़ी तैनेईं यीशु दाछ्यारो रस ते टलिटो रस मिलेइतां पीने जेईं दित्तो, पन तैनी पीनी न चाव।

35 ज़ैखन तैनेईं यीशु क़रूसे पुड़ चाढ़ो त शर्त रेखतां चिट्ठी छेइतां तैसेरां लिगडां भी एप्पू मामेइं बंटा।

36 ते तैड़ी बिश्तां तैसेरो पैरहो केरने लगगे।

37 ते तैनेईं तैसेरो जुर्म एक्की पेखड़ी पुड़ लिखतां तैसेरे दोगगे करां बा लाईं ज़ैस पुड़ एन लिखोरू थियूं, “ई यहूदी केरो राजा यीशु आए।”

38 तैखन तैस सेइं साथी इईं डैकू भी क़रूसे पुड़ चाढ़े, अक यीशुएरे देइने पासे, ते होरो बांए पासे।

39 तैट्टां गानेबाले सारे लोक दोग हिलेइतां गाते थिये ते तैसेरी तुहीन केरते थिये।

40 ते ज़ोते थी इस मन्दरे डोलने बाला ते टलेइ दिहइन मां बनाने बाला, अपना आप त बचा, “अगर तू परमेशेरू मट्टू आस त एस क़रूसे पुड़रां उन्दो ओस।”

- 41 एन्चरे प्रधान याजक ते शास्त्री ते बुजुर्ग भी तैसेरी हासी बनाते थिये, ते ज़ोते थिये ।
 42 “एनी होरे बचाए पन अपनो आप न बच्चेइ बटो, ई त इसराएलेरो राज़ो आए ।” अगर हुन्ना भी तू करूसे पुडरां उन्डो ओस्स, त अस तीं पुड विश्वास केरतम ।
 43 एसेरो भरोसो परमेशरे पुडे, अगर तै एस चाते त एस बचाए, किजोकि एनी ज़ोरू थियूं, ‘अवं परमेशरें मट्टू आई ।’ ”
 44 ते दूई डैकू भी ज़ैना तैस सेइं साथी करूसे पुड च़ादोरे थिये, तैना भी तैसेरी तुहीन केरते थिये ।

मत्ती 27:41-49

(**मत्ती 15:33-41**; **मत्ती 23:44-49**; **मत्ती 19:28-30**)

- 45 दीसेरे 12 बज्जेई सारे मुल्खे मां आंधरू भोवं ते टलेइ बजन तगर रावं ।
 46 ते टलेइ बाज़ां केरे लगभग यीशुए बडे ज़ोरे सेइं ज़ोवं, “एली, एली लमा शबक्तनी?” ज़ेसेरो मतलबे, “हे मेरे परमेशर, हे मेरे परमेशर, तीं अवं किजो शारो?”
 47 ज़ैना लोक तैडी खडखडे थिये, तैन मरां किछ शुन्तां एन ज़ोने लगगे, कि ए त एलिय्याह फुक़ारने लोरोए ।
 48 तैखन अक मैन्हु देवडतां जेव, ते अक गलास पैनी मां डोबतां ते निरेठरे सोटी पुड टकेइतां पीनेरे लेइ तैसेरे ऐशी सेइं हुरावं ।
 49 किछ ज़ोने लगगे, “बलगा हुनी हेरतम, कि एलिय्याह एस बचाने एइते कि नई ।”
 50 ते यीशुए फिरी ज़ोरे सेइं चिन्ड मारी ते प्राण दित्ते ।
 51 तैखन मन्दरेरो पडदो बां देंता बुन तगर फेटतां दूई टुकडे भोइ जे, ते पहाड़ां ते सारी ज़मीन हीलने लगगी ।
 52 कब्रां खुल्ली जेई, ते बडे पवित्र लोक ज़ैना मौतरी निडला मां झुलोरे थिये, ज़ीते भोइ जे ।
 53 ते कब्रन मरां निस्तां ज़ीते भोनेरां पत्ती पवित्र नगर मां दाखल भोए, ते तैडी बडे होरि लोकेई भी लाए ।
 54 तैखन तैनी सूबेदारे ते तैसेरे सैथेई ज़ैन यीशुएरी निगरानी केरने लोरे थिये, भुजल गांतो हेरो, त तैना डेरि जे, ते ज़ोने लगगे, “सच्चे एन परमेशरें मट्टू थियूं!”
 55 तैडी बेडि कुआन्शां ज़ैना गलील इलाके मरां यीशु सेइं साथी तैसेरी सेवा केरती तैस पत्ती ओरी थी, ते दूरेरां तकने लोरी थी ।
 56 तैन मां मरियम मगदलीनी ते याकूब त योसेसेरी अम्मा मरियम ते जब्दरे मट्टां केरि अम्मा साथी थी ।

मत्ती 27:50-56

(**मत्ती 15:42-47**; **मत्ती 23:50-56**; **मत्ती 19:38-42**)

- 57 ज़ैखन इलोझ भोइ त अरिमतियाहरो अक अमीर यूसुफ नंब्वेरो मैन्हु ज़ै एण्पू भी यीशुएरो चेलो थियो अव ।
 58 तैनी पिलातुसे कां गोइतां यीशुएरी लाश मगी, ते पिलातुसे लाश देनेरो हुक्म दित्तो ।
 59 यूसुफे लाश नेइतां एककी रोडि ज़ेरि च़ादरी मां पलैटी ।
 60 ते तै लाश एककी नर्वीं कबरी मां ज़ै शफ़डी मां घडोरी थी रख्खी, ते तैस कबरी आग्रोरां अक बड्डो घोड तैस उबरो छड्डो ।
 61 ते मगदलीन इलव्वेरी मरियम ते होरि मरियम तैडी तैस कबरारे सामने विशोरी थी ज़ैस मां यीशुएरी लाश रखोरि थी ।

मत्ती 27:57-62

- 62 होरसां तियैरारे दिहाड़े बाद यहूदी केरे आरामेरे दिहाड़े प्रधान याजक ते फरीसी लोक मिलतां पिलातुसे कां पुजे ।

63 ते ज्ञाने लगगे महाराज्ज असन यादे कि तैनी धोखे बाज्जे अपने ज्जीते सांसेइ ज़ोरू थियूं, “अवं मरनेरे टलेइ दिहाइं बाद फिरी ज्जीतो भोनोई।

64 एल्हेरेलेइ हुक्म दे ताके टलाई दिहाइन तगर कबरी पुड़ पेरहो दित्तो गाए, कि एरू न भोए कि तैसेरे चले एइतां तैसेरी लाश चोरन, ते लोकन सेइं ज़ोन कि ते मुडदन मरां ज्जीतो भोरोए, ए धोखो पेइले धोखे करां भी जादे बुरो भोलो।”

65 पिलातुसे जुवाब दित्तो, “तुसन कां पेरहो देनेवाले आन, गाथ जेतूरू भोइसखे पेरहो देथ।”

66 तैखन तैनेई गेइतां घोडे पुड़ मोहर लाई, ते कबररारे पेरहे लेइ पेरहेदार रख्वे।

28

XXXXXXXXXXXXXXXXXXXX

(XXXXXXXX 16:1-10; XXXXXX 24:1-12; XXXXXXXXXXX 20:1-10)

1 आरामेरे दिहाइरे बाद हफतेरे पेइले दिहाइ टलेकडॉते-टलेकडॉते मगदलीन इलव्वेरी मरियम ते होरि मरियम ज़ैडी यीशुएरी लाश कबरी मां रख्वोरी थी, हेरने एई।

2 ते हेरा अक बडो भुंजल अव, किजोकि परमेशेरो अक स्वर्गदूत स्वर्गेरां ओरो थियो, ते तैस कबरी अगरां घोइ उन्ढो बिछोइतां तैस पुड़ बिश्वी जेव।

3 तैसेरी शकल सूरत दिहाइरी जेरि रोडी थी, ते तैसेरां लिगइा हीवेरां जेरां छित्तां सुफैद थियां।

4 पेरहेदार डेरतां थर-थर कम्बने लगगे ते जेरे मुडदे भोए।

5 स्वर्गदूते कुआन्शन सेइं ज़ोवं, “डरा नन्ना, अवं ज्ञानताई कि तुस यीशुए तोपने लोरिथ, ज़ै कूरूसे पुड़ चाढोरोए।

6 ते इडी नई बल्के ज़ेन्नेरे तैनी ज़ोरू थियूं, ते ज्जीतो भोरोए, एज्जा ते ठार हेरा, ज़ैडी प्रभु थियो।

7 ते जल्दी गेइतां तैसेरे चेलन पतो देथ, कि ते मुडदन मरां ज्जीतो भोरोए, ते तुसन करां पेइलो गलीले मां गाते, ते तुसेईं ते लहनोए हेरा मीं तुसन एन ज़ोरूए।”

8 तैखन तैना कुआन्शां डेरतां भी ते खुशी सेइं भी कबरी मरां बेइर एई, ते दौवइती-दौवइती जेई ताके चेलन पतो देन।

9 तैखन यीशु तैन मैल्लो, ते तैनी ज़ोवं तुसन शान्ति मैल्ले, ते तैनेई तैसेरे पाव बंते, ते तैस कां मथ्यो टेको।

10 तैखन यीशुए तैन ज़ोवं, डरा न ते गाथ ते मेरे चेलन सेइं ज़ोथ कि गलीले मांजो गान, तैना मीं तैडी लाएले।

XXXXXXXXXXXXXXXXXXXX

11 हेजू तैना कुआन्शां बत्तां थी कि ज़ैना चेलन खबर देने ज़लोरी थी, त पेरहेदारन मरां किछ नगर मां जे ते प्रधान याजकन सेइं सारो बिस्तार शुनाव।

12 ज़ैखन महायाजकेई बुजुर्गन सेइं मिलतां मुशोरो कियो, ते तैनेई ई फैसलो कियो कि सिपेहिन बडे पेइंसे देन, कि तैना ई गल केन्वी सेइं न ज़ोन, कि कवर केन्नेरे खाली भोइ।

13 तैनेई पेहेरेदारन एन ज़ोवं, कि तुस एन ज़ोइयथ, कि ज़ैखन अस राती झुल्लोरे थिये त तैसेरे चले आए ते तैनेई तैसेरी लाश नी।

14 अगर ए गल गुवनरि तगर पुजेली त अस तैस एप्पू समझामेले त तुसन कोई परेशानी न भोली।

15 ते सिपेहेईं पेइंसे नीए ते ज़ेन्नेरे तैनेई ज़ोरू थियूं तेन्नेरे कमाव, ते अज तगर ए गल यहूदन मां मुशूरे।

XXXXXXXXXXXXXXXXXXXX

(XXXXXXXX 16:14-18; XXXXXX 24:36-49; XXXXXXXXXXX 20:19-23; XXXXXXXXXXX 1:6-8)

16 11 चले गलीले मां जे, ते तैस पहाइ पुड़ अकोटटे भोए ज़ैडी गानेरे बारे मां यीशुए तैन ज़ोवरू थियूं।

17 ज़ैखन तैनेई यीशु लाव त तैस कां मथ्यो टेको, ते किछ्छन हेजू भी शक थी, कि तै ज़ींतो वापस ओरोए।

18 तैखन यीशु तैन केरे नेडे एइतां ज़ोवं, “धेरतरो ते स्वर्गेरो सारो अधिकार मीं दित्तोरोए।

19 एल्हेरेलेइ तुस गाथ ते सैरी कौमां केरे लोकन चले बनाथ, ते तैन बाजी, ते मट्टेरे, ते पवित्र आत्मारं नंव्वे सेइं बपतिस्मो देथ।

20 ते तैन तैना सब हुक्म मन्ने शिखाला ज़ैना मीं तुसन दित्तोरेन, ते हेरा, अवं दुनियारे आखरी तगर हमेशा तुसन सेइं साथी आईं।”

मरकुस

ⓂⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂⓂ ⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ
(ⓂⓂⓂⓂⓂ 3:1-12; ⓂⓂⓂⓂⓂ 3:1-18; ⓂⓂⓂⓂⓂⓂⓂ 1:19-28)

- 1 ई यीशु मसीहरे बारे मां खुशखबरायी शुरुआत आए, जैन परमेशेरू मट्टू आए ।
- 2 (बड़े पेइले) यशायाह नेबे अपनि किताबी मां लिखोरू थियूं कि, (परमेशेरु अपने मट्टे सेई ज़ोव,) “शुन, अवं अपनो बिस्तार देनेबालो तीं केरां पेइले भेजेलो ।”
“तै तीं केरां पेइलो गेइतां तेरे लेइ बत तियार केरेलो । (यानी, लोकां केरे दिल परमेशेरु लेइ तियार केरेलो)”
- 3 “तै बिस्तार देनेबालो सुनसान ठैरी मां लोकन, जैना तैस कां गाले, तैन हक देइतां ज़ोलो कि ‘तुसन कां पूरभु एजनेबालो आए, एल्हेरेलेइ तुस तैसेरेलेइ बत तियार केरा त कने तैसेरेलेइ सड़कां सिद्धी केरा ।’ (यानी, पूरभुएरे लेइ तुस अपने दिल साफ केरा)”
- 4 जेन्त्रां लिखोरू थियूं, अक बिस्तार देनेबालो अब । तैस मैनेरू नवं यूहन्ना थियूं । लोक तैस जो बपतिस्मो* देनेबालो भी ज़ोते थिये । तै यहूदिया इलाकेरे सुनसान ठैरी मां अब । तैड़ी तै लोकन परमेशेरु गल्लां शुनातो थियो कि, “तुस अपने पापन करां मनफिराथ, त कने बपतिस्मो नेथ, ताके परमेशेरु तुशुशे पाप माफ़ केरे ।”
- 5 यहूदिया इलाकेरे बड़े लोक त यरूशलेम नगरेरे रानेबालन मरां बड़े लोक यूहन्नारी गल्लां शुन्नेरे लेइ सुनसान ठैरी मां तैस कां आए । तैन लोकेई अपने पाप मेन्तां यूहन्ना करां यरदन दरियाए मां बपतिस्मो नीयो ।
- 6 यूहन्ना आम लिगड़ां लातो थियो जैना लिगड़ां ऊँटेरे बालन सेइं बनोरां थियां । तै अपनि कमरी पुड़ चमड़ेरू मज़ बंधतो थियो । ते तै टिटटां त कने जंगलेरू माछ्ठी खातो थियो ।
- 7 तै लोकन शुनातो थियो कि, “कोई अक, जै मीं केरां भी महान आए, मेरे बाद एजनेबालोए । अवं त तैसेरो गुलाम भोनेरे काबल भी नई कि लिकतां तैसेरे वूटेरे तसमे खोल्ली ।
- 8 अवं त तुसन पैनी सेइं बपतिस्मो देताई, पन तै तुसन पवित्र आत्मा सेइं बपतिस्मो देलो।”

ⓂⓂⓂⓂⓂⓂ ⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂⓂ
(ⓂⓂⓂⓂⓂ 3:13; 4:11; ⓂⓂⓂⓂⓂ 3:21-22; 4:1-13)

- 9 तैल्ला पत्ती, तैन दिहाइन मां एरू भोवं कि यीशु गलील इलाकेरे नासरत नगरेरां यूहन्ना कां अब । तैनी यूहन्ना करां यरदन दरियाए मां बपतिस्मो नीयो ।
- 10 जैखन यीशु बपतिस्मो नेइतां पैनी मरां बेइर अब, त तैनी अम्बर खुलतू त पवित्र आत्मा कबूतरेरी शकली मां तैस पुड़ एत्तो लाव ।
- 11 तैखन परमेशेरु स्वर्गोरां यीशु सेइं ज़ोव, “तू मेरू ट्लारू मट्टू आस, अवं तीं पुड़ बड़ो खुश आई ।”

ⓂⓂⓂⓂⓂ ⓂⓂⓂ ⓂⓂⓂⓂⓂⓂⓂⓂ ⓂⓂ ⓂⓂⓂⓂⓂ ⓂⓂⓂⓂⓂⓂⓂⓂ

- 12 तैल्ला पत्ती, अकदम पवित्र आत्मा यीशु सुनसान ठैरी जो भेजो ।
- 13 सुनसान ठैरी मां 40 दिहाइन तगर शैताने यीशु अज़माव । त तैड़ी यीशु जंगली जानवरन साथी थियो । तैखन परमेशेरु स्वर्गदूत यीशु कां एइतां तैसेरी सेवा करेने लगगे ।

* 1:4 बपतिस्मो: मतलब कि, मैन्हु पापेरी ज़िन्दगी छेइतां परमेशेरु बची पुड़ ज़लनेरे लेइ तियार भोते । एल्हेरेलेइ एस रसमी करेतन । एसमां कुन भोते कि मैन्हु पैनी मां डूबेइतां बेइर कदतन । † 1:8 पवित्र आत्मा सेइं बपतिस्मो: ए अक मुहावरो आए । एसेरो मतलब, जैना लोक पापन करां मनफिरातन, तैनन् परमेशेरु एन आशिवांद देते । तैन मां बसनेरे लेइ परमेशेरु तैन कां अपनि पवित्र आत्मा भेजेलो । पवित्र आत्मा तैनन् शुद्ध केरेलो, त कने परमेशेरु मर्जी पुड़ ज़लनेरे लेइ महत केरेलो त समझ देलो, त कने होरि बड़ी गल्लन मां भी तैन करि महत केरेलो ।

32 इलोझी जैखन दिहाड़ो डुब्बो, त लोक सारे बिमार मैन्हु त कने जैन मैनन् पुड भूतेरो सायो थियो तैना यीशु कां आन्ने लगगे, ताके तै तैनन् बज्झाए ।

33 तैस नगरेरे बडे लोक तैस घरेरे दारे पुड अकोट्टे भोए ।

34 यीशुए बडे मैन्हु बज्झाए, जैना बडे किसमां केरि बिमैरन सेइं दुखी थिये । त तैनी बडे मैनन् मरां भूतां केरो सायो कडडो । पन यीशुए भूतन किछ् ज़ोने न दित्तू, किजोकि तैना यीशु पिशानतां थियां (कि एन परमेशेरे मट्टू आए) ।

ॐॐॐ ॐॐॐ ॐॐॐॐॐॐ ॐॐॐॐ ॐॐॐॐ
(ॐॐॐ 4:42-44)

35 एगरी दिहाड़ी, झेज्झां-झेज्झां दिहाड़ो निस्ने केरां बडे पेइले, यीशु उठतां बेइर एक्की सुनसान टैरी मां जेव । तैड़ी तै प्रार्थना केरने लगो ।

36 पन थोडे चिरेरां बाद, शमौन त तैसेरे साथी, यीशु तोपने जे ।

37 जैखन तैनन् तै मैल्लो, त तैनेई यीशुए सेइं ज़ोवं, “(वापस इलाव्वे मां एई,) सारे लोक तीं तोप्पी राओरेन!”

38 पन यीशुए तैन सेइं ज़ोवं, “एज्जा, अस होरि केन्वी आसेपासेरे इलोव्वन मां गाम, ताके अवं तैन लोकन भी परमेशेरी गल्लां शुनेई । किजोकि अवं एस्से कम्मरे लेइ दुनियाई मां ओरोई ।”

39 तैल्लेरेलेइ यीशु गलील इलाकेरे सारे इलोव्वन मां गेइतां, तैन केरे प्रार्थना घरन मां लोकन परमेशेरी गल्लां शुनातो राव ते बडे लोकन मरां भूतां केरो सायो कढतो राव ।

ॐॐॐ ॐॐॐ ॐॐॐ ॐॐॐ ॐॐॐॐॐॐ
(ॐॐॐ 8:1-4; ॐॐॐ 5:12-16)

40 तैल्ला पत्ती, एक्सां अक कोढी मैन्हु यीशु कां अव । तैनी मैने यीशुएरे सामने जैन्धु केरे भारे विशतां तैस कां मिन्नत केरतां तैस सेइं ज़ोवं, “अगर तू चास, त मीं बज्झेई सकतस । (महरवानी केरतां मीं बज्झा ।)”

41 यीशुए तैस मैन्हु पुड तरस खाव । यीशुए अपनो हथ अग्रोवं कियो त तैस कोढी मैन्हु सेइं हथ लेइतां‡ ज़ोवं, “अवं चाताई, तू बज्झोस ।”

42 अकदम तै कोढी बज्झोई जेव ।

43 तैखन यीशुए तै मैन्हु समझेइतां लूशी भेजो ।

44 त तैनी तैस सेइं ज़ोवं, “हेर, एस गल्लेरे बारे मां केन्वी सेइं किछ् न ज़ोइयां । (तू यरूशलेम नगरेरे मन्देरे मां गा), त कने अपने आपे याजके हिरा । तैल्ला पत्ती, तू अपने बेज्झोनेरे वजाई सेइं चढतल च़ाढ, जेसेरे बारे मां मूसा नेवे कानूने मां हुक्म दित्तोरोए, ताके लोकन पतो च़ले कि तू बेज्झोरोस ।”

45 पन तै मैन्हु बेइर गेइतां एस गल्लेरे बारे मां लोकन बडू शुनाने लगो ते इड़ी तगर फैलाने लगो कि यीशु फिरी बांटे नगरे मां न गेइ सको, पन बेइर सुनसान टैरन मां राव ते च़ेवरे पासां केरे लोक तैस कां एइते राए ।

2

ॐॐॐ ॐॐॐॐ ॐॐॐॐ ॐॐॐॐ
(ॐॐॐ 9:1-8; ॐॐॐ 5:17-26)

1 किछ् दिहाड़ना बाद, यीशु फिरी कफरनहूम नगरे मां जेव । तैट्टेरे मैनेईं शुनू कि तै तैड़ी एक्की घरे मां आए ।

2 अकदम बडे मैन्हु तैस घरे मां अकोट्टे भोए । तैड़ी ठार न राई, इड़ी तगर कि दारे केरां बेइर भी ठार न थी । यीशु तैन लोकन परमेशेरी गल्लां शुनाने लगो ।

‡ 1:41 हथ लेइतां: पन सारे लोक समझते थिये कि कोढी मैन्हु सेइं हथ लानो ज़ुठो (गंढो) आए ।

19 यीशुए तैनन् जुवाव दित्तो, “डलाएरे दिहाड़े, ज़ैखन लाडो जैनी सेइं साथी राते, कुन तैना वरत रेख्वी सकतन? (बिलकुल नई) तैल्हेरेलेइ, ज़ांतगर लाडो तैन सेइं साथी राते, तांतगर तैना वरत न रेख्वी सकन। (किजोकि तैना खुशी आन।)

20 मेरे चले भी तैन केरे ज़ेरे आन, किजोकि अवं तैन सेइं साथी आई। पन तैना दिहाड़े एज्जले, ज़ैखन लाडो तैन केरां अलग कियो गालो (यानी मारो गालो), तैस मौके तैना (अपने दुख्खेरे वजाई सेइं) वरत रख्वेले।”

21 “अवं तुसन अक होरि मिसाल देताई, नंवे लिगडेरी टलोई पुराने लिगडे कोई न लाए। अगर कोई एन्त्रां केरे, त धोनेरे पत्ती नंवे लिगडेरी टलोई पुराने लिगडे अपने पासे खिच्वी छ्इडेली। त तैन पेइले केरां भी जादे छ्इन्दोल्।

22 तेन्त्रे कोई भी पुरैनी मसकन मां नंवे दाछारो रस न रखे, किजोकि दाछारो रस अम्लो भोइतां फुलते बार मसकन छ्इन्दी छ्इडेलो। दाछारे रस त कने मसकां, एना दुइये वरवाद भोइ गाले। एल्हेरेलेइ नंवे दाछारे रस हमेशा नंवे मसकन मां रख्वोरो लोइ, ताके मसकन न छ्इन्दे।”

☞☞☞ ☞☞☞☞☞ ☞☞☞☞☞ ☞☞☞☞ ☞☞☞☞☞☞☞☞
(☞☞☞☞ 12:1-8; ☞☞☞☞ 6:1-5)

23 एककी आरामेरे दिहाड़े, यीशु त कने तैसेरे चले वत्ती मांमेइं चलने लगगोरे थिये, ज़ै गेंव्वां केरे ऊडारन मांमेइं थी। चलते-चलते तैसेरे चले गेंव्वां केरे किछ् शिल्लां टलोइतां खाने लगगे।

24 पन किछ् फरीसी लोकेई तैन हेरतां यीशु सेइं ज़ोवं, “तक! एना आरामेरे दिहाड़े तैन कम किजो केरतन, ज़ैन मूसेरे कानूनेरे मुताबिक जेइज नई?”

25 यीशुए तैन सेइं ज़ोवं, “कुन तुसेईं परमेशेरी किताबी मां एन कधी नई पढोरूए कि (बड़े पेइले) दाऊद राजे कुन कियूं, ज़ैखन तैस त तैसेरे सैथन ढलुख लगगी त तैनन् रोट्टरी ज़रूरत थी?”

26 तुसन पतोए कि दाऊद राजे परमेशेरे घरे मां गेइतां, अबियातार नंवेरे महायाजक करां खाने जो रोट्टी मग्गी। दाऊदे तै रोट्टी खाइ, ज़ै परमेशेरे जो ज़दोरी थी। कानूनेरे मुताबिक याजक केरे अलावा होरि केन्ची तैना रोट्टी खानेरी अज़ाज़त नई थी। पन दाऊदे अपने सैथन भी रोट्टी दित्ती त तैनेई भी तैना रोट्टी खेइ? (पन फिरी भी परमेशेरे दाऊदे पुइ दोष न लाव।)”

27 तैखन यीशुए तैन फरीसी लोकन सेइं ज़ोवं, “परमेशेरे आरामेरी दिहाड़ी लोकन महत केरनेरे लेइ बनोरीए, न कि आरामेरे दिहाड़ेरे कानून मन्नेरे लेइ तैनी लोक रत्रे।

28 एल्हेरेलेइ, मैनेरू मट्टू यानी अवं आरामेरे दिहाड़ेरो भी प्रभु आई।”

3

☞☞☞ ☞☞☞☞☞ ☞☞☞☞☞ ☞☞☞☞☞ ☞☞☞☞☞☞☞☞ ☞☞☞☞☞☞☞☞
(☞☞☞☞ 12:9-14; ☞☞☞☞ 6:6-11)

1 तैल्ला पत्ती, यीशु एककी प्रार्थना घरे मां जेव। तैडी अक मैन्हु थियो, जेसेरो हथ शुक्कोरे थियो।

2 तैडी किछ् फरीसी लोक भी थिये, ज़ैना यीशु पुइ इलज़ाम लानो चाते थिये। एल्हेरेलेइ तैना यीशु ध्याने सेइं हेरने लगगोरे थिये कि आरामेरे दिहाड़े तै तैस मैन्हु बज्ज़ाते की नई।

3 तैखन यीशुए शुक्कोरे हथेबाले मैन्हु सेइं ज़ोवं, “मज़ाटे खडे भो।” (तै तै मैन्हु खडे भोव।)

4 त यीशुए तैन लोकन पुच्छ्छ्, “आरामेरे दिहाड़े कुन केरनू जेइज, मैनेरू भलू केरनू या वुरू केरनू, मैनेरी जान वन्नानी या मारनी?” पन तैना चुप राए।

5 त तैनी सरकी सेइं तैन केरे ज़ेरे पासन तकू, पन तैन केरे सखत दिलेरी वजाई सेइं उदास भोव। तैखन तैनी तैस मैन्हु सेइं ज़ोवं, “अपनो हथ अग्रोवं केर।” तैनी मैने अपनो हथ अग्रोवं कियो। त अकदम तैसेरो हथ बेज्ज़ोव।

6 तैखन फरीसी लोक प्रार्थना घरे मरां बेइर जे। अकदम तैना हेरोदेस राजेरे लोकन सेइं साथी यीशुएरे खलाफ साजिश करेने लगगे कि यीशुएरो कोस तरीके सेइं कत्ल केरम।

[[[11:1-11:11]]]

7 तैल्ला पत्ती, यीशु अपने चेलन सेइं साथी गलील समुन्दरेरे पासे जेव। मैन्हु केरि बडी भीड तैस पत्ती चली। गलील त यहूदिया इलाकां केरे लोक तैस कां आए।

8 यरूशलेम नगरेरे लोक, इदूमिया इलाकेरे लोक ते यरदन दरियारे पारेरे लोक त कने सूर त सैदारे आसेपासेरे लोक भी तैस कां ओरे थिये। तैना सब यीशु कां आए, किजोकि तैनेई यीशुएरे सारे चमत्कारेरे कम्मां केरे बारे मां शुनोरू थियूं, जैना तै केरतो थियो।

9-10 यीशुए बडे लोक हथ लेइतां बज्जावरे थिये, एल्हेरेलेइ होरे बडे लोक जैना बडे बिमार थिये, तैना तैस सेइं हथ लानेरे लेइ तैस पुइ बिछ्छी गाते थिये, ताके तैना भी बेज्जोन। मैन्हु केरि भीड बडी जादे थी। एल्हेरेलेइ यीशुए अपने चेलन सेइं ज़ोवं, “मेरे लेइ अक किशती तियार केरा, ताके एना लोक मीं दलन्ची न सकन।”

11 त जैन लोकन पुइ भूतां केरो सायो थियो, तैना भी यीशु लेइतां तैसेरे पावन पुइ बिछ्छी गाते थिए। तैना भी ज़ोरे-ज़ोरे सेइं ज़ोते थिए कि, “तू परमेशेरू मटटू आस।”

12 यीशुए तैन भूतन सखत हुक्म दित्तो कि, “मेरे बारे मां लोकन न ज़ोथ कि अवं कौन आई।”

[[[12:1-12:12]]], [[[12:13-12:16]]]
([[[10:1-4]]]; [[[6:12-16]])

13 तैल्ला पत्ती, यीशु एक्की पहाडे पुइ चढो। जैना मैनन् तै अपने चले बनानो चातो थियो, तैना एप्पू कां कुजाए। तैना तैस कां आए।

14 यीशुए तैन मरां 12 मडद चुने, ते तैन प्रेरित नवं दित्तू कि तैना तैस सेइं साथी-साथी रान, ताके तै तैन लोकन खुशखबरी शुनाने भेजे।

15 यीशुए तैनन्, लोकां केरि बिमैरी बज्जाने त कने मैनन् मरां भूतां केरो सायो कढनेरो अधिकार दित्तो।

16 तैना 12 मैन्हु केरां नंवां इना थियां: शमौन जेसेरू नवं यीशुए पतरस रखू,

17 याकूब त तैसेरो दला यहून्ना, एना दुइये जेबेदां मट्टां थियां, त यीशुए एन दुइयां केरू नवं बुअनरगिस रखू, मतलब कि, गुइनेरां मट्टां।

18 त अन्दरयास, फिलिप्पुस, बरतुलमै, मत्ती, थोमा, याकूब जैन हलफईसेरू मटटू थियूं, त तद्वै, शमौन जै पेइले रोमी सरकारारे खलाफ यहूदी लोकां केरि आजैदेरे लेइ लइनेवालो थियो।

19 त कने यहूदा इस्करियोती जैनी वादे मां यीशु धोखे सेइं दलुवाव।

[[[12:22-12:32]]], [[[11:14-11:23]]], [[[11:24-11:30]]]
[[[12:22-12:32]]]

([[[12:22-32]]]; [[[11:14-23]]]; [[[12:10]])

20 तैल्ला पत्ती यीशु कफरनहूम नगरेरे एक्की घरे मां जेव। फिरी मैन्हु केरि भीड तैस घरे मां अकोट्टी भोइ, कि यीशु त तैसेरे चेलन रोट्टी खानेरे लेइ भी मौको न मैल्लो।

21 जैखन यीशुएरे रिशतेदारै एन शुन्, त तैना तैस टलेइतां अपने घरे वापस आन्नेरे लेइ जे, किजोकि तैना ज़ोने लगगेरे थिये कि तैसेरो दिमाग ठीकाने नई।

22 किछ्छ शास्त्री लोक, जैना यरूशलेम नगरेरां ओरे थिये, तैना लोकन सेइं ज़ोई राओरे थिये कि, “यीशु मां शैतान आए।” त एन भी ज़ोई राओरे थिये कि, “ते भूतां केरे प्रधानेरी शेक्ति सेइं लोकन मरां भूतां केरो सायो कढते।”

23 एल्हेरेलेइ यीशुए तैना नेडे कुजाए ते तैन मिसाल देइतां ज़ोने लगगे, “शैतान केन्चरां अपने भूतन लोकन मरां केइडी सकते?”

24 अगर एक्की राज्जरे लोक अपने राज्जरे खलाफ लड़ाई केरन, त तैन राज बनेरू न रेइ सके।

25 अगर केन्ची टब्बरे लोक अपने टब्बरे खलाफ लडाई करन, त तैन टब्बर भी बनोरू न रेड सके।

26 तेन्चरे, शैतान भी अगर एप्पू अपने भूतां केरे खलाफ लडाई केरे, त तै केन्चरां बनोरो रेड सकते? तैसेरो त बिलकुल खातमां भोड गालो।

27 अवं होरि मिसाल देताई, कोई मैन्हु केन्ची ज़ोरेबाले मैनेरे घरेरे मां गेइतां तैसेरो माल तांतगर लुट्टी न सके, ज़ांतगर कि ते पेइले तैस ज़ोरेबाले मैन्हु बेंधी न छुड्डे। तैखन तै तैस ज़ोरेबाले मैनेरो माल लुट्टी सकते। अवं भी शैतानेरे भूतां केरो सायो लोकन मरां केडडी सकतां। (शैतान तैस ज़ोरेबाले मैनेरो ज़ेरोए)

28 अवं तुसन सेइं सच्च ज़ोतई कि मैन्हु केरे सारे किसमां केरे पाप त कने परमेशेरी तुहीन, ज़ै तैना करतन, अगर तैना मन फिरान त परमेशर तैन माफ़ केरेलो।

29 पन ज़ै कोई पवित्तर आत्मारी तुहीन केरे, त तैस कधी भी परमेशर माफ़ न केरेलो। पन तै मैन्हु हमेशारे पापेरो दोषी बेनि गालो।”

30 यीशुए एन्चरां ज़ोवं किजोकि तैना यीशुएरे बारे मां एन ज़ोते थिये कि तैस पुड भूतेरो सायो आए।

~~~~~  
(~~~~~ 12:46-50; ~~~~~ 8:19-21)

31 तैखन यीशुएरी अम्मा त कने तैसेरे दूला तैडी आए। तैना घरेरे बेडर खडे भोइतां तैस जो विस्तार भेजो।

32 तैना घरेरे अन्तर न गेइ सके किजोकि मैन्हु केरि भीड यीशुएरे च़ेवरे पासन विशशोरी थी। एल्हेरेलेइ तैन लोकेई यीशु सेइं ज़ोवं, “तक, तेरी अम्मा त तेरे दूला बेडर खडे आन। तैना तीं सेइं मिलनू चातन।”

33 पन यीशुए तैनन् जुवाब दित्तो, “अवं तुसन ज़ोताई मेरी अम्मा त कने मेरे दूला कौन आन!”

34 तैखन यीशुए तैन लोकां केरे पासे तेकतां ज़ोवं, ज़ैना तैसेरे च़ेवरे पासन विशशोरे थिये, “तक्का, मेरी अम्मा त कने मेरे दूला इना आन।

35 किजोकि ज़ै कोई परमेशेरी मेर्ज़ी पुड चलते, तैए मेरो दूला, मेरी बेइन ते मेरी अम्मा आए।”

## 4

~~~~~  
(~~~~~ 13:1-9; ~~~~~ 8:4-8)

1 तैल्ला पत्ती, यीशु फिरि गलील समुन्दरेरे वन्ने लोकन शिक्षा देने लगे। मैन्हु केरि एतूरी भीड तैस कां अकोट्टी भोइ। यीशु समुन्दरे मां एक्की किशती मां च़दो ते विशशी जेव, ताके तै सेब्भी लोकन परमेशेरी गल्लां केरि शिक्षा देइ सके। मैन्हु केरि सारी भीड तैसेरी गल्लां शुन्तां समुन्दरेरे वन्ने पुड खडी राई।

2 यीशुए तैनन् बेडि गल्लां मिसालन मां ज़ोई। तैनी शिक्षा देइतां तैन लोकन सेइं ज़ोवं,

3 “ई कहानी शुना! एक्सां अक बीज बेनेबालो बीज बेने जो जेव।

4 बीज बेते बार किछ, बीज बत्तेरे डलेखी बिछ्छू, त चुडोल्लेई एइतां तैन बीज चुनू।

5 किछ, बीज घोइनबाली ज़मीनी पुड बिछ्छू, ज़ेडी तैस डुग्धी मित्ती न मेलनेरे वजाई सेइं तैन लूशी उगगू त बूटो लगे।

6 पन ज़ैखन दिहाडो निस्तो, त तै निकडो बूटो फुक्कोई जेव। ते ज़ील न छुड्डनेरे वजाई सेइं शुक्की जेव।

7 होरू किछ, बीज कंटां केरे झैल्लन मां बिछ्छू, ज़ैखन तैडी बूटो लगे, त कंटां केरे झैल्लेई बेडोइतां तै बूटो दवेइ छुड्डो, त तैनी बुटे फल न दित्तो।

8 पन किछ् वीज रोड़ी ज़मीनी पुड् बिछ्डू, त तैन उग्गू त बेडोवं त फलदार भोवं । तैन मरां केन्ची बीजे ट्लही गुणा फल दित्तो, त केन्ची बीजे शठ गुणा, त केन्चे शौव गुणा ।”

9 ए मिसाल शुनानेरे बाद, यीशुए लोकन सेइं ज़ोवं, “जै कोई समझनू चाते, तै ध्याने सेइं शुने त समझै ।”

Matthew 13:10-17; Mark 8:9-10

10 तैल्ला पत्ती, जैखन यीशु मैन्हु केरि भीड़ी करां अलग थियो, त तैखन तैसेरे सैथेईं त कने तैसेरे 12 चलेईं यीशु तैस मिसालेरे बारे मां पुच्छ् ।

11 यीशुए तैन सेइं ज़ोवं, “अवं तुसन परमेशेरे राज़ेरो भेद समझैईलो । पन होरि लोकां केरे लेइ मिसालन मां ज़ोवं गाते ।

12 ताके ज़ेन्चरां परमेशेरी किताबी मां लिखोरूए तेन्चरां भोए कि, ‘जैन अवं केरतईं, तैन तैना बार-बार हेरेले, पन तैना तैसेरो मतलब न बुज्झेले । जैन अवं ज़ोतईं, तैन तैना बार-बार शुनेले, पन मेरी गल न समझेले । एरू न भोए कि तैना अपने पापन करां मन फिरान त तैन केरे पाप माफ़ किये गान ।’”

Matthew 13:18-23; Mark 8:11-15

13 तैल्ला पत्ती, यीशुए तैन सेइं ज़ोवं, “कुन तुसेईं तै मिसाल न समझी? अगर तुस तैस मिसाली न समझथ, त फिरि होरि सब मिसालां केन्चरां समझेले?”

14 अवं तुसन तै मिसाल समझताईं । बीज बेनेबाला ते आए, जै परमेशेरी गल्लां लोकन शुनाते ।

15 जैना मैन्हु परमेशेरी गल्लां शुन्तन, तैन मरां किछ् लोक तैस बत्तेरे ज़ेरे आन, जेड़ी बीज बिछ्डते । तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां परमेशेरी गल्लां केइडी छइते ।

16 किछ् होरे लोक, जैना परमेशेरी गल्लां शुन्तन, तैना तैस धोइनबैली ज़मीनेरे ज़ेरे आन । तैना परमेशेरी गल्लां शुन्तन त खुशी सेइं तैन कबूल भी केरतन ।

17 पन ज़ेन्चरां निकड़ी बूटो धोइनबैली ज़मीनी मां मिच्ची घट भोनेरे वजाईं सेइं लूशी लगते, तेन्चरां एना मैन्हु भी भोतन । तैना मज़बूत विश्वास न रखन । एल्हेरेलेइ तैना थोडे दिहाइन तगर विश्वास रखतन । पन ज़ैखन परमेशेरी गल्लां केरे मुताबिक च़लनेरे वजाईं सेइं तैन पुड् मुसीबतां एचचन त कने ज़ैखन लोकन केरां सताए गातन, त तैखन तैना अकदम अपने विश्वास छइतां टोकर खातन ।

18 होरे किछ् लोक, जैना परमेशेरी गल्लां शुन्तन, तैना तैस कटां केरे झैल्लां केरे ज़मीनेरे ज़ेरे आन । तैना परमेशेरी गल्लां त शुन्तन,

19 पन तैना इस दुनियारी फिर करतन, त कने दौलतरे वजाईं सेइं धोखो खातन, त तैना बडे चीज़ां केरू लालच़ करतन । एसेरे वजाईं सेइं तैना परमेशेरी गल्लां बिसरी छइतन त तैन गल्लन पुड् न च़लन ।

20 पन किछ् लोक, जैना परमेशेरी गल्लां शुन्तन त कने तैन पुड् च़लतन, तैना तैस रोड़ी ज़मीनेरे ज़ेरे आन । तैना परमेशेरी गल्लां शुन्तन त कबूल भी केरतन त फल देतन, मतलब की तैना परमेशेरी गल्लां केरे मुताबिक ज़िन्दगी ज़ीतन । कोई ट्लही गुणा, कोई शठ गुणा त कोई शौव गुणा फल देतन ।”

Matthew 8:16-18

21 तैल्ला पत्ती, यीशुए मैन्हु केरि भीड़ी सेइं ज़ोवं, “कोई बलतो दीयो एन्तां हेटी मां या खट्टी हठ न रख्वे । पन केन्ची उच्ची ठैरी पुड् रख्वो गाते । (ताके सारे घरे लौ भोए ।)

22 कोई गल छप्पोरी न राली, पन सैरी गल्लां बेंदी भोली, तेन कोई भेद छप्पोरो रालो, पन सारो भेद बांदो भोलो ।

23 जै कोई समझनू चाते, तै ध्याने सेइं शुने त समझे!"

24 तैल्ला पत्ती, यीशुए मैन्हु केरि भीड़ी सेइं ज़ोवं, "होशियार राथ कि अवं तुसन कुन शिक्षा देइ राओरोई। मेरी शिक्षाईं शुन्तां, ज़ेत्त्री तुस मेरी गल मन्नेले तेत्त्री परमेशर तुसन समझ देलो। हाँ, परमेशर तुशशी समझ होरि भी बधालो।*"

25 किजोकि ज़ैस कां परमेशरेरी मर्जी समझनेरी इच्छा आए, तैस परमेशर जादे समझ देलो। पन ज़ैस कां परमेशरेरी मर्जी समझनेरी इच्छा नई, तैस केरां, थोड़ी ज़ेरि समझ, ज़ै तैस कां आए, तै भी नी गाली।"

~~~~~

26 तैल्ला पत्ती, यीशुए मैन्हु केरि भीड़ी सेइं ज़ोवं, "परमेशेरू राज़ एरू ज़ेरू आए, कि अक मैन्हु ज़मीनी पुड़ बीज बेते ।

27 तै मैन्हु हर राती झुलते त दीसां बींझते। तैन बीज उगने लग्गोरूए त बडोने लग्गोरूए, पन तैस पतो न चले कि तैन केन्चरां भोते ।

28 केन्चेरी महतरे बगैर ज़मीन एप्पू फल आन्चे। पेइले मुन्केरे निस्तन, बादे मां शिल्लां निस्तन, तैल्ला पत्ती शिल्लन ग्लेव लगतन।

29 आखरी मां, ज़ैखन ग्लेव पेक्की गातन, तैखन अकदम तै मैन्हु कटाई केरनेरे लेइ मैन्हु भेजते, किजोकि कटाईरो वक्त ओरो भोते।"

~~~~~

(~~~~~ 13:31-32,34; ~~~~~ 13:18-19)

30 तैल्ला पत्ती, यीशुए मैन्हु केरि भीड़ी सेइं ज़ोवं, "अस परमेशेरू राज़ेरी मसाल कोस चीज़ी सेइं देइ सकतम? कोस मिसाली सेइं अस तैस समझेइ सकतम?"

31 परमेशेरू राज़ शेरीएरे बीजेरू ज़ेरू आए (ज़ै शेरीयो इस्राएले मां भोते)। ज़ैखन तैन बीज ज़मीनी मां बेव गाते, तैन सारे बीजन केरां निकडू भोते ।

32 पन ज़ैखन तैन बीज बेव गाते, तै उगतां सारे निक्के-निक्के बुट्टन केरां बड्डो भोते। तैसेरी एत्त्री बेड्डी डेलडी निस्चन, कि अम्बेरां चुड्डोल्ली तैसेरी छावी मां अपने आले बनेइ सकतन।"

33 एन्चरां बेडि मिसालां ज़ोइतां, यीशु तैन लोकन परमेशरेरी गल्लां शुनातो थियो, ज़ेत्तूरू तैना शुनी सकते थिये ।

34 तै हमेशा मिसाल देइतां परमेशरेरे राज़ेरे बारे मां तैन सेइं ज़ोतो थियो। पन ज़ैखन मैन्हु केरि भीड़ी मरां यीशु त तैसेरे चले अलग बिशते थिये, तैखन यीशु अपने चलन सेइं सैरी मिसालां केरो मतलब समझोतो थियो।

~~~~~

(~~~~~ 8:23-27; ~~~~~ 8:22-25)

35 तैस दिहाड़ेरे बादे मां, ज़ैखन इलोझ भोइ, यीशुए अपने चलन सेइं ज़ोवं, "एज्जा, अस गलील समुन्दरेरे पार च़लम।"

36 तैह्नेरेलेइ मैन्हु केरि भीड छेइतां तैना तैस किशती मां च़ढ़े ज़ैस मां यीशु पेइलो थियो, त तैना तैट्टां च़ले जे। होरि किछ् किशती मां भी लोक तैन सेइं साथी जे।

37 ज़ैखन तैना समुन्दर पार केरने लग्गारे थिये, तैखन अक बड्डो तूफान च़लो, त छेल्ली एडी तगर पुज्जी कि किशती पैनी सेइं भेरोई जेई।

38 पन यीशु किशतेरी पेत्री पासे, शेराहने पुड़ क़ोडी रेखतां झुल्लोरो थियो। तैखन तैसेरे च़ेलेई तै बींझेइतां तैस सेइं ज़ोवं, "हे गुरू, कुन तीं फ़िकर नई, अस त मरने बालेम!"

\* 4:24 मूल भाषाई मां: ज़ैस नापी सेइं तुस नापतथ तैस्वे नापी सेइं परमेशर तुसन भी नापेलो, त तुसन परमेशर होरू भी जादे देलो।

39 तैखन यीशुए उठतां तूफान डांटो, त समुन्दरे सेइं ज़ोवं, “शान्त रा, रुकी गा!” अकदम तूफान रुकी जेव त समुन्दर शान्त भोव ।

40 तैखन यीशुए अपने चेलन सेइं ज़ोवं, “तुस किजो डरतथ? कुन तुसन हेजू भी मीं पुड़ विश्वास नई?”

41 पन तैना बड़े डेरि जे त एप्पू मांमेइं ज़ोने लगगे, “ए मैन्हु कौन आए कि तूफान त समुन्दर भी एसेरो हुक्म मन्तन!”

## 5

ⓂⓂⓂⓂ ⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ  
(ⓂⓂⓂⓂⓂ 8:28-34; ⓂⓂⓂⓂⓂ 8:26-39)

1 यीशु त तैसेरे चले गलील समुन्दरेरे पार, गिरासेनी इलाके मां पुज्जे ।

2 ज़ैखन यीशु किशती पुड़ेरां ओस्सो, त तैखन अक मैन्हु, ज़ैस पुड़ भूतां केरो सायो थियो, कब्रन मांमेइं यीशु कां मिलने अव ।

3 तै मैन्हु कब्रस्ताने मां रातो थियो । (तै मैन्हु बड़ो खतरनाक थियो ।) कोई तैस शंगली सेइं भी न बंधी सकतो थियो ।

4 किजोकि (पेडले बड़े बार) लोकेईं तैसेरे हथ पाव शंगलन सेइं बंधोरे थियो । पन हर बार तै हथ्यां केरि शंगलां टलोडतो थियो त पव्वां केरि शंगलां केरे टुकड़े-टुकड़े केरतो थियो । कोई तैस कैवू न केरि सकतो थियो ।

5 तै हमेशा रात-दिहाड़ी कब्रस्ताने मां त कने पहैइन पुड़मेइं हन्टतो थियो त चिन्डां मारतो थियो, त अपने आपे घोड़न सेइं ज़ख्मी केरतो थियो ।

6 ज़ैखन तैनी मैने यीशु दूरेरां लाव, त तै दौडतां यीशु कां अव ते तैस कां मथ्यो टेको ।

7-8 यीशुए भूते सेइं ज़ोवं, “हे भूता, एस मैन्हु मरां निस्सी गा!” तैनी भूते ज़ोरे सेइं चिन्डां मेरतां ज़ोवं, “हे यीशु, परमप्रधान परमेशेरेरा मट्टा, मीं तीं सेइं कुन कम? अवं तीं परमेशेरेरी कसम देताईं, मीं दुख न दे ।”

9 एल्हेरेलेइ यीशुए तैस पुच्छू, “तेरू कुन नवं आए?” तैनी यीशु सेइं ज़ोवं, “मेरू नवं फौज आए, किजोकि अस बड़े आम ।”

10 तैखन तैनी यीशु कां बड़ी मिन्नत की, “इस इलाके मरां असन बेडर न भेज ।”

11 तैड़ी पहैड़ी पुड़ सूरं केरो अक बड़ो घान च़ेरी राहोरो थियो ।

12 तैल्हेरेलेइ तैन भूतेईं यीशु कां मिन्नत की, “महरबानी केरतां असन उन सूरन मां भेज्ती दे ताके अस उन मां गाम!”

13 तैखन यीशुए तैनन, सूरन मां गानेरी अज़ाज़त दित्ती, त तैना भूतां तैस मैन्हु मरां निस्तां सूरन मां जेओ । तैखन सूरं केरो घान, ज़ैस मां लगभग दूईं हज़ार सूर थियो, टिब्बे पुड़ेरां बिछड़तां अकदम समुन्दरे मां डुबतां मेरि जे ।

14 ज़ैखन सूरं केरे च़ारनेबालेईं एन हेरू, त तैना डेरि जे । तैनेईं तैट्टां नेशतां नगरी मां त कने आसेपासेरे इलोव्वन मां ए खबर शुनाई । तैल्हेरेलेइ लोक एप्पू हेरनेरे लेइ तैड़ी आए ।

15 ज़ैखन नगरेरे लोक यीशु कां पुज्जे, त तैस मैन्हु, ज़ैस मां पेडले भूतां केरि फौजेरो सायो थियो, हुनी लिगडां लगगोरे त कने होशी मां लेइतां डेरि जे ।

16 ज़ैनेईं तैना गल्लां पेडले लेवरी थी, तैनेईं तैस मैनेरे बारे मां ज़ैस पुड़ भूतेरो सायो थियो त कने तैन सूरं केरे बारे मां पूरो हाल लोकन शुनाव ।

17 तैना यीशु कां मिन्नत केरतां ज़ोने लगगे कि, “इशे इलाके मरां च़ेलि गा!”

18 ज़ैखन यीशु वापस गानेरे लेइ किशती मां च़ढ़ने लगो, त तैनी मैने ज़ैस मां पेडले भूतां केरो सायो थियो, यीशु कां मिन्नत की कि, “मीं एप्पू सेइं साथी चलने दे ।”

19 पन यीशुए तै एप्पू सेइं साथी च़लने न दित्तो । पन तैनी तैस सेइं ज़ोवं, “अपने घरे जो गा त कने अपने लोकन सेइं ज़ो, कि परभु परमेशेरे तीं पुड़ दया केरतां तेरे लेइ केतू बड्डू कम कियोरूए ।”

20 एल्हेरेलेइ तै मैन्हु गेइतां दिकापुलिस इलाके मां लोकन शुनाने लगे कि यीशुए मेरे लेइ केतू बड्डू कम कियोरूए । सारे लोक ए गल शुन्तां हैरान भोइ जे ।

एल्हेरेलेइ तै मैन्हु गेइतां दिकापुलिस इलाके मां लोकन शुनाने लगे कि यीशुए मेरे लेइ केतू बड्डू कम कियोरूए । सारे लोक ए गल शुन्तां हैरान भोइ जे ।

(एल्हेरेलेइ 9:18-26; एल्हेरेलेइ 8:40-56)

21 तैल्ला पत्ती, यीशु फिरी किशती मां गलील समुन्देरे इस पासे वापस अव, त मैन्हु केरि बडी भीड़ तैस कां अकोट्टी भोइ । यीशु समुन्देरे बन्ने पुड़ थियो ।

22 तैखन याईर नव्वेरो मैन्हु तैडी अव, ज़ै यहूदी लोकां केरे प्रार्थना घेरे प्रधान्न मरां अक थियो । ज़ैखन तैनी यीशु लाव, त तैसेरे पावन पेव ।

23 तैनी एन ज़ोइतां यीशुए सेइं बडी मिन्नत की, “मेरी निकडी कुई मरनेबाली आए । तू मीं सेइं साथी एइतां तैस पुड़ अपनां हथ रख, ताके तै बेज्झोए ते ज़ींती राए ।”

24 एल्हेरेलेइ यीशु तैस सेइं साथी तैसेरे घरे जेव ।

मैन्हु केरि अक बडी भीड़ यीशु पत्ती च़ली, इडी तगर कि लोक यीशु पुड़ बिछ्छते थियो ।

25 तैस भीडी मां अक कुआन्श भी थी, ज़ैस 12 सालां केरि खून च़लनेरी बिमारी थी ।

26 तैसां बडे बेइदन केरां बडो दुख झल्लो । बिमारी ठीक भोनेरे लेइ तैसां अपने सब पेंइसे खेर्ची दित्ते, पन तैस कोई फेइदो न भोव । पन तै होरि भी जादे बिमार भोइ जेई ।

27-28 तै यीशुएरे बारे मां शुन्तां अपने दिले मां ज़ोती थी, “अगर अव सिर्फ तैसेरे लिगडे सेइं हथ लाएली, त अव बेज्झोई गाली ।” एल्हेरेलेइ तै मैन्हु केरि भीडी मां यीशुएरे पत्तेवरां आई ते तैसेरे लिगडे सेइं हथ लाव ।

29 ज़ैखन तैसां यीशुएरे लिगडे सेइं हथ लाव, त अकदम तैसेरो खून च़लनेरी बिमारी बेज्झोई । तैसां अपनि जानी मां बुज्झू कि अव तैस बिमारी केरां बेज्झोरी आई ।

30 यीशुए अकदम बुज्झू कि मीं मरां शक्ति निस्सोरीए । एल्हेरेलेइ तैनी मैन्हु केरि भीडी मां च़ेवरे पासन मुइतां लोकन पुच्छू, “मेरे लिगडे सेइं केनि हथ लाव?”

31 तैसेरे चेलेई तैस सेइं ज़ोवं, “तू हेरतस कि मैन्हु केरि भीड़ तीं पुड़ बिछ्छने लगगोरी, फिर भी तू किजो पुच्छतस कि ‘केनि मीं सेइं हथ लाव?’”

32 पन यीशु तैस हेनेरे लेइ, ज़ैनी एरू कियोरू थियू, च़ेवरे पासन तकने लगे ।

33 तैखन तै कुआन्श डरती ते थकती थी, किजोकि तै ज़ानती थी कि तैसां मूसेरो कानून दलोडरोए । तै अगगर आई ते यीशुएरे पावन पुड़ बिछ्छतां, तैस सेइं सैरी गल्लां सच्च-सच्च ज़ोने लगगी ।

34 पन यीशुए तैस सेइं ज़ोवं, “हे कुईए, तेरे विश्वासे, ज़ै तीं मीं पुड़ रखवोरो, तैनी तू वज्झाई । खुशी सेइं घरजो गा, ते हुनी तू एस बिमारी केरां वेची जेई ।”

35 ज़ताली यीशु ई गल मसां ज़ोई राओरो थियो, तैखन प्रार्थना घेरे लीडेरे घेरां किछ्छ मैनेई एइतां तैस सेइं ज़ोवं, “तेरी कुई मेरि जोरीए, हुनी गुरू किजो तकलीफ देतस?”

36 पन यीशुए तैन केरि गल न शुन्तां प्रार्थना घेरे लीडेरे सेइं ज़ोवं, “न डर । सिर्फ मीं पुड़ विश्वास रख ।”

37 यीशु ते याईर च़लने लगगे, पन यीशुए पतरस, याकूब ते तैसेरो दूला यूहन्नारे अलावा, होरो कोई एप्पू सेइं साथी एजने न दित्तो ।

38 प्रार्थना घेरे लीडेरे घेरे मां पुज्जां यीशुए हल्लो मच़ोरो लाव ते कने लोक बडे लेरां देते त शोग करते लाए ।

39 तैखन यीशुए घरे मां गोइतां तैन सेइं ज़ोवं, “तुस किजो रोलो मचातथ त लेरां देतथ? कुई मर्रीं नईं, पन झुल्लोरीए।”

40 ज़ैखन तैन लोकेईं एन शुनु, त तैना तैसेरो मज़ाक बनाने लगगे, किजोकि तैना ज़ानते थिये कि कुई मेरि जोरीए। तैखन यीशुए सारे मैन्हू तैट्टां केढतां, सिर्फ कुईअरे हाज-बव त कने अपने ट्लाई चेलन सेइं साथी कमरेरे अन्तर जेव, ज़ेडी कुई पेवरी थी।

41 तैखन यीशुए कुईएरो हथ टलेइतां तैस सेइं अपनि भाषाई मां ज़ोवं, “तलीता कूमी!” ज़ेसेरो मतलब कि, “हे निकडी कुईए, अवं तीं सेइं ज़ोतईं, खडी उट!”

42 अकदम कुई उटतां च़लने फिरने लगगी, किजोकि तै कुई 12 सालां केरि थी। एन हेरतां तैना बडे हैरान भोए।

43 पन यीशुए तैन हुकम देइतां ज़ोवं कि, “ए गल केन्ची सेइं न ज़ोइयथ। एस कुईए किछ खाने जो देथ।”

## 6

**[[[1:1-13]]] [[[1:14-23]]] [[[1:24-33]]] [[[2:1-10]]] [[[2:11-20]]] [[[2:21-30]]] [[[2:31-40]]] [[[3:1-10]]] [[[3:11-20]]] [[[3:21-30]]] [[[3:31-40]]] [[[4:1-10]]] [[[4:11-20]]] [[[4:21-30]]] [[[4:31-40]]] [[[5:1-10]]] [[[5:11-20]]] [[[5:21-30]]] [[[5:31-40]]] [[[6:1-10]]] [[[6:11-20]]] [[[6:21-30]]] [[[6:31-40]]] [[[7:1-10]]] [[[7:11-20]]] [[[7:21-30]]] [[[7:31-40]]] [[[8:1-10]]] [[[8:11-20]]] [[[8:21-30]]] [[[8:31-40]]] [[[9:1-10]]] [[[9:11-20]]] [[[9:21-30]]] [[[9:31-40]]] [[[10:1-10]]] [[[10:11-20]]] [[[10:21-30]]] [[[10:31-40]]] [[[11:1-10]]] [[[11:11-20]]] [[[11:21-30]]] [[[11:31-40]]] [[[12:1-10]]] [[[12:11-20]]] [[[12:21-30]]] [[[12:31-40]]] [[[13:1-10]]] [[[13:11-20]]] [[[13:21-30]]] [[[13:31-40]]] [[[14:1-10]]] [[[14:11-20]]] [[[14:21-30]]] [[[14:31-40]]] [[[15:1-10]]] [[[15:11-20]]] [[[15:21-30]]] [[[15:31-40]]] [[[16:1-10]]] [[[16:11-20]]] [[[16:21-30]]] [[[16:31-40]]] [[[17:1-10]]] [[[17:11-20]]] [[[17:21-30]]] [[[17:31-40]]] [[[18:1-10]]] [[[18:11-20]]] [[[18:21-30]]] [[[18:31-40]]] [[[19:1-10]]] [[[19:11-20]]] [[[19:21-30]]] [[[19:31-40]]] [[[20:1-10]]] [[[20:11-20]]] [[[20:21-30]]] [[[20:31-40]]] [[[21:1-10]]] [[[21:11-20]]] [[[21:21-30]]] [[[21:31-40]]] [[[22:1-10]]] [[[22:11-20]]] [[[22:21-30]]] [[[22:31-40]]] [[[23:1-10]]] [[[23:11-20]]] [[[23:21-30]]] [[[23:31-40]]] [[[24:1-10]]] [[[24:11-20]]] [[[24:21-30]]] [[[24:31-40]]] [[[25:1-10]]] [[[25:11-20]]] [[[25:21-30]]] [[[25:31-40]]] [[[26:1-10]]] [[[26:11-20]]] [[[26:21-30]]] [[[26:31-40]]] [[[27:1-10]]] [[[27:11-20]]] [[[27:21-30]]] [[[27:31-40]]] [[[28:1-10]]] [[[28:11-20]]] [[[28:21-30]]] [[[28:31-40]]] [[[29:1-10]]] [[[29:11-20]]] [[[29:21-30]]] [[[29:31-40]]] [[[30:1-10]]] [[[30:11-20]]] [[[30:21-30]]] [[[30:31-40]]] [[[31:1-10]]] [[[31:11-20]]] [[[31:21-30]]] [[[31:31-40]]] [[[32:1-10]]] [[[32:11-20]]] [[[32:21-30]]] [[[32:31-40]]] [[[33:1-10]]] [[[33:11-20]]] [[[33:21-30]]] [[[33:31-40]]] [[[34:1-10]]] [[[34:11-20]]] [[[34:21-30]]] [[[34:31-40]]] [[[35:1-10]]] [[[35:11-20]]] [[[35:21-30]]] [[[35:31-40]]] [[[36:1-10]]] [[[36:11-20]]] [[[36:21-30]]] [[[36:31-40]]] [[[37:1-10]]] [[[37:11-20]]] [[[37:21-30]]] [[[37:31-40]]] [[[38:1-10]]] [[[38:11-20]]] [[[38:21-30]]] [[[38:31-40]]] [[[39:1-10]]] [[[39:11-20]]] [[[39:21-30]]] [[[39:31-40]]] [[[40:1-10]]] [[[40:11-20]]] [[[40:21-30]]] [[[40:31-40]]] [[[41:1-10]]] [[[41:11-20]]] [[[41:21-30]]] [[[41:31-40]]] [[[42:1-10]]] [[[42:11-20]]] [[[42:21-30]]] [[[42:31-40]]] [[[43:1-10]]] [[[43:11-20]]] [[[43:21-30]]] [[[43:31-40]]] [[[44:1-10]]] [[[44:11-20]]] [[[44:21-30]]] [[[44:31-40]]] [[[45:1-10]]] [[[45:11-20]]] [[[45:21-30]]] [[[45:31-40]]] [[[46:1-10]]] [[[46:11-20]]] [[[46:21-30]]] [[[46:31-40]]] [[[47:1-10]]] [[[47:11-20]]] [[[47:21-30]]] [[[47:31-40]]] [[[48:1-10]]] [[[48:11-20]]] [[[48:21-30]]] [[[48:31-40]]] [[[49:1-10]]] [[[49:11-20]]] [[[49:21-30]]] [[[49:31-40]]] [[[50:1-10]]] [[[50:11-20]]] [[[50:21-30]]] [[[50:31-40]]] [[[51:1-10]]] [[[51:11-20]]] [[[51:21-30]]] [[[51:31-40]]] [[[52:1-10]]] [[[52:11-20]]] [[[52:21-30]]] [[[52:31-40]]] [[[53:1-10]]] [[[53:11-20]]] [[[53:21-30]]] [[[53:31-40]]] [[[54:1-10]]] [[[54:11-20]]] [[[54:21-30]]] [[[54:31-40]]] [[[55:1-10]]] [[[55:11-20]]] [[[55:21-30]]] [[[55:31-40]]] [[[56:1-10]]] [[[56:11-20]]] [[[56:21-30]]] [[[56:31-40]]] [[[57:1-10]]] [[[57:11-20]]] [[[57:21-30]]] [[[57:31-40]]] [[[58:1-10]]] [[[58:11-20]]] [[[58:21-30]]] [[[58:31-40]]] [[[59:1-10]]] [[[59:11-20]]] [[[59:21-30]]] [[[59:31-40]]] [[[60:1-10]]] [[[60:11-20]]] [[[60:21-30]]] [[[60:31-40]]] [[[61:1-10]]] [[[61:11-20]]] [[[61:21-30]]] [[[61:31-40]]] [[[62:1-10]]] [[[62:11-20]]] [[[62:21-30]]] [[[62:31-40]]] [[[63:1-10]]] [[[63:11-20]]] [[[63:21-30]]] [[[63:31-40]]] [[[64:1-10]]] [[[64:11-20]]] [[[64:21-30]]] [[[64:31-40]]] [[[65:1-10]]] [[[65:11-20]]] [[[65:21-30]]] [[[65:31-40]]] [[[66:1-10]]] [[[66:11-20]]] [[[66:21-30]]] [[[66:31-40]]] [[[67:1-10]]] [[[67:11-20]]] [[[67:21-30]]] [[[67:31-40]]] [[[68:1-10]]] [[[68:11-20]]] [[[68:21-30]]] [[[68:31-40]]] [[[69:1-10]]] [[[69:11-20]]] [[[69:21-30]]] [[[69:31-40]]] [[[70:1-10]]] [[[70:11-20]]] [[[70:21-30]]] [[[70:31-40]]] [[[71:1-10]]] [[[71:11-20]]] [[[71:21-30]]] [[[71:31-40]]] [[[72:1-10]]] [[[72:11-20]]] [[[72:21-30]]] [[[72:31-40]]] [[[73:1-10]]] [[[73:11-20]]] [[[73:21-30]]] [[[73:31-40]]] [[[74:1-10]]] [[[74:11-20]]] [[[74:21-30]]] [[[74:31-40]]] [[[75:1-10]]] [[[75:11-20]]] [[[75:21-30]]] [[[75:31-40]]] [[[76:1-10]]] [[[76:11-20]]] [[[76:21-30]]] [[[76:31-40]]] [[[77:1-10]]] [[[77:11-20]]] [[[77:21-30]]] [[[77:31-40]]] [[[78:1-10]]] [[[78:11-20]]] [[[78:21-30]]] [[[78:31-40]]] [[[79:1-10]]] [[[79:11-20]]] [[[79:21-30]]] [[[79:31-40]]] [[[80:1-10]]] [[[80:11-20]]] [[[80:21-30]]] [[[80:31-40]]] [[[81:1-10]]] [[[81:11-20]]] [[[81:21-30]]] [[[81:31-40]]] [[[82:1-10]]] [[[82:11-20]]] [[[82:21-30]]] [[[82:31-40]]] [[[83:1-10]]] [[[83:11-20]]] [[[83:21-30]]] [[[83:31-40]]] [[[84:1-10]]] [[[84:11-20]]] [[[84:21-30]]] [[[84:31-40]]] [[[85:1-10]]] [[[85:11-20]]] [[[85:21-30]]] [[[85:31-40]]] [[[86:1-10]]] [[[86:11-20]]] [[[86:21-30]]] [[[86:31-40]]] [[[87:1-10]]] [[[87:11-20]]] [[[87:21-30]]] [[[87:31-40]]] [[[88:1-10]]] [[[88:11-20]]] [[[88:21-30]]] [[[88:31-40]]] [[[89:1-10]]] [[[89:11-20]]] [[[89:21-30]]] [[[89:31-40]]] [[[90:1-10]]] [[[90:11-20]]] [[[90:21-30]]] [[[90:31-40]]] [[[91:1-10]]] [[[91:11-20]]] [[[91:21-30]]] [[[91:31-40]]] [[[92:1-10]]] [[[92:11-20]]] [[[92:21-30]]] [[[92:31-40]]] [[[93:1-10]]] [[[93:11-20]]] [[[93:21-30]]] [[[93:31-40]]] [[[94:1-10]]] [[[94:11-20]]] [[[94:21-30]]] [[[94:31-40]]] [[[95:1-10]]] [[[95:11-20]]] [[[95:21-30]]] [[[95:31-40]]] [[[96:1-10]]] [[[96:11-20]]] [[[96:21-30]]] [[[96:31-40]]] [[[97:1-10]]] [[[97:11-20]]] [[[97:21-30]]] [[[97:31-40]]] [[[98:1-10]]] [[[98:11-20]]] [[[98:21-30]]] [[[98:31-40]]] [[[99:1-10]]] [[[99:11-20]]] [[[99:21-30]]] [[[99:31-40]]] [[[100:1-10]]] [[[100:11-20]]] [[[100:21-30]]] [[[100:31-40]]]**

**([[[13:53-58]]] [[[4:16-30]])**

1 तैल्ला पत्ती, यीशु तैट्टां निस्तां अपने नगर नासरते जो जेव। तैसेरे चले तैस सेइं साथी च़ले।

2 आरामेरे दिहाड़े, यीशु तैन केरे प्रार्थना घरे मां गोइतां तैन लोकन परमेशेरी गल्लां केरि शिक्षा देने लगे। तैसेरी शिक्षा शुन्तां बडे लोक हैरान भोए ते एक्की होरि पुछ्ने लगगे, “एनी मैने एना गल्लां कोट्टां शिखी? एस एतरी अक्ल कोट्टां आई? एस एतरे चमत्कार केरनेरी शक्ति कोट्टां मैल्ली!”

3 ए त टलखान आए, ज़ैन मरियमारू मट्टू आए। ए त याकूब, योसेस, यहूदा, ते शमौनेरो ढला आए! एसेरी बेइनां भी इश्शे इड़ी रेइचन!” एल्हेरेलेइ तैनेई यीशुएरो इन्कार कियो।

4 तैखन यीशुए तैन लोकन अक कहावत ज़ोई, “नबी बेडींए लोकन मां इज़्जतदार भोलो, पन अपने नगरेरे लोकन केरां ते कने अपने रिश्तेदारन केरां त कने अपने घरेवालन मां बेइज़्जत भोलो।”

5 तैन लोकेईं यीशु पुड़ विश्वास न केरनेरे वजाई सेइं, तैनी तैस नगरी मां सिर्फ थोड़े ज़ेरे विमार मैनु पुड़ हथ रेखतां तैना बज़्ज़ाए, तैन केरे अलावा होरो कोई चमत्कार न केरि सको।

6 यीशु नासरत नगरेरे लोकां केरो अविश्वास हेरतां हैरान भोव। तैल्ला पत्ती, तै अपने चेलन सेइं साथी च़ेवरे पासन केरे इलोव्वन मां परमेशेरी गल्लां केरि शिक्षा देतो राव।

**[[[10:5-15]]] [[[9:1-6]]]**

7 तैल्ला पत्ती, यीशुए अपने 12 चले एप्सू कां कुजेइतां, तैन दूई-दूई केरतां भेज़ने लगे। भेज़ने केरां पेइले, तैनी अपने चेलन, लोकन मरां भूतां केरो साथो कढनेरो अधिकार दित्तो।

8 ते तैनी तैन हुकम दित्तो, “बत्तां च़लते-च़लते सोटरे अलावा होरू किछ न नेइयथ। न रोट्टी न झोलो त कने बेटवे मां पेइसे भी न नेइयथ।

9 पन बूट लेइयथ, पन दूई-दूई कुरते न लेइयथ।

10 ज़ैखन तुस केन्ची इलोव्वं मां गाथ, अगर कोई अपने घरे बिश्नेरेलेइ तुसन कुजाए, त तैस्से घरे मां बिश्शथ, जातगर तैस इलोव्वेरां न निस्सथ।

11 अगर केन्ची इलोव्वेरे लोक तुसन कबूल न केरन त कने तुश्शी गल्लां न शुनन्, त तैट्टां च़लते-च़लते तुस अपने पावां केरि धूड़ झेडी छेइइथ\* ताके तैन केरे खलाफ गवाही भोए। (अवं तुसन सेइं सज़ ज़ोतईं कि परमेशेरे आदालतेरे दिहाड़े बुरे लोकन सज़ा देलो, ज़ैना सदोम त कने

\* 6:11 पावां केरि धूड़ झाड़ा: एरू केरतां, यीशुएरे चले लोकन इतला देतन कि परमेशेरी गल्लां न शुन्नेरे वजाई सेइं तैनन् सज़ा मैलेली।

अमोरा नगरन मां रहते थिये। पन ज़ैना लोक तुशशी गल्लां न शुनेले, तैस नगरेरे लोकन परमेशर बडी जादे सज़ा देलो)”)

12 यीशुएरो हुकम शुन्नेरे बाद, तैनेई तैट्ठां निस्तां बडे नगरन मां गेइतां लोकन परमेशेरी गल्लां शुनेई कि, “तुस अपने पापन करां मनफिराथ।”

13 ते तैनेई बडे लोकन मरां भूतां केरो सायो भी कड्डो, त कने बडे बिमार मेनन् पुड़ तेल लेइतां बज्जाए।

???????? ???? ?????? ??????????? ????????? ????????? ?????????  
(?????? 14:1-12; ????? 9:7-9)

14 हेरोदेस राजे भी यीशुएरे बारे मां शुनु, किजोकि यीशुएरू नव मुशूर भोरू थियूं। तैनी यीशुएरे बारे मां ज़ोवं कि, “शायद, यूहन्ना, जै बपतिस्मो देनेवालो थियो, मुडदन मरां ज़ीतो भोरोए। एल्हेरेलेइ, तै एना चमत्कार केरि सकते।”

15 होरेई मैनेई यीशुएरे बारे मां ज़ोवं कि, “शायद, तै मैन्हु एलिय्याह नबी आए!” पन किछ होरेई मैनेई ज़ोवं कि, “तै त पराने ज़मानेरे परमेशेरी गल्लां ज़ोनेवालां केरो ज़ेरो अक नबी आए!”

16 पन हेरोदेस राजे लोकां केरि गल्लां शुन्तां ज़ोवं कि, “तै मैन्हु त यूहन्ना आए, जेसेरी क्रोडी मीं कट्टेवरी थी। तै मुडदन मरां ज़ीतो भोरो आए!”

17 हेरोदेस राजे एन्चरां सोच, किजोकि थोडे दिहाइना पेइले, तैनी एप्पू अपने सिपाही भेजतां यूहन्ना कैद केरतां छड्डोरो थियो। तैनी अपने दूला फिलिप्पुसेरी लाडी हेरोदियासेरी वजाई सेइ एन्चरां कियोरू थियूं, जैस सेइ तैनी इला बनोरो थियो।

18 एल्हेरेलेइ, यूहन्ना हेरोदेस राजे सेइ बार-बार ज़ोतो थियो कि, “तीं अपने दूलाएरी लाडी सेइ इला बनानो जेइज नई।”

19 तैल्हेरेलेइ हेरोदियास रानी यूहन्ना सेइ दुश्मनी रखती थी ते तैस कल्ल केरनो चाती थी। पन तै तेन्चरां न केरि सकती थी,

20 किजोकि हेरोदेस राजे पतो थियो कि यूहन्ना अक धर्मी ते पवित्र मैन्हु थियो। तैल्हेरेलेइ, हेरोदेस राजो तैसेरी बडी इज्जत केरतो थियो त कैदखाने मां हेरोदियास रैनी केरां बचेइतां रखतो थियो। त तै यूहन्नारी गल्लां शुन्तां बडी डरतो थियो, पन तैसेरी गल्लां खुशी सेइ शुन्तो भी थियो।

21 आखकार यूहन्ना मारनेरो ठीक मौको मैल्लो। हेरोदेस राजे अपने ज़रमेरी दिहाडी मां अक धाम रखी। तैस धामी मां तैनी अपने बडे खास अफसरन, त कने फौजी अफसरन, त कने गलील इलाकेरे बड्डे-बड्डे मैन्हु कुजाए।

22 तैखन हेरोदियास रैनेरी कुई तैस कमेरे मां आई, जेडी तैना बिशारे थियो। त तैसां तैडी नेचतां हेरोदेस राजो त कने तैसेरे मेहमान खुश किये। तैखन राजे कुईए सेइ ज़ोवं, “ज़ैन तू चास मीं केरां मग, अवं तीं देलो।”

23 त राजे तैस कुईए सेइ कसम भी खाइ कि, “ज़ैन किछ तू मीं केरां मग्गेली, अवं तीं देलो, इडी तगर कि अवं अपनू अधू राज भी देलो।”

24 तैल्हेरेलेइ तैस कुइयां बेइर गेइतां, अपनि अम्मा पुच्छू, “अवं हेरोदेस राजे केरां कुन मेग्गी?” तैखन तैसेरी अम्मा ज़ोवं, “यूहन्ना बपतिस्मो देनेवालेरी क्रोडी मग।”

25 अकदम तै कुई अन्तर राजे कां आई त तैस कां मिन्तत की, “अवं चाताई कि, तू यूहन्ना बपतिस्मो देनेवालेरी क्रोडी केरतां एक्की थाले मां हुन्ना आन।”

26 तैसेरी गल शुन्तां राजो बडी दुखी भोव, पन अपनि कसमेरे वजाई सेइ त कने अपने मेहमानां केरे वजाई सेइ तैने इन्कार केरनो न चाव।

27 तैल्हेरेलेइ, तैनी अकदम एक्की सिपाही हुकम दित्तो कि, “यूहन्नारी क्रोडी केरतां आन।”

28 सिपाही कैदखाने मां गेइतां यूहन्नारी क्रोडी कट्टाई, त एक्की थाले मां रखतां आनी त कुईए कां दित्ती। त कुइयां गेइतां अपनि अम्मा कां दित्ती।

29 ए गल शुन्तां यूहन्नारे चले तैडी आए, त तैसेरी लाश नेइतां कबरी मां देव्वी छुड्डी ।

30 परमेशेरी गल्लां लोकन शुनानेरे पत्ती, यीशुएरे परेरित तैस कां वापस आए, जैना तैनी भेजोरे थिये । जैन किछु तैनेई लोकन सेइं कियोरू ते शिक्षा दित्तोरी थी, तैन सारी गल्लां यीशु सेइं शुनाई ।

31 बडे लोक यीशु त कने तैसेरे चलन कां एइते गाते थिये । एस वजाई सेइं, तैनन रोट्टी खानेरे लेइ भी मौको न थियो मैल्लोरो । तैल्हेरेलेइ यीशुए अपने चलन सेइं ज़ोवं, “मीं सेइं साथी केन्ची अकेन्ती ठैरी एज्जा, त थोडो जेरो आराम केरा ।”

32 एल्हेरेलेइ तैना किशती मां च्चेढतां, अकेन्ती ठैरी च्चेलि जे ।

*ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂ 5000 ⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ*

*(ⓂⓂⓂⓂⓂ 14:15-21; ⓂⓂⓂⓂⓂ 9:11-17; ⓂⓂⓂⓂⓂⓂⓂ 6:1-14)*

33 पन बडे लोकई यीशु त तैसेरे चले गाते लेइतां पिशानी छुड्डे कि तैना कोरां च्चलोरन । तैल्हेरेलेइ, सारे नगरेरे मैन्हु पैदल दौइतां तैन केरां पेइले तैडी पुज्तां अकोट्टे भोए ।

34 जैखन यीशु किशती पुडेरां ओस्सो, त तैनी मैन्हु केरि अक बडी भीड लेइतां तैन पुइ तरस खाव, किजोकि तैना मैन्हु तैन भेइडां केरे ज़ेरे थिये, जैन केरो कोई पुहाल न भोए† । तैखन यीशु तैन लोकन परमेशेरे राऊजेरे बारे मां वेइं गल्लां केरि शिक्षा देने लगे ।

35 जैखन दिहाडी डुबने लग्गोरी थी, त यीशुएरे चलेई तैस कां एइतां ज़ोवं, “ई सुनसान ठार आए, ते च्चिर भी बडू भोरू आए ।

36 एन मैनन् भेज, ताके एना च्चेवरे पासां केरे वेस्तन त कने इलोव्वन मां गोइतां अपने लेइ खाने जो रोट्टी घिन्ना ।”

37 पन यीशुए तैनन् जुवाव दित्तो कि, “तुस्से एन खाने जो रोट्टी देथ ।” पन तैनेई तैस सेइं ज़ोवं, “कुन अस दूई शौव दिहाडी केरि कमाई सेइं रोट्टी घिन्तां एन मैनन् खुवाम? एन न भोइ सके!”

38 एल्हेरेलेइ, यीशुए तैन सेइं ज़ोवं, “तुसन कां केत्ती रोट्टी आन? गेइतां हेरा ।” पतो केरनेरे पत्ती, तैनेई यीशु सेइं ज़ोवं कि, “पंच रोट्टी त कने दूई मेछली आन ।”

39 तैखन यीशुए अपने चलन हुक्म दित्तो कि, “सारे मैन्हु नीले घासे पुइ बिशाला ।”

40 एल्हेरेलेइ तैना मैन्हु शौव-शौव त कने पज्जां-पज्जां केरि हुन्डी मां विश्शी जे ।

41 तैखन यीशुए अपने हथ्थे मां पंच रोट्टी ते दूई मेछली टलेइ, त अम्बरेरे पासे तेकतां शुक्र कियूं । तैल्ला पत्ती, यीशु तैना रोट्टी टलोइतां चलन कां देते जेव कि लोकन खाने जो देन । तेन्चरां दूई मेछली भी तैन सारे लोकन वेंटी दित्ती ।

42 ते सारे मैन्हु खेइतां रेऊजी जे ।

43 तैल्ला पत्ती, यीशुएरे चलेई वेच़्चोरी रोट्टी त कने मेछली केरे टुकड़न सेइं 12 टोकरि भेरि ।

44 जैनेई रोट्टी त मेछली खेइ, तैन मां 5000 मडद थिये ।

*ⓂⓂⓂⓂ ⓂⓂⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂ ⓂⓂⓂⓂⓂ*

*(ⓂⓂⓂⓂⓂ 14:22-33; ⓂⓂⓂⓂⓂⓂⓂ 6:15-21)*

45 तैल्ला पत्ती, यीशुए अपने चलन हुक्म दित्तो कि, “तुस किशती मां च्चेढतां मीं केरां पेइले समुन्दरेरे उस पार बैतसैदा नगरे जो च्चली गाथ, ज़ांतगर अवं एन लोकन न भेज्जी ।” त तैना तैट्टां जे ।

46 लोकन भेजनेरे पत्ती, यीशु तैट्टां निस्तां नेडे एककी पहैडी पुइ प्रार्थना केरनेरे लेइ जेव ।

47 जैखन इलोझ भोइ, त तै किशती, जैस मां यीशुएरे चले थिये, समुन्दरेरे मझाटे थी, त यीशु अकैल्लो ज़मीनी पुइ थियो ।

48 तैनी हेरू कि तैसेरे चले किशती मां च्चेप्पू देइ-देइ परेशान भोने लग्गोरेन, किजोकि एग्रोवरां बडी तेज हवा च्चलोरी थी ।

† 6:34 यानी तैनन् परमेशेरी गल्लन पुइ च्चलानेवालो कोई न थियो ।



लगभग झेञ्जेरे चेवरे बजेई जैखन हेजू आंधरू थियूं, यीशु समुन्दरेरे पैनी पुड च़लतां अपने च़लन कां अव । तै तैन केरां अगरोवं निस्नु चातो थियो ।

49 पन ज़ैखन तैनेई यीशु समुन्दरेरे पैनी पुड च़लतो लाव, त तैनेई सोचो कि तै भूत आए । तैह्हेरेलेइ, तैनेई चिन्डां मैरी,

50 किजोकि तैना सारे तैस हेरतां बडे डेरि जोरे थिये । पन तैनी अकदम तैन सेइं गल्लां की ते ज़ोवं, “हिम्मत रखा! अवं आई । डरा न!”

51 तैखन तै तैन केरि किशती मां च़दो, ते तूफान च़लनो बन्ध भोइ जेव । तैखन च़ेले बडे हैरान भोए,

52 किजोकि तैनेई न थियूं समझोरू कि यीशु केन्च़रां रोट्टी त कने मेछली बधोरी थी, पन तैन केरे मन बेसमझ भोरे थिये ।

~~~~~  
 (~~~~~ 14:34-36)

53 तैल्ला पत्ती, यीशु त तैसेरे च़ेले गलील समुन्दर पार केरतां गन्नेसरत नंब्बेरे जगई पुड पुञ्जे । तैडी तैनेई किनारे पुड किशती बंधतां रखी ।

54 ज़ैखन तैना किशती पुडेरं ओस्से, त तैट्टेरे लोकेई यीशु पिशैनी छुडो ।

55 एह्हेरेलेइ, तैनेई सारे इलाके मां गेइतां लोकन खबर शुनाई कि यीशु ओरोए । ज़ेडी-जेडी लोकेई शुनु कि यीशु ओरोए, तैडी लोकेई बिमार मैन्हु खट्टी पुड छुडतां यीशु कां आन्ने लगो, ताके तै तैनन् बञ्झाए ।

56 ज़ेडी कोन्ची इलोव्वन मां, नगरन या बेस्तन मां यीशु गातो थियो, तैडी लोक बिमार मैनन् बज़ारन मां यीशु कां एन्ता रखते थिये । तैना यीशु सेइं मिन्त केरते थिये कि, तैन सिर्फ तैसेरे लिगडे सेइं हुने देन । ज़ेत्तेरे बिमार मैन्हु यीशु सेइं हथ लाते थिये, तैना सारे बेञ्झोते थिये ।

7

~~~~~  
 (~~~~~ 15:1-9)

1 एक्की दिहाडे किछ फरीसी लोक त कने शास्त्री लोकन मरां किछ लोक, ज़ैना यरूशलेम नगरेरां ओरे थिये यीशुए कां अकोट्टे भोए ।

2 ते तैनेई हेरू कि यीशुएरे किछ च़ेले रीति रुवाज़ेरे खलाफ अधोए हथ्यन सेइं रोट्टी खेइ राओरेन ।

3 किजोकि फरीसी लोक त कने सारे यहूदी लोक, ज़ांतगर हथ न धोन तांतगर रोट्टी न खाते थिये । अपने बुजुर्गां केरि परमपरा च़लानेरे लेइ तैना एन्च़रां केरते थिये ।

4 ज़ैखन तैना बज़ारेरां घरे एइते थिये, ज़ांतगर तैना निहान न देन तांतगर रोट्टी न थिये खाते । होरे भी बडे रीति रुवाज़ थिये, ज़ैना तैन केरे बुजुर्गन केरां ओरे थिये, ज़ेन्च़रां कटोरे, घडे, ट्लामेरां भांडां रुवाज़ेरे मुताबिक धोना ।

5 एह्हेरेलेइ फरीसी लोकेई त कने शास्त्री लोकेई यीशु पुच़छू, “तेरे च़ेले इशशे बुजुर्गां केरि परमपरा पुड की न च़लन? पन तैना रुवाज़ेरे खलाफ अधोए हथ्यन सेइं रोट्टी खातन!”

6 तैखन यीशुए तैन सेइं ज़ोवं, “बडे पेइले यशायाह नेबे तुशशे ज़ेरे पाखंडी केरे वारे मां ठीक भविष्यवाणी कियोरीए कि परमेशेरे ज़ोवं,

एना लोक ऐशी सेइं त मेरी बडी तारीफ़ केरतन,

पन एन केरे दिल मीं केरां बडे दूर आन ।

7 एना बेफाइदी मेरी आराधना (पूजा) केरतन,

किजोकि एना त मैन्हु केरि बनोरी परमपरान, परमेशेरेरे हुक्मां केरे ज़ेरे लोकन शिक्षा देतन ।”





7 तैन कां थोड़ी जेरि निक्की मेछली भी थी। यीशुए मेछली केरे लेइ भी परमेशेरू शुक्र केरतां अपने चलन सेइं ज़ोवं, “इना भी लोकन खाने जो देथ।” तेन्त्रां तैसेरे चलेईं कियुं।

8 तैना सारे मैन्हु रोट्टी खेइतां रेज़्ज़ी जे। तैल्ला पत्ती, यीशुएरे चलेईं मेछली त कने रोट्टी केरे बच्चोरे टुकड़न मरां सत टोकरे भेरतां सल्ले।

9 तैड़ी लगभग 4000 मड़द थिये। लोकन रोट्टी खुवानेरे पत्ती यीशुए मैन्हु भेज़्ज़ी दित्ते।

10 तैखन तै अकदम अपने चलन सेइं साथी किशती मां ब्रदतां दलमनूता इलाके जो चलो जेव।

\*\*\*\*\*  
(\*\*\*\*\* 16:1-4)

11 फिरी किछ फरीसी लोक यीशु कां एइतां तैस सेइं बेंस करेने लग्गे। तैना तैस अज़मानेरे लेइ तैस पुछ्छने लग्गे, “असन अम्बेरां कोई निशान\* हिरा।”

12 जैखन यीशुए एन शुनू, त तैनी अक बड़डो ओशा छेइतां ज़ोवं, “इस ज़मानेरे लोक मीं केरां किजो निशान मगतन! अवं तुसन सेइं सच ज़ोतईं कि इस ज़मानेरे लोकन, यानी तुसन अवं कोई भी निशान न हिरैईं।”

13 तैल्ला पत्ती, यीशु तैन लोकन छेइतां, फिरी किशती मां ब्रदो ते गलील समुन्दरेरे पार चलो जेव।

\*\*\*\*\*  
(\*\*\*\*\* 16:5-12)

14 जैखन यीशुएरे चले किशती मां ब्रदो, त तैना एप्पू सेइं साथी रोट्टी नेनी बिसरी जे। किशती मां तैन कां अक्के रोट्टी थी।

15 जैखन तैना समुन्दरेरे पार केरि राओरे थिये, त यीशुए तैन समझावं कि, “खबरदार! फरीसी लोकां केरे खमीरेरे† बारे मां ते कने हेरोदेस राजेरे खमीरेरे बारे मां होशियार रेइयथ।”

16 चले यीशुएरी गल गलत सेमझतां एप्पू मामेइं गलवात केरने लग्गे कि, “असन कां त रोट्टी नई, एल्हेरेलेइ यीशुए एन्त्रां ज़ोवं।”

17 तैखन यीशुए तैन केरि गल ज़ेनतां, तैन सेइं ज़ोवं, “तुस एप्पू मामेइं एन्त्रां किजो सोची राओरेथ कि असन कां रोट्टी नई? कुन तुस हेजू भी मेरी गल न समझी ते कने न बुझी? कुन तुशये मन बेसमझ भोइ जोरेन?”

18 कुन तुसन एछ्छी भोइतां भी न लेइहोए? ते कन भोइतां भी न शुनोए? कुन तुसन याद नई?

19 ज़ताली 5000 मैन्हु केरे लेइ पंच रोट्टी टलोइतां दित्तोरी थी, त तुसेईं बादे मां बच्चोरी रोट्टी केरे केतरे टोकरे भेरतां सल्लोरे थिये?” तैनेईं तैस जुवाब दित्तो, “वारहे टोकरे।”

20 तैखन तैनी तैन पुचछ्छ, “ज़ताली मीं 4000 मैन्हु केरे लेइ सत रोट्टी टलोइतां दित्तोरी थी, त तुसेईं रोट्टी केरे केतरे टोकरे भेरतां सल्लोरे थिये?” तैनेईं तैस जुवाब दित्तो, “सत टोकरे।”

21 तैखन तैनी तैन पुचछ्छ, “कुन तुसन हेजू भी समझ न आई?”

\*\*\*\*\*

22 तैल्ला पत्ती, यीशु त तैसेरे चेल बेतसेदा नगरे मां आए। लोकेईं अक कानो मैन्हु यीशु कां आनो ते तैस कां मिन्नत की कि, “एस मैन्हु सेइं हथ लाथ ताके ए बेज्झोए।”

23 तैखन यीशुए तैस काने मैनेरो हथ टलेइतां इलोव्वे केरां बेइर नीयो। तैखन तैनी तैस काने मैनेरी एछ्छन पुड़ थुक्तां, तैस पुड़ हथ रखे, ते तैस पुचछ्छ, “कुन तू किछ लातस?”

24 तैखन तैनी मैने उबरे तेकतां ज़ोवं, “हाँ, अवं मैनन् हेरी सकतईं, तैना मीं चलते बुट्टां केरे ज़ेरे लेइहोतन।”

\* 8:11 यीशुए पड़ेले बड़े चमत्कार कियोरे थिये, पन फरीसी लोक तैस पुड़ विश्वास न कियो। तैना सिर्फ यीशुए गल्लन मां फसानेरे लेइ एन्त्रां सवाल पुछ्छते थिये। † 8:15 इड़ी खमीरेरो मतलब गलत शिक्षा आए, पन यीशुएरे चलेईं तैसेरी गल न समझी।

25 तैखन यीशुए दुइयोंव हटे तैसेरी एच्छुन पुड़ हथ रखे । तै कानो ध्याने सेइं लाने लगो । तैसेरी एच्छुनी ठीक भोइ जेईं, त तै सब किछु साफ-साफ हेरने लगो ।

26 तैल्ला पत्ती, यीशुए तै मैन्हु एन जोइतां घरे जो भेजो, “तू इस इलोंव्हे मां पाव भी न रेखां (ते कने ईं गल केन्वी सेइं न जोइयां ।)”

ⓂⓂⓂⓂ ⓂⓂⓂⓂ ⓂⓂ ⓂⓂⓂⓂ ⓂⓂⓂⓂ ⓂⓂⓂⓂ  
(ⓂⓂⓂⓂ 16:13-20; ⓂⓂⓂⓂ 9:18-21)

27 तैल्ला पत्ती, यीशु ते तैसेरे चले बैतसैदा नगरे मरां निस्तां कैसरिया-फिलिप्पी नंव्वेरे नगरेरे इलोंव्वन मां ज़ेलि जे । बत्तां ज़लते-ज़लते यीशुए अपने चेलन पुच्छू, “जैखन लोक मेरे बारे मां गल्लां करतन, त तैना मेरे बारे मां कुन ज़ोतन कि अवं कौन आई?”

28 तैसेरे चलेईं जुवाव दित्तो, “किछु ज़ोतन कि तू यूहन्ना आस, जै बपतिस्मो देनेवालो थियो, पन किछु हारे मैन्हु ज़ोतन कि तू एलिय्याह आस, जै नबी थियो, पन किछु हारे मैन्हु एन भी ज़ोतन कि तू परमेशेरी गल्लां ज़ोनेवालन मरां अक मैन्हु आस ।”

29 तैखन यीशुए अपने चेलन पुच्छू, “पन तुस मेरे बारे मां कुन सोचतथ कि अवं कौन आई?” पतरसे जुवाव दित्तो, “तू मसीहः आस ।”

30 त यीशुए तैननू समझावं कि, “मेरे बारे मां ईं गल केन्वी सेइं न जोइयथ ।”

ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂ  
(ⓂⓂⓂⓂ 16:21-23; ⓂⓂⓂⓂ 9:22)

31 तैखन यीशु अपने चेलन शिक्षा देनो लगो कि, “मैनेरे मट्ठेरे लेइ, यानी मेरे लेइ एन ज़रूरी आए कि मीं बड़ दुख झल्लनेन । यहूदी लोकां केरे बुजुर्गन, प्रधान याजकन, त कने शास्त्री लोकन केरां अवं निकम्मो समझो गानोईं त मारो गानोईं । पन ट्लेइ दिहाइना पत्ती अवं फिरी ज़ीतो भोनोईं ।”

32 यीशुए एना गल्लां तैन सेइं साफ-साफ जोई । तैखन पतरस तैस अलग नेइतां डांटने लगो, “मसीह न मरे ।”

33 पन यीशुए मुइतां अपने बाकी चेलनां केरे पासे तक्कू, ते पतरसे सेइं झिड़केइतां ज़ोवं, “हे शैतान, मीं केरां दूर भो! (मतलब एन्चरां न सोच! शैतान तीं केरां एन्चरां जुवाते) मीं केरां दूर भोइ गा । तू परमेशेरी गल्लन पुड़ नईं, पन मैन्हु केरि गल्लन पुड़ मन लातस ।”

ⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂⓂⓂⓂⓂ  
(ⓂⓂⓂⓂ 16:24-28; ⓂⓂⓂⓂ 9:23-27)

34 तैखन यीशुए अपने चेले त कने मैन्हु केरि भीड़ एप्पू कां कुजेइतां सेब्बन सेइं ज़ोवं, “तुस अगर मेरे चेलो बन्नु चातथ, त तुस अपने आपेरो इन्कारऽ केरा त कने तुस अपनू कूरुस\* छुइतां मीं पत्ती चला ।

35 किजोकि जै कोई अपनि जिन्दगी बच्चानी चाते, त तै हमेशारी जिन्दगी गुवालो । पन जै कोई मेरे वजाईं सेइं त कने मेरे बारे मां खुशखबरी हरि लोकन शुनानेरी वजाईं सेइं अपनि जिन्दगी गुवाते, यानी बलिदान करते, त तै तैस बचालो, यानी हमेशारी जिन्दगी हासिल केरलो ।

36 मैन्हु अगर सारी दुनियाईं हासिल केरे त अपनि हमेशारी जिन्दगी गुवाए, त तैस फिरी कुन फैइदो भोलो?

37 मैन्हु अगर अपनि हमेशारी जिन्दगी गुवालो, त गुवानेरे पत्ती तै कुन देइतां तैस वापस धिन्नी सकते?

‡ 8:29 मसीहः मतलब की, परमेशेरे तरफां भेजोरो राजो । § 8:34 इन्कार करनू: मतलब की, अपनि खुवाइस छुइडी देनी कने अपनि मर्जी पुड़ नईं ज़लनू । \* 8:34 कूरुस छुइतां यीशु पत्ती ज़लनू: मतलब कि, यीशुएरे पत्ती ज़लनेरे वजाईं सेइं दुख या मुसीबत झलनेरे लेइ, त मरनेरे लेइ भी तयार भोनू ।





33 तैल्ला पत्ती, यीशु ते तैसेरे चले कफरनहूम नगरे मां आए। तैना तैडी एक्की घरे मां जे। तैखन यीशुए अपने चेलन पुच्छ्छ, “बत्तां जलते-जलते तुस एप्पू मांमेइं कोस गल्लारे बारे मां बेंस केरि राओरे धिये?”

34 तैना सब शरमेइतां चुप राए, किजोकि तैनेई बत्तां एप्पू मांमेइं एसेरे बारे मां बेंस कियोरी थी कि असन मां बड्डो मैन्हु कौन आए।

35 तैखन यीशुए तल्ले बिश्तां अपने 12 चले कुजाए ते तैन सेइं ज़ोवं, “अगर कोई परमेशेरी नज़री मां बड्डो बन्नु चाते, त तै सेबन केरां निकडो बने, ते कने सेबनी मैन्हु केरो सेवक बने।”

36 तैखन यीशुए अक निकडो बच्चो हथ्यन मां टलेइतां, तैन केरे मझाटे खडो कियो। तैनी ते बच्चो अपने कुम्मे मां रेखतां अपने चेलन सेइं ज़ोवं,

37 “जैना लोक मीं सेइं प्यार केरनेरे वजाई सेइं एरे ज़ेरे बच्चन मरां अक भी कबूल केरतन, तैना मीं कबूल केरतन। जैना मीं कबूल केरतन, तैना सिर्फ मीं नई, पन तैना परमेशेरी भी कबूल केरतन, जैनी अवं इडी भेजोरोई।”

ⓂⓂⓂⓂ ⓂⓂⓂⓂⓂ ⓂⓂ ⓂⓂⓂ ⓂⓂⓂ ⓂⓂⓂⓂ ⓂⓂⓂⓂ ⓂⓂ ⓂⓂⓂ ⓂⓂⓂⓂ ⓂⓂⓂⓂ ⓂⓂ

(ⓂⓂⓂⓂ 9:49-50)

38 तैखन यूहन्ने यीशु सेइं ज़ोवं, “हे गुरू, असेई अक मैन्हु लाव, ज़ै तेरू नंव घिन्तां लोकन मरां भूतेरो सायो केडडी राओरो धियो। एल्हेरलेइ, असेई तै मैन्हु ठाको, किजोकि तै असन सेइं साथी तीं पत्ती नई ज़ले।”

39 पन यीशुए जुवाब दित्तो, “तैस न टाका, किजोकि अगर कोई मेरे नंव घिन्तां चमत्कारेरां कम्मां केरे, त तै मेरे बारे मां लूशी बुरी गल्लां न ज़ोए।

40 किजोकि ज़ैना इश्शे खलाफ कम न केरन, तैना इश्शे पासेन।

41 अगर कोई मेरे नंव्वे सेइं तुश्शी मद्दत केरे, अक गिलास पानी भी तुसन पियाए, कि मसीहेरे आथ, त अवं तुसन सेइं सच्च ज़ोतां कि तै मैन्हु परमेशेरे केरां अपनो फल ज़रूर हासिल केरेलो।

42 “जै कोई इन निकडे बच्चन मरां ज़ैना मीं पुड विश्वास केरतन, केन्ची भी पाप करवाए, त तैस मैनेरे लेइ एन रोडू आए कि द्वालेटोरो अक बड्डो द्वालेइटोल तैसेरे गल्ले सेइं बेंधतां समुन्दरे मां शारो गाए।

43 अगर तेरो हथ तीं पाप केरनेरे लेइ ठोकर खुवाए, त तैस केट्टी छड। किजोकि तेरे लेइ दूई हथ भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू डोण्डो भोइतां हमेशारी ज़िन्दगी मां दाखल भोस। किजोकि नरकेरी अग कधी भी न हिश्शे।

44 तैडी तैन केरे कीडे, ज़ैना तैन खातन न मरन ते कने अग भी न हिश्शे।

45 त अगर तेरो पाव तीं पाप केरनेरे लेइ ठोकर खुवाए, त तैस केट्टी छड। किजोकि तेरे लेइ दूई पाव भोंते सांते सज़ा मैलनेरे लेइ नरकेरी अग्गी मां गाने केरां एन रोडू आए, कि तू टोंटो भोइतां हमेशारी ज़िन्दगी मां दाखल भोस। किजोकि नरकेरी अग कधी भी न हिश्शे।

46 तैडी तैन केरे कीडे, यानी ज़ैना तैन खातन न मरन त अग भी न हिश्शे।

47 अगर तेरी अछ्छ तीं पाप केरनेरे लेइ ठोकर खुवाए, त तैस केडडी छड। किजोकि तेरे लेइ दूई एछ्छी भोंते सांते नरकेरी अग्गी मां छड्डे गाने केरां एन रोडू आए, कि एक्की अछ्छी सेइं तू परमेशेरे राज़े मां दाखल भोस।

48 नरके मां तैन केरे कीडे, ज़ैना तैन खातन न मरन त अग भी न हिश्शे।

49 ज़ेन्चरां हर बलिदाने\* मां लून छड्डून ज़रूरी आए, तेन्चरां परमेशर हर† एक्की मैनेरी अज़मैइश घिन्तलो, ज़ै बडी दुखे वाली भोनी आए, ज़ेन्चरां कि अग्गी‡ मांमेइं निसनूए।

\* 9:49 पुराने ज़माने मां बलिदाने पुड लून छड्डते धिये। तेन्चरां यीशुएरो हर अक चेलो ज़ीतो बलिदानेरो ज़ेरो भोनेए। मतलब की, मसीहेरे लोक अगारे ज़ेरे मुसीबतन मां भी, परमेशेरो हुक्म मन्नारे लोडे। † 9:49 मूल भाषाई मां: हर अक मैन्हु अग्गी सेइं लूनो कियो गालो। ‡ 9:49 परमेशर अगगारे ज़ेरे मुसीबतन सेइं हर एक्की मैन्हु अज़मालो, यानी इमतिहान नेलो। एन्चरां केरतां परमेशर साबत केरते की सच्चे मां तैसेरे लोक कौन आन, त तै तैन सेइं अपनो रिश्तो मज़बूत केरते।



50 लून त रोडू आए, पन अगर लूनेरो स्वाद चेलि गाए, त फिरी दुबारां केन्चरे तैसेरो स्वाद वापस आनेले? तेन्चरां तुस भी एप्पू मां लून रखाई, यानी परमेशेरो हुक्म मन्ना, त एप्पू मांमेइं मेल मिलापे सेइं राथ ।”

## 10

*॥॥॥ ॥ ॥॥ ॥॥॥॥॥॥ ॥॥॥॥॥॥ ॥॥॥ ॥॥ ॥॥॥ ॥॥॥ ॥॥॥॥॥ ॥॥॥*  
*(॥॥॥॥ 19:1-12; ॥॥॥॥ 16:18)*

1 तैल्ला पत्ती, यीशु त तैसेरे चले तैट्टां उठतां यहूदिया इलाके मां आए, त फिरी यरदन दरियोरे उस पार चले जे । तैडी मैन्हु केरि भीड़ फिरी तैस कां अकोट्टी भोइ । त तै अपने रीतेरे मुताबिक तैन फिरी शिक्षा देने लगे ।

2 तैखन फरीसी लोकेईं यीशु कां एइतां तैस अज्रमानेरे लेइ तैस पुच्छ्छ, “कुन एन जेइज्र आए कि मइद अपनि कुआन्शी फारख्ती दे?”

3 पन यीशुए तैनन् पुच्छ्छ, “बडे पेइले मूसा नेवे तुसन कुन केनेरो हुक्म दित्तोरो थियो?”

4 तैखन तैनेईं यीशुए जुवाब दित्तो, “मूसे मइदे अजाज्रत दित्तोरीए कि तै लिखतां फारख्ती दे ।”

5 तैखन यीशुए तैनन् जुवाब दित्तो, “तुश्शे सखत दिलेरी वजाईं सेइं, मूसे तुश्शे लेइ ए हुक्म दित्तोरो थियो ।

6 पन दुनियारी शुरुआती मां, ज़ैखन परमेशेरे मैन्हु केरि रचना की, तैखन तैनी तैना मइद ते कुआन्श बनोरेन ।

7 एल्हेरेलेइ, इलाएरे पत्ती मइद अपने हाज-बव्वे केरां अलग भोइतां अपनि कुआन्शी सेइं साथी रालो,

8 ते तैना दुइये अक्के जान भोले ।” तैल्ला पत्ती यीशुए ज़ोव, “एल्हेरेलेइ तैना हुनी परमेशेरी नज़री मां दूईं नईं, पन तैना अक्के आन ।

9 एल्हेरेलेइ ज़ैना परमेशेरे ज़ोडोरेन, तैनन् कोई मैन्हु अलग न केरे !”

10 बादे मां, ज़ैखन यीशु ते तैसेरे चले घरे मां थिये, तैखन तैसेरे चलेईं फारख्ती देनेरे बारे मां तैस फिरी पुच्छ्छ ।

11 यीशुए तैन सेइं ज़ोव, “जै कोई अपनि कुआन्शी फारख्ती देइतां होरो इला बनाए, त तै तैस पेइली कुआन्शारे खलाफ बदमाशी केरते ।

12 त अगर कुआन्श अपने मइदे छेइतां होरो इला बनाए, त तै अपने पेइले मइदेरे खलाफ बदमाशी केरचे ।”

*॥॥॥ ॥॥॥॥॥ ॥॥॥॥ ॥॥॥॥॥॥॥ ॥॥॥*  
*(॥॥॥॥ 19:13-15; ॥॥॥॥ 18:15-17)*

13 तैल्ला पत्ती, किछ्छ लोक अपने निक्के बच्चन यीशु कां आन्ने लग्गे ताके तै तैन पुइ हथ रेखतां आशिवांद दे, पन तैसेरे चलेईं तैना लोक डांटे ।

14 यीशुए एन हेरतां सेरकोइतां अपने चलन सेइं ज़ोव, “निक्के बच्चन मीं कां एजने देथ, तैनन् न टाका, किजोकि परमेशेरेरू राज़ एरे ज़ेरे लोकां केरे लेइ आए ।

15 अवं तुसन सेइं सच्च ज़ोतईं कि ज़ै कोई परमेशेरेरे राज़जे\* निकडे बच्चेरू ज़ेरू कबूल न केरे, त तै परमेशेरेरे राज़जे मां कधी भी दाखल न भोइ सके ।”

16 तैखन यीशुए तैना बच्चे कुम्मे मां रेखां, तैन पुइ हथ रेखतां तैनन् आशिवांद दित्तो ।

*॥॥॥॥॥ ॥॥॥॥॥॥॥ ॥॥॥ ॥॥ ॥ ॥॥॥ ॥॥॥ ॥॥॥॥ ॥॥॥ ॥॥॥॥॥॥*  
*(॥॥॥॥ 19:16-30; ॥॥॥॥ 18:18-30)*

§ 9:50 यीशु चाते कि तैसेरे चले नरम दिले सेइं राए (वचन 35-37), ताके तैना एप्पू मांमेइं बेंस न केरे कि असन मरां बड्डो कौन आए, त तैन मरां कोई भी एन्चरां न सोचे कि अर्व्वे बड्डोईं, त केन्ची ठोकर न खुवाए । \* 10:15 परमेशेरेरे राज़जेरे दूईं मतलब आन । इश्शी ज़िन्दगी मां, हुन्ना भी परमेशर राज़ केरते । या स्वर्गे मां भी तै हमेशा असन पुइ राज़ केरेलो ।

17 तैल्ला पत्ती, ज़ैखन यीशु त तैसेरे चले घेरां बेडर निस्तां बत्तां चेलि राओरे थिये, ते अक मैन्हु यीशु कां दौडतो अव। तैनी तैस कां मथ्यो टेकतां तैस पुच्छू, “हे रोडे गुरू, हमेशारी ज़िन्दगी हासिल केरनेरे लेइ अवं कुन केरि?”

18 पन यीशुए तैस पुच्छू, “किजो तू मींजो रोडू ज़ोतस? परमेशेरेरे अलावा होरो कोई भी रोडो नई।”

19 तू त परमेशेरेरे हुक्मन ज़ानतस, यानी खून न केरा, बदमाशी न केरा, चोरी न केरा, झूठी गवाही न देथ, धोखो न देथ, अपने हाज-बव्यां केरि इज़्जत केरा।”

20 पन तैनी मैने यीशु जुवाब दित्तो, “हे गुरू, एना सब हुक्म अवं बचपनेरो मन्तो ओरोई।”

21 तैखन यीशुए तैस तेकतां तैस सेइं प्यार कियो, त तैस सेइं ज़ोवं, “तीं मां एक्की गल्लारी कमी आए। गा, ज़ैन किछ् तीं कां आए तैन बेचत्तां गरीब मैनन् दे, तैखन तीं स्वर्गे मां खज़ानो मैलेलो। तैल्ला पत्ती, एइतां मेरो चेलो बना, त अपनू करूस † छुइतां मीं पत्ती च़ल।”

22 यीशुएरी ए गल श्रुन्तां तैस मैनेरू तुत्तर टलक्क, त तै बडो दुखी भोइतां च़लो जेव, किजोकि तै बडो अमीर थियो त तै अपनो धन छुइने न चातो थियो।

23 तैखन यीशुए च़ेवरे पासन अपने चेलन तेकतां तैन सेइं ज़ोवं, “अमीर मैन्हु केरू परमेशेरेरे राज़्जे मां दाखल भोन् बडू मुश्किल आए।”

24 यीशुएरे च़ेले तैसेरी गल्लां श्रुन्तां हैरान ‡ भोए। पन यीशुए फ़िरी तैन सेइं ज़ोवं, “हे मट्टाव, ज़ैना धने पुइ भरोसो रखतन, तैन केरे लेइ परमेशेरेरे राज़्जे मां दाखल भोन् बडू मुश्किल आए!”

25 परमेशेरेरे राज़्जे मां अमीर मैनेरू दाखल भोने केरां ऊँटेरू सांधनेरे पाए मरां निस्नु सुख्नु आए!”

26 तैखन तैना बडे हैरान भोइतां एप्पू मांमेइं ज़ोने लग्गे, “अगर अमीर मैनेरे लेइ मुक्ति § हासिल केरनि नमुमकिन आए, त फ़िरी केसेरी मुक्ति भोइ सकचे?”

27 यीशुए तैन केरे पासे तेकतां ज़ोवं, “मैन्हु अपने आपे न बच्चेइ सकन, यानी मुक्ति हासिल न केरि सकन, पन परमेशर एन केरि सकते, किजोकि परमेशर सब किछ् केरि सकते।”

28 तैखन पतरस यीशु सेइं ज़ोने लग्गे, “तक, अस त सब किछ् छेइतां तीं पत्ती च़लोरेम! असन कुन इनाम मैलेलू?”

29 यीशुए अपने चेलन सेइं ज़ोवं, “अवं तुसन सेइं सच़ ज़ोतई कि, ज़ैनेई मेरे लेइ त कने मेरे बारे मां खुशखबरी होरे लोकन श्रुनानेरे लेइ अपने घर या दूला या बेइन या हाज या बव या बच्चे या ऊडारां शारोरन,

30 तैनन् इस दुनियाई मां शौव गुणा मैलेलू। तैना घरन, दूलान, बेइनन, हेईयन, बच्चन त कने ऊडारां हासिल केरेले। लोक भी तैनन् सताले, पन एजनेबाली दुनियाई मां परमेशर तैनन् हमेशारी ज़िन्दगी देलो।

31 पन बडे मैन्हु ज़ैना हुन्ना पेइले आन, तैना बादे मां पत्रोवं भोनेन। त ज़ैना हुन्ना पत्रोवं आन, तैना बादे मां पेइले भोनेन।”

“§ 10:21 कूरूस छुइतां यीशु पत्ती च़लनू; मतलब कि, यीशुएरे पत्ती च़लनेरे वजाई सेइं दुख या मुसीबत झलनेरे लेइ, त मरनेरे लेइ भी तियार रानू। ‡ 10:24 यहूदी लोक एरो विश्वास केरते थिये कि अगर कोई अमीर आए त तै स्वर्गे मां गेइ सकते। एल्हेरेलेइ यीशुएरे च़ेले तैसेरी ए गल श्रुन्तां हैरान भोए। § 10:26 मुक्ति हासिल केरनि या परमेशेरेरे राज़्जे मां दाखल भोन्, एना दुइये लगभग अक्के गल आए।”

32 तैल्ला पत्ती, यीशु त तैसेरे चले ते किछ् लोक यरूशलेम नगरे जो च़लते-च़लते, तैना हेजू बत्तां थिये। यीशु तैन केरे अग़री-अग़री पासे च़ेलि राओरो थियो। ते तैसेरे चले हैरान भोए त होरे लोक डरते-डरते तैस पत्ती च़ली राओरे थिये। तैखन यीशु अपने 12 चेलन बत्ती मरां अलग नेइतां फ़िरी तैन सेइं तैना गल्लां ज़ोने लग्गे, ज़ैना तैस सेइं भोनेबैली थी।

† 10:21 कूरूस छुइतां यीशु पत्ती च़लनू; मतलब कि, यीशुएरे पत्ती च़लनेरे वजाई सेइं दुख या मुसीबत झलनेरे लेइ, त मरनेरे लेइ भी तियार रानू। ‡ 10:24 यहूदी लोक एरो विश्वास केरते थिये कि अगर कोई अमीर आए त तै स्वर्गे मां गेइ सकते। एल्हेरेलेइ यीशुएरे च़ेले तैसेरी ए गल श्रुन्तां हैरान भोए। § 10:26 मुक्ति हासिल केरनि या परमेशेरेरे राज़्जे मां दाखल भोन्, एना दुइये लगभग अक्के गल आए।



51 तैखन यीशुए तैस पुच्छू, “तीं कुन लोडते कि अवं तेरे लेड केरि?” काने मैने जुवाब दित्तो, “हे गुरू, अवं लानू चाताई।”

52 तैखन यीशुए तैस सेइं ज़ावं, “तू गा। तीं मीं पुड विश्वास कियूं एल्हेरेलेड अवं तीं बज्जाताई।” अकदम तै लाने लगो त कने यीशु पत्ती चलो।

## 11

ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 21:1-11; ⓂⓂⓂⓂⓂ 19:28-40; ⓂⓂⓂⓂⓂⓂⓂ 12:12-19)

1 ज़ैखन यीशु त तैसेरे चले यरूशलेम नगरेरे नेडे आए, त तैखन ज़ैतून नंव्वेरे पहाड़ेरे नेडे, बैतफगो त कने बैतनिय्याह इलोव्वन कां पुज्जे। तैखन यीशुए अपने चलन मरां दुइयन सेइं एन ज़ोइतां पडले भेजे कि,

2 “अपने सामनेबाले इलोव्वे मां गाथ। तैड़ी पुज्जते तुसन अक गैधरो बच्चो बंधोरो मैलेलो, ज़ैस पुड कधी कोई नई चद्रोरो। तैस खोलतां इड़ी मीं कां आनां।

3 अगर तुसन कोई पुच्छू, ‘किजो एन केरने लगगोरैथ?’ त तैस सेइं ज़ोइयथ, ‘परभुए एसेरी ज़रूरत आए।’ त तै अकदम गधेरे बच्चे तुसन सेइं साथी इड़ी भेजेलो।”

4 तैना दूई चले तैस इलोव्वे मां जे। तैड़ी गैधरो बच्चो एक्के धरेरे दारे बेइर बंधोरो लाव, त तैना तैस खोलने लगगे।

5 ज़ैना तैड़ी खडे थिये, तैन मरां किछू मैनेई तैन पुच्छू, “एन कुन केरने लगगोरैथ, गधेरे बच्चे किजो खोलने लगगोरैथ?”

6 ज़ेन्चरां यीशुए अपने चलन सेइं ज़ोरू थियूं, तेन्चरां तैनेई तैन मैनन् सेइं ज़ावं। तैखन तैन मैनेई चले तैटटां गाने दित्ते।

7 यीशुएरे चलेई बच्चो यीशु कां एन्तां यीशुए तैस पुड विशालनेरे लेड, तैस पुड अपने लिगडां छुड्डो। त यीशु तैस पुड विश्शां (त तैना यरूशलेम नगरेरे पासे जो चलने लगगे)।

8 तैखन बडे लोकेई (तैसेरी इज्जत केरनेरे लेई) अपना लिगडां बत्ती मां बिछ्ठां त कने किछू मैनेई पटलनबाली डैलडी एन्तां बत्ती मां बिछ्छेई।

9 ज़ैना यीशुएरे अग्री-अगरी त कने पत्ती-पत्ती चलने लगगोरै थिये, तैना खुशी सेइं ज़ोरे सेइं ज़ोने लगगे, “होशाना! (परमेशेरी तारीफ भोए) परमेशर तैस बरकत दे, ज़ै परभु-परमेशेरे अधिकारे सेइं साथी एज्जी राओरोए!”

10 “परमेशर तीं आशिवां दे, ज़ैखन तू इश्ये पडदादे दाऊदेरू राजेरू ज़ेरू राज\* केरे! परमेशेरी होशाना (तारीफ) भोए, ज़ै उच्चे स्वर्गे मां आए!”

11 तैल्ला पत्ती, तैन लोकन सेइं साथी, यीशु यरूशलेम नगरी मां पुज्जां मन्देरे मां जेव। यीशु मन्देरे मां चेवरे पासन तक्कू कि ज़ैन तैड़ी भोइ राओरू थियूं। तै अपने 12 चलन सेइं साथी नगरे मरां निस्तां, राती विशनेरे लेड बैतनिय्याह इलोव्वे जो वापस चलो जेव, किजोकि इलोझ भोइ जोरी थी।

ⓂⓂⓂⓂ ⓂⓂⓂⓂⓂⓂⓂⓂ ⓂⓂⓂⓂ ⓂⓂⓂⓂⓂⓂⓂⓂ

(ⓂⓂⓂⓂⓂ 21:18-19)

12 त एग्री दिहाड़ी, ज़ैखन यीशु त तैसेरे चले बैतनिय्याह इलोव्वेरां निस्तां यरूशलेम नगरे जो वापस एज्जी राओरे थिये, तैखन यीशुए ढलुख लगगी।

13 तै दूरेरां फ्रेगोरो अक नीलो बुट लेइतां तैसेरे नेडे जेव कि खाने जो शायद तैस मां किछू मैल्ले। पन, ज़ैखन तै बुटे कां जेव, त तैड़ी पट्लां केरे अलावा तैस किछू न मैल्लू, किजोकि तै फल्लेरो मौसम न थियो।

\* 11:10 बडे पडले परमेशेरे दाऊद राजे सेइं ए वादो कियोरो थियो कि तैसेरी ओलादी मां अक मैन्हु राजो भोइतां हमेशेरे लेड परमेशेरे लोकन पुड राजे केरेलो। एल्हेरेलेड, सारे लोक तैस राजेरे लेड इतजार केरि राओरे थिये। यीशु मसीह ज़ै आए तैए तै राजो आए।

14 तैखन यीशुए तैस बुटे फिटकार देइतां तैस सेइं ज़ोवं, “हुन्नेरे पत्ती, तीं मां कोई फल कधी न लगगलो!” त तैसेरे चले एन शुनी राओरे थिये ।

*Matthew 21:12-17; Mark 11:15-18; Luke 19:45-48; John 8:12-14*

15 तैल्ला पत्ती, तैना फिरी यरूशलेम नगरे मां पुज्जे, त यीशु मन्देरे अंगने मां जेव । तैड़ी लोक जानवरां केरू त कने मन्देरे मां चाढ़नेरू सामान धिन्नेरू त कने बेचनेरो कारोवार केरि राओरे थिये । यीशु तैनन बेइर कढने लगो, ते तैनी तैड़ी पेइसे बदलनेवालनां केरे मेज्जन त कने कबूतर बेचनेवालन केरि कुर्सी उलटेइ दित्ती ।

16 त मन्देरेरी ठैरी मां केन्वी बेचनेरे लेइ कोई चीज एन्तां च़लने न दित्तू ।

17 तैखन यीशुए तैन लोकन शिक्षा देइतां ज़ोवं, “परमेशेरी किताबी मां एस मन्देरे बारे मां एन लिखोरूए कि परमेशेरे ज़ोवं, मेरू मन्दर सैरी कौमां केरे लोकां केरे लेइ प्रार्थनारू घर भोलू! पन तुस लोकेई इन मन्दर डैकू केरो अड्डो बनोरोए ।”

18 एन शुन्तां प्रधान याजक त कने शास्त्री लोक यीशु कल्ल केनेरो मौको तोपने लगगे । पन तैना यीशु केरां डरते थिये, किजोकि सारे लोक तैसेरी शिक्षाई शुन्तां हैरान भोते थिये ।

19 ज़ैखन इलोझ भोइ, त यीशु त तैसेरे चले (रात गुजारनेरे लेइ) नगरेरां बेइर च़लि जे ।

*Matthew 21:20-22; Mark 11:20-22; Luke 19:47; John 8:15*

20 एग़री दिहाड़ी, झेज्झां यीशु त तैसेरे चले तैटठां यरूशलेम नगरे जो च़ले त तैनेई तै फ़ेग़ेरो बुट लाव, ज़ैस यीशुए पेइले फिटकार दित्तोरो थियो । तै बुट ज़ीलन तगर शुक्की जोरो थियो ।

21 पतरसे तै गल याद आई कि यीशुए एस बुटे फिटकार दित्तोरो थियो, त तैनी यीशु सेइं ज़ोवं, “हे गुरु, तक! ए फ़ेग़ेरो बुट ज़ैस तीं फिटकार दित्तोरो थियो, शुक्की जोरोए! (एन केन्च़रां भोवं)”

22 यीशुए अपने चेलन जुवाव दित्तो, “तुस परमेशेरे पुइ विश्वास रखा ।

23 अवं तुसन सेइं सच़ ज़ोताई कि ज़ै कोई एस पहाड़े सेइं ज़ोए, ‘तू उखड़तां समुन्देरे मां बिछ़ड़ी गा,’ त एन्च़रां ज़ोइतां अपने दिले मां शक न केरे, पन विश्वास केरे कि ‘ज़ैन अवं ज़ोतई तैन भोइ गालू,’ त तैसेरेलेइ तैन्ने भोलू ।

24 एल्हेरेलेइ अवं तुसन सेइं ज़ोतई कि, ज़ैखन तुस प्रार्थना केरतां परमेशेरे केरां ज़ैन भी मग़ेले, त विश्वास केरा कि तुसन तैन ज़रूर मैल्ली गालू, तैखन परमेशेरे केरां तैन तुसन दित्तू गालू ।

25 ते ज़ैखन कधी तुस खड़े भोइतां परमेशेरे कां प्रार्थना केरतथ, त अगर तुसन केन्वी सेइं गिलो भोए, त पेइले तुस तैस माफ़ केरा, ताके तुशुओ स्वर्गेरो बाजी भी तुशुओ पाप माफ़ केरे ।

26 अगर तुस होरि लोकन माफ़ न केरथ, त तुशुओ बाजी परमेशर भी, ज़ै स्वर्गे मां आए, तुशुओ पाप माफ़ न केरेलो ।”

*Matthew 21:23-27; Mark 11:27-32; Luke 20:1-8*

27 तैल्ला पत्ती, यीशु त तैसेरे चले फिरी यरूशलेम नगरे मां आए । ज़ैखन यीशु मन्देरे अंगने मांमेइं हंठने लगगोरो थियो, त तैखन प्रधान याजक त कने शास्त्री त कने यहूदी लोकां केरे बुजुर्ग तैस कां आए, त तैस सवाल पुछ़ने लगगे,

28 “तू एन कम्मां कोस अधिकारे सेइं केरतस, त कने एन कम्मां केनेरो तीं केनि अधिकार दित्तोरोए?”

† 11:15 ज़ैन पेइसे लोकन मन्देरे मां आनतन, तैन मां रोमी सरकारेरे राज़ेरी शकल भोती थी । एल्हेरेलेइ तैन पेइसे मन्देरे मां इस्तेमाल न थिये केरते । मन्देरे मां इस्तेमाल केनेरे लेइ अलग पेइसे रखते थिये । तैस पेइसे सेइं बलिदानां केरि चीजां चिन्ते थिये ।

‡ 11:28 एन कम्मांमत्तलब कि, यीशुए पेइले मन्देरे मरां बुपारिन बेइर कढे । तैस कम्मेरे बारे मां तैना यीशु केरां सवाल पुछ़तन ।

29 पन यीशुए तैन सेइं ज़ोवं, “अवं भी तुसन अक सवाल पुछ्ततई। मीं तैसेरो जुवाब देथ, तैखन अवं भी तुसन ज़ोलो कि अवं एन कम्मां कोस अधिकारे सेइं केरतई।

30 मीं जुवाब देथ। यूहन्ना ज़ै बपतिस्मो देनेवालो थियो, तैस बपतिस्मो देनेरो अधिकार कोट्टां मैल्लो, परमेशेरी तरफां मैल्लो या मैन्हु केरि तरफां?”

31 तैखन तैना एप्पू मांमेइं गलवात केरने लगगे कि, “अगर अस ज़ोम कि, ‘परमेशेरी तरफां मैल्लो,’ त एनी पुछ्तनूए कि, ‘फिरी तुसेईं तैसेरो विश्वास की न कियो?”

32 पन अस एन भी नईं ज़ोईं सकम कि, ‘यूहन्ना अधिकार, मैन्हु केरि तरफां मैल्लो,’ किजोकि असन लोकां केरो डर आए कि तैना असन पुड़ क्रोध केरले, किजोकि सारे लोक समझते थिये कि सच्चे यूहन्ना नवी आए।”

33 एल्हरेलेइ तैनेईं यीशुए एन जुवाब दित्तो कि, “असन नईं पतो।” यीशुए तैन सेइं ज़ोवं, “अवं भी तुसन सेइं न ज़ोईं कि अवं एन कम्मां कोस अधिकारे सेइं केरतई।”

## 12

*Matthew 21:33-46; Mark 12:1-19*

1 तैल्ला पत्ती, यीशु यहूदी लोकां केरे लीडरन सेइं मिसालन मां गल्लां केरने लगगे, “एक्सां, एककी मैने दाछरी बाग लाई, ते बागारे च़ेवरे पासन वाड़ दित्तो, त दाछारो रस कढनेरे लेइ कुण्ड बनावं, ते तैनी तैस बागारी रखवाली केरनेरे लेइ अक उच्ची कूड़ी बनाई। तैल्ला पत्ती, ते मैन्हु तैस बागारो टेको किछ ज़मीनदारन देइतां होरि मुल्वे जो च़लो जेव।

2 ज़ैखन फल्लेरो मौसम अव, त तैनी ज़मीनदारन कां अक नौकर भेजो कि ज़मीनदारन केरां दाछारे बागारे फल्लां केरो अपनो हिस्सो आने।

3 पन ज़ैखन ते नौकर बागी मां पुज्जो, त तैन किसानेईं तै टलेइतां मड्डो त खाली हथ्येइं वापस भेजो।

4 ज़ैखन बागारे मालिके शुनू कि तैनेईं एन कुन कियूं, त तैनी होरो अक नौकर फिरी भेजो। पन तैनेईं तैसेरो भी दोग बन्नो ते तैसेरी बेज्जती केरतां भेजो दित्तो।

5 फिरी तैनी मालिके होरो अक नौकर तैन कां भेजो। तैनेईं ते भी मैरी छुड़डो। तैखन तैनी होरे जादे नौकर भेजे। तैन मरां तैनेईं किछ मड्डे, ते किछ मारे।

6 तैस मालिके कां अक्के रेवरो थियो, जैन तैसेरू ट्लारू मट्टू थियूं। आखरी मां, तैनी ते भी तैन कां एन सोचतां भेज्ज कि तैना मेरे मट्टेरी इज्जत केरले।

7 पन ज़ैखन मालिकेरू मट्टू तैन कां अव, त तैन किसानेईं एप्पू मांमेइं ज़ोवं, ‘ए त एस बागारो वारिस आए। एज्जा, अस एस भी मैरी छुड़डम, तैखन एसेरी जेइदात इशशी भोनी।’

8 एल्हरेलेइ, तैनेईं ते टलेइतां मैरी छुड़डो, ते बागारे बेइर शेरी छुड़डो।”

9 तैखन यीशुए तैन मैनन पुच्छ्, “हुनी बागारो मालिक तैन ज़मीनदारन सेइं कुन केरेलो? अवं ज़ोतईं कि तैनी कुन केरनू, ते एइतां तैन किसानां केरो नाश केरेलो, ते बागारो टेको होरि केन्ची ज़मीनदारन देलो\*!”

10 “कुन तुसेईं पवित्तरशास्त्रे मां मसीहेरे बारे मां ई गल नईं पढोरी? तैस मां लिखोरूए कि,

‘ज़ै घोड़ राज-मिस्त्रेईं निकम्मो ठहरेवरो थियो,

तै मकानेरो खास घोड़ बेनि जेव।

11 एन प्रभु परमेशेरी तरफां एन्त्ररां भोव,

ते कने इशशी नज़री मां ए हैरान भोनेरी गल आए!’ ”

\* 12:9 एस मिसाली मां, बागारो मालिक परमेशर आए, त बुरे किसान यहूदी लोक त कने तैन केरे लीडर आन, त फल्लेरो मतलब परमेशेरी गल्लन पुड़ च़लनेवाली जिन्दगी, त मालिकेरे नौकर तैना आन, जैना परमेशेरे गल्लां ज़ोनेवालेन, त मालिकेरू मट्टू, यीशु मसीह आए। त तै मालिक तैन ज़मीनदारन सज़ा देते, मतलब कि परमेशर यहूदी लोकन सज़ा देलो। त होरे किसान गैर-यहूदी लोक आन।

12 ज़ैखन यहूदी लोकां केरे लीडरेई एन शुनु, त तैनेई सेमझी छुड्डू कि यीशुए ई मिसाल इशशे खलाफ ज़ोरीए। एल्हेरेलेइ, तैना सेरकोए। त तैनेई यीशु कैद केरनू चाव। पन तैना लोकन केरां डरे, एल्हेरेलेइ तैस छेडतां ज़ेलि जे।

॥२२:१५-२२; २०:२०-२६॥

(२२:१५-२२; २०:२०-२६)

13 तैल्ला पत्ती, यहूदी लोकां केरे लीडरेई यीशु कां किछु फरीसी लोक त कने हेरोदेस राज़ेरे लोक भेजे, ताके तैना यीशुए अपनि गल्लन मां फसान।

14 तैनेई यीशु कां एडतां तैस सेई ज़ोवं, “हे गुरु, अस ज़ानतम कि तू सच्चो आस, त केन्चेरी परवाह न केरस, किजोकि तू सारे मेनन् बराबर समझतस, त तू परमेशेरी गल्लां लोकन सच्च्चाई सेई शुनातस। एल्हेरेलेइ असन ज़ो, कुन रोम-मुल्खेरे महाराजे जो चुंगी देनी जेइज आए कि नई?”

15 अस देम या न देम?” यीशुए तैन केरू पाखंड ज़ेनतां तैन सेई ज़ोवं, “मीं किजो अज़मातथ? अक सिक्को (दीनार) मीं कां आनां कि अवं तैस हेरी।”

16 तैनेई आनो, तैखन यीशुए तैन पुच्छू, “इस सिक्के पुड केसेरी शकल त केसेरू नवं आए?” तैनेई जुवाब दित्तो, “महाराजेरू आए।”

17 यीशुए तैन सेई ज़ोवं, “ज़ैन महाराजेरू आए तैन बड्डे राज़े देथ, ते ज़ैन परमेशेरेरू आए तैन परमेशेरे देथ।” ज़ैखन फरीसी लोकेई ते कने हेरोदेस राज़ेरे लोकेई एन शुनु, त तैखन तैना बडे हैरान भोए।

॥२२:२३-३३; २०:२७-४०॥

(२२:२३-३३; २०:२७-४०)

18 तैल्ला पत्ती, सडूकी लोक यीशु कां आए। तैना ज़ोतन मुड्डे ज़ीते न भोन। त तैनेई यीशु पुच्छू,

19 “हे गुरु, बडे पेइले मूसे असन जो कानूने मां लिखोरू थियूं कि अगर कोई मैन्हू वेओलाद मेरि गाए त तैसेरी कुआन्श रेइ गाए, त तैसेरो दूला तैसेरी लैडी सेई इला बनाए, त अपने दूलाएरे लेइ औलाद पैदा केरे, ताके तैसेरी खानदानी राए।

20 सत दूला थिये। पेइलो दूला इला वनेइतां वेओलाद मेरि जेव।

21 तैखन दुइयोवं दूलाए तैस कुआन्शी सेई इला बनाव। तै भी वेओलाद मेरि जेव। तेन्चरां टलेइयोवं दूलाए भी कियूं।

22 त सते दूलाएई तैस कुआन्शी सेई एक्केरे पत्ती एक्के इला कियो, पन औलाद न भोइ। सैरेन पत्ती तै कुआन्श भी मेरि जेई।

23 एल्हेरेलेइ, परमेशर लोक मुड्डन मरां ज़ीते केरनेरे पत्ती, यानी ज़ैखन लोक ज़ीते भोले, त तैखन तै कुआन्श तैन सत्तन मरां केसेरी लाडी भोली? किजोकि ते इडी धेरती पुड सत्तां केरि लाडी भोरी थी।”

24 यीशुए तैन सेई ज़ोवं, “तुशशी सोच केतरी गलत आए! कुन तुसन पतो किजो? किजोकि तुस पवित्तरशास्त्रे मां लिखोरी गल्लन त कने परमेशेरी शक्ति न ज़ानथ!

25 तुसेई ज़ै कहानी ज़ोई, तैस मां तै कुआन्श तैन सत्तन मरां केन्चेरी लाडी नई भोनी, किजोकि ज़ैखन लोक मुड्डन मरां ज़ीते भोले, त तैखन कोई केन्ची सेई इला न बनालो, पन तैना स्वर्गे मां परमेशेरेरे स्वर्गदूतां केरे ज़ेरे भोले, ज़ैना इला न बनान।

26 मुड्डां केरे ज़ीतो भोनेरे बारे मां, कुन तुसेई मूसेरी किताबी मां एन नई पढोरू ज़ैखन मूसे बलत् झैल्ल लाव, तैखन (यानी अबराहम, इसहाक त याकूब मरनेरे बडे सालना पत्ती) परमेशेरे मूसा सेई ज़ोवं, “अवं अबराहमेरो परमेशर, ते इसहाकेरो परमेशर, ते याकूबेरो परमेशर आई?”

† 12:13 फरीसी लोक सोचते थिये कि रोम-मुल्खेरे बड्डे राज़े जो चुंगी देनी गलत आए। ‡ 12:13 हेरोदेस राज़ेरे लोक सोचते थिये कि रोम-मुल्खेरे बड्डे राज़े जो चुंगी देनी ठीक आए।

27 परमेश्वर मुडदां केरो परमेश्वर नई, पन ज़ीतां केरो परमेश्वर आए<sup>S</sup>, एल्हेरेलेइ तुशशी सोच बिलकुल गलत आए।”

\*\*\*\*\*

(\*\*\*\*\* 22:34-40; \*\*\*\*\* 10:25-28)

28 तैखन शास्त्री लोकन मरां एक्की मैने एजतां यीशु ते सद्की लोकां केरि गलवात शुनी। तैस पतो ज़लो कि यीशुए तैनन् ठीक ज़ुवाब दित्तो, ते तैनी यीशु कां एइतां तैस पुच्छू, “परमेश्वरे सारे हुक्मन मरां बड़ो खास हुक्म को आए?”

29 यीशुए तैस ज़ुवाब दित्तो, “सारे हुक्मन मरां बड़ो खास हुक्म ई आए, जेन्चरां परमेश्वरी किताबी मां लिखोरूए कि, ‘हे इस्राएलेरे लोकव शुना, प्रभु इशशो परमेश्वर, अक्के प्रभु आए,

30 एन्हेरेलेइ प्रभु अपने परमेश्वरे सेइं तुस अपने सारे दिले सेइं, त अपनि सैरी जानी सेइं, त अपनि सैरी अक्ली सेइं, त अपनि सैरी ताकती सेइं प्यार केरा।’ ए बड़ो खास हुक्म आए।

31 तैसेरो ज़ेरो दुइयोवं बड़ो खास हुक्म ई भी आए कि, ‘तू अपने पेड़ोसन\* सेइं अपने बराबर प्यार केर।’ एन दूइ हुक्मन केरां होरो कोई भी बड्डो हुक्म नई।”

32 तैखन शास्त्री मैन्हु यीशु सेइं ज़ोवं, “हे गुरू, तीं बडू ठीक ज़ोवं! त तीं सज़ ज़ोवं कि परमेश्वर अक्के आए, ते तैसेरे अलावा होरो कोई नई।

33 त असेईं परमेश्वरे सेइं अपने सारे दिले सेइं, ते अपनि सैरी जानी सेइं, ते अपनि सैरी अक्ली सेइं, त अपनि सैरी ताकती सेइं प्यार कियोरो लोड़े। ते कने असेईं अपने पेड़ोसन सेइं अपने बराबर प्यार कियोरो लोड़े। जानवरां केरू बलिदान केरनू या होरि चीजां केरि चढ़तल चढ़ाने केरां भी बेधतां, एना दुइये हुक्मन मन्ने परमेश्वरे लेइ बड़े खास आन!”

34 ज़ैखन यीशुए हेरू कि तैनी अक्ली सेइं ज़ुवाब दित्तो, त तैनी तैस सेइं ज़ोवं, “तू परमेश्वरे राज़े मां दाखल भोने केरां दूर नई।” ते तैल्ला पत्ती, केन्ची यीशु किछ पुछ्नेरी हिम्मत न भोइ।

\*\*\*\*\*

(\*\*\*\*\* 22:41-46; \*\*\*\*\* 20:41-44)

35 मन्दरे मां शिक्षा देते बार यीशुए लोकन अक सवाल पुच्छो, “शास्त्री किजो ज़ोतन कि ज़ै मसीह आए, ते दाऊद-राज़ेरी औलादी मरां भोलो?

36 बड़े पेइले दाऊद राज़े एप्पू पवित्र आत्मार शक्ति सेइं एन्चरां ज़ोरू थियू कि, प्रभु परमेश्वरे मेरे प्रभु मसीहे सेइं ज़ोवं, ‘तू मेरे देइने पास बिश, ज़ांतगर कि अवं तेरे दुश्मन बिलकुल न हारेई।’

37 दाऊद राज़े त एप्पू मसीहेरे बारे मां एन ज़ोवं कि ‘तै मेरो प्रभु आए,’ फिरि मसीह तैसेरू मट्टू केन्चरां भोइ सकते?” त मैन्हु केरि भीड़ यीशुएरी गल्लां खुशी सेइं शुन्ती थी।

\*\*\*\*\*

(\*\*\*\*\* 23:1-36; \*\*\*\*\* 20:45-47)

38 यीशुए शिक्षा देते बार लोकन सेइं ज़ोवं, “शास्त्री लोकन केरां खबरदार राथ, ज़ैना लम्मे-लम्मे चोले लेइतां हन्ठन् च़ातन, ताके लोक समझन कि तैना बड़े धर्मी आन, त तैना च़ातन कि बज़ारन मां लोक असन बड़ी इज़्जती सेइं नमस्कार केरन।

39 त कने प्रार्थना घरन मां बड़े खास मैन्हु केरे लेइ रख्वोरी कुर्सी पुड़ बिशन् च़ातन, त धामन मां भी गेइतां बड़े खास मैन्हु केरे लेइ रख्वोरी कुर्सी पुड़ बिशन् च़ातन।

40 तैना विधवां केरे घरन लुटतन त कने होरि मैन्न हिरानेरे लेइ लेम्मी-लेम्मी प्रार्थना केरतन, ताके लोक समझन कि तैना बड़े धर्मी आन। परमेश्वर तैनन् बड़ी जादे सज़ा देलो!”

<sup>S</sup> 12:27 किजोकि ज़ैना इस धरती पुड़ मेरि गातन, तैना परमेश्वरे सेइं साथी ज़ीते भोइ गानेन! एस सेइं एन सावत भोते कि परमेश्वर लोकन मुडदन मरां ज़ीतो केरेलो। \* 12:31 पड़ोसी सेइं: मतलब कि होरे सारे मैन्न सेइं प्यार केरनोए।







28 तैल्ला पत्ती, यीशुए तैन सेइं ज़ोवं, “फ़ेगोरे बुटेरे मिसाले केरां अक सबक शिख्वा! ज़ैखन तैसेरी डैलडी नरम भोइतां, त नंब्वां पट्लां निस्ने लगतन, ते तुस बुज्झी छड्इतथ कि गेमेंरो मौसम एजनेवालो आए।

29 एसेरो ज़ेरो, ज़ैखन तुस एना गल्लां, ज़ैना मीं ज़ोई, भोते हेरेले, त तुस बुज्झी छड्इडा कि मैनेरू मट्टू, यानी अवं बडे नेडे पुज्जोरोई।

30 अवं तुसन सेइं सत्र ज़ोतई कि ज़ांतगर एना सैरी गल्लां न भोली, तांतगर एना लोक, ज़ैना हुन्ना ज़ीतेन, तैना न मरेले।

31 अम्बर त कने धरती टेली गाली, पन मेरी गल्लां कधी न टेलेली।”

~~~~~  
(~~~~~ 24:36-44)

32 तैल्ला पत्ती, यीशुए तैन सेइं ज़ोवं, “मेरे वापस एजनेरे दिहाड़ेरे बारे मां, या तैस वक्तेरे बारे मां कोई भी न ज़ाने कि ते कताली भोलो, स्वर्गेरे स्वर्गदूते भी न ज़ानन् त परमेशेरू मट्टू यानी अवं भी न ज़ैनी, पन सिर्फ मेरो बाजी परमेशर ज़ानते।

33 एल्हेरेलेइ, मेरे वापस एजनेरे लेइ हमेशा तियार राथ, ते प्रार्थना केरते राथ, किजोकि तुस न ज़ानथ कि ते वक्त कताली एज्जलो।

34 मैनेरे मट्टेरू, यानी मेरू वापस एजन् तैस मैनेरू ज़ेरू आए, ज़ै अपनू घर छेडतां होंरे मुल्ले जो गाते। गाने केरां पेइले, तै अपने नौकरन कुजेइतां अपने घरेरी रखवाली केरनेरो अधिकार देते, ते हर एककी अपनू-अपनू कम देते, त दारे पुड रखवाली केरनेरे लेइ संतरी बींझो रानेरो हुक्म भी देते, किजोकि ते कधी भी वापस एज्जी सकते।”

35 “एसेरे ज़ेरे, तुस भी हमेशा मेरे वापस एजनेरे लेइ तियार राथ, किजोकि तुस न ज़ानथ कि घरेरो मालिक यानी अवं कताली वापस एज्जेलो। शायद इलोझी या एध्धी राती या कुकड़ेरे बांग देनेरे मौके या झेज्झां।

36 एल्हेरेलेइ तियार राथ! एरू न भोए कि अवं अचानक एइतां लेई कि तुस तियार नई।

37 ज़ैन अवं तुसन सेइं ज़ोतई, तैन्ने सारे मैनन् सेइं भी ज़ोतई कि, ‘हमेशा तियार राथ!’”

14

~~~~~  
(~~~~~ 26:1-5; ~~~~~ 22:1-2; ~~~~~ 11:45-53)

1 फ़सहेरू तिहार त कने अखमीरी रोट्टारू तिहार दई दिहाइन पत्ती एजनेवालां थियां। प्रधान याजक त कने शास्त्री मौको तोपने लगगोरे थिये कि अस यीशु केन्चरां चुपचारे ट्लाम ते तैस मैरी छड्इडम।

2 पन तैनेई एप्पू मामेइं ज़ोवं कि, “अस तिहारोरे दिहाइन मां यीशुए कैद न केरम, किजोकि तैन दिहाइन मां बडे लोक च़ेवरे पासन भोतन, ते एरू न भोए कि यीशुएरे कैद भोनेरे वजाई सेइं लोकन मां दंगोफसाद भोइ गाए।”

~~~~~  
(~~~~~ 26:6-13; ~~~~~ 12:1-8)

3 यीशु बैतनिय्याह इलोव्वे मां शमोन नंब्बेरे मैनेरे घरे मां थियो, ज़ैस पेइले कोद्रेरो रोग थियो। ज़ैखन यीशु तेई रोट्टी खेइ राओरो थियो, त तैखन अक कुआन्श संगमरमेरे सेइं बनोरे भांडे मां इत्र एन्तां यीशु कां आई, ज़ै बड़ी कीमती थियो त कने ज़ैस जो जटाभासी ज़ोतन। तैसां ते इत्र बोतल टलोइतां खोल्ली ते यीशुएरी इज्जत केरनेरे लेइ तैसेरे दोगगे पुड इत्र उलटव।

4 पन किछ् मैन्हु, ज़ैना तेई खडे थिये, तैस कुआन्शी हेरतां अपने दिले मां सेरकोइतां एप्पू मामेइं जोने लगगे, “ए कुआन्श किजो एस बड़ी कीमतारो इत्र ज़ाया केरचे?”

5 ए इतर त एक्की सालेरी मजदूदारे पेंडसन केरां भी जादे भाए मां बेचतां, ते तैना पेंडसे गरीब मैनन् देइ सकती थी!" ते तैना सेरकोइतां तैस सेइं डांटने लगगे ।

6 पन यीशुए तैन सेइं ज़ोवं, "एस छेइडी देथ! एस किजो तंग केरतथ? एसां त मीं सेइं भलाई कियोरीए ।

7 गरीब मैन्हु त हमेशा तुसन सेइं साथी रातन । ज़ैखन भी तुस चाथ, तैखन तैन सेइं भलाई केरि सकतथ, पन अवं तुसन सेइं साथी हमेशा न रालो ।

8 ज़ैन किछ ए कुआन्श केरि सकती थी, तैन एसां कियूं । एसां मेरी जानी पुइ खुशबूदार तेल लेइतां मेरे मरनेरां पेइली मेरी जान दबनेरे लेइं तियार कियोरीए ।

9 अवं तुसन सेइं सत्र ज़ोतई कि सैरी दुनियाई मां ज़ेड़ी कोन्वी मेरे बारे मां खुशखबरी लोकन शुनाई गाली, तैड़ी ज़ैन कम एसां मीं सेइं कियोरूए तैन भी एसेरी यादी मां ज़ोवं गालू ।"

~~~~~

(~~~~~ 26:14-16; ~~~~~ 22:3-6)

10 तैल्ला पत्ती, यहूदा इस्करियोती, ज़ै 12 चेलन मरां अक थियो, प्रधान याजकन कां जेव कि तै यीशु ट्लुवानेरे लेइ तैन केरि मद्दत केरे ।

11 एन शुन्तां तैना बडे खुश भोए, ते तैसेरे मद्दतरे लेइ तैनेई चैंदेरे रुपइये देनेरो वादो कियो । एल्हेरेलेइ, तै ठीक मौके बलगने लगगे कि यीशु केन्चरां सेइं ट्लुवाए ।

~~~~~

(~~~~~ 26:17-25; ~~~~~ 22:7-14,21-23; ~~~~~ 13:21-30)

12 अखमीरी रोट्टारे तिहारेरी पेइली दिहाड़ी, ज़ैखन लोक फ़सहेरे तिहारेरे गवडे वलिदान केरते थिये, तैखन यीशुएरे चलेई तैस पुच्छू, "तू कोडि चातस कि अस गेइतां तेरे लेइ फ़सह तिहारेरी रोट्टी तियार केरम?"

13 तैखन यीशुए अपने दई चले एन ज़ोइतां भेजे, "यरूशलेम नगरे मां गाथ, ते अक मैन्हु तुसन पैनेरो घडो छुवोरो मैलेलो, तैस पत्ती-पत्ती गेइयथ ।

14 ते तै ज़ैस घरे मां गालो, तैस घरेरे मालिके सेइं तुस एन ज़ोइयथ कि, इश्शे गुरे ज़ोवरूए कि, भेरे लेइ तियार कियोरो मेहमान कमरो कोडि आए, ज़ेड़ी अवं अपने चेलन सेइं साथी फ़सह तिहारेरी रोट्टी खेइ?"

15 तैखन घरेरो मालिक तुसन दुइयोवं छती पुइ, तियार कियोरो, अक बड्डो कमरो हिरालो । तैड़ी इश्शे लेइ रोट्टी तियार केरथ ।"

16 ते चले तैट्टां निस्तां नगरे मां आए, त ज़ेन्चरां यीशुए तैन सेइं ज़ोरू थियूं, तेन्चरां तैनेई लावं । ते तैनेई फ़सह तिहारेरी रोट्टी तियार की ।

~~~~~

17 ज़ैखन इलोझ भोइ, त यीशु अपने 12 चेलन सेइं साथी मेहमान कमरे मां अव ।

18 ज़ैखन तैना बिश्तां रोट्टी खेइ राओरे थिये, त यीशुए तैन सेइं ज़ोवं, "अवं तुसन सेइं सत्र ज़ोतई कि तुसन मरां अक, ज़ै मीं सेइं साथी रोट्टी खेइ राओरोए, मीं धोखे सेइं ट्लुवालो ।"

19 एन शुन्तां तैना सारे चले उदास भोए, ते तैना अक-अक केरतां यीशु सेइं पुछने लगगे, "कुन अवं आई? कुन अवं आई?"

20 यीशुए तैन सेइं ज़ोवं, "तै तुसन बारहन मरां अक आए, ज़ै मीं सेइं साथी बिश्तां इश्शी एक्की थैली मां रोट्टी खेइ राओरोए ।

21 जेन्चरां मैनेरू मट्टू यानी मेरे बारे मां परमेशेरी किताबी मां लिखोरूए, तेन्चरां अवं मारो गानोई। अफ्रसोस! (किजोकि तैस मैन्हु बड़ी सज़ा मैल्लनीए एजने बालीए) जेसेरे वजाई सेइं मैनेरू मट्टू यानी अवं ट्लुवाव गानोई! अगर तै मैन्हु ज़रमोरो न भोथो, त तैसेरे लेई तैन भलू थियू।”

~~~~~

(~~~~~ 26:26-30; ~~~~~ 22:14-20; 1 ~~~~~ 11:23-25)

22 ज़ैखन यीशु त तैसेरे चले फ़सहेरी रोट्टी खेइ राओरे थिये, यीशुए अक रोट्टी ट्लेइतां परमेशेरू शुक्र करतां ट्लोडी। तैल्ला पत्ती, तैनी तै अपने चलन दित्ती, ते तैन सेइं ज़ोव, “ट्लाथ ते खाथ। ई मेरो ज़िसम आए।”

23 फिरी यीशुए दाछारे रस्सेरो कटोरो ट्लेइतां परमेशेरू शुक्र कियू। तैल्ला पत्ती, तैनी तै अपने चलन दित्तो, ते तैनेई सैरेई पियो।

24 तैखन तैनी तैन सेइं ज़ोव, “ए दाछारे रस मेरो खून आए, ज़ै परमेशर त कने लोकां केरे मझाटे नव्वों करार बनाते, ज़ै बडे लोकां केरे मैफारे लेइ बगाव गालो।

25 अवं तुसन सेइं सन्न ज़ोतई कि अवं दाछारे रस तैस दिहाडी तगर फिरी कधी न पीलो, ज़ांतगर परमेशेरे राज़े मां अवं नव्वो दाछारे रस पीं।

26 तैल्ला पत्ती, यीशु त कने तैसेरे चले परमेशेरू भजन ज़ोइतां, यरूशलम नगरेरे बेइर ज़ैतून नव्वेरे पहेडी पुड ब्रले जे।”

~~~~~

(~~~~~ 26:31-35; ~~~~~ 22:31-34; ~~~~~ 13:36-38)

27 तैखन यीशुए अपने चलन सेइं ज़ोव, “तुस सारे मीं छेइतां नशशेले, किजोकि परमेशेरी किताबी मां लिखोरू कि, ‘अवं पुहाले मैरेलो ते तैसेरी भैडडां इरां उरां नेशशी गाली।’

28 पन अवं मेरतां मुडदन मरां फिरी ज़ीतो भोनोई। तैल्ला पत्ती, अवं तुसन केरां पेइले गलील इलाके जो गालो त तैडी तुस मीं लाएले।”

29 तैखन पतरसे यीशु सेइं ज़ोव, “अगर सारे तीं छेइतां नशशेले त नशशन, पन अवं कधे न नेशशेलो।”

30 यीशुए पतरसे सेइं ज़ोव, “अवं तीं सेइं सन्न ज़ोतई कि अज़्जेरी राती कुकड़ेरे दूई बार बांग देने केरां पेइले, तू टलाई बार मेरो इन्कार केरेलो कि तू मीं न ज़ानस।”

31 पन पतरसे मना ज़ोरे सेइं यीशु सेइं ज़ोने लगो, “अगर मीं तीं सेइं साथी मरनू भी पे, त फिरी भी अवं तेरो इन्कार कधी न केरेलो।” एन्चरां होरि चलेई भी ज़ोव।

~~~~~

(~~~~~ 26:36-46; ~~~~~ 22:39-46)

32 तैल्ला पत्ती, यीशु ते तैसेरे चले गतसमनी नव्वेरे एक्की बागी मां जे, ते तैडी यीशुए अपने किछु चलन सेइं ज़ोव, “इडी बिशशोरे राथ, ज़ां तगर अवं प्रार्थना न केरि।”

33 फिरी यीशुए पतरस ते याकूब ते यूहन्ना एण्पू सेइं साथी बागी मां अगगर निये, ते तैडी तै बडे परेशान भोने ते कने घबराने लगो।

34 ते तैखन यीशुए तैन सेइं ज़ोव, “मेरो दिल बडो उदास आए, इडी तगर कि अवं मरनेबालोई। तुस इडी बलगा, ते बीझे राथ।”

35 फिरी तै बागी मां थोडो ज़ेरे अगगर गेइतां, तल्ले मां ज़ैन्धु केरे भारे बिशतां प्रार्थना करने लगो कि अगर भोइ सके त ए दुखखेरी घडी मीं पुडरां टेली गाए।

36 ते तैनी प्रार्थनाई मां एन ज़ोव, “बैपू! हे मेरे बाजी, तुसन केरां सब किछु भोइ सकते। एस दुखखेरो कटोरो मीं केरां दूर केरा। फिरी भी ज़ैन अवं चाताई तैन नई, पन ज़ैन तुस चातथ तैन्ने भोए।”

55 मेहलेरे अन्तर, प्रधान याजक त कने सारी महासभा यीशुएरे खलाफ गवाही तोपनेरी कोशिश केरि राओरे थिये, ताके तैना तैस मैरी सकन, पन तैनन् किछ् न मैल्लू ।

56 किजोकि बडे मैन्हु यीशु पुड झूठी गवाही देने लगगोरे थिये, पन तैन केरि गवाही अक्कां जेरि न थी ।

57 आखरी मां किछ् मैनेई उठतां तैसेरे खलाफ ई झूठी गवाही दित्ती कि,

58 “असेई एस केरां एन ज्रोते शुनेरू कि, ‘अवं मैन्हु केरू बनोरू एस मन्दरे विछोडतां ट्लेइ दिहाइन मां होरू मन्दर बनालो, जैन मैन्हु केरू बनोरू न भोल् ।’”

59 पन एन ज्रोइतां भी तैन केरि गवाही अक्कां जेरि न निस्सी ।

60 तैखन महायाजके आदालतेरे मझाटे खडे भोइतां यीशु पुञ्छ्, “एना लोक तेरे खलाफ गवाही देतन, कुन तू कोई जुवाब नई देस?”

61 पन यीशु चुप राव, ते किछ् जुवाब न दित्तो । तैखन महायाजके तैस फिरी पुञ्छ्, “कुन तू परमेशेरू मट्टू मसीह आस?”

62 यीशुए ज्रोवं, “हाँ, अवं तै आई । ते जेन्चरां परमेशेरी कितावी मां लिखोरू कि ‘तुस सारे लोक, मैनेरू मट्टू (यानी मीं) सर्वशक्तिमान परमेशेरी देइने पासे बिश्शोरे त अम्बरे मरां विदलारे सेइ साथी धरती पुड एजते हेरेले ।’”

63 तैखन महायाजके सेरकोइतां, अपना चोगो छिन्दतां आदालतेरे मैनन् सेइ ज्रोवं, “हुनी असन होरि केन्चेरी गवाहेरी ज़रूरत नई!

64 तुसेई एप्पू परमेशेरी तुहीन शुनी! ते तुस एसेरो कुन फैसलो केरतथ?” तैखन तैनेई सारे मैनेई ज्रोवं कि, “ए मैन्हु दोषी आए किजोकि एनी परमेशेरी तुहीन की, एल्हेरेलेइ, एस मौतरी सज़ा दे ।”

65 तैखन तैन मरां किछ् मैन्हु, तैसेरी बेज्रती केरनेरे लेइ, तैस पुड थुकने लगगे । ते किछ् मैन्हु तैसेरी एछ्छी लिगडे सेइ ढेकतां तैस मुक्केई बाने लगगे ते तैस सेइ ज़ोने लगगे, “भविष्यवाणी केर कि केनि तीं बाई ।” ते नौकरेई भी तैस ट्लेइतां थप्पड बाए ।

26:69-75; 22:56-62; 18:15-18,25-27

(26:69-75; 22:56-62; 18:15-18,25-27)

66 ज़ैखन पतरस, महायाजकेरे महलेरे अंगने मां थियो, त महायाजकेरे नौकरेनन मरां अक कुआन्श तैड़ी आई ।

67 तैसां पतरस अग तपतो लाव । ते तै कुआन्श पतरस तेकतां तैस सेइ ज़ोने लगगी, “तू भी एस नासरत नगरेरो यीशु सेइ साथी थियो ।”

68 पन पतरसे यीशुएरो इन्कार कियो ते ज़ोवं, “अवं न ज़ैनी ते न सेमझी कि तू कुन लगोरिस ज़ोने ।” फिरी तै तैट्टां बेइर डेवढी मां जेव । तैखन कुकडे बांग दित्ती ।

69 ज़ैखन तैसां नौकरेनां फिरी पतरस लव, त तै तैन सेइ, ज़ैना नेडे खडे थिये, ज़ोने लगगी, “ए मैन्हु तैसेरे चलन मरां अक आए!”

70 पन पतरसे फिरी यीशुएरो इन्कार कियो ।

थोडे च़िरे बाद, ज़ैना पतरसेरे नेडे खडे थिये, तैनेई तैस सेइ ज़ोवं, “पक्को तू भी तैसेरे चलन मरां अक आस, किजोकि तू गलील इलाकेरो मैन्हु भी आस ।”

71 तैखन पतरस कसम केरतां ज़ोने लगो, “मीं फिटकार लगगे, अगर अवं झूठ ज़ोई कि अवं एस मैन्हु ज़ानतो भोई, ज़ेसरे बारे मां तुस गल्लां केरने लगगोरेथ!”

72 तैखन अकदम दुइयोवं बार कुकडे बांग दित्ती । ज़ै गल यीशुए पतरसे सेइ पेइली ज़ोरी थी, तै गल तैस याद आई कि, “कुकड़ेरे दूई बार बांग देने केरां पेइले तू ट्लाई बार मेरो इन्कार केरलो कि तू मीं न ज़ानस ।” तैखन तैनी बड़ी लेरां दित्ती, किजोकि तैनी यीशुएरो इन्कार केरनेरे वजाई सेइ बडो दुखी भोव ।

17 तैखन तैनेई यीशुएरो मज्जाक बनानेरे लेइ तैसेरां लिगडां खोल्लां, ते तैस लाल रंगेरो चोलो लुवाव ते कने कंटां केरू ताज बनेइतां तैसेरे दोग्गे पुड़ रख्वू।

18 ते एन ज्ञाने लग्गे कि, “हे यहूदी केरा राज्जा, नमस्कार!”

19 तैना यीशुएरे दोग्गे पुड़ अक्केरे पत्ती अक केरतां सोटी सेइ बाने लग्गे, ते तैसेरी बेजती केरनेरे लेइ तैस पुड़ थुकने लग्गे, ते मज्जाक बनानेरे लेइ तैसेरे अग्गर जैन्धु केरे भारे विशतां तैस नमस्कार करते राए।

20 तैसेरो मज्जाक बनानेरे पत्ती, तैनेई तैस पुड़ेरां लाल रंगेरो चोगो खोलतां तैसेरां लिगडां लुवां। तैखन तैना यीशु कर्से पुड़ चादनेरे लेइ यरूशलेमेरे नगरे केरां बेइर नीयो।

~~~~~

(~~~~~ 27:32-44; ~~~~~ 23:26-43; ~~~~~ 19:17-27)

21 जताली तैना तैटटां ज़ेलि राओरे थियो, त तैखन शमौन नंवेरो मैन्हु इलांवेरां तैलमेइ एज्जी राओरो थियो। तै मैन्हु कुरेनी नंवेरे नगरेरां ओरो थियो ते तै सिकन्दर ते कने रूफुसेरो बाजी थियो। तैखन सिपाहेई शमौन मजबूर कियो कि तै यीशुएरे लेइ तैसेरी कर्से छुइतां ज़ले।

22 ते तैनेई यीशु गुलगुता नंवेरी टैरी पुड़ आनो, जेसेरो मतलब “खोपडारी टार” आए।

23 फिरी किछ लोकई मुरं नंवेरी दवाई, दाछ्छारे रस्से मां मिलेइतां यीशु पीने जो दिती†, पन तैनी तैसेरो इन्कार केरतां न पी।

24 तैखन तैनेई यीशु कर्से पुड़ चादो ते तैसेरां लिगडां केरे लेइ पेरची छेइडी कि तैसेरां लिगडां केस मैलतन। तैल्ला पत्ती, तैनेई तैसेरां लिगडां बन्टी छेइडां।

25 जैखन तैनेई तै कर्से पुड़ चादो, तैखन झेज्जेरे नौ बज्जारे थियो।

26 ते एककी फेटटी पुड़ तैसेरी सज्जारी बजा लिखतां तैसेरे क्रोडी केरां बां लेइ छेइडी। तैस मां लिखोरू थियू कि, “ए यहूदी लोकां केरो राज्जो आए।”

27 सिपाहेई यीशु सेइ साथी हारे दई डैकू भी, अक तैसेरे देइने पासे ते अक तैसेरे बाए पासे अलग-अलग कर्सेन पुड़ चादो।

28 तैखन परमेशेरी किताबी मां लिखोरी गल पूरी भोइ। तैस मां मसीहेरे बारे मां एरू लिखोरू थियू कि, “ते पापी मैन्हु केरे साथी गनो गालो।”

29 तैखन बत्तां ज़लनेवालन मरां किछ मैन्हु अपनि क्रोडी हिलेइ-हिलेइतां ते कने एन ज़ोइतां तैसेरी तुहीन करते थियो कि, “वाह! वाह! मन्दर बिछोइनेवालो, त कने टलेइ दिहाइन मां बनानेवालो!”

30 अगर तू शक्तिशाली आस त कर्से पुड़ेरां ओस्तां अपने आपे बच्चा!”

31 एन्चरां प्रधान याजक भी शास्त्री लोकिन सेइ साथी तैसेरो मज्जाक बनेइ राओरे थियो, त तैना एप्पू मामेइ ज़ोते थियो कि, “एनी हारे मैन्हु त बच्चाए, पन अपने आपे बच्चेइ न सको।

32 ए ज़ोरो थियो कि ‘अवं इस्राएल लोकां केरो राज्जो आई, यानी मसीह आई,’ अगर ए गल सज्ज आए त हुन्ना कर्से पुड़ेरां ओस्स, ताके अस हेरतां विश्वास केरम कि ए इश्शो राज्जो आए।” त दई डैकू, जैना तैस सेइ साथी कर्से पुड़ चादोरे थियो, तैनेई भी तैसेरी बेजती की।

~~~~~

(~~~~~ 27:45-56; ~~~~~ 23:44-49; ~~~~~ 19:28-30)

33 दीसारे बारे बज्जेई सारे मुल्खे मां आंधरू भोवं, ते टलेइ बज्जन तगर रावं।

34 टलेइ बज्जेई यीशुए बडी ज़ोरे सेइ अपनि बोली मां ज़ोवं कि, “इलोई, इलोई, लमा शबक्तनी!” जेसेरू मतलब, “हे मेरे परमेशर, हे मेरे परमेशर, तीं किजो अवं छेइडी दित्तो!”

† 15:23 मुरं नंवेरी दवाई दाछ्छारे रस्से मां मिलेइतां तैस पीनेरे लेइ देतन, ताके तैसेरो दुख घट भोइ गाए।

35 तैखन जैना तैड़ी नेडे खडे थिये, तैन मरां किछ मैनेई एन शुन्तां गलत सेमझतां एप्पू मांमेइं ज़ोवं, “हेरा, ए मैन्हु एलिय्याहे जो मद्दत केरनेरे लेइ कुजेई राओरो ए।”

36 तैखन तैन मरां एक्की मैने दौड़तां स्पन्जे (जै पेनेरी ज़ेरि चीज़ चूसी सकचे) खट्टे दाछारे रस्से मां डुबेइतां डांगी पुड़ रेखतां यीशु जो चुसावं त ज़ोवं, “बलगा, हेरम, एलिय्याह एस क़रूसे पुड़ेरां उसालने एजते कि नई।”

37 तैखन यीशुए बडे ज़ोरे सेइं आवाज़ देइतां प्राण दित्ते।

38 ते तैखन मोट्टो पर्दो, जै मन्दरे मां लोरो थियो, बां देता बुन तगर फेटतां दूई टुकडे भोइ जे।

39 ज़ैखन फौजी-अफसर, जै यीशुएरे सामने खडो थियो, यीशु एन्चरां ज़ोरे सेइं आवाज़ देइतां प्राण देतो लाव, तैखन तैनी ज़ोवं, “सच्चे, ए मैन्हु परमेशेरेरू मट्टू थियूं!”

40 किछ कुआन्शां भी दूरेरां एन हेरी राओरी थी। तैन मां मगदलीन नगरेरी मरियम, निकडो याकूब ते योसेसेरी अम्मा मरियम, त कने सलोमी भी थी।

41 ज़ैखन यीशु गलील इलाके मां थियो, त तैखन एना कुआन्शां तैस पत्ती-पत्ती चेलती थी त तैसेरी सेवा केरती थी। त तैड़ी होरि भी बड़ी कुआन्शां थी, जैना तैस सेइं साथी गलील इलाके मरां यरूशलेम नगरे मां ओरी थी।

ⓂⓂⓂⓂ ⓂⓂⓂⓂⓂ ⓂⓂⓂⓂⓂⓂ ⓂⓂⓂ ⓂⓂⓂⓂ

(ⓂⓂⓂⓂⓂ 27:57-61; ⓂⓂⓂⓂ 23:50-56; ⓂⓂⓂⓂⓂⓂⓂ 19:38-42)

42 ज़ैखन इलोझ भोइ, ते एल्हेरेलेइ कि तै तिहारेरी दिहाड़ी थी, यानी आरामेरे दिहाड़ेरे पेइली दिहाड़ी ज़ैखन लोक आरामेरी दिहाड़ेरे लेइ तियार भोते थिये, त तैखन

43 अरिमतियाह नगरेरो रानेबालो यूसुफ नंब्वेरो मैन्हु तैड़ी अव, जै यहूदी लोकां केरे बड्डे आदालतेरे खास मैनन् मरां अक थियो। तै एप्पू भी परमेशेरेरे राज्जे बलगने लोरो थियो। तै मैन्हु हिम्मत केरतां गवर्नर पिलातुसे कां जेव ते यीशुएरी लाश मग्गी, ताके तै तैस दबनेरे लेइ ने।

44 तैखन पिलातुस हैरान भोव कि केन्चरां तै एत्रि लूशी मेरि जेव। त तैनी फौजी-अफसर कुजेइतां पुच्छे, “कुन तै मेरि जोरोए?”

45 ज़ैखन तैनी फौजी-अफसरे केरां हाल ज़ानो कि यीशु सच्चे मेरि जेव, त तैनी यूसुफे लाश नेनेरी अज़ाज़त दिती।

46 तैखन यूसुफे अक कीमती लिगड घिन्नु ते यीशुएरी लाश क़रूसे पुड़ेरां ओसैलतां यहूदी लोकां केरि रसमेरे मुताबिक तैस लिगडे मां पलेटतां एक्की कबरी मां छेइडी, जै पहैड़ी पुड़ एक्की घोडे मां घडोरी थी। त तैस कबरेरे बेइर दारे पुड़ अक बड्डो घोड़ घिसेइतां छेइडो।

47 मगदलीन इलव्वेरी मरियम, ते योसेसेरी अम्मा मरियम, एना दुइये हेरी राओरी थी कि यीशुएरी लाश कोड़ि रखतन।

16

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂ ⓂⓂⓂⓂ ⓂⓂⓂⓂⓂⓂ ⓂⓂⓂⓂ

(ⓂⓂⓂⓂⓂ 28:1-8; ⓂⓂⓂⓂ 24:1-12; ⓂⓂⓂⓂⓂⓂⓂ 20:1-10)

1 होरसां इलोझी, ज़ैखन आरामेरी दिहाड़ी खतम भोरी थी, त तैखन मगदलीन इलव्वेरी मरियम, त कने याकूबेरी अम्मा मरियम, त कने सलोमी, एन सेब्भेई रोड़ी मुशकी बालो तेल आनो, ताके यहूदी लोकां केरि रसमेरे मुताबिक यीशुएरी लाशी पुड़ तेल लान।

2 हफतेरे पेइले दिहाडे झेज्जां-झेज्जां, ज़ैखन मसां दिहाड़ो निस्सी राओरो थियो, त तैना कबरी कां जेई ज़ैस मां यीशुएरी लाश रखोरि थी।

3 तैखन तैना एप्पू मांमेइं ज़ोती थी, “इश्शे लेइ कबरेरे दारे पुड़ेरां घोड़ कौन गिसालो?”

4 किजोकि तै घोड़ बडो बड्डो थियो। पन तैड़ी पुज़नेरे बाद, तैनेई कबरेरे पासे उव्री तक्कू त हेरू कि घोड़ पेइलो कबरेरे दारे पुड़ेरां गिस्सोरो थियो।

5 तैनेई कबरेरे अन्तर गेइतां अक जवान* लाव ते तैना बेड़ि हैरान भोइ जेई। तैस छिऱ्तां लिगइं लैगगोरां थियां, ते तैड़ी तैन केरे सिध्धे पासे विश्शोरो थियो।

6 तैनी जवाने तैन सेइं ज़ोवं, “डरा न, अवं ज़ानताई कि तुस नासरत नगरेरे यीशु तोप्पी राओरिथ, ज़ै करूसे पुड़ ज़ादरो थियो। तै मुइदन मरां ज़ीतो भोरोए। तै इड़ी नई। हेरा, ई तैए ठार आए, ज़ेड़ी तैसेरी लाश रख्वोरी थी।

7 पन तुस गेइतां तैसेरे चेलन सेइं त कने पतरसे सेइं भी ज़ोइयथ कि यीशु तुसन करां पेइलो गलील इलाके जो गालो। ज़ेन्चरां तैनी पेइलू तुसन सेइं ज़ोरु थियूं, तेन्चरां तुस तैस तैड़ी लाले।”

8 तैना कुअन्शां कबरी मरां बेइर निस्तां तैट्टां नेश्शी जेई, किजोकि तैनन् थर्क लगगोरी त घेबोरी थी। वत्तां तैनेई केन्वी सेइं किछ्च न ज़ोवं, किजोकि तैना डेर्री थी।

~~~~~
 (मरकुस 28:9-10; मरकुस 20:11-18)

9 हफ्तरे पेइले दिहाड़े झेज्ज भोते, यीशु मुइदन मरां ज़ीतो भोइतां पेइले मगदलीन नगरेरी मरियमी लेइहोव, ज़ैस मरां तैनी पेइलां सत भूतां केरो सायो कइडोरो थियो।

10 मरियमां यीशु लानेरे पत्ती, गेइतां तैसेरे चेलन खबर दित्ती, ज़ैना यीशुएरे लेइ शोग केरेने लगगोरे ते कने लेरां देने लगगोरे थियो।

11 पन ज़ैखन तैनेई तैसारी गल शुनी कि यीशु फिरी ज़ीतो भोरोए ते तैसां लेवरोए, त तैनेई तैसारी गल्ली पुड़ याकीन न कियूं।

~~~~~
 (मरकुस 24:13-35)

12 तैल्ला पत्ती, यीशु अपने चेलन मरां दूई चेलन होरि रूपे मां लेइहोव, ज़ैखन तैना (यरूशलेम) नगरेरां अपने इलावे जो च़लारे थियो।

13 तैखन तैनेई भी नगरे वापस एजतां यीशुएरे होरे चेलन खबर दित्ती, पन तैनेई तैन केरि गल्लारो भी विश्वास न कियो।

~~~~~
 (मरकुस 28:16-20; मरकुस 24:36-49; मरकुस 20:19-23; मरकुस 1:6-8)

14 तैल्ला पत्ती, यीशु अपने 11 चेलन भी लेइहोव, ज़ैखन तैना रोट्टी खेइ राओरे थियो। त तैन केरे अविश्वास त कने सखत दिलेरे वजाई सेइं यीशुए तैना डांटे, किजोकि तैनेई तैन केरो विश्वास न कियो, ज़ैनेई यीशु ज़ीतो भोनेरे पत्ती तै लेवरो थियो।

15 यीशुए अपने चेलन ज़ोवं, “तुस सैरी दुनियाई मां गेइतां सारे लोकन मेरे वारे मां खुशखबरी शुनाथ।

16 ज़ै कोई मीं पुड़ विश्वास केरे ते बपतिस्मो ने, तैस पापां केरि सज़ाई करां मुक्ति मैलेली। पन ज़ै कोई विश्वास न केरे, तैस अपने पापां केरि सज़ा मैलेली।

17 ज़ैना मीं पुड़ विश्वास केरतन, तैना एरां चमत्कारेरां कम्मां (निशाना) केरले कि तैना मेरे नंवे सेइं लोकन मरां भूतां केरो सायो कढेले, ते नंवी-नंवी बोली केरले।

18 ते अगर तैना ज़ेहरीले सप्पन टलाले त कने ज़ेहरीली चीज़ भी पीले, तांभी तैनन् किछ्च नुकसान न भोलो। ते ज़ैखन तैना बिमारन पुड़ हथ रख्वेले, ते तैना बेज्जोइ गाले।”

~~~~~
 (मरकुस 24:50-53; मरकुस 1:9-11)

19 यीशु अपने चेलन सेइं गल्लां केरनेरां पत्ती, परमेशरे तै स्वर्गे जो नीयो। ते यीशु परमेशरेरे देइने पासे राज़गेदी पुड़ बिश्शी जेव।

20 ते यीशुएरे चेलेई बेइर हर जगाई गेइतां लोकन खुशखबरी शुनाने लगगे। ते प्रभु तैन सेइं साथी कम केरतो राव। तैना चमत्कारेरां कम्मां (निशानन) केरे ज़िरिये, ज़ैना साथी-साथी भोतां थियां, प्रभु सावत केरतो राव कि तैन केरि गल्लां सज़ आन। आमीन।

* 16:5 तै जवान मैन्हु स्वर्गदूत थियो

लूका

१-२ जनाव धियुफिलुस, बडे लोकेई तैना गल्लां हेरी जैना प्रभु-यीशुए कियोरी थी, जैखन ते असन सेइं साथी थियो, जेइसेरां तैनी अपनू सेवारू कम शुरू कियोरू थियूं। तैन मैनेई होरि मैनन् यीशुएरे बारे मां शिक्षा देइतां परमेशेरी सेवा की। बडे मैनेई तैन केरि गल्लां शुन्तां यीशुएरे बारे मां इशशे लेइ इतिहासेरी किताब लिखी।

३मीं एप्पू तैन सैरी गल्लां केरि बडे रोडेचारे छानवीन की। एल्हेरेलेइ, मीं एन रोडू लगगू, कि अवं भी तुशशे लेइ तैन गल्लां केरे बारे मां ठीक डंगे सेइं इतिहासेरी किताब लिखी।

४अवं चाताई कि तीं पतो लगगे कि यीशुएरे बारे मां तैना गल्लां सच्चि आन, जैन केरे बारे मां तुसन शिक्षा मैल्लोरी थी।

५यहूदिया इलाके मां, जैखन हेरोदेस राजो राज करतो थियो, त तैखन जकर्याह नंवेरो अक यहूदी याजक* थियो। तै मैन्हु याजकां केरे टोली मां अबिय्याह नंवेरो टोली मरां थियो। तैसेरी कुआन्शारू नंव एलीशिवा थियूं। एलीशिवा हारूनेरे खानवेनी मरां थी, (हारून इस्राएल लोकां केरो पेइलो याजक थियो)।

६तैना दुइये प्रभु-परमेशेरी नजरी मां धर्मी थियां ते कने परमेशेरे सारे कानून ते सारे हुक्मन पुड बेइलजाम च्लनेबालां थियां।

७पन तैन केरि कोई औलाद न थी, किजोकि एलीशिवा बाँझ थी, ते तैना दुइये बुढां थियां।

८एक्की फेरे, जकर्याहेरी टोली यरूशलेम नगरेरे मन्दरे मां सेवारू कम केरि राओरे थी, तैखन तै प्रभु परमेशेरी हजरी मां अपनू याजकेरू कम लोगोरो थियो केरने।

९याजकां केरे रीतरे मुताबिक तैनेई परची छेइतां जकर्याह चुनो कि तै प्रभु-परमेशेरे मन्दरे मां गेइतां गुग्गल बाले।

१०जैखन तै गुग्गल बालने लोरो थियो, त तैखन मैन्हु केरि सारी भीड मन्दरेरे बेइर प्रार्थना केरि राओरी थी।

११तैखन अचानक प्रभु-परमेशेरो अक स्वर्गदूत गुग्गल बालनेरी ठारारे देइने पासे खडे भोइतां जकर्याह लेइहोव।

१२जैखन जकर्याहे स्वर्गदूत लाव, त तै घेमरोव ते बडो डेरि जेव।

१३पन स्वर्गदूते तैस सेइं ज़ोवं, "हे जकर्याह, न डर! जैखन तीं प्रार्थना की, त परमेशेरे तेरी प्रार्थना शुनी। एल्हेरेलेइ, तेरी कुआन्श एलीशिबाई मट्टू भोनूए, ते तू तैसेरू नंव यूहन्ना रेख्वां।

१४तैसेरे जर्म भोने सेइं तू बडो खुश भोलो। त बडे लोक भी खुश भोले।

१५तै प्रभु-परमेशेरी नजरी मां महान भोलो, ते तैनी कोन्वी भी किसमेरी नशशे बाले चीज त कने शराब कधे न लोडे पियोरी, ते तै अपनि अम्मारे पेटे मां भोते वक्तेरां परमेशेरी पवित्र आत्मारी शेक्ति सेइं भरपूर भोलो।

१६तै इस्राएली लोकन मरां बडे लोक परमेशेरे पासे जै तैन केरो प्रभु परमेशेरे वापस तैस कां आनेलो, जैना अपने पापां केरि वजाई सेइं परमेशेरे करां दूर भोरे थिये।

१७ते तै एरो मैन्हु भोलो जैस पुड एलिय्याहरी आत्मा ते कने शक्ति भोली। तै परमेशेरी बत तियार केरेलो, तैस अग्री-अग्री च्ललेलो ताके हाज बव्वां केरो दिल औलादरे पासे ते परमेशर न

* 1:5 याजक याजक यहूदी मन्दरे मां सेवा केरनेबालो अक सेवक भोतो थियो, तै बलिदानां चाढ़नेरी सेवा केरतो थियो जैना लोक मन्दरे मां आनते थिये।

मन्नेवाले लोकन धेर्मी लोकां केरे बत्तां केरे पासे बदलेलो, ताके जैखन प्रभु एज्जे त लोक तियार भोन ।”

18 जकर्याहे स्वर्गदूते पुच्छू, “अवं केन्त्रे मेन्नी एन असन सेइं भोनूए, अवं त बुढोइं ते मेरी कुआन्श भी बुढी भोरीए ।”

19 स्वर्गदूते जुवाव दित्तो, “अवं जिब्राईल आई अवं परमेशेरे कां खडो भोताई, अवं एल्हेरेलेइ भेज्जोरोई, कि अवं तीं सेइं गल केरि ते तीं ए खुशखबरी शुनेई ।

20 ते हेर ज्जां तगर एना गल्लां पूरी न भोन तेरी ज्जवान बंद भोली, ते तू गल न केरि सकेलो किजोकि तीं मेरी गल्लां केरू याकीन नईं कियेरू जैना अपने वक्ते पुड़ पूरी भोनिन ।”

21 ते जैखन जकर्याह ते स्वर्गदूत मन्देरे मां गल्लां लोरे थिये करने त लोक मन्देरेरे बेइर अंगने मां जकर्याहे बलगने लोरे थिये, तेना बडे हैरान भोइजेइ कि जकर्याहे मन्देरे मां एतूरु चिरि किजो लाव ।

22 जैखन तै बेइर निस्सो, त तै कुजी न बटो ते तैन लोकेई बुझी छुडू, कि एनी मन्देरे मां किछु दर्शन लाहेरूए किजोकि तै इशारो करतो थियो, पन कुजी न थियो बटतो ।

23 जेइस यरूशलेम नगरेरे मन्देरे मां जकर्याहरू एक्की हफतेरे याजकेरी सेवारू कम पूरू भोवं, त तै अपने घरे जो चलो जेव ।

24 किछु वक्तेरां बाद तैसेरी कुआन्श एलीशिवा दोजीतीए भोइ, ते तै पंज महीन्ना तगर बेइर लोकन मां न जेई । तैसां ज़ोवं,

25 “प्रभुए मीं पुड़ दया केरतां केतूरू महान कम कियूं, ते अवं दोजीती भोइ, ते जैस गल्लेरे वाजाई सेइं लोक मीं घटिया समझते थिये, तै गल दूर की ।”



26 एलीशिवारे दोजीती भोनेरे शेइयोवं महीने जिब्राईल स्वर्गदूत परमेशेरेरी तरफां गलील इलाकेरे नासरत नगरे मां,

27 एक्की अड्लैई कुइये कां भेजो । तैसारी कुडमाइ दाऊदेरे खानदाने मरां एक्की मइदे सेइं भोरी थी जेसेरू नवं यूसुफ थियूं, ते तैस कुइयरू नवं मरियम थियूं ।

28 स्वर्गदूते तैस कां एइतां ज़ोवं, “आनन्द ते ज़ीत तेरी भोए, तीं पुड़ परमेशेरेरी बड़ी दया भोरीए, प्रभु तीं सेइं साथिये!”

29 मरियम स्वर्गदूतेरी गल शुन्तां परेशान भोइतां सोचने लगी एन केरहु नमस्कारे?

30 स्वर्गदूते तैस सेइं ज़ोवं “हे मरियम, डर न, किजोकि परमेशेरो तीं पुड़ बडो अनुग्रह भोरोए ।

31 तू दोजीती भोली तीं अक मट्टू भोलू, ते तू तैसेरू नवं यीशु रेखां ।

32 तैन महान भोलू ते तैस जो परमप्रधान परमेशेरू मट्टू ज़ोले, ते परमेशर तैस तैसेरे पूर्वज दाऊद राजेरू जेरो राजो बनालो ।

33 ते तै याकूबेरे खानदाने पुड़ हमेशा राज केरेलो, ते तैसेरू राज कधे खतम न भोलू ।”

34 मरियमा स्वर्गदूते पुच्छू, “एन केन्त्रे भोइ सकते? अवं त अड्लाइ आई ।”

35 स्वर्गदूते जुवाव दित्तो, “पवित्तर आत्मा तीं पुड़ उतरेलो, ते परमप्रधान परमेशेरी शक्ति तीं पुड़ सैयो केरली एल्हेरेलेइ तै बच्चो जै जर्मएलो तै पवित्तर भोलो तैस जो परमेशेरू मट्टू ज़ोले ।

36 ते हेर तेरी रिशतेदार एलीशिवाई भी बुढे वारे मट्टू भोने बालूए तैस जो लोक बाँझ ज़ोते थिये, तैस दोजीती शा महीने भोरेन ।

37 किजोकि परमेशेरेरे लेइ किछु भी नमुमकिन नईं ।”

38 मरियमा स्वर्गदूते जुवाव दित्तो, “अवं परमेशेरी सेवा केरती जैन तीं ज़ोए तैन भोए ।” तैखन स्वर्गदूत तैस करां चलो जेव ।



39 किछु दिहाइन पत्ती मरियम तियार भोइतां यहूदियारे इलाकेरे एक्की पहाडी नगरे मां जेई ।

40 ते जकर्याहरे घरे मां गेइतां एलीशिवा जो नमस्कार कियूं ।

41 जैखन एलीशिबा मरियमारू नमस्कार शुनु त बच्चो तैसारे पेटे मां उछुडने लगो ते एलीशिबा पवित्तर आत्माई सेइं भेरोई जेई।

42 ते बडे ज़ोरे सेइं ज़ोने लगी, “तू कुआन्शन मां धन आस ते ज़ै बच्चो तीं ज़ांनोए तै भी धने!

43 ते मेरे लेइ बड़ी इज्जतरी गल आए कि, मेरे प्रभुएरी अम्मा मीं कां आई!

44 किजोकि हेर ज़ेरि तेरे नमस्कारेरी आवाज़ मीं शुनी त बच्चे खुशी सेइं मेरे पेटे मां छालां लगो मारने।

45 तू धन आस तीं तैन गल्लन पुड़ विश्वास कियो ज़ैना प्रभुए तीं सेइं ज़ोई कि, तैना पूरी भोली।”

????????? ?????-???

46 ते मरियमा ज़ोवं,

“अवं प्रभुएरी तारीफ़ करती।

47 ते मेरी आत्मा मेरे मुक्ति देनेवाले

परमेशरे सेइं खुशी भोइ।

48 किजोकि तैनी अपन सेवा करने बैलरी गिरोरी हालती पुड़ नज़र की,

अज़ेरां देइतां हर ज़मानेरे लोक

मींजो धन ज़ोले।

49 किजोकि परमेशरे मेरे लेइ बड़ां-बड़ां

कम्मां कियोरन ते तैसेरू नवं पवित्तर भोए।

50 तैसेरी दया तैस करां डरने बालन

पुड़ पीड़ी-पीड़ी तगर राचे।

51 तैनी अपने शक्ति सेइं बड़ां-बड़ां कम्मां कियोरन

तैनी घमण्डी तितर-बितर कियो।

52 तैनी राजे राज़ करने करां रोके,

ते तैनी नम्र लोकन आदर दिती।

53 तैनी नियन्ने रोड़ी-रोड़ी चीज़ेइं सेइं रज़ाने

ते धन दौलती बाले खाली हथेइं भेजे।

54 तैनी अपने वादे ज़ैना तैनी इशरे दादन-पड़दादन सेइं कियोरे थिये याद कियो, तैनी अपन सेवा करनेवाले इस्राएली लोकां केरि मद्दत की,

55 तैनी हमेशारे लेइ अब्राहमे पुड़ ते तैसेरी

औलादी पुड़ दया केरन याद रख्वी।”

56 मरियम कोई ट्लाई महीन्न तगर एलीशिबा सेइं साथी राई ते फिरी अपने घरजो आई।

????????? ?????????? ?????????????? ?????

57 एलीशिबारो गल्ह बिशनरो वक्त एज्जी अव ते तैस मट्टू भोवं।

58 तैसारे आसेपासेरे रिशतेदारेइं एन शुनु कि परमेशरे तैस पुड़ बड़ी दया कियोरियो ते तैस सेइं साथी खुशी मनाई।

59 अठोवं दिहाड़े तैना मट्टेरो खतनो करने आए, ते तैना तैसेरू नवं तैसेरे बाजी केरे नव्वें पुड़ जकर्याह रखनु चाते थियो।

60 पन तैसेरी अम्मा ज़ोने लगी, “नई एसेरू नवं यूहन्ना भोलू।”

61 किछ तैस जो ज़ोने लगे, “तुशशी खानदेनी मां कोई भी एस नव्वेरो नई।”

62 तैखन तैन लोकेईं जकर्याहरे पासे इशारे सेइं पुच्छू कि तू मट्टेरू नवं कुन रखनु चातस?

63 ते तैनी पटारी मगी ते तैस पुड़ लिखू, “एसेरू नवं यूहन्ना आए,” ते सब लोक हैरान रेइजे।

64 तैखने तैसेरी ज़िभ खुल्ली ते जकर्याह गल्लां लगो करने ते परमेशरेरी तारीफ़ करने लगो।

65 ते आसे-पासेरे लोक एस तमाशे हेरतां हैरान रेइजे, ते यहूदियारे इलाकेरे एककी पहाड़ी नगर मां एस गल्लरी चरचा भोने लगी।

66 ते शुन्ने बाले अपने-अपने मन्न मां सोचते थिये, “एन मट्टू बड्डू भोइतां केरहु भोनूए?” किजोकि परमेशेरी शक्ति अज्जेरी देंतीं एस सेइं साथीए?

~~~~~

67 तेखन तेसरो बाजी जकयाह पवित्र आत्माई सेइं भरोव ते भविष्यवाणी केने लगो ।

68 “परभु इस्राएलेरो परमेश धन भोए,  
किजोकि तैनी एइतां अपने लोकन मुक्ति दितोरिये ।

69 ते तैसेरे दास दाऊदरे घराने मरां इशे लेइ अक मुक्ति देनेबालो भेजोरोए ।

70 (बडे पेइले जेन्चरे पवित्र नेबी केरे जिरिये जोरू थियूं,

जैन शुरु करां देंते ओरूए ।)

71 असां अपने दुश्मन करां ते बैर रखने बालन करां मुक्ति हासिल केरम ।

72 ते तै इशे दादे पइदादन पुइ दया केरे

ते अपनो पवित्र करार याद केर ।

73 ते करार जै तीं इशे पूर्वज

अब्राहमे सेइं कियोरो थियो ।

74 कि तै असन हिम्मत देलो,

कि असां अपने दुश्मन करां बगैर केन्ची भी डरे सेइं बेंची सखम ।

75 ते अपनि जिन्दगी तैस सोंफम ते सारी जिन्दगी पवित्रेइ ते धार्मिकता ज़ीम ।

76 ते हे बच्चां तू नबी भोलो

किजोकि तू परमेशेरे अग्री-अग्री चेलतां

लोकन तियार केरेलो कि परमेश एजोरोए ।

77 तै अपने लोकन तैन केरे पाप माफ़ केनेरे जिरिये मुक्तेरे बारे मां ज्ञान देलो ।

78 ते इशे परमेशेरी दया एरी भोली

जेन्चरे दिहाडो लौ देते तेन्चरे मसीह स्वर्गेरां एज्जेलो ।

79 ताके तैन केरे लेइ जैना पापे मां ज़ीतन ते हमेशेरे मौतरे खतरे मां रातन लौ दे,

ते तै असन बत हिराए ताके अस सुखे सेइं जिन्दगी ज़ीम ।”

80 तैन मट्टू यानी यूहन्ना बेडोतो जेव ते आत्माई मां बद्धतो जेव ते इस्राएलेरे लोकन प्रचार केने तगर सुनसान टैन मां राव ।

## 2

~~~~~

(~~~~~ 1:18-25)

1 तैन दिहैइन मां रोम मुलखेरे महाराजे औगुस्तुसे एलान कियूं कि, दुनियारे सारे मैन्हु केरि गिनती की गाए ।

2 ए पेइली मैन्हु केरि गिनती थी, जै सीरिया इलाकेरे गवर्नर क्विरिनियुसेरे वक्ते मां भोइ ।

3 ते सारे लोक, मैन्हु केरि गिनतरे लेइ नवं लिखाने अपने-अपने पूर्वजां केरे नगर जो चले जे ।

4 यूसुफ भी गलील इलाकेरे नगर नासरते मरां यहूदिया इलाके मां दाऊदरे नगर बैतलहम मांजो चलो, किजोकि ते दाऊद राजेरे खानदाने मरां थियो ।

5 ताके तैड़ी मरियमी सेइं साथी जैस सेइं तैसेरी कुडमाइ भोरी थी ते तै दोज्जींती थी नवं लिखाए ।

6 तैन केरे तैड़ी रेइतां तैसारे गल्हे बिशनेरो वक्त अव ।

7 ते तैस पेइलू मट्टू भोवं ते तैसां तैन फैल्ह डी मां पलेटतां खुरली मां रखू किजोकि तैन धर्मशाली मां कोन्च ठार न थी मैल्लोरी ।

~~~~~

8 किछ् पुहाल राती एक्की इलबडें मां गब्बां करां पेरहो केरते थिये ।

9 ते परमेशेरो स्वर्गदूत तैन कां बांदो भोव ते परमेशेरी महिमारी लौ तैन केरे चेवरे पासन बलने लगी ते तैना बडे डेरि जे ।

10 तैखन स्वर्गदूते तैन जो ज़ोवं, “डरा नन्ना, किजोकि अवं तुसन अक बडी खुशखबरी शुनाने ओरोई, जै खुशी सैरी लोकां केरे लेइ भोली ।

11 अज्र बैतलहमे मां ज़ैन दाऊद राजेरू नगर थियूं, तुशे लेइ अक मुक्ति देनेवालो ज़रमोरोए यानी यीशु मसीह प्रभु ।

12 तैसेरो तुशे लेइ ए निशान भोलो कि तुसन अक मट्टू फैल्हडी मां पलैट्टेरू गाल्हेरे बेइर खुरली मां मैलैलू ।”

13 ते अकदम तैस स्वर्गदूते सेइं हारे भी स्वर्गदूत बांदे भोए ते तैना परमेशेरी तारीफ़ करेने लगे ते एन ज़ोने लगे,

14 “स्वर्गे मां परमेशेरी महिमा भोए, ते ज़मीनी पुइ तैन मैनन् शान्ति मैल्ले, ज़ैन पुइ परमेशर खुशे ।”

15 ज़ैखन स्वर्गदूत पुहालां केरे सामने वापस स्वर्गे मांजो चले जे । पुहाल एण्णू मांमेइं ज़ोने लगे, “एज्जा अस बैतलहम नगरे मां गाम ज़ै बिस्तार प्रभुए असन दित्तोरोए तैस हेरम ।”


16 एल्हेरेलेइ तैना लूशी तैट्टां चले जे ते तैडी पुजे ते सच्चे तैडी मरियम, यूसुफ ते निकडो बच्चो फैल्हडी मां पलेट्टोरो गोरू केरि गाल्हेरे बेइर खुरली मां मैल्लो ।

17 ते पुहाल एन हेरतां ज़ै गल तैन एस बच्चेरे बारे मां ज़ोरी थी सेबन सेइं ज़ोने लगे ।


18 पुहालां केरि गल्लां शुन्तां सारे लोक हैरान रेइजे ।

19 पन मरियम सैरी गल्लां अपने दिले मां रेखतां सोचने लगी ।

20 ते पुहालन ज़ेन्चरे तैनी स्वर्गदूते ज़ोरू थियूं, तैनेई अपनि एच्छेई तैन सब किछ् लेइतां परमेशेरी तारीफ़ करते वापस घरजो चले जे ।



21 अटोवं दिहाडे ज़ेइस तैसेरो खतनो केनेरो वक्त अव त तैसेरू नवं यीशु रख्वू । एन तैन नवं आए, ज़ैन स्वर्गदूते मरियमारे दोजींतीए भोने करां पेइले रख्वेरू थियूं ।



22 ज़ैखन मूसरे कानूनेरे मुताबिक तैसेरे शुच्चे भोनेरे दिहाडे पूरे भोए, त यूसुफे ते मरियमा यीशु यरूशलेम नगरे मांजो नीयो ताके तैस प्रभुए कां अर्पण केरन ।

23 जेन्चरे प्रभुएरे कानूने मां लिखोरूए, “सारां पेइलां मट्टां परमेशेरे लेइ पवित्तर भोलां ।”

24 जेन्चरे प्रभुएरे कानूने मां लिखोरूए कि, “अक जोडी गुधू केरि या कबूतरेरे दूई बच्चे बलिदानेरे लेइ आन ।”



25 तैस वक्ते यरूशलेम नगरे मां अक मैन्हु थियो, तैसेरू नवं शमौन थियूं, तै बडो धर्मी ते भक्त मैन्हु थियो, तै मसीह बलगने लोरो थियो, कि तै एज्जेलो ते इस्राएली लोकन शान्ति देलो, ते तैस पुइ पवित्तर आत्मा थियो ।

26 पवित्तर आत्मा तैस पुइ बांदू कियूं, कि ज़ां तगर तू प्रभुएरे मसीह न लाएलो तांतगर न मरेलो ।

27 तैस दिहाडे शमौन पवित्तर आत्मा चलाव, तै आत्मिक शक्ति सेइं मन्दरे मां अव तैखन यीशु भी तैसेरे अम्मा बाजेई अन्तर आनोरो थियो, कि तैसेरेलेइ मूसरे कानूनेरे मुताबिक कमाम ।

28 त शमौने बच्चो कुम्मे मां ट्लातो ते परमेशेरी तारीफ़ करेने लगे ।

29 “हे प्रभु तीं ज़ै अपनो वादो कियोरोए अपने दासे आनन्दे सेइं मरने दे ।

30 किजोकि मीं अपने एच्छेई सेइं मुक्ति देनेवालो लाव, ज़ै तीं सैरी लोकां केरे लेइ भेजोरोए ।

31 ज़ै तीं सैरी कौमां केरे सामने तियार कियोरोए ।



32 तै, परमेशर गैर कौमन पुड़ बांदो केरनेरे लेइ लौ आए,  
ते इस्राएली लोकां केरे लेइ अक बड़ी महिमा भोए ।”

~~~~~

33 यीशुएरे अम्मा बाजी शमौनेरी एना गल्लां शुन्तां हक्के-बक्के भोए ।

34 तैखन शमौने तैन बरकत दिती, तै तैसेरी अम्मा मरियम सेइं ज़ोवं, “हेरा, इन मट्टू एल्हेरेलेइ ठहरावरो, कि इस्राएले मां बड़े लोकां केरे लेइ नाश भोनेरी ते मुक्ति मैलनेरी वजा भोए, तै परमेशेरी तरफां अक निशान आए पन बड़े लोक तैसेरे खलाफ भोले ।

35 ताके बड़े दिलां केरे खियाल खुल्ली गान ते तीं बड़ो दुःख भोनोए ज़ेन्चरे तलवार कटतीए ।”

36 तैड़ी अक कुआन्श थी ज़ै नबिन थी, तैसारू नवं हन्नाह थियूं, अशेरेरे खानदाने मरां अक मैन्हु ज़ेसेरू नवं फनुएल थियूं, हन्नाह तैसेरी कुई थी तै बड़ी बुढी थी तै अपने ड्लाहेरां बाद सत साल अपने मुन्शे सेइं साथी रहोरी थी ।

37 तै विधवा थी तैसारी उमर चूरासी साल थी तै मन्दरे मरां न थी गाती ते रात दिहैड़ी प्रार्थना ते कने बरतां रखती ते परमेशेरी आराधना केरती रहती थी ।

38 तैखन तै भी तैड़ी एडतां परमेशेरू शुकूर केरने लगी ते बच्चेरे बारे मां तैन सेब्बन सेइं गल्लां लाई केरने, ज़ैना बलगने लोरे थिये कि परमेशेरू यरूशलेम नगरेरे लोकन छुटानेरे लेइ मसीह भेज्जोए ।

~~~~~

39 ज़ैखन मरियम ते युसुफ मूसरे कानूनरे मुताबिक यीशुएरो खतनो कियो, त तैना गलील इलाके मरां अपने नगर नासरते मांजो जे ।

40 तैन मट्टू बडोतू जेवं ते अक्लमन्द भोतू जेवं किजोकि परमेशेरो तैस पुड़ बड़ो अनुग्रह थियो ।

~~~~~

41 यीशुएरे अम्मा बाजी हर साल फ़सह तिहारेरी दिहाड़ी बनाने यरूशलेम नगरे मां गाते थिये ।

42 ज़ैखन यीशु 12 सालां केरो भोव त तैना रीतरे मुताबिक यरूशलेम नगरे मां जे ।

43 ज़ैखन तिहार बीतू त यीशुएरे अम्मा बाजी वापस घरजो आए त यीशु यरूशलेम नगरे मां रेइ जेव ते तैसेरे अम्मा बाजी कोई पतो न थियो ।

44 तैनेई बुझू कि यीशु होरि मैनन् सेइं साथी अग्रोवं जोरोए, तैना अपने रिशतेदारन ते ज्ञान पिशानी बालन मां तोपने लगे ।

45 ज़ैखन तैन यीशु न मैल्लो त तैना वापस तोपते-तोपते यरूशलेम नगरे मां पुजे ।

46 टलेइयोवं दिहाड़े तैन यीशु मन्दरेरे अंगने मां बुजुर्ग लोकन सेइं गलबात केरतो ते तैन सेइं सवाल जुवाब केरतो मैल्लो ।

47 ज़ैना लोक तैसेरी गल्लां शुन्ने लोरे थिये तैना यीशुएरी गल्लां शुन्तां हैरान रेइजे ।

48 ज़ैखन तैसेरे हाज बव्हेई यीशु लाव त तैना हैरान रेइजे ते ज़ोने लगे, “मट्टां तीं असन सेइं एन कुन कमाव? तेरे हाज बव तीं तोपते-तोपते परेशान भोइ जे ।”

49 यीशु तैन सेइं ज़ोवं तुस मीं किजो तोपने लगगोरो थिये? “तुसन पतो नई कि मीं अपने बाजेरे घरे मां रानू ज़रूरी थियूं?”

50 पन तैन तैना गल्लां केरि समझ न आई कि, एन केरो कुन मतलब आए ।

51 तैखन तै अपने अम्मा बाजी सेइं साथी नासरत नगरे मां अब ते अपने अम्मा बाजी कां राव ते मरियमा एना सेरी गल्लां अपने दिले मां रेख्खी ।

52 यीशु अक्ली मां भी ते कदे मां भी बेडोतो जेव ते परमेशेरी ते इन्सानेरी कृपाई मां बद्धतो जेव ।

3

~~~~~

(~~~~~ 3:1-12; ~~~~~ 1:1-8; ~~~~~ 1:19-28)

1 तिबिरियुस महाराज्जरे हुकुमतेर परनोहूँ साले मां ज़ेइस पुन्तियुस पिलातुस यहूदिया इलाकेरो गवर्नर थियो, ते गलीलेरे इलाके मां हेरोदेस गवर्नर थियो, तैसेरो दला फिलिप्पुस इतूरैया ते त्रखोनीतिस इलाकां केरो गवर्नर थियो, लिसानियास, अबिलेन इलाकेरो गवर्नर थियो ।

2 तैस वक्ते हन्ना ते कैफा महायाजक थिये, तेइस परमेशे जकर्याहरे मट्टे यूहन्ना सेइं गल्लां को । जैन सुनसान ठैरी मां रातू थियूं ।

3 ते यूहन्ना यरदन दरियारे आसेपासेरे इलाकन मां गेइतां ई प्रचार केरने लगो, कि अपने पापन करां मनफिराथ, ते बपतिस्मो नेथ ताके परमेशर तुशुशे पाप माफ़ केरे ।

4 जेन्चरे यशायाह नेबेरी किताबी मां लिखोरूए,  
“सुनसान ठैरी मां फुकारने बालेरी आवाज एइचे कि,  
“प्रभुएरी बत बनाथ ते तैसेरी बत्तां पैट्टी केरा ।”

5 “डुग्घी ठारां सैरी भेरोई गैनिन,  
हर अक पहाड ते चौदु बछोडनोए

ते जैना टलेढी बत्तन तैना सिधी केरनिन जैना उन्ढी उबरिन तैना पैट्टी केरनिन ।

6 ते सब लोक तैस हेरेले, जै परमेशे तैन मुक्ति देने भेजोरोए ।”

7 ते यूहन्ना तैन लोकन सेइं ज़ोवं, जैना जथन मां तैस करां बपतिस्मो नेने ओरे थिये, “तुस ज़ेहरीले सप्पेरे ज़ेरे बुरे आथ! तुसन केनि ज़ोवं कि, एजनेबाले परमेशेरे कोपे करां नशशा?

8 बस्सा, सज़ाई करां बच्चनेरे लेइ तैना कम्मां केरा, जैन सेइं पतो लगगे तुसेईं सच्चे पापन करां मन फिरावरोए । ते अपने-अपने मने मां एन न ज़ोथ कि, अबराहम जेन्चरे इशुशो बाजीए, किजोकि अवं तुसन सेइं जोताई कि परमेशर इन घोड़न मरां अबराहमेरे लेइ औलाद पैदा केरि सकते ।

9 ते हुन्ना त बुट्टां केरे ज़ीलन पुड़ परमेशेरो मैक्कु रख्वोरोए, एल्हेरेलेइ जै कोई तैस बुट्टेरो ज़ेरो भोते, जै रोडो फल न दे, तै कटनोए ते अग्गी मां छुडनोए ।”

10 लोकेई तैस पुच्चू, “फिरी असां परमेशेरी सज़ाई करां केन्चरे बत्तम?”

11 यूहन्ना तैन सेइं ज़ोवं, “जैस कां दई कुरतेन त अक कुरतो तैस देथ जैस कां अक भी नई ते जैस कां रोट्टी आए त तै भी रोट्टी बंटे जैन कां नई ।”

12 ते धडत नेनेबाले भी बपतिस्मो नेने ओरे थिये तैनेई तैस पुच्चू, “हे गुरू जी असां कुन केरम?”

13 तैनी तैन सेइं ज़ोवं, “जैन तुशुशे लेइ सरकारी कानूनेरे हिसाबे सेइं रख्वोरूए तैस करां जादे धडत न नेइयथ ।”

14 ते तैखन होरि सिपाहीएइ भी तैस पुच्चू, “असां कुन केरम?” यूहन्ना तैन सेइं ज़ोवं, “केन्ची पुड़ जुलम केरतां बेहक न नेइयथ, ते न केन्ची पुड़ झूठो दोष लेइयथ, पन अपनि तनखुवाही पुड़ गुजारो केरथ ।”

15 तैखन लोक इंतज़ारे मां थिये कि, मसीह जल्दी एज्जोए, ते सब लोक अपने दिले मां यूहन्नारे बारे मां सोचते थिये कि जै ओरोए तै मसीह आए या नई?

16 ते यूहन्ना तैन जुवाबे मां तैन सेइं ज़ोवं, “अवं त तुसन पैनी सेइं बपतिस्मो देताई पन जै मीं करां महाने तै एज्जनेबालो आए । अवं तैसेरो गुलाम बेनतां तैसेरी जुट्टी केरे तसमे भी खोलनेरे काबल नई । तै तुसन पवित्र आत्माई ते अग्गी सेइं बपतिस्मो देलो ।

17 तैसेरू छुज्ज तैसेरे हथ्थे मां आए ते तै खलाइ रोडेचारे साफ केरेलो, ते गेहुं अपने कोठारे मां रखेलो पन झाङ्गी तैस अग्गी मां फुकेलो जै कधी हिशनेरी न भोली ।”

18 बस्सा तै बडे रोडेचारे लोकन समझेइतां परमेशेरी खुशखबरी शुनातो राव ।

19 हेरोदेस जेवरोवं मुखसे पुड़ राज़ केरतो थियो । यूहन्ना तै झिडकावरो थियो, कि हेरोदेस अपने दला फिलिप्पुसेरी कुआन्श हेरोदियास जै थी तैस सेइं इला कियोरो थियो, ते होरां भी बडां बुरां कम्मां कियोरां थियां ।

20 हेरोदेस एन सेब्बन करां जादे बुरू कम कियू कि यूहन्ना कैद केरतां छुड्डो ।

॥॥॥॥॥॥ ॥॥॥॥॥ ॥॥॥॥॥॥॥॥ ॥॥॥॥॥  
(॥॥॥॥॥ 3:13-17; ॥॥॥॥॥ 1:9-11)

21 जैखन सब लोक बपतिस्मो नेने लोर धियो त यीशुए भी बपतिस्मो नीयो, ते जैखन तै प्रार्थना लोरो धियो केने, त एरू भोव कि स्वर्ग खुल्ली जेवं ।

22 ते पवित्र आत्मा कबूतरेरी शकली मां यीशु पुड़ उत्रो ते अम्बरे मरां ई आवाज अई, “तू मेरू दलारू मट्टू आस, अवं तीं पुड़ बड़ो खुश आई ।”

॥॥॥॥ ॥॥॥॥॥॥॥ ॥॥॥॥॥॥॥॥  
(॥॥॥॥॥ 1:1-17)

23 जैखन यीशुए अपने सेवारू कम शुरू कियूं त तैसेरी उमर 30 साल थी (जेन्चरे समझू गातू थियूं) एन यूसुफेरू मट्टूए, ते तैन एलेरू

24 एली मत्तातेरू ते तैन लेवेरू ते तैन मलकेरो ते तैन यन्नेएरो ते तैन यूसुफेरू मट्टू थियूं,

25 ते तैन मत्तित्याहेरू ते तैन आमोसेरो ते तैन नहूमेरू ते तैन असल्याहेरू ते तैन नगगईएरू मट्टू थियूं ।

26 ते तैन मत्तातेरो ते तै मत्तित्याहेरू ते तैन शिमीएरू ते तैन योसेखेरू ते तैन योदाहेरू मट्टू थियूं ।

27 ते तैन यूहन्नारू ते तैन रेसारू ते तै जरुब्बाबेलेरू ते तैन शालतियेलेरू ते तैन नेरेरू मट्टू थियूं ।

28 ते तैन मलकीएरू ते तैन अद्दीयेरू ते तैन कोसामेरू ते तैन एल्मदामेरू ते तैन एरेरू मट्टू थियूं ।

29 ते तैन येशूएरू ते तैन एलीएजेरेरू ते तैन योरीमेरू ते तैन मत्तातेरू ते तैन लेवेरू मट्टू थियूं ।

30 ते तैन शमोनेरू ते तैन यहूदेरू ते तैन यूसुफेरो ते तैन योननेरू ते तैन एलयाकीमेरू मट्टू थियूं ।

31 ते तैन मलेआहेरू ते तैन मिन्नाहेरो ते तैन मत्ततेरो ते तैन नातानेरो ते तैन दाऊदेरू मट्टू थियूं ।

32 ते तैन यिशैएरो ते तैन ओबेदेरो ते तैन बोआजेरो ते तैन सलमोनेरो ते तैन नहशोनेरू मट्टू थियूं ।

33 ते तैन अम्मीनादाबेरू ते तैन अरनेरू ते तै हेस्रोनेरू ते तैन परेसेरू ते तैन यहूदेरू मट्टू थियूं ।

34 ते तैन याकूबेरू ते तैन इसहाकेरो ते तैन अब्राहमेरू ते तैन तेरहेरो ते तैन नाहोरू मट्टू थियूं ।

35 ते तैन सरूगेरो ते तैन रऊएरो ते तैन पलेगेरो ते तैन एबेरेरू ते तैन शिलहेरू मट्टू थियूं ।

36 ते तैन केनानेरू ते तैन अरफक्षदेरो ते तैन शेमेरो ते तैन नूहेरो ते तैन लेमेकेरू मट्टू थियूं ।

37 ते तैन मधूशिलहेरू ते तैन हनोकेरो ते तैन यिरिदिरू ते तैन महललेलेरू ते तैन केनानेरू मट्टू थियूं ।

38 ते तैन एनोशेरू ते तैन शेतेरू ते तैन आदमेरो ते तैन परमेशेरू मट्टू थियूं ।

## 4

॥॥॥॥॥॥ ॥॥॥॥॥॥॥  
(॥॥॥॥॥ 4:1-11; ॥॥॥॥॥ 1:12-13)

1 फिरी यीशु पवित्र आत्मा सेइं भरपूर भोइतां यरदन दरियाए मरां वापस अव त 40 दिहाड़े पवित्र आत्मारे च़लाने सेइं सुनसान ठैरी जो च़लो जेव ।

2 तैन 40 दिहाड़न मां शैतान तैस अज़मातो राव, तैन दिहैड़न मां तैनी किछ न खाव पीवं ते जैखन तैना दिहाड़े पूरे भोए त तैस दलुख लगगी ।

3 शैताने तैस जो ज़ोवं, “अगर तू परमेशेरू मट्टू आस त इन घोड़न जो ज़ो कि एना रोट्टी बन्न ।”

4 यीशु तैस जुवाब दित्तो, “पवित्रशास्त्रे मां लिखोरूए, ‘मैन्हु सिर्फ़ रोट्टेइं सेइं ज़ींतो न राए ।’”

5 फिरी शैताने यीशु एककी उच्चे पहाड़े पुड़ घिन्तां जेव ते तैट्ठां एककी पले मां तैस तैड़ी दुनियारां सारां राज्जां हिरां ।

6 ते तैनी यीशु सेइं ज़ोवं, “एन सब किछ् मेरे अधिकारे मां आए, ते एसेरी सारी धन दौलत अवं तीं देलो एन मेरे स्पुर्दे । अवं ज़ैस चाताई तैस देइ सकताई ।

7 बस अगर तू मीं कां मथ्यो टेकस त एन सब किछ् तेरू भोलू ।”

8 यीशुए तैस जुवाब दित्तो, “पवित्रशास्त्र मां लिखोरूए, ‘तू सिर्फ अपने प्रभु परमेशरे कां मथ्यो टेकतां ते सिर्फ तैसेरी भक्ति केरां ।’”

9 ते तैनी यीशु यरूशलेम नगररे मन्दरेरी उच्ची छम्पी पुड़ नेइतां खड़ो कियो ते तैस सेइं ज़ोवं, “अगर तू परमेशररू मट्टू आस त अपनो आप इट्ठां उन्ढो बछोड़ ।

10 किजोकि पवित्रशास्त्रे मां लिखोरूए, ‘तै तेरे लेइ अपने स्वर्गदूतन ज़ोलो ते तैना तेरी हफ़ाज़त केरेले ।’

11 ते तैना तीं अपने हथ्यन पुड़ छूले ताके एरू न भोए कि तेरे पावन घोड़न सेइं टोकर लगगे ।”

12 यीशु तैस जुवाब दित्तो, “पवित्रशास्त्रे मां इन भी लिखोरूए तू अपने प्रभु परमेशरेरी अज़मैइश न केरां ।”

13 ज़ैखन शैताने तैसेरी बड़े तरीकेईं अज़मैइश की, त किछ् च़िरेरां बाद तैस केरां च़लो जेव ।

~~~~~

(~~~~~ 4:12-17; ~~~~~ 1:14-15)

14 फिरी यीशु पवित्र आत्मारी शेक्ति सेइं भरपूर भोइतां गलील इलाके मां वापस अव, ते सारे इलाके मां तैसेरी मुशूरी भोइजेइ ।

15 यीशु तैन केरे प्रार्थना घरन मां शिक्षा देतो राव, ते सब लोक तैसेरी तारीफ़ करते थिये ।

~~~~~

(~~~~~ 13:53-58; ~~~~~ 6:1-8)

16 फिरी ते नासरत नगर मां वापस अव ज़ैड़ी तै पलोरो थियो । अपने रीतेरे मुताबिक आरामेरे दिहाड़े तै प्रार्थना घरे मां जेव ते वचन पढ़नेरे लेइ खड़ो भोव ।

17 ते तैस यशायाह नेवेरी किताब दित्ती ते तैनी खोलतां तैन वचन कढ़ू ज़ैड़ी लिखेरू थियू, कि,

18 “प्रभुएरी आत्मा मीं पुड़े,

एल्हेरेलेइ कि तैनी गरीबन खुशखबरी शुनानेरे लेइ

मेरू अभिषेक कियोरूए,

तैनी अवं भेजोरोई कि कैदन हथरां छेइडी (ज़ैना शैतानेरे कब्जे मां आन)

ते कांना केरि एछ्छन ठीक भोनेरी खबर शुनेई, ते

ज़ैन पुड़ ज़ुलम भोते तैन लोकन आज़ाद केरि ।

19 ते तैस वक्तेरू एलान केरि ज़ेइस परमेशर लोकन पुड़ दया केरेलो ।”

20 फिरी तैनी तै किताब बंद केरतां सेवके कां वापस देइतां विश्शी जेव । ज़ेत्तेरे प्रार्थना घरे मां थिये सब तैसेरां तकते थिये ।

21 ते तै तैन सेइं ज़ोने लगगे, “अज़ पवित्रशास्त्रेरू तैन वचन तुशेरे सामने पूरू भोवं ।”

22 ते सब तैसेरी तारीफ़ केरने लगगे, ते तैसेरी गल्लन पुड़ बड़ो अनुग्रह थियो, ज़ैना गल्लां तैसेरे ऐशेरां निसती थी, ते लोक हैरान भोइतां ज़ोने लगगे, “कुन एन यूसुफेरू मट्टू नई?”

23 यीशु तैन सेइं ज़ोने लगगे, “ए कहावत तुस मीं पुड़ ज़रूर ज़ोले, ‘कि हे बेईद जी अपनो आप त ठीक केर, ज़ैन किछ् असेईं कफ़रनहूम नगर मां केरतू शुनेरूए, तैन इड़ी अपने नगरे मां भी केर ।’”

24 ते तैनी इन भी ज़ोवं, “अवं तुसन सेइं सत्र ज़ोताई, कि कोई नबी अपने मुलखे मां कबूल न कियो गाए ।

25 अवं तुसन सेइं सच्च ज़ोताई कि एलिय्याह नेबेरे वक्ते मां ज़ैखन साडे ट्लाई साल अम्बर बंद भोवं (यानी झड़ी न भोइ) ते इड़ी तगर कि सैरी मुलखे मां बड़ो काल पेई जेव ते तैस वक्ते बेड़ि विधवा कुआन्शां इस्राएले मुलखे मां थी।

26 पन एलिय्याह नबी, तैन मरां केन्ची कां नई पन सैदा नगरेरे नेडे सारफत नगर मां एक्की विधवा कां भेजो, जै यहूदी न थी।

27 ते एलीशा नेबेरे ज़माने मां इस्राएलेरे मुलखे मां बड़े कोढी थिये पन तैन मरां कोई भी कोढे करां साफ न थियो भोरो, पन सिर्फ अक सीरियारो रानेबालो नामान कोढे करां साफ भोरो थियो, जै गैर कौमी मरां थियो।”

28 ज़ेतरे लोक प्रार्थना घरे मां थिये एना गल्लां शुन्तां सरकी सेइं लाल-लाल भोइ जे।

29 ते खडे उटठतां तैस नगर करां बेइर निस्से ते तै तैस पहाड़ेरी च़ौटी पुड़ घिन्तां जे ज़ैस पुड़ तैन केरू नगर आबाद थियू, ताके तैस तैटठां उन्डे बछ़ोइतां मारन।

30 पन यीशु तैन मरां निस्तां च़लो जेव।

~~~~~

(~~~~~ 1:21-28)

31 फिरी तै गलील इलाकेरे कफरनहूम नगरे मांजो जेव। ते आरामेरे दिहाडे तैन शिक्षा देने लगगोरो थियो।

32 ते लोक तैसेरी शिक्षा शुन्तां हैरान रहते थिये किजोकि तैसेरी शिक्षा बड़े अधिकारे सेइं थी।

33 प्रार्थना घरे मां अक मैन्हु थियो, ज़ैस पुड़ भूतेरो सायो थियो। तै बड़े ज़ोरे सेइं चिन्डां मारने लगे।

34 “हे नासरत नगरेरे यीशु! असन तीं सेइं कुन कम? कुन तू असन नाश केरनेरे लेइ ओरोस? अवं ज़ानताई कि तू कौन आस, तू परमेशेरू पवित्र मटटू आस!”

35 यीशुए तैस झिङक देइतां ज़ोवं, “चुप रा, एस मैन्हु मरां निस्सी गा!” तैखन भूते तै मैन्हु ज़मीनी पुड़ शैरी दित्तो, ते तैस मरां निस्सी जेव।

36 एन हेरतां सारे लोक बड़े हैरान भोए ते एप्पू मामेई ज़ोने लगे, “ए कुन गल आए! तै अधिकारे ते शेक्ति सेइं भूतन हुक्म देते ते तैना तैस मरां निस्सी गातन।”

37 ते सारे मुलखेरे मां च़ेवरे पासन तैसेरी खबर फैली जेई।

~~~~~

(~~~~~ 8:14-17; ~~~~~ 1:29-34)

38 फिरी तै प्रार्थना घरे मरां उटठतां शमौनेरे घरे जेव ते शमौनेरी शिखी बड़ो भुखार थियो, ते लोकेई तैसारे बारे मां यीशु सेइं ज़ोवं।

39 तै खडो भोइतां तैसारे पासे फिरो ते बिमारी झिङकी, ते तैसारो सारो भुखार उतरी जेव ते तै खड़ी भोइ, ते तैन केरि सेवा केरने लगी।

40 ज़ैखन दिहाड़ी लाई डुबने त लोकेई तैना सब लोक ज़ैन मां किसमां-किसमां केरि बिमैरी थी तैस कां आने, ते यीशुए तैन पुड़ हथ रेखतां तैना सब बज्झाए।

41 भूतां भी चिन्डां मारतां थियां, ते ज़ोतां थियां, “तू परमेशेरू मटटूस!” ते बड़े लोकन मरां भूतां केरो सैयो निस्सी जेव, ते तै तैन झिङकतो थियो, ते तैन गल भी न थियो देतो केरने, किजोकि तैना भूतां ज़ानतां थियां कि ए मसीह आए।

~~~~~

(~~~~~ 1:35-39)

42 ज़ैखन झेझ भोइ त यीशु उटठतां बेइर एक्की सुनसान ठैरी मां जेव, ते पतारां सारे लोक तैस तोपते-तोपते तैस कां पुजे ते रोकने लगे कि तू असन करां न गा।

43 पन यीशुए तैन सेइं ज़ोवं, “मीं होरि नगरन मां भी परमेशेरूरे राज़जेरी खुशखबरी शुनानी ज़रूरीए किजोकि अवं एल्हेरेलेइ भेजोरोई।”

44 ते तै यहूदिया इलाकेरे प्रार्थना घरन मां प्रचार केरतो राव ।

5

ⓂⓂⓂⓂ ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 4:18-22; ⓂⓂⓂⓂⓂ 1:16-20)

1 एक्की दिहाड़े यीशु गन्नेसरतरे समुन्दरे* बन्ने पुड़ खेड़ोरो थियो, ते बड़े लोक तैस कां करां परमेशेरू वचन शुन्नेरे लेइ तै उन्ढे विछड़ी गाते थिये ।

2 तैनी दई किशती बन्ने लेगोरी लेई, ते मेछली टलानेवाले किशती इलेखी छेडतां अपना ज़ालां धोने लगगोरो थिये ।

3 यीशु एक्की किशती मां ज़दो ते किशतरे मालिके शमौने सेइ ज़ोने लगो, तुस किशती इटठां बन्ने पुड़ेरां नेइतां थोड़ी दूर लाथ । फिरी यीशु किशती मां बिशतां तैन लोकन उपदेश देने लगो ।

4 ज़ैखन तैनी लोकन शिक्षा दिती त तै शमौने सेइ ज़ोने लगो, “तुस किशती डुगघी ठैरी ज़लाथ ते मेछली टलानेरे लेइ ज़ाल छडा ।”

5 शमौने जुवाब दित्तो, “हे गुरू, असेई सैरी राती तरले कियोरेन ते अक मेछली भी नई टलेइयोरी, पन असां तेरे ज़ोने सेइ ज़ाल छडतम ।”

6 आखकार पतरस ते तैसेरे सैथेई ज़ालां छैडी दितां ते एत्री मेछली लेगि, कि ज़ालां छिन्दोइतां मेछली बेइरोवं निस्सने लेगि ।

7 तैखन तैनेई अपने सैथन जो ज़ैना होरि किशती पुड़ थिए, इशारो कियो कि एज्जा इश्री मद्दत केरा, ते तैना भी आए ते किशती मेछलेई सेइ एत्री भेरोई जेई कि किशती डुबने लगी ।

8 शमौन पतरस एन हेरतां यीशुएरे पावन पुड़ पेइतां ज़ोने लगो, “हे प्रभु, अवं पापी मैन्हु आई तू मीं करां दूर भो!”

9 गल ए थी कि तै त तैसेरे साथी एत्री मेछली लेइतां हैरान भोइ जोरे थिये ।

10 तेरहो हाल जेब्देरे मटठां केरो यानी याकूब त कने यूहन्नारो भी थियो, ज़ैना शमौने सेइ साथी थिये, यीशुए शमौने सेइ ज़ोवं, “डर नन्ना अज्जेरे वाद तू मेछली टलाने वालो नई, बल्के मैनन् अकोट्टे केरतां मेरे चले बनानेवालो भोलो ।”

11 तैनेई किशती इलेखी एन्तां लेई, ते अपनू सब किछ छेडतां यीशु पत्ती ज़ले जे ।

ⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 8:1-4; ⓂⓂⓂⓂⓂ 1:40-45)

12 ज़ैखन यीशु एक्की नगर मां थियो, ते एरू भोवं कि तैड़ी अक मैन्हु थियो, ज़ेसेरे सैरी जानी कोद थियू, तैनी यीशु लाव, ते तै ज़ैन्हु केरे भारे बिशतां तैस कां मिन्नत केरतां ज़ोने लगो, “हे प्रभु तू चास त मेरू कोद बज्झेई सकतस ।”

13 यीशुए अपनो हथ तैस पुड़ रखवो ते ज़ोवं, “अवं चाताई, तू बज्जोस ।” ते तैखने तैसेरू कोद साफ भोइ जेवं ।

14 तैखन यीशुए तैस मैन्हु हुकम दित्तो, “हेर, एसेरे बारे मां केन्वी सेइ किछ न ज़ोइयां । बल्के अपनो आपे याजके हिरा । तैल्ला पत्ती, तू अपने बेज्जोनेरे वजाई सेइ ज़दतल चाद, ज़ेसेरे बारे मां मूसा नेवे कानूने मां हुकम दित्तोरोए । ताके लोकन पतो ज़ले कि तू बेज्जोरोस ।”

15 पन यीशुएरे बारे मां सेब्बन पतो लगो ते लोक दूरेरां देंते एजने लगे ताके यीशुएरी गल्लां शुन्न कने अपनि बिमैरन करां बेज्जोन ।

16 पन यीशु जादे केरतां सुनसान ठैरी ज़लो गातो थियो, ते प्रार्थना केरतो रातो थियो ।

ⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ ⓂⓂⓂⓂⓂⓂ

(ⓂⓂⓂⓂⓂ 9:1-8; ⓂⓂⓂⓂⓂ 2:1-12)

* 5:1 गन्नेसरतरे समुन्दरे इन गलील समुन्दरेरू दुइयोवं नवं आए

17 एककी दिहैड़ी एरू भोवं कि यीशु शिक्षा देने लगगोरो थियो, ते तैखन किछ फरीसी ते शास्त्री लोक ज़ोते थिये, तैना गलील इलाके ते यहूदियारे सैरी इलाकन मरां यरूशलेम नगरे मां ओरे थिये; ते परमेशेरी शक्ति यीशु सेइं साथी थी, ते बिमार बेज्झोइतां गाते थिये ।

18 किछ मैनेई अक अधरंगी मैन्हु खट्टी पुइ छुइतां आनोरोए थियो, ते तैना कोशिश लगे केरने कि एस अन्तर नेइतां यीशु कां पुजाम ।

19 पन अन्तर एतरी तंगी थी कि तैना अन्तर न गेइ सके फिरी तैनेई तैस घरेरी छत पुट्टी ज़ैस घरे मां यीशु थियो, ते खट्टां सने तै अधरंगी मैन्हु अन्तर यीशुएरे तुतरे अगर ओसालो ।

20 यीशु तैन केरो विश्वास हेरतां ज़ोवं, “हे दोस्त तेरे पाप माफ़ भोए ।”

21 शास्त्री ते फरीसी लोक सोचने लगे, “ए कौन मैन्हु आए, ज़ै परमेशेरी तुहीन केरते, परमेशेरे अलावा कौन पाप माफ़ केरि सकते?”

22 यीशुए तैन केरि गल्लां बुझी ते तैन जुवाब दित्तो, “तुस अपने-अपने मने मां एन्चरां किजो सोचने लगगोरेथ?”

23 कुन ज़ोनू सुखतुए, ‘तेरे पाप माफ़ भोए,’ या एन ज़ोनू ‘उठ, ते ज़ल फिर?’

24 पन तुसन पतो लगगे, मैनेरे मट्टे ज़मीनी पुइ पाप माफ़ केरनेरो अधिकारे,” फिरी यीशुए तैस बिमारे जो ज़ोवं, “अपनि खट सल्ल ते घरजो ज़लो गा ।”

25 तै अधरंगी बिमार मैन्हु सेब्वी केरे सामने ते खड़े उठो ते ज़ैस खट्टी पुइ तै झुलतो थियो, अपने दोग्गे पुइ छुइतां परमेशेरी बइयाई केरतो-केरतो घरजो ज़लो जेव ।

26 तैना सारे लोक हैरान राए ते परमेशेरी तारीफ़ केरने लगे ते कने ज़ोने लगे, “ए त असेई अज़ नव्वी गल लाई ।”

???? ???? ???? ???? ??????? ???? ???????
(?????? 9:9-13; ??????? 2:13-17)

27 एना गल्लां बीतनेरां बाद यीशु तैट्टां निस्सो, ते एक्की चुंगी धिन्ने वाले कां ज़ले जेव, तैसेरू नवं लेवी थियू । ते तै चुंगी नेनेबाले दफ़तरे मां विश्शोरो लाव, ते यीशुए तैस जो ज़ोवं, “तू मीं पत्ती ज़ल ते मेरो चेलो बन ।”

28 तै तैखने यीशु पत्ती ज़लो जेव ।

29 ते फिरी लेवी यीशुएरे लेइ अपने घरे अक बड़ी धाम दित्ती । ते तैड़ी चुंगी नेनेबाले ते होरे भी बड़े लोक थिये ज़ैना तैस सेइं साथी रोट्टी खाने विश्शे ।

30 फरीसी लोक ते शास्त्री यीशुएरे चलन सेइं ज़ोने लगगे, “तुस चुंगी नेनेबालन ते पापी लोकन सेइं साथी किजो खातथ पीतथ?”

31 यीशुए तैन सेइं ज़ोवं, “बिमारन डाक्टररी ज़रूरत भोचे, न कि सझर लोकन ।

32 अवं धर्मी लोकन नई, पन पापी लोकन कुजाने ओरोई कि, तैना अपने पापन करां मन फिरान ।”

?????? ????
(?????? 9:14-17; ??????? 2:18-22)

33 तैना लोक यीशु सेइं ज़ोने लगे, “यूहन्नारे चले त वरत रखतन ते प्रार्थना भी केरतन ते एन्चरे फरीसी लोक भी केरतन, पन तेरे चले त खातन पीतन?”

34 यीशुए तैन जुवाब दित्तो, “इलाएरे दिहाड़े, कुन लाड़ो साथी भोते सांते जन वरत रेखी सकतथ?”

35 पन तैना दिहाड़े एज्जले, ज़ैखन लाड़ो तैन केरां अलग कियो गालो (थानी मारो गालो) । तैन दिहैइन मां तैना (अपने दुखेरे वजाई सेइं) वरत रखेले ।”

36 फिरी यीशु तैन अक होरि मसाल दित्ती, “पुराने लिगड़े पुइ नव्वे लिगड़ेरी टलोई कोई न लाए, नता तै टलोई तैस मरां होरू भी छिंदेली, ते कने पुराने सेइं तै मिले भी नन्ना ।

37 नव्वो दाछारो रस पुरैनी मसकी मां कोई न छुइडे, नन्ना त नव्वे दाछारो रस सेइं मसक भी फैट्टी गाचे, ते दाछारो रस भी डुल्ली गाते, ते तै मसक भी बरबाद भोचे ।

- 38 किजोकि नव्वो दाछारो रस नव्वीं मसकन मां भरोरो लोडते ।
 39 कोई मैन्हु पुरानो दाछारो रस पीतां नव्वों न पीनो चाए, किजोकि तै ज़ोते कि पुरानो दाछारो रस जादे रोडोए ।”

6

Matthew 12:1-8; Mark 3:23-28

- 1 एक्की फेरे यीशु त तैसेरे चले आरामेरे दिहाड़े ऊडारन मांमेइं एक्की बत्तां ज़लोरे थिये, ते तैसेरे चले शिल्लां हथेइं सेइं प्रोडतां खाने लगगे ।
 2 एन लेइतां किछ फरीसी लोकेईं तैन सेइं ज़ोवं, “तुस एन कम किजो लोरेथ केरने, ज़ैन आरामेरे दिहाड़े केरनु जेइज नईं?”
 3 यीशुए तैन जुवाब दित्तो, “कुन तुसेईं पवित्रशास्त्रे मां कधे नईं पढेरू कि ज़ेइस इशुओ पूर्वज दाऊद राज़ो त तैसेरे साथी दलुखोरे थिये त तैनेईं कुन कियेरू थियूं?
 4 तैनेईं केन्त्रे परमेशेरे घरे मां गोइतां ज़ेदोरी रोट्टी खोरी थी, ते अपने सैथन भी दित्तोरी थी । तैना रोट्टी खैनी सिर्फ याजकां केरे लेइ जेइज थी ।”
 5 फिरी तैने तैन सेइं ज़ोवं, “मैनेरू मट्टू, यानी अवं आरामेरे दिहाड़ेरो भी प्रभु आई ।”

Matthew 12:9-14; Mark 3:1-6

- 6 एक्की बार यीशु प्रार्थना घरे मां गोइतां उपदेश शुनेईं राहोरो थियो, ते तेइस भी आरामेरी दिहाड़ी थी तैड़ी अक मैन्हु थियो, जेसेरो देइनो हथ शुक्कोरो थियो ।
 7 शास्त्री त फरीसी लोक यीशुएरी ताके मां थिये कि अगर यीशु आरामेरे दिहाड़े केन्वी बझालो त असन इलज़ाम लानेरो मौको मेलनोए ।
 8 पन यीशु तैन केरे बारे मां सेमझी जेव, यीशुए तैस शुक्कोरे हथेवाले मैन्हु सेइं ज़ोवं, “मझाटे खडे भो ।” तै खडो भोव ।
 9 तैखन यीशु तैन सेइं ज़ोवं, “अवं तुसन पुछतां कि आरामेरे दिहाड़े भलाई केरनि रोड़ीए या बुराई केरनि रोड़ीए, मैनेरी जान बज़ानी या मारनी?”
 10 ते तैनी ज़ेवरे पासना तैन केरां तक्कू ते तैस मैन्हु जो ज़ोवं, “अपनो हथ हिरा ।” तैनी मैने अपनो हथ अगरोवं कियो । त अकदम तैसेरो हथ बेज्झोव ।
 11 पन याजकन त फरीसन बड़ी सरक अईं तैना एप्पू मांमेइं बेंस केरने लगगे, कि असां यीशुए सेइं कुन केरम?

Matthew 10:1-4; Mark 3:13-19

- 12 तेइस एरू भोवं कि यीशु प्रार्थना केरनेरे लेइ एक्की पहाड़े पुड ज़दो, ते सैरी राती परमेशेरे कां प्रार्थना केरतो राव ।
 13 ज़ैखन टलेकडोने लगू त तैनी अपने चले एप्पू कां कुजाए ते तैन मरां 12 प्रेरित चुने ।
 14 अक शमौन ज़ैस जो पतरस भी ज़ोते थिये तैसेरो दला अन्द्रियास, याकूब, यूहन्ना, फिलिप्पुस, बरतुल्मै,
 15 मती, थोमा, हलफईरू मट्टू याकूब, ते शमौन ज़ैस जो जेलोतेस ज़ोतन ।
 16 ते याकूबेरू मट्टू यहूदा ते यहूदा इस्करियोती ज़ै तैसेरो टलुवाने बालो बनो ।

Matthew 4:23-25

17 तैखन यीशु तैन सेइं साथी चौरस ठैरी मां खडो भोव, ते तैसेरे चले भी तैड़ी अकोट्टे भोए ते सारे यहूदिया ते यरूशलेम नगरन त कने सूर ते सैदारे आसेपासेरे लोक समुन्दरेरे बन्नेरे बडे लोक ज़ैना तैड़ी थिये ।

18 एन लोक यीशु करां ज्ञान शुन्ने ते अपनि-अपनि बिमैरी तैस कां बड़ाने ओरे थिये, ते ज़ैन लोकन पुड़ भूतां केरे सैये सेइं दुखे मां थिये तैना भी बेज्झोइ जे ।

19 सब लोक तैस सेइं हथ लानेरी कोशिश केरते थिये किजोकि तैस मां शक्ति थी ज़ैस सेइं तैना बेज्झोते थिये ।

???? ?? ??? ??????? ???
(????? 5:1-12)

20 तैखन यीशु अपने चेलां केरे तकने लगो ते ज़ोने लगो,
“परमेशर तुसन बरकत देलो ज़ैना नमरथ,
किजोकि स्वर्गेरू राज़ तुशू आए ।

21 परमेशर तुसन बरकत देलो ज़ैना दलुखोरेथ,
किजोकि तुस रज़नेथ,
परमेशर तुसन बरकत देलो ज़ैना अज़ लेरां देतथ,
किजोकि तुसेईं हसनुए ।”

22 “परमेशर तुसन बरकत देलो,
ज़ैखन मैनेरे मट्टे, यानी मेरे चेलो भोनेरे वाजाई सेइं लोक तुशुशी तुहीन केरन,
ते तुसन भाईचारे करां कनारे छडेले,
ते तुसन बेइज़त केरेले,
ते तुशुशू नवं केट्टी छडेले ।”

23 “तैस दिहाडे खुशी भोइतां उछडथ, किजोकि हेरा तुशुशे लेइ स्वर्गे मां बडू इनामे । तैन केरे दादे-पडदादे नेवन सेइं भी एरो ज़ेरो बताव केरते थिये ।”

24 “पन अफ़सोस! तुसन पुड़ ज़ैना दौलतमन्दथ,
किजोकि तुसन सब किछ मैलेरूए ।

25 अफ़सोस! तुसन पुड़, ज़ैन तुस चाते थिये, तुसन तैन मैल्लू,
किजोकि तुस नियन्ने भोले,
अफ़सोस! तुसन पुड़ ज़ैना अज़ हसतथ
किजोकि तुस शोग केरेले ते लेरां देले ।

26 पन अफ़सोस! तुसन पुड़ ज़ैखन लोक तुसन जो भलू ज़ोन,
किजोकि तुशुशे दादे-पडदादेईं भी झूटे नेवन सेइं एरो बताव कियोरो थियो ।”

???? ??? ??? ??? ??????? ????? ???????
(????? 5:38-48; 7:12)

27 “अवं तुसन शुन्नेबालन सेइं ज़ोताई कि अपने दुश्मन सेइं प्यार केरा । ज़ैना तुसन सेइं बैर रखतन तैन केरू भलू केरा ।

28 ज़ैना तुसन जो बुरू ज़ोतन तुस तैन केरे लेइ बरकत मग्गा, ज़ैन तुसन बेइज़त केरन तुस तैन केरे लेइ प्रार्थना केरा ।

29 अगर कोई तुशुशे एक्की खैखोड़ी पुड़ थप्पड बाहे त होरो पासो भी तैसेरे पासे रखा, ते अगर कोई तुशुशू कोट नेते त कमीज़ भी तैस देथ ।

30 ज़े कोई तीं करां किछ मग्गे त तैस देथ अगर कोई तेरो सबाब नेते ते तैस करां वापस न मग्गा ।

31 ते ज़ेन्नेरे तुस चातथ कि लोक तुसन सेइं केरन तेन्नेरे तुस भी तैन सेइं तेरहु केरा ।

32 अगर तुस तैन्ने सेइं प्यार केरथ जैना तुसन सेइं प्यार केरतन त तुश्शू कुन एवसाने? किजोकि पापी लोक भी अपने प्यार करनेवालन सेइं प्यार केरतन।

33 अगर तुस तैन केरू भलू केरतथ जैना तुश्शू भलू केरतन त तुश्शू कुन एवसाने? किजोकि पापी लोक भी अपने प्यार करनेवालन सेइं प्यार केरतन।

34 अगर तुस तैन्ने ओधार देतथ जैन करां तुसन वापस भी मैलनेरी उमीदे, त परमेशर तुश्शी बड़याई किजो करे? किजोकि बुरे लोक भी अपने प्यार करनेवालन पेइसे देतन ताके तैन करां वापस मैलन।

35 पन तुस अपने दुश्मन सेइं प्यार केरा ते तैन केरू भलू केरा, ओधार देइयथ पन तैन करां वापस मैलनेरी उमीद न रेखथ, एल्हेरो स्वर्गे मां तुश्शे लेइ अक बड़ो फले, किजोकि तुस परमप्रधान परमेशरे बच्चे भोले, किजोकि तै परमेशर न मन्ने बालन पुइ ते ज़ालमन पुइ भी दया केरते।

36 ज़ेरो दया दिल तुश्शो बाजी तेरहे दया दिल तुस भी भोथ।”

~~~~~  
(~~~~~ 7:1-4)

37 “दोष न लाथ, तुसन पुइ भी दोष न लव गालो, निन्दा न केरा, तुश्शी भी निन्दा न की गाली, तुस होरन माफ केरले त तुसन भी माफ कियू गालू।

38 तुस होरि किछ देले त तुसन भी किछ दितू गालू तुश्शू बरकतरू भांड ज़ेन्चरे अन्नेरी हाटी हिलेइतां देतां तैन भी तेन्चरे ज़ैस हैटी सेइं तुस होरि करे लेइ मिनतथ तैस्से सेइं तुश्शे लेइ भी मिनेले।”

39 यीशुए तैन अक मिसाल शुनाई, “कुन कानो होरि काने बत हेरेई सकते? तैना त दुइये गढे मां बिछड़ेले?

40 चेलो अपने गुरू करां बड़ो न भोए पन हर एक्की गल्ली मां ज़ैखन सब शिखेलो त अपने गुरो ज़ेरो भोलो।

41 तू अपने दलाएरी एछ्छी मां कूड़ो किजो तकतस, पन तेरी एछ्छी मां त नग आए, ते तैसेरो तू खियाल भी न केरस?

42 तू अपने दलाए केन्चरे जोई सकतस कि, ‘तेरी एछ्छी मरां कूड़ो केदी?’ हे पाखंडी पेइले अपनि एछ्छी मरां नग कढ फिरी अपने दलाएरी एछ्छी मरां कूड़ो केदी सकतस।”

~~~~~  
(~~~~~ 7:16-20; 12:33-35)

43 “किजोकि केन्ची भी रोड़े बुटे बुरो फल न लगगे ते न केन्ची बुरे बुटे रोड़ो फल लगगे।

44 हर बुट अपने फले सेइं पिशैनोते। किजोकि न झलन सेइं फैगू लगन ते न झल्लन सेइं दाछ लगे।

45 रोड़ो मैन्हु अपने दिलेरे रोड़े खजाने मरां रोड़ी चीज़ां कढते ते बुरो मैन्हु अपने दिलेरे बुरे खजाने मरां बुरी चीज़ां कढते किजोकि जैन दिले मां भेरू भोते तैन्ने ज़बानी पुइ एइते।”

~~~~~  
(~~~~~ 7:24-27)

46 “ज़ैखन तुस मेरे ज़ोने पुइ अमल न केरथ त मीजो, हे पूरभु, हे पूरभु; किजो ज़ोतथ?

47 ज़ै मीं कां एइते ते मेरी गल्लां शुन्तां तैन पुइ अमल केरते त अवं तुसन सेइं ज़ोताई कि ते केसेरो ज़ेरो भोलो?

48 ते तैस मैनेरो ज़ेरोए ज़ैनी अपनू घर डुग्धी खाइ केढतां पेक्की टैरी घर बनाव ज़ैखन हड़ाई आई त तैस घरे किछ न भोवं, किजोकि तैसेरी मुनीयाद पेक्की टैरी थी।

49 पन ज़ै मेरी गल्लां शुन्तां तैन पुइ अमल न केरे त तै तैस मैनेरो ज़ेरोए, ज़ैनी अपनू घर रेती पुइ बनाव ते ज़ैखन हड़ाई आई त तैन घर डुल्ली जेवं ते तब्बा भोइ जेवं।”

## 7

8:5-13)

- 1 ज़ैखन तैनी लोकन एपनी सब गल्लां शुनेई छैडी, त तै कफरनहूम नगर मां अव।
- 2 तैडी केन्ची सूबेदारो अक टलारो सेवक बिमार थियो ते मरने बालो थियो।
- 3 तैनी यीशुएरी मुशूरी शुन्तां यहूदी केरे किछ बुजुर्ग तैस कां मिनत केरनेरे लेइ भेजे, कि तै एइतां मेरो सेवक बज्झाए।
- 4 तैना यीशु कां आए ते तैस कां मिनत केरने लगे, “तै इस काबले, कि तू तैसेरेलेइ इन केरस।
- 5 किजोकि ते इशुथी कौमी सेइं बड़ी हमदरदी रखते, ते इशुथू प्रार्थना घर तैन्नी बनेवरुए।”
- 6 यीशु तैन सेइं साथी-साथी ज़लो जेव, पन ज़ैखन तैस घरे नेडे पुजो त सूबेदारो होरि दोस्तन सेइं समाद भेजो कि, “प्रभु तकलीफ न केर, किजोकि अवं एस काबल नई कि तू मेरे घरे मां एज्जी सखत।
- 7 एस्से वजाई सेइं अवं भी अपना आप तीं का एजनेरे काबल न सेमझी बल्के अपनि ज़बानी सेइं जोस त मेरो नौकर बेज्झोइ सकते।
- 8 तै मैन्हु जोने लगे कि अवं भी केन्चेरे अधिकारे मां कम केरताई, ते सिपाही मेरे अधीन आन, ते ज़ैखन एक्की जो ज़ोतां कि ‘गा,’ त तै गाते, ते होरि जो ज़ोतां एई, त तै ‘एइते,’ ते अपने सेवके जो ज़ोताई, ‘इन कम केर,’ त तै केरते।”
- 9 यीशु एन शुन्तां हैरान रेइ जेव, ते पत्रोवं लोकां केरे पासे लगे तकने ज़ैना तैस पत्पती ओरे थिये तैन जो ज़ोने लगे, “कि अवं तुसन सेइं सत्र ज़ोताई कि मीं इस्राएल मुलखे मां इस गैर यहूदी मैनेरो ज़ेरो मैन्हु नई लोवरो ज़ै मीं पुइ एतरो विश्वास केरे।”
- 10 ते ज़ैना लोक यीशु कां भेजोरे थिये वापस ज़ैखन घरे आए त तै सेवक बेज्झोरो लव।

11 थोडे च़िररां पत्ती एरू भोवं कि यीशु नाईन नव्वेरे नगर मां ज़लो जेव, ते तैसेरे चले ते होरे भी बड़े लोक तैन सेइं साथी थिये।

- 12 ज़ैखन तैना नगरेरे फाटके पुइ नेडे पुजे, त हेरतन, कि अक मुइदो बेडर जो ज़लेवरोए, ते तैन अपनि अम्मारू अक्के मट्टू थियू, ते नगरेरे बड़े लोक तैस विधवा कुआन्शी सेइं साथी थिये।
- 13 एन लेइतां प्रभुए बड़ी तरस अव, ते तैस जो ज़ोवं, “लेरां न दे।”
- 14 फिरी यीशु नेडे एइतां शिड़ी सेइं हथ लाव, ते छूनेबाले रुके, ते यीशुए ज़ोवं, “ए जवान, अवं तीं सेइं ज़ोतां, खड़ो उठ।”
- 15 तैखन मुइदो उठो, ते गल्लां लगे केरने, ते यीशुए तै तैसेरी अम्मा सोंफतां छड़ू।
- 16 इन हेरतां सब लोक डेरि जे, ते परमेशेरी तारीफ़ केरने लगे, “अक महान नबी असन मां ओरोए, ते परमेशेरे अपने लोकन पुइ अपनि सिधी नज़र रखोरीए।
- 17 एस्से गल्लरी वजाई सेइं ए खबर यहूदियारे ते आसेपासेरे सेब्भी मुलखन मां फैली जेई।”

11:2-19)

- 18 ते यूहन्ना तैसेरे चलेई एन सैरी गल्लां केरि खबर दिती।
- 19 तैखन यूहन्ना एन शुन्तां दई चले कुजेइतां यीशु कां पुच्छने भेजे कि, “एजनेबालो तू आस, या असां होरि बलगम?”
- 20 तैनेई यीशु कां एइतां पुच्छू, “असां यूहन्ना बपतिस्मो देनेबाले तीं कां पुच्छने भेजोरेम, कि एजनेबालो तू आस, या असां होरि बलगम?”
- 21 तैखन यीशुए बड़े लोक बिमैरन ते तकलीफ, ते भूतन करां छुटाए, ते बड़े काने लोकन एच्छन लौ दिती।

22 यीशु तैन ज़ोवं, “जैन किछ तुसेई लाहेरूए ते शुनेरूए गोइतां यूहन्ना सेइं ज़ोथ, कि काने लातन, ते टोंटे च़लतन, ते कोढी केरू कोढ साफ भोते, ते टोंऊने शुन्तन, ते मुइदे ज़ीते भोतन, ते गरीबन खुशखबरी शुनाई गाचे ।

23 परमेशर तैस वरकत देते, ज़ै मीं पुइ शक न केरे ।”

24 ज़ैखन यूहन्नारे बिस्तार देनेवाले लोक वापस च़ले ज़े, त यीशु यूहन्नारे बारे मां गवाही देने लगो, “तुस जंगले मां कुन हेरने जोरे थिये? कुन हवाई सेइं हिलते निरेठरे डाल?

25 त फिरी तुस होरू कुन हेरने जोरे थिये? कुन रोड़ां लगगोरां लिगडन बालो मैन्हु? हेरा, ज़ैना मगां लिगडां लाने बाले मैन्हु, ते ज़ैना एश केरनेवाले लोक भोतन । तैना राज महलन मां रातन,

26 त फिरी तुस होरू कुन हेरने जोरे थिये? कुन कोई नबी? हाँ, अवं तुसन सेइं ज़ोताई, नेवी करां बड्डे ।

27 ए तैए, ज़ेसेरे बारे मां लिखोरूए, ‘हेर, अवं अपनो बिस्तार देनेवालो तीं अग्री-अग्री भेजताई, ज़ै तेरी बत अग्रोवं तियार केरेलो ।’

28 यीशुए ज़ोवं, “अवं तुसन सेइं सन्न ज़ोताई, कि ज़ै कुआन्शन करां ज़रमोरोए, तैन मां यूहन्ना वपतिस्मो देनेवाले करां बड्डो कोई नई । पन ज़ै परमेशरेरे राज्जे मां निकडोए, तै यूहन्ना करां बड्डोए ।”

29 ज़ैखन तैन लोकेई एन गल्लां शुनी त धइत नेनेवालेई भी यूहन्ना वपतिस्मो देनेवाले करां वपतिस्मो नेइतां परमेशर धर्मी मन्नो ।

30 पन फरीसी लोकेई ते शास्त्री लोकेई तैस करां वपतिस्मो न नेइतां परमेशरेरी मर्जी अपने बारे मां टाली ।

31 ‘बस्सा, अवं इस ज़मानेरे लोकां केरि मिसाल केस सेइं देई, तैना केसेरे ज़ेरेन?

32 तैना तैन मट्टां केरे ज़ेरेन ज़ैना बज़ारे मां विशोरां एक्की होरि जो हक देइतां ज़ोतन, ‘असेई तुशे लेइ बेंशोई बज़ाद, ते तुस न नच़चे, असेई शौग मनाव, पन तुसेई लेरां न दिती!’

33 किजोकि यूहन्ना वपतिस्मो देनेवालो न रोट्टी खांतो अव, न शराब पीतो अव, ते तुस ज़ोतथ, कि एस पुइ भूतेरो सैयो आए ।

34 मैनेरू मट्टू खातू पीतू अव, ते तुस ज़ोतथ, हेरा, तै पेटू ते शराबी मैन्हु, कने धइत नेनेवाले ते पापी लोकां केरो दोस्त ।’

35 पन अक्ल अपने सेब्मी मट्टन करां जादे सच़्ची सावत भोइ ।”

*~~~~~*

36 फिरी केन्च फरीसे यीशु का मिनत की, कि मीं सेइं साथी रोट्टी खा, बस्सा, तै तैस सेइं साथी तैसेरे घरे जेव, ते तैस सेइं साथी रोट्टी खाने लगो ।

37 त हेरा, अक बदचलन कुआन्श ज़ै तैस नगरेरी थी एन बुझतां कि यीशु फरीसेरे घरे रोट्टी खाने विशोरोए, संगमरमरेरे एक्की भांडे मां इत्र आनो ।

38 ते यीशुएरे पावन कां नेडे लेरां देंती खड़ी भोइ, ते तैसेरे पाव एंखेइं सेइं सेले ते अपने दोगेरे बालेई सेइं पोंछने लगी ते तैसेरे पावन फुम्मड़ी देने लगी कने पावन पुइ इत्र लाव ।

39 ज़ैनी फरीसे यीशु कुजोरो थियो, तैनी एन लाव, त ज़ोने लगो, “अगर ए मैन्हु नबी भोथो त बुझेथो कि ज़ै कुआन्श तैस कांए तै कौने ते ए केरि कुआन्शे? किजोकि ए बदचलने ।”

40 यीशु तैसेरे इन खियाल ज़ैनतां तैस सेइं ज़ोवं, “हे शमौन, मीं तीं सेइं किछ ज़ोनूए ।” फरीसे ज़ोवं, “हे गुरू ज़ो ।”

41 यीशुए तैस सेइं मिसाल देइतां ज़ोवं “केन्ची शोहुकारेरो केन्ची दूई ज़न्न कां कर्जो थियो, एक्की कां 500 दीनार\*, ते होरि कां 50 दीनार थिये ।

\* 7:41 शौव दीनार, शौव दिहेड़ी केरि मज़दूरी ।

42 जैखन तैन कां देने जो किछ् न राऊं, त तैनी शोहोकरे दुइने कज्जो माफ़ कमाव । बस्सा, कौन तैन मरां जादे शोहोकारे सेइं प्यार करेलो?"

43 शमौने जुवाव दित्तो, "मेरे समझी सेइं त जेसेरो जादे कज्जो माफ़ कियो ।" यीशुए ज़ोवं, "तीं ठीक फैसलो कियो ।"

44 यीशु तैस कुआन्शरे पासे तेकतां शमौने ज़ोवं, "कुन तू इस कुआन्शरां तकतस? अवं तेरे घरे अव, तीं मीं (रीतरे मुताबिक) पव धोने जो पानी न दित्तू, पन इसां मेरे पाव एंखेइं सेइं पव धोए ते अपने दोगगरे वालेईं सेइं पीछे ।"

45 तीं मीं (रीतरे मुताबिक) फुम्मड़ी न दित्ती, पन एसां ज़ैखनेरो अवं इड़ी ओरोईं मेरे पव्वन फुमड़ी देनी न उडैईं ।

46 तीं मेरे दोगगे पुड़ तेल न मल्लो, पन एसां मेरे पावन पुड़ इतर मल्लो ।

47 "एल्हेरेलेइ अवं तीं सेइं ज़ोताईं कि, एसांरे जादे पाप ज़ैना एसां कियोरे थिये, माफ़ भोए, किजोकि एसां जादे प्यार कियो, पन जेसेरे थोडे पाप माफ़ भोतन तै थोडे प्यार करते ।"

48 यीशुए तैस कुआन्शी जो ज़ोवं, "गा तेरे पाप माफ़ भोए ।"

49 एस गल्ली पुड़ ज़ैना तैस सेइं साथी रोट्टी खाने विशशोरे थिये, अपने-अपने मने मां सोचने लगे, "ए कौने ज़ै पाप भी माफ़ करते, पाप त सिर्फ परमेशर माफ़ करते?"

50 पन यीशुए तैस कुआन्शी सेइं ज़ोवं, "परमेशरे तू एल्हेरेलेइ बचाई कि तीं मीं पुड़ विश्वास कियो, हुनी तू खुशी सेइं गा ।"

## 8

~~~~~

1 थोडे चिररां बाद एरू भोवं यीशु अपने तैन 12 चलेन सेइं साथी नगर-नगर ते डलव्वे-डलव्वे हंटतो ते प्रचार केरतो राव, ते परमेशरेरे राज्जेरी खुशखबरी शुनातो राव ।

2 किछ् कुआन्शां भी तैन सेइं साथी थी, ज़ैन मरां भूतां केरो सैयो कढोरो थियो । ते ज़ैन केरि बिमैरी दूर भोरी थी, तैना केरां नव्वां इना आन, मरियम ज़ै मगदलीन डलव्वेरी राने वाली थी, ज़ैस पुड़ां सत भूतां केरो सैयो कढोरो थियो,

3 हेरोदेस राज्जेरे भण्डारी खोजेरी कुआन्श योअन्ना ते सूसन्नाह ते होरि भी काई कुआन्शां थी ज़ैना अपनि जेइदात देइतां यीशु ते तैसेरे चेलां केरि सेवा केरती थी ।

~~~~~

(~~~~~ 13:1-9; ~~~~~ 4:1-9)

4 फिरी ज़ैखन बडे लोक तैस कां अकोट्टे भोए, ज़ैस मां नगरां-नगरां केरे लोक तैस कां एइते थिये । यीशुए तैन मिसाल देइतां ज़ोवं ।

5 "एक्सां अक बीज बेनेबालो बीज बेने जो जेव । बीज बेते वार किछ् बीज बत्तेरे डलेखी बिछ्ड़ू ते अम्बरेरे चुड़ोल्लेईं एइतां तैन बीज चुनू ।

6 ते किछ् बीज घोड़नवाली ज़मीनी पुड़ बिछ्ड़ू, ते लग्गू पन जल्दी शुक्की जेव, एल्हेरेलेइ कि तैस पानी न मैल्लू ।

7 किछ् बीज कटां केरे झैल्लन मां बिछ्ड़ू । ज़ैखन तैड़ी बूटो लगो, त कटां केरे झैल्लेईं भी बेड़ोइतां तै बूटो दवेइ छ्ड़ोइ ।

8 ते किछ् बीज रोड़ी ज़मीनी मां बिछ्ड़ू, ते लगू ते शौव गुणा फल लगो," एन शुनेइतां तैनी तैन सेइं उच्ची आवाजी मां ज़ोवं, "ज़ै कोई समझनू चाते, तै ध्याने सेइं शुने ते समझे ।"

~~~~~

(~~~~~ 13:10-17; ~~~~~ 4:10-12)

9 तैसेरे चलेईं तैस पुच्छू, "एस मिसालरो कुन मतलबे?"

10 यीशुए तैन ज़ोवं, “तुसन परमेशेरे रे राज़ेरे भेदां केरि समझ दिचोरीए, पन अवं होरि लोकन मिसाल देइतां ज़ोताई,
तैन तैना बार-बार शुनेले, पन मेरी गल न समझेले।”

ॐॐॐ ॐॐॐॐॐॐॐ ॐॐॐॐॐ ॐॐॐ
(ॐॐॐॐ 13:18-23; ॐॐॐॐ 4:13-20)

11 “एस मिसालरो ई मतलब, कि बीज परमेशेरे वचने।

12 ज़ैना मैन्हु परमेशेरी गल्लां शुन्तन, तैन मरां किछ लोक तैस बत्तेरे ज़ेरे आन, ज़ैड़ी बीज बिछइते। तैना त परमेशेरी गल्लां शुन्तन, पन शैतान अकदम एइतां तैन मैन्हु केरे दिले मरां तैन वचन धिनी गाते, कि एरू न भोए कि तैना विश्वास केरन ते तैन मुक्ति मैल्ले।

13 ते घोड़नवाले ज़मीनी मां बेवरू बीज तैने, ज़ैना वचन शुन्तां खुशी सेइं मन्तन पन ज़ील न छडने सेइं तैना थोड़े चिरे तगर विश्वास रखतन ते अज़मैइशेरे मौके मुड़ी गातन।

14 ते ज़ैन झल्लन मां बीज झड़ तैना इना आन, ज़ैना वचन शुन्तन, पन अग्रोवं च़ेलतां फिक्र ते दौलत ते ज़िन्दगरो एशो-अशरती मां फेसी गातन ते तैन केरो फल न पक्के।

15 पन रोड़ी ज़मीनी पुड़ेरूए बीज तैन्न, ज़ैना वचन शुन्तन ते अमल भी केरतन, ते रोड़ेच़ारे दिले मां बसातन ते सबरी सेइं फल भी लगते।

ॐॐॐॐ ॐॐॐॐ
(ॐॐॐॐ 4:21-25)

16 “कोई दीयो बैलतां केन्ची भांडे हैट ओड़कतां न रखे, ते न खट्टी हैट रखे बल्के उच्ची टैरी रखतन ताके दीयो अन्तर एजने बालन लौ दे।

17 किजोकि कोई एरी चीज छपोरी नई, ज़ै बांदी नई भोनी, ते कोई भेद छपोतो न रालो, पन सारो भेद बांदो भोलो।

18 बन्सा हुशार राथ, कि तुस केन्चरे शुन्तथ? ज़ैस कां परमेशेरी मर्ज़ी समझनेरी इच्छा आए, तैस परमेशर जादे समझ देलो। पन ज़ैस कां परमेशेरी मर्ज़ी समझनेरी इच्छा नई, तैस केरां थोड़ी ज़ेरि समझ, ज़ै तैस कां आए, तै भी नी गाली।”

ॐॐॐॐॐ ॐॐॐॐ ॐॐ ॐॐॐॐ
(ॐॐॐॐ 12:46-50; ॐॐॐॐ 3:31-35)

19 फिरी तैसेरी अम्मा ते तैसेरे दूला तैस कां आए, पन हछे मैन्हु केरि वजाई सेइं तैस कां न पुज़ी सके।

20 ते यीशुए पतो दित्तो, “तेरी अम्मा ते तेरे दूला बेइर खड़े आन ते तैना तीं सेइं गल केरनि चातन।”

21 यीशुए तैन जुवाव दित्तो, “मेरी अम्मा ते मेरे दूला इना आन ज़ैना परमेशेरे वचन शुन्तन ते तैस पुड़ अमल भी केरतन।”

ॐॐॐॐ ॐॐॐॐ
(ॐॐॐॐ 8:23-27; ॐॐॐॐ 4:35-41)

22 फिरी एक्की दिहाड़े एरू भोवं, कि यीशुए अपने चलन सेइं ज़ोवं, “एज्जा, समुन्दरे पार गाम ते तैना किशती मां च़ेदतां समुन्दरे पार च़ले जे।”

23 पन ज़ैखन किशती च़लोरी थी, त यीशुए झुली जेव ते समुन्दरे पुड़ बड़ो तूफान अव, ते किशती पैनी सेइं भेरोने लगगी, ते तैन खतरो भोइ जेव।

24 च़ेलेइं तै बींझइतां तैस सेइं ज़ोवं, “हे गुरु, असां मेरि गातम यीशु खड़े उठो ते हवाई जो ते पैनी जो ज़ोवं, रुकी गाथ ते तूफान रुकी जेव।”

25 यीशुए अपने चलन सेइं ज़ोवं, “तुशो विश्वास कोरां जेव?” तैना डेरि जे ते हैरान भोइतां एपू मांमेइं ज़ोने लगे, “ए कौने! ए हवाई त पैनी भी हुकम देते ते तैना एसेरो हुकम मन्तन।”

45 यीशुए ज़ोवं, “मेरे लिगडे सेइं केनि हथ लाव?” ज़ैखन सब लोक इन्कार केरने लगे, त पतरसे ते तैसेरे सैथेईं ज़ोवं, “ए गुरू, लोक तीं दलान्नने ते तीं उन्ढे बिच्छुइने लोरेन।”

46 पन यीशु ज़ोवं, “केन्चे मीं सेइं हथ लोरोए किजोकि मीं पतो लगे कि मीं मरां शक्ति निसोरिए।”

47 तेखन तैस कुआन्शां हेरू, कि अवं छेप्पी न बेटि, त तै डरती-डरती सामने अईं ते यीशुएरे पावन पुड़ बिच्छुइतां सैरी लोकां केरे सामने ज़ोने लगी, मीं तीं सेइं हथ लोरोए, ते ज़ेरो मीं हथ लोरोए अवं अकदम वेज्झोरी।

48 यीशुए तैस कुआन्शी ज़ोवं, “हे कुईए, तेरे विश्वासे तू बज्झाईं ते खुशी सेइं चली गा।”

49 यीशु एन हेजू ज़ोतो थियो, त प्रार्थना घरेरे प्रधानेरे तैट्टां केन्चे मैने एइतां ज़ोवं, “तेरी कुई मेरि जेवरिए, हुनी गुरू तकलीफ न दे।”

50 पन यीशु एन शुन्तां जुवाब दित्तो, “न डर। सिर्फ मीं पुड़ विश्वास रख कुई बेंची गानीए।”

51 ज़ैखन तै तैस घरे मां जेव, त तैनी पतरस यूहन्ना ते याकूब ते कुइयरे हाज बव्वेरे अलावा होरो कोई अन्तर एजने न दित्तो।

52 सब लोक तैस कुइयरे लेइ लेरां देंते थिये, पन यीशुए ज़ोवं, “लेरां न देथ, ए कुई मूओरी नईं बल्के झुलोरोए।”

53 लोक एन शुन्तां हसने लगे, किजोकि तैना ज्ञानते थिये कुई मेरि जेवरिए।

54 पन यीशुए तैस कुइयरो हथ टलाव ते ज़ोवं, “कुइये खड़ी उठ।”

55 ते तैसारे प्राण वापस आए ते तै लूशी खड़ी भोइ, ते यीशुए तैन ज़ोवं, एस कुइये किछु खाने जो देथ।

56 तैस कुइयरे हाज बव हैरान रेइजे, पन तैनी तैन सेइं समझेइतां ज़ोवं, ज़ैन किछु इड़ी भोवं एन केन्ची सेइं न ज़ोइयथ।

9

12 [REDACTED] [REDACTED]

([REDACTED] 10:5-15; [REDACTED] 6:7-13)

1 यीशुए अपने 12 चले एप्पू कां कुजाए ते तैन शक्ति ते अधिकार दित्तो कि सैरी भूतन कढन ते विमैरी दूर करन।

2 ते यीशुए तैना परमेशेरे राज्जेरो प्रचार केरनेरे लेइ ते विमार बज्झानेरे लेइ भेजे।

3 तैनी तैन सेइं ज़ोवं, “बत्तां जो किछु न नेइयथ, न सोटी न झोलो न रोट्टी न पेंइसे ते न दुइयोवं लिगडां।

4 ज़ैस घरे मां गाथ त तैड़ी बिशुशी रेइयथ ज़ां तगर तुस तैस नगरे मरां न गाथ।

5 ते ज़ैस नगरेरे लोक तुसन कबूल न केरन त तैस नगर मरां गांते बार अपने पांवां केरि धूड़ टुड़कथ, ताके तैन पुड़ गवाही भोए।”

6 बस्सा, तैना चले जे, ते इलोव्वे-इलोव्वे गोइतां परमेशेरी खुशखबरी शुनाते, ते लोकन विमैरन करां बज्झाते चले जे।

[REDACTED] [REDACTED]

([REDACTED] 14:1-12; [REDACTED] 6:14-29)

7 मुलखरो च़ेवरोवं हिस्से पुड़ हेरोदेस राज़ो राज़ केरतो थियो, तै एन सब शुन्तां डेरि जेव। किजोकि किछु ज़ोते थिये यूहन्ना मुइदन मरां ज़ीतो भोरोए।

8 ते किछु ज़ोते थिये एलिय्याह लेइहोरोए, ते किछु ज़ोते थिये नेबन मरां कोई ज़ीतो भोरोए।

9 पन हेरोदेसे ज़ोवं, “यूहन्नारी क्रोड़ी त मीं कट्टेवरी थी, पन ए कौन आए, जेसेरे बारे मां एरी ज़ेरि गल्लां शुन्ने मां एजने लोरिन?” ते हेरोदेस यीशु हेरनेरी इच्छा की।

[REDACTED] 5000 [REDACTED] [REDACTED]

([REDACTED] 14:13-21; [REDACTED] 6:30-44; [REDACTED] 6:1-14)

10 फिरि परेरितेई वापस एइतां जैन किछ कियेरू थियूं, यीशु सेइं शुनावं, ते यीशु तैन अलग नेइतां वैतसैदा नव्वेरे नगर मां चलो जेव ।

11 ते बडे लोक तैस पत्ती चले, ते यीशु बडे खुशी सेइं तैन सेइं मिलो । ते तैन सेइं परमेशेरे राज्जेरी गल्लां करेने लगो, ते जैना बिमार ठीक भोनू चाते थिये, तैनी तैना बज्जाए ।

12 जैखन दिहाडी डुबने लगी त तैन 12 चलेई यीशु सेइं ज़ोवं, “एन लोकन भेजी छुड एना कोस्कोई इलॉव्वन मां गेइतां विशन ते रोट्टारो इंतजाम करेन । किजोकि असां गैर आबाद ठैरी आम ।”

13 तैनी तैन सेइं ज़ोवं, “तुस्से एन किछ खाने जो देथ ।” तैनेई ज़ोवं, “असन कां पंच रोट्टी ते दूई मेछलीन करां जादे किछ भी नई, पन असां गेइतां एन जेई रोट्टी मुल्ले घिन्तां आनतम, त इन भोइ बटते ।”

14 (किजोकि तैन लगभग 5000 मइद थिये ।) यीशुए अपने चलन सेइं ज़ोवं, “एन लोकन 50-50 मैन्हु केरि हुन्डी मां विशाला ।”

15 ते चलेई तैन्ने कियूं ते तैना तेन्चरे विशाले ।

16 तैखन तैनी तैना पंच रोट्टी ते दूई मेछली नी, ते अम्बेरां तेकतां शुकर कियूं, फिरि तैनी तैना रोट्टी टलोडी ते चलन कां दिती, कि तैन विशालोरे लोकन खाने जो देन ।

17 सारे मैन्हु खेइतां रेऊजी जे । तैल्ला पत्ती, यीशुएरे चलेई बचोरे टुकड़न सेइं 12 टोकरी भेरि ।

~~~~~

(~~~~~ 16:13-20; ~~~~~ 8:27-30)

18 एककी बार यीशु अकैल्लो पुरार्थना करेने लोरे थियो, ते चले भी तैस सेइं थिये । यीशुए तैन पुचछ, “कि लोक मींजो कुन ज़ोतन?”

19 चलेई जुवाब दित्तो, “किछ ज़ोतन यूहन्ना बपतिस्मो देनेवालो, ते किछ ज़ोतन एलिय्याह, ते किछ ज़ोतन नेबन मरां कोई अक ज़ीतो भोरोए ।”

20 तैखन यीशुए चलन पुचछ, “पन तुस मेरे बारे मां कुन सोचतथ कि अवं कौन आई?” पतरसे जुवाब दित्तो, “तू परमेशेरो मसीह आस ।”

21 तैखन तैनी तैन खबरदार केरतां ज़ोवं, “कि ए गल केन्ची सेइं न ज़ोइयथ ।”

~~~~~

(~~~~~ 16:21-23; ~~~~~ 8:31-33)

22 यीशुए ज़ोवं, “मैनेरे मट्टेरे लेइ ज़रूरी आए, कि तै बडो दुःख झैल्ले, यहूदी लोकां केरे बुजुर्गन, प्रधान याजकन, ते शास्त्री तैस घटिया सेमझतां मारेले, ते तै टलेइयोवं दिहाडे फिरि ज़ीतो भोलो ।”

~~~~~

(~~~~~ 16:24-28; ~~~~~ 8:34-9:1)

23 फिरि यीशुए तैन सेबन ज़ोवं, “अगर कोई मीं पत्ती एजनो चाए, त अपने आपेरो इन्कार केरे, ते रोज अपनू करूस छूए ते मीं पत्ती चले ।

24 किजोकि ज़े कोई अपनि जान बचानी चाते तै तैस गुवालो, पन ज़े मेरे लेइ अपनि जान गुवालो त तै तैस बचालो ।

25 मैन्हु अगर सारी दुनिया हासिल केरे, ते अपनि जानरो नुकसान केरे, या अपनो आप गुवाए, त तैस कुन फेइदो?

26 किजोकि अगर कोई मैन्हु मीं करां त कने मेरी गल्लन करां शरमाते, त मैनेरू मट्टू यानी अवं भी तैस केरां शरमालो । ज़ेइस अवं अपने बाजी केरि महिमा सेइं साथी त कने पवित्तर स्वर्गदूतन सेइं साथी वापस एज्जलो, त तेइस अवं तैस केरां भी शरमालो ।”

27 “अवं तुसन सेइं सज्ज ज़ोतई कि जैना इडी खडे आन, तैन मरां किछ मैन्हु एरे आन कि ज़ांतगर तैना परमेशेरे राज्जेरी शक्ति न हेरेले, तांतगर तैना न मरेले ।”

॥॥॥॥॥॥ ॥॥॥ ॥॥॥॥॥॥  
(॥॥॥॥॥ 17:1-8; ॥॥॥॥॥ 9:2-8)

28 एन गल्लां करे लगभग अठ दिहाइना बाद पतरस, ते यूहन्ना ते याकूब साथी नेइतां एक्की पहाड़े पुड़ प्रार्थना करने चले जे ।

29 ते ज़ैखन यीशु प्रार्थना लोरो थियो करने, त तैसेरी शकल बेदलोई जेई, ते तैसेरां लिगड़ां लोअरां जेरां चमकने लगो ।

30 ते हेरा, मूसा, ते एलिय्याह, इन्ना दूई मड़द तैस सेइं गल्लां करने लगगे ।

31 इन्ना महिमा सेइं साथी लेइहोए, ते तैसेरे मरनेरी गलवात करने लोरे थिये, ज़ैन किछ् यरूशलेम नगरे मां भोनेवालू थियूं ।

32 पन पतरस ते तैसेरे सैथी केरि एच्छ्छी निडली सेइं गिरकी भोरी थी, ज़ैखन तैना वींझे, त तैनेई तैसेरी महिमा ते तैना दूई मड़द भी लाए, ज़ैना तैस सेइं साथी खड़े थिये ।

33 ज़ैखन तैना तैस करां चले, त पतरसे यीशु सेइं ज़ोवं, “हे गुरु, इश्शू इडी रानू रोड़ोए, कि असां ट्लाई डेरे बनाम, अक तेरे लेइ, ते अक मूसेरे लेइ, ते एलिय्याहरे लेइ ।” तैस पतो न थियो, कि ते कुन लोरोए ज़ोने ।

34 ते इन ज़ोई राओरो थियो, तैन पुड़ बिदलार घिरी जेई, ते ज़ैखन तैन केरे च़ेवरे पासन बिदलारी घिरी तू तैना डेरि जे ।

35 तैखन तैस बिदलारी मरां अक आवाज़ आई, “एन मेरू ट्लारू मट्टू आए । ध्याने सेइं एसेरी गल शुना !”

36 ते तैस आवाज़ी सेइं साथी तैनेई यीशु अकैल्लो लाव, ते तैना चुप राए ते ज़ैन किछ् लाहेरू थियूं, तैन केन्ची सेइं न ज़ोवं ।

॥॥॥॥ ॥॥॥॥॥॥ ॥॥॥॥॥॥ ॥॥॥ ॥॥॥  
(॥॥॥॥॥ 17:14-18; ॥॥॥॥॥ 9:14-27)

37 होरसां एरू भोवं कि ज़ैखन तैना पहाड़े पुड़ेरां उन्डे ओरे थिये, त बड़े मैन्हू केरि भीड़ तैन कां आई ।

38 ते हेरा, एक्की मैने तैन लोकन मरां बड़े ज़ोरे सेइं हक देइतां ज़ोवं, “ए गुरु अवं तीं कां ज़ोवले हथ केरतां कि मेरे मट्टे पुड़ दया केर; तैन मेरू अक्के मट्टूए ।

39 ते हेर, अक भूत तैस अपने कब्जे मां करते, ते तैन अकदम चिन्डां मारते, ते कम्बने लगते, ते तैसेरे ऐशेरां शैमफ निसचे, ते भूत तैस बड़े बुरे तरीके सेइं ज़ख्मी केरतां शारते ।

40 ते मीं तेरे चलन कां बिनती कियोरी थी, कि तैस कढन, पन तैना न केदी सके ।”

41 यीशुए जुवाब दित्तो, “हे विश्वास न करने बालाव ते डीठ लोकव, अवं केइस तगर तुसन सेइं साथी रेइलो ते तुश्शी झैल्लेलो? अपने मट्टे इडी आन ।”

42 तै मसां ओरो थियो, त भूते तैन मट्टू मुरोड़तां शारू, पन यीशुए भूत झिड़कतां कट्टू, ते तैन मट्टू बज्जेइतां तैसेरे बाजरे हवाले कियूं ।

॥॥॥॥ ॥॥॥॥॥॥ ॥॥॥॥ ॥॥॥ ॥॥॥॥॥॥॥॥॥ ॥॥॥ ॥॥॥॥  
(॥॥॥॥॥ 17:22-23; ॥॥॥॥॥ 9:30-32)

43 ते सब लोक परमेशेरी बेई कुदरती हेरतां हैरान रेइजे, ते ज़ैखन सब लोक तैन कम्मां ज़ैन यीशु केरतो थियो हैरान रहते थिये । त तैनी अपने चलन सेइं ज़ोवं ।

44 “मेरी इन गल्लां रोड़ेचारे शुना किजोकि मैनेरू मट्टू मैन्हू केरे हवाले भोने बालूए ।”

45 पन यीशुएरी ए गल चेलां केरि समझी मां न आई, किजोकि तैन करां ए गल छुपेरी थी । कि तैन न समझन, ते चले एस बारे मां यीशु पुच्छने करां डरते भी थिये ।

॥॥॥॥॥॥ ॥॥॥॥॥॥ ॥॥॥  
(॥॥॥॥॥ 18:1-5; ॥॥॥॥॥ 9:33-37)

46 फिरी चलन एप्पू मामेई बड़ी बेस भोइ, कि असन मां बड़ो कौन आए?

47 यीशु तैन केरि दिलेरी गल्लां बुझतां निकडो बच्चो आनो ते तै एप्पू कां खडू कियूं।

48 ते अपने चलन सेइं ज़ावें, “जै इस बच्चे मेरे नव्वे सेइं कबूल करते, तै मीं कबूल करते, ते जै मीं कबूल करते, तै मेरे भेजने बाले कबूल करते। किजोकि जै तुसन मां निकडे करां निकडोए तै सेभन करां बड्डोए।”

२२ २२२२ २२२ २२ २२२ २२२  
(२२२२२ 9:38-40)

49 तैखन यूहन्ना यीशु सेइं ज़ावें, “ए गुरू, असेईं अक मैन्हु तेरे नव्वे सेइं भूतां केरो सैयो कढतो लाव, ते असेईं तैस ठाकू किजोकि तै असन सेइं साथी मिलतां तीं पत्ती न चले।”

50 पन यीशुए जुवाब दित्तो, “तैस न ठाका, किजोकि जै तुशशे खलाफ नईं तै तुशशो पासे।”

२२२२२ २२२२ २२२२२२२ २२२२२२२२ २२२२२२

51 जैखन यीशुए उबरे ननेर दिहाडें पूरे भोने पुड धी त तैनी पक्के चारे यरूशलेम नगरेरे पासे गानेरो खियाल कियो।

52 ते एप्पू करां अग्री-अग्री किछ बिस्तार देनेबाले लोक भेजे। ते लोक सामरी लोकां केरे एक्की डलोवें मां जे ताके यीशुए एजनेरी ठार तियारी केरन।

53 पन लोकेईं तै एजने न दित्तो, किजोकि तै यरूशलेम नगरे जो चलोरो थियो।

54 एन हेरतां तैसेरे चले याकूब ते यूहन्ना ज़ोने लगे, “हे परभु, कुन तू चातस, कि अस हुक्म देम, अम्बरेरां अग बखेनतां एन लोकन भस्म केरे?”

55 पन तैनी बेदलोइतां तकू, ते तैना झिडके (ते ज़ावें, “तुस न ज़ानथ कि तुस कौस आत्मारै आथ।

56 किजोकि मैनेरू मट्टू लोकां केरे प्राणन नाश केरने लेइ नईं बल्के बचाने ओरोए)” तैखन तैना होरि डलोव्वेरे पासे चले जे।

२२२२२२२ २२२२ २२२२२२२२ २२२२२२२२  
(२२२२२ 8:19-22)

57 जैखन तैना बत्तां चलोरे थिये, त केन्वे तैस सेइं ज़ावें, “तू ज़ैडी-ज़ैडी भी गालो, अवं तीं पत्ती चलेलो।”

58 यीशुए तैस सेइं ज़ावें, “लौईं केरि कूदां ते अम्बरेरे चुडोल्लू केरे आले भोतन, पन मैनेरे मटटे यानी मीं कां कोई ठार नईं ज़ैडी अवं झुल्ली सेक्खी।”

59 फिरी यीशु एक्की होरि जो ज़ावें, “मीं पत्ती चले,” पन तैनी मैने ज़ावें, “हे परभु मीं घरे गानेरी अज़ाज़त दे, मेरे बाजरे मरनेरां बाद अवं तैस देबतां एज्जेलो ते फिरी तीं पत्ती चलेलो।”

60 यीशुए तैस जो ज़ावें, “जैना लोक आत्मिक तरीके सेइं मरंन तैन अपने मैन्हु मरने बलगने दे, पन तू गा ते परमेशेरे राज़ेरे बारे मां लोकन मां प्रचार केर।”

61 एक्के होरे भी ज़ावें, “ए परभु अवं तीं पत्ती चलेलो, पन पेइले मीं भेज कि अवं अपने घरेबालन जोई।”

62 यीशुए तैस सेइं ज़ावें, “जै कोई हल्ली पुड हथ रेखतां पत्रोवं फिरतां तकते, तै परमेशेरे राज़ेरे कावल नईं।”

## 10

70 २२२२२ २२२२२२

1 ते इन गल्लां केरे बाद परभुए 70 होरे चले ठहराए, कि तै ज़ैस-ज़ैस नगर ते ठैरी तैनी एप्पू गानेरे बारे मां सोचोरू थियूं, तैडी दूईं-दूईं मैन्हु एप्पू अग्री भेजे।

2 ते तैनी तैन सेइं ज़ावें, “पकारी फसलरे ज़ेरे बडे लोक तियार आन ज़ैना परमेशेरे वचने पुड विश्वास केरनू चातन, पन कम केरनेबाले थोडे आन ज़ैना तैन परमेशेरे राज़ेरे बारे मां ज़ोन।



23 तैखन तैनी अपने चेलां केरे पासे फिरो अकैल्ले मां ज़ोवं, “धन आन तैना एच्छ्छी ज़ैना एना गल्लां हेरचन ज़ैना गल्लां तुस लातथ,

24 किजोकि अवं तुसन सेइं ज़ोतां, कि बड़े नेबन ते राज़ां केरि खुवैइश थी, कि एना गल्लां हेरन, ज़ैना तुसेईं लेईं, पन न लेईं सके, ते एना गल्लां शुन्न ज़ैना तुस शुन्तथ पन न शुनी बेटि ।”

~~~~~

25 एक्सां यीशु लोकन शिक्षा देने लोरो थियो, ते हेरा, अक शास्त्री खडो भोव, ते इन ज़ोइतां तैस अजमाने लगो, “ए गुरु, हमेशारी ज़िन्दगी हासिल केरनेरे लेइ अवं कुन केरि?”

26 तैनी तैस जुवाब दित्तो, “मूसेरे कानूने मां कुन लिखोरूए? तू केन्चरे समझतस?”

27 तैनी जुवाब दित्तो, “तू प्रभु अपने परमेशरे सेइं अपने सारे दिले, सैरी जानी सेइं, ते अपनि सैरी ताकती सेइं ते अपनि सैरी अक्ल सेइं प्यार रख, ते अपने पड़ोसी सेइं अपने बराबर प्यार केर ।”

28 तैनी तैस सेइं ज़ोवं, “तीं ठीक जुवाब दित्तो एन्ने केर, फिरी तीं हमेशारी ज़िन्दगी मैलेली ।”

29 पन तैनी अपनो आप धर्मी ठहरानेरे लेइ यीशु पुच्छ्छ, “फिरी मेरो पड़ोसी कौने?”

30 यीशुए तैस मिसाल देइतां जुवाब दित्तो, “अक मैन्हु यरूशलेम नगरेरां यरीहो नगरे जो ब्रलोलो थियो, ते तै डैकेइं तैस पुड़ हमलो कियो, ते ज़ैन किछ तैस कां थियूं नेव । ते तैसेरां लिगड़ां खोल्लां, ते मारो कुट्टो ते ज़ख्मी केरतां अधमरो बनेइतां तैड़ी ज़ेरे छुडतां ब्रले जे ।

31 ते एरू भोवं कि, अक याजक तैस बत्तां ब्रलोलो थियो, तैनी तै लव ते थरकतो तैसेरी मद्दत केरने बगैर इलखमेइं निस्सो ।

32 एन्चरे अक मन्दरे मां कम केरनेवालो लेवी भी निस्सो, ते तैस लेइतां तै भी इलखमेइं निस्सो ।

33 फिरी अक सामरी मुसाफर भी तैस बत्तां निस्सो, ते तैस लेइतां तैस बड़ो तरस अव ।

34 ते तै तैस कां जेव, ते तैसेरे ज़खमन तेल मल्लो ते दाछोरो रस लाव, ते तैसेरे ज़खमन पट्टी बंधी ते अपने गधे पुड़ ब्रेइतां एककी धर्मशाली मां तैसेरी सेवा की ।

35 होरसां तैनी दूई दीनार केइतां धर्मशाले मालिके कां दित्ते, ते ज़ोवं, ‘एसेरी हेरगेश करां अगर जादे लगगेले त अवं वैपसी पुड़ देलो ।’

36 तेरे समझी मां एन टलेइन मरां कौन तैसेरो पड़ोसीए ज़ै डैकेइं टलातोरो थियो?”

37 तैनी जुवाब दित्तो, “ज़ैनी तैस पुड़ दया की ।” यीशुए तैस सेइं ज़ोवं, “गा, तू भी एरू केर ।”

~~~~~

38 फिरी ज़ैखन यीशु त कने तैसेरे चले गइ रावरे थियो, त तैना एककी इलव्वे मां जे, ते मार्था नव्वेरी एककी कुआन्शां यीशु अपने घरे नीयो ।

39 ते मरियम नव्वेरी तैसेरी अक बेइन थी, तै यीशुएरे पावन कां बिश्तां तैसेरी गल्लां शुनती थी ।

40 पन मार्था किछ खास चीज़ बनेइ रावरी थी, ते यीशु कां आईं ते ज़ोने लगी, “हे प्रभु तुसन ज़रां भी खियाल नई कि, मेरी बेइनां अवं कम केरनेरे लेइ अवं अकैल्लनी छुडोरी? ते एस ज़ोथ, तै मेरी मद्दत केरे ।”

41 प्रभुए तैस जुवाब दित्तो, “मार्था, हे मार्था, तू बेइं गल्लां केरे फिक्क केरतिस,

42 पन अक गल ज़रूरीए, मरियमा तै रोडो हिस्सो चुनोरोए, ज़ै तैस करां कोई न नेइ सके ।”

## 11

~~~~~

(लूका 6:9-13)

1 फिरी यीशु एककी ठैरी प्रार्थना लोरे थियो केरने । ते ज़ैखन तैनी प्रार्थना की, त तैसेरे चलन मरां एक्के ज़ोवं, “हे प्रभु, जेन्चरे यूहन्ना अपने चलन प्रार्थना केरनि शिखालोरिये तेन्चरे तू भी असन शिखाल ।”

2 यीशुए तैन सेइं ज़ोवं, “ज़ैखन तुस प्रार्थना केरथ, त एन ज़ोइयथ, हे बाजी, लोक तेरी आदर केरन किजोकि तू पवित्र परमेशर आस ।

????? ?????? ???? ????
(????? 12:43-45)

24 “जैखन केन्वी मैन्हु मरां भूत निसते त तैन शुक्कोरो ठैरन मां आराम तोपते ते जैखन तैस तै आराम न मैल्ले त ज़ोते कि अवं वापस तैस्से घरे मां गालो ज़ैट्ठां अवं निसोरोई ।

25 ते तैखन तैन भूत वापस एइतां तैन घर साफ सुधरु रोडू लाते ।

26 तैखन तै एप्पू सेइं साथी सत होरां भूतां साथी धिन्तां तैस मां अन्तर गेइतां विश्रतन, ते तैस मैनेरो हाल पेइले हाले करां जादे बुरो भोते ।”

?? ??????

27 जैखन यीशु इना गल्लां ज़ोने लगगोरो थियो, त भीड़ी मरां अक कुआन्श जोरे सेइं ज़ोने लगी, “धने तै कुआन्श ज़ैसां तीं ज़र्म दिचू ते तू पालो ।”

28 पन यीशुए ज़ोवं, “हाँ, पन धन आन तैना लोक ज़ैना परमेशेरू वचन शुन्तन ते तैस पुइ अमल करतन ।”

????? ?????? ????
(????? 12:38-42)

29 जैखन हछे लोक भोने लगे त यीशु ज़ोवं, “इस ज़मानेरे लोक बुरेन, तैना निशान तोपतन, पन योनेरे निशानेरे अलावा एन होरो कोई निशान न दित्तो गालो ।

30 किजोकि ज़ेन्त्रेरे योना नवी नीनवेरे लोकन जो निशान बनो तेन्त्रेरे मैनेरू मट्टू भी इस ज़मानेरे लोकां केरे लेइ निशान बनेलू ।

31 पन दक्षिणेरी रानी आदालतरे दिहाडे इस ज़मानेरे लोकन दोषी बनाली, किजोकि तै बडे दूरेरां सुलैमानेरे ज़ानेरे बारे मां शुन्तां ओरी थी । ते इड़ी हेरा सुलैमाने करां भी बड्डोए ।

32 नीनवेरे लोक आदालतरे दिहाडे इस ज़मानेरे लोकन सेइं साथी खंडे भोइतां मुज़्रम बनाले । किजोकि तैनेई योनारे प्रचारे सेइं पापन करां मनफिरावरो थियो, पन इड़ी हेरा तै आए, ज़ै योना करां भी बड्डोए ।

????? ????
(????? 5:15; 6:22-23)

33 “कोई मैन्हु दीयो बैलतां भांडे हैठ या ओडकतां न छडे, बल्के उच्ची ठैरी रखतन ताके अन्तर एजने बालन लौ भोए ।

34 अछ्छ जानेरे लेइ दीयेरी ज़ेरि आए, अगर तेरी अछ्छ रोड़ीए, त तेरी जानी मां भी लौए, ते अगर तेरी अछ्छे बुरीए त तेरी जान भी आंधरीए ।

35 एल्हेरेलेइ खबरदार रेइयां, कोस्कोई एरू न भोए कि ज़ै लौ तीं मां आए तै आंधरू न भोए ।

36 अगर तेरी जानी मां लौए, त तैसेरो कोई भी हिस्सो आंधरो न भोए, त सब एरू भोलू, जैखन दीयो चमकतां लौ देते ।”

????????? ?? ?????? ???? ???? ??????
(????? 23:1-36; ?????? 12:38-40)

37 जैखन तै एना गल्लां ज़ोने लोरो थियो, त केन्वे फरीसे यीशु कां मिनत की, कि मीं सेइं साथी रोट्टी खा, ते यीशु तैसेरे घरे जेव ते तैसेरे कां गेइतां रोट्टी खाने विश्रो ।

38 फरीसी लोक एन हेरतां हैरान भोव, कि ए बगैर हथ-पाव धोने रोट्टी खाने विश्रो जेव ।

39 पन प्रभुए फरीसी सेइं ज़ोवं, “हे फरीसाव तुस कटोरो, ते थाली बेइरमेई त बड़ी साफ करतथ, पन तुशे अन्तर ज़ुलम ते लालच भरताए ।

40 हे बेअक्लाव, ज़ैनी बेरीयोवं हिस्सो बनावरोए, तैनी आंत्लेइयों हिस्सो नई बनेरो?

41 बस्सा एन्त्री चीज़ दान केरा, त हेरा, सब किछ्छ तुशे लेइ साफ भोइ गालू ।

7 बल्के तुश्शे दोगगोरे सारे बाल गनोरेन डरा नन्ना तुस त काई चुडोलन करां भी जादे कीमती आथ ।

???? ???? ???? ? ? ? ???? ???? ?

(???? 10:32-33; 12:32; 10:19-20)

8 “अवं तुसन ज़ोताई कि ज़ै कोई मैन्हु केरे सामने मेरो इकारा केरेलो, त अवं मैनेरू मट्टू भी परमेशेरे स्वर्गदूतां केरे सामने इकारा केरेलो

9 पन ज़ै मैन्हु केरे सामने मेरो इन्कार केरेलो त तैसेरो इन्कार परमेशेरे स्वर्गदूतां केरे सामने कियो गालो ।

10 “ज़ैना लोक मैनेरे मट्टेरे खलाफ किछ ज़ोले तै तैस माफ़ केरेलो पन ज़ै पवित् आत्मारी तुहीन केरेलो तैस माफ़ न केरेलो ।

11 “ज़ैखन तैना तुसन प्रार्थना घरन मां ते बडे-बडे ते अधिकैरन कां नेले त फिक्र न केरथ कि अस कुन ज़ोम ते केन्चरे जुवाब देम ।

12 किजोकि पवित् आत्मा तुसन तैस वक्ते ज़ोलो कि तुसेई कुन ज़ोनूए ।”

???? ???? ???? ???? ?

13 फिरी भीडी मरां केन्च एक्के यीशु सेई ज़ोवं, “हे गुरु जी मेरे दूलाए जो ज़ो, कि इश्शे बाजी केरि जेइदाती मरां मेरो हिस्सा मेरे हवाले केरे ।”

14 यीशुए तैस जुवाब दित्तो, “अवं केनि तुश्शो हाकिम या बंटने बालो बनेवरोइं?”

15 ते यीशुए तैन सेई ज़ोवं, “हर किसमेरे लालचे करां दूर भोइयथ ते न केन्चेरी जेइदाद केन्चेरी जानी करां जादे भोए ।”

16 तैखन यीशुए तैन अक मिसाल शुनाई, “केन्ची अमीरेरे ज़मीनी मां बडी फसल बनी ।

17 तै अपने दिले मां सोचतां ज़ोने लगो, कि अवं कुन केरि, मीं कां ठारे नई कि ज़ैडी अवं अन्न रेख्खी सेखी?

18 तैखन तैनी ज़ोवं कि, “अवं अक कम केरताई, अपने पुराने कोठार पुटतां हारे बड्डे कोठार बनेइ ते अपनू सारू अन्न तैस मां रखेलो ।

19 फिरी मीं अपने आपे सेई ज़ोनूए कि, मीं कां त बडे सालन तगर अन्न जम्हां भोरूए, मेरी जान आरामे सेई खा ते एश केर ।”

20 पन परमेशेरे तैस मैन्हु जो ज़ोवं, हे बेवकूफ अजे राती तू मरेलो, ते ज़ैन किछ तीं अपने लेइ जम्हां केरतां रखेरूए तैन केसेरू भोलू?”

21 एल्हेरेलेइ ज़ै अपने लेइ दौलत जम्हां केरते, पन परमेशेरेरी नज़री मां तै अमीर न भोए एसेरो भी एरो हाल भोनोए ।”

???? ???? ???? ?

(???? 6:25-34)

22 तैखन यीशुए अपने चलन सेई ज़ोवं, एल्हेरेलेइ तुस न अपने जिन्दगरी ज़रूरतरे लेइ फिक्र केरा, कि तुस कुन खाले, ते न अपने जानारी कि कुन लामेले ।

23 किजोकि प्राण रोट्टी करां ते जान लिगडे करां बेधतां भोते ।

24 कांवां केरां तक्का, तैना न बेन ते न कटन ते न तैन कां गुदाम या कोठार भोन, तांभी परमेशर तैन खाने जो देते ते तुस त चुडोलन करां भी जादे कीमती आथ ।

25 तुसन मां एरो कौन आए, ज़ै फिक्र केरतां अपनि उमर अक घड़ी भी बधैई सकते?

26 बस्सा, ज़ैखन तुस ए अक निकडी ज़ेरि गल भी न केरि बटथ, त बाकी बेड्डी चीज़ां केरि फिक्र किजो केरतथ?

27 सोसनरे फूडू केरे तक्का कि तैना केन्चरे बेडोतन? तैना न मेहनत केरन ते न कत्तन, फिरी भी अवं तुसन सेई ज़ोताई कि राज़ो सुलैमाने भी अपने सारे धन दौलतरे बावजूद भी तैन केरां ज़ेरां लिगड़ा न लां ।

28 बस्सा जैखन परमेशेरे मैइदानेरो घास, जै अज्र आए ते कालां लौवंने मां फुकनोए, एरी खूबसूरीते देते, त हे घट विश्वासे बाले लोकव, कुन तै तुसन लिगड न देतो?

29 ते एस फिकरे मां न रेइयथ, कुन खामेले, या कुन पीमेले, या कुन लामेले, ते न शक केरथ।

30 किजोकि दुनियारी सैरी कौमां एस्से फिकरे मां लेगोरी रेइचन, पन तुशशो बाजी ज्ञानते, कि तुसन कोनां-कोनां चीजां केरि जरूरत आए।

31 पेइले परमेशेरे राज्जरे तलाश केरा, फिरी तुसन एना सैरी चीजां मैल्ली गैली।

~~~~~

(~~~~~ 6:19-21)

32 "तुस भेइडां केरे निकडे केन्नेरे ज़ेरथ, तुस कोन्ची गल्लरे लेइ न डरा, किजोकि तुशशे बाजेरी खुशी एस्से मां आए, कि तै तुसन राज दे।

33 अपनू घरवार बेचतां धर्मरथ देथ, ते एप्पू जो अक बेटुवो बनाथ, जै पुरानो न भोए, स्वर्गे मां दौलत जम्हां केरा जै कथे न मुक्के, जैड़ी न चोर पुजे ते न कीडो खाए।

34 किजोकि जैड़ी तेरी दौलत भोली, तैड़ी तेरो दिल भी लग्गेलो।

~~~~~

35 "सेवा केरनेरे लेइ रोडेचारे कमर बेद्धतां तियार भोथ, ते तुशशे दीये सैरी राती बलते रान।

36 तुस मेरे एजनेरे लेइ एन्चरे तियार राथ, जेन्चरे मैन्हु केरे अपने मालिके, जै इलाएरे धामी मरां वापस एजने बलगतन, कि जैखन तै एज्जे ते दार गुडकान त अस दार खोल्लम।

37 तैना नौकर धन आन जैना अपने मालिकेरे वापस एजने पुड बीङ्गो मैलतन, अवं तुसन सेइं सत्र ज़ोताई, कि तै एप्पू तैन रोडेचारे नौकरन लिगडां लेइतां तियार लाएलो, ते मालिक तैन सेइं खुश भोइतां एप्पू सेइं साथी रोट्टी खाने विशालेलो ते तैन केरि सेवा केरेलो।

38 अगर मालिक एध्धी राती या झेझेरेपार एइतां अपने नौकरन बीङ्गो लाए त तैन नौकरां केरे लेइ केतरी रोड़ी गल्ले।

39 पन याद रखा, अगर घरेरे मालिके, चोर एजनेरो पतो भोए त तै बीङ्गो राथो ते अपने घरे चोरी न देथो भोने।

40 बस्सा, तुस भी मेरे वापस एजनेरे लेइ तियार राथ, मैनेरू मट्टू यानी अवं तैस वक्ते एज्जेलो ज़ेइस तुसन खियाल भी न भोलो।"

~~~~~

(~~~~~ 24:45-51)

41 पतरसे पुच्छू, "हे परभु जै मिसाल तीं शुनाई ते सिर्फ इशशे लेइए या सेबभी केरे लेइए?"

42 परभुए ज़ोवं, "कौने ईमानदार अकलमन्द नौकर ज़ेसेरो मालिक तैस अपने नौकरन पुड मुन्शी रखे ताके तैन केरि खूराक ठीक मौके पुड रोडेचारे बंटतो राए?"

43 तै नौकर धने कि ज़ेसेरो मालिक एज्जे ते मालिक तैस रोडेचारे कम केरतू लाए।

44 अवं तुसन सेइं सत्र ज़ोताई कि तै अपने सारे घरवारेरी हेरगैशरो अधिकार तैसेरे सुपुर्द केरेलो।

45 पन अगर तै नौकर अपने दिले मां ज़ोए कि मेरे मालिके एजने हेजू बडू चिरे ते होरि नौकरन ते नौकरेनन मार धाड़ केरनि शुरू केरे ते खेइ पीतां नशे मां मसत भोइ गाए।

46 ते तैस नौकरेरो मालिक केन्ची एरे दिहाड़ एज्जे ज़ेइस तैस नौकरे एजनेरो पतो न भोए ते तै मालिक एज्जी गाए त तैस नौकरेरे टुकडे-टुकडे केरतां ते तैसेरी हालत बेइमाना केरि ज़ेरि भोली।

47 हर तै नौकर जै ज्ञानते कि तैसेरे मालिकेरी कुन मर्जी आए, कि तै कुन केरे, मगर तै अपने आपे कम केरनेरे लेइ तियार न केरे ते अपने मालिकेरी मर्जी पूरी न केरे तैस पक्की मार बजनीए।

48 पन अगर कोई नौकरे ज़ैस नई पतो कि मेरे मालिकेरी कुन मर्जी, कि अवं कुन केरि, ते तैन केरे ज़ैस सेइं तैस सज़ा मैल्ले, त तैस घट सज़ा मैलेली।"

XXXXXXXXXXXXXXXXXXXX

(XXXXXXXX 10:34-36)

- 49 यीशुए ज़ोवं, “अवं धरती पुड़ अग लाने ओरोई ते अगर अग लगगोरी भोधी त रोडू थियूं।  
 50 पन मीं बड़े जल्दी दुःख झैल्लनोए, ते अवं बड़ो परेशानई ज़ां तगर दुख न झैल्ली।  
 51 कुन तुस एन सोचतथ कि अवं धरती पुड़ मेल कराने लेइ ओरोई? नई! अवं तुसन सेइं ज़ोताई, कि अलग करने ओरोई।  
 52 अरुजरे बाद अगर एक्की घरे मां पंच मैन्हु भोले त तैना एप्पू मांमेइं बेंटोले, टलाई ज़ैना मीं पुड़ विश्वास न केरन तैना दुइयां केरे खलाफ भोले, ते दूई, टलेइयां केरे खलाफ भोले।  
 53 बाजी मट्टेरे खलाफ भोलो ते मट्टू बाजेरे खलाफ भोलू, हैई कुइयरे खलाफ ते कुई हैईयरे खलाफ ते शिख नुशारे ते नुश शिखारे खलाफ भोनीए।”

XXXXXXXXXXXXXXXXXXXX

(XXXXXXXX 16:2-3)

- 54 फिरी यीशुए बड़े मैनु मां ज़ोवं, “कि ज़ैखन तुस विदलार डुबते पासेरां ज़लती लातथ त तुस ज़ोतथ कि झड़ी एजने बालीए ते तैन्ने भोते।  
 55 ते दक्षिणेरे पासेरां हवा ज़ली त तुस ज़ोतथ गर्मी भोरीए ते तैन्ने भोते।  
 56 हे पाखंडी लोकव, तुस धरती ते अम्बेरो हाल हेरतां मौसमेरो अंदाजो केरनो ज़ानतथ, पन इन न ज़ैनी बटथ कि, परमेशर कुन चाते?”

XXXX XXXXXXXX XXXX XXXXXXXX

(XXXXXXXX 5:25-26)

- 57 “तुस एप्पू फैसलो केरा कि, तुशे लेइ कुन रोडूए।  
 58 ज़ैखन तू लीडेरे सेइं साथी हाकिमे कां गाथ त बत्ते मां तैस सेइं फैसलो की न केरस, एरू न भोए ते तीं हाकिमे कां ने ते हाकिम सिपाहीएरे हवाले केरे, ते तू कैद भोइ गास।  
 59 अवं तुसन सेइं ज़ोताई कि ज़ां तगर तू पाई-पाई न देले त तांतगर तैट्टां छुट्टी न सकेलो।”

## 13

XXXX XXXX XXXX XXXXXXXX XX XXX XXX

- 1 तैस मौके किछ लोक तैड़ी आए, तैना यीशु सेइं तैन गलील इलाकेरे लोकां केरे बारे मां ज़ोने लगे, ज़ैन केरो खून, रोमेरे गवर्नर पिलातुसे मन्देरे मां जानवरां केरे बलिदाने सेइं साथी मलेवरो थियो।  
 2 यीशुए तैन जुवाब दिचो, “कुन तुस एन समझतथ कि तैन गलीलेरे लोकां केरो एत्रो बुरो हाल एल्हेरेलेइ भोवं, कि तैना बाकी गलीलेरे लोकन करां जादे पापी थिये?  
 3 अवं तुसन सेइं ज़ोताई कि, अगर तुस भी पापन करां मन न फिराले त सब एन्चरे नाश भोनेथ।  
 4 या कुन तैना अठारे ज़न्हे ज़ैन उन्ढो शीलोहेरो गुम्मट बिछड़ोरो थियो, ते तैना सब तैस हैठ मेरि जे, ते तैना यरूशलेम नगरेरे होरि लोकन करां पापी थिये?  
 5 अवं तुसन सेइं सज़ ज़ोताई, कि नई बल्के अगर तुस भी पापन करां मन न फिराले त तुस सब एन्चरे नाश भोइ गानेथ।”

XXXX XXXXXXXX XXXXXXX XXXXXXX

- 6 तैसरां बाद यीशुए तैन अक मिसाल देइतां ज़ोवं, “केन्चे मैने अपनि बागी मां अक फ़ेगेरो बुट लोरो थियो, ते तैस बुट्टे पुड़ हर साल फल तोपने अव पन तैस फल न मैल्लो।  
 7 तैखन तैनी बागबने सेइं ज़ोवं, हेरे अवं टलाई सालां केरो देतो इस फ़ेगेरे बुट्टे पुड़ फल लोरोई तोपने, पन अज़ तगर एस पुड़ फल न मैल्लो एस केट्टी छुड एनी किजो रोड़ी ठार चिकतां रखोरीए?”  
 8 पन तैनी तैस जुवाब देइतां ज़ोवं, मीं निदतां एसेरे ज़ेवरे पासन खाद छुडनिये।

9 अगर फिरी भी फल न लगे त फिरी केट्टी देनोए\* ।”

\*\*\*\*\*

10 एक्की आरामेरे दिहाड़े यीशु प्रार्थना घरे मां शिक्षा देने लोरो थियो ।

11 हेरा, तैडी अक कुआन्श थी जैस अठारे सालां केरि देती भूतेरे सैइयेरे वजाई सेइं कुबड़ी भोरी थी । तै सिधी न थी भोइ बटती ।

12 यीशुए तै कुबड़ी कुआन्श लाई त एप्पू कां कुजाई ते ज़ावं, “हे कुआन्श, तू अपनि तकलीफी करां छुटी जेई ।”

13 ते यीशुए तैस कुआन्शी पुड़ हथ रखे ते तै लूशी बेज्झोइं ते परमेशेरी तारीफ़ केरने लगी ।

14 पन प्रार्थना घरेरो प्रधान यीशु पुड़ नराज भोव कि, एनी ए कुआन्श, आरामेरे दिहाड़े किजो बज्झाई ते ज़ोने लगे, “हफते मां शा दिहाड़े कम काज केरनेरे लेइ आन, ते तैन्ने मां कोई बज्झावरो भी लोइचे, ते आरामेरी दिहैडी न ।”

15 प्रभु यीशुए तैस जुवाब दित्तो, “ए पाखंडी लोकव कुन तुस आरामेरी दिहाड़ी अपने दांत या गधे खोलतां तैन पानी पियाने न नेथ?

16 त कुन एन रोडू न भोवं कि जै कुआन्श बेज्झोइ तै अब्राहमेरे खानदाने मरां ए, जै अठारे सालां केरि देती शैताने गुलेमी मां रखोरि थी त आरामेरे दिहाड़े ए कुआन्श छुटानी न थी?”

17 जैखन यीशुए एना गल्लां ज़ोई त तैसेरे खलाफ ज़ोने वाले सेब्भी केरि बेइज्जती भोइ, ते सारे लोक यीशुए जैना महिमारां कम्मां अपने हथेइं कियोरां थियां खुशी मनाने लगे ।

\*\*\*\*\*

(\*\*\*\*\* 13:31-32; \*\*\*\*\* 4:30-32)

18 तैखन यीशु तैन सेइं ज़ोने लगे, “परमेशेरू राज कौस चीजरी ज़ेरूए अवं केस सेइं ज़ोई?

19 तन शेरीएरे बीजेरू ज़ेरू आए, जैन एक्की मैने एन्तां अपनि बागी मां बेवं, पन जैखन तैन बीज बेव गाते, तै उगतां सारे निक्के-निक्के बुट्टन केरां बड्डो भोते । ते अम्बेरेरां चुड़ोल्लू भी तैस पुड़ विशने लगां ।”

\*\*\*\*\*

(\*\*\*\*\* 13:33)

20 यीशुए फिरी ज़ावं, “अवं परमेशेरेरे राज्जेरी मसाल केस सेइं देई?

21 तैन खमीरेरू ज़ेरूए, जैन केन्ची कुआन्शां आनू, ते हछे अट्टे मां मलाव ते सारू अट्टू खमीर बेनि ज़ावं ।”

\*\*\*\*\*

(\*\*\*\*\* 7:13-14,21-23)

22 यीशु अपने चलन सेइं साथी यरूशलेम नगरे मामेइं गाते बार नगरन मां ते इल्लोव्वन मां शिक्षा देतो च़ललोरो थियो ।

23 केन्चे यीशु पुच़्छू, “हे प्रभु कुन थोडे ज़ेरे लोक हमेशारी सज़ाई करां बच़ेले?” यीशु तैन सेइं ज़ावं ।

24 “परमेशेरेरे राज्जे मां सुन्कडे दारेरां बत्तां गानेरी कोशिश केरा, किजोकि अवं तुसन सेइं ज़ोताई कि बडे लोक अन्तर गानेरी कोशिश केरेले पन न गेइ संकेले ।

25 जैखन घरेरो मालिक एक्की बार दार बंद केरि छ़डते, त तुस बेइर खइ खडे दार गुडकाते, ते बिनती केरते राथ कि, हे प्रभु इश्शे लेइ दार खोल्ल, ते तै तुसन जुवाब देते कि अवं तुसन न ज़ैनी तुस कौन आथ ते कोट्टां ओरेथ?

26 तैखन तुस ज़ोले कि, असेई तीं सेइं साथी खोरी पियोरी नई, ते तीं इश्शे अंगने मां असन शिक्षा नई दित्तोरी ।”

\* 13:9 फ़ेगोरो बुट इस्राएली लोकन हियाते ।



10 जैखन भी कोई तुसन धाम जोइतां कुजाए त सेबन करां पत्र विश्वा, ताके जैखन तेरो कुजाने वालो एज्जे ते जोए, 'दोस्त, अगर एइतां खास ठैरी विश्वा,' त तैन लोकां केरे सामने तेरी केतूरी बड़याई भोनीए।

11 किजोकि जै कोई अपनो आप बड़डो बनालो त तै निकडो बनाव गालो ते जै कोई अपनो आप निकडो बनालो त तै बड़डो बनाव गालो।”

12 फिरी यीशुए, तैस फरीसी मैन्हु सेइं जैनी तै कुजोरो थियो जोवं, “जैखन तुस दिसेरी या रातरी धामी मां मैन्न कुजाथ, त अपने दोस्तन या दलान रिशतेदारन या अपने अमीर पडोसन न कुजेइयथ। किजोकि तैना भी तीं कुजेइतां तेरू एवसान मुकेइ छुडेले।

13 बल्के जैखन तुस धाम देथ त टोंटे, कानो, गरीब गुरबे, परदेशी कुजेइयथ।

14 ते परमेशर तुसन बरकत देलो, किजोकि तैन कां किछ भी नईं जैस सेइं तैना तुशू एवसान मुकेइ बटन, ते तेरे एस एवसानेरो फल धेमी लोकन जीते भोने सेइं साथी फैसलेरी दिहैडी मैलेलो।”

~~~~~

(लूका 22:1-10)

15 टलाहनन मरां एक्के एन गल्लां शुन्तां यीशु सेइं जोवं, “परमेशररे राज्जेरी धामी मां खाने वालो धन भोलो।”

16 यीशुए तैस जुवाव दित्तो, “केन्चे मैने अक बड़ी धाम दित्ती ते बड़े लोक कुजाए।

17 जैखन रोट्टी खानेरो वक्त अव त तैनी अपनो नौकर भेजो कि तैन लोकन जैन जो इलाएरी धाम बनोरी थी, एज्जा, रोट्टी बनोरोए।”

18 पन धामी बालेई सेबेई मिलतां एतराज कियो ते पेइले मैने जोवं, भीं ऊडार चिन्नेरू आए, मीं तैस हेरने गानूए ते अवं तीं कां मिनत केरतां कि मीं राने दे।”

19 त होरो जोने लगे, भीं पञ्च हल्लां दांत चिन्नेरेन ते अवं तैन लाने परखने ज़लोरोई। अवं तीं कां मिनत केरतां कि मीं राने दे।”

20 अक होरो मैन्हु लगे जोने, भीं इला बनावरोए, एल्हेरेलेइ अवं न एज्जी बेटि।”

21 तैखन नौकरे वापस एइतां एन सैरी गल्लां अपने मालिके शुनेई, त मालिके बड़ी सरक अई, तैनी अपने नौकरे जो जोवं, इस नगर मां गा ते लेंगे लुथे, गरीब गुरबे नग्गे, नियन्ने भत्ते, टोंटे, कानो इरां कुजा।”

22 नौकरे जोवं, हे मालिक जैन तीं जोवं, मीं तैन्ने कमाव, पन फिरी भी ठार खाली आए।”

23 मालिके नौकरे सेइं जोवं, ‘बत्तारे आसे पासे ऊडारन मामेईं गा ते लोक मजबूर केरतां आन, ताके मेरू घर भरतां भोए।

24 किजोकि अवं तीं सेइं जोताई कि जैन लोक पेइले कुजेवरे थिये, यानी खास ठैरारे लेइ कुजेवरे थिये, तैन मरां कोई भी मेरी धामी मां रोट्टी न खेइ सकेलो।”

~~~~~

(लूका 10:37-38)

25 बड़े लोक यीशु पत्ती ज़लोरे थिये, यीशुए पत्रोवं तक्कू ते जोवं।

26 “अगर कोई मीं कां एज्जे, ते अपने अम्मा बाजी, कुआन्श, बच्चन, दलान ते बेइन्न ते अपने जानी करां जादे प्यार मीं सेइं न केरे त तै मेरो चेलो न भोइ सके।

27 ते जै कोई मेरो चेलो भोनेरी वजाई सेइं दुःख झैल्लनेरे लेइ त कने मरनेरे लेइ तियार नईं, त तै मेरो चेलो न भोइसखे।

28 तुसन मरां एरो कोई भोए, जै गुम्मत बनानू चाए, ते पेइले विश्वां हिसाब न केरे, कि पूरो केरनेरे लेइ मीं कां खर्चां आए कि नईं।

29 कधे एरू न भोए कि खाइ कटनेरे बाद तैस बनेइ न सके ते तकने बाले हसते रान।

30 ते ज़ान एनी मैने बनानू त शुरु कियू, पन बनेइ न बटो।”

31 या फर्ज केरा कि कोई राज़ो होरि राज़े सेइं लडाई केरनेरे लेइ सोची राहोरो भोए त कुन पेइले एन न सोचे कि 10000 फौजी जवानन् सेइं अवं 20000 फौजी जवावन सेइं तैसेरो मुकाबलो केरि सकतां कि नईं?

32 अगर तै मुकाबलो न केरि सखे त तैस फौजी सेइं ज़ै दूरे, मैन्हु भेजतां तैस सेइं सल्लारी मिनत केरेलो।

33 एन्त्रेरे अगर ज़ै कोई तुसन मरां अपनू सब किछ न छुडे त मेरो चेलो न भोइसखे।

\*\*\*\*\*

(\*\*\*\*\* 5:13; \*\*\*\*\* 9:50)

34 “लून रोड़ी चीजे, पन अगर लूनेरो लूनार मुकी गाए त तैन कोस सेइं लूने बनाव गालू?

35 लोक तैस बेइरोवं शेरी देले, ज़ै कोई समझनू चाते, तै ध्याने सेइं शुने ते समझे।”

## 15

\*\*\*\*\*

(\*\*\*\*\* 18:12-14)

1 बड़े लोक धड़त घिन्ने बाले ते पापी लोक\* यीशु कां एइतां तैसेरी गल्लां शुन्ने लोरे थिये।

2 फरीसी ते शास्त्री लोक शिकयत केरतां ज़ोने लगे, “कि ए मैन्हु पापी लोकन सेइं तालमेल रखते, ते तैन सेइं साथी खाते पीते।”

3 यीशुए तैन अक मिसाल देइतां ज़ोवं।

4 “तुसन मां एरो कोई आए ज़ैस कां 100 भैइडां भोन ते तैन मरां अक हेरोए ते 99 भैइडां तैड़ी जेरे जंगले मां छेइतां तोपने न गाए, ज़ां तगर तैस मैल्लोरी नईं?

5 ते ज़ैखन ते तैस मैल्ले त खुशी सेइं कंधे पुड़ छुइतां आने।

6 ते अपने घरे एइतां अपने दोस्तन ते भियालन कुजेइतां ज़ोए कि, ‘अज मीं सेइं साथी खुशी मनाथ, किजोकि अज मेरी हेरोरि भैइ मैलोरीए।’

7 अवं तुसन सेइं ज़ोताई कि, एन्त्रेरे 99 धर्मी ज़ैनेई पेइले अपने पापन करां मनफिरावरो तैन करां जादे ज़ैखन अक पापी, पापन करां मन फिराते स्वर्गे मां बड़ी खुशी बनाई गाचे।

\*\*\*\*\*

8 “कुन एरी भी कोई कुआन्श भोली ज़ैस कां चैदरे दश सिके भोन ते अक हेरोए ते तै दीयो बैलतां घरे अन्तर धूनी न दे, ते ज़ां तगर मैल्ले न तांतगर तोप्ती न राए?

9 ते तोपनेरे बाद अपने पड़ोसन ते अपनि सेहेलन कुजेइतां एन न ज़ोए कि, ‘एज्जा मीं सेइं साथी खुशी मनाथ किजोकि अज मेरो हेरोरो सिको मैलोरोए।’

10 बस्सा, अवं तुसन सेइं ज़ोताई कि एक्की पैपेरे, पापन करां मन फिराने सेइं परमेशेरेरे स्वर्गदूतां केरे सामने बड़ी खुशी मनाई गाचे।”

\*\*\*\*\*

11 यीशु फिरी होरि मिसाल दित्ती, “केन्वी मैनेरां दूई मट्टां थियां।

12 तैन मरां निकड़े मट्टे अपने बव्वे सेइं ज़ोवं, हे बाजी जेइदाती मां ज़ै मेरो हिस्सो बनते तै मीं दे। तैनी दुइने हिस्सो बेंटतां दित्तो।

13 थोडे दिहैइना पत्ती निकड़े मट्टे अपनू सब किछ जेइदात होरि मुलखे जो नी, ते बुरे कम्मन मां लुट्टाई।

14 ज़ैखन तैनी सब किछ मुकेइ छुइइ त तैस मुलखे मां बड़ो काल पेव, ते तैस कां खाने जो किछ न राऊं।

15 तैखन तै तैस मुलखेरे एक्की रानेबाले कां कम तोपने पुजो। तैनी तै अपने ऊडारन मां सूर चारनेरे कम्मे लाव।

\* 15:1 पापी लोक लोक तैन केरे बारे मां पापी समझते थिये।

16 तैडी तै बडो दलुखोरो थियो, तै तैन खाने मां राजी थियो जैन सूर खाते थिये, किजोकि तैस केन्चे किछ खाने जो न दिनु ।

17 तैखन तैस समझ आई ते ज़ोने लगे, भेरे बाजी केरे मज़दूर रेज़तां रोट्टी खातन, पन अवं इडी फाके लोरोई मरने ।

18 मीं खडे उठतां अपने बाजी कां गानूए ते तैस सेइं ज़ोनूए हे बाजी अवं परमेशेरी नज़री मां ते तुशशी नज़री मां पापी आई ।

19 हुनी अवं एस काबल त नई, कि तुशशू मट्टू भोइ, पन मीं भी अपने मज़दूर मां रखा । ”

20 “बस्सा, तैनी तै मुलख शारो ते वापस अपने बाजी कां ज़लो, ते हेजू तै बडे दूरे थियो, ते तैसेरे बाजे तै लाव ते तैसेरे बाजी तैस पुइ बडो तरस अव, ते तै दौवइतो अपने मट्टे कां जेव, ते तैन गले लाव ते बडो खुशी भोव ।

21 मट्टे अपने बाजी सेइं ज़ोवं, ‘ए बाजी अवं परमेशेरी नज़री मां ते तुशशी नज़री मां पापी आई । हुनी अवं एस काबल त नई कि, अपने आपे जो तुशशू मट्टू जोई ।’

22 पन बाजे अपने नौकरन सेइं ज़ोवं, ‘लूश केरा ते सेबन करां पेइले रोड़ां लिगड़ां एस मट्टे लुवाथ, ते एसेरे हथ्थे आंवठी ते पावन वूट लुवाथ ।

23 ते अक जानवर मारो ते बडी धाम बनेइतां बडी खुशी मनाई ।

24 किजोकि मेरू मट्टू ज़ैन जेन्चरे मेरि जोरू थियू, अज ज़ींतू भोरूए, हेरोरू थियो, ते मैलोरूए । बस्सा तैना खुशी मनाने लगे ।”

25 “तेइस बडू मट्टू ज़ैन ऊडारे मां कम केरतां घरजो ओरू थियू ज़ैखन तै घरे नेडे पुजो त तैनी गीतां केरि त नञ्चनेरी शौर शुनी ।

26 तैनी अक नौकर कुजाव ते तैस पुञ्छू, ‘ए शौर कीजेई लोरी भोने?’

27 नौकरे तैस सेइं ज़ोवं, ‘तेरो निकडो दूला वापस घरे ओरोए ते तेरे बाजे अक जानवर मेरतां धाम बनोरीए, किजोकि तै ठीक ठाक घरे पुजोरोए ।’

28 पन तैस मैनेरू बडू मट्टू नाराज भोवं ते अन्तर घरे मां भी न लगे एजने, पन तैसेरो बाजी बेइर अव, ते तैस मिठानेरी कोशिश की, कि घरे अन्तर एज्जे ।

29 बडे मट्टे अपने बाजी सेइं ज़ोवं, हेरा अवं केतरे सालां केरि देंती तुशशी सेवा केरने लोरोई, ते कधे तुशशो हुक्म नई मोडोरो ते तुसेईं कधे कोई छेइ नई दित्तोरोए कि अवं भी अपने दोस्तन सेइं खुशी मनेई ।

30 पन ज़ैखन तुशशू निकडू मट्टू अपनू सब किछ लुटेइतां वापस अव, त तैसेरेलेइ जानवर मारो ते अक बडी धाम बनाई ।’

31 तैसेरो बाजी ज़ोने लगे, भेरा मट्टां तू त मीं कां आस ते ज़ैन किछ मीं कांए तैन सब तेरूए ।

32 पन असेईं खुशी मनानी ज़रूरी थी किजोकि तेरो ए निकडो दूला ज़ै जेन्चरे मेरि जोरो थियो, अज ज़ींतो भोरूए, हेरोरो थियो ते अज मैलोरूए ।”

## 16



1 फिरी यीशुए अपने चेलन अक होरि मिसाल दिती कि, “केन्ची अमीरेरो अक मुन्शी थियो, लोकेई तैसेरी शकैइत तैसेरे मालिके सेइं लाई कि, ए तेरो माल बरबाद केरने लोरोए ।

2 मालिके ते कुजाव ते ज़ोवं, ‘एन कुने ज़ैन अवं तेरे बारे मां शुन्ने लोरोई? सारो हिसाब-किताबे मां अज़रां बाद तू मेरो मुन्शी नई रालो ।’

3 मुन्शे अपने दिले मां सोचू मेरो मालिक मेरे कम्मे करां मीं कढने लोरोए, मीं मज़दूरी भी न केरोए ते शमारिमारे भीख भी न मैगोए ।



4 'अवं ज्ञानताई कि, मीं कुन केरनूए इट्टां कढनेरे बाद मीं लोक खुशी सेइं अपने घरे मां कबूल केरतन ।'

5 बस्सा तैनी अपने मालिकेरो अक कर्जदार तोपते, पेइले एककी पुच्छू तीं कां मेरे मालिकेरे केतरे रुपेइयेन?

6 तैनी जुवाब दित्तो, जैतूनेरे तेलेरे 100 पीपां केरि कीमते, तैनी ज़ोवं इना रां तेरां काकलां, ते बिशतां 50 पीपे बना ।

7 फिरी तैनी मुन्शे होरि सेइं ज़ोवं, 'तीं कां केतरो कर्जोए?' तैनी ज़ोवं, 'गेहुं केरि 100 बोरी\*'; तैनी ज़ोवं, 'यां काकलां ते बिशतां 80 लिखी ।'

8 मालिके तैस बेईमान मुन्शेरी तारीफ़ की, एल्हेरेलेइ कि तैनी बेइ च़लैकी सेइं कम कियेरू थियूं । किजोकि इस दुनियारे लोक अपने लोकन सेइं सौदो केरनो परमेशेरे लोकन करां बड़े हुशारी सेइं केरतन ।

9 अवं तुसन सेइं ज़ोताई कि दौलत खचं केरतां इस दुनियारे लोकन दोस्त बनाथ, तुसन मरनेरां बाद हमेशारू घर मैलनूए ।

10 ज़ै थोड़े ज़ेरे मां इमानदेरी सेइं रहते ते हछे मां भी ईमानदार रहते । ज़ै थोड़े करां थोड़े मां भी बेइमाने ते हछ्छे मां भी बेइमाने ।

11 बस्सा अगर तुस बेइमानेरे धन दौलती मां ईमानदार न भोए, त अपनि सच्ची दौलत ज़ै स्वर्गे मां आए, कौन तुशे हवाले केरेलो?

12 अगर तुसेईं होरि केरे माले मां ईमानदार न भोए, त ज़ै तुशे अपनो माले कौन तुसन देलो?

13 कोई नौकर दूई मालिकां केरि सेवा एककी वक्ते मां न केरि सके । न त एककी सेइं दुश्मनी केरेलो ते होरि सेइं प्यार केरेलो, या एककेरो बेनतां रालो त होरि न सुखालो । तुस परमेशेरी ते दौलतरी, दुइयां केरि सेवा न केरि सकतथ ।"

~~~~~

(~~~~~ 11:12-13; 5:31-32; ~~~~~ 10:11-12)

14 तैखन फरीसी लोक जैना दौलतरे लालची थिये, एन गल्लां शुन्तां यीशुएरी हासी बनाने लगे ।

15 यीशु तैन जो ज़ोवं, "तुस तैना आथ जैना लोकन मां अपनो आप बड़ो धर्मी हिरातन । पन परमेशर तुशे दिलेरी हालत ज्ञानते किजोकि ज़ै चीज लोकां केरे लेइ बड़ी बड्डीए ते ते परमेशेरी नज़री मां भिट्टी आए ।"

16 "मूसेरे कानून ते नेवी केरि गल्लां यूहन्ना बपतिस्मो देनेवाले तगर रेइ, ते फिरी परमेशेरे राज्जेरी खुशखबरी शुनाने लगे ते हर कोई तैस मां दाखल भोनेरी बड़ी कोशिश केरने लगोरेन ।

17 पन धरती अम्बर टेली गालू पन परमेशेरे कानूने मरां अक बिंदी भी न मिटेली ।

18 ज़ै कोई अपनि कुआन्शी शैरतां होरि सेइं इला बनाते ते तैस सेइं बदमाशी केरते ते ज़ै शैरोरी कुआन्शी सेइं इला बनाते ते भी बदमाशी केरते ।"

~~~~~

19 "अक मैन्हु बड़ो अमीर थियो, ते ते बैगनी लिगड़ां लातो थियो, ते बड़ां माघो लिगड़ां लातो थियो । ते रोज एश अशरती मां मसत रातो थियो ।

20 अक बड़ो गरीब मैन्हु जेसेरू नवं लाज़र थियूं, तैसेरे दारे कां एन्तां रखोरो थियो, तैसेरी सारी जान खेराइइं सेइं भेरतां थी ।

21 तै चातो थियो, कि अमीर मैनेरे टुकेइं सेइं अपनू पेट भेरि, पन तैड़ी कुतरां एइतां थियां ते तैना तैसरां खेरड़ां भी च़टतां थियां ।

22 फिरी एरू भोवं कि ते गरीब लाज़र मेरि जेव स्वर्गदूतेईं ते छुइतां अब्राहमे कां पुजव, ते अमीर मैन्हु भी मेरि जेव ते ते दैब्बी छुइडो ।

\* 16:7 गेहुं केरि 100 बोरी अक बोरी 200 किल्लो केरि थी ।

23 जैखन तैनी पातालेरे दुखे मां अपनि एच्छ्छी घैड़ी? त दूरेरां तैनी अब्राहम ते तैस कां नेडे लाजरे लाव ।

24 तै चिन्डां मैरतां ज़ोने लगो, 'ए बाजी अब्राहम मीं पुड़ दया केर, एस लाजरे भेज ते ए अपनि अंग्लोई पैनी सेइं सेलतां मेरे जिमी पुड़ लाए, किजोकि अवं अग्गी मां तडफने लोरोई ।'

25 पन अब्राहमे ज़ोवं, 'भट्टां याद केर तीं त अपनि जवेंनी मां सब रोड़ी चीजां मैल्ली ते इस लाजरे सिर्फ बुरी चीजां मैल्ली, पन ए हुन्ना इडी आरामे मांए ते तू तकलीफी मां आस ।

26 ते एन गल्लां केरे अलावा इशे ते तुशे मझाटे अक बड्डी खाईए, ताके ज़ै कोई पार गानू चाए न गेइ सखे ते ज़ै वार एजनू चाए न एज्जी सखे ।'

27 तैनी मैने ज़ोवं, 'ए बाजी अब्राहम, अवं ज़ोवले हथ केरतां ज़ोताई कि, तू लाजरे दुनियाई मां मेरे बाजी केरे घरे भेज ।

28 तेड़ी मेरे पंज दूला आन ते तै तैन हदायत दे कि, एरू न भोए ते तैना भी इस अग्गी मां एजन ।

29 पन अब्राहमे तैस ज़ोवं, 'तैन केरि हदायतरे लेइ तैन कां मूसेरो कानूने ते नेबी केरि किताबां त आन तैना तैन शुनन् ते मनन् ।'

30 तैनी मैने ज़ोवं, 'नई ए बाजी अब्राहम अगर कोई मुडदन मरां ज़ीतो भोइतां गाए त तैना ज़रूर पापन करां मन फिराले ।'

31 पन अब्राहम तैस सेइं ज़ोवं, 'अगर तैना मूसेरी ते नेबी केरि न शुनी ते अगर कोई मुडदन मरां ज़ीतो भोइतां गाए त तैना तैसेरू भी याकीन न केरेले ।' "

## 17

~~~~~

(~~~~~ 18:6-7,21-22; ~~~~~ 9:42)

1 फिरी तैनी अपने चलन सेइं ज़ोवं, 'एन न भोइसखे कि लोकन टोकर न लगगे, पन अफसोस तैस मैन्हू पुड़ ज़ै होरि केरे लेइ टोकर बनते ।

2 तैसेरेलेइ त एन्ने रोड़ थियूं, कि दूलाटेरो दूलेइटोल तैसेरे गल्ले उन्ढो छेडतां ते समुन्द्रे मां शैरतां छेडो गाथो, ताके तै होरि जो ज़ैना विश्वासे मां कमजोरन टोकर न बने ।

3 बस्सा हुआर राथ तुस कुन केरतथ, अगर तुशो विश्वासी दूला पाप केरते त तैस समझाथ ते अगर तै पापन करां मन फिराए त तैस माफ़ केरा ।

4 अगर तै एक्की दिहैड़ी मां तेरो सत्ते बार तेरो पाप केरे त अगर तै सत्ते फेरेई तीं कां एइतां माफ़ी मगगे त तू सत्ते फेरेई तैस माफ़ केरा ।'

~~~~~

5 प्रेरितेई प्रभु सेइं ज़ोवं, 'हे प्रभु, इशशी मदत केर कि अस होरे भी मजबूती सेइं विश्वास केरम ।'

6 प्रभु यीशुए ज़ोवं, 'अगर तुशो विश्वास सिवलारे गलेवे बराबर भी भोलो त तुस इस तूतेरे बुटे जो ज़ोई सकतथ इट्टां उखड ते समुन्द्रे मां लग त तै तुशो हुकम मनेलो ।

~~~~~

7 'तुसन मां एरो कौन आए, जेसेरो नौकर ऊडारां बेंतो भोए या गोरू ज़ारतो भोए ते ज़ैखन तै ऊडारे मरां घरे एज्जे त तैसेरो मालिक तैस ज़ोए कि, 'लूशी विश्श ते रोट्टी खा ।'

8 या एन न ज़ोए कि मेरी रोट्टी तियार केरथ ते ज़ां तगर अवं खेइ पीं नन्ना ते ज़ां तगर अवं रेज्जी नन्ना तू मेरी सेवा केरतो राए, तैल्ला पत्ती तू भी खा?

9 कुन तै एन्हेरेलेइ नौकरेरू अहसान केरेलो कि, तीं तैन कियूं ज़ैन तीं केरनेरे लेइ ज़ोवरू थियूं?

10 एन्वरे ज़ैखन तुस एन सब केरेले ज़ैस केरनेरो तुसन हुकम दित्तोरो थियो, त ज़ोथ कि, 'असां निकम्मे नौकर आम? असेई तैन्ने कियूं ज़ैन केरनू चाते थिये ।' "

~~~~~

11 एककी फेरे यीशु त कने तैसेरे चले यरूशलेम नगरेरे पासे च़लोर थिये । तैना सामरिया ते गलीले इलाके मामेइ च़लोर थिये ।

12 ज़ैखन तैना एककी इलव्वे मां पुजने वाले थिये त तैड़ी दश कोद्दी मैल्ले ज़ैना दूर खेड़ोरे थिये ।

13 तैनेई बड़े ज़ोरे सेइ ज़ोवं, “हे यीशु, हे प्रभु, असन पुड़ दया केर ।”

14 यीशुए तैन लेइतां ज़ोवं, “यरूशलेम नगरेरे मन्दरे मां गाथ ते अपनो आप याजकन हिराथ, ते सच्च़े एरू भोवं कि गाते बार बत्तां तैन केरू कोद साफ भोइ जेवं ।”

15 पन तैन मरां अक कोद्दी अपनू कोद हेरतां कि, तैसेरू कोद साफ भोरुए खुशी भोइतां बड़े ज़ोरे सेइ परमेशेरी तारीफ़ केरतो वापस यीशु कां अव

16 ते यीशुएरे पावन पुड़ दोगग रेखतां शुकर लगो केरने । ए मैन्हू सामरी थियो ।

17 यीशुए तैस पुच़्छू, “कुन तैन दश कोद्दी केरू कोद साफ नई भोवरू? फिरी तैना कोरां जे?

18 कुन एस गैर यहूदी मैनेरे अलावा तैन होरन एतरी हिम्मत न अई, कि गोइतां परमेशेरी महिमा केरम?”

19 तैखन यीशुए तैस ज़ोवं, “खड़ो उठ ते च़लो गा तीं मीं पुड़ विश्वास कियो तांए तू वेज्झोरुस ।”

?????????? ???? ????  
(?????? 24:23-28,37-41)

20 फरीसी लोक यीशु पुच़्छने लगे, “कि परमेशेरेरू राज़ केइस एजनूए? यीशुए तैन जुवाब दित्तो कि परमेशेरेरू राज़ एरू नई कि कोई तेस लेई बटे ।

21 ते ज़ोन कि हेरा इड़ी या उड़ीए एन्चरे नई बल्के परमेशेरेरू राज़ तुशे मझाटे ।”

22 यीशुए अपने चलन सेइ ज़ोवं, “तै दिहाड़ी भी एजनीए कि, ज़ेइस तुस परमेशेरी दिहैइन मरां अक दिहाड़ी हेरनेरी इच्छा रखेले, ज़ेइस मैनेरू मट्टे यानी अवं वापस एजनाई, पन तुस न लेई बटेले ।

23 लोक तुसन सेइ ज़ोले कि, ‘हेरा, मसीह इड़ीए,’ या ‘उड़ीए या हेरा तै इड़ीए!’ पन तुस तैरां न गेइयथ ते न तैन पत्ती न च़ेलथ ।

24 किजोकि ज़ेन्चरे बिजली अम्बरे मरां चेमकतां एककी पासेरां होरि पासे च़ली गावे, तेन्चरे मैनेरू मट्टू यानी अवं तैस दिहैड़ी बांदो भोलो ।

25 पन ज़रूरीए कि तै पेइले दुःख झैल्ले ते इस ज़मानेरे लोक तैस घटिया समझन ।

26 ते ज़ेरू इशे पूर्वज नूहेरे ज़माने मां भोरू थियूं, तेरहु मैनेरे मट्टेरे ज़माने मां भी भोलू ।

27 तेइस भी लोक खाते पीते थिये ते इला भोंते रहते थिये । ते ज़ां तगर नूह किशती मां न थियो जोरो तांतगर सब किछ भोतू राव । ते फिरी तूफान अव ते सब किछ खतम भोइ जेवं ।

28 ते ज़ेरू इशे पूर्वज लूतेरे ज़माने मां भोरू थियूं, कि लोक खाते पीते थिये बुपार केरते, बागां लाते ते घरां बनाने मां मघन थिये ।

29 पन ज़ैस दिहैड़ी लूत सदोम नगरे मरां बेइर निस्सो त पत्रोवं अम्बरेरां गंधकेरी अग बैखतां सब किछ खतम केरि छड़ू ।

30 ते मैनेरे मट्टू यानी मेरू वापस एजनू भी अचानक भोलू ।

31 “तैस दिहैड़ी ज़े लाए पुड़ भोलो त तैसेरो माल सबाव अगर घरे मां भोलो त तैस नेने तै अन्तर न एज्जे, ते ज़ै ऊडारे मां भोलो तै भी वापस न गाए ।

32 लूतेरी कुआन्शी सेइ कुन भोवं याद रख्खा ।

33 ज़े अपनि जान बचानेरी कोशिश केरेलो तै तैस गुवालो, ते ज़ै तैस गुवालो तै तैस बचालो ।

34 अवं तुसन सेइ ज़ोताई कि तैस राती दूई मैन्हू एककी खट्टी पुड़ झुल्लोर भोले, ते अक नीयो गालो, ते दुइयोवं तैड़ी रालो ।

35 दूई कुआन्शां हिट्लाट पइती भोली त अक नेनीए ते अक तैड़ी छड़निवं ।

36 दूई मैन्हू ऊडारे मां भोले त अक नेनोए ते अक तैड़ी छड़नोए ।”

37 एन शुन्तां तैनेई यीशुए पुचछू, “हे परभु असन सेइं ज़ो, एन कोड़ि भोलू?” यीशुए तैन ज़ोवं, “ज़ैड़ी ज़िग्ग भोते तैड़ी इल्लां जम्हां भोइचन।”

## 18

~~~~~

1 यीशु अपने चलन अक मिसाल देइतां ज़ोवं, कि हिम्मत हारनेरे बगेर प्रार्थना करती रावरी लोड़े।

2 “एक्की नगर मां अक हाकिम रातो थियो। तैन परमेशेर करां डरतो थियो, ते न कोन्वी मैनेरी परवाह करतो थियो।

3 तैस नगर मां अक विधवा कुआन्श रहती थी ज़ै तैस हाकिमे कां एइती रहती थी, ते तैस कां मिनत करती रहती थी कि, मेरो इन्साफ करतां मीं मेरे दुश्मने करां छुटा।

4 पेइले त तैनी एतूरो खियाल न कियो पन ज़ैखन ए हिसाब चलतो राव, त तैनी अपने मने मां ज़ोवं, ‘अवं न परमेशेर करां डेरि ते न मैनेरी परवाह केरि।

5 पन ए विधवा कुआन्श मीं परेशान करती राचे, एल्हेरेलेइ अवं एसारो इन्साफ केरेलो, नई त एसां अवं बड़ो ज़लील केरनोई।”

6 तैखन परभु यीशुए ज़ोवं, “शुना ए बेईमान हाकिम कुन लोरोए ज़ोने।

7 बस कुन परमेशेर अपने चुनोरे लोकां केरो फैसलो केरने मां च़िर लालो, ज़ैना रात दिहैड़ी फरयाद केरते रातन?

8 अवं ज़ोताई, कि तै तैन केरो फैसलो केरेलो ते लूशी केरेलो। पन फिरी भी ज़ेइस मैनेरू मट्टू यानी अवं एज्जेलो त कुन लोक मीं पुड़ हेजू तगर विश्वास केरते भोलो?”

~~~~~

9 यीशुए किछ एरे लोकन अक मिसाल दिती कि, ज़ैन अपनो आपे बड़ो धर्मी समझते थिये ते होरन किछ न थिये बुझते।

10 “दूई मैन्हु प्रार्थना केरने मन्दरे मां जे अक फरीसी मैन्हु थियो, ते होरो धड़त (टेकस) घिन्ने वालो थियो।

11 फरीसी मैन्हु खड़ो भोइतां प्रार्थना केरने ते अपने बारे मां सोचने लगो, कि हे परमेशेर अवं तेरू शुकर करताई, अवं होरि मैन्हु केरो ज़ेरो नई ज़ैना डैकू, अधर्मी, बदमाशी केरनेबाले, ते इस धड़त नेने बालेरो ज़ेरोई नई,

12 अवं हफते मां दूई बार बरत रखताई, ते अपनि कमैईयरो दशोवं हिस्सो तींजो देताई।

13 “पन तै धड़त नेनेबालो ज़ै दूर खड़खड़ो थियो, तैनी एतूरू भी न केरि बटु, कि अम्बरेरे पासे तक्के बल्के छाती पिट्टतां ज़ोने लगो, ‘हे परमेशेर मीं पैपी पुड़ दया केरतां माफ़ केर!’

14 अवं तुसन सेइं सज़ ज़ोताई, ए धड़न नेनेबाले मैन्हु तैस फरीसी मैन्हु करां धर्मी निस्तां अपने घरजो जेव। किजोकि ज़ै कोई अपनो आप बड़ो बनावालो तै निकड़ो बनाव गालो ते ज़ै अपनो आप निकड़ो बनावालो तै बड़ो बनाव गालो।”

~~~~~

(~~~~~ 19:13-15; ~~~~~ 10:13-16)

15 फिरी किछ लोक निक्के बच्चन यीशु कां आन्ने लगे ताके यीशु तैन पुड़ हथ रेखतां बरकत दे। चेलेई तैन लाव त तैन धमकाए ते ठाकू।

16 पन यीशुए बच्चे एप्पू कां कुजाए ते चलन सेइं ज़ोवं, “बच्चन मीं कां एजने देथ एन न ठाका, किजोकि परमेशेरू राज़ एरां ज़ेरां केरूए।

17 अवं तुसन सेइं सज़ ज़ोताई, ज़ै कोई परमेशेररे राज़ मां गानेरे लेइ अपनो आप निक्के बच्चन बराबर न बनाए, तांतगर परमेशेररे राज़े मां दाखल न भोइसखे।”

19

~~~~~

- 1 यीशु यरीहो नगरे मामेई निस्तां ज़लारे थियो ।
- 2 तैडै अक मैन्हु थियो, जेसेरू नवं जक्कई थियूं, तै धइत घिन्ने बालां केरो अफसर थियो, तै बड़ो अमीर थियो ।
- 3 तैस यीशु हेरनेरो चाऊ थियो, पन तैसेरू कद छोदू थियूं, तांए तै हछे, मैनन् मरां लेई न थियो बटतो ।
- 4 एल्हेरेलेइ तै देवइतां अगर जेव ते फ़गेरे बुदटे उबरो गुस्सो किजोकि ज़ैखन यीशु एज्जे त तै तैस रोड्चारे लेई सके ।
- 5 ज़ैखन यीशु तैस ठैरी पुज्जो त तैनी उबरू तेकतां ज़ोवं, “जक्कई लूशी उन्दो ओस, किजोकि अज़ मीं तेरे घरे टूलाहन च़ारेई एज्जुए ।”
- 6 जक्कई तैखने उन्दो ओस्सो ते यीशु वेडि खुशी सेइं अपने घरे नीयो ।
- 7 एन हेरतां सब लोक शकैइत केरतां ज़ोने लाए, “कि यीशु त एक्की पैपी मैनेरो मेहमान बनोरोए ।”
- 8 जक्कई रोदटी खांते बारे खडो भोइतां प्रभु सेइं ज़ोने लगो, “हे प्रभु यीशु तक अवं अपनि अध्डी जेइदात कंगालन देताई, अगर केन्चेरू किछ् खो रू भोलू त तैस च़ेवरे हिस्से वापस देइलो ।”
- 9 तैखन यीशुए तैस सेइं ज़ोवं, “अज़ इस घरे मां मुक्ति ओरिए, एल्हेरेलेइ इन भी पूर्वज अब्राहमेरू अक मद्दूए ।
- 10 किजोकि मैनेरू मद्दू यानी अवं होरि लोकन हमेशारी सज़ाई करां मुक्ति देने एवरोई ।”

~~~~~

(लूका 25:14-30)

- 11 ज़ैखन लोक यीशुएरी गल्लां शुन्ने लग्गोरो थिये त तैनी तैन अक मिसाल देइतां ज़ोवं, किजोकि तैना यरूशलम नगरेरे नेडे पुज्जोरे थिये ते लोकां केरो खियाल थियो परमेशेरू राज़ लूशी एज्जु आए ।
- 12 तैनी तैन ज़ोवं, “अक बड़ो अमीर मैन्हु होरि मुलखे मां ज़लो, ताके तैस मुलखेरो मेंतरेरो ओदो घिन्तां वापस एज्जे ।
- 13 तैनी अपने सेवादारन मरां दश ज़न्हे कुजाए, ते तैन दश मोहरां देइतां ज़ोवं, भेरे वापस एज्जे तगर इस पेंडसे सेइं कारोबार केरथ ।”
- 14 पन तैस ठैरी लोक तैस सेइं नफरत केरते थिये, तैनेई किछ् लोक भेजतां तैस जो बिस्तार भेजो, कि अस न चाम ए मैन्हु असन पुड़ राज़ केरे ।”
- 15 “ज़ैखन तै हुकुमतरो ओदो हासिल केरतां वापस अव त तैनी अपने सेवादारे जो समदा भेजो । ज़ैना तैनी कारोबारेरे लेइ पेंडसे दित्तोरे थिये ताके सेब्भी केरो पतो केरे कि केनि केतू कियेरू आए ।
- 16 पेइले मैने एइतां ज़ोवं, ‘हे मालिक मीं तेरी दश अशरेफेइं सेइं दश होरि कमैई ।’
- 17 तैनी तैस सेइं ज़ोवं, ‘तीं दश अशरेफेइं सेइं इमानदेरी सेइं कम कियूं गा तीं दश नगरन पुड़ अधिकार दित्तो गाते ।’
- 18 दुइयोवं मैने एइतां ज़ोवं, ‘हे मालिक मीं तेरी पंच अशरेफेइं सेइं पंच होरि कमैई ।’
- 19 तैनी तैस सेइं भी ज़ोवं, ‘तीं भी पंच नगरन पुड़ अधिकार दित्तो गाते ।’
- 20 तैखन एक्की मैने एइतां ज़ोवं, ‘हे मालिक इना रेइ तेरी अशरेफी मीं एन रूमाले मां बंधतां रखोरि थी ।’
- 21 किजोकि तू सखत मैनूस ते अवं तीं करां डरतो थियो । किजोकि तू तै चीज़ ज़ै तीं न भोए रखोरि तू तैस भी नेतस ते ज़ैन न भोए बेवहू तू तैन भी लुनतस ।

22 तैनी तैस सेइं ज़ोवं, हे दुष्ट नौकरा अवं तेरी गल्लेईं सेइं तींए मुर्जम बनताइं । ज़द तीं पतो थियो, कि अवं बड़ो सखत मैन्हु आईं, ते ज़ै चीज़ मीं नईं रखोरि अवं तैस भी सल्हतां ते ज़ैन नईं बेवरू अवं तैन भी लुनतां ।

23 फिरी तीं मेरे रूपैइये केन्वी कां किजो नईं रखोरि ताके अवं वापस एइतां तैस करां सूते समेत उसुल करेथो?”

24 तैखन तैनी तैन सेइं ज़ोवं, “ज़ैन तैड़ी खड़खड़े थिये एस करां एन अशरेफी एन्तां उस देथ ज़ैस कां दश अशरेफीन ।”

25 तैना ज़ोने लगे हे मालिक एस कां पेइली दश अशरेफीन।

26 तैनी तैन जुवाब दित्तो, अवं तुसन सेइं ज़ोताईं कि, “ज़ैस कां परमेशेरी मर्ज़ी समझनेरी खुवाइश आए, तैस परमेशर जादे समझ देलो । पन ज़ैस कां परमेशेरी मर्ज़ी समझनेरी खुवाइश नईं, तैस केरां, थोड़ी ज़ेरि समझ ज़ै तैस कां आए, तै भी नी गाली ।”

27 पन मेरे इन दुश्मन ज़ैन मीं न थिये सुखाते कि, ए असन पुड़ राज़ केरे एन इरां आनां ते मेरे सामने एन मैरी छड़डा ।”

~~~~~

(~~~~~ 21:1-11; ~~~~~ 11:1-11; ~~~~~ 12:12-19)

28 एना गल्लां ज़ोइतां यीशु अपने चेलन सेइं साथी अग्रोवं जेव कि यरूशलेम नगरे मां गाए ।

29 ज़ैखन तैना ज़ैतूनेरे पहाड़े बैतफगे ते बैतनिय्याह मां पुज़े त यीशुए दूईं चले एन ज़ोइतां अग्रोवं भेजे ।

30 “तुस सामने उस इलव्वें मां गाथ ते तैड़ी तुसन अक गधेरो बच्चो बन्धोरो मैलनोए । ज़ैस पुड़ अज़ तगर कोई नईं चढ़ोरो तैस खोलतां इड़ी मीं कां आनां ।

31 ते अगर तुसन कोई पुच्छे, कि तुस एस किजो लोरेथ खोलने त तुस ज़ोइयथ, कि प्रभुए एसेरी ज़रूरत आए ।”

32 अग्रोवं गानेवाले चलेईं तैन्ने कियूं ज़ैन यीशुए ज़ोरू थियूं ।

33 ज़ैखन तैना गधेरो बच्चे खोलने लगगोरो थिये त तैसेरो मालिक तैन पुच्छने लगे, “तुस एस बच्चे किजो लोरेथ खोलने?”

34 तैनेईं जुवाब दित्तो, “प्रभुए एसेरी ज़रूरते ।”

35 तैनेईं तै बच्चो खोलतां यीशु कां आनो, ते यीशुए तैस पुड़ अपना लिगड़ां छेइतां तैस पुड़ चेइतां ज़लो जेव ।

36 ज़ैखन तैना ज़लोरे थिये त लोकेईं अपना लिगड़ां बत्ती मां बिछां ।

37 ज़ैखन तैना यरूशलेम नगरे नेडे पुजे त ज़ैटठां बत ज़ैतून पहाड़े पुड़ेरां उन्दी गातीए तैड़ी सारे चलेईं एना चमत्कार हेरतां ते खुशी भोइतां परमेशेरी तारीफ़ केरने लगे कि,

38 “धने तै राज़ो ज़ै परमेशेरे नव्वें सेइं एइते!  
ते स्वर्गे मां महिमा ते अम्बरे मां शान्ति भोए ।”

39 तैन मैनन् मां किछ फरीसी लोक भी थिये । तैना यीशु सेइं ज़ोने लगे, “हे गुरू अपने चेलन ज़ो कि चुप केरन ।”

40 यीशुए तैन जुवाब दित्तो, “अवं तुसन ज़ोताईं, अगर एना लोक चुप केरन त इना घोड़ ज़ोरे सेइं परमेशेरी तारीफ़ केरेले ।”

~~~~~

41 यरूशलेम नगरे मां पुजतां यीशु यरूशलेम नगरेरो हाल हेरतां तैस लेरां छुटी ।

42 ते ज़ोने लगे, “अगर तुस सिर्फ़ इस दिहैइरे बारे मां ज़ानते भोथे, ज़ै तुसन शैन्तेरे पासे नेती! पन ईं गल हुना तुशे एछ्छन करां छपोरीए ।

43 तीं तैना दिहाड़े हेरने पनेन ज़ेइस तेरे दुश्मन तेरे ज़ेवरे पासन मोरचो बंधतां ते तीं घेरो देले, ते हर पासेरां तीं पुड़ हमलो केरेले ।

44 तुम्हारे दुश्मन तुमनाश करेले, ते सैरी लोकन मारेले, ते तीं पुड घोडे पुड घोड बाकी न रालो । किजोकि जेइस परमेश्वर तुमनाश करेले तेइ ओरो थियो तुसेई न पिशानो ।”

XXXXXXXXXXXXXXXXXXXX

(XXXXXXXX 21:12-17; XXXXXXXX 11:15-19; XXXXXXXX 2:13-22)

45 तेखन ते मन्दरे मां जेव ते तैडी तैने बुपारी ते गाक बेइरोवं कढने शुरू किये ।

46 तेनी तैन सेइं ज़ोवं, “पवित्रशास्त्रे मां लिखोरूए, मेरू मन्दर प्रार्थनारू घर भोलू, पन तुसेई त डैकू केरो अडडो बनेइतां रखोरूए ।”

47 ते तै तैस पवित्र दहैडी मन्दरे मां शिक्षा देतो थियो, पन प्रधान याजक ते शास्त्री लोकेई यीशु मारनेरी कोशिश मां लगगोरो थिये ।

48 पन तैन एन केरनेरो मौको न थियो मैलतो, किजोकि सारे लोक यीशुएरी गल्लां शुन्नेरे लेइ च़ेवरे पासन बिश्शारे रहते थिये ।

20

XXXXXXXXXXXXXXXXXXXX

(XXXXXXXX 21:23-27; XXXXXXXX 11:27-33)

1 एक्की दिहाडे ज़ैखन यीशु मन्दरे मां शिक्षा लोरो थियो देने, ते तैन खुशखबरी लोरो थियो शुनाने त प्रधान याजक ते शास्त्री ते यहूदी बुजुर्ग यीशु कां पुजे ।

2 ते तैना ज़ोने लगे, “तू एन सैरी गल्लां कसेरे अधिकारे सेइं केरतस या तीं ए अधिकारे केनि दित्तोरूए?”

3 यीशु तैन जुवाब दित्तो, “अवं भी तुसन अक गल पुछ्तई, मीं ज़ोथ ।

4 यहून्नारो बपतिस्मो स्वर्गेरे तरफां थियो या मैन्हु केरे तरफां थियो?”

5 तेना एप्पू मांमेइं बेंस केरने लगे, “कि अगर अस ज़ोम, ‘स्वर्गेरे तरफां थियो,’ त तै पुछ्तलो कि, ‘फिरी तुसेई याकीन की नई कियेरू?’

6 पन अगर अस ज़ोम कि, ‘मैन्हु केरे तरफां थियो,’ त लोकेई असन घोडेई देनिन, किजोकि तैना यहून्ना नबी मन्ते थिये ।”

7 एल्हेरेलेइ तेनेई जुवाब दित्तो, “कि अस न ज़ानम कि केसेरी तरफां थियो ।”

8 यीशु तैन सेइं ज़ोवं, “त अवं भी तुसन सेइं न ज़ोई कि एना कम्मा कसेरे अधिकारे सेइं केरताई ।”

XXXXXXXXXXXXXXXXXXXX

(XXXXXXXX 21:33-46; XXXXXXXX 12:1-12)

9 फिरी यीशु तैन लोकन अक मिसाल देइतां ज़ोने लगो, “एक्की मैने दाछ्छरी बाग लाई ते ते टेकेदारन टेके पुड देइतां एप्पू खरे च़िरे कोस्कोई दूर मुलखे च़लो जेव ।

10 जेइस दाछ्छ पकनेरो मौसम अव त तैनी अपनो हिस्सो नेनेरे लेइ अक नौकर बागी मां भेजो । पन तेनेई तै खूब कुटो ते खाली वापस भेजो ।

11 ते फिरी तैनी अक होरो नौकर भेजो, पन तेनेई तैसेरी भी बेइजती की, ते तै भी झुस कुट केरतां खाली वापस भेजो ।

12 फिरी तैनी अक टलेइयोवं होरो नौकर भेजो, पन तेनेई तैसेरी भी बेइजती की ते ज़ख्मी केरतां कढो ।

13 तेखन बागारे मालिके ज़ोवं, ‘अवं अपनू टलारू मट्टू भेजताई शैइद तैना तैसेरो लिहाज़ केरेले ।’

14 पन ज़ैखन टेकेदारइं ते लाव त एप्पू मांमेइं मुशोरो केरने लगे, ए मालिके, एज्जा एस्से मारम ताके जेइदात इश्शी भोइ गाए ।

15 तेनेई तैन मट्टू बागी मरां बेइर शैरी छ़ड्छ़, ते मारू तुस सोचा कि फिरी बागारे मालिके तैन सेइं कुन केरलो ।

16 ते मालिक एडतां तैन मैरी छुडेलो ते बाग होरि केरे हवाले केरेलो।" तैनेई एन शुन्तां ज़ोवं, "परमेशर न केरे एरू न भोए।"

17 तैनी तैन केरे पासे तेकतां ज़ोवं, "फिरी इन कुने ज़ैन पवित्रशास्त्रे मां लिखोरूए कि, 'जै घोड़ मिस्त्रेई रदी कियो, तैए घोड़ कूनेरो घोड़ भोलो।'

18 जै मैन्हु इस घोड़े पुड़ बिछुडेलो त तैसेरे टुकड़े-टुकड़े भोइ गाले, ते ज़ैस उन्डो ए घोड़ बिछुडेलो तैस ए पितां छुडेलो।"

~~~~~

(~~~~~ 22:15-22; ~~~~~ 12:13-17)

19 शास्त्री लोकेई ते प्रधान याजकेई यीशु टलानेरी कोशिश की। किजोकि तैना बुझी जोरे थिये, कि तैनी ए मिसाल एन केरे बारे मां शुनेवरी थी, पन तैना लोकन करां डरते थिये।

20 तैना लोक यीशुए टलानेरो मौको तोपने लोरे थिये, तैनेई विशवैसी केरे रूपे मां जासूस भेजे ताके तैसेरी कोई गल टलेइ सखन ते फिरी राज़ेरे अधिकारे मां देइ देन।

21 तैनेई यीशु पुच्छु, "हे गुरू अस ज़ानतम कि तू सच्चो आस ते सच्चेरी शिक्षा देतस, ते केन्चेरी तरफदारी न केरस बल्के सच्चे सेइं परमेशेरी बत्तरी शिक्षा देतस।

22 कुन असन महाराजे जो धड़त देनी जेइजे कि नेई?"

23 यीशुए तैन केरि चलाकी बुझतां तैन जो ज़ोवं।

24 "मीं अक दीनार हिराथ ते एस पुड़ केसेरी शकल ते केसेरू नव्वे?" तैनेई ज़ोवं, "महाराजेरी।"

25 यीशु तैन सेइं ज़ोवं, "ज़ैन महाराजेरू तैन महाराजे जो देथ, ते ज़ैन परमेशेरू ए, तैन परमेशे जो देथ।"

26 ते तैना लोकां केरे सामने तैसेरी कोई गल न टलेइ सखे बल्के तैसेरे जुवावे सेइं तैना हैरान भोइतां चुप रेइजे।

~~~~~

(~~~~~ 22:23-33; ~~~~~ 12:18-27)

27 फिरी सद्की ज़ैन ज़ोते थिये कि मुवोरे ज़ीते न भोन ते फिरी किछु यीशु कां एडतां पुच्छने लगे।

28 "हे गुरू असन जो मूसरो हुक्मे कि अगर केन्चेरो दूला अपनि कुआन्शारे भोते सते ओईटले मेरि गाए त तैसेरो दूला तैस कुआन्शी सेइं इला बनाए, ताके तै अपने दूलाएरे लेइ औलाद पैदा केरे।

29 सत दूला थिये पेइले इला बनाव ते ओईटले मेरि जेव।

30 फिरी होरे तैस सेइं इला बनाव।

31 फिरी तैल्ला पत्ती टलेइयोवं तै कुआन्श रख्खी फिरी एन्चरे सेइं सत्तेई ज़नेई इला बनाव, पन सब बेऔलाद मेरि जे।

32 ते आखकार तै कुआन्श भी मेरि जेई।

33 ते ज़ीते भोने पुड़ तै केसेरी कुआन्श भोली? किजोकि तै सत्ते दूलां केरि कुआन्श बनोरी थी।"

34 यीशुए तैन सेइं ज़ोवं, "इस दुनियारे लोकन मां त इला बनानेरो दस्तूरे।

35 पन ज़ैना लोक एजने बैली दुनियारे कावल भोले, ते ज़ैना मुइदन मरां ज़ीते भोले तैना इला न बनाले।

36 तैना मरेले भी नन्ना एल्हेरेलेइ की तैना स्वर्गदूतां केरे ज़ेरे भोले ते तैन जो ज़ीते भोनेरां ते परमेशेरां मट्टां ज़ोले।

37 ते ज़ैडी तगर मुइदां केरो ज़ीते भोनेरी गल्ले, ज़ेन्चरे मूसा नेबेरे ज़लते झैल्लोवेरे बारे मां, तेन्चरे इशारो कियो किजोकि तै परमेशर अब्राहमेरो परमेशर, इसहाकेरो परमेशर ते याकूबेरो परमेशर ज़ोइतां फुकारतो थियो।

38 पन परमेशर मुइदां केरो नई बल्के ज़ीतां केरो परमेशरे। किजोकि तैसेरे नेडे सब ज़ीतेन।"

39 शास्त्री लोकन मरां किछेई जुवाव दित्तो, “हे गुरू तीं त बडू रोडू ज़ोवं।”

40 फिरी तैन मरां केन्ची हिम्मत न अई, कि एस होरू किछ पुछ्न।

~~~~~

(~~~~~ 22:41-46; ~~~~~ 12:35-37)

41 फिरी यीशुए तैन सेइं ज़ोवं, “फिरि मसीह जो दाऊदेरू मट्टू केन्चरे सेइं ज़ोतन?

42 किजोकि दाऊद त एप्पू भजना केरे किताबी मां ज़ोते,

परमेशरे मेरे प्रभु सेइं ज़ोवं,

मेरे देइने पासे विश।

43 कि ज़ां तगर अवं तेरे दुश्मन तेरे पावन हैठ न विशैली।

44 दाऊद त तैस जो प्रभु ज़ोते, फिरि तैन तैसेरू मट्टू केन्चरे भोवं?”

~~~~~

(~~~~~ 23:1-36; ~~~~~ 12:38-40)

45 ज़ैखन सब लोक शुनी राहोरे थिये त यीशुए अपने चलन सेइं ज़ोवं।

46 “शास्त्री लोकन करां हुशाए रेइयथ तैना लम्मे-लम्मे कुरते लाने पसंद केरतन, ते होरू एन चातन कि लोक बज़ारन मां तैन जो नमस्कार ज़ोन, ते तैना प्रार्थना घरे मां उच्ची कुर्सी तोपतन ते धामन मां बडे खास बन्नू चातन।

47 तैना विधवां कुआन्शां करां घरां लुटतन ते लोकन हिरानेरे लेइ बडी लम्मी प्रार्थना केरतन। तैन हच्छी सज़ा मैलनीए।”

21

~~~~~

(~~~~~ 12:41-44)

1 यीशु अमीर लोकां केरे पासे तकने लगो, ज़ैना-ज़ैना दान-पेट्टी मां दान लोरे थिये छुडने।

2 तैनी अक बडी गरीब विधवा कुआन्श लाई ज़ैसां इई पेंइसे यानी अक धेलो चाढो।

3 तैखन यीशुए ज़ोवं, “अवं तुसन सेइं सज़ ज़ोताई कि दान-पेट्टी मां दान देने बालन मरां सेअन करां जादे इस विधवा कुआन्शां दान दित्तू।

4 किजोकि तैनेई त अपनि दौलती मरां सिर्फ धगसरे पेंइसे परमेशरे घरे मां दित्तोरेन पन इस कुआन्शां अपनि गरीब हालती सेइं ज़ैन किछ एसारे पल्ले थियू सब किछ देइ छुडू।”

~~~~~

(~~~~~ 24:1-2; ~~~~~ 13:1-2)

5 किछ लोक मन्दरे बारे मां ज़ोने लोरे थिये, कि बडे माघे घोडेई सेइं ते दान कियोरी चीज़न सेइं बनोरूए, त यीशुए ज़ोवं।

6 “तैना दिहाडे एजने बालेन कि इन चीज़ां ज़ैना तुस इडी लहने लोरेथ इडी घोडे पुइ घोइ नई रानो ज़ै बछोडो न गालो।”

~~~~~

(~~~~~ 24:3-14; ~~~~~ 13:3-13)

7 तैनेई यीशुए पुछ्छू, “हे गुरू जी एन गल्लां केइस भोनिन? ते तैन केरो दुनियाई मां एजनेरो कुन निशान भोनीए।”

8 यीशुए तैन ज़ोवं, “खबरदार टेपलोईयथ नन्ना, किजोकि काई लोक मेरे नव्वे सेइं एजनेन ते तैनेई ज़ोनूए कि अव्वे मसीह आई, ते मौको भी नेडे पुजोरोए तुस तैन पत्ती न गेइयथ।

9 ते ज़ैखन तुस लडेइयरी त उलझनरी अफुवां शुनेले त डेरथ नन्ना, किजोकि एन गल्लां केरू पेइले भोनू ज़रूरीए, पन तेइसे खातमों नई भोनो।”

10 तैखन यीशुए ज़ोवं, “किजोकि कौमी पुइ कौम, ते राज़े पुइ राज़ चढहाई केरेलू।

11 ठारी-ठारी बडे-बडे भुंजल एजनेन ते काल पेनोए ते बिमारी फैलनिएं ते बुरी-बुरी गल्लां भोनिन ते अम्बरे मां आजीब निशान लेइहोनेन ।

12 एन सब गल्लां भोने करां पेडले तुशशे दुश्मन तुसन सिर्फ मेरे नव्वेरे वजाई सेइं ढप्पेले ते तुसन सताले ते प्रार्थना घेरी आदालती मां हाज़र केरेले ते कैद केरेले ते गवर्नरन ते कने राजन कां पैश केरेले ।

13 तैखन तुसन मेरी गवाही देनेरो रोडो मौको मैलेलो ।

14 पन तुसन कोई ज़रूरत नई, कि पेडले फिकर करने लगथ कि अस कुन ज़ोमेले ।

15 किजोकि अवं तुसन एरी ज़बान ते अकल देइलो, कि कोई भी मुखालफ तुशशे सामने खडो न भोइ सकेलो ते न लोक तुशशे खलाफ किछ ज़ोई सकेलो ।

16 ते तुशशे हाज़ बव ते दूला ते रिशतेदार ते दोस्त तुसन सेइं बैर केरेले ते तुसन मरां किछन मारेले भी ।

17 ते मेरे नव्वेरे वजाई सेइं सारे लोक तुसन सेइं नफरत केरेले ।

18 पन तुशशे दोग्गेरो कोई बाल बांको न भोलो ।

19 सब किछ झेलतां तुस अपनि जान बचेइ साखेलो ।”

~~~~~

(~~~~~ 24:15-21; ~~~~~ 13:14-19)

20 “जेइस तुस यरूशलेम नगर चेवरे पासन फौवजेइं सेइं घेरेरू लाले, त बुझथ कि एस नाश भोनेरे दिहाडे नेडे ओरेन ।

21 तैस मौके ज़ैन यहूदिया मां भोले तैना पहाडे पुड जो नेशशी गान ते ज़ैना यरूशलेम नगरे मां भोले त तैन बेइरोवं निसन ते ज़ैना इलॉव्वन मां भोले त तैना नगर मांजो न गान ।

22 किजोकि एना बदलेरे दिहाडे भोले, एन मां तैन सब किछ ज़ैन पेडलू पवित्रशास्त्रे मां लिखोरूए तैन पूरू भोनूए ।

23 तैन दिहाडन मां ज़ैना दोजींती त दुद्ध पियाती कुआन्श भोली, तैन केरे लेइ अफ़सोस! किजोकि धेरती पुड बडी मुसीबत एजनीए ते एस कौमी पुड बडी आफत एजनीए ।

24 तैना सब तलवारी सेइं मारे गाले ते गुलाम बेनतां सेब्बी कौमन मां पुजरेले ते गैर कौमां केरो मौको पूरो भोने तगर यरूशलेम नगर गैर कौमेईं सेइं पस्त भोंतो रालू ।

~~~~~

(~~~~~ 24:29-31; ~~~~~ 13:24-27)

25 “दिहाडे चेंदनरी ते तारन मां निशान बांदे भोनेन ते धेरती पुड कौमन बडी तकलीफ पुजिनियें, किजोकि समुन्दरेरी लैहेरां केरि शौरी सेइं तैना डेरि गानेन ।

26 डरं मारे एजने बैली मुसीबतरे इंतज़ार केरते-केरते तैन केरे होश उडी गानेन, किजोकि अम्बरेरी सैरी शेक्ति हिल्लेली ।

27 तैखन लोक मैनेरू मट्टू बेडि शेक्ति ते महिमा सेइं बिदलारी मां एंडतू लाएले ।

28 ज़ैखन एन गल्लां भोनी शुरू भोली त सिधे खडे भोइतां उवरू तेकथ, किजोकि तुशशो छुटकारो भोने बालोए ।”

~~~~~

(~~~~~ 24:32-35; ~~~~~ 13:28-31)

29 फिरी यीशुए तैन अक मिसाल देइतां ज़ोवं, “तुस फेगरे वुट ते होरि वुट्टन भी हेरतथ ।

30 ज़ेरि तैस गुडी लेगनी शुरू भोइचन? त तुस हेरतां बुझतथ कि नेला ओरोए ।

31 एसेरो ज़ेरो, ज़ैखन तुस एना गल्लां, ज़ैना मीं ज़ोई, भोते हेरेले, त तुस बुझ्की छड्डा कि परमेशेरू राज़ नेडे ओरूए ।

32 अवं तुसन सेइं सन्न ज़ोताई, कि ज़ां तगर एन गल्लां पूरी न भोन, एस कौमरो खातमों न भोलो ।

33 धरती अम्बर टेली गालू पन मेरी गल्लां कधे न टेलेली ।

॥॥॥॥ ॥॥

(॥॥॥॥ 24:36-44; ॥॥॥॥ 13:32-37)

- 34 “बस्सा खबरदार भोध कोस्कोई एरून भोए कि तुप्रशो दिल नशे मां मसत भोइतां इस ज़िन्दगरे फिकरे सेइ कमजोर भोए, ते तैस दिहाड़े तुप्रशे लेइ अक मुसीबत बने ।
- 35 किजोकि ते इस सैरी धेरती पुइ जेत्तरे लोकन तैन सेबन पुइ एन्चरे एजनीए ।
- 36 बस्सा, हर वक्त तियार राथ ते प्रार्थना केरते राथ, ताके तुस एन गल्लन करां जैना भोने बैलिन बँचतां राथ, ते मैनेरे मट्ठे कां खड़े भोनेरे काबल भोध ।”
- 37 यीशु रोज मन्दरे मां शिक्षा देतो थियो, ते राती ज़ैतून पहाड़े पुइ रातो थियो ।
- 38 झेझां सारे लोक यीशुएरी गल्लां शुन्नेरे लेइ मन्दरे मां तैस कां एइते थिये ।

22

॥॥॥॥॥ ॥॥॥ ॥॥॥॥॥

(॥॥॥॥ 26:1-5; ॥॥॥॥ 14:1-2; ॥॥॥॥॥ 11:45-53)

- 1 अखमीरी तिहारेरी दिहाड़ी जैस जो फ़सह ज़ोतन नेइ ओरी थी ।
- 2 प्रधान याजक ते शास्त्री मौको तोपने लोरे थिये कि यीशु केन्चरे मारम । किजोकि तैना लोकन करां डरते थिये ।

॥॥॥॥ ॥॥॥॥॥॥॥॥॥ ॥॥॥॥॥

(॥॥॥॥ 26:14-16; ॥॥॥॥ 14:10-11)

- 3 ते शैतान यहूदा मां बेस्सी जेव तैस जो इस्करियोती भी ज़ोते थिये, ते ते यीशुएरे 12 चेलन मां गनो गातो थियो ।
- 4 दे ते प्रधान याजकन ते प्रार्थना घरेरे किछ् खास पुच्छ्ने गन्ने लोकन कां जेव ते तैन सेइ मुशोरो केरने लगो कि केन्चरे सेइं यीशु तैन केरे हवाले केरी बटते ।
- 5 तैना बड़े खुशी भोए ते तैस पेंइसे देनेरो वादो कियो ।
- 6 तैनी तैन केरि गल मन्नी ते मौको तोपने लगो, कि यीशु केन्चरे सेइं तैन केरे हावाले केरे ते केन्ची पतो न लगो ।

॥॥॥ ॥॥॥ ॥॥॥ ॥॥॥ ॥॥॥॥॥॥॥ ॥॥॥ ॥॥

(॥॥॥॥ 26:17-25; ॥॥॥॥ 14:12-21; ॥॥॥॥॥ 13:21-30)

- 7 अखमीरी रोटरू तिहार नेइ ओरू थियूं, जैस फ़सह तिहारे मां गबड़ेरू बलिदान देनू ज़रूरी थियूं ।
- 8 यीशुए पतरस ते यूहन्ना एन ज़ोइतां भेजे, “कि गाथ ते इश्शे लेइ फ़सह तिहारेरी रोट्टी तियार केरा ।”
- 9 चलेईं पुच्छ्, “कि तू कोडि चातस कि अस तीजो फ़सह तिहारेरी रोट्टी तियार केरम?”
- 10 यीशुए तैन जुवाब दित्तो, “नगर मां गाते तुसन अक मैन्हु मैलनोए ज़ै पैनेरो घडो घिन्तां च़लोरो भोनोए, तैस पत्ती गोइयथ ते ज़ैस घरे मां तै गालो तुस भी गोइयथ ।
- 11 तैसेरे मालिके सेइं ज़ोइयथ कि गुरे ज़ोरूए कि टलाहना केरि ठार कोडि आए, ज़ैडी अव अपने चेलन सेइं साथी फ़सह तिहारेरी रोट्टी खेइ सेखी?
- 12 तै तुसन दोपरे नेइतां अक बड्डो कमरो हिरालो ज़ै खूब रोडेचारे सज़ैवरो भोनोए तैडी इश्शे लेइ तियारी केरथ ।”
- 13 तेनेईं तैडी गोइतां सब किछ् तेरहु लाव ज़ेरू तैनी ज़ोरू थियूं, ते तैडी फ़सह तिहारेरी रोट्टी तियार की ।

॥॥॥॥ ॥॥

(॥॥॥॥ 26:26-30; ॥॥॥॥ 14:22-26; 1 ॥॥॥॥॥॥॥॥ 11:23-25)

- 14 ज़ैखन रोट्टी खानेरो मौको अव त यीशु अपने प्रेरितन सेइं साथी विशशोर थिये ।

15 ते यीशुए तैन सेइं ज़ोवं, “मेरी ए बड़ी इच्छा थी, कि अपनो दुःख झल्लने (मरने) करां पेइले एककी बार फ़सह तिहारेरी रोट्टी तुसन सेइं साथी खेइ।

16 किजोकि अवं तुसन सेइं ज़ोताई, कि अज़ेरां पत्ती तांतगर न किछ खेइ सेखी, ज़ां तगर परमेशेरे राज़ेरू कम पूरू न भोए।”

17 फिरी यीशुए दाछेरे रसेरो कटोरो ट्लातो ते परमेशेरू शुक्र केरतां चलन दित्तो ते ज़ोवं, “थांथ ते एप्पू मामेइं बंटा।

18 किजोकि अवं तुसन सेइं ज़ोताई कि अज़ेरां पत्ती दाछारो ए रस फिरी तांतगर न पीलो ज़ां तगर परमेशेरू राज़ न एज्जे।”

19 फिरी यीशुए रोट्टी ट्लाती ते परमेशेरू शुक्र केरतां टलोड़ी ते तैसेरे टुकड़े बनेइतां अपने चलन एन ज़ोइतां दित्ती, “कि ई मेरी जाने ज़ै तुशे लेइ अवं देताई ते तुस भी मेरी यादगैरी मां एन्ने केरते रेइयथ।”

20 एन्चरे रोट्टी खानेरे बाद तैनी कटोरो ट्लातो ते चलन कां दित्तो ते ज़ोवं, “कि ई कटोरो मेरो तैस खूनेरो नंव्वा करारे ज़ै तुशे लेइ दित्तोरोए।

21 पन हेरा मीं टलुवानि बालो मीं सेइं साथी खाने लोरोए।

22 किजोकि मैनेरू मट्टू त हुनी ज़ल्लोरोस ज़ेन्चरे कि तेसेरेलेइ पेइले एन पक्कू भोरूए पन तैस मैन्हू पुइ अफ़सोस ज़ेसेरे हथेइं तै गिरफ़्तार भोए।”

23 एन शुन्तां तैना एप्पू मामेइं पुच्छने लगे, “असन मां एरो ज़ेरो कौने ज़ै एन कम केरेलो?”

???? ???? ? ? ? ? ? ? ? ?

24 तैन एस गल्ली पुइ एप्पू मामेइं बंस भोइ कि असन मां बड्डो कौने?

25 यीशु तैन सेइं ज़ोवं, “गैर कौमन पुइ तैन केरे राज़े राज़ केरतन, ते ज़ैन केरो तैन पुइ अधिकारे भोते तैन जो भलाई केरनेबाले ज़ोतन।

26 पन तुसन मां एरू लोइं भोवरू, तुसन मां ज़ै बड्डोए तै निकड़े बराबर बने ते ज़ै खास आए तै सेवकेरे बराबर बने।

27 किजोकि बड्डो कौने? ज़ै तैस कां साथी विशोरोए या तै ज़ै तैसेरो चलोए? कुन तै तैस कां नई विशोरो? पन अवं त तुसन मां अक सेवकेरे बराबर आईं।

28 पन तुस तैना आथ ज़ैना मेरी अज़मैइशेरे मौके बराबर मीं सेइं साथी रातथ।

29 ज़ेन्चरे बाजी मीं अक राज़ दित्तोरूए अवं भी तुसन अक राज़ देताई।

30 ताके तुस मेरे राज़े मां मीं सेइं साथी विशतां खाथ पीथ, बल्के बडे-बडे शाही तखतन पुइ विशतां इस्राएलेरे 12 गोत्रां केरो इन्साफ़ केरेले।”

???????? ???? ???? ???? ???? ?

(???? 26:11-35; ???? 14:27-31; ???? 13:36-38)

31 “शमौन, शमौन, खबरदार रा, शैताने परमेशेरे करां अज़ाज़त मगगोरीए कि तुसन सेबन परखे, कि रोड़े बुरे करां अलग केरे ज़ेन्चरे ज़मीनदार गेहुंन करां झाझ अलग केरते।

32 पन मीं तेरे लेइ प्रार्थना की, कि तू मीं पुइ विश्वास केरनो न शारस, ज़ैखन तू मन फिरास त अपने विश्वासी दलान मज़बूत केरां।”

33 पतरसे यीशु सेइं ज़ोवं, “हे परमेशर तीं सेइं अवं कैद भोने बल्के मरनेरे लेइ भी तियार आईं।”

34 पन यीशुए ज़ोवं, “हे पतरस अवं तीं सेइं ज़ोताई कि अज़ कुकड़े बांग देने करां पेइले तू मेरो ट्लाई बार इन्कार केरेलो कि अवं एस न ज़ैनी।”

????, ???? ? ? ? ?

35 यीशुए तैन सेइं ज़ोवं, “कि ज़ेइस मीं तुस खुशखबरी शुनाने, बगैर बेटवे, बूटां ते झोलेरे बगैर भेजोरे थिये त तुस केन्वी चीज़ारे घटी भोइ?” तैनई ज़ोवं, “केन्वी चीज़री नई।”

36 यीशु तैन सेइं ज़ोवं, “पन हुनी ज़ैस कां बेटवो भोए ते साथी रखे ते एन्चरे झोलो भी ते ज़ैस कां तलवार न भोए तै अपनू कोट बेन्नतां भी तलवार घिन्ने।

37 अवं तुसन सेइं ज़ोताई कि ई गल्ले ज़ै पवित्रशास्त्रे मां लिखोरीए, कि तै पूरी भोए। तै बुरे लोकन सेइं साथी गनो जेव! एल्हेरेलेइ मेरे बारे मां लिखोरी गल्लां पूरी भोने लोरिन।”

38 तैनेई ज़ोवं, “हे प्रभु हेर इड़ी दूई तलवारन।” तैनी तैन सेइं ज़ोवं “बेड़ि आन।”

??

(???????? 26:36-46; ??????? 14:32-42)

39 फिरी तै बेइर निस्सो ते ज़ेन्चरे तैसेरो दस्तूर थियो, तै ज़ैतून पहाड़े पुड़ जो ज़लो जेव ते तैसेरे चले भी तैस सेइं साथी चले जे।

40 तैस ठैरी पुज़तां तैनी तैन सेइं ज़ोवं, “प्रार्थना केरा ताके तुस अज़मैइशी मां न पेथ।”

41 यीशुए तैन करां थोड़े ज़ेरे अगगर गोइतां ज़ैधू केरे भारे विशतां प्रार्थना केरने लगे।

42 “हे बाजी अगर तेरी मर्जी भोए त ई दुखेरो कटोरो मीं करां दूर केर, पन फिरी भी मेरी मर्जी पूरी न भोए बल्के तेरी मर्जी पूरी भोए।”

43 तैखन तैनी अम्बेरां अक स्वर्गदूत लाव ज़ै तैस शक्ति देतो थियो।

44 ते तै परेशान भोइतां होरि जादे दिले सेइं प्रार्थना केरने लगे ते तैसेरो पिनीनो बुझा कि खूनेरे बडे-बडे तेपु तल्ले झड़ते थियो।

45 प्रार्थना केरनेरे बाद यीशु अपने चलन कां वापस अव ते तैना गम्मेरे मारे झुलोरे मैल्ले।

46 यीशुए तैन सेइं ज़ोवं, “तुस किजो झुल्लोरेथ उठा ते प्रार्थना केरा ताके अज़मैइशी मां न राथ।”

??

(???????? 26:47-56; ??????? 14:43-50; ?????????? 18:3-12)

47 हेजू यीशुए गल ज़ोने लोरो थियो, त मैन्हु केरो अक जथो तैड़ी पुजो ते बारहन मरां अक ज़ेसेरू नवं यहूदा थियूं, तैन सेइं अग्री-अग्री थियो, ते तै यीशु फुम्मड़ी देने अगर अव।

48 पन यीशुए तैस सेइं ज़ोवं, “यहूदा कुन तू एक्की फुम्मड़ी सेइं मीं मैनेरे मट्टे टलुवातस?”

49 ज़ैखन यीशुएरे सैथेई एन सब हेरू त तैनेई ज़ोवं, “हे प्रभु कुन अस तलवार च़लाम?”

50 ते तैन मरां एक्के महायाजकेरे नीकरे पुड़ तलवारां च़लाई ते तैसेरो तैनी कन्न उड़ाव।

51 पन यीशुए जुवाव दित्तो, “बस्सा बड़ भोइ जेवं।” ते यीशुए तैसेरो कन्न तैखने हथ लेइतां बझाव।

52 तैखन यीशुए प्रधान याजकन ते मन्देरे सिपाही ते बुज़ुर्ग ज़ैन तैस गिरफ्तार केरने ओरे थिये तैन जो ज़ोवं, “तुस कुन तलवारां ते डंडे घिन्तां मीं डैकू बुझतां टलाने ओरेथ?”

53 ज़ेइस अवं तुसन सेइं साथी मन्देरे मां भोतो थियो, त तुसेई मीं सेइं हथ न लाव, पन ई त तुश्शे आंधेरे मौकेरो अधिकारे।”

??

(???????? 26:57-58,69-75; ??????? 14:53-54,66-72; ?????????? 18:12-18,25-27)

54 ज़ैखन तैनेई यीशु टलातो तैस तैट्टां नेइतां महायाजकेरे घरे नीयो, पतरस भी पत्तपति बल्हे-बल्हे तैरां जेव।

55 तैनेई अंगने मां अग बालोरी थी ते सब विशतां अग तपने लोरे थिये ते पतरस भी तैन मां थियो।

56 ते अक कुआन्श अग्गी कां विशोरी तकने लोरी थी ते पतरसेरां तेकतां ज़ोने लगी, “कि ई मैन्हु भी तैस सेइं साथी थियो।”

57 पन पतरसे इन्कार केरतां ज़ोवं, “हे कुआन्शे अवं एस न ज़ैनी ए कौने।”

58 थोड़ी सैइत्रां पत्ती होरे एक्के पतरसेरां तेकतां ज़ोवं, “तू भी तैन्ना केरो साथिस।” पन पतरसे ज़ोवं, “नई अवं नई।”

59 कोई एककी घेंटेरे बाद केन्चे होरे बड़े याकीने सेइं ज़ोवं, “ई मैन्हु पक्को तैस सेइं साथी थियो, किजोकि ए भी गलीली आए।”

60 पन पतरसे इन्कार केरतां ज़ोवं, “अवं एस न ज़ैनी तू कुन ज़ोतस?” हेजू पतरसे ए गल ज़ोने लोरो थियो, त कुकड़े बांग दित्ती।

61 ते प्रभुए फिरतां पतरसेरे पासे तक्कू ते पतरसे परमेशेरी तै गल याद आई, ज़ै तैनी पतरसे सेइं ज़ोरी थी, “कि अज़ कुकड़े बांग देने करां पेडले तू मेरो ट्लाई बार इन्कार केरेलो।”

62 ते पतरस बेडर गेडतां ज़ोरे-ज़ोरे लेरां देने लगे।

?????? ?????

(?????? 26:67-68; ?????? 14:65)

63 ज़ैने मेनेई यीशु अपने कब्जे मां कियोरो थियो, तैना तैसेरी हासी बनाते थिये ते कने तैस बाते थिये।

64 तैना यीशुएरी एछ्छन पुड़ पट्टी बेन्धतां बाते थिये ते पुछ्छते थिये, “भविष्यवाणी केर ते ज़ो केनि बाहोरिए?”

65 ते तैनेई एन्चरे होरि भी बेड़ि गल्लां ज़ोई ते तैसेरी तुहीन की।

????????? ??? ?????

(?????? 26:59-66; ?????? 14:55-64; ????????? 18:19-24)

66 झेझां बुजुर्ग लोक ते प्रधान याजक ते शास्त्री लोकेई यीशु अपने महासभाई मां आनो,

67 ते ज़ोने लगे, “अगर तू मसीह आस त ज़ो!” यीशुए तैन सेइं ज़ोवं, “अगर अवं तुसन ज़ोई भी त तुस मेरू याकीन न केरेले।

68 ते अगर अवं तुसन पुछ्छी त तुस जुवाबे न देले।

69 पन अज़ेरां बाद मैनेरू मट्टू परमेशेरे देइने पासे विशोरू लाएले।”

70 एस गल्ली पुड़ तैना सब ज़ोने लगे, “तू परमेशेरू मट्टू आस?” यीशुए जुवाब दित्तो, “तुस एप्पू मीजो ज़ोतथ कि तू आस?”

71 तैनेई ज़ोवं, “हुनी असन होरि शाहादतां केरि कुन ज़रूरीए? किजोकि असेई एसेरी ज़बान शुनेरूए।”

23

????????????? ?????? ?????

(?????? 27:1-2,11-14; ?????? 15:1-5; ????????? 18:28-38)

1 तैखन तैना सब तैटठां उठे ते यीशुए पिलातुसे कां घिन्तां जे।

2 ते तैस जो एन ज़ोइतां ए इलज़ाम लाने लगे, “कि ए इश्शे लोकन भडकाते ते महाराजे जो धड़त देनेरे लेइ ठाकते, ते अपने आपे जो मसीह राज़ो ज़ोते।”

3 तैखन पिलातुसे यीशुए पुछ्छ, “तू यहूदी केरो राज़ोस?” यीशु तैस जुवाब दित्तो, “तू एप्पू ज़ोतस!”

4 पिलातुसे प्रधान याजकन ते लोकन सेइं ज़ोवं, “कि अवं एस मैन्हु मां कोई कसूर न लेई।”

5 पन तैना बड़े घमण्डे सेइं ज़ोने लगे, “ए यहूदियारे इलाके करां गलील इलाके तगर बल्के इड़ी तगर लोकन अपनि शिक्षाई सेइं भडकाते।”

6 ज़ैखन पिलातुसे एन शुनू त तैनी पुछ्छ, “कुन ए मैन्हु भी गलील इलाकेरो आए।”

7 ते ज़ेरो तैस पतो लगे, कि ए हेरोदेसेरे इलाकेरो रानेबालोए, त पिलातुसे तै हेरोदेस कांजो भेजो। किजोकि तैस वक्ते मां तै एप्पू भी यरूशलेम नगरे मां थियो।

????????????? ?????? ?????

8 जैखन हेरोदेसे यीशु लाव त बड़ो खुशी भोव । किजोकि तैस ज़रोक्नी देती यीशु हेरनेरी इच्छा थी । तैनी तैसेरे वारे मां बेड़ि गल्लां शुनारी थी, ते तैस बड़ी उमीद थी, कि यीशुएरो कोई चमत्कार हेरे ।

9 तैनी यीशुए बड़ किछ पुच्छ, पन यीशुए तैस कोई जुवाब न दित्तो ।

10 पन याजक ते प्रधान याजक ते कने शास्त्री लोक बड़े ज़ोरे शोरे सेइं यीशु पुड़ इलजाम लांने लगे ।

11 तैखन हेरोदेस भी अपने सैथन सेइं मिलतां यीशुएरी तुहीन की, ते तैसेरी हासी बनाई फिरी तैस अक चमकतो कुरतो लुवेइतां पिलातुसे कां वापस भेजो ।

12 पेइले पिलातुस त हेरोदेस दुश्मन थिये, तैस दिहाड़े तैना दोस्त बेनि जे ।

Matthew 27:15-16; Mark 15:7-10; Luke 23:13-16

(*Matthew 27:15-16; Mark 15:6-15; Luke 18:39-19:16*)

13 तैखन पिलातुसे प्रधान याजक ते सरदार ते हारे लोक अकोट्टे कियो ।

14 ते पिलातुसे तैन सेइं ज़ोवं तुसेईं ए मैन्हु मीं कां एन ज़ांतो आनोरोए कि, ए लोकन भडकाते ते मिमी एसेरी पुछ्छ गन की, पन ज़ैस जुर्मोरो दोष तुस एस पुड़ लातथ, अवं एल्हेरो एसमां कोई कसूर न लेईं ।

15 ते न हेरोदेस जैनी ए असन कां भेजोरोए तैस भी कोई दोष न मैल्लो, ते असन कां एरू कोई सबूत बराँमद न भोवं, ज़ैस सेइं ए कल्ल कियो गाए ।

16 तैल्हेरेलेइ अवं एस कोडेइं बाएतां छेडी देताई ।”

17 पिलातुस यहूदी केरे फ़सह तिहाररे मौके पुड़ अक कैदी हथरां छडतो थियो ।

18 तैना सारे लोक चिन्डां लगे मारने, “कि एस मैन्हु सज़ा देथ ते बरअब्बा इश्शे लेइ हथरां छडडा ।”

19 बरअब्बा नगर मां गडबड़ी केरनेरे ते कतलेरे वारे मां पावंद भोरो थियो ।

20 पिलातुस यीशु हथरां छडनेरे इरादे सेइं लोकन दुवारू पुच्छ ।

21 पन तैना लोक मना चिन्डां लगे मारने, “कि तू एस क़रूसे पुड़ ज़ाद एस क़रूसे पुड़ ज़ाद ।”

22 तैखन पिलातुसे तैन टलेइयोवं फेरे फिरी ज़ोवं, “किजो आखर एनी कुन जुर्म कियोरोए? हेरा एसमां एरू कोई सबूत बराँमद न भोवं, कि ए मौतरे सज़ारो हकदार भोए, तैल्हेरेलेइ अवं एस कुटेइतां छेडी देताई ।”

23 पन तैना चिन्डां मैरी-मैरी ज़ोने लगे, ए क़रूसे पुड़ ज़ादोरो लोइते, ते तैन केरि चिन्डां मारनेरी उमीद पूरी भोइ ।

24 बस्सा, पिलातुसे ज़ोवं कि तैन केरे मेरज़रे मुताबिक कियू गाए ।

25 ते ज़ै मैन्हु हुकुमतरे खलाफ ते खूनेरे जुर्म मां कैद थियो, ते ज़ैस हथरां छडनेरे लेइ तैनेई दरखुवास कियोरी थी, ते हथरां छडडा पन यीशु तैन केरि मेर्जी सेइं सिपाही केरे हवाले कियो ।

Matthew 27:22-23; Mark 15:21-22; Luke 23:17-18

(*Matthew 27:32-44; Mark 15:21-32; Luke 19:17-27*)

26 जैखन तैना यीशु नेइतां ज़लोरे थियो, त तैनेई शमीन कुरेनी ज़ै एक्की इलावेरां ओरो थियो, टलातो ते क़रूसे तैस कां छूने जो दित्तु, कि तू ई क़रूसे छुइतां यीशु पत्ती ज़ला ।

27 ते बड़े लोक तैस पत्ती ज़लोरे थिये ते किछ कुआन्शां भी थी ज़ैना यीशुएरे लेइ शौग बनैती थी ।

28 यीशुए तैन केरे पासे मुइतां ज़ोवं, “हे यरूशलम नगरेरी कुइयाव मेरे लेइ लेरां न देथ, बल्के अपने बच्चां केरे लेइ लेरां देथ ।

29 किजोकि तैना मुशकिल दिहाड़े एजने बालेन ज़ैखन लोक एन ज़ोले कि, ‘धन आन तैना कुआन्शां ज़ैना बेओलादन ते बच्चे न पाले ।”

30 “तैस वक्ते लोक पहाइन सेइं ज़ोले,

‘असन उन्हे बिछड़ा ते उच्चि ठारन जो ज़ोले, कि असन छपाथ ।’

31 किजोकि ज़ैसन तैनेई सब्ज बुट्टे सेइं एन करू, त शुक्कोर बुट्टे सेइं कुन न केरेले?”

32 ते सिपाहेई दूई होरे मुर्जम भी यीशु सेइं साथी ब्रलवरे थिये ताके तैन भी मारन ।

33 ज़ैसन तैना तैस ठैरी पुज्जे ज़ैस जो “खोपड़ी” जोतन त तैड़ी यीशु करूसे पुड़ ज़ादो, ते तैना दूई मुर्जमन भी एक्की यीशुएरे देइने पासे ते होरि बांए पासे करूसे पुड़ ज़ादो ।

34 यीशु ज़ोवं, “हे बाजी एन माफ़ करां एन न जानन् कि एना कुन लोरेम केरने ।” ते तैनेई तैसेरे लिगड़ां केरे लेइ परची छेडतां शर्त रखवु ते एप्पू मांमेइं बटां ।

35 लोक खडखडे एन सब किछ् हरने लोरे थिये ते सरदार ज़ोरे-ज़ोरे सेइं जोते थिये, “एनी होरे त बचाए ते अगर ए मसीहे ते परमेशेरो चुनोरे त अपने आपे किजो न बचाए ।”

36 सिपाही भी तैस कां एइतां तैसेरी हासी बनाने लगे (किजोकि तै अपने आप राज़ो बनातो थियो), ते घटया दाछारो रस पीनेरे लेइ तैस देने लगे ।

37 “ते जोते थिये तू अगर यहूदी केरो राज़ोस त अपने आप बचा !”

38 ते तैस करूसे पुड़ यानी यीशुएरे दोग्गे करां बहा अक पखड़ी लिखतां लेवरी थी, ते तैस पुड़ एन लिखेरू थियूं, “ए यहूदी केरो राज़ आए ।”

☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞

39 तैन दूई डेकू ज़ैना मारे जे तैन मरां एक्के यीशु जो तुहीन केरतां ज़ोवं, “अगर तू मसीह आस त एप्पू भी बंभ ते असन भी बचा ।”

40 पन होरे दुइयोवं डैके तैस जो झिड़कतां ज़ोवं, “तीं परमेशेरो भी डर नई? ज़ै सजा तैस मैलने लावरी तीं भी त तैए सजा मैलने लोरीए ।

41 असन त इन्साफेरे मुताबिक अपने बुरे कर्मां केरि सजा मैलने लोरी पन एनी त कोई गलत कम नई कियेरू ।”

42 तैसन तैनी ज़ोवं, “हे यीशु ज़ैसन तू अपने राज़े मां एज्जेलो त मीं भी याद केरां ।”

43 यीशुए तैस जो ज़ोवं, “अवं तीं सेइं सब ज़ोताई कि तू अजे मीं सेइं साथी स्वर्ग मां भोलो ।”

☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞

(☞ ☞ ☞ ☞ 27:45-56; ☞ ☞ ☞ ☞ 15:33-41; ☞ ☞ ☞ ☞ ☞ 19:28-30)

44 दीसारे 12 बजेई सारे मुखे मां आंधरू भोवं, त टलेइ बज्जन तगर रावं ।

45 दिहाड़ा भी कालो भोव ते मन्देरो पड़दो बां देता बुन तगर फेटतां दूई टुकड़े भोइ जे ।

46 यीशुए बडे ज़ोरे सेइं ज़ोवं, “हे बाजी अवं अपनि आत्मा तेरे हथ्थे मां सांफताई,” ते एन ज़ोइतां यीशुए प्राण दिते ।

47 ज़ैसन रोमी सूबेदारे एन सब हेरू त परमेशेरी तारीफ़ केरते ज़ोवं, “ए मैन्हु सच्चे धर्मी थियो ।”

48 ते सारे लोक ज़ैना तैड़ी थिये ए अनर्थ हेरतां छाती पिट्टते ब्रले जे ।

49 पन यीशुएरे सारे दोस्त ते तैना कुआन्शां ज़ैना गलील इलाके मरां यीशुए पत्पती ओरी थी दूर ज़ेरे खेडोइतां, ज़ैन किछ् भोइ रावरू थियूं सब किछ् हेरी रेवरी थी ।

☞ ☞ ☞ ☞ ☞ ☞ ☞ ☞ ☞ ☞ ☞ ☞ ☞

(☞ ☞ ☞ ☞ 27:57-61; ☞ ☞ ☞ ☞ 15:42-47; ☞ ☞ ☞ ☞ ☞ 19:38-42)

50 अक मैन्हु थियो, जेसरू नवं यूसुफ थियूं, ते यहूदी केरि आदालतरो अक मुलाज़म भी थियो, ते अक बड़ो नेक ते धर्मी मैन्हु थियो ।

51 तै बेडड़ी आदालत अफसरां केरे फैसलेरे हके मां न थियो । तै यहूदी केरे नगर अरिमतियाह रानेवालो थियो, ते परमेशेरे राज़ेरे तलाशी मां थियो ।

52 तैनी पिलातुसे कां गेइतां यीशुएरी लाश मगी ।

53 ते लाश करूसे पुड़ेरां ओसैलतां मलमलेरे कपड़े मां पलेटतां ते एक्की कबरी मां रखवी, ज़ै एक्की शफ़ड़ी मां बनेवरी थी, तैस कबरी मां पेइले कोई लाश न थी रखोरी ।

54 तै तियेरारी दिहाड़ी थी जै आरामेरी दिहाड़ी शुरू भोने वाली थी ।

55 ते तैना दूई कुआन्शां जैना गलील इलाके मरां यीशुए पत्पती ओरी थी, यूसुफे पत्पती जेई ते तैनेई तै कबर हेरी, कि यीशुएरी लाश एसमां केन्त्रे सेइं रखोरीए ।

56 तैखन तैना अपने घरे वापस आए, ते खुशबूदार चीजां ते इत्र तियार कियो ते आरामेरे दिहाड़े मूसेरे कानूनेरे मुताबिक आराम कियो ।

24

XXXXXXXXXXXXXXXXXXXX

(XXXXXXXX 28:1-10; XXXXXXX 16:1-8; XXXXXXX 20:1-10)

1 हफतेरी पइले दिहैड़ी झेजां किछ कुआन्शां खुशबूदार चीजां नेइतां जेई, जैना तैनेई तियार कियोरी थी ते एन्तां कबरी कां पुजी ।

2 पन तैनेई तै घोड़ कबरी करां बिछड़ोरो लाव ।

3 जैखन तैना अन्तर जेई त तैन यीशुएरी लाश न मैल्ली ।

4 तैखन तैना एन हेरतां परेशान भोइ त दूई मैन्हु जैन छितां लिगड़ां लेगगोरां थियां, तैन कुआन्शन कां एइतां खेडोए ।

5 तैना कुआन्शां डेरि जेई ते तैना ज़मीनेरे पासे तकने लगगी । तैन मैनेई तैन जो ज़ोवं, “तुस ज़ीते, मुइदन मां किजो लोरिथ तोपने ।

6 तै इड़ी नई बल्के ज़ीतो भोरोए तुसन याद नई कि जेइस तै गलीले मां थियो, त तैनी तुसन ज़ोरू थियूं कि,

7 मैनेरू मट्टू यानी अवं पापी लोकां केरे हथ्ये दनोए ते क़रूसे पुड़ चाढ़नोई ते फिरी टलेइ दिहाड़ां बाद फिरी ज़ीतो भोनाई ।”

8 तैखन तैना यीशुएरी गल्लां याद एई ।

9 तैखन तैना कबरी करां च़ेलि जेई, त तैनेई यीशुएरे 11 च़ेलन ते बाकी होरि च़ेलन भी एस गल्लरो पतो दित्तो ।

10 ज़ैनेई प्ररितन सेइं गल्लां की, मरियम मगदलीनी योअन्ना ते याकूबेरी अम्मा मरियम ते तैस सेइं साथी होरि भी काई कुआन्शां थी ।

11 पन तैन, तैन केरि गल्लां कहानी लगगी, ते तैनेई तैन केरू याकीन न कियूं ।

12 पन पतरस उठो ते तै कबरेरे पासे दौवडतो तैस टैरी कां जेव, ते तैड़ी तैनी लिक्तां अन्तर तक्कू ते सिर्फ कफन तैड़ी लाव, ते एस गल्ली पुड़ हैरान भोइतां तैट्टां च़लो जेव ।

XXXXXXXXXXXXXXXXXXXX

(XXXXXXXX 16:12-13)

13 फिरी एरू भोवं कि तैन मरां दूई च़ेले तैस दिहैड़ी एक्की इलोव्वेरे पासे च़लोरे थिये, तैस इलोव्वेरू नवं इम्माऊस थियूं । तैन यरूशलेम नगरेरां 11 किलोमीटर दूर थियूं ।

14 तैना एप्पू मांमेइं एस्से बारे मां गल्लां केरते च़लोरे थिये ज़ै बितना बीतोरी थी ।

15 ज़ैखन तैना गल्लन मां मसत थिये, ते एप्पू मांमेइं गलबात लोरे थिये केरने त यीशु एप्पू तैन कां नेडे एइतां तैन सेइं साथी-साथी च़लने लगो ।

16 पन तैनेई यीशु न पिशानो किजोकि परमेशेर तैना पिशान्ने करां रोकोरे थिये ।

17 यीशुए तैन जो ज़ोवं, “तुस लोक एप्पू मांमेइं कुन गल्लां केरने लोरेथ?” तैना रुकी जे, ते तैन केरू तुतर उदास लेइहोने लगू ।

18 तैखन तै ज़ेसेरू नवं क्लियुपास थियूं, तैस सेइं ज़ोने लगो, “यरूशलेम नगरे मां सिर्फ तू अक मैन्हु आस ज़ैस पतो नई कि, आखरी दिहाड़न मां कुन-कुन भोने लोरूए ।”

19 यीशुए ज़ोवं, “कुन लोरूए भोने?” तैनेई तैस सेइं ज़ोवं, “नासरत नगरेरो यीशु, ज़ै नबी थियो, तै परमेशेर ते मैन्हु केरे सामने कम्मन मां ते शिक्षा देने मां बेड़ि शक्ति बालो थियो ।

20 तै प्रधान याजकेई ते हाकिमेई केन्चरे सेइं रोमी गवनरि हवाले कियो ते तैस जो कतलेरे हुक्म देइतां तै क्रूस पुइ चाढो ।

21 पन असन त उमीद थी कि ए मैनुए, जै इस्राएली लोकन रोमेरे राज्जे करां आज्ञाद केरेलो, एन गल्लन अज दलेइयोवं दिहाडीए ।

22 हुन्ना असन मरां किछ कुआन्शां अज झेझां कब्री कां जोरी थी, तैन केरे ज़ोने सेइं असां हैरान भोए ।

23 ज़ैखन तैन लाश न मैल्ली त तैना एन ज़ोती एई, असेईं स्वर्गदूत लाए ते तैनेईं ज़ोवं, कि यीशु ज़ीतो भोरोए ।

24 तैखन किछ इश्शे साथी भी कब्री कां जे, ते ज़ेन्चरे कुआन्शेईं ज़ेरू थियूं, तेरहु लाव पन यीशु न लाव ।”

25 यीशु तैन दूईं चेलन सेइं ज़ोवं, “हे बेअक्ल लोकव! तुश्शे लेइ पवित्त्रशास्त्र मां नेबी केरि जोरी गल्लन पुइ भी विश्वास केरनो केतरो मुशकले ।

26 कुन मसीहेरे लेइ ज़रूरी न थियूं, कि दुःख झल्लले ते फिरी अपनि महिमा मां दाखल भोए?”

27 यीशु अपने बारे मां तैना सैरी गल्लां समझेइ, जैना पवित्त्रशास्त्रे मां मूसा करां देते सारे नेबेईं ज़ोरिन ।

28 एतरे मां तैना तैस डलव्वें नेडे पुजे ज़ैडी तैनेईं गानू थियूं, तैनेईं बुझ कि यीशु अग्रोवं गानूए ।

29 पन तैनेईं एन ज़ोइतां मजबूर कियो, “कि असन कां विश किजोकि दिहाडी डुबोरीए आंधरू भोने बालूए ।” बस्सा तै विशनेरे लेइ तैन सेइं साथी अन्तर चलो जेव ।

30 ज़ैखन तै तैन सेइं साथी रोट्टी खाने विश्शो त तैनी रोट्टी ट्लाती ते बरकत देइतां टलोडी ते तैन देने लगे ।

31 तैखन तैन केरि एछ्छी खुल्ली ते तैनेईं तै पिशानो, पन तै तैन करां आलोप भोइ जेव ।

32 तैना एप्पू मांमेइं ज़ोने लगे, “ज़ैखन तै बत्तां असन सेइं साथी गल्लां लोरो थियो केरने, ते असन पवित्त्रशास्त्रेरो मतलब मसमझातो थियो, त असन केरी उमीद भोरी थी ।”

33 तैना तैखने तैट्टां उठे ते यरूशलेम नगरे मां आए ज़ैडी तैना यारहे चले ते होरे तैन केरे साथी एककी ठेरी मैल्ले ।

34 तैना ज़ोने लोरे थिये, “कि प्रभु सञ्च ज़ीतो भोरोए ते शमौन पतरसे लाहोरोए ।”

35 तैनेईं बत्तरी सैरी गल्लां शुनेईं ते फिरी केन्चरे असेईं यीशु रोट्टी टलोइते बार पिशानो ।

????? 28:16-20; ????? 16:14-18; ????? 20:19-23; ????? 1:6-8)

36 तैना गल्लां केरने लोरे थिये त यीशु तैन केर मझाट खड़ी भोइतां ज़ोने लगे, “तुसन शान्ति मैल्ले ।”

37 पन तैना एतरे डेरि जे, कि तैना समझने लगे कि असां आत्मा लहने लोरेम ।

38 यीशुए तैन सेइं ज़ोवं, “तुस किजो डेरेंथ ते तुश्शे मने मां शक किजो भोतीए ।

39 मेरे हथ पाव हेरा अवं तैए आई, मीं हथ लेइतां हेरा, किजोकि आत्माई हड्डी त कने मास न भोए ज़ेरू तुस मीं मां लातथ ।”

40 एन ज़ोनेरे पत्ती तैनी अपने हथ पाव हिराए ।

41 पन खुशी सेइं तैन याकीन न भोवं, कि यीशु ज़ीतोए, ते तैना हैरान भोए, यीशुए तैन सेइं ज़ोवं, “तुसन कां खाने जो किछ आए?”

42 तैनेईं तैस ट्लाडोरी मेछलरो अक टुकडो दित्तो ।

43 तैनी ट्लाती ते तैन केरे सामने खाइ ।

44 तैनी तैन सेइं ज़ोवं, “ज़ैखन अवं तुसन सेइं साथी थियो, त मीं तुसन एना गल्लां ज़ोरी थी, कि मूसेरे कानूने मां ते नेबी केरि किताबन मां ते भजना केरि किताबी मां मेरे बारे मां ज़ैन किछ लिखोरूए तैन पूरू भोनू ज़रूरीए ।”

45 तैखन तैनी तैन केरि मद्दत की, ताके पवित्रशास्त्रे सेमझी सखन ।

46 ते तैन सेइं ज़ोवं, “एन पवित्रशास्त्र मां लिखोरूए कि मसीह दुःख झैल्लेलो ते ट्लेइयोवं दिहाडे मुइदन मरां ज़ीतो भोलो ।

47 ते तैसेरे नंब्वे सेइं यरूशलेम नगरेरां शुरु केरतां सैरी कौमन मां पापन करां मनफिरानेरे मैफारो प्रचार कियो गालो ।

48 किजोकि तुस एना सैरी गल्लां केरे गवाहथ ।

49 हेरा, अवं एप्पू तुसन पवित्र आत्मा देइलो, ज़ेसेरो वादो बाजी परमेशरे कियोरोए । पन ज़ां तगर स्वर्गेरां शक्ति न मैल्ले तांतगर इस नगर मां राथ ।”

???????? ???? ? ? ?

(???? 16:19-20; ????? 1:9-11)

50 फिरी यीशुए तैना नगरेरे वेइर बैतनिय्याह इल्लोब्बेरे नेडे ने । ते अपनो हथ खडो केरतां तैन बरकत दित्ती ।

51 ज़ैखन तै तैन बरकत देने लोरो थियो, त तैन करां अलग भोइ जेव ते परमेशरे तै स्वर्गे जो नीयो ।

52 च्चेलैई तैसेरी आराधना की ते फिरी खुशी सेइं यरूशलेम नगरे जो वापस च़ले जे ।

53 ते तैना हर वक्त मन्दरे मां एइतां परमेशेरी तारीफ़ केरते थिये ।

यूहन्ना

॥॥॥॥॥॥ ॥॥॥॥॥॥॥॥ ॥॥॥॥ ॥ ॥॥॥॥॥॥ ॥॥॥॥

॥॥॥॥ ॥॥॥॥॥॥॥॥॥ ॥॥॥॥ ॥॥

1 (दुनियारे रचनेरे पडलो) शुरुआती मां वचन थियूं। तैन वचन परमेशेरे सेइं साथी थियूं। तैन वचन परमेशर थियूं।

2 शुरुआती मां परमेशेरे सेइं साथी तैन वचने थियूं।

3 सब किछ् वचनेरे जिरिये बनाव जेव। त जैन किछ् बनाव ज़ोवं, तैस मरां कोई भी चीज तैसेरे बगैर न बनाई जेई।

4 तैस (वचने) मां ज़िन्दगी थी; ते तै ज़िन्दगी सारे मैनन् लौ देचे।

5 त तै लौ आंधरे मां (हमेशा) चमकचे, त आंधरू लोई कधी कैवू न केरि सके।

6 परमेशेरी तरफां अक मैन्हु भेजो जेव, जेसेरू नवं यूहन्ना थियूं।

7 तै तैस लोअरे बारे मां ज़ोने ओरो थियो, ताके सब लोक तैसेरे जिरिये सेइं (तैस लोई पुड़) विश्वास केरन।

8 तै एप्पू लौ न थियो, पन लोअरे बारे मां लोकन गवाही देने ओरो थियो।

9 सच्ची लौ जै हर एक्की मैन्हु (परमेशेरे बारे मां ज़ान्नेरी) लौ देचे, तै दुनियाई मां एजनेबाली थी।

10 तैन वचन दुनियाई मां (ओरू) थियूं, त दुनिया तैसेरे जिरिये बनाई जेई, पन दुनियारे लोकेई तैन न पिशानू (कि तै कौन आए)।

11 तै अपने लोकन कां अव, पन तैसेरे अपने लोकेई तै कबूल न कियो।

12 पन जेतरे लोकेई तै कबूल कियो, तैनी तैनन् परमेशेरे बच्चे भोनेरू हक दित्तू; यानी सारे लोकन ज़ैना तैसेरे नव्वे पुड़ विश्वास केरतन।

13 तैना न हाज-बव्वे सेइं, न मैन्हु केरे मेर्जी सेइं, न तैस मैनेरे मेर्जी सेइं जै बच्चे पैदा केरनेरी इच्छा रखते, बल्के परमेशेरे मेर्जी सेइं पैदा भोरन।

14 तैन वचन मैन्हु बेनतां किछ् वक्त असन सेइं साथी रावं, ते (इस दुनियाई मां) डेरो कियो। तैनी असन पुड़ बड़ो अनुग्रह कियो ते परमेशेरे बारे मां सारी सच्चाई हिराई। (जताली तै इडी थियो, तैखन) असेई तैसेरी महिमा लाई। (जेन्चरां की) तै अपने बाजी परमेशेरे करां अव, त तैसेरी जेरि महिमा कोन्वी मां नई थी।

15 यूहन्ने तैसेरे बारे मां गवाही दिती, ते ज़ोरे सेइं लोकन सेइं ज़ोवं, “ई तै आए, जेसेरे बारे मां मीं ज़ोरू थियूं, कि जै मेरे बाद एज्जी राओरोए, तै मीं करां बड़ो महान आए, किजोकि तै मीं करां पेडलो थियो।

16 तैसेरी भरपूरी सेइं (यानी, तैसेरे सारे अनुग्रह ते सच्चाई सेइं) असन सेभन आशिवाद पती आशिवाद मैल्लू।

17 मूसा नेबेरे जिरिये असन कानून मैल्लो, पन यीशु मसीहेरे जिरिये असन कां (परमेशेरे करां) अनुग्रह ते सच्चाई पुज्जी।

18 परमेशर केन्चे कधी भी नई लावरो, पन तैसेरू अक्के मट्टू (यीशु) ज़ैन बाजी परमेशेरे कुम्मे मां आए, तैन्ने असन परमेशर हिराव।”

॥॥॥॥॥॥ ॥॥॥॥॥॥॥॥ ॥॥॥॥॥॥॥॥ ॥॥॥॥॥॥ ॥॥॥ ॥॥॥॥ ॥॥॥॥॥॥ ॥॥॥॥॥॥

(॥॥॥॥॥ 3:1-12; ॥॥॥॥॥ 1:1-8; ॥॥॥॥॥ 3:1-18)

19 यूहन्ने यीशु मसीहेरे बारे मां ई गवाही दिती, (एक्सां) ज़ैखन यहूदी लोकां केरे लीडरेई यरूशलेम नगरेरां यूहन्ना कां किछ् याजक त लेवी भेजे, त तैनेई तैस पुच्छू, “तू कौन आस?”

20 यूहन्ने तैन सेइं सच्च ज़ोवं ते किछ् भी छ्पानेरी कोशिश न की, त तैनी तैन सेइं ज़ोवं, “अवं मसीह नईं।”

21 तैखन तैनेईं तैस पुच्छ्, “फिरी तू कौन आस? कुन तू एलिय्याह नबी आस?” यूहन्ने तैनन् जुवाब दित्तो, “अवं तै नईं।” तैनेईं फिरी पुच्छ्, “कुन तू कोई नबी आस?” तैनी जुवाब दित्तो, “नईं।”

22 तैखन तैनेईं तैस पुच्छ्, “फिरी तू कौन आस? (असन ज़ो) ताके अस तैनन् जुवाब देम ज़ैनेईं अस भेज़ोरेम। तू अपने बारे मां कुन ज़ोतस?”

23 तैनी जुवाब दित्तो, “जेन्चरे यशायाह नेवे (मेरे बारे मां) ज़ोरूए, तेन्चरे अवं सुनसान ठैरी मां लोकन हक देइतां ज़ोताई कि, ‘तुसन कां प्रभु एजनेबालो आए, तैसेरेलेइ बत तियार केरा।’ (यानी, प्रभुएरे लेइ तुस अपने दिल साफ केरा)”

24 फरीसी लोकां केरे तरफां किछ् मैन्हु यूहन्ना कां भेज़ोरे थियो।

25 तैनेईं यूहन्ना पुच्छ्, “अगर तू न मसीह आस, न एलिय्याह, त न नबी, त फिरी (तीं कुन अधिकार आए) लोकन बपतिस्मो किजो देतस?”

26 यूहन्ने जुवाब दित्तो, “अवं त (लोकन) पैनी सेइं बपतिस्मो देताई, पन तुसन सेइं साथी रानेबालो अक एरो आए, ज़ैस तुस हकीकित मां न पिशानथ।

27 ईं तै आए, ज़ै मेरे बाद एजनेबालो आए, तै मीं करां महान आए। अवं त तैसेरो गुलाम भोनेरे काबल भी नईं कि तैसेरे बूटेरे तसमे खोल्ली।”

28 एना गल्लां, यरदन दरियारे पार बैतनिय्याह नगरे मां भोइ, ज़ैडी यूहन्ना लोकन बपतिस्मो देतो थियो।

~~~~~

29 एग्री दिहाड़े यूहन्ने यीशु अपने पासे एइतो लाव, त तैनी यीशुएरे बारे मां लोकन सेइं ज़ोवं, “तक्का, परमेशरे तरफां भेज़ोरू (बलिदानेरू) गबडू, ज़ैन सेरी दुनियारे लोकां केरे पाप नेते!

30 ईं तै आए, ज़ेसेरे बारे मां मीं ज़ोरू थियूं कि, ‘अक मैन्हु मेरे बाद एजनेबालो आए, ज़ै मीं करां बडो महान आए, किजोकि तै मीं करां पेइलो थियो।’

31 हुन्ना तगर अवं त एप्पू भी तैस पिशानतो न थियो। पन एल्हेरेलेइ अवं (इडी) एजतां लोकन पैनी सेइं बपतिस्मो देताई, ताके तै मैन्हु इस्राएलेरे लोकन मां बांदो भोए।”

32 तैखन यूहन्ने लोकां केरे सामने गवाही दित्ती, “मीं पवित्र आत्मा कबूतरेरे शकली मां अम्बरेरां एइतो लाव, ते तै तैस पुइ बिश्शो।

33 अवं त एप्पू पिशानतो न थियो कि यीशु हकीकित मां कौन थियो, पन परमेशरे ज़ैनी अवं लोकन पैनी सेइं बपतिस्मो देने भेज़ो, तैनी मीं सेइं ज़ोवं, ‘ज़ैस पुइ तू पवित्र आत्मा एइतो त बिश्शो लाएलो, तैए लोकन पवित्र आत्मा सेइं बपतिस्मो देनेबालो आए।’

34 तै मीं लाव, त अवं तुसन गवाही देताई, कि ए मैन्हु परमेशेरू मट्टू आए!”

~~~~~

35 दुइयोवं दिहाड़े, फिरी यूहन्ना त तैसेरे चलन मरां दूईं तैडी खडे भोरे थियो,

36 त यीशु तैलमेइं च़लोरो थियो। ज़ैखन यूहन्ने यीशु लाव, त तैनी यीशुएरे बारे मां अपने चलन सेइं ज़ोवं, “तक्का, इन परमेशरे तरफां भेज़ोरू (बलिदानेरू) गबडू आए!”

37 ज़ैखन यूहन्नारे दुइये च़लेईं एन शुनू, त तैना यीशु पत्ती च़ले।

38 यीशुए बेदलोइतां तैना एइते लाए ते तैन पुच्छ्, “तुस केस लगोरेथ तोपने?” तैनेईं ज़ोवं, “हे गुरू, तू कोडि रातस?”

39 तैनी तैन ज़ोवं, “त्रला तुस एप्पू हेरेले।” तैखन तैनेई गोइतां तैसेरे रानेरी ठार हेरी, ते तैस दिहाड़े तैना तैस साथी राए। तै कोई डलोझी च़ेवरे बज़ां केरो मौको थियो।

40 तैन दूई चेलन मरां, ज़ैना यूहन्नेरी गल्लां शुन्तां यीशु पत्ती च़लारे थियो, अक अन्दरयास थियो, ज़ै शमौन-पतरसेरो दूला थियो।

41 तैनी पेडलू एन कम कियूं कि अपने दूला शमौन-पतरस तोपतां तैस सेइं ज़ोवं, “असन मसीह मैलोरोए!” *

42 तैखन अन्दरयासे यीशु कां शमौन आनो। यीशुए तैसेरे पासे तक्कू ते ज़ोवं, “तू यूहन्नेरू मट्टू शमौन आस। पन अज़्जेरे बाद तेरू नवं कैफा भोलू।” यूनानी भाषाई मां कैफारो मतलब “पतरस” आए। (एसेरो मतलब घोड़।)

43 होरसां दुइयोवं दिहाड़े यीशुए गलील इलाके मां गानू चाव। तैनी फिलिप्पुस लेइतां तैस सेइं ज़ोवं, “मीं सेइं साथी च़ल (ते मेरो चेलो बन)।” (फिलिप्पुस यीशु सेइं साथी च़लो।)

44 फिलिप्पुस बैतसैदा नगरे मां रातो थियो, ज़ैडी अन्दरयास त पतरस भी राते थियो।

45 तैल्ला पत्ती फिलिप्पुस गोइतां नतनएले सेइं मिलो त ज़ोने लगो, “असन मसीह मैलोरोए, ज़ेसेरे बारे मां (बड़े पेडले) मूसेरे कानूने मां लिखोरोए त कने नेबेई भी अपनि किताबी मां लिखोरोए। तै यूसुफेरू मट्टू नासरत नगरे बालो यीशु आए, ज़ै नासरत नगरेरो आए!”

46 नतनएले तैस सेइं ज़ोवं, “कुन नासरते मरां कोई रोड़ी चीज़ निस्सी सकतीए?” फिलिप्पुसे ज़ोवं, “एइतां एप्पू हेर।” (त नतनएल फिलिप्पुसे सेइं साथी च़लो।)

47 यीशुए नतनएल अपने पासे एइतो लाव ते तैनी तैसेरे बारे मां एन ज़ोवं, “ई असली इस्राएली मैन्हु आए, एसमां कोई पाखंड नई!”

48 नतनएले यीशु पुच्छू, “तू मीं केन्चरे ज़ानतस?” यीशुए तैस जुवाब दित्तो, “फिलिप्पुस तीं कुजाने करां पेइले ज़ैखन तू फ़ेगरे बुटटे हैट थियो, मीं तू तैडी लावरो थियो।”

49 तैखन नतनएले ज़ोवं, “हे गुरू, (हुन्ना अवं ज़ानतां कि) तू परमेशेरू मट्टू आस! तू इस्राएल लोकां केरो राज़ो आस!”

50 यीशुए तैस जुवाब दित्तो, “कुन तू मीं पुड़ एल्हेरेलेइ विश्वास केरतस कि मीं तीं सेइं एन ज़ोवं, कि मीं तू फ़ेगरे बुटटे हैट लावरो थियो? तू इस करां भी वेइडी-वेइडी गल्लां लाएलो!”

51 फिरी तैल्ला पत्ती यीशुए ज़ोवं, “अवं तुसन सेइं सच-सच ज़ोताई कि, तुस स्वर्ग खुल्लू त कने परमेशेरुं स्वर्गदूतन उबरे गाते त मैनेरे मटठे पुड़, यानी मीं पुड़ उतरते लाएले।”

2

~~~~~

1 तैल्ला पत्ती, टलेइयोवं दिहाड़े गलील इलाकेर काना नगर मां केन्चरो इला थियो। यीशुएरी अम्मा भी तैडी थी।

2 यीशु ते तैसेरे चेलन भी धाम कियोरी थी।

3 ज़ैखन दाछ़ेरो रस मुक्को, त यीशुएरी अम्मा तैस सेइं लगी ज़ोने, “एन कां दाछ़ेरो रस मुकोरोए।”

4 यीशु लगो ज़ोने, “अम्मा, मीं तीं सेइं कुन कम? हेजू मेरो वक्त नई ओरो।”

5 तैसेरे अम्मा नौकरन सेइं ज़ोवं, “ज़ैन किछ़ यीशु तुसन सेइं ज़ोए, तैन्ने केरथ।”

6 तैडी नेडे घोड़ां केरे शा (बडडे) घड़े रखोरे थियो, ज़ैन मां दूई-दूई टलाई-टलाई मन (पानी) लगतू थियूं। यहूदी लोक अपने रुवाज़ेरे मुताबिक (अपने आपे त कने चीज़न) धोनेरे लेइ एन घड़े (मां पानी भरतां) इस्तेमाल केरते थियो।

7 यीशुए नौकरन सेइं ज़ोवं, “घड़न मां पानी भरा।” तैनेई पूरे घड़े भरे।

\* 1:41 मसीह: यूनानी भाषाई मां मसीहेरो मतलब “ख्रिस्त” आए। (एसेरो मतलब “परमेशेरुं तरफां भेजोरो राज़ो।)।

8 तैखन यीशुए तैन सेइं ज़ोवं, “हुन्ना, घड़े मरां किछ् पानी केढतां धामारे पूरधाने कां (ज्रखनेरे लेइ) देथ । तैनेईं तैस कां नेव ।

9 ज्रैखन धामारे पूरधाने तैन पानी ज्रख्व, ज्रैन दाछेरो रस बनोरू थियूं, तैन थियो ज्ञानतो कि एन कोट्टां ओरूए, पन नौकर ज्ञानते थिये, ज्रैनेईं तैन केढतां आनेरू थियूं । एल्हेरेलेइ धामारे पूरधाने लाडो कुजाव, ते तैस सेइं ज़ोवं,

10 हर कोई मैन्हु (आम तौरै, धामी मां) पेइलो रोडो दाछ्यारो रस देते, त ज्रैखन लोक पीतां रज़्जतन, त बादे मां घट रोडो ज़ेरो दाछ्यारो रस देते, पन तीं रोडो हेजू पत्रोवं रखोरो थियो!”

11 गलील इलाकेरे काना नगरे मां यीशुए पेइलो चमत्कार कियो । एन केरतां तैनी अपनि महिमा बांदी की, त तैसेरे चलेईं तैस पुइ (होरो भी जादे) विश्वास कियो कि तै मसीह आए ।

12 तैल्ला पत्ती यीशु त तैरी अम्मा ते तैसेरे द्ला ते कने तैसेरे चले कफरनहूम नगरे मां जे, ते किछ् दिहाडे तैडी राए ।

*~~~~~*

*(मत्थै 21:12-13; मार्क 11:15-17; लुका 19:45-46)*

13 ज़ेइस यहूदी लोकां केरू फ़सह तिहार नेडे अव, त यीशु यरूशलेम नगरे जो च़लो जेव ।

14 त तैडी मन्दरेरे अंगने मां तैनी (बलिदानेरे लेइ) दांत, भैड्डां त कबूतर बेचने वाले लाए त कने पेंसे बदलनेवाले भी अपने मेज़न पुइ विश्शारे लाए ।

15 तैखन तैनी रेस्सरो अक कोडो बनेइतां, तैनन् सेम्भन त भैड्डां त दांत मन्दरे मरां बेइर कढे, त बुपारी केरे पेंसे (इरां उरां) शारे, त तैन केरे मेज़ उलटाए ।

16 त कबूतर बेचनेवालन सेइं ज़ोवं, “इना इट्टां नेइ गाथ! मेरे बाजी केरे मन्दरे बुपारी लोकां केरू घर न बनाथा!”

17 ज्रैखन तैसेरे चलेईं एन शुन्, त तैनन् याद अव कि (परमेशेरी किताबी मां) लिखोरूए कि (मसीहे परमेशेरे सेइं ज़ोवं) “तेरे घरेरे लेइ मेरी भक्ति, (हे परमेशेरे) मेरे अन्तर अगारी ज़ेरि ज़लतीए!”

18 तैखन यहूदी लोकां केरे किछ् लीडेरेईं तैस सेइं ज़ोने लगगे, “तू असन कोई निशान (चमत्कार) हिरा कि मन्दरेरे अंगने मरां लोकन कढनेरे लेइ तीं कां परमेशेरे तरफ़ां अधिकार आए?”

19 यीशुए तैन जुवाब दित्तो, “एस मन्दरे डोला, ते अवं ट्लेइ दिहैइन मां एस (दुबारो) बनेइलो !”

20 यहूदी लोकेईं यीशु जुवाब दित्तो, “कुन इस मन्दरे बन्ने मां 46 साल लगारेन, कुन तू एस ट्लेइ दिहैइन मां (दुबारो) बनेइ सकतस?”

21 तेनेईं गलत समझू यीशुए ज़ैस मन्दरेरी गल कियोरी थी, ते तैसेरी अपनि ज्ञान थी ।

22 एन्हेरेलेइ (बादे मां) ज्रैखन यीशु (करूसे पुइ मरो त) मुइदन मरां ज़ीतो भोव, त तैखन तैसेरे चलन याद अवं कि यीशुए (अपने मौत त कने ज़ीतो भोनेरे बारे मां) असन ईं गल ज़ोरी थी । त (एसेरे वजाईं सेइं) तैनेईं पवित्रशास्त्रे मां लिखोरी गल्लन पुइ त कने यीशु मसीहेरी ज़ोरी गल्लन पुइ होरो भी जादे विश्वास कियो ।

*~~~~~*

23 ज़ताली यीशु फ़सह तिहारेरे मौके यरूशलेम नगरे मां थियो, त बडे लोकेईं तैसेरे चमत्कार, ज़ैना तैनी किये, लेइतां तैस पुइ विश्वास कियो ।

24 पन फिरी भी यीशुए तैन पुइ अतबार न कियो, किजोकि तै सेम्भी केरो इन्सानी सोच ज्ञानतो थियो ।

25 तैस ए ज़रूरत न थी कि कोई मैन्हु तैस केन्वी होरि मैनेरे बारे मां ज़ोए, किजोकि तै (पेइले) मैन्हु केरि सोच ज्ञानतो थियो ।



## 3

???? ? ? ? ? ? ? ? ? ? ?

1 फरीसी लोकन मां अक मैन्हु थियो जेसेरू नवं नीकुदेमुस थियूं। तै यहूदी लोकां केरो अक लीडर थियो।

2 एक्की राती तै यीशु कां एइतां ज़ोने लगे, “हे गुरु, अस ज्ञानतम कि तू परमेशेरी तरफां गुरु भोइतां ओरोस; किजोकि ज़ैना चमत्कार तू हेरातस, होरो कोई न हेरेई सके, ज़ांतगर परमेशर तैस सेइं साथी न भोए।”

3 यीशुए जुवाब दित्तो, “अवं तुसन सेइं सच्च-सच्च ज़ोतां कि ज़ांतगर कोई मैन्हु दुबारो जर्म न घिन्ने, त तै परमेशेरू राज न लेई सके।”

4 नीकुदेमुस पुच्छने लगे, “जैसन मैन्हु बुढो भोते, त तै केन्चरे सेइं दुबारो पैदा भोइ सकते? कुन तै अम्मारे पेटे मां गेइतां दुबारो ज़ेरमी सकते?”

5 यीशुए जुवाब दित्तो, “अवं तुसन सेइं सच्च-सच्च ज़ोताई कि ज़ांतगर कोई मैन्हु पैनी सेइं ते आत्माई सेइं पैदा न भोए, तै परमेशेरे राज्जे मां दाखल न भोइ सके।

6 किजोकि हाज-बव अपने बच्चन सिर्फ एस जानेरी ज़िन्दगी देइ सकतन, पन सिर्फ (पवित्र) आत्मा लोकन आत्मिक ज़िन्दगी देइ सकते।

7 हैरान न भो कि मीं तीं सेइं कुन ज़ोवं कि, तीं दुबारो जर्म घिन्नु जरूरीए।”

8 हवा ज़ेरां च़लनू चातीए तैरां च़लचे, त तू तैसारी आवाज़ त शुनतस, पन एन न ज्ञानस कि तै कोट्टां एइचे त कोरां गाचे। तेन्चरे कोई भी न हेरी सके त न समझी सके कि केन्चरां पवित्र आत्मा लोकन (नब्वीं) ज़िन्दगी देते।”

9 तैसन नीकुदेमुसे पुच्छू, “एना गल्लां केन्चरे सेइं भोइ सेकतिन पवित्र आत्मा केन्चरां लोकन नब्वीं आत्मिक ज़िन्दगी देते?”

10 यीशुए तैस सेइं ज़ोवं, “तू इस्राएली लोकां केरो (अक खास) गुरु भोइतां भी कुन इना गल्लां न समझस?

11 अवं तीं सेइं सच्च-सच्च ज़ोताई, ज़ैन अस ज्ञानतम तैन्ने (लोकन) ज़ोतम, त ज़ैन असेई लावरूए तैसेरे बारे मां (लोकन) गवाही देतम, पन फिर भी तुस लोक इश्शी गवाही न मन्थ।

12 मीं त तुसन सेइं धेतारी गल्लां केरे बारे मां गल की, त तुसेई (मीं पुइ) विश्वास न कियूं, त अगर अवं स्वर्गेरी गल्लां ज़ोई त तुस केन्चरे विश्वास केरेले?

13 (स्वर्गेरी गल्लां ज़ान्नेरे लेइ कधी) कोई मैन्हु स्वर्गें मां नई जोरो, सिर्फ तैए ज़ै स्वर्गेरां ओरो, यानी अवं मैनेरू मट्टू ज़ैन स्वर्गें मां आई।

14 ज़ेन्चरे मूसा सुनसाने मां (परमेशेरे लोकन बचानेरे लेइ पितल सेइं बनोरो) सप (खंभे पुइ) उच्चे पुइ च़ढाव, तेन्चरे एन जरूरी आए कि (अवं) मैनेरू मट्टू भी उच्चे पुइ च़ाढू गाए।

15 ताके ज़ै कोई तैस पुइ विश्वास केरे, तैस हमेशारी ज़िन्दगी मैल्ले।”

16 “किजोकि परमेशेरे दुनियारे लोकन सेइं एत्रो प्यार कियो कि तैनी अपनू अक्के मट्टू दित्तू, ताके ज़ै कोई तैस पुइ विश्वास केरे, तै नाश न भोए, बल्के हमेशारी ज़िन्दगी हासिल केरे।

17 किजोकि परमेशेरे अपनू मट्टू दुनियाई मां एल्हेरेलेइ नई भेजोरू कि तै दुनियारे लोकन (तैन केरे पापां केरि) सज़ा दे, बल्के एल्हेरेलेइ कि दुनियारे लोक तैसेरे ज़िरिये सेइं (पापां केरि सज़ाई करां) मुक्ति हासिल केरन।

18 ज़ै तैस पुइ विश्वास केरते, तैस सज़ा न मैल्ले। पन ज़ै मट्टे पुइ विश्वास न केरे, तै पेइलोए दोषी भोइ जोरोए, किजोकि तैनी परमेशेरे अकैल्ले मट्टेरे नव्वे पुइ विश्वास नई कियोरो।

19 परमेशर लोकन सज़ा देनेरी वजा ई आए कि ज़ैस जो लौ ज़ोतन तै दुनियाई मां ओरिए, परमेशेरे अपनि लौ दुनियाई मां भेजो, पन लोक ते कने तेन केरां कम्मां बुरां थियां, एल्हेरेलेइ तैनेई तैस लोई करां जादे पापेरू आंभेरू पसंद कियूं।

20 जै कोई बुरू कम केरते, तै लोई सेइं नफरत केरते त लोअरे नेडे न एज्जे, एरून न भोए कि तैसेरे कम्मन पुड़ दोष लाव गाए ।

21 पन हर कोई जै परमेशेरी सञ्जाई पुड़ जलते, तै लोई कां एइते, ताके लोई सेइं बांदो भोए कि तैसेरे सब कम्मां परमेशेरी शक्ति सेइं साथी किये गातन ।”

~~~~~

22 एना गल्लां केरे बाद यीशु त तैसेरे चले यहूदिया इलाके मां आए, त तैड़ी रेइतां लोकन बपतिस्मो देने लगगे ।

23 यूहन्ना भी शालेम नगरेरे नेडे ऐनोन नंब्बेरे ठैरी लोकन बपतिस्मो देतो थियो । किजोकि तैड़ी हच्छु पानी थियूं त लोक बपतिस्मो नेनेरे लेइ तैस कां एइते राते थिये ।

24 किजोकि यूहन्ना हेजू कैदखाने मां न थियो छइडोरो ।

25 एक्सां यूहन्नारे चेलां केरि केन्ची यहूदी मैन्हु सेइं (रुवाजरेर मुताबिक) शुद्ध भोनेरे बारे मां बेंस भोइ ।

26 एल्हेरेलेइ यूहन्नारे चले तैस कां एइतां ज़ोने लगगे, “हे गुरू, (तीं पतो आए) तै मैन्हु जै यरदन दरियारे पार तीं सेइं साथी थियो त कने तीं तैसेरे बारे मां गवाही दित्तोरी थी, हेर, तै भी लोकन बपतिस्मो देते त सब लोक तैस कां गातन !”

27 यूहन्ना जुवाब दित्तो, “(तै रोड़ी गल आए, किजोकि) मैन्हु किछ न हासिल केरि सके, ज़ांतगर तैस स्वर्गेरां (यानी परमेशेरे करां) न मैल्ले ।

28 तुस एप्पू मेरे गवाह आथ, कि मीं तुसन सेइं ज़ोरू थियूं कि अवं मसीह नई, पन अवं तैस करां पेइले (परमेशेरां तरफां) भेजोरोई ।

29 जेसेरी महरनीए त तै महरावे, पन महरावेरो दोस्त जै खड़ोए महरावेरी हर गल खुशी सेइं शुनतो रहते; हुनी मेरी ई खुशी पूरी भोइ । (कि सब लोक तैस कां गातन) ।

30 एन ज़रूरीए कि तै बधे ते अवं घैटी ।”

31 “(मसीह) जै स्वर्गेरां एइते तै होरि सेब्बन करां महान भोते । त जै मैन्हु धेरती पुड़ेरां भोते, तै धेर्तारोए त धेर्तारी गल्लां केरते । जै स्वर्गेरां एइते तै सेब्बना उच्चो महान भोते ।

32 तैनी (परमेशेरे तरफां) ज़ैन किछ लाव ते शुनेरू, तैसेरे बारे मां लोकन शुनाते, पन तैसेरी गवाही कोई न शुने ।

33 जै कोई तैसेरी गवाही पुड़ विश्वास केरते, तै तैसेरी तसदीक केरते कि परमेशर सञ्जो आए ।

34 किजोकि (मसीह) जै परमेशेरे भेजोरोए, तै परमेशेरी गल्लां ज़ोते, किजोकि परमेशर तैस पवित्तर आत्मा नैपतां न दे ।

35 (परमेशर) बाजी मट्टे सेइं प्यार रखते, त तैनी सब किछ तैसेरे हावाले कियोरूए ।

36 जै (परमेशेरे) मट्टे पुड़ विश्वास केरते तैस हमेशारी जिन्दगी मैलचे, पन जै मट्टे पुड़ विश्वास न केरे तै जिन्दगी करां दूर रालो, ते तैस पुड़ परमेशेरो क्रोध (हुन्ना करां लेइतां हमेशा) राते ।”

4

~~~~~

1 फिरी जैखन प्रभु पतो लगगे कि फरीसी लोकेई शुनोरूए, यीशु, यूहन्ना करां जादे चले बनाते ते बपतिस्मो देते ।

2 (हालांकी सञ्ज एन थियूं यीशु एप्पू नई बल्के तैसेरे चले बपतिस्मो देते थिये),

3 तैखन तैना यहूदिया इलाके शेरतां गलील इलाके जो ज़ले जे ।

4 ते तैसेरू सामरिया इलाके मांमेइं भोइतां गानू ज़रूरी थियूं ।

5 एल्हेरेलेइ ते सामरिया इलाकेरू सूखार नगर मां अवं, तै डार तैस ज़मीनेरे नेडे थी जै याकूबे अपने मट्टे यूसुफे दित्तोरी थी ।

6 याकूबे जैन खुह बनोरू थियू तैन तैड़ी थियू, ते यीशु सफर केरतां थकोरो थियो, ते तैस खुहे पुड विशशो। तैखन दुपाहरां केरो मौको थियो।

7 एतरे मां अक सामरी कुआन्शा तैड़ी पानी भरने आई। यीशुए तैस जो ज़ोवं, “मीं पानी पीया।”

8 किजोकि तैसेरे चले रोट्टी आन्नेरे लेइ नगर मां जोरे थिये।

9 तैस सैमरी कुआन्शां तैस जो ज़ोवं, “तू यहूदिस ते अवं त सामरी, तू मीं पानी पीयानेरे लेइ किजो ज़ोतस?” किजोकि यहूदी सैमरन सेइ मिलनू जुलनु न थिये सुखाते।

10 यीशुए तैस जुवाब दित्तो, “अगर तू ज़ानेथी कि परमेशर तीं कुन देनू चाते, त एन भी ज़ानेथी कि, तीं करां कौन पानी मगने लोरोए, त तू तैस करां मगोथी, ते तै तीं जिन्दगरू पानी देथो।”

11 तैस कुआन्शां ज़ोवं, “हे परभु, तीं कां पानी भरनेरे लेइ कोई भांड नई, ते खुह बडू डूघू आए, ते तीं जिन्दगरू पानी कोट्टां मैल्लू?”

12 कुन तू इशशे पूर्वज याकूबे करां भी बडूडोस, जैनी एन खुह असन दित्तेरूए, ते तैनी एप्पू भी ते तैसेरी औलादां ते तैसेरे गोरू गब्बेइं भी एप्से मरां पिव?”

13 यीशुए तैस जुवाब दित्तो, “जै कोई एस खुहे मरां पियेलो तैस फिर भी दलिश रानीए।

14 पन जै कोई तैन पानी पीते जैन अवं देताई तै हमेशारे लेइ दलिशोरो न रालो, बल्के जैन पानी अवं तैस देलो तैन तैस मां अक नाग बनेलो जै पानी देतो रालो, जैस सेइ तैस हमेशारी जिन्दगी मैलेली।”

15 तैस कुआन्शां यीशु जो ज़ोवं, “हे परभु, मीं भी तैन पानी दे ताके मीं दलिश न लगगे ते मीं बार-बार पानी भरने इस खुहे पुड न एजनू प।”

16 यीशुए तैस जो ज़ोवं, “गा, अपनो मुन्श कुजा।”

17 तैसां कुआन्शां जुवाब दित्तो, “मेरो कोई मुन्श नई।” यीशुए तैस जो ज़ोवं, “तीं सच्च ज़ोवं, कि मेरो कोई मुन्श नई।”

18 किजोकि तीं पंच मुन्श बनोरेन ते जैस सेइं साथी तू हुन्ना आस, ते तेरो मुन्श नई, तीं जैन किछ ज़ोवं तैन सच्च ज़ोरूए।”

19 तैस कुआन्शा ज़ोवं, “हे परभु, मीं लगगते तू कोई नबी आस।

20 इशशे दादे-पडदादेई इस पहाड़े पुड आराधना की, पन तुस यहूदी लोक ज़ोतथ कि जैड़ी आराधना कियोरी लोडचे, तै टार सिर्फ यरूशलेम आए।”

21 यीशुए तैस कुआन्शी जो ज़ोवं, “हे कुआन्श, मेरी गल्लरो विश्वास केर, कि तै मौको भी एज्जी राहोरोए, कि तुस लोक बाजी केरि आराधना न त इस पहाड़े पुड केरेले ते न यरूशलेमे मां केरेले।

22 तुस सामरी लोक ज़ेसेरी आराधना केरतथ तैस न ज़ानथ, पन अस यहूदी लोक ज़ेसेरी आराधना केरतम तैस ज़ानतम, किजोकि मुक्ति यहूदन मरां आए।

23 पन तै मौको एज्जी राहोरोए बल्के ओरोए, जैखन सच्च भक्त बाजेरी आराधना आत्मा ते सच्चैई सेइं केरेले, किजोकि बाजी एरे ज़ेरे सच्च भक्त तोपते।

24 परमेशर आत्मा आए, एल्हेरेलेइ तैसेरे भक्त तैसेरी आराधना आत्मा ते सच्चैई सेइं केरन।”

25 कुआन्शां तैस सेइं ज़ोवं, “अवं ज़ानती कि मसीह, जैस जो ख्रिस्त ज़ोतन एजनेबालोए, जैखन तै एज्जेलो तै सव किछ समझालो।”

26 तैखन यीशुए ज़ोवं, “अवं जै तीं सेइं गल्लां लगेरोइं केरने तैए मसीह आई।”



27 एतरे मां तैसेरे चले आए ते तैनेई तै एक्की कुआन्शी सेइं गल्लां केरतो लेइतां हैरान राए, पन केन्चे तैस एन न पुच्छू, “तू कुन चातस?” या “एस कुआन्शी सेइं किजो गल्लां लगेरोस केरने?”

28 तै कुआन्श पैनरो घड़ा तैड़ी छेडतां वापस नगर मां जेई ते मैननू सेइं ज़ोने लगी।

29 “एज्जा, एक्की मैन्हु सेइं मिला तैनी मीं सेइं सब किछ् ज़ोवं ज़ैन मीं अज तगर कियेरू थियूं, कुन ए तै मसीह त नईं?”

30 तैना मैन्हु नगर मरां निस्तां यीशु हेरनेरे लेइ तैसेरे पासे च़लने लगे ।

31 यीशुएरे चले तैस कां मिनत केरने लगगे, “हे गुरू, रोट्टी खा ।”

32 पन यीशुए तैन सेइं ज़ोवं, “मीं कां खानेरे लेइ अक एरी रोट्टी आए, पन तुसन तैसेरे बारे मां कोई पतो नईं ।”

33 तैखन चले एप्पू मांमेइं ज़ोने लगे, “कुन केन्चे पेइलू एसेरे लेइ किछ् खाने जो आनोरूए?”

34 यीशुए तैन सेइं ज़ोवं, “मेरी रोट्टी ईए कि, परमेशेरी मर्जी पूरी केरि ज़ैनी अवं भेजोरुईं ते तैन कम पूरू केरि ज़ैन तैनी दित्तरूए ।

35 कुन तुस न ज़ोथ कि, फसल पकने हेजू च़ेवरे महीन्न बाकिन? अवं तुसन जो ज़ोताई कि, अपनि एछ्छी घाडा! ते एजनेबाले मैनन् हेरा, ज़ैना पक्कोरे ऊडारां केरि फसलारे ज़ेरे आन ।

36 फसल कटने बालन कम केरतां मज़दूरी मैल्ली राओरीए, यानी तैना लोकन अकोट्टे केरि राओरेन ज़ैना लोकन हमेशारी ज़िन्दगी हासिल केरेले, ताके ज़ै बेते ते कटते साथी खुशी मनान ।

37 एल्हेरेलेइ अक कहावते कि बेनेबालो कोईए ते कटने बालो होरो कोईए, तैन सच्चे ।

38 मीं तुस भेजे कि गाथ तैस फसली कट्टा ज़ै तुसेईं नईं बेवरी, होरेईं मेहनती सेइं कम कियूं ते तुसन तैन केरि मेहनतरो फल मैल्लो ।”

~~~~~

39 नगरेरे बड़े लोकेईं तैस सैमरी कुआन्शी गल शुन्तां यीशु पुड़ विश्वास कियो, किजोकि तैसां तैन लोकन सेइं ज़ोवं कि तैनी मीं सेइं सब किछ् ज़ोवं, ज़ैन मीं कियेरू थियूं ।

40 ज़ैस नगरेरे सामरी लोक यीशु कां ओरे थिये, मिनत केरतां ज़ोने लगे, असन कां विश फिरी तै दूईं दिहाड़े तैड़ी राव ।

41 होरे भी बड़े लोक थिये ज़ैनेईं तैसेरी गल्लां शुन्तां तैस पुड़ विश्वास कियो ।

42 तैनेईं तैस कुआन्शी जो ज़ोवं, “असेईं तेरी गल्लां शुन्तां विश्वास नईं कियोरो, बल्के असेईं अपने कन्नेईं शुनेरूए ते असेईं एन हुनी बुझू कि ए मैन्हु सच्चे इनियाईं मुक्ति देनेबालोए ।”

43 दूईं दिहैइना बाद यीशु फिरी गलीलेरे पासे च़लो जेव ।

44 ते यीशुए एप्पू ज़ोरू थियूं, कि कोई नवी अपने मुलखे मां इज्जतरे कावल न समझो गाए ।

45 ज़ैखन तै गलीले मां अव त गलीली लोक तैस सेइं खुशी सेइं मिले, एल्हेरेलेइ कि तैनेईं तैन सब किछ् ज़ैन तैनी फ़सहरे मौके यरूशलम नगरे मां कियेरू थियूं, तैनेईं अपनि एछ्छेईं सेइं लावरू थियूं तैखन तैना एप्पू भी तैड़ी थिये ।

~~~~~

46 दुइयोवं बार ज़ैखन तै गलील इलाकेरे काना इलब्बं मां ओरो थियो ज़ैड़ी तैनी पानी दाछ़ारो रस बनारो थियूं । तैड़ी अक बड़ो बड़ो राज़ेरो अफसर थियो तैसेरू मट्टू कफ़नहूम नगर मां बिमार भोरू थियूं ।

47 ज़ैखन तैनी अफसरे शुनू कि यीशु यहूदिया इलाकेरां गलील इलाके मां ओरोए त तै यीशु कां पुज़ो ते मिनत केरतां ज़ोने लगो मेरू मट्टू मरने बालूए तू च़ल ते तैस बज्झा, किजोकि तैन मरने बालू थियूं ।

48 यीशुए तैस सेइं ज़ोवं, “ज़ांतगर तुस लोक निशान ते चमत्कार न लाएले कधे विश्वास न केरेले कि, अवं मसीह आई ।”

49 तैनी बड़्डे अफसरे ज़ोवं, “परभु लूश केर एरू न भोए कि मेरू मट्टू मेरि गाए ।”

50 यीशुए जुवाब दित्तो, “च़ल तेरू मट्टू ज़ीतू भोनूए ।” तैनी तैसेरी गल्लरो विश्वास कियो ते तैट्ठां च़लो जेव ।

- 51 तै हेजू बत्तां थियो त तैसेरे नौकर तैस मैल्ले ते ज़ोने लगे, “तेरू मट्टू ज़ींतूए।”
- 52 तैखन तै पुच्छने लगे, “मेरू मट्टू कैखन ज़ेरे बेज्जोने लग्गोरू थियू?” ते तैनेई ज़ोवं “तैसेरो भुखार हीज दीसां एक्की बज्जे उतरी जोरो थियो।”
- 53 तैखन तैसेरे बाजी याद अवं कि, तैए मौको थियो, ज़ैखन यीशुए ज़ोरू थियू, “गा तेरू मट्टू ज़ींतूए” तैखन तैनी भी ते तैसेरे पूरे टब्बरे यीशु पुड़ विश्वास कियो।
- 54 ई दुइयोवं चमत्कारेरो निशान थियो ज़ै यीशुए यहूदिया इलाकेरां वापस एजनेरां बाद गलील इलाके मां कियोरो थियो।

## 5

### 38

- 1 एन गल्लन पत्ती यहूदी केरू अक तिहार भोवं, ते यीशु यरूशलेम नगरे जो जेव।
- 2 यरूशलेम नगरे मां भेड्डां केरे दारे कां अक हावदे, ज़ैस जो इब्रानी भाषाई मां बैतहसदा ज़ोतन, तैसेरां पंच अंगना थियां।
- 3 एन मां बड़े विमार, काने, टोंटे, नीपाते (पानी हीलनेरे इंतज़ारे मां) भोते थिये।
- 4 (किजोकि वक्ते पुड़ परमेशेरो स्वर्गदूत हावदे पुड़ एइतां पानी हिलातो थियो, ते पानी हिलनेरां पत्ती ज़ै कोई पेडलो हवदे मां गातो थियो तै ठीक भोतो थियो, चाए तैसेरी कोई भी विमारी किना भोए)।
- 5 तैड़ी अक मैन्हू थू, ज़ै 38 सालां केरो विमार थू।
- 6 यीशुए तै तैड़ी बिशोरो लाव ते एन ज़ेनतां कि ए बड़ो च़ोरकोनो इस हालती मांए, ते तैस पुच्छू, “कुन तू ठीक भोनु चातस?”
- 7 तैने विमारे जुवाब दित्तो, “हे परभु, मीं कां कोई मैन्हू नई, कि ज़ताली पानी हिलावं गाए त मीं कोई हावदे मां गाने लेइ मेरी मद्दत केरे, मेरे पुजते-पुजते तांतगर होरो कोई गाते।”
- 8 यीशुए तैस सेइं ज़ोवं, “उठ अपनि खट सल्ल ते च़ल फिर।”
- 9 तै मैन्हू तैखने ठीक भोव, ते अपनि खट छुइतां च़लने फिरने लगे।
- 10 तै आरामेरी दिहाड़ी थी एल्हेरेलेइ यहूदी लीडर तैस सेइं ज़ै ठीक भोरो थियो, ज़ोने लग्गे, “अज्र त आरामेरी दिहाड़ी आए, तीं खट छूनी जेइज्र नई।”
- 11 तैने तैन जुवाब दित्तो, “ज़ैने अव ठीक कियो, तैने मीं सेइं ज़ोवं, ‘अपनि खट छू ते च़ल फिर।’”
- 12 तैनेई तैस पुच्छू, “तै कौन मैनुए ज़ैने तीं सेइं ज़ोवं, ‘खट छुइतां च़ल फिर?’”
- 13 ज़ै ठीक भोरो थियो तै न थियो ज़ानतो कि तै कौन आए, किजोकि तैस ठैरी भीड़ भोनेरे वजाई सेइं यीशु तैस ठैरां होरि पासे चुपच़ारे च़लो जोरो थियो।
- 14 एन गल्लन पत्ती यीशु तै मन्देरे अंगने मां मैल्लो, यीशुए तैस सेइं ज़ोवं, “तक, तू ठीक भोरोस, फ़ीरी पाप न करां, एरू न भोए कि, एस करां बड़डी आफत एज्जे।”
- 15 तैने मैने यहूदी लीडरन सेइं ज़ोवं, कि ज़ैने अवं ठीक कियोरोई तै यीशुए।
- 16 एल्हेरेलेइ यहूदी लीडर यीशु सताने लाए, किजोकि तै एरां ज़ेरां कम्मां आरामेरे दिहाडे केरतो थियो।
- 17 एस पुड़ यीशुए तैन सेइं ज़ोवं, “मेरो बाजी यानी परमेशर हमेशा कम केरते, मीं भी कम कियोरू लोडे।”
- 18 एस वजाई सेइं यहूदी लीडर मनां जादे तैस मारनेरी कोशिश केरने लाए, किजोकि तै न सिर्फ़ आरामेरे दिहाडेरो हुक्म न थियो टलोतो बल्के परमेशर अपनो बाजी ज़ोतो थियो ते अपनो आप परमेशरेरे बराबर बनातो थियो।

19 यीशुए तैन सेइं ज़ोवं, “अवं तुसन सेइं सन्न-सन्न ज़ोताई, मट्टू यानी अवं एण्णू किछ्च न केरि बेटि, सिर्फ तैन ज़ैन बाजी परमेशेर करां केरतू लाताई, किजोकि ज़ैना-ज़ैना कम्मां बाजी करां केरतो लाते तैन मट्टू भी तैस्से तरीके सेइं केरते।

20 किजोकि बाजी, मट्टे सेइं प्यार केरते, ते ज़ैना-ज़ैना कम्मां तै एण्णू केरते, तैना सब मट्टे भी हिराते, ते तैन एस करां भी बड्डां कम्मां हिरालू, ताके तुस हैरान भोथं।

21 किजोकि ज़ेन्चरे बाजी मुडदन ज़ीतो केरते, तेन्चरे मट्टू भी ज़ैस चाते तैस ज़ीतो केरते।

22 बाजी केन्चेरी इन्साफ न केरे, पन तैने इन्साफ केरनेरू सारू कम मट्टे दित्तेरूए।

23 कि सब लोक ज़ेन्चरे बाजेरी आदर केरतन तेन्चरे मट्टेरी भी आदर केरन, ज़ै मट्टेरी आदर न केरे, तै बाजी केरि ज़ैने तैन भेजोरूए तैसेरी आदर न केरे।

24 अवं तुसन सेइं सन्न ज़ोताई ज़ै मेरू वचन शुन्तां मेरे भेजने वाले पुड विश्वास केरते, हमेशारी ज़िन्दगी तैसेरीए, ते तैस पुड सज़ारो हुक्म न भोए, बल्के तै मौतरां पार भोइतां हमेशारे ज़िन्दगी मां दाखल भोते।”

25 “अवं तुसन सेइं सन्न-सन्न ज़ोताई, कि तै वक्त एजनेबालोए, बल्के हुन्नाए ज़ैस मां मुड्डे परमेशेरें मट्टेरी यानी मेरी आवाज़ शुनेले, ते ज़ैना शुनेले तैना हमेशा जीएले।

26 किजोकि ज़ेन्चरे बाजी अपने आपे मां ज़िन्दगी रखते तेन्चरे तैने मट्टे भी ए अधिकार दित्तोरूए, कि अपने आपे मां ज़िन्दगी रखे एल्हेरेलेइ तैन मैनेरू मट्टूए।

27 बल्के बाजी परमेशेर तैस सेरी लोकां केरि आदालत केरनेरो भी अधिकार दित्तोरूए, एल्हेरेलेइ कि तैन यानी अवं मैनेरू मट्टू आई।

28 एसमां हैरान न भोथ, किजोकि तै वक्त एइते कि ज़ेत्तरे कव्रन मां आन तैसेरी आवाज़ शुन्तां ज़ीते भोनेन।

29 ज़ैनेई भलाई कियोरूए हमेशारे ज़िन्दगरी लेइ ज़ीते भोनेन ज़ैनेई बुरी ज़िन्दगी ज़ीयोरूए तैना सज़ारी लेइ ज़ीते भोनेन।”

### ~~~~~

30 “अवं अपने आपे सेइं किछ्च न केरि बेटि, ज़ेन्चरे मेरो बाजी मीं ज़ोते तेन्चरे अवं लोकां केरि आदालत केरताई, ते मेरी आदालत सच्चीए, किजोकि अवं अपने मेर्जी सेइं नई पन अपने भेजने वालेरी मेर्जी सेइं चाताई।

31 अगर अवं अपनि गवाही एण्णू देई, त मेरी गवाही सच्ची नई।

32 अक होरो आए, यानी मेरो बाजी ज़ै मेरी गवाही देते, ते अवं ज़ानताई ज़ै गवाही तै मेरे बारे मां देते तै सच्चीए।

33 तुसेईं मैन्हु यूहन्ना कां मेरे बारे मां पुच्छने भेजे, ते तैनी सच्चेरी गवाही दित्तोरूए।

34 पन अवं अपने लेइ मैनेरी गवाही न चैई, पन यूहन्ना ज़ै गवाही दित्ती तैसेरे बारे मां मीं एल्हेरेलेइ ज़ोवं ताके तुसन मुक्ति मैल्ले।

35 तै त बलतो ते चमकतो दीयेरो ज़ेरो थियो, पन तुसन थोड़े चिरेरे लेइ तैसेरी लोई मां खुश भोन् रूडू लग्गू।

36 पन मीं कां ज़ै गवाहीए तै यूहन्नारी गवाही करां भी बड्डीए। किजोकि ज़ैन कम बाजे मीं केरनेरे लेइ दित्तेरू मतलब इन्ने कम्मां ज़ैना अवं केरताई, तैना मेरी गवाही देतन कि बाजे अवं भेजोरूई।

37 ते बाजी ज़ैने अवं भेजोरूई तैने मेरी गवाही दित्तोरूए, तुसेईं न कधी तैसेरी आवाज़ शुनोरी, ते न तै आमने सामने लोरूए।

38 तुसेईं तैसेरी शिक्षा अपने मने मां नई रखेरी, किजोकि तुसेईं मीं पुड विश्वास न कियो, कि अवं परमेशेर भेजोरूई।

39 तुस पवित्रशास्त्रे मां एन पदतथ, किजोकि तुस सोचतथ कि हमेशारी ज़िन्दगी तैस मां मैलतीए, तै ईए, ज़ै मेरे बारे मां गवाही देते।

40 फिरी भी तुस हमेशारे ज़िन्दगी हासिल केरनेरे लेइ मीं कां न एजन् चाथ।

- 41 अवं मैनन् करां तारीफ़ न चैई ।  
 42 पन अवं तुसन ज्ञानताई तुशशे दिले मां परमेशेरे लेइ प्यार नई ।  
 43 अवं अपने बाजेरे अधिकारे सेई ओरोई, ते तुस मेरी गल न मन्नथ। अगर होरो कोई अपने अधिकारे सेई एज्जे, त तैसेरी गल मन्नेले ।  
 44 तुस मीं पुड़ विश्वास न केरि बटथ, किजोकि तुस एक्की होरि करां तारीफ़ चातथ, ते तुस तै तारीफ़ न चाथ ज़ै सिर्फ परमेशेरे तरफां ।  
 45 इन न समझा कि अवं बाजेरे सामने तुसन पुड़ दोष लेइएलो, तुसन पुड़ दोष लानेबालोए त मूसोए, ज़ैस पुड़ तुसेई भरोसो रखबोरोए ।  
 46 किजोकि अगर तुसेई मूसेरो विश्वास कियोरो भोथो, त मेरो भी विश्वास केरेथे, किजोकि तैने मेरे बारे मां लिखोरूए ।  
 47 तुस त तैसेरे कानूनेरे गल्लन पुड़ विश्वास न केरथ, ते फिरी तुस किजो मेरी गल्लन पुड़ विश्वास केरेले?"

## 6

5000

(14:13-21; 6:30-44; 9:10-17)

- 1 एन गल्लन पत्ती यीशु गलीलेरे समुन्देरे मतलब तिबिरियुसेरे समुन्देरे पार जेव ।  
 2 ते अक बड़ी भीड़ तैस पत्ती चली, किजोकि ज़ैना चमत्कार तै बिमारन पुड़ हीरतो थियो, ते तैना ठीक भोते थिए ते लोक एन हेरते थिए ।  
 3 तैखना यीशु पहाड़े पुड़ चढ़तां अपने चलन साथी तैड़ी विशशो ।  
 4 ते यहूदी केरे फ़सहेरू तिहार नेडू थियूं ।  
 5 ज़ैखन यीशुए अक बड़ी भीड़ अपने पासे एंडती लाई, त तैने फिलिप्पुसे सेई ज़ोवं, “असां एना केरे लेइ रोट्टी कोट्टां घिन्न?”  
 6 पन तैनी तै गल तैस अजमानेरे लेइ ज़ोई, किजोकि तै एप्पू ज्ञानतो थियो कि तै कुन केरेलो ।  
 7 फिलिप्पुसे तैस जुवाब दित्तो, “एन केरे लेइ 200 दीनारां केरि रोट्टी भी पूरी न भोली कि तैन थोड़ी-थोड़ी मैली गैली ।”  
 8 तैसेरे चलन मरां शमीन पतरसेरे दूलाए अन्दरयासे तैस सेई ज़ोवं ।  
 9 “इड़ी अक मट्टूए ज़ैस कां जोआं केरि पंच रोट्टिन, तै दूई मेछलीन, पन एतरे लोकन जो कुन तैना पूरी भोनिन?”  
 10 यीशुए ज़ोवं, “लोकन विशाला ।” तैड़ी बड़ो घास थियो । तैखन लोक ज़ैना लगभग 5000 मडद विशशेरे थिये ।  
 11 तैखन यीशुए रोट्टी टलेइ ते शुक्र केरतां विशने बलना दिती, ते तेन्नेरे मेछलीन मरां भी ज़ेत्तरी तैना चातो थियो बेन्ती ।  
 12 ज़ैखन तैना खेइतां रज्जे त तैनी अपने चलन सेई ज़ोवं, “बच्चोरे टुकड़े अकोट्टे केरा, ताके किछ शारू न गाए ।”  
 13 ते तैनेई अकोट्टे केरे, ते जोआं केरे पंच रोट्टी केरे टुकड़न मरां ज़ैना खाने बालन करां बच्चोरे थिए 12 टोकरे थिए ।  
 14 तैखन तै चमत्कार ज़ै तैनी कियोरो थियो लोक हेरतां ज़ोने लाए, “तै नबी ज़ै दुनियाई मां एजेनेबालो थियो सच्चै ईए ।”  
 15 यीशुए एना ज़ेनतां कि एना मीं राज़ो बनानेरे लेइ टलानो चातन, फिरी तै अकैल्लो पहाड़े पुड़ जेव ।

14:22-33; 6:45-52

(14:22-33; 6:45-52)

- 16 जैखन डलोझ भोइ, त तैसेरे चले समुन्दरेरे बन्ने जे ।
- 17 ते किशती मां च्छेदां समुन्दरेरे पार कफरनहूम नगर जो चले, तैस वक्ते आंधरू भोरू थियूं, ते यीशु हेजू तगर तैन कां न थियूं ओरो ।
- 18 ते बडी तेज हवा चलोरी थी ते समुन्दरे मां छेल्ली उठने लेइ ।
- 19 जैखन तै लगभग टलाई च्चेवरे मील नेडे अव, त तैनेई यीशु समुन्दरे पुइ चलतो लाव ते किशतरे नेडे एइतो लाव ते डरे ।
- 20 पन यीशुए तैन सेइं ज़ोवं, “अवं आई डरा न ।”
- 21 ते तै तैस किशती मां च्छेनेरे लेइ तियार भोव, ते तैखने किशती तैस ठैरी पुइ पुज्जी ज़ैडी तैना चलोरे थिये ।
- 22 दुइयोवं दिहाडे तैस मैन्हु केरि भीडां ज़ै समुन्दरेरे पार खडी थी, इन हेरतां कि एक्की किशतरे अलावा होरि कोई न थी, यीशु अपने चेलन साथी तैस किशती पुइ न च्छेरो थियो, पन सिर्फ तैसेरे चले थिये ।
- 23 (तैखन होरि किशती तिविरियुस नगरेरां तैस ठैरी एई, ज़ैडी तैनेई प्रभुएरू शुक्र केरतां रोट्टी खोरी थी)
- 24 एल्हरेलेइ ज़ैखन लोकेई हेरू कि इडी न यीशु ते न तैसेरे चले, ते तैना फिरी तैना निक्की-निक्की किशतन पुइ च्छेदां यीशु तोपते कफरनहूम नगर ए पुज्जे ।
- 25 समुन्दरेरे पार ज़ैखन तैना तैस मैल्ले त तैने ज़ोवं, “हे गुरू, तू इडी कताली अव?”
- 26 यीशुए तैन जुवाव दित्तो, “अवं तुसन सेइं सन्न-सन्न ज़ोताई, तुस मीं एल्हरेलेइ न तोपथ कि तुसेईं चमत्कार लाव, बल्के एल्हरेलेइ कि रोट्टी खेइतां रज्जे ।
- 27 नाश भोनेवैली रोट्टेरे लेइ मेहनत न केरा । पन तैस रोट्टेरे लेइ मेहनत केरा ज़ै हमेशारी ज़िन्दगी देतीए, ज़ै मैनेरू मट्टू यानी अवं तुसन देइलो, किजोकि बाजी परमेशरे मीं एन्चरां केरनेरो अधिकार दित्तोए ।”
- 28 तैनेई तैस्से सेइं ज़ोवं, “परमेशरेरू कम केरनेरे लेइ अस कुन केरम?”
- 29 यीशुए तैन जुवाव दित्तो, “परमेशर तुसन करां एन कम चाते कि तुस तैस पुइ यानी मीं पुइ विश्वास केरा ज़ैनी अवं भेजोरोई ।”
- 30 तैखन तैनेई तैस सेइं ज़ोवं, “फिरी तू कुन निशान हीरातस कि अस तैस हेरतां तेरो विश्वास केरम? तू कोन जेरू कम हीरातस?
- 31 इश्रे दादेई-पइदादेई जंगले मां स्वर्गेरी रोट्टी खेइ, ज़ैस जो मन्नो ज़ोतन । जेन्चरे पवित्तरशास्त्रे मां लिखोरूए, तैनी तैन खानेरे लेइ स्वर्गेरां रोट्टी दिती ।”
- 32 यीशुए तैन सेइं ज़ोवं, “अवं तुसन सेइं सन्न-सन्न ज़ोताई कि मूसा तुसन तै रोट्टी स्वर्गेरां न दिती, पन मेरो बाजी तुसन सन्न-सन्न रोट्टी स्वर्गेरां देते ।
- 33 किजोकि ज़ै रोट्टी परमेशर देते, ते तै ईए ज़ै स्वर्गेरां एइतां दुनियारे लोकन ज़िन्दगी देतीए ।”
- 34 तैखन तैनी तैस्से सेइं ज़ोवं, “हे प्रभु, ए रोट्टी असन स्वर्गेरां देतो रा ।”
- 35 यीशुए तैन सेइं ज़ोवं, “ज़िन्दगी रोट्टी (ज़ै ज़िन्दगी देनेवाली रोट्टी) अवं आई, ज़ै मीं कां एजते तै कधी निअन्नो न भोलो, ते ज़ै मीं पुइ विश्वास केरलो ते कधी टलिशोरो न भोलो ।
- 36 पन मीं तुसन सेइं पेइलू ज़ोरूए, कि तुसेईं अवं लोरोई फिरी भी मीं पुइ विश्वास न केरथ ।
- 37 ज़ैन किछ बाजी मीं देते तैन सब किछ मीं कां एजनुए, ते ज़ै कोई मीं कां एज्जेलो अवं तैस ज़रूर कबूल केरलो ।
- 38 किजोकि अवं अपनि मर्जी नई, बल्के परमेशरेरी मर्जी पूरी केरनेरे लेइ स्वर्गेरां ओरोई ज़ैनी अवं भेजोरोई ।
- 39 ईए मेरे बाजेरी मर्जी आए ज़ैनी अवं भेजोरोई कि ज़ैन किछ तैनी मीं दित्तोए तैस मरां अवं किछ न हिरई, पन आखरी दिहैडी फिरी तैस ज़ीतो केरलो ।



40 किजोकि मेरे बाजेरी मर्जी ईए कि जै कोई मट्टे हेरे ते तैस पुड़ विश्वास केरे, तैस हमेशारी ज़िन्दगी मैल्ले, ते अवं तैस आखरी दिहैड़ी फिरी ज़ीतो करेलो ।”

41 एल्हेरेलेइ यहूदी लोक तैस पुड़ कुड़कुड़ाने लग्गे, किजोकि तैनी ज़ोरू थियू, “जै रोट्टी स्वर्गेंरा ओरिए तै अवं आई ।”

42 ते तैनेई ज़ोवं, “कुन एन यूसुफेरू मट्टू यीशु नई, जेसेरे अम्मा बाजी अस ज्ञानतम? त ते केन्चरे ज़ोते कि अवं स्वर्गेंरा ओरोई?”

43 यीशुए तैन जुवाव दित्तो, “एप्पू मांमेइं न कुड़कुड़ाय ।

44 कोई मीं कां न एज्जी बट्टे ज़ांतगर बाजी, जैनी अवं भेजोरोई, तैस मीं कां न आने, ते अवं तैस आखरी दिहैड़ी फिरी ज़ीतो करेलो ।

45 नेबी केरे पवित्रशास्तरे मां एन लिखोरूए, ‘तैना सब परमेशरेरे तरफां शिख्वेरे भोनेन ।’ जैनी बाजी करां शुनोरूए त शिख्वेरोए तै मीं कां एइते ।

46 एसेरो मतलब ई नई कि केन्चे बाजी लोरोए, पन जै परमेशरेरे तरफांए यानी मीं बाजी लोरोए ।

47 अवं तुसन सेइं सन्न-सन्न ज़ोताई जै कोई विश्वास केरते हमेशारी ज़िन्दगी तैसेरीए ।

48 ज़िन्दगरी रोट्टी (ज़िन्दगी देनेवाली रोट्टी) अवं आई ।

49 तुशे दादे-पड़दादेई जंगले मां मन्नो खाऊ ते मरे ।

50 ई तै स्वर्गेंरी रोट्टीए कि मैन्हु खान ते न मरन ।

51 ज़िन्दगरी रोट्टी जै स्वर्गेंरा ओरिए अवं आई । अगर कोई इस रोट्टी मरां खाए, त हमेशा ज़ीतो रालो, ते जैस रोट्टी सेइं दुनियारे लोकन हमेशारी ज़िन्दगी मैलचे, तैन मेरू मासे ।”

52 एस पुड़ यहूदी लोक एप्पू मांमेइं बेंस केरने लाए, “ई मैन्हु असन अपनू मास केन्चरे खाने जो देइ बटते?”

53 यीशुए तैन सेइं ज़ोवं, “अवं तुसन सेइं सन्न-सन्न ज़ोताई, कि ज़ांतगर तुस मैनेरे मट्टेरू यानी मेरू मास न खाले, ते मेरो खून न पीले, तुसन हमेशारी ज़िन्दगी न मैलेली ।

54 जै मेरू मास खाते ते मेरो खून पीते हमेशारी ज़िन्दगी तैसेरीए ते आखरी दिहैड़ी अवं फिरी तैस ज़ीतो करेलो ।

55 किजोकि हकीकत मां मेरू मास खानेरी चीजे ते मेरो खून पीनेरी चीजे ।

56 जै मेरू मास खाते ते खून पीते तै मीं मां बनोरो राते, ते अवं तैस मां ।

57 जेन्चरे ज़ीते बाजी अवं भेजोरोई, ते अवं बाजी केरे कारन ज़ोताई, तेन्चरे तै भी जै मीं खालो मेरे कारन ज़ीतो रालो ।

58 जै रोट्टी स्वर्गेंरा ओरिए, तैस रोट्टी जेरि नई जै तुशे दादे-पड़दादेई खाइ ते वादे मां मरे, पन जै कोई ई रोट्टी खालो तै हमेशा ज़ीतो रालो ।”

59 इना गल्लां तैनी कफरनहूम नगरेरे एककी प्रार्थना घरे मां ज़ोई ।



60 एल्हेरेलेइ तैसेरे चलन मरां बड़ेई एन शुन्तां ज़ोवं, “ए शिक्षा सकते, एस कौन मेन्नी बटते?”

61 यीशु अपने मने मां एना बुझतां कि मेरे चले एस गल्ली पुड़ एप्पू मांमेइं कुड़कुड़ाने लोरेन, तैन पुच्छ, “कुन इना गल्लां तुसन मीं पुड़ विश्वास केरने करां रोकतिन?”

62 अगर तुस मैनेरू मट्टू यानी अवं जैड़ी पेइलो थियो उबरे (स्वर्गें) गातो लाएले, त कुन भोलू?

63 परमेशरेरी आत्मा त ज़िन्दगी देने वालीए, मैन्हु केरि ताकती सेइं किछ, न केरोए, जैना गल्लां मीं तुसन सेइं ज़ोई तैना परमेशरेरी आत्मां तरफां आन ते तैना ज़िन्दगी भी आन ।

64 पन तुसन मां किछ एरे आन जैना विश्वास न केरन । किजोकि यीशु पेइलो ज्ञानतो थियो कि जैना विश्वास न थी केरते तैना कौन आन, ते तैस कौन टलवालो ।

65 ते तैनी ज़ोवं, “एल्हेरेलेइ मीं तुसन सेइं ज़ोरू थियू, ज़ांतगर बाजी केरे तरफां एन वरदान न मैल्ले तांतगर कोई मीं कां न एज्जी बट्टे ।”

?????? ???????

- 66 एस पुड़ तैसेरे चलन मरां बड़े उलटे फिरे, ते तैल्ला पत्ती तैस साथी न चले।  
 67 तैखन यीशुए 12 चलन सेइं ज़ोवं, “कुन तुस भी च़लू गानू चातथ?”  
 68 शमौन पतरस तैस जुवाब दित्तो, “हे प्रभु अस केस कां गाम? हमेशारी ज़िन्दगरी देने बैली गल्लां त तीए कां आन।  
 69 ते असेईं तीं पुड़ विश्वास कियो ते ज़ानू कि तू परमेशेरो पवित्र मैन्हु आस।”  
 70 यीशुए तैन जुवाब दित्तो, “कुन मीं तुस 12 न चुने। फिर भी तुसन मरां अक मैन्हु शैताने।”  
 71 तेने इन तैस शमौन इस्करियोतेरे मट्टे यहूदा इस्करियोतेरे बारे मां ज़ोवं। हांलाकि तै तैन 12 चलन मरां अक थियो, ज़ै यीशु टलुवाने बालो थियो।

## 7

???? ?? ??????? ???

- 1 एना गल्लन पत्ती यीशु गलील इलाके मां फिरतो राव, किजोकि यहूदी लीडर तैस मारनेरी कोशिश केरि राओरे थिये, एल्हेरेलेइ तै यहूदिया इलाके मां फिरनू न चातो थियो।  
 2 यहूदी केरू झॉफडी केरू तिहार\* (तेम्बु) नेडू थियू।  
 3 एल्हेरेलेइ तैसेरे दूलाएई तैस ज़ोवं, “इडी न रा। यहूदिया इलाके मां गा ज़ैडी तिहार मनाने लोरेन, कि ज़ैना चमत्कार तू केरतस तैना तेरे तैना चले भी हेरन, ज़ैना यहूदिया इलाके मां रातन।  
 4 किजोकि एरो कोई न भोलो कि ज़ै मशूर भोनू चाए, ते छेपतां कम केरे। अगर तू कम केरतस, त अपनो आप हिरा।”  
 5 किजोकि तैसेरे दूला भी तैसेरो विश्वास न थी केरते।  
 6 तैखन यीशुए तैन सेइं ज़ोवं, “मेरो लेइ ठीक वक्त हेजू नई ओरो, पन तुस केन्ची वक्त मां भी गेइ सकतथ।  
 7 इस दुनियारे लोक तुसन सेइं बैर न केरि सकन, पन मीं सेइं बैर रखतन किजोकि अवं तैन केरे खलाफ इन ज़ोताईं कि तैना बुरां कम्मां केरतन।  
 8 तुस तिहारे मां गाथ, मीं हुना एस तिहारे मां नई एज्जनू, किजोकि मेरो हेजू ठीक वक्त नई ओरो।”  
 9 ते तै तैन सेइं एना गल्लां केरतां गलीले मां राव।

?????? ??? ??????? ???

- 10 पन ज़ैखन तैसेरे दूला तिहारे मां च़ले जे त तै बांदो न पन छेपतां जेव।  
 11 यहूदी लीडर तिहारे मां यीशु तोपने लाए। तैना लोकन पुछ्छी राओरे थिये, “तै मैन्हु कोडि आए?”  
 12 ते लोकन मां तैसेरे बारे मां बल्हे-बल्हे बेडि गल्लां भोइ, किछ ज़ोते थी, “तै रोडो मैनुए।” ते किछ ज़ोते थी, “नई तै मैनु गुमरा केरते।”  
 13 फिरी भी यहूदी लोकां केरे प्रधानां केरे डरे सेइं केन्ची भी मैन्हु तैसेरे बारे मां खुलतां तैसेरे बारे मां गल केरनेरी हिम्मत न भोइ।

?????? ??? ??????? ???????

- 14 ज़ैखन तिहारेरे अध्ये दिहाइ बीते, त यीशु मन्देरेरे अंगने मां गेइतां शिक्षा देने लगो।  
 15 तैखन यहूदी लीडरेई हैरान भोइतां ज़ोवं, “एनी त पवित्रशास्तेरी शिक्षा केन्ची करां नई पढ़ोरीए, फिरी एस केन्चरे एना गल्लां एई?”

\* 7:2 झॉफडी केरू तिहार: इन तिहार यहूदी लोकां केरे दूलाईं खास तिहारन मरां अक आए, जैन यरूशलेम नगरे मां अठ दिहाइन तगर मनाव गाते। बड़े दूररां लोक यरूशलेम नगरे मां एइतां अकोट्टे भोते थिये, तैना लोक निक्की-निक्की झॉफडी बनेइतां तैन मां रातन। तैस तिहारे मां तैना परमेशेरे याद केरतां खुशी मनावे थिये।

16 यीशुए तैन जुवाब दित्तो, “मेरी शिक्षा मेरी अपनि नई, बल्के परमेशेरे तरफां आए, जैने अवं भेजोरोई।

17 अगर कोई तैसेरी मेर्जी पुड चलनू चाए, त तै इस शिक्षारे बार मां ज्ञानेलो कि ए परमेशेरे तरफांए या अवं अपने तरफां ज़ोताई।

18 जै अपने तरफां किछ ज़ोते तै अपनि बड़याई चाते, पन जै अपने भेजने वालेरी बड़याई चाते तै ईमानदार आए, ते तैस मां कोई बेइमानी नई।

19 तुसन मूसे कानून दित्तो, पन तुसन मरां कोई भी तैस पुड न चले! पन तुस लोक मीं मारनेरी कोशिश करतथ।”

20 लोकेई जुवाब दित्तो, “तीं पुड भूतेरो सैयोए! कौन तीं मारनेरी कोशिश करते?”

21 यीशुए जुवाब दित्तो, “मीं अक चमत्कार कियो, ते तुस हैरान भोए।

22 एल्हेरेलेइ मूसा तुसन खतनेरो हुक्म दित्तो (एना नई कि मूसेरे तरफांए बल्के वाप दादां करां चलतो ओरोए) ते तुस आरामेरे दिहाड़े मैनेरो खतनो करतथ।

23 एल्हेरेलेइ आरामेरे दिहाड़े मैनेरो खतनो कियो गाते ताके मूसेरे कानूनेरो हुक्म न टले, त तुस मीं पुड किजो क्रोध करतथ, कि मीं आरामेरे दिहाड़े अक मैन्हु रोडेचारे ठीक करो।

24 तुतर हेरतां इन्साफ न केरा बल्के ठीक-ठीक आदालत केरा।”

\*\*\*

25 तैखन किछ यरूशलेम नगरेरे रानेवाले एप्पू मामेई एक्की होरि पुच्छने लगे, “कुन ए तै नई, जैस मारनेरी कोशिश चलोरिए?”

26 पन तक्का, तै त खुले आम गल्लां करते, ते कोई एस किछ न ज़ोए। कुन लीडरेई सच्चे, सच्च ज्ञानू कि ए मसीहे?

27 पन ए मैन्हु मसीह केन्चरे भोइ सकते? एस त अस ज्ञानतम कि ए कोट्टां ओरोए, पन जेइस मसीह एज्जेलो त कोई न ज्ञानेलो कि तै कोट्टां एज्जेलो।”

28 तैखन यीशुए मन्दरे अंगने मां शिक्षा देते बारे ज़ोरे सेई ज़ोवं, “तुस मीं ज्ञानतथ ते इन भी कि अवं कोट्टां ओरोई। अवं एप्पू नई ओरो, पन मेरो भेजने वालो सच्चोए, तैस तुस न ज्ञानाथ।

29 पन अवं तैस ज्ञानताई, किजोकि अवं तैसेरे तरफां ओरोई, ते तैनी अवं भेजोरोई।”

30 एस पुड लीडरेई तै टलानो चाव, फिरी भी केन्चे तैस सेई हथ न लव, किजोकि तैसेरो मरनेरो वक्त हेजू न थियो ओरो।

31 फिरी भी भीड़ी मरां बडे लोकेई तैस पुड विश्वास कियो, ते ज़ोने लाए, “मसीह जैखन एज्जेलो ते एट्टां जादे चमत्कार हिरालो जैना एने हीराहे?”

\*\*\*

32 फरीसी लोकेई, लोक तैसेरे बारे मां बल्हे-बल्हे एना गल्लां करते शुने, ते प्रधान याजकेई ते फरीसी लोकेई तैस टलानेरे लेइ मन्दरेरे पहरदार भेजे।

33 एस पुड यीशुए ज़ोवं, “अवं थोडे चिरे तगर हेजू तुसन साथी आई, फिरी अवं अपने भेजने वाले कां वापस गानोई।

34 तुस मीं तोप्येले, पन अवं नई मैलनो, ते ज़ैडी अवं आई, तैडी तुस न एज्जी बटथ।”

35 एस पुड यहूदी लीडर एप्पू मामेई ज़ोने लगे, “ए कोरां चलोरे, ज़ेरां अस न गेइ बटम? कुन ए तैन कां गालो जैना यूनान नगरे मां तितर-बितर भोइतां रातन, ते यूनानेरे लोकन भी शिक्षा देलो?”

36 एस गल्लरो कुन मतलबे जै एनी ज़ोई, कि तुस मीं तोप्येले, पन अवं तुसन न मैलेलो, ते ज़ैडी अवं आई तैडी तुस न एज्जी बटतथ?

\*\*\*

37 तिहाररे आखरी दिहाड़े, जै खास दिहाड़ी भोतीए, तेइस यीशु खडो भोइतां ज़ोने लगे, “अगर कोई टलिश्शोरो भोए त मीं कां एज्जे ते पीये।

38 जै मीं पुड़ विश्वास केरे, जेन्चरे पवित्रशास्त्रे मां लिखेरूए, तैसेरे दिले मरां तै पैनेरे दरिया निस्सेले जैना ज़िन्दगी देतन।”

39 यीशुए एना गल्लां पवित्र आत्मारे बारे मां ज़ोई, जै विश्वास केरेने बालन पुड़ एजनेबाली थी, किजोकि पवित्र आत्मा हेजू तगर न थी दित्तोरी, किजोकि यीशु हेजू तगर अपनि महिमा मां वापस न थियो जोरोए।

40 तैखन भीड़ी मरां किछेई एना गल्लां शुन्तां ज़ोवं, “सच्चे ई तै नबी आए, जेसेरे एजनेरी अस उमीदी मां आम।”

41 किछे लोकेई ज़ोवं, “ई मसीहे,” पन किछेई ज़ोवं, “कुन मसीह गलील इलाकेरां एजनेओ?”

42 पवित्रशास्त्र मां लिखेरू कि मसीह दाऊदरे खानदाने ते बैतलहम इलव्वे मरां एज्जेलो, ज़ैड़ी दाऊद राजो रातो थियो।”

43 यीशुएरे बारे मां लोकां केरो अलग-अलग खियाल थियो, एल्हेरेलेइ तैन एप्पू मामेई अनबन भोइ।

44 किछे तैन मरां तैस टलाने चाते थिये, पन केन्चे तैस सेई हथ न लव।

~~~~~

45 तैखन मन्दरेरे पहरदार, प्रधान याजकन ते फरीसन कां एइतां तैन सेई ज़ोवं, “तुसेई तै किजो न आनो?”

46 पहरदारेई जुवाब दित्तो, “केन्चे मैने कधी एत्त्री रोड़ो गल्लां न कियोरी, जेरि गल्लां ए मैन्हु करते।”

47 फरीसेई तैन जुवाब दित्तो, “कुन तुस भी टेपलोरेथ?”

48 कुन सरदारन ते फरीसन मरां केन्चे तैस पुड़ विश्वास कियोरोए?”

49 पन एन लोक जैना मूसेरे कानूने न ज्ञानन् तैन पुड़ परमेशेरो फिटकार भोते।”

50 नीकुदेमुसे जै पेइलो तैस कां राती ओरो थियो, ते तैना मरां अक थियो, तैनी ज़ोवं,

51 “कुन इश्ये कानून केन्ची मैन्हु सज़ा देनेरी अज़ाज़त देते, ज़ांतगर तैसेरी गल शुन्तां इन न ज्ञानम कि तै कुन करते?”

52 तैनेई तैस जुवाब दित्तो, “कुन तू भी गलील इलाकेरो आस! पवित्रशास्त्रे मां तोप ते ज्ञान, कि गलीलेरां कोई नबी त नई निसने बालो!”

53 (तैखन सब अपने-अपने घरे चले जे)।

8

~~~~~

1 पन यीशु अपने चलन सेई साथी ज़ैतून पहाड़े पुड़ जेव।

2 होरसां तै झेझां-झेझां मन्दरेरे अंगने मां जेव, बड़े लोक तैस कां आए ते तै विशतां तैन शिक्षा देने लगे।

3 तैखन शास्त्री ते फरीसी लोक एक्की कुआन्शी जै बदमैशी मां टलेइयोरी थी, तै मझाटे खड़ी केरतां यीशु सेई ज़ोवं,

4 “हे गुरू, ई कुआन्श बदमाशी करते वक्त टलोरीए।

5 मूसेरे कानूने मां मूसा असन हुक्म दित्तोरोए कि एरी जेरि कुआन्शी घोड़ेई बैइतां मारा, ते तू एस कुआन्शरे बारे मां कुन ज़ोतस, कि अस एस कुन केरम?”

6 तैनेई यीशु परखनेरे लेइ ए गल ज़ोई, ताके तैस पुड़ दोष लाने जो गल मैल्ले। पन यीशु उन्डे लिक्तां एंगलोई सेई ज़मीनी पुड़ लिखने लव।

7 ज़ैखन तैना तैस पुछ्ते राए, त तैनी उबरे तेकतां तैन सेई ज़ोवं, “तुसन मरां ज़ैनी पाप न भोए कियोरोए, तैए पेइलो घोड़े बाए।”

8 ते फिरी उन्डे लिक्तां एंगलोई सेई ज़मीनी पुड़ लिखने लव।

9 पन तैना एना शुन्तां बड्डन करां निकडन तगर सारे एक्की पत्ती अक तैट्टां चले जे, ते यीशु अकैल्लो राव, ते तै कुआन्श मझाटे खड़ी राई।

10 यीशुए उबरे तेकतां तैस पुच्छू, “हे कुआन्श, तैना कोरां जे? कुन केन्चे तीं पुड सज्जारो हुक्म न दित्तो?”

11 तैसां ज़ोवं, “हे प्रभु केन्चे नई।” यीशुए ज़ोवं, “अवं भी तीं सज्जारो हुक्म न देई। अपने घरे जो गा ते फिरी पत्ती पापेरी न जिन्दगी ज़ीयां।”

???? ???? ? ? ? ?

12 यीशुए फिरी लोकन सेइं ज़ोवं, “दुनियारी लौ अवं आई, ज़ै मीं पत्ती एज्जेलो त तै आंधरे मां न चलेलो, पन तै लौ हासिल केरेलो ज़ै जिन्दगरी देचे।”

13 फरीसी लोकेईं तैस सेइं ज़ोवं, “तू अपनि गवाही एप्पू देतस, तेरी गवाही सच्च्ची नई।”

14 यीशुए तैन जुवाव दित्तो, “भला अवं अपनि गवाही एप्पू देताई फिरी भी मेरी गवाही सच्च्चीए, किजोकि अवं ज्ञानताई कि अवं कोट्टां ओरोईं ते कोरां गाताई? पन तुस न ज्ञानाथ कि अवं कोट्टां ओरोईं ते कोरां गाताई।

15 तुस इन्सानेरी सोचरे मुताबिक इन्साफ केरतथ, अवं केन्चेरी इन्साफ न केरि।

16 ते अगर अवं इन्साफ केरि भी त मेरो इन्साफ सच्च्चीए, किजोकि अवं अकैल्लो नई, पन अवं ते मेरो बाजीए, ज़ैनी अवं भेज्जोरोईं।

17 मूसेरे कानूने मां भी लिखोरोए कि दूईं ज्ञानां केरि गवाही मिलतां सच्च्ची भोतीए।

18 अक त अवं अपनि गवाही देताई, ते दुइयोवं गवाही मेरो बाजी देते ज़ैनी अवं भेज्जोरोईं।”

19 तैनेईं तैस पुच्छू, “तेरो बाजी कोडि आए?” यीशुए जुवाव दित्तो, “न तुस मीं ज्ञानतथ न मेरे बाजी, अगर मीं ज्ञानते त मेरे बाजी भी ज्ञानते।”

20 एना गल्लां तैनी मन्देरेरे अंगने मां शिक्षा देते भण्डार घरे मां ज़ोईं, ते केन्चे तैन ट्लाव, किजोकि तैसेरो वक्त हेजू न थियो ओरो।

???? ???? ? ? ? ? ? ? ? ? ? ?

21 यीशुए फिरी तैन सेइं ज़ोवं, “अवं ज्ञानताई कि तुस मीं तोपेले ते पाप केरते-केरते मरेले, ज़ैडी अवं गाताई तैडी तुस न एज्जी बटथ।”

22 एस पुड यहूदी लीडरेईं ज़ोवं, “कुन एने अपनो आप मारनोए, ज़ैन ज़ोते कि ज़ैडी अवं गाताई तैडी तुस न एज्जी बटतथ?”

23 यीशुए तैन सेइं ज़ोवं, “तुस इस दुनियाईं मां ज़मरिथ, अवं स्वर्गोरां ओरोईं। तुस दुनियारेथ, अवं दुनियारो नई।

24 एल्हेरेलेइ मीं तुसन सेइं ज़ोरू थियू, कि तुस अपने पापन मां मरेले, किजोकि अगर तुस विश्वास न केरेले कि अवं तैए आईं त अपने पापन मां मरेले।”

25 यहूदी लीडरेईं तैस सेइं ज़ोवं, “तू कौन आस?” यीशुए तैन सेइं ज़ोवं, “ज़ैन शुरु करां ज़ोतो ओरोईं, अवं तैए आईं।

26 तुशे बारे मां मीं बडू किछ ज़ोनूए ते फैसलो केरनोए, पन मेरो भेज्जने बालो सच्च्चीए, ते ज़ैन मीं तैस करां शुनोरूए तैन दुनियारे लोकन सेइं ज़ोताई।”

27 तैनेईं एन न समझू कि असन सेइं बाजी केरे बारे मां कुन ज़ोने लोरोए।

28 तैखन यीशुए ज़ोवं, “ज़ैखन तुस मैनेरे मट्टे यानी मीं उच्चे पुड च़ाढेले, त ज़ानेले कि अवं तैए आईं, अवं अपने आपे सेइं किछ न केरि, ज़ेन्चरे मेरो बाजी मीं शिखालते तेन्चरे तैना गल्लां केरताई।

29 मेरो भेज्जने बालो मीं साथीए, तैनी अवं अकैल्लो नई शारोरो किजोकि अवं हमेशा तैन कम केरताई ज़ैस सेइं ते खुश भोते।”

30 बड़े लोकेई यीशुएरी तैना गल्लां शुन्ते वक्त जैना तै जोई राओरो थियो तैस पुड़ विश्वास कियो।

~~~~~

31 तैखन यीशुए तैन यहूदन सेइं जैनेई तैस पुड़ विश्वास कियोरो थियो ज़ोवं, “अगर तुस मेरे वचने मां बनेरे राले, त सच्च मेरे चले भोले।

32 तुस सच्च जानेले ते सच्च तुसन आज़ाद केरेलू।”

33 तैनेई तैस जुवाब दित्तो, “अस त अब्राहमेरे औलादी मरां आम, ते कधी केन्चेरे गुलाम नई भोरे, फिरी तू केन्चेरे ज़ोतस कि तुस आज़ाद भोले?”

34 यीशुए तैन जुवाब दित्तो, “अवं तुसन सेइं सच्च-सच्च ज़ोताई कि ज़ै कोई पाप केरते तै पापेरो गुलामे।

35 गुलाम हमेशा घरे न रेइ सके, मट्टू हमेशा रहते।

36 एल्हेरेलेइ अगर मट्टू तुसन आज़ाद केरे त सच्च तुस आज़ाद भोले।

37 अवं ज़ानताई कि तुसा अब्राहमेरे औलादी मरां आथ, फिरी भी मेरी शिक्षा तुस मन्थ, एल्हेरेलेइ तुस मीं मारने चातथ।

38 अवं तैन्ने ज़ोताई ज़ैन मीं लव, ज़ैखन अवं अपने बाजी सेइं साथी थियो, ते तुस तैन्ने केरतथ ज़ैन तुसेईं अपने बाजी केरां शुनोरू।”

39 तैनेई तैस जुवाब दित्तो, “इश्शो पूर्वज त अब्राहमे।” यीशुए तैन सेइं ज़ोवं, “अगर तुस अब्राहमेरे औलादी मरां भोथे त अब्राहमेरां ज़ेरां कम्मां केरेथ।

40 पन हुन्ना तुस मीं मारनो चातथ, किजोकि मीं तुसन तैना सच्चि गल्लां जोई जैना मीं परमेशेरे करां शुनी, एरू त अब्राहमे न थियू कियोरू।

41 तुस अपने बाजेरां ज़ेरां कम्मां केरतथ।” तैनेई तैस सेइं ज़ोवं, “अस बदमैशी सेइं नई ज़मोरे, इश्शो अक्के बाजीए, ते तै परमेशेरे।”

42 यीशुए तैन सेइं ज़ोवं, “अगर परमेशर तुश्शो बाजी भोथो, त तुस मीं सेइं प्यार केरेथ, किजोकि अवं परमेशेरेरे करां ओरोई, अवं अपने तरफां नई ओरो, बल्के तेनी भेजोरोई।

43 तुस मेरी गल्लां किजो न समझथ? एल्हेरेलेइ कि तुस मेरी शिक्षा मन्नी न चाथ।

44 तुस अपने बाजी शैतानेरेथ, ते तैसेरी मर्जी पूरी केरनि चातथ। ते त शूरू करां खूनी आए ते सच्च पुड़ बनोरो न राव, किजोकि सच्च तैस मां अथी नई। ज़ैखन तै झूठ ज़ोते त अपने सुभावेरे मुताबिक ज़ोते, किजोकि तै झूठो बल्के झूठेरो बाजीए।

45 पन अवं सच्च ज़ोताई तांए तुस मेरो विश्वास न केरथ।

46 तुसन मां मीं कौन पापेरो दोष लाते? अगर अवं सच्च ज़ोताई त फिरी मेरो विश्वास की न केरथ?

47 ज़ै परमेशेरेरे तरफां भोते तै परमेशेरेरी गल्लां केरते, ते तुस एल्हेरेलेइ न शुनथ किजोकि तुस परमेशेरेरे तरफां नई।”

~~~~~

48 एना शुन्तां यहूदेई तैस सेइं ज़ोवं, “कुन अस ठीक न थिये ज़ोते, कि तू सामरी मैन्हु आस, ते तीं मां भूते!”

49 यीशुए जुवाब दित्तो, “मीं मां भूत नई, पन अवं अपने बाजेरी इज़्जत केरताई, ते तुस मेरी निरादर केरतथ।

50 पन अवं अपनि बड़याई न चैई, हाँ अक्के ज़ै चाते कि लोक मेरी बड़याई केरन, ते तै आदालत केरनेवालो भी आए।

51 अवं तुसन सेइं सच्च-सच्च ज़ोताई कि ज़ै कोई मैन्हु मेरे वचने पुड़ चले तै कधे न मरेलो।”

52 यहूदेई तैस सेइं ज़ोवं, “हुनी त असेईं बुझू, कि तीं मां भूते, अब्राहम ते नबी भी मरे, ते तू ज़ोतस, अगर कोई मेरे वचने पुड़ चले त तै कधी न मरेलो।

53 इश्शो पूर्वज अब्राहम मरो, कुन तू तैस करां भी बड्डो आस? ते नबी भी मरे, तू अपने बारे मां कुन सोचतस कि तू कौन आस?”

54 यीशुए जुवाब दित्तो, “अगर अवं अपनि बड्याई केरि त मेरी बड्याई किछ भी नई। पन मेरी बड्याई करनेवालो मेरो बाजीए, ज़ैस तुस ज़ोतथ कि तै तुश्शो परमेशेरे।

55 तुसेईं त तै न ज़ानो, पन अवं तैस ज़ानताई, अगर अवं ज़ोईं कि तैस न ज़ैनी, त तुश्शो ज़ेरो झूठो भोइ। पन अवं तैस ज़ानताई ते तैसेरे वचने पुड़ चलताई।

56 तुश्शो पूर्वज अब्राहम मेरी दिहाड़ी हेरनेरे उमीदी पुड़ बड़ी खुश थियो, ते तैनी हेरी, ते खुश भोव।”

57 यहूदेई तैस्से सेइं ज़ोवं, “हेजू तू 50 साला केरो भी नई भोरो फिरी भी तीं अब्राहम लोरोए?”

58 यीशुए तैन सेइं ज़ोवं, “अवं तुसन सेइं सच्च-सच्च ज़ोताई कि अब्राहम पैदा भोने करां पेइलो, अवं आई।”

59 तैखन तेनेईं तैस मारनेरे लेइ घोड़ सल्ले, पन यीशु छेपतां मन्दरे मरां निस्सी जेव।

## 9

\*\*\*\*\*

1 फिरी यीशुए अपने चलन सेइं साथी चलोरो थियो, ते तेनेईं अक मैन्हु लाव, ज़ै ज़र्मनेरो कानो थियो।

2 तेसेरे चलेईं तैस पुच्छू, “हे गुरू, केने पाप कियो कि ए कानो ज़रमो, एने मैने या एसेरे अम्मा बाजे?”

3 यीशुए जुवाब दित्तो, “न एने पाप कियो, न एसेरे अम्मा-बाजेई, पन तै एल्हेरेलेइ कानो ज़रमो ताके परमेशेरे चमत्कार एसमां लेईहोन।

4 ज़ैने अवं भेजोरोई, असेईं तैसेरू कम लुशी केरनू ज़रूरीए, ज़ैने कम तैनी असन दित्तोरूए, तै रात एजने बालीए ज़ैस मां कोई भी कम न केरि सके।

5 ज़ांतगर अवं दुनियाईं मां आई, अवं दुनियारी लौ आई।”

6 एन ज़ोइतां तैनी ज़मीनी पुड़ थुकू, ते तैस थुके सेइं मित्ती सन्नी, ते तै मित्ती कानेरे एच्छन पुड़ लाई।

7 ते तैस सेइं ज़ोवं, “गा शीलोह नंब्वेरे हावदे मां अपनू तुत्तर धो” (शीलोहेरे मतलब भेजरो) तैनी गेइतां धोवं, ते लांतो वापस अव।

8 तैखन तैस मैनेरे पड़ोसेईं त ज़ैनेईं तै भीख मगतो लावरो थियो, एक्की होरि सेइं ज़ोने लगगे, “कुन ई तैए मैन्हु नईं ज़ै पेइलो बिश्तां भीख मगतो थियो?”

9 किछ मैन्हु ज़ोने लाए, “ई तैए,” हारेईं ज़ोवं, “नईं तैसेरो ज़ेरो कोई होरो भोनेए,” तैनी ज़ोवं, “अवं तैए आई।”

10 तैखन तैना तैस पुच्छने लगगे, “तेरी एच्छन केन्चरां लौ आई?”

11 तैनी जुवाब दित्तो, “यीशु नंब्वेरे एक्की मैने मित्ती सन्नी, ते मेरी एच्छन पुड़ लेइतां मीं सेइं ज़ोवं, गा शीलोह हावदे मां गेइतां अपनू तुत्तर धो, ते अवं जेव ते मीं तुत्तर धोवं, ते लाने लाव।”

12 तेनेईं तैस पुच्छू, “तै मैन्हु कोइ आए?” तैनी ज़ोवं, “मीं नईं पतो।”

13 लोकेईं तै ज़ै पेइलो कानो थियो फरीसी लोकन कां नेव।

14 ज़ैस दिहाड़े यीशुए मित्ती सैनतां तैसेरी एच्छी लौ दित्तो थी, तै आरामेरी दिहाड़ी थी।

15 फिरी फरीसी लोकेईं तै तैस पुच्छू, “तैसेरी एच्छन लौ केन्चरे आई?” तैनी तैन सेइं ज़ोवं, “तैनी मेरी एच्छन पुड़ मित्ती लाई, फिरी मीं तुत्तर धोवं, ते अवं हुनी लाताई।”

16 एस पुड़ किछु फरीसी लोक ज़ोने लगे, “ए मैन्हु परमेशेरे तरफां नई, किजोकि ए आरामेरी दिहाड़ी न मन्ने।” हारेई ज़ोवं, “एरो ज़ेरो पापी मैन्हु एरे चमत्कार केन्चरे हिरेई बटते?” ते तैन एप्पू मांमेइं अनबन भोइ।

17 तैनेई काने फिरी पुच्छु, “ज़ैने तेरी एच्छुछी खोलोरेन, तू तैसेरे बारे मां कुन ज़ोतस?” तैनी ज़ोवं, “तै नबी आए।”

18 पन यहूदी लीडरन विश्वास न भोव, कि तै कानो थियो ते हुनी लाते, ज़ांतगर तैनेई, तैसेरे अम्मा-बाजी न कुजाए।

19 तैन पुच्छु, कुन एन तुश्शू मट्टूए, “ज़ैस तुस ज़ोतथ कि कानो ज़र्मोरू थियू? फिरी हुना केन्चरां लाते?”

20 तैसेरे अम्मा बाजीए जुवाब दित्तो, “असां त ज़ानतम कि एन इश्शू मट्टूए, ते कानो ज़र्मोरू थियू।

21 पन अस इन न ज़ानतम कि अज केन्चरे लाते, ते न इन ज़ानतम कि केने एसेरी एच्छुछन लौ दित्ती, एन हुनी बड्डूए एस पुच्छा, ए अपने बारे मां एप्पू ज़ोलो।”

22 एना गल्लां तैसेरे अम्मा बाजे एल्हेरेलेइ ज़ोई तैना यहूदी लीडरन करां डरते थिये, किजोकि यहूदी लीडर सारे अक भोरे थी, कि अगर कोई जोए, कि ए मसीहे त तै प्रार्थना घरे मरां कड्डो गाए।

23 एल्हेरेलेइ तैसेरे अम्मा बाजे ज़ोवं, “एन बड्डूए, एस्से पुच्छा।”

24 तैखन तैस मैन्हु ज़ै कानो थियो, दुइयोवं बार कुजेइतां ज़ोवं, “सन्न ज़ोइतां परमेशेरी बड्डयाई केर, अस ज़ानतम तै मैन्हु पापीए।”

25 तैनी जुवाब दित्तो, “अवं न ज़ैनी कि ए पापी कि नई, अवं अक गल ज़ानताई, कि अवं कानो थियो हुनी लाताई।”

26 तैनेई तैस पुच्छु, “तैने तीं सेइं कुन कियू? तैनी केन्चरे तेरी एच्छुछन लौ दित्ती?”

27 तैनी तैन सेइं ज़ोवं, “मीं त तुसन सेइं ज़ोवरूए, ते तुसेईं न शुनु, हुनी दुइयोवं बार किजो शुनु चातथ? कुन तुस भी तैसेरे चले बन्ने चातथ?”

28 तैखन तैना तैस बुरू भलू ज़ोने लाए, “तूए तैसेरो चेलोस, अस त मूसेरे चलेम।”

29 अस ज़ानतम परमेशेरे मूसा सेइं गल्लां की, पन एस न ज़ानम कि ए कोट्टां ओरोए।

30 तैनी तैन जुवाब दित्तो, “ए त बडी बड्डी गल्ले कि तुस न ज़ानाथ कि ए कोट्टां ओरोए, फिरी भी तैनी मेरी एच्छुछन लौ दित्ती।

31 अस ज़ानतम की परमेशर पापी केरि न शुने, पन कोई परमेशेरो भक्त भोए त तैसेरे मेर्जी पुड़ ज़लतो भोए, त परमेशर तै तैसेरी शुनते।

32 दुनिया रचनेरे वक्ते करां कथे शुन्ने मां नई ओरोए कि केन्चे ज़र्मनेरे कानेरी एच्छुछन लौ दित्तोरी,

33 अगर ए मैन्हु परमेशेरे तरफां न भोथो त किछु न केरि सकेथो।”

34 तैनेई तैस ज़ोवं, “तू त बिलकुल पापन मां ज़र्मोरिस, तू असन शिखालतस?” ते तैनेई तै प्रार्थना घरे मरां बेइरोवं कड्डो।



35 यीशुए शुनु कि ते बेइरोवं कड्डोरोए, ते ज़ैखन तैसेरी तैस सेइं मुलाकात भोइ, त तैस सेइं ज़ोवं, “कुन तू मैनेरे मट्टे पुड़ विश्वास केरतस?”

36 तैनी तैस जुवाब दित्तो, “हे प्रभु, मीं सेइं ज़ो कि तै कौने, ताके अवं तैस पुड़ विश्वास केरि?”

37 यीशुए तैस सेइं ज़ोवं, “अर्वे आई, तीं अवं पेइलो लोरोई, ज़ै तीं सेइं गल्लां केरि राओरोए।”

38 तैनी ज़ोवं, “हे प्रभु, अवं तीं पुड़ विश्वास केरताई।” ते तैस कां मथ्यो टेको।



39 तैखन यीशुए ज़ोवं, “अवं इस दुनियाई मां ई इन्साफ़ केरने ओरोई, ज़ैना न लान तैना लान, ते ज़ैना लातन तैना काने भोन ।”

40 ज़ैना फरीसी लोक तैस सेई साथी थिये तैनेई ज़ोवं, “कुन तू असन जो भी काने ज़ोतस?”

41 यीशुए तैन सेई ज़ोवं, “अगर तुस काने भोथे त पापी न भोथे, पन हुनी ज़ोतथ कि अस लातम, एल्हेरेलेइ तुशे पाप माफ़ न भोले ।”

## 10

~~~~~

1 “अवं तुसन सेई सच्च-सच्च ज़ोताई, कि ज़ै कोई दारेरे बत्तां बाड़े मां न गाए, पन होरि बत्तां गाते, तै च़ोर ते डैकूए ।

2 पन भैड्डां केरो पुहाल दारेरे बत्तां गाते ।

3 तैसेरेलेइ दरबान दार खोलते, ते भैड्डां तैसेरी गल पिशैनतिन, ते तै अपनि भैड्डन नव्वे सेई कुजाते ते बेइर नेते ।

4 ते ज़ैखन तै अपनि सैरी भैड्डां बेइर कढते, त तैन केरे अग्री-अग्री चलते, ते भैड्डां तैस पत्ती-पत्ती गैतिन, किजोकि तैना तैसेरी आवाज़ पिशैनचन ।

5 तैना बखलेरी पत्ती न गैली, पन तैस करां नशशेली, किजोकि तैना बखलेरी आवाज़ न पिशानन् ।”

6 यीशुए तैन सेई मिसाल देइतां ज़ोवं, पन तैनेई न समझू कि एसेरी गल्लां केरो कुन मतलबे, ज़ैना तै असन सेई ज़ोते ।

7 तैखन यीशुए तैन सेई फिरी ज़ोवं, “अवं तुसन सेई सच्च-सच्च ज़ोताई, भैड्डां केरू दार अव्वे आई ।

8 ज़ेत्तरे मीं करां पेइले आए सब च़ोर ते डैकून, पन मेरी भैड्डेई तैन केरि न शुनी ।

9 दार अवं आई, अगर कोई मेरे ज़िरिये अन्तर गालो, त परमेशर तैस मुक्ति देलो, ते तै अन्तर बेइर एइतो गालो ते खूराक पालो ।

10 च़ोर होरि कोन्ची कम्मरे लेइ न एज्जे, बल्के च़ोरी केरने ते मारने ते नाश केरने एइते, अवं एल्हेरेलेइ ओरोई कि तैन भरपूर ज़िन्दगी ज़ीन ।

11 रोड़ो पुहाल अव्वे आई, रोड़ो पुहाल भैड्डां केरे लेइ अपनि जान देते ।

12 ज़ैखन नौकर गिद एंडतू लाते त तै भैड्डां शैरतां नेशशी गालो । किजोकि तै तैन केरो न पुहाले न मालिके, ते गिद तैन पुइ हमलो केरतां तितर-वितर केरते ।

13 तै एल्हेरेलेइ नशते कि तै नौकर आए, ते तैस भैड्डां केरि फिकर नई ।

14 रोड़ो पुहाल अवं आई, अवं अपनि भैड्डां पिशानताई, ते मेरी भैड्डां मीं पिशैनचन ।

15 ज़ेन्च़रे बाजी मीं ज़ानाते, तेन्च़रे अवं भी तैस ज़ानताई, ते अवं भैड्डां केरे लेइ अपनि जान देताई ।

16 ते मेरी होरि भी भैड्डन, ज़ैना इस बाड़े मां नई, मीं तैना भी ऐनिन ज़रूरिन, तैना मेरी आवाज़ पिशैनेली, फिरी अक्के डेरो ते अक्के पुहाल भोनोए ।

17 अवं अपनि जान देताई, एल्हेरेलेइ बाजी मीं सेई प्यार केरते, कि अवं फिरी जीतो भोई ।

18 कोई मेरी ज़िन्दगी मीं करां न थसोड़े, बल्के अवं एप्पू देताई, मीं तैस देनेरू भी अधिकारे ते नेनेरो भी अधिकारे, ई हुकम मीं मेरे बाजी करां मैलोरोए ।”

19 एल्लां पत्ती, यहूदन मां फिरी अनबन भोइ ।

20 तैन मरां बड़े ज़ाने लाए, “तैस मां भूते, ते तै पागले, तैसेरी किजो शुनातथ?”


21 होरे लोकेई ज़ोवं, “एना गल्लां एरे मैनेरी नई ज़ैस मां भूत भोए, कुन भूत कांना केरि एछ्छी खोल्ली बटते?”

~~~~~

22 यरूशलम नगर मां तिहार भोवं, ते हीवतड़ेरो मौसम थियो ।

- 23 यीशु सुलैमानेरे मन्देरे अंगने मां हंठने फिरने लग्गोरो थियो ।
- 24 तैखन यहूदेई तै घेरो ते पुच्छू, “तू केइस तगर इश्शे दिले डामाडोल केरतस? असन सेइं साफ-साफ ज़ो । कुन तू मसीह आस?”
- 25 यीशुए तैन जुवाब दित्तो, “मीं तुसन सेइं ज़ोवं पन तुस विश्वास न केरथ । ज़ैना कम्मां अवं अपने बाजी केरे अधिकारे सेइं केरताई तैना मेरे गवाह आन ।
- 26 पन तुस एल्हेरेलेइ विश्वास न केरथ कि मेरी भैडडन मरां नई ।
- 27 मेरी भैडडन मेरी आवाज पिशैनचन, अवं तैन ज़ानताई, ते तैना मीं पत्ती-पत्ती ज़ेलचन ।
- 28 ते अवं तैन हमेशारी ज़िन्दगी देताई, तैना कधी नाश न भोले, ते कोई तैन मेरे हथ्ये मरां न थसोड़ी सके ।
- 29 मेरो बाजी, ज़ैनी तैना मीं दित्तोरिन, सेब्बन करां महान आए, ते कोई तैन बाजी केरे हथ्ये मरां न नेइ बटे ।
- 30 अवं त बाजी अक्के आम ।”
- 31 दुबारां फिरी, यहूदेई तैस घोडेव देनेरे लेइ फिरी घोड सल्ले ।
- 32 एस पुइ यीशुए तैन सेइं ज़ोवं, “मीं अपने बाजी केरे तरफां बड़ां रोड़ां कम्मां हिरां, तैन मरां कोस कम्मरे लेइ घोडेव देतथ?”
- 33 यहूदेई तैस जुवाब दित्तो, “रोड़ां कम्मां केरे लेइ अस तीं पुइ घोडेव नई केरने लेवरे, पन परमेशेरी तुहीन केरनेरे लेइ, एल्हेरेलेइ कि मैन्हु भोइतां अपनो आप परमेशर बनातस ।”
- 34 यीशुए तैन जुवाब दित्तो, “मूसेरे कानूने मां एन लिखोरू कि परमेशेरे अपने लोकां केरे लीडरन सेइं ज़ोवं कि तैना ईश्वरन ।
- 35 (तुसन पत्तोए पवित्रशास्त्रेरी गल कोई भी बेदली न बटे) अगर परमेशेरे तैन लोकन जो ईश्वर ज़ोवं ज़ैन कां परमेशेरू वचन पुज्जु,
- 36 फिरी तुस किजो ज़ोतथ कि तू तुहीन केरतस, ज़ैखन अवं ज़ोताई कि अवं परमेशेरू मट्टू आई? बाजी परमेशेरे अवं पवित्र ठहरइतां दुनियाई मां भेजो ।
- 37 अगर अवं अपने बाजेरू कम न केरि, त मेरो विश्वास न केरा ।
- 38 पन अगर अवं अपने बाजेरू कम केरताई, त चाए तुस मेरो विश्वास न भी केरा, पन तैन कम्मन पुइ विश्वास केरा । तैखन तुस बुज्जोले ते समझोले कि बाजी मीं मां आए, ते अवं बाजी मां आई ।
- 39 तैनेई फिरी तैस टूलानेरी कोशिश की, पन तै तैन करां ज़लो जेव ।”
- 40 फिरी यीशु यरदन दरियारे पार तैस ठैरी जेव, ज़ैड़ी यूहन्ना पेइले बपतिस्मो देतो थियो, ते तैड़ी राव ।
- 41 बडे लोक तैस कां एइतां ज़ोते थिये, “यूहन्ना त कोई चमत्कारी निशान न हिराव, पन ज़ैन किछू यूहन्ना एसेरे वारे मां ज़ोवं, तैन सब सच्च थियूं ।”
- 42 ते तैड़ी बडेई यीशु पुइ विश्वास कियो ।

## 11



- 1 मरियम ते तैसेरी बेइन माथरि ड्लव्वें बैतनिय्याह मां लाज़र नव्वेरो अक मैन्हु थियो
- 2 ई तैए मरियम थी ज़ैसां बादे मां प्रभु पुइ इत्र छेइतां अपने बालन सेइं तैसेरे पाव पूछोरे थी, एसेरो दूला लाज़र बिमार थियो ।
- 3 तैखन तैसेरी बेइने यीशु कां अक बिस्तार भेजो, “हे प्रभु, ज़ैस सेइं तू प्यार केरतस ते बिमारे ।”
- 4 ज़ैखन यीशुए एन शूनू त ज़ोवं, “ए बिमारी मरनेरे लेइ नई बल्के परमेशेरेरी महिमारे लेइ आए, ताके तैसेरे ज़िरिये परमेशेरे मट्टेरी महिमा भोए ।”
- 5 यीशु माथां ते तैसेरी बेइन मरियम ते लाज़रे सेइं प्यार केरतो थियूं ।
- 6 ज़ैखन यीशुए शूनू कि, लाज़र बिमारे, पन फिर भी दूई दिहाडे तैड़ी बिश्शो ज़ैड़ी तै थियो ।

- 7 दूई दिहैइना बाद यीशुए अपने चलन सेइं ज़ोवं, “एज्जा, अस फिरी यहूदिया इलाके मां गाम ।”
- 8 चले ज़ोने लगे, “हे गुरू, थोड़े च़िर पेइले यहूदी लीडर तीं घोड़ेईं बाते थिये, ते तू फिरी तैड़ी गानू चातस?”
- 9 यीशुए जुवाब दित्तो, “कुन दिहैड़ी मां 12 घंटे न भोन? ज़ै दीसां च़लते तैस ठोकर न लगे, एह्नेरलेइ कि तै दुनियारी लोईं मां च़ेलि सकते ।
- 10 पन अगर तै राती च़लते त आंधरे मां तैस ठोकर लगचे, किजोकि तैस कां लौ नईं।”
- 11 तैनी एना गल्लां ज़ोईं, ते अपने चलन सेइं ज़ोने लगे, “इशो दोस्त लाज़र झुलोरोए पन अव तैस बीझाने च़लोरोईं ।”
- 12 तैसेरे चले ज़ोने लगे, “हे प्रभु अगर तै झुलोरोए त तै बीझेलो ।”
- 13 यीशुए लाज़रेरे मरनेरे बारे मां ज़ोरू थियूं, पन तैसेरे चलेईं बुझू कि तैसेरो मतलब निड्लारे बारे मां झुलोरोए, पन अव तैस बीझाने च़लोरोईं ।
- 14 तैखन यीशुए रोडेच़ारे ज़ोवं, “लाज़र मेरि ज़ेवरोए ।
- 15 अव खुश आईं कि तुशे लेइ फैइदोए, कि अव तैड़ी न थियो ज़ैस सेइं विश्वास केरथ । हुनी एज्जा अस तैड़ी गाम ।”
- 16 तैखन थोमा ज़ैस जो दिदुमुस ज़ोतन, होरि चलन सेइं ज़ोने लगे, “एज्जा, अस भी तैस सेइं साथी मरनेरे लेइ गाम ।”

~~~~~

- 17 ज़ैखन यीशुए बैतनिय्याह इलव्वं मां पुज़्जो त तैस पतो लगे, कि लाज़र दब्बोरे च़ेवरे दिहाड़े भोरन
- 18 बैतनिय्याह यरूशलेम नगरेरां कोई टलाई किलोमीटर दूर थियूं ।
- 19 बड़े यहूदी लोक मारथा ते मरियमी कां तैन केरे दूला लाज़रेरे मरनेरां पत्ती तैना तसल्ली देने ओरे थिये ।
- 20 ज़ैखन मारथा शुनू कि यीशु ओरोए तै तैस सेइं मिलनेरे लेइ बेइर निस्सी, पन मरियम बेइर न निस्सी ।
- 21 मारथा यीशुए सेइं ज़ोने लगी, “हे प्रभु, अगर तू इड़ी भोथो त मेरो दूला न थियो मरनो ।
- 22 पन अव ज़ानती, हुनी ज़ैन किछ् तू परमेशेरे करां मगेलो, ते परमेशेरे तीं देलो ।”
- 23 यीशुए तैस ज़ोवं, “तेरो दूला ज़ीतो भोइ गानोए ।”
- 24 मारथा तैस सेइं ज़ोवं, “अवं ज़ानती तै आदालतरे दिहाड़े ज़ेइस सारे लोक ज़ीते भोनेन, तेइस तै भी ज़ीतो भोइ गानोए ।”
- 25 यीशुए तैस ज़ोवं, “मैनन् मुइदन मरां ज़ीते केरनेवालो अव्वं आईं । ज़ै मीं पुइ विश्वास केरते तै मरनेरां बाद भी ज़ीतो रालो ।
- 26 ते ज़ै कोई ज़ीतोए, ते मीं पुइ विश्वास केरते, तै कधे न मरेलो, कुन तू इस पुइ विश्वास केरचस?”
- 27 मारथा जुवाब दित्तो, “हाँ प्रभु, मेरो विश्वास तीं पुड़े, कि तू परमेशेरेरू मट्टू मसीह ज़ैन दुनियाईं मां एजनेबालू थियूं ।”

~~~~~

- 28 ज़ैखन तैसां ए गल ज़ोईं त तै वापस च़ली जेईं, ते अपनि बेइन मरियम कनारे कुजेइतां ज़ोने लगी, “गुरू जी ओरेन ते तीं कुजाने लगेरेन ।”
- 29 तै एन शुन्तां लूशी उट्टतां यीशु सेइं मिलने च़ली आईं ।
- 30 यीशु हेजू इलव्वं मां न थियो पुज़्जोरे, पन तै तैड़ी थियो ज़ैड़ी मारथा तैस सेइं मिलोरी थी ।
- 31 तैखन तैना यहूदी लोक ज़ैना मरियमी तस्सली देने ओरे थिये मरियम लूशी खड़ी उट्टतां बेइर जेईं, त तैना भी तैस पत्ती बेइर जे, कि भोइ सकते ए लेरां देने कबरी पुइ च़लोरिए ।

32 जैखन मरियम तैस ठारी पुज्जी जैड़ी यीशु थियो त तैस लेइतां तै तैसेरे पवन पुड़ बिच्छुड़ी जेई ते ज़ोने लगी, “हे प्रभु अगर तू इड़ी भोथो त मरो दूला न थियो मरनो।”

33 जैखन यीशुए तै ते तैस सेइं साथी एजनेबाले यहूदी लोक लेरां देते लाए, तै आत्माई मां उदास भोइतां बड़ो दुःखी भोव।

34 ते पुच्छ, “तुसेईं लाज़र कोडि रख्वोरोए?” तैना ज़ोने लगे, “हे प्रभु, असन सेइं साथी एइते एप्पू हेर।”

35 यीशु लेरां देने लगे।

36 तैखन यहूदी लोक ज़ोने लगे, “हेरा, ए लाज़रे सेइं केतरो प्यार केरतो थियो।”

37 पन तैन मरां किछ ज़ोने लगे, “कुन ज़ैनी कानेरी एच्छुछन लौ दित्ती, इन भी न केरि बट्ट, कि ए मैन्हु न मरेथो?”

~~~~~

38 यीशु दुखी दिले सेइं कबरी कां अव, तै अक कुद थी, जैस पुड़ अक घोड़ छुड़ोरो थियो।

39 यीशु ज़ोने लगे, “घोड़ खड़ो केरा।” मार्था ज़ै लाज़री बेइन थी तै ज़ोने लगी, “हे प्रभु एस मरां त मुशक लोरीए एजने, किजोकि एस च़ेवरे दिहाड़े मरें भोरन।”

40 यीशुए तैस सेइं ज़ोवं, किजोकि, “मीं तुसन न थियूं ज़ोरू कि अगर तेरो विश्वास भोलो, त तू परमेशेरी महिमा हेरली।”

41 तैखन तैनेई तै घोड़ घिसाव, ते यीशुए उवरे तेकतां ज़ोने लगे, “हे बाजी, अव तेरू शुक्र केरतां कि तीं मेरी शुनी।

42 अव ज़ानतो थियो, कि तू मेरी प्रार्थना शुन्तस पन अव एन लोकां केरे लेइ ज़ैना च़ेवरे पासन खेड़ोरेन एन ज़ोरू थियूं कि एना भी विश्वास केरन, कि तीं अव भेजोरोई।”

43 एन ज़ोनेरां पत्ती यीशुए ज़ोरे सेइं ज़ोवं, “लाज़र बेइर निस।”

44 ते तै मुओरो लाज़र बेइर निस्सो ज़ेसेरे हथ पाव कफने सेइं बंधोरे थिये ते दोगगे अक कपड़ो बंधोरो थियो। यीशुए तैन सेइं ज़ोवं, “एस खोल्ला ते एस गाने देथ।”

~~~~~

(~~~~~ 26:1-5; ~~~~~ 14:1-2; ~~~~~ 22:1-2)

45 बड़े यहूदी लोक ज़ैना मरियम सेइं मिलने ओरे थिये। ते तैसेरां इन्ना कम्मां हेरतां तैस पुड़ विश्वास कियो।

46 पन तैन मरां किछेई फरीसन कां गेइतां सब शुनावं ज़ैना यीशुए कियेरू थियूं।

47 एस पुड़ प्रधान याजकन ते फरीसी लोक महासभारे लोक अकोट्टे किये ते ज़ोने लगे, “अस कुन केरम? ए मैन्हु त इड़ी बड़े चमत्कार लोरोए केरने।

48 अगर अस एस हुन्ना न रोकमेले त सारे लोक तैस पुड़ विश्वास केरेले, कि ए मसीह आए, ते फिरी रोमेइं इड़ी एइतां इश्शे मन्दरे ते इश्शी कौमी दुइने नाश केरेले।”

49 तैखन तैन केरे टोली मरां अक ज़ेसेरू नवं कैफा थियूं, ज़ै तैस साल मन्दरेरो महायाजक थियो ज़ोने लगे, “तुस लोक किछ न ज़ानाथ,

50 तुसन इन न समझथ कि, तुश्शे लेइ रोडूए, इश्शे लोकां केरे लेइ अक मैन्हु मरे, न कि इश्शे सारे लोक।”

51 ए गल तैनी अपने आपे सेइं न थी ज़ोरी, पन तैस साल महायाजक भोइतां भविष्यद्वाणी, कि यीशु इस्एलरे सारे लोकां केरे लेइ अपनि जान देलो।

52 ते सिर्फ इस्एलरे लोकां केरे लेइ नई, पन एल्हेरेलेइ भी कि ज़ैना परमेशेरे बच्चे तितर-बितर भोरन तैन अकोट्टे केरतां अक बनाए।

53 बस्ता, यहूदी लीडरईं तैस दिहाड़ेरे बाद यीशु मारोरो इरादो कियो।

54 एल्हेरेलेइ यीशुए तैस वक्ते करां यहूदन मां बांदि मां न फिरो, पन जंगलेरे नेडे एप्रैम नगरे मां जेव, ते अपने चलन सेइं साथी तैड़ी राने लगो।

55 तेइस यहूदी केरू फ्रसह तिहार नेडे अव, ते बडे लोक आसेपासेरे इलाकन मरां यरूशलेम नगरे मांजो जले जे, ताके अपनो आप शुद्ध केरन।

56 तैना यीशु तोपते थिये तेइस तैना मन्दरे मां अकोट्टे भोए, ते एक्की होरि सेइं ज़ोने लगे, “तुस कुन समझतथ? कोई पत्तोए कुन तै इडी फ्रसह तिहारे मां एज्जेलो कि नई?”

57 ते प्रधान याजकेई ते फरीसी लोकेई हुक्म दित्तोरो थियो कि अगर केन्ची पतो लगे कि यीशु कोडि आए त ज़ोथ दे ताके असां तैस गिरफ्तार केरम।

## 12

XXXXXXXXXXXX

(XXXXXXXX 26:6-13; XXXXXXX 14:3-9)

1 फ्रसह तिहारे करां शा दिहाडे पेइले यीशु बैतनिय्याह इलव्वे मांजो ज़लो अव, ज़ैडी लाज़र रातो थियो, ज़ै यीशुए मुडदन मरां ज़ीतो कियोरो थियो।

2 तैड़ी तैनेई यीशुएरी खातरदारी केरनेरे लेइ धाम बनाई। ते मार्था सेवा लोरी थी केरने, लाज़र भी तैन मरां अक थियो ज़ैना यीशु सेइं साथी रोट्टी खाने बिश्शोरे थिये।

3 तैखन मरियमा जटामासी सेइं बनोरो अध्धो लीटर खुशबूदार इतर ज़ै बडो कीमती थियो, यीशुएरे पावन मल्लो, ते अपने दोगोरे बालन सेइं पोंछने लगी, ते सारू घर रोडी मुशकी सेइं भेरोई जेव।

4 पन तैसेरे चलन मरां अक यहूदा इस्करियोती नव्वेरो अक चेलो, ज़ैनी यीशु टलुवेवरो थियो ज़ोने लगे,

5 “ई इतर 300 दीनारन मां बेजतां गरीबन किजो न दित्तो?”

6 तैनी एना गल्लां एल्हेरेलेइ न थी ज़ोरी, कि तैस गरीबां केरो खियाल थियो, पन एल्हेरेलेइ ज़ोव कि तै ज़ोर थियो, तैस कां पेइसां केरि झोली भोती थी, ते ज़ैन किछ तैस मां रखते थी ते कढतो थियो।

7 यीशुए ज़ोव, “एस तंग न केरा, एसां वक्तेरे पेइले मेरी जान दब्वनेरी तिथारी कियोरीए।

8 किजोकि गरीब लोक त तुसन सेइं साथी सदा रातन, पन अवं तुसन सेइं साथी सदा नई रानो।”

XXXXXXXXXXXX

9 मेन्हु केरि बडी भीडी तैड़ी आई ज़ैखन तैनेई शुनू कि यीशु तैड़ी अव। तैना सिर्फ यीशु नई बल्के लाज़रे भी हेरने ओरे थिये, ज़ै तैनी मुडदन मरां ज़ीतो कियोरो थियो।

10 तैखन प्रधान याजके लाज़र भी मारनेरी सलाह की।

11 किजोकि बडे लोक यहूदी लीडरन करां ज़ले जे, ते तैनेई यीशु पुड विश्वास कियो।

XXXXXXXXXXXX

(XXXXXX 21:1-11; XXXXXX 11:1-11; XXXXX 19:28-40)

12 होरसां मेन्हु केरि बडी भीड तिहारे मां आई। ज़ैखन तैनेई शुनू कि यीशु भी यरूशलेम नगरे मां एजनेवालोए,

13 त तैनेई खजूरां केरि डेलडी हथ्यन मां रेखतां नहरे देते तैस सेइं मिलनेरे लेइ निस्से ते ज़ोने लगे, “होशाना (तारीफ़) धने इस्राएलेरो राज़ो, ज़ै प्रभुएरे नव्वे सेइं एडते।”

14 ज़ैखन यीशु अक गधरो बच्चो मैल्लो, ते तै तैस पुड बिश्तां यरूशलेम नगरे मांजो अव, ज़ेन्चरे पवित्रशास्त्रे मां लिखोरूए तेन्चरे एन भोवं,

15 “हे सिध्योनेरी कुई (यरूशलेमेरे लोक),

तू न डर, हेर,

तेरो राज़ो एज्जी राओरोए,

ते तै गधेरे बच्चे पुङ्ग च्चेदता एज्जी राओरोए ।”

16 पेडलू त यीशुएरे चेलैई किछ्च न समझू, पन ज़ैखन यीशुएरी महिमा बांदी भोइ, तैनेई तैना सैरी गल्लां याद की, एन सब गल्लां तैसेरे बारे मां लिखोरी थी, ते लोकेई एरो ज़ेरो सलूख कियोरो थियो ।

17 तैखन भीडरे लोकेई ज़ैना तैस सेइं थी, ई गवाही दिती, कि तैनी लाज़र कबरी मरां कुजाव, ते मुडन मरां ज़ीतो कियो ।

18 एल्हेरेलेइ लोक तैस सेइं मिलनेरे लेइ आए, किजोकि तैनेई शुनोरू थियूं, तैनी ई चमत्कार कियोरो ।

19 फरीसी लोक एन हेरतां एक्की होरि सेइं ज़ोने लगे, “सोचा, तुस लोक किछ्च नई केरि लोरे बटने, हेरा सारी दुनिया एस पत्ती च़ली ।”

### \*\*\*\*\*

20 ज़ैना लोक फ़सह तिहारे मां यरूशलेम नगरे मां आराधना करने ओरे थिये, तैन मां किछ्च यूनानी थिये ।

21 तैना फिलिप्पुसे कां जे ज़ै गलीलेरे नगर बैतसैदा मां रातो थियो, तै ज़ोवले हथ केरतां ज़ोने लगे, “जनाब अस यीशु सेइं मिलनू चातमा ।”

22 फिलिप्पुसे अन्दिरयासे सेइं ज़ोवं, ते अन्दिरयास फिलिप्पुसे सेइं साथी जेव ते यीशु सेइं ज़ोवं ।

23 यीशुए तैन जुवाब दिती, “कि मैनेरे मट्ठेरी यानी मेरी महिमा बांदी भोनेरो वक्त ओरोए ।

24 अवं तुसन सेइं सन्न-सन्न ज़ोताई, कि ज़ातगर गेहुं केरो ग्लेव मिती मां न मरें, तै अक्के रहते, पन ज़ैखन मरते ते बडो फल आनते, (तेन्च़रे मीं सेइं साथी भोनूए)\* ।

25 ज़ै अपनि जान ट़लारी रखते ते अपनि जान गुवाते, पन ज़ै अपनि जानी सेइं बैर रखते ते अक हमेशारी ज़िन्दगी बच़ालो ।

26 ज़ै कोई मेरी सेवा केरनि चाते ते तैसेरेलेइ ज़रूरीए तै मेरो चेलो बने, ताके ज़ैडी अवं आई तैडी मेरो सेवक भी भोए, ज़ै मेरी सेवा केरते मेरो परमेशर तैस इज्जत देलो ।”

### \*\*\*\*\*

27 “हुना मेरो दिल बडो उदास भोरोए । एल्हेरेलेइ अवं कुन ज़ोई? हे बाजी इस दुखेरी घेडी करां मीं बच़ा, पन अवं इस दुनियाई मां एल्हेरेलेइ ओरोई कि दुःख झेल्ली ।

28 हे बाजी तू केतरो महिमा बालोस इन बांदू केर ।” तैखन स्वर्गेरां अक आवाज़ अई, “मीं तेरी केतरी महिमा बांदी कियोरीए ते फिरी भी केरेलो ।

29 तैखन तैडी ज़ैना मैन्हु खडे भोइतां शुनी रावरे थिये, तैनेई ज़ोवं, गुडने लोरूए, ते होरेई ज़ोवं, “केन्चे स्वर्गदूते तैस सेइं गल की ।”

30 यीशुए ज़ोवं, “ई आवाज़ मेरे फैइदेरे लेइ नई बल्के तुशे लेइ आए ।

31 इस वक्त परमेशर दुनियारे लोकां केरो इन्साफ़ केरेलो, ते अवं इस शैतानेरी शक्ति नाश केरेलो ज़ै इस दुनियाई पुङ्ग राज़ केरते ।

32 ते ज़ैखन अवं ज़मीनी पुङ्ग उच्चे च़ादो गालो, तैखन अवं सैरी लोकन एप्पू कांजो आनेलो ।”

33 एन ज़ोइतां तैनी साफ़ च़ारे बांदू कियूं, ते तै केन्च़रां मरने बालो ।

34 एस पुङ्ग लोकेई ज़ोवं, “असेई मूसेरे कानूने मां ई गल शुनोरीए, कि मसीह हमेशा रानोए, फिरी तू केन्च़रे ज़ोतस कि मैनेरू मट्ठू उच्चे पुङ्ग च़दनू ज़रूरीए? एन मैनेरे मट्ठे कौने?”

35 यीशुए तैन सेइं ज़ोवं, “लौ! तुसन कां थोडे च़िरे तगरे आए, ज़ां तगर लौ तुसन साथीए, तांतगर च़लते राथ, एरू न भोए आंधरू तुसन घेरे, ज़ै आंधरे मां च़लते ते न ज़ाने तै कोरां च़लरोए ।

\* 12:24 यीशु अपने बारे ज़ोने लोरो थियो, कि केन्च़रां तैसेरे मरने ते ज़ीते भोनेरे बजाई सेइं होरि कोमां केरे लोक तैस पुङ्ग विश्वास केरेले । † 12:35 लौ: यीशु अपने बारे मां ज़ोने लोरो थियो ।

36 ज्ञातगर लौ तुसन सेइं साथीए, त लोई पुड़ विश्वास केरा ताके तुस लोअरे बच्चे बनथ ।” इना गल्लां जोइतां यीशु छेप्पी जेव ।

~~~~~

37 तैनी तैन केर सामने बड़ चमत्कार हिराए, फिरी भी तैनेई विश्वास न कियो ।

38 ताके यशायाह नेवेरू जोरू वचन पूरू भोए,

“हे परभु, केन्चे इश्शे खुशखेबरी पुड़ विश्वास न कियो,
ते बड़े लोकेई परमेशेरी शक्ति हेरतां भी कबूल न की ।”

39 एल्हेरेलेइ तैना विश्वास न केरि सके यशायाह एक्की होरि ठैरी ज़ोते:

40 “तैनी तैन केरि एछ्छी केनि की, ते मन सखत कियोरोए,

एरू न भोए कि तैना एछ्छन सेइं लान ते मने सेइं बुझन,

ते माफ़ी मगन ते अवं तैन बज्जेई ।”

41 यशायाह नबी एल्हेरेलेइ ज़ोतो थियो, कि तैनी यीशुएरी एजनेबाली महिमा लवरी थी, ते तैसेरे बारे मां गल भी की ।

42 फिरी भी लीडरन मरां बड़ेई यीशु पुड़ विश्वास कियो, पन फरीसी लोकां केरे वजाई सेइं बादे मां न थिये मन्ते, एरू न भोए कि असन प्रार्थना घरे मरां कढन ।

43 किजोकि मैन्हु केरि बड़्याई तैन परमेशेरी बड़्याई करां जादे रोड़ी लगती थी ।

~~~~~

44 तैखन यीशुए ज़ोरे सेइं ज़ोवं, “ज़ै कोई मीं पुड़ विश्वास केरते तै मीं पुड़ नई पन मेरे भेजने बाले परमेशेरे पुड़ विश्वास केरते ।

45 ते ज़ै मीं हेरते तै मेरे भेजने बाले हेरते ।

46 अवं दुनियाई मां अक लौ बेनतां ओरोई, ताके ज़ै मीं पुड़ विश्वास केरे तै आंधरे मां न रालो ।

47 अगर कोई मेरी गल्लां शुन्तां तैन पुड़ अमल केरे, त अवं तैस दोष न लेइलो, अवं दुनियारे लोकन पुड़ दोष लाने नई पन मुक्ति देने ओरोई ।

48 ज़ै मेरो इन्कार केरते ते मेरी गल्लां कबूल न केरे, तैस पुड़ दोष लानेबालो अक्के, मतलब ज़ैन वचन मीं जोरूए, तैन आखरी दिहाड़े तैस दोषी ठैरालू ।

49 किजोकि मीं अपने अधिकारे सेइं किछ नई जोरू, पन बाजी ज़ैने अवं भेजोरोई तैनी मीं हुकम दित्तोरोए, कि कुन-कुन जोई ते कुन-कुन शुनेई?

50 ते अवं ज्ञानताई कि तैसेरो हुकम मन्ने सेइं हमेशारी जिन्दगीए मैलतीए, एल्हेरेलेइ अवं तुसन सेइं तैन्ने ज़ोताई ज़ैन ज़ोनेरो हुकम मेरे बाजे मीं दित्तोरोए ।”

## 13

~~~~~

1 फ़सह तिहाररे पेइले दिहाड़ यीशुए ज़ैनीं छड़डू, कि मेरो दुनियाई मरां बाजी कां वापस गानेरो वक्त ओरोए । तै अपने लोकन सेइं ज़ैना दुनियाई मां थिये ज़ेरो प्यार केरतो थियो, तेरहो प्यार आखरी तगर केरतो राव ।

2 ज़ैताने शमौनेर मट्टे यहूदा इस्क्रियोतेरे दिले मां पेइले यीशु टलुवानेरो खियाल छड़ोरो थियो । यीशु त कने तैसेरे चले इलाई खानेरो लोरे थियो ।

3 यीशु पतो थियो कि बाजे सैरी चीजां तैसेरे हथ्थे मां दित्तोरिन, ते कने तै परमेशेरी तरफां ओरोए ते परमेशेरे कांजो वापस च़लरोए ।

4 एल्हेरेलेइ तै रोट्टी छेड़तां खड़ो उठो ते अपनू कोट खोल्लू, ते अक तोलियो अपने लखे सेइं पलैटो ।

5 तैखन तैनी अक भांड टलावं ते तैस मां पानी छाड़ु ते अपने चेलां केरे पाव धोइतां लखे बन्धोरे तोलिये सेइं पोछे ।

- 6 जैखन तै शमौन पतरस कां अव त पतरसे ज़ोवं, “हे प्रभु, कुन तू मेरे पाव धोने लोरस?”
- 7 यीशुए जुवाब दित्तो, “जैन अवं केरने लोरोई तू हुन्ना न बुझस, पन पत्ती तू बुझेलो।”
- 8 पतरसे तैस सेइं ज़ोवं, “तू मेरे पाव कधे न धोई सकस!” यीशुए तैस सेइं ज़ोवं, “अगर अवं तेरे पव न धोई, त तू मेरो चेलो नई।”
- 9 शमौन पतरस यीशु सेइं ज़ोने लगो, “हे प्रभु, तू मेरे पाव नई बल्के हथ ते दोग भी धो।”
- 10 यीशुए तैस सेइं ज़ोवं, “जैनी निहावरूए, तैस पावां केरे अलावा होरू धोनेरू किछ ज़रूरत नई। तै बिलकुल शुद्धे, ते तुस शुद्धथ, पन सारे नई।”
- 11 तै त टलुवाने बाले ज़ानतो थियो एल्हेरेलेइ तैनी ज़ोवं, “तुस सब शुद्ध नई।”
- 12 जैखन यीशुए सेब्बी केरे पाव धोए त अपनू कोट लेइतां अपनि ठैरी बिश्शो तैखन तैनी तैन पुच्छू, “कुन तुस समझतथ कि मीं तुसन सेइं कुन कियू?”
- 13 तुस मींजो गुरू, ते प्रभु ज़ोतथ, तुशू ज़ानू ठीके, किजोकि अवं आई।
- 14 अगर मीं तुशू गुरू त कने प्रभु भोइतां तुशू पाव धोए, त तुशू भी फर्जे कि एक्की होरेरे पाव धोथ।
- 15 किजोकि मीं तुसन अक नमूनो हिराव, कि जेन्चरे मीं पाव धोए तुस भी एरू केरथ।
- 16 अवं तुसन सेइं सन्न-सन्न ज़ोताई, कि नौकर अपने मालिके करां बड्डो न भोए, ते न भेजोरो भेजने बाले करां।
- 17 तुस त एना गल्लां ज़ानतथ, ते अगर तैन पुड अमल केरतथ त तुस धन आथ।
- 18 अवं तुसन सेब्बी केरे बारे मां न ज़ोई, जैना मीं चुनोरेन अवं तैन ज़ानताई, पन इन एल्हेरेलेइ आए, कि पवित्रशास्त्रेरू एन वचन पूरू भोए, जैने मेरी रोट्टी खाइ, तैए मेरे खलाफ भोव।
- 19 अवं तैन भोने करां पेइले तुसन ज़ोताई कि जैखन भोए त बिश्वास केरथ कि अवं तैए आई।
- 20 अवं तुसन सेइं सन्न-सन्न ज़ोताई कि, जै मेरे भेजोरे कबूल केरते तै मीं कबूल केरते, ते जै मीं कबूल केरते तै मेरे भेजनेबाले बाले कबूल केरते।”

XXXXXXXXXXXXXXXXXXXX XXXX XXXXX

(XXXXXXXX 26:20-25; XXXXXX 14:17-21; XXXX 22:21-23)

- 21 एना गल्लां ज़ोइतां यीशु आत्माई मां उदास भोइतां बड्डो दुःखी भोव, ते अपने चलन सेइं ज़ोने लगो, “अवं तुसन सेइं सन्न-सन्न ज़ोतां, कि तुसन मरां एक्के अवं टलुवानोई।”
- 22 चले एक्की होरेरे पासे तकने लगे, किजोकि तैन पतो न थियो कि ए केसेरे बारे मां ज़ोने लोरोए।
- 23 तैसेरे चलन मरां अक चेलो जैस सेइं यीशु प्यार केरतो थियो, यीशुएरे नेडे बिशोरो थियो।
- 24 तैखन शमौन पतरसे तैसेरे पासे इशारे सेइं पुच्छू, “ज़ो कसेरे बारे मां ज़ोने लोरोए?”
- 25 तैखन तेन्चरे यीशुएरे छैतरे पासे लिकतां पुच्छू, “हे प्रभु, तै कौने?”
- 26 यीशुए जुवाब दित्तो, “जैस अवं ई रोट्टरो टुकडो डोबतां देइलो तैए।” ते यीशुए टुकडो डोबतां शमौनेरे मट्टे यहूदा इस्करियोती दित्तो।
- 27 ते टुकडो नेनेरे पत्ती तै शैतानेरे बस्से मां भोइ जेव, तैखन यीशुए तैस ज़ोवं, “तीं जैन किछ केरनूए, लूशी केर।”
- 28 पन हारि केन्वी ए पतो न लगो कि ए गल यीशुए केसेरे बारे मां की।
- 29 यहूदा कां पेइसां केरी थेलडी भोती थी, ते किछेई समझू, कि यीशु तैस सेइं ज़ोते, कि जैन किछ असन तिहारैरे लेइ लोइते तैन धिन्ने, या गरीबन किछ दे।
- 30 तैखन यहूदा टुकडो खेइतां बेइर चलो जेव, तै रातरो वक्त थियो।

XXXXXXXXXXXXXXXXXXXX

- 31 जैखन तै बइर जेव त यीशु ज़ोने लगो, “हुनी मेनेरे मट्टे यानी मेरी महिमा भोइ, ते मेरे ज़िरिये परमेशेरी महिमा भोइ,

32 ते परमेशर भी मीं एप्पू महिमा बालो केरेलो, बल्के जल्दी केरेलो।

33 हे मेरे दोस्तव, अवं किछ् चिरेरे लेइ हेजू तुसन सेइं साथी आई, फिरी तुस मीं तोप्येले, ते जेन्चरे मीं यहूदन भी ज़ोवं, ज़ैड़ी अवं गाताई तैड़ी तुस न एज्जी बटथ, तेन्चरे अवं तुसन सेइं भी ज़ोताई ।

34 अवं तुसन अक नंच्यो हुकम देताई कि, एक्की होरि सेइं प्यार केरा, जेन्चरे मीं तुसन सेइं प्यार कियो तुस भी एक्के होरि सेइं प्यार केरा ।

35 अगर तुस एक्के होरि सेइं प्यार केरेले त सेभी लोकन पतो लगगेलो, कि तुस मेरे चेलेथ ।”

~~~~~

(~~~~~ 26:31-35; ~~~~~ 14:27-31; ~~~~~ 22:31-34)

36 शमौन पतरसे तैस पुचछ्, “हे प्रभु तू कोरां च़लोरोस?” यीशुए जुवाब दित्तो, “जेरां अवं च़लोरोई तू हुना मीं सेइं साथी न एज्जी सकस, पन वादे मां एज्जी सकतस ।”

37 पतरसे ज़ोवं, “हे प्रभु अवं हुना तीं सेइं साथी किना एज्जी सेखी? अवं त तेरे लेइ अपनि जान भी देनेरे लेइ तियार आई ।”

38 यीशुए जुवाब दित्तो, “कुन तू मेरे लेइ अपनि जान देलो, अवं तीं सेइं सच़-सच़ ज़ोताई कि कुकड़ बांग़ देने करां पेइले तू मेरो टूलेइ बार इन्कार केरेलो ।”

## 14

~~~~~

1 “तुश़ो दिल उदास न भोए, तुस परमेशेरे पुड़ विश्वास केरतथ, मीं पुड़ भी विश्वास केरा ।

2 मेरे बाजरे घरे मां बड़े कमरेन, अगर न भोथी त अवं तुसन सेइं ज़ोथो, किजोकि अवं तुश़े लेइ ठार तियार केरने च़लोरोई ।

3 अगर गेइतां तुश़े लेइ ठार तियार केरि त वापस एइतां तुसन एप्पू सेइं साथी नेलो, ताके ज़ैड़ी अवं भोलो तुस भी तैड़ी भोथ ।

4 ते जेरां अवं च़लोरोई तुस तैठेरी बत ज़ानतथ ।”

5 थोमा तैस ज़ोवं, “हे प्रभु, असन नई पतो तू कोरां च़लोरोस, ते फिरी बत केन्चरे ज़ानम?”

6 यीशुए तैस सेइं ज़ोवं, “बत, सच़्ची ते हमेशारी जिन्दगी अच़्चे आई, कोई मेरे ज़िरियेरे बगैर बाजी कां न एज्जी सके ।

7 अगर तुसेईं अवं पिशानोरो भोथो त मेरे बाजी भी पिशानेथे, पन हुनी तुस तैस ज़ानतथ ते कने लाव भी ।”

8 फ़िलिप्पुसे तैस सेइं ज़ोवं, “हे प्रभु असन बाजी हिरा, तैन्ने इश़े लेइ बडू आए ।”

9 यीशुए तैस सेइं ज़ोवं, “फ़िलिप्पुस, एतरे च़िरे अवं तुसन सेइं साथी राव कुन तू मीं न ज़ानस ज़ैनी अवं लाव तैनी बाजी भी लाव तू किजो ज़ोतस असन बाजी हिरा?

10 कुन तू विश्वास न केरस, कि अवं बाजी मां आई ते बाजी मीं मां आए? अवं ज़ैना गल्लां तुसन सेइं ज़ोताई तैना गल्लां अवं अधिकारे सेइं न ज़ोई, बल्के बाजी मीं मां रेइतां अपनू कम केरते ।

11 मेरो विश्वास केरा, कि अवं बाजी मां आई ते बाजी मीं मां आए, नई त ज़ैना कम्मां केरताई तैन हेरतां मीं पुड़ विश्वास केरा ।”

12 अवं तुसन सेइं सच़-सच़ ज़ोताई, “कि ज़ै मीं पुड़ विश्वास केरते, एना कम्मां ज़ैना अवं केरताई तै भी केरेलो, बल्के मीं करां भी बडां कम्मां केरेलो, किजोकि अवं बाजी कां च़लोरोई ।

13 ज़ैन किछ् तुस मेरे नंच्ये सेइं मगले अवं तुसन देलो कि बाजी केरि महिमा मटठेरे वजाई सेइं बांदी भोए ।

14 अगर तुस मेरू नंच्ये सेइं किछ् भी मगलेले त अवं तैन केरेलो ।”

~~~~~

15 “अगर तुस मीं सईं प्यार केरतथ त मेरे हुकमन मन्नेले ।

16 ते अवं बाजी कां प्रार्थना केरेलो ते ते तुसन अक महतगार देलो कि हमेशा तुसन सेइं साथी रालो ।

17 मतलब तै आत्मा जै परमेशेरे बारे मां सच्च बांदू केरेली, जै दुनिया कबूल न केरि सके, किजोकि न तैस लेइहोए न ज्ञाने, तुस तैस ज्ञातथ किजोकि तै तुसन साथी रहती, तै तै तुसन मां भोली ।

18 अवं तुसन अकैल्लो न शेरलो बल्के अवं तुसन कां एज्जेलो ।

19 ई दुनिया किछ चिरेरां बाद मीं न लाएली, पन तुस मीं लांते राले, किजोकि अवं ज़ीतोई ते तुस भी ज़ीते राले ।

20 ज़ैखन अवं ज़ीतो भोलो तेइस तुसन पतो लग्गेलो, कि अवं अपने बाजी मां आई ते तुस मीं मां आथ ते अवं तुसन मां आई ।

21 ज़ैस कां मेरे हुक्म आन ते तैन मन्ते, त तैए मीं सेइं प्यार करते ते मेरो बाजी तैस सेइं प्यार केरेलो, ते अवं तैस सेइं प्यार केरेलो, ते अपनी आप तैस पुड़ बांदो केरेलो ।”

22 तेखन यहूदा (ते यहूदा इस्करियोती न थियो बल्के हारो चेलो थियो) तैस सेइं ज़ोवं, “हे प्रभु कुन भोव कि तू अपनी आप असन पुड़ बांदो केरनो चातस ते दुनियारे लोकन पुड़ नई?”

23 यीशुए जुवाव दित्तो, अगर कोई मीं सेइं प्यार करते त तै मेरी शिक्षाई मन्ते, ते मेरो बाजी भी तैस सेइं प्यार केरेलो, ते अस तैस कां एज्जमेले ते तैस सेइं साथी रामेले ।

24 ज़ै मीं सेइं प्यार न केरे, तै मेरे शिक्षाई न मन्ते, ज़ै शिक्षा तुस शुन्ने लोरेथ, मेरी नई पन मेरे बाजी केरि ज़ेने अवं भेजोरोई ।

25 एना सैरी गल्लां मीं तुसन साथी रेइतां ज़ोई ।

26 पन तै मद्दतगार यानी पवित् आत्मा ज़ैस बाजी मेरे ठैरी भेजेलो, तुसन सैरी गल्लां शिक्षालेलो, ते हर गल ज़ै मीं तुसन सेइं ज़ोरी याद करालो ।”

27 अवं तुसन शान्ति देइतां ज़ै मीं कां आए, जेन्चरे दुनिया देचे तेन्चरे नई, तुशुओ दिल उदास न भोए ते न डेरथ ।

28 तुसेईं शुनु, मीं तुसन सेइं ज़ोवं, अवं गाताई तुसन कां फिरी एज्जेलो अगर तुस मीं सेइं प्यार करते भोते त खुशी भोने थिये, कि अवं बाजी कां ज़लोरोई किजोकि बाजी मीं करां बड़ोए ।

29 मीं सैरी गल्लां पेइले तुसन ज़ोरिन कि ज़ैखन तैना पूरी भोन त तुस विश्वास केरेले ।

30 हुनी अवं तुसन सेइं जादे गल्लां न केरेलो, किजोकि शैतान एइते, ज़ै इस दुनियाई पुड़ राज़ केनेबालोए । मीं पुड़ तैसेरो किछ अधिकार नई ।

31 जेन्चरे बाजीए मीं हुक्म दित्तो, अवं तेन्चरे केरताई । पन एन एल्हेरेलेइ भोते कि दुनिया ज्ञाने, कि अवं बाजी सेइं प्यार केरताई । ते उठा इट्ठां ज़लम ।

## 15

**CHAPTER 15**

1 यीशुए ज़ोवं “अवं दाछारू सच्च बड़ह अर्वे आई, ते मेरो बाजी बागवाने ।

2 ज़ै डालड़ी मीं मां आए, ते तैस फल न लगे, तै कट्टी गानीए, ते ज़ैस फल लगते तैस छांटते कि जादे फल लगे ।

3 तुस तैस शिक्षाई सेइं ज़ै मीं तुसन दित्तोरीए शुद्ध आथ ।

4 तुस मीं मां बनोरे राथ, ते अवं तुसन मां, जेन्चरे डालड़ी अगर बड़हे सेइं बनोरी न राए, त अपने आप सेइं तैस फल न लगे । तेन्चरे तुसन भी अगर मीं मां बनोरे न राले त तुस फलदार न भोइ सकेले ।

5 अवं दाछारू बड़ह आई, तुस डेलड़ी आथ, ज़ै मीं मां बनोरो रहते तैस खूव फल लगते, किजोकि मीं करां अलग भोइतां तुस किछ न केरि सखत ।

6 अगर कोई मीं मां बनोरो न राए, त तैस डेलड़ारो ज़ेरोए ज़ैस केटतां शारतन, ते शुक्की गाचे, ते लोक घेरतां अग्गी मां फुकी छडतन ।

7 अगर तुस मीं मां बनोरे रातथ ते मेरी गल्लां तुसन मां बेनोरी रैतिन त ज़ैन चाहेले ते मगले तुसन दित्तू गालू ।

- 8 मेरे बाजेरी महिमा एसमां आए कि तुस हछो फल आनां, फिरी तुस मेरे चले भोले ।  
 9 जेन्चरे बाजे मीं सेइं प्यार कियो, तेन्चरे मीं भी तुसन सेइं प्यार कियो । मेरे प्यारे मां बनोरे राथ ।  
 10 अगर तुस मेरे हुक्मन मन्नेले, त मेरे प्यारे मां बनोरे राले, जेन्चरे मीं अपने बाजेरे हुक्म मन्ने, ते तैसेरे प्यारे मां बनोरो राव ।  
 11 मीं एना गल्लां एल्हेरेलेइ तुसन ज़ोरिन, कि मेरी खुशी तुसन मां बनोरी राए ।”  
 12 “मेरो हुक्मे ई आए जेन्चरे मीं तुसन सेइं प्यार कियो, तुस भी एककी होरि सेइं प्यार केरा  
 13 एस करां जादे प्यार केन्चे नईं कियोरो, कि कोई अपने दोस्तां केरे लेइ अपनि जान दे ।  
 14 ज़ै हुक्म अवं देताई, अगर तुस तैस मन्नाथ, त मेरे दोस्त आथ ।  
 15 अज़्जेरे बाद अवं तुसन जो नौकर न ज़ोइलो, किजोकि नौकर न ज़ाने कि तैसेरो मालिक कुन केरते । मीं तुसन जो दोस्त ज़ोरूए, किजोकि ज़ैन किछ् मीं बाजी करां शुनोरूए तुसन भी शुनावरू आए ।  
 16 तुसेईं अवं नईं चुनोरो पन मीं तुस चुनोरेथ ते ठहरावरे भी आथ, ताके तुस गेइतां फल आनथ, ते तुश्शो फल बनोरो राए, कि तुस मेरे नव्ये सेइं बाजी करां ज़ैन किछ् मगथ, तै तुसन देलो किजो तुस मेरे चलेथ ।  
 17 अवं इन गल्लां केरो हुक्म एल्हेरेलेइ देताई, कि तुस एककी होरि सेइं प्यार केरा ।”



- 18 “अगर दुनियारे लोक तुसन सेइं दुश्मनी रखतन, त याद रखा कि तैनेईं पेइले मीं सेइं दुश्मनी रखोरी ।  
 19 अगर तुस दुनियारे भोथे, त दुनिया अपने लोकन सेइं प्यार केरती, पन हुनी तुस दुनियारे लोक नईं किजोकि मीं तुस दुनियाईं मरां चुनोरेथ तांए दुनियारे लोक तुसन सेइं दुश्मनी रखतन ।  
 20 तै गल ज़ै मीं तुसन सेइं ज़ोरी थी याद रख्वा, नौकर अपने मालिके करां बड्डो न भोए, अगर दुनियां अवं सतेवरोईं त तैना तुसन भी सताले, अगर तैनेईं मेरी गल्ली पुइ अमल कियू त तुश्शी गल्ली पुइ भी अमल केरेले ।  
 21 पन तैना लोक तुसन सेइं एरो ज़ेरो बर्ताव केरेले, किजोकि तुस मेरे चलेथ । तैना मेरे भेज्जेने बाले परमेशरे न ज़ानन् ।  
 22 अगर मीं एइतां तैन सेइं गल्लां न भोथी कियोरी त तैना पापी न थिये भोने, पन हुनी तैन केरे पापेरो तैन कां कोई बहानो नईं ।  
 23 ज़ै मीं सेइं दुश्मनी रखते, ते तै मेरे बाजी सेइं भी दुश्मनी रखते ।  
 24 अगर मीं तैन केरे सामने तैना चमत्कार न भोथे कियोरे, ज़ैना कधी होरे केन्चे नईं कियोरे त तैना पापी न थिये भोने, पन हुनी तैनेईं सब किछ् लाव, ते मीं भी ते बाजी सेइं दुश्मनी रख्वी ।  
 25 पन एन एल्हेरेलेइ भोवं कि तैन केरे कानूने मां लिखोरी तै गल पूरी भोए, तैनेईं मीं सेइं खामखा दुश्मनी रख्वी ।  
 26 पन ज़ैखन ते महत्तगार एज्जेलो ज़ैस अवं अपने बाजेरे तरफां भेज्जेलो, मतलब सच्चैरी आत्मा, ज़ै बाजी केरि तरफां एइतीए, तै मेरी गवाही देली ।  
 27 ते तुस भी गवाह आथ किजोकि तुस भी शुरू करां मीं सेइं साथी थिये ।”

## 16

- 1 “मीं तुसन एना सैरी गल्लां एल्हेरेलेइ ज़ोईं कि तुश्शो विश्वास न ट्लुटे ।  
 2 तैनेईं तुस प्रार्थना धरन मरां कढनेथ, खास केरतां एरो ज़ेरो वक्त एज्जी राहोरोए, ज़ै तुसन मारेलो तै इन समझेलो कि तै परमेशेरी सेवा करने लोरोए ।  
 3 तैन एन सब एल्हेरेलेइ केरेले कि न तैनेईं कधी मेरो बाजी ज़ानो ते न कधी अवं ।

4 पन मीं एना सैरी गल्लां एल्हेरेलेइ तुसन सेइं ज़ोई, कि ज़ैखन तैना पूरी भोनेरो वक्त एज्जेलो, त तुसन याद एज्जे, कि मीं तुसन एन पेडलू ज़ोरू थियूं, ज़ेइस तुस मेरे चले बनोरे थिये। मीं एना गल्लां केरे बारे मां पेडलू एल्हेरेलेइ न ज़ोवं, कि अवं एप्पू तुसन सेइं साथी थियो।”

~~~~~

5 “पन हुन्ना अवं अपने भेजने बाल कां ज़लोरोई, पन तुसेईं केन्वे भी न पुच्छू कि तू कोरां ज़लोरोस?

6 पन मीं तुसन सेइं ज़ोई छ्डेरूए एल्हेरेलेइ तुशशो मन उदास आए।

7 फिरी भी अवं तुसन सेइं सन्न ज़ोताई कि मेरू इट्टां गानू तुशशे लेइ फैडदोए, अगर अवं न गेइलो त तै मदतगार तुसन कां नई एजोनो, पन अवं ज़लो जेव त तैस अवं तुसन कां भेज्जी देलो।

8 ते ज़ैखन तै एज्जेलो त दुनियाई पाप ते धार्मिकता ते इन्साफेरे बारे मां सब किछ् बांदू केरेलो।

9 पापेरे बारे मां एल्हेरेलेइ कि दुनियां मीं पुड़ विश्वास न कियो,

10 धार्मिकतारे बारे मां एल्हेरेलेइ कि अवं वापस बाजी कां ज़लोरोई ते तुसेईं अवं फिरी नई लहनो,

11 इन्साफेरे बारे मां एल्हेरेलेइ कि, शैतान ज़ै दुनियाई पुड़ राज़ केरेनेबालो मुज्रम बनोरोए।”

12 “अवं तुसन सेइं होरू भी बड़ किछ् ज़ोनू चाताई, पन हुन्ना तुसेईं तैन झैली नई बटनू।

13 पन ज़ैखन तै मतलब सच्चेरी आत्मा एज्जेली त तै सच्चेरी बत हिराली, किजोकि तै अपने तरफां न ज़ोली, पन ज़ैखन किछ् परमेशेरे करां शुनेली तैन्ने ज़ोली, ते एज्जे बैली गल्लां ज़ोली।

14 ते मेरी महिमा केरेली किजोकि तै मेरी गल्लां ज़ोली, किजोकि तै मेरी गल्लन मरां तुसन सेइं ज़ोली।

15 ज़ैन किछ् बाजी केरूए, तैन सब मेरूए, एल्हेरेलेइ मीं ज़ोवं, कि तै मेरी गल्लन मरां शुनालो।”

~~~~~

16 “थोड़े च़िरेरां पत्ती तुसेईं अवं फिरी नई लहनो, ते तैसेरे थोड़े च़िरेरां पत्ती तुसेईं अवं फिरी लांनोई।”

17 तैखन तैसेरे किछ् च़ेलेई एप्पू मामेइं ज़ोवं, इन कुने, “ए कुन ज़ोते, थोड़े च़िरेरां पत्ती तुस मीं न लाएले, ते फिरी थोड़े च़िरेरां पत्ती तुस मीं लाएले? कि अवं बाजी कां गाताई?”

18 तैखन तैनेईं ज़ोवं, “थोड़े ज़ेरे च़िरेरां बाद, एन ज़ै ए ज़ोते, कुन आए? अस न ज़ानम कि कुन?”

19 यीशुए एन ज़ैनतां, कि एना मीं पुछ्णू चातन, “कुन तुस मेरी इस गल्लरे बारे मां एप्पू मामेइं गलबात केरने लोरेथ, कि एस गल्लारो कुन मतलबे, थोड़े च़िरेरां पत्ती मीं न लाएले, ते फिरी थोड़े च़िरेरां पत्ती लाएले?”

20 अवं तुसन सेइं सन्न-सन्न ज़ोताई, कि तुस लेरां देले ते शोग बनाले, पन दुनियारे लोक खुशी भोले, पन ज़ैखन तुस मीं दुबारां लाएले त तुशशो दुःख, खुशी मां वेदलोई गानोए।

21 ज़ैखन कुआन्श ज़ातीए त तैस बड़ी तकलीफ भोतीए, किजोकि तैसेरे दुःखेरी घड़ी नेडे पुजोरीए, पन ज़ैखन बच्चो ज़र्मते त एस खुशी मां कि दुनियाई मां अक मैन्हु पैदा भोरोए अपनि तकलीफ बिस्सरी गाचे।

22 ते तुसन भी हुन्ना तेरही तकलीफे, पन अवं तुसन सेइं फिरी मिलेलो, ते फिरी तुशशे मने मां खुशी भोली, ते खुशी तुसन करां कोई न नेही सकेलो।

23 तैस वक्ते तुस मीं कोई किछ् न पुछ्खेलो, अवं तुसन सेइं सन्न-सन्न ज़ोताई, तुस मेरे नंवे सेइं बाजी करां ज़ैन किछ् मगथ, तै तुसन देलो किजो तुस मेरे च़ेलेथ।

24 तुसेईं मेरू नवं घिन्तां हुना तगर बाजी करां किछ् नई मगेरू, मगेले त तुसन मैल्ली गालू, ते तुशशी खुशी पूरी भोली।”

~~~~~

25 “अवं तुसन एना गल्लां मिसाल देइतां ज़ोताई, पन तै वक्त ओरोए कि अवं कहैन्न मां फिरी न ज़ोइलो, पन रोड़ च़ारे बाजेरे बारे मां तुसन सेइं गल्लां केरेलो।

- 14 मीं तैन तेरू वचन तैन कां पुजेवरुए, ते दुनियारे लोकेई तैन सेइं दुश्मनी रख्खी, किजोकि जेन्चरे अवं दुनियारो नई, तैना भी नई ।
- 15 मेरी प्रार्थना ई नई कि तू तैन दुनियाई मरां ने, पन तू तैन शैताने करां बचेइतां रख ।
- 16 जेन्चरे अवं दुनियारो नई तैन भी इस दुनियारे नई ।
- 17 तेरू वचन सच्चे । सच्चेरे जिरिये सेइं तैन पवित्र केर ।
- 18 जेन्चरे तीं अवं दुनियाई मां भेजोरोई तेन्चरे मीं भी तैना दुनियाई मां भेजोरेन ।
- 19 अवं अपनो आप तैन केरे लेइ पवित्र करताई, ताके तैना भी सच्चेरे जिरिये सेइं पवित्र भोन ।”

????? ?????? ???? ???? ?????? ?????????

- 20 “मेरी प्रार्थना सिफे चले केरे लेइ नई, पन तेन केरे लेइ भी जैना तैन वचनेरे जिरिये मीं पुइ विश्वास केरेले ।
- 21 कि तैना सब अक भोन, जेन्चरे तू बाजी मीं मां आस, ते अवं तीं मां आई तेन्चरे तैना असन मां भोन, एल्हेरेलेइ दुनियारे लोक विश्वास केरन, कि तींए अवं भेजोरोई ।
- 22 ते तै महिमा जै तीं मीं दित्तोरीए, कि जेन्चरे अस अक आम तैन भी अक भोन ।
- 23 अवं तैन मां भोइलो, ते तू मीं मां भोलो, ताके तैन पूरो अकीजो भोए, ते दुनिया ज्ञाने कि तीं अवं भेजोरोई । जेन्चरे तीं मीं सेइं प्यार कियो, तेन्चरे तीं तैन सेइं भी प्यार कियो ।
- 24 हे बाजी अवं चाताई कि जैना तीं मीं दित्तोरेन, जैड़ी अवं आई तैड़ी तैना भी मीं सेइं साथी भोन, कि तैना भी मेरी महिमा हेरन, जै तीं मीं दित्तोरीए । दुनियारे रचने करां भी पेइले तीं, मीं सेइं प्यार कियोरोए ।
- 25 हे धर्मी बाजी, दुनियां तू न पिशानो, पन मीं तू पिशानो, ते तैन चलेई भी अवं पिशानो कि तीं अवं भेजोरोई ।
- 26 मीं तैन पुइ बांदू कियूं, कि तू कौन आस, ते बांदू केरतो रालो, जैस प्यारे सेइं तीं मीं प्यार कियो, ते तैन मां भोए, ते अवं तैन मां बनोरो रेई ।”

18

???? ?????????

(????? 26:47-56; ?????? 14:43-50; ?????? 22:47-53)

- 1 यीशुए ए प्रार्थना करतां झाड़ी, त अपने चलन सेइं साथी किद्रोन वैदरे पार जेव । तैड़ी अक बाग थी ते ते तैसेरे चले तैड़ी जे ।
- 2 तैस टलुवाने बालो यहूदा तैस ठारारो बाकम थियो, किजोकि यीशु अपने चलन सेइं साथी तैड़ी केही फेरेई जोरो थियो ।
- 3 तैखन यहूदे, रोमी सिपाही ते किछू प्रधान याजक ते फरीसी केरे तरफां भेजोरे लोकन सेइं साथी एन्तां दीये ते मिसालां ते हथियार घिन्तां तैड़ी पुजाए ।
- 4 तैखन यीशु सब गल्लां जैना तैस सेइं भोनेबैली थी, बुझतां तैन सेइं जोने लगे, “तुस केस लोरेथ तोपने?”
- 5 तैनेई तैस जुवाब दित्तो, “यीशु नासरी ।” यीशुए तैन सेइं ज़ोवं, “अवं तैए आई ।” तैस टलुवाने बालो यहूदा भी तैन सेइं साथी खड़खड़ो थियो ।
- 6 जैखन यीशुए ज़ोवं, “अवं तैए आई,” तैना पत्रोवं ज़मीनी पुइ झड़े ।
- 7 एल्हेरेलेइ तैनी फिरी पुच्छू, “तुस केस लोरेथ तोपने?” तैनेई जुवाब दित्तो, “यीशु नासरी ।”
- 8 यीशुए जुवाब दित्तो, “मीं त ज़ोवं कि अवं तैए आई, अगर तुस मीं तोप्पतथ, त एन लोकन गाने देथ ।”
- 9 एन एल्हेरेलेइ भोवं, कि तैन वचन पूरू भोए, “जैना तीं मीं दित्ते, तैन मरां मीं अक भी न हिरव ।”
- 10 शमौन पत्रसे कां अक तलवार थी, तैनी तलवार केढतां महायाजकेरे नौकेरे बाई ते तैसेरो देइने कन्न केढव । तैस नौकेरे नवं मलखुस थियूं ।

11 तैखन यीशुए पतरसे ज़ोवं, “अपनि तलवार मियाने मां रख, कुन अवं तै दुखेरो कटोरो न पीं जै मेरे बाजे मीं पीनेरे लेइ दितोए?”

????? ???? ???? ?

12 तैखन रोमी फौवजी ते तैन केरे सूबेदार ते यहूदी केरे लीडरेई यीशु टलाव तै बंधे ।

13 ते पेइलो हन्ना कां नीयो किजोकि तै कैफारो शेरहो थियो जै तैस सालेरो महायाजक थियो ।

14 ई तैए कैफाए जैनी यहूदन सलाह दित्तोरी थी, कि इश्ये लोकां केरे लेइ एक्की मैनेरू मरनू रोइ आए ।

????????? ???? ???? ?

(????? 26:69-70; ???? 14:66-68; ???? 22:55-57)

15 शमौन पतरस ते अक हारो चेलो यीशु पत्ती जे । तै चेलो महायाजकेरो बाकम थियो, तै यीशु सेइं साथी महायाजकेरे अंगने मां जेव ।

16 पन पतरस बेइर दारे पुइ खडो थियो, तै हारो चेलो जै महायाजकेरो बाकम थियो वापस अव, ते तैस नौकरैनी सेइं जै दारे पुइ थी गल केरतां पतरस अन्तर नीयो ।

17 तैस नौकरेनां जै दारे पुइ थी पतरसे पुच्छू, “कुन तू भी तैसेरे चलन मरां आस?” पतरस ज़ोवं, “नई अवं नई ।”

18 ठंडारे वजाई सेइं नौकरेई ते मन्देरे परहरदारेई अग बालोरी थी, ते पतरस भी तैन सेइं साथी अग लोरो थियो तपने ।

????????? ???? ???? ?

(????? 26:59-66; ???? 14:55-64; ???? 22:66-71)

19 तैखन महायाजक यीशुएरे चेलां त कने तैसेरी शिक्षारे बारे मां पुच्छने लगे ।

20 यीशुए जुवाव दित्तो, “मीं त सेबमी केरे सामने सैरी गल्लां कियोरिन, मीं त रोज तुश्ये प्रार्थना धरन ते मन्देरे मां, ते जैइं यहूदी अकोट्टे भोतन तैइं शिक्षा दित्ती, ते छपतां किछ भी न ज़ोवं ।

21 तू मीं ए सवाल किजो पुछ्तस? शुन्नेबालन पुच्छू, कि मीं तैन सेइं कुन ज़ोवरूए? हेर तैन पतोए, कि मीं कुन ज़ोवरूए ।”

22 जैखन तैनी ज़ोवं, त मन्देरे परहरदारन मरां अक जै तैइं खडो थियो, तैनी यीशुए थप्पड वैइतां ज़ोवं, “कुन तू महायाजक एन्चरे जुवाव देतस?”

23 यीशुए तैस जुवाव दित्तो, “अगर मीं किछ बुरू ज़ोरूए त साबत केर, पन अगर रोइ ज़ोरूए त थप्पड किजो बातस?”

24 तैसेरां बाद हन्ना यीशुएरे हेजू बन्धोरो थियो तेन्चरे महायाजक कैफा कां भेजो ।

????? ???? ???? ?

(????? 26:71-75; ???? 14:69-72; ???? 22:58-62)

25 शमौन पतरस खडखडो अग लोरो थियो तपने । तैखन केन्चे तैस पुच्छू, “कुन तू भी तैसेरे चलन मरां आस?” पतरस इन्कार केरतां ज़ोवं, “नई अवं नई ।”

26 महायाजकेरे नौकरन मरां अक जै तैसेरो रिशतेदार थियो, जेसेरो कन्न पतरसे तलवारी सेइं कटोरो थियो, जोने लगे, “कुन मीं तू बागी मां यीशु साथी नई लाहोरो?”

27 पतरसे फिरी इन्कार कियो, ते तैखन कुकडे भी बांग दित्ती ।

????????????? ???? ?

(????? 27:1-2,11-14; ???? 15:1-5; ???? 23:1-5)

28 तैनेई यीशु झेझां कैफा करां रोमी गवर्नर पिलातुसेरे महले मां नीयो, पन तैना एप्पू अन्तर न जे, ताके भिटे न भोन, ते फ़सह तिहारेरी रोट्टी खेइ बटन ।

29 तैखन पिलातुस तैन कां बेइर अव ते जोने लगे, “तुस इस मैन्हु पुइ कुन इलज़ाम लातथ?”

30 तैनेई तैस जुवाव दित्तो, “ए मैन्हु मुज़म न भोथो त असेई ए तीं कां न थियो आन्नो ।”

31 पिलातुसे तैन सेइं ज़ोने लगे, “तुस एस नेथ ते अपने कानूनेरे हिसाबे सेइं फैसलो केरा ।” यहूदी लीडर ज़ोने लगे, “असन त केन्ची भी मारनेरी अज़ाज़त नई ।”

32 एन एल्हेरेलेइ भोवं कि ज़ैन गल्लां यीशुए ज़ोरी थी, कि तै केरही मौतां मरेलो पूरी भोन ।

33 तैखन पिलातुस फिरी महले मां जेव ते तैनी यीशु कुजेइतां तैस पुच्छ, “कुन तू यहूदी केरो राज़ोस?”

34 यीशुए जुवाब दित्तो, “तू ए गल अपनि भोती ज़ोने लोरोस कि होरेई मेरे बारे मां तीं सेइं ज़ेवरीए?”

35 पिलातुसे जुवाब दित्तो, “कुन अवं यहूदी आई? तेरी कौमरे ते प्रधान याजकेई तू मेरे हवाले कियोरोस, तू ज़ो तीं कुन कियोरूए?”

36 यीशुए जुवाब दित्तो, “मेरू राज़ इस दुनियारू नई, अगर दुनियारू भोथू त मेरे चले जंग केरेथे, ते मीं यहूदी लोकां केरे प्रधानां केरे हथ्ये टलेयोने न देथे, पन हुन्ना मेरू राज़ इट्टेरू नई ।”

37 पिलातुसे ज़ोवं, “त कुन तू राज़ोस?” यीशुए जुवाब दित्तो, “तू ज़ोतस कि, अवं राज़ोई, अवं एल्हेरेलेइ ज़रमोरोंई, ते एल्हेरेलेइ दुनियाई मां ओरोई कि सच्चरे बारे मां शिक्षा देई । ज़ैना सच्चरे मन्तन तैना मेरी गल शुन्तन ।”

38 पिलातुसे पुच्छ, “सच्च कुने?”

~~~~~

(~~~~~ 27:15-31; ~~~~~ 15:6-20; ~~~~~ 23:13-25)

एन ज़ोइतां तै यहूदी लीडरन कां जेव ते ज़ोने लगे, “अवं त एस मैन्हु मुरज़म न सेमझी ।”

39 पन तुशशे रीतरे मुताबिक अवं फ़सह तिहारेरे मौके पुइ अक कैदी हथरां छडताई । कुन तुस चातथ कि अवं तुशशे लेइ यहूदी केरे राज़े हथरां छेइडी?

40 तैना फिरी ज़ोरे-ज़ोरे सेइं ज़ोने लगे, ए नन्ना इशशे लेइ वरअब्बा हथरां छड । वरअब्बा अक डैकू थियो ।

## 19

1 पिलातुसे सिपेहिन हुक्म दित्तो, कि यीशु नेइतां कोडे वान ।

2 ते सिपाहीयेइं कंटां केरू ताज बनेइतां यीशुएरे दोग्गे पुइ रखवू, ते तैस बैजनी रंगेरां लिगड़ां लुवां ।

3 ते तैन केरे सामने तैन कां एइतां ज़ोने लगे, “हे यहूदी केरे राज़ा, नमस्कार!” ते तैस थप्पड बाहे ।

4 तैखन पिलातुसे फिरी बेइर गेइतां लोकन सेइं ज़ोवं, हेरा, “अवं तैस तुसन कां फिरी बेइर आनताई, तुसन पतो लगे कि मीं एसमां कोई ज़ुरम न लेइहोव ।”

5 ज़ैखन यीशु कंटां केरू ताज दोग्गे पुइ रेखतां ते बैजनी लिगड़ां लेइतां बेइर आनो त पिलातुसे तैन सेइं ज़ोवं, “हेरा ई मैन्हु ।”

6 ज़ैखन प्रधान याजक ते मन्दरेरे पहरदारेई यीशु लाव त ज़ोरे-ज़ोरे चिन्डां मैरतां ज़ोने लगे, “एस क़रूसे पुइ च़ाद्दा, एस क़रूसे पुइ च़ाद्दा!” पिलातुसे तैन सेइं ज़ोवं, “तुसे एस नेथ ते क़रूसे पुइ च़ाद्दा, किजोकि अवं एसमां कोई दोष न लेही ।”

7 यहूदी लीडर ज़ोने लगे, “इशशो भी कानूने, ते तैसेरे कानूनेरे मुताबिक ए मौतरे सज़ारे काबले । किजोकि ए अपने आपे जो परमेशेरू मट्टू ज़ोते ।”

8 ज़ैखन पिलातुसे एन शुनू त तै मन्ना डरो ।

9 ते फिरी अपने महले मां जेव ते यीशु सेइं फिरी ज़ोवं, “तू कोटठां ओरोस?” पन यीशुए तैस किछ जुवाब न दित्तो ।





29 तैडी अक भांड सिरके सेइं भेरतां रखोरू थियूं, केन्वे जूफेरी डालडी तैस मां डोवतां यीशुएरे ऐशी सेइं हुराई ।

30 जैखन यीशुए चख्वू त तैनी ज़ोवं, “पूरू भोवं” ते करोडी दलोइतां अपने प्राण दित्ते ।

☞☞☞☞☞

31 ते एल्हेरेलेइ कि ते तियेरारी दिहाडी थी, होरसां आरामेरी दिहाडी ते कने फ़सह तिहार थियूं । ई यहूदी केरे लेइ खास दिहाडी थी, यहूदी न थिये चाते कि आरामेरे दिहाडे लाशां करूसन पुइ टंगोरी रान, एल्हेरेलेइ तैनेई पिलातुसे कां गइतां ज़ोवं, कि मुज़्रमां केरि ज़न्धां दलोइतां तैन केरि लाशां उन्दी उसालम ।

32 सिपाही आए तैनेई पेइले मैनेरी ज़न्धां दलोडी, फिरी होरेरी भी, जैना यीशु सेइं साथी करूसे पुइ चादोरे थिये ।

33 पन जैखन यीशुएरी वारी अई त तैनेई हेरू कि ते पेइले मेरि जेवरोए, ते तैनेई तैसेरी ज़न्धां न दलोडी ।

34 पन सिपेहिन मरां एक्के अपनि बलम एन्तां यीशुएरे देल्लोडी मां बाई ते तैखने खून त पानी बगने लगू ।

35 जैनी मैने एन हेरू, तैनी गवाही दित्ती, ते तैसेरी गवाही सच्च्चीए, ते तै ज्ञानते, कि सच्च ज़ोते कि तुस भी विश्वास केरा ।

36 एना सैरी गल्लां एल्हेरेलेइ भोइ कि पवित्रशास्त्रे मां लिखोरू पूरू भोए, “तैसेरी कोई हडी न दलोडी गाए ।”

37 पवित्रशास्त्रेरे एक्की होरि वचने मां लिखोरूए, “तैस जैनेई बलमी सेइं बाई तैना तैस हेरेले ।”

☞☞☞☞☞

(☞☞☞☞☞ 27:57-61; ☞☞☞☞☞ 15:42-47; ☞☞☞☞☞ 23:50-56)

38 एना गल्लां केरे पत्ती अक मैन्हु यूसुफ नब्बेरो जै अरिमतियाह इलोंब्वेरो रानेबालो थियो, पिलातुसे कां बिनती केरने लगो, कि यीशुएरी लाश दे, ए मैन्हु यहूदी लोकां केरे प्राधानां केरे डरे सेइं छेपतां यीशुएरो चेलो थियूं, ते पिलातुसे तैस अज़ाज़त दित्ती, ते तैनी यीशुएरी लाश नेही ।

39 नीकुदेमुस भी अव, जैनी एक्की बार राती यीशु सेइं मुलाकात कियोरी थी, तैनी गन्धरस ते एलवा आनोरे थिये, एन तेत्ती किल्लो थियूं ।

40 तैखन तैनेई यीशुएरी लाश नेइतां यहूदी केरे दबनेरे रसमरे मुताबिक तैस खुशबूदार चीज़ां लेइतां कफने मां पलेटतां रखवी ।

41 जैडी यीशु करूसे पुइ चादोरे थियो तैडी बागी मां अक नब्वी कवर थी, जैस मां पेइली कोई लाश न थी ।

42 ते ए यहूदी केरि आरामेरी तियेरारी दिहाडी थी ते कवर भी नेडे थी तैनेई यीशुएरी लाश तैडी रखवी ।

## 20

☞☞☞☞☞

(☞☞☞☞☞ 28:1-8; ☞☞☞☞☞ 16:1-8; ☞☞☞☞☞ 24:1-12)

1 हफतेरी पेइली दिहैडी झेझां हेजू आंधरू थियूं मगदलीन इलंब्वेरी मरियम कवरी पुइ आई, तैसां हेरू कि कवरी करां घोइ भी खडो कियोरोए ।

2 ते दौवडती शमौन पतरस ते होरि चेले कां पुजी जै यीशु सेइं प्यार केरतो थियो, ज़ोने लगी, “तैनेई प्रभुएरी लाश कवरी मरां केढतां नीयोरो, ते असन नई पतो तै कोडि रख्वोरोए ।”

3 एना शुन्तां पतरस त अक होरो चेलो कवरारे पासे चले ।

4 ते दुइये साथी-साथी दौवडतां चलोरे थिये, पन ते होरो दुइयोवं चेलो पतरस करां अग्रोवं निस्सी जेव, ते तैस करां पेइलो कवरी पुइ पुजो ।

5 तैनी लिकतां तक्कू ते कफन लाव ते अन्तर न जेव ।

6 तैखन शमौन पतरस भी पत्ती-पत्ती तैड़ी पुजो ते सिधो कबरी मां जेव तैनी हेरू कि तैड़ी लिगडां थियां ।

7 ते कफनेरो तै रुमाल भी जै यीशुएरे दोग्गे सेइ पलेटोरो थियो, लिगडन मां नई पन अलग ठैरी थियो ।

8 तैखन तै होरो चेलो भी जै कबरी पुड पेडलो पुजोरो थियू अन्तर जेव तैस भी लेइतां याकीन भोवं ।

9 किजोकि तैनेई पवित्रशास्त्रेरी ए गल न थी समझोरी जेसेरे बारे मां यीशुएरू मुइदन मरां ज़ीतू भोनू ज़रूरी थियू ।

10 तैखन एना चले वापस घरजो चले जे ।

*~~~~~*

*(~~~~~ 28:9-10; ~~~~~ 16:9-11)*

11 पन मरियम कबरी करां बेइर लेरां देंती थी । लेरां देंती-देंती तैसां लिकतां कबरी मांजो तक्कू ।

12 त तैड़ी तैसां दई स्वर्गदूत लाए जैन छिट्तां लिगडां लगगोरां थियां, जैड़ी यीशुएरी लाश रखारि थी तैड़ी अक शेरेंते ते होरो परेंते विश्शोरे लाए ।

13 तैनेई तैस पुचछू, “हे कुआन्शे तू किजो लोरिस लेरां देने?” मरियमा ज़ोवं, “तैनेई मेरे प्रभुएरी लाश नेवरीए ते पतो नई कोडि रख्वोरोए ।”

14 एना ज़ोते तै पत्रोवं बेदलोई त तैड़ी यीशु खइखइ लोव, पन तैस पिशान न आई कि ए यीशुए ।

15 यीशुए ज़ोवं, “हे कुआन्शे तू किजो लेरां देने लोरिस? तू केस तोपने लोरिस?” तैसां समझू कि कोई बागवाने, तैसां ज़ोवं, “हे जनाब अगर तीं तै नीयोरोए त ज़ो कि तीं कोडि रख्वोरोए ते अवं तैस नेइ ।”

16 यीशुए तैस सेइ ज़ोवं, “मरियम!” तैसां तैसेरे पासे फिरतां इब्रानी मां ज़ोवं, “रब्बूनी!” जेसेरो मतलबे हे गुरू ।

17 यीशुए ज़ोवं, “मीं सेइ न हुरा किजोकि अवं बाजी कां बाह हेजू नई जोरो, पन मेरे दूलान गेइतां ज़ो कि अवं अपने बाजी ते तुशशे बाजी ते अपने परमेशर ते तुशशे परमेशरे कां बा च़ल्लोरोई ।”

18 मरियम मगदलीनी तैट्टां च़ली जेई ते चलन कां गेइतां तैन पतो दित्तो, “मीं प्रभु लाहोरोए ते तैनी मीं सेइ एना गल्लां की ।”

*~~~~~*

*(~~~~~ 28:16-20; ~~~~~ 16:14-18; ~~~~~ 24:36-49)*

19 तेस्से दिहैड़ी जै हफतेरी पेइली दिहाड़ी थी डलोझरे मौके सारे चले एककी ठैरी थिये, ते यहूदी लोकां केरे प्रधानां केरे डरे सेइ दार बन्द केरतां विश्शोरे थिये, तैखन यीशु अव ते मझाटे खडो भोइतां ज़ोने लगो, “तुसन शान्ति मैलती राए ।”

20 एन ज़ोइतां तैनी अपने हथ ते अपनि देल्लोड़ी तैन हिराई, चले तैस हेरतां खुशी भोए ।

21 यीशुए फिरी ज़ोवं, “तुसन शान्ति मैलती राए, ज़ेन्चरे बाजी अवं भेजोरोई, तेन्चरे अवं भी तुसन भी इस दुनियाई मां भेजताई ।”

22 एन ज़ोइतां तैनी तैन जो फुक दित्ती ते ज़ोवं, “पवित्र आत्मा नेथ ।

23 ज़ैन केरे पाप तुस माफ़ केरेले त तैन केरे पाप माफ़ भोले, ज़ैन केरे तुस रखेले तैना राले ।”

*~~~~~*

24 पन बादे मां 12 चलन मरां अक मैन्हु मतलब थोमा ज़ैस दिदुमुस ज़ोतन, ज़ैखन यीशु अव त तै तैन साथी न थियो ।

25 ज़ैखन हारि चले तैस सेइ ज़ोवं, “कि असेई प्रभु लाव,” तैखन तैनेई ज़ोवं, “ज़ां तगर अवं तैसेरे हथ्यन मां कीलां करां गत्तन मां एंगलोई न छेइडी, तांतगर विश्वास न केरि ।”

26 अठ दिहैइना बाद यीशुएरे चले एककी बार फिरी तैस्से ठैरी बिशशोरे थिये, ते थोमा भी तैड़ी थियो ते दार भी बंद थियूं, ते यीशु एइतां तैन मझाटे खडो भोव, ते तैन जो ज़ोने लगे, “तुसन शान्ति मैल्ले ।”

27 फिरी तैनी थोमा जो ज़ोवं, “अपनि अंग्लोई आन ते मेरो हथ हेर ते अपने हथ्ये सेइं मेरी दल्लोड़ी हेर, शक न केर बल्के मीं पुड़ विश्वास केर ।”

28 थोमा तैस जो ज़ोवं, “हे मेरे प्रभु हे मेरे परमेशर!”

29 यीशुए तैस जो ज़ोवं, “तीं लेइतां तीं मीं पुड़ विश्वास कियो, धन तैना ज़ैना बगैर लाहने मीं पुड़ विश्वास केरन ।”

~~~~~

30 यीशुए अपने चेलां केरे सामने हारे भी बडे चमत्कार कियोरे थिये, ज़ैना इस किताबी मां नई लिखोरे ।

31 पन ज़ैना लिखोरन, एल्हेरेलेइ लिखोरन, कि तुस विश्वास केरथ, कि यीशु परमेशेरू मट्टू, मसीहे आए, ते विश्वास केरतां तैसेरे नंबे सेइं हमेशारी ज़िन्दगी हासिल केरथ ।

21

~~~~~

1 बादे मां यीशुए एप्पू एककी फेरे फिरी अपने चलन पुड़ तिविरियुस समुन्दरेरो बन्ने एन्चरे बांदो भोव ।

2 शमौन पतरस, थोमा ज़ैस जो दिदमुस जोतन, नतनएल ज़ै गलीलेरे काना नगर मां रातो थियूं, ते जेब्देरू मट्टू ते हारे चले भी तैड़ी थिये ।

3 शमौन पतरसे तैन सेइं ज़ोवं, “अवं मेछली टलाने गाताई ।” तैनेई ज़ोवं, “अस भी तीं साथी ज़लतम ।” तैना तैट्टां निस्से ते किशती मां चेटतां जे, पन तैस राती तैन किछ न मैल्लू ।

4 झेझां सुबेलो यीशु बन्ने पुड़ एइतां खडो भोव, पन चलेईं न पिशानो कि ए यीशुए ।

5 तैखन यीशुए तैन ज़ोवं, “हे बच्चव, कुन तुसन कां किछ खाने जो आए?” तैनेई जुवाव दित्तो, “नई ।”

6 यीशुए ज़ोवं, “ज़ाल किशतरे देइने पासे छडथ त तुसन किछ मेछली मैलनिन ।” तैनेई ज़ाल छाडु ते मेछली एतरी ज़ाले मां लेगि कि ज़ाल खिचोने न लगू ।

7 तैखन यीशु ज़ैस चले सेइं प्यार केरतो थियो तैनी पतरस सेइं ज़ोवं, “ए त प्रभुए ।” ज़ेरू शमौन पतरसे शुन्नु कि प्रभुए, तैनी अपनो चोगो, ज़ै कम केरनेरे लेइ खोल्लोरो थियो लाव ते पैनी मांजो छाल मारी ।

8 हारे चले ज़ैना किशती मां थिये ज़ाल ज़ैना मेछलेईं सेइं भेरतां थियूं तैनेई खिचतां आनु, किजोकि तैना 100 मीटर दूर थिये ।

9 ज़ैखन तैना बन्ने पुड़ ओस्से, त तैनेई मूरन पुड़ मेछली रेखोरिन ते इलेखी रोट्टी भी लेई ।

10 यीशुए तैन सेइं ज़ोवं, “ज़ैना मेछली तुसेईं टलेतोरिन तैन मरां किछ इरां आनां ।”

11 शमौन पतरस किशती मां चढो ते ज़ाल इलेखी पुड़ खिचतां आनु ज़ैस मां 153 मेछली लेगोरी थी, ते फिरी भी ज़ाल नई छींदेरू ।

12 यीशुए तैन सेइं ज़ोवं, “एज्जा केलोव खाथ ।” पन चलन मरां केन्ची हिम्मत न अई कि पुछ्छन, “कि तू कौन आस?” तैना ज़ानते थिये कि ए प्रभुए ।

13 यीशुए रोट्टी टलाती ते तैना भी दित्ती ते मेछली भी दित्ती ।

14 यीशु मुइदन मरां ज़ींतो भोनेरां पत्ती टलेइयोवं फेरे अपने चलन पुड़ बांदो भोइ जेव ।

~~~~~


प्रेरितां केरां कम्मां

१ २२२२२ २२२२ २२२२२२२

1 जनाब थियुफिलुस, मीं अपनि पेडली किताब मां तैना सैरी गल्लां लिखोरिन, जैना यीशु शुरु मां केरतो ते शिखालतो राव,

2 तैस दिहैड़ी तगर जेइस तै स्वर्गे मांजो नीयो जेव। तैस करां पेडले तैनी अपने चुनोरे प्रेरितन पवित्र आत्माे शेक्ते जिरिये सेइं किछु हुक्म भी दित्तोरे थी।

3 यीशुए दुःख झैलनेरां ते मौतरे बाद तैनी अपने ज़ीते भोनेरां काई पक्कां सबूतां तैन हिरां, ते 40 दिहाइन तगर तैन लेइहोतो राव, ते परमेशेरे राज्जरे गल्लां शुनातो राव।

4 एक्की फेरे जैखन यीशुए अपने चलन सेइं साथी थियो तैनी तैन ठाकू, “कि तुस यरूशलेम नगरे मरां बेइर न गेइयथ ते मेरे बाजी परमेशेरो तै वादो पूरो भोनेरो इंतज़ार केरथ, जेसेरे बारे मां तुसेईं मीं करां शुनोरू भी आए।

5 किजोकि यूहन्ना त लोकन पैनी सेइं बपतिस्मो दित्तो, पन तुसन थोडे दिहैड़ना पत्ती पवित्र आत्मा सेइं बपतिस्मो दित्तो गालो (यानी परमेशर पवित्र आत्मा भेजेलो जै तुसन सेइं साथी रालो)”

२२२२२२२ २२२२२२२ २२ २२२२

6 ज़ताली प्रेरित दुबारा यीशु सेइं मिले, त तैनेईं तैस पुच्छू, “हे प्रभु, कुन तू इस वक्ते फिरी इस्राएले तैसेरू राज देने बालोस?”

7 तैनी तैन सेइं ज़ोवं, “तैस वक्तेरो या जेइस तैना गल्लां भोली, तैन केरे बारे मां तुसन ज़ान्नेरी कोई ज़रूरत नई, जैना बाजी परमेशेरे अपने अधिकार मां रेखोरिन।

8 पन पवित्र आत्मा जैखन तुसन पुइ उतरेली त तुसन शक्ति मैलेली, ते तुस यरूशलेम नगर ते सारे यहूदिया ते सामरिया इलाकन मां बल्के धेरतारे हर पासे मेरे गवाह भोले।”

9 एना गल्लां ज़ोनेरां पत्ती यीशु तैन केरे सामने हेरते-हेरते परमेशेरे तै स्वर्गे जो नीयो, ते बिदलारां तै तैन केरे एछूछन करां छुपाव।

10 जैखन तैना यीशुए अम्बरे मांजो गांतो तकने लोरे थिये, त अचानक, दूई मइद जैन छित्तां लिगडां लगगोरां थियां तैन कां एइतां खडे भोए।

11 ते ज़ोने लगे, “हे गलीली मइदाव तुस खइखडे अम्बेरे पासे कुन तकने लोरेथ? एहे यीशु जेन्वरे तुशे सामने परमेशेरे, स्वर्गे मांजो नीयो, जेन्वरे तुसेईं स्वर्गे मांजो गांतो लाहोरोए तेन्वरे फिरी एइतो लाएले।”

२२२२२२२२ २२२२२२२ २२२२२ २२२२२

12 जैखन चले ज़ेतून पहाडे पुइरां जैन यरूशलेम नगरेरे नेडे एक्की किलोमीटर दूरे, यरूशलेम नगरे मांजो वापस आए।

13 नगरे मां एइतां तैना तैस कमरे मां जे जैड़ी तैना रहते थिये, तै कमरो दुइयोवं छते थियो। तैना प्रेरित इना थिये, पतरस, यूहन्ना, याकूब, अन्दरयास, फिलिप्पुस थोमा, बरतुल्मै, मत्ती ते हलफईरू मट्टू याकूब ते शमौन जेलोतेस ते याकूबेरू मट्टू यहूदा रहते थिये।

14 एना सब मइद ते किछु होरि कुआन्शां जैनेईं यीशुएरी महत कियोरी थी, ते यीशुएरी अम्मा मरियम ते यीशुएरे दूलान सेइं साथी अक मन भोइतां लगातार प्रार्थनाईं मां लगगोरे थिये।

15 ते तैन्ने दिहाइन मां पतरस तैन दूलां केरि टोली मां जैन केरि तैधात कोई 120 थिये, पतरस खडे भोइतां ज़ोने लगे।

16 “हे मेरे दूलाव, पवित्रशास्त्रेरी तै गल जै पवित्र आत्मा दाऊद राजेरी ज़िरिये पेइले ज़ोरी थी, पूरी भोनी ज़रूरी थी, तै गल यहूदारे बारे मां ज़ोरी थी, जैनी यीशुएरे ट्लुवाने बालां केरि मद्दत कियोरी थी।

17 तै असन सेइं साथी सेवा करनेवालो थियो, ते असन साथी तै गनो गातो थियो।

18 तैनी नीञ्च कमेयरे लेइ यीशु ट्लुवाव, ते फिरी तैनी तैना पेइसे यहूदी लीडरन वापस दित्ते, ते तैनेई तैन पेइसां केरू अक ऊडार घिन्नु, जैड़ी तै दोगेरे भारे खिरकोरो थियो, ते तैसेरू पेट फेटतां तैसेरी एंटलोडी बेइर निस्सी।”

19 यरूशलेम नगरेरे सारे लोकन ए पतो लगगोरो थियो, तैनेई अपने भाषाई मां तैस उडारेरू नव हकलदमा रख्ख, जेसेरो मतलबे, “खूनेरू ऊडार।”

20 किजोकि दाऊदे भजना केरि किताबी मां लिखोरूए कि,

“तैसेरू घर उज्जे,

ते तैस मां कोई बसने वालो न भोए,

ते इन भी लिखोरूए, तैसेरी पदवी कोई होरो ने।”

21 एल्हेरेलेइ एन ज़रूरीए कि अक एरो मैन्हु चुनो गाए, जै प्रभु यीशुएरे सारे कम्मां केरे गवाह भोए, यानी यीशुएरो यूहन्ना करां वपतिस्मो नेने करां लेइतां असन करां यीशुएरे स्वर्गे गाने तगर

22 तैन मरां अक मैन्हु चुनो गाए, जै असन सेइं साथी यीशुएरे ज़ीते भोनेरो गवाह भोए।

23 तैखन तैनेई दुइये ज़ने नामज़द किये, अक यूसुफ ज़ैस जो बरसब्वास ज़ोते थिये, जेसेरो खताव यूस्तुस थियो, ते दुइयोवं मत्तियाह थियो।

24 ते एन ज़ोइतां प्रार्थना की, “हे प्रभु, तू सेब्भी केरे दिले ज़ानतस ते असन पुइ बांदू केर, कि इन दुईन मां तीं कौन ज़ेरो चुनोरोए।

25 कि ते इस सेवकाई ते प्रेरिताइयोरो पद ने, जै यहूदा शैरतां अपने ठैरी जेवरोए।”

26 तैनेई तैसेरे बारे मां शर्त रखेरू थियूं, जैन मत्तियाह नव्वे पुइ निस्सू, एल्हेरेलेइ तै 12 प्रेरितन सेइं साथी गनो जेव।

2

XXXXXXXXXXXXXXXXXXXX

1 ज़ेइस यहूदी केरे पिन्तेकुस्त तिहारेरी दिहाड़ी अई, त तैना सब एक्की ठैरी अकोट्टे थिये।

2 अचानक अम्बेरेरां आवाज़ आई, जेन्बरे बड़े बात ज़लने लोगोरो थियो, ते तैस सेइं सारू घर घुमने लगू जैड़ी तैना विशशोरे थिये।

3 ते तैनेई अगारी लप्परी ज़ेरि ज़िभां लेई, जैना अलग-अलग भोइतां तैन सेब्भन पुइ एइतां टिकी।

4 ते तैना सब पवित्र आत्माई सेइं भरपूर भोए, ते आत्मारे वरदाने सेइं तैना अलग-अलग भाषा करने लगे।

5 तैस वक्ते मां, बड़े यहूदी भक्त ज़ैना तिहारे मां दुनियारी सैरी मुलखन मरां ओरे थिये, तैना यरूशलेम नगरे मां राने लोरे थिये।

6 ज़ैखन तैनेई ए बातेरी ज़ेरि आवाज़ शुनी त बड़े लोक जम्हां भोए, ते सब लोक बड़े हैरान रेइजे, किजोकि हर कोई चेलन अपने-अपने भाषाई मां गल्लां केरते शुन्ने लोरे थियो।

7 ते सब बड़े हैरान भोइतां ज़ोने लगे, हैरा, “कुन एना ज़ोनेवाले सारे गलील इलाकेरे रानेवाले नईं?

8 फिरी एन कुन भोइ रावरूए कि, असन मरां हर कोई अपनि-अपनि भाषा शुन्ने लोरोए।

9 असन मरां किछ् इन इलाकन मरां आन, पारथी, मेदी, एलामी ते मेसोपोटामिया, यहूदिया, कप्पदकिया, पुन्तुस ते आसिया,

10 फरूगिया, पंफुलिया, मिस्र मुलख, ते लीबिया मुलखे जै कुरेन नगरेरे नेडे, इन सब मुलखां केरे रानेबाले ते रोमी मुसाफर,

11 कुन यहूदी, ते कुन यहूदी पंथ धारण करेनेबाले, करेती ते अरब मुलखेरे लोक भी आन, पन अस अपनि-अपनि भाषाई मां तैन करां परमेशेरां बड्डां-बड्डां कम्मां केरि चर्चा शुन्ने लोरेम ।”

12 तैना सब बडे हैरान भोइ जे ते घबरेइतां एक्की होरि पुच्छने लगे, “कि एन कुन भोइ रावरूए?”

13 पन किछ तैन केरि हासी बनेइतां ज़ोने लगे, “कि एनेई सज़री शराप पियोरि ए ।”

~~~~~

14 तैखन पतरस 11 प्रेरितन सेइं साथी खडो भोव, ते बडे ज़ोरे सेइं ज़ोने लगे, “हे लोकव हे यहूदियारे रानेबालव ते हे यरूशलेम नगरेरे राने बालाव, मेरी गल ध्याने सेइं शुना, अवं तुसन ज़ोताई इडी एन कुन भोने लोरूए ।

15 ज़ैन तुस बुझने लोरेथ तैन नई, एना मैन्हु नशे मां नई, किजोकि हुन्ना त झेझेरे नौ बज़ोरेन,

16 बल्के ए तै गल्ले, ज़ै परमेशेरे योएल नेबेरे ज़िरिये ज़ोरी थी,

17 परमेशर ज़ोते कि, आखरी दिहैइन मां एरू भोलू,

अवं अपनि आत्मा सेबभी लोकन देइलो,  
ते तुशशां मट्टां कुइयां भविष्यवाणी केरेलां,  
ते तुशशे नौजवान दर्शन हेरेले,  
ते बुढे सुपना हेरेले ।

18 बल्के अवं तैन दिहैइन मां अपने सेवादार मइदन ते सेवादार कुआन्शन पुइ अपनि आत्मा उतरेलो, ते तैना भविष्यवाणी केरेले ।

19 अवं अम्बरे मां आजीब-आजीब कम्मां ते ज़मीनी पुइ निशान,  
यानी अग, खून ते कालो तूएरी बिदलार हिरयेलो ।

20 प्रभुएरी दिहाडी एजने करां पेइले,  
दिहाडो आंधरो भोइ गानोए,  
ते चाँदनी खूनेरी ज़ेरि भोनीए,  
तै अक महान ते खास दिहाडी भोनीए ।

21 ते ज़ै कोई परमेशेरू नवं घिन्नेलो तैस मुक्ति मैलेली ।”

22 “हे इस्राएलेरे लोकव, इना गल्लां शुना, यीशु नासरत नगरेरो अक मैन्हु धियो, ज़ै परमेशर तुशशे लेइ भेजोरो धियो, ते एस गल्लारी तसदीक तैसेरे खास चमत्कारां केरे सबूतेई सेइं भोचे, ज़ैना परमेशेरे तैसेरे ज़िरिये सेइं इशशे सामने हिरां, ज़ेन्चरे कि तुस एस्पू भी ज़ानतथ ।

23 ज़ैखन तै परमेशेरेरे इतज़ामेरे पूरे मौके पुइ ज़ानेरे हिसाबे सेइं दलुवाव, ते तुसेई तै अधर्मी लोकां केरे हथ्थे क़रूसे पुइ टंगेइतां माराव ।

24 पन परमेशेरे तै मौतरे सकेजे मरां छुटेइतां ज़ीतो कियो, किजोकि एन भोइ न धियू सकतु, कि तै मौतरे कञ्जे मां राए ।

25 किजोकि दाऊद मसीहेरे बारे मां एन ज़ोते,  
हेरा, प्रभु हर वक्त मेरे सामने,  
अवं तैन लोकन करां न डरेलो ज़ैना मेरो नुकसान चातन ।

26 तांए मेरो दिल बड्डो खुश भोव, ते अवं खुशी सेइं ज़ोइलो,  
बल्के मेरी जान उमीदी सेइं ज़ीएली ।

27 किजोकि तू मेरे पूरणन पाताले मां राने न देलो,  
ते न अपने पवित्र मैन्हु शइने देलो!

28 तीं मीं ज़िन्दगरी बत हेरेवरिए,



तू अपने हज़री सेइं मीं भरपूर करेलो ।”

29 “हे मेरे ढूलाव, अवं कौमारे बुजुर्ग दाऊदरे बारे मां तुसन सेइं साफ-साफ ज़ोईं सकताईं, कि ते मेरि भी जेव, ते दबबो भी ते तैसेरी कबर अज़ तगर इश्शे सामने मौजूद ।

30 तै नबी थियो, ते तै ज्ञानतो थियो, कि परमेशरे तैस सेइं वादो कियोरो थियो, ‘अवं तेरी खानदेंनी मरां अक मैन्हू तैसेरे तखते पुड़ बिशैलेलो ।’

31 तैनी पेडले भोनेबैली गल्लां ते मसीहरे मुडुदन मरां जीते भोनेरे बारे मां बियांन कियेरू थियूं, कि न ते पाताले मां राने देलो, ते न अपने पवित्तर मैन्हू शङ्गे देलो!

32 “एहे यीशु परमेशरे ज़ींतो कियो ज़ेसरे अस सब गवाह आम ।

33 ते हुना तै स्वर्गे मां खास टैरी यानी परमेशरेरे देइने पासे आए । ते तैने बाजी परमेशरे करां पवित्तर आत्मा हासिल की, ज़ेसेरो तैने वादो कियोरो थियो, यीशुए असन पवित्तर आत्मा भरपूरी सेइं दितोरीए, ज़ैन तुस लातथ ते शुन्तथ ।

34 किजोकि दाऊद त एप्पू स्वर्गे मां नईं जोरो, पन फिर भी तै एप्पू ज़ोते, प्रभु परमेशरे मेरे प्रभु सेइं ज़ोवं, मीं सेइं साथी राज़ केर ।

35 ज़ांतगर अवं तेरे दुश्मन तेरे अधीन न केरि ।

36 एन्हरेलेइ, इस्राएलरे सारे लोकन पतो लगगे, कि परमेशरे, यीशु ज़ै तुसेईं करूसे पुड़ चाढ़ो तै प्रभु भी कियो ते मसीह भी कियो ।”

37 एना गल्लां शुन्तां तैन बड़ो एसास भोव कि तैना पापिन, तैखन तैनेईं पतरसे ते होरि प्रेरितन सेइं ज़ोवं, “हे ढूलाव अस कुन केरम?”

38 पतरसे तैन सेइं ज़ोवं, “पापन करां मनफिराथ ते तुसन मरां सारे यीशु मसीहरे नब्बे सेइं बपतिस्मो घिन्ना, त परमेशर तुसन माफ़ करेलो ते पवित्तर आत्मा तुसन इनामे मां मैलेली ।

39 एन्हरेलेइ कि ए वादो तुसन त तुश्शी औलादी सेइं आए ते तैन सेब्बन सेइं ज़ैना दूर-दूर रातन, ते ज़ैन इश्शो प्रभु परमेशरे एप्पू कां कुजाते ।”

40 पतरसे होरि भी बेड़ि गल्लां केरि गवाही दित्ती, ते तैन बार-बार ज़ोवं, कि अपनो आप एस टैरी कौमी करां बचाथ ।

41 ते तैनेईं तैसेरी गल्लां कबूल की, तैनी तैन बपतिस्मो दित्तो, तैस दिहैड़ी लगभग कोई 3000 मैन्हू तैन मां शामिल भोए ।

42 एना लोक प्रेरितन करां शिक्षा हासिल करते थिये, ते संगती रखते थिये, ते साथी रोट्टी खाते थिये, ते प्रभु भोज मनाते थिये ते प्रार्थना करने मां मघन रहते थिये ।

~~~~~

43 प्रेरितां केरि ज़िरिये सेइं बड़ चमत्कार ते निशान भोते थिये, ते यरूशलेमेरे सारे लोक डेरि जे ।

44 यीशु मसीह पुड़ विश्वास करनेवाले सारे अकोट्टे रहते थिये, ते सैरी चीज़न मां एक्की होरि बराबर हिस्सेदार रखते थिये ।

45 ते तैना अपनि जेइदात ते माल सबाब बेचतां एक्की होरेरी ज़रूरतेर मुताबिक रकम बेंदतां सेब्बी केरि ज़रूरत पूरी करते थिये ।

46 तैना रोज़ अक मन भोइतां मन्दरे मां अकोट्टे भोते थिये, ते घरन मां साथी रोट्टी खाते थिये ते प्रभु भोज मनाते थिये, ते अकोट्टे भोइतां खुशी सेइं खाते थिये ।

47 तैना परमेशरेरी तारीफ़ करते थिये, तैना सैरी केरि नज़री मां रोड़े थिये । ज़ैन पापन करां मुक्ति मैलती थी, परमेशर तैन लोकन तैन केरि टोली मां शामिल करतो थियो ।

3

~~~~~

1 एक्की दिहाड़ पतरस ते यूहन्ना प्रार्थना करने दीसेरे ट्लेइ बज़ेइं मन्दरे मांजो च़लारे थिये ।

2 ते मैनेई अक जर्मनेरो टोंटो छुइतां आनोरोए थियो, ते तैस मन्देरे दारे पुइ छुइते थिये, जैस दारे रु नवं “रोडू” थियू, ताके अन्तर गाने बालन करां भीख मग्गे।

3 जैखन तैनी पतरस ते यूहन्ना मन्देरे मांजो गांते लाए त तैन करां भीख मगने लगे।

4 पतरस ते यूहन्ना तैसेरे पासे खेइतां ज़ोने लगे, “इश्शे पासे तक।”

5 ते तैस उमीद भोइजेइ कि एन करां किछ् मैलेलू, तै तैन केरे पासे तकने लगे।

6 पतरसे ज़ोवं, “सोन्नु चाँदी त असन कां अथ्थी नई, पन ज़ैन मीं कां आए तैन अवं तीं देताई, तू यीशु मसीह नैसेरे नव्वे सेइ खइो उठ ते च़ल फिर।”

7 पतरसे ज़ेरो तैसेरो देइनो हथ् डलेइतां खइो कियो, त तैसेरे पावन मां ते गुडन मां ताकत आई।

8 ते तै तैखने खइो भोव, ते च़लने फिरने लगे, ते फिरी छालां मारतो ते परमेशेरी तारीफ़ केरतो तैन सेइ साथी मन्देरे अंगने मां च़लो जेव।

9 ते सेब्भी लोकेई तै च़लतो फिरतो ते परमेशेरी तारीफ़ केरतो लाव।

10 ते पिशानो ई त तैए, जै मन्देरे रोइे दारे पुइ विश्तां भीख मगतो थियो, ते जै चमत्कार एन लोकां केरे सामने भोव, त तैना लोक बडे हैरान राए।

~~~~~

11 जैखन ते मैन्हु पतरस ते यूहन्ना डलेइतां खइखइो थियो, त सब लोक ज़ैना तैडी खइखइे थिये, बडे हैरान भोइतां सुलैमानी अंगने मां देवइतां तैन कां आए।

12 पतरसे एन हेरू त तै लोकन कां एन्च़रे खइो भोव, ते ज़ोने लगे, “हे इस्राएली लोकव तुस एस गल्ली पुइ किजो हैरान भोरेथ, ते असन एन्च़रे किजो तकने लोरेथ, असेई अपने शक्ति या भक्ति सेइ ए टोंटो मैन्हु च़लने फिरनेरे कावल नई बनेवरोए।

13 अब्राहम ते इसहाक ते याकूबेरे परमेशेरे ते इश्शे पूर्वजां केरे परमेशर अपने दासे यीशु महिमा दिती, पन तुसेई तै यहूदी लीडरन कां दित्तो कि तैना तैस मारन। पिलातुसे तै हथरां छुइनेरो इरादो कियो, पन तुसेई यीशुएरो इन्कार कियो।

14 तुसेई यीशु अक एरो पवित्र ते धर्मी मैन्हु रद कियो, ते पिलातुसे कां दरखुवास की, कि तै तुश्शे लेइ अक कातली हथरां छुडे।

15 तुसेई त ज़िन्दगी देनेवालो मारो, पन अस गवाह आम, कि परमेशेरे तै मुइदन मरां ज़ीतो कियो।

16 तैसेरे नव्वेरी शक्ति एस टोंटे, जै तुश्शे सामने ते जैस तुस ज्ञानतथ शिफा दित्तोरिये ते ए मैन्हु यीशुएरे नव्वे सेइ ते यीशु पुइ विश्वास केने सेइ बिलकुल ठीक भोव, ते ए एप्पू तुश्शे सामने।

17 “हे मेरे दूलाव अवं ज्ञानताई कि ज़ैन किछ् तुसेई ते तुश्शे लीडरेई यीशु सेइ कियू, तैन तुसेई अनज्ञान भोइतां कियू। किजोकि तुसन न थियो पतो कि तै मसीह आए।

18 पन परमेशेरे एना सैरी गल्लां ज़ैना तैनी अपने नेबी केरे ज़िरिये ज़ोरी थी, कि मसीह दुःख ऊढालो ते मरेलो ते तैनी तैना एन्च़रे पूरी की।

19 बस्सा पापन करां मनफिराथ ते परमेशेरे पासे फिरा ते तै तुश्शे पाप माफ़ केरेलो, ते परमेशेरी तरफां तुश्शे लेइ परमेशेरे तरफां रोडे दिहाडे एज्जले।

20 ते तै मसीह यानी यीशु जै तैनी ठहरावरो आए, तुश्शे लेइ भेजे।

21 पन ज्ञातगर तैना सैरी चीज़ां बहाल न केरे, ज़ैन केरे बारे मां परमेशेरे बडे पेइले अपने पवित्र नेबी केरि ज़बानी ज़ोरूए, तांतगर यीशुएरू स्वर्गे मां रानू ज़रूरीए।

22 ज़ेन्च़रे मूसा एस बारे मां ज़ोरू थियू, परभु परमेशर तुश्शे दूलान मरां तुश्शे लेइ मेरो ज़ेरो अक नबी भेजेलो, ज़ैन किछ् तै तुसन सेइ ज़ोए, तुस तैसेरी गल शुनथ।

23 पन जै तैस नेबेरी गल न शुनेलो, तै लोकन मरां नाश कियो गालो।

24 ते शमूएल परमेशेरी गल्लां ज़ोनेवाले करां देइतां पेइले तमाम नेबेई इन दिहाडां केरे बारे मां शुनावरू।

3 पन पतरसे तैस सेइं ज़ोवं, “हे हनन्याह! ज़ैताने तेरे मने मां ए गल केन्चरे छुडी, कि तू पवित्तर आत्माई सेइं झूठ ज़ोस, ते ज़मीनारे पेंडसन मरां किछ रेख्की छुडस?”

4 कुन बेचने करां पेडले ज़मीन तेरी न थी, पन बेचनेरां बाद कुन पेंडसो तेरो न भोव? तीं अपने मने मां किजो सोचू? तीं मैन्हु सेइं नई बल्के परमेशरे सेइं झूठ ज़ोरूए।”

5 हनन्याह एन शुनते खिरकी जेव, ते तैसेरे प्राण निस्से, ते ज़ैन लोकेई एन शुनू त तैना बड़े डेरि जे।

6 तैखन किछ नौजवान आए ते तैनेई तैसेरी लाश कफने मां पलेटतां ते बेइरोवं नेइतां देवतां छुडी।

7 ट्लेइ घैन्टना पत्ती तैसेरी कुआन्श आई, ते तैस एस बारे मां कोई पतो न थियो।

8 पतरसे तैस पुच्छ, “मीं ज़ो, कुन तुसेईं दुइयेईं ज़मीन एत्रे मां बेचोरी थी?” तैसां ज़ोवं, “हाँ कुल कीमत एत्री मैल्लोरी थी।”

9 पतरसे तैस सेइं ज़ोवं, “प्रभुएरी आत्मा अज़मानेरे लेइ तुस केन्चरे सेइं राज़ी भोए, ते ज़ैन लोकेई तेरो मुन्श दबोरोए, तैन केरे पाव हेर दारे पुड आन, ते तैना तीं भी बेइरोवं धिनी गाले।”

10 तै कुआन्श तैखने तल्ले बिछुडी, ते तैसां भी प्राण निस्से, ते ज़ैखन नौजवान अन्तर आए त तै कुआन्श मरीं लेइतां ते भी छुइतां तैसां मुन्श इलाखोरां देवतां छुडी।

11 सैरी यरूशलेमेरी कलीसिया ते एन गल्लां केरे शुन्ने वाले बड़े डेरि जे।

~~~~~

12 प्रेरितां केरे ज़िरिये बड़े चमत्कार ते निशान बांटे भोए, ते सारे विश्वासी अक भोइतां सुलैमानी अंगने मां जम्हां भोते थिये।

13 हालांकी होरे लोक तैन केरि बड़ी इज़्जत करते थिये, पन केन्ची हिम्मत न आई कि तैन मां शामिल भोन।

14 बड़े मइदेइं ते कुआन्शेईं विश्वास कियो ते तैन लोकां केरि मेनडली मां शामिल भोए, ते परमेशर मन्ने बालां केरि तैधात बद्धती चली।

15 ज़ैन प्रेरितेईं कियूं तैसेरो नितीजो ई भोव, कि लोक विमारन खट्टन पुड ते पिट्टी पुड छुइतां सड़की मां रखते थिये, कि पतरस ज़ैखन तैस बत्तां एज्जे त तैसेरी छाव त तैन पुड पे।

16 यरूशलेम नगरेरे च़ेवरे पासना इलोवां केरे बड़े लोक विमारन ते ज़ैन पुड भूतां केरो सैयो, एप्पू सेइं साथी आनते थिये, ते तैना सब बेज्जोते थिये।

~~~~~

17 तैखन महायाजक ते तैसेरे साथी ज़ैना सद्की केरे फिरके मरां थिये, तैन बड़ी जलन भोने लगी ते तैना प्रेरितां केरे खलाफ खंडे भोए।

18 ते तैनेई प्रेरित दलुवेइतां कैद मां छेइडी दित्ते।

19 पन प्रभुएरो राती स्वर्गदूत कैदखाने मां दार खोलतां प्रेरितन कां जेव, ते तैना बेइर केदतां तैन सेइं ज़ोने लगे।

20 “गाथ ते मन्दरेरे अंगने मां खडे भोइतां हमेशारे ज़िन्दगरे बारे मां लोकन बिस्तार देथ।”

21 तैना एन शुन्तां झेझां मन्दरेरे अंगने मां पुजे ते ज़ेन्चरे तैन स्वर्गदूते हुक्म दित्तोरो थियो, तेन्चरे लोकन शिक्षा देने लगे, ते ज़ैखन इस्राएली महायाजक ते तैसेरे साथी तैडी आए, त तैनेई महासभा ते सब यहूदी केरे सारे बुज़ुर्ग कुजाए, ते तैनेई यीशुएरे प्रेरित कैदखाने मरां कुजाए।

22 ज़ैखन मन्दरेरे परहेदार कैदखाने मां पुजे त तैन प्रेरित तैडी न मैल्ले, ते वापस एइतां तैन खबर दित्ती।

23 “असेईं कैदखानो रोडेच़ेरे बंद कियोरी थियो, ते परहेदार भी असन दारे मां खडखडे मैल्ले, पन ज़ैखन असेईं कैदखानो खोल्लो त अन्तर कोई न मैल्लो।”

24 एना गल्लां शुन्तां मन्दरेरे परहेदारां केरो प्रधान, प्रधान याजक ते सारे लोक हैरान रेइजे, ते तैन केरि फिक्री मां पे कि हुनी कुन भोनूए!

25 तैखन केन्चे एडतां ज़ोवं, “तैना मैन्हु ज़ैना तुसेई कैदे मां छुडोरे थिये, तैना मन्दरे मां खडे भोइतां शिक्षा देने लगेरेन।”

26 तैखन मन्दरेरे पहरेदारां केरे प्रधान अपने सिपाही साथी घिन्तां जे, ते प्रेरित कुजेइतां आने पन ज़बरदस्ती नई, किजोकि तैना लोकन करां डरते थिये, कि एरू न भोए एना असन घोडेई बान।

27 तैनेई प्रेरित एन्तां महासभा मां पैश किये, ते महायाजके तैन पुच्छू।

28 “असेई तुसन ठाकेरू थियू, कि यीशुएरू नवं घिन्तां शिक्षा न देइयथ? फिरी भी हेरा, तुसेई सारे यरूशलेम नगरे मां अपनि शिक्षा फैलाई, ते तैस मैनेरो खूनेरो दोष असन पुड लानो चातथ।”

29 पतरस ते होरि प्रेरितेई जुवाब दित्तो, “असन मैन्हु केरो हुक्म मन्नेरे बजाहे परमेशेरो हुक्म मन्नो जादे ज़रूरीए।

30 इग्रेशे दादे-पड़दादां केरे परमेशे ए यीशु मुडदन मरां ज़ीतो कियो, ज़ै तुसेई करूसे पुड च़ेदतां मारो।

31 तैए परमेशे, प्रभु ते मुक्ति देनेवालो बनेइतां अपने देइने पासे विशालो, ताके तै इस्राएलिन मन फिराने ते पापां केरि मैफारो मौको दे।

32 असां एन गल्लां केरे गवाह आम, ते पवित्र आत्मा भी, ज़ै परमेशे तैनी अपनो हुक्म मन्ने बालन दित्तोरीए।”

33 ज़ैखन तैनेई एन शुनू त फुकोई जे, ते तैन केरि मर्जी लगी ज़ोने कि एन मैरी छुडम।

34 पन अक फरीसी मैन्हु ज़ेसेरू नवं गमलीएल थियू, ते ज़ै शास्त्री भी थियो, ते ज़ै सेब्मी लोकन मां इज़्रतदार थियो, तैनी महासभा मां खडे भोइतां हुक्म दित्तो कि एना मैन्हु थोडे च़िरे बेडर भेज्जा।

35 तै एन ज़ोने लगो, “हे इस्राएली लोकव तुस ज़ैन किछ एन मैनन् सेइं केरनू चातथ तैन रोडेच़ारे सोचा।

36 किजोकि थोडे च़िरे पेइले थियूदास इन ज़ोइतां खडो भोरो थियो, ते ज़ोतो थियो, अवं भी किछ आई, ते लगभग 400 मैन्हु तैस सेइं मिले, पन तै मारो जेव, ते तैसेरे मन्नेबाले सारे तितर-बितर भोइ जे, ते तैन केरो नामो निशान मिटी जेव।

37 तैसेरां पत्ती मैन्हु केरे गिनतरे वक्ते गलील इलाकेरो यहूदा निसोरो थियो, ते तैनी काई लोक अपने पासे खिचोरे थिये, तै भी मारो जेव, ते तैसेरे ज़ेत्तरे साथी थिये, सब तितर-बितर भोइ जे।

38 हुनी अवं तुसन एन्ने ज़ोताई कि एन मैनन् करां दूर भोथ, ते एन गाने देथ, किजोकि अगर एना चमत्कार, मैन्हु केरि तरफां भोले त एप्पू खतम भोइ गानेन।


39 पन अगर एना कम्मां परमेशेरी तरफां भोलां, त तुस एन मैन्हु केरू किछ न बिगोड़ी सकत, ते तुस परमेशेरे खलाफ लइनेबाले भोले, तैनेई तैसेरी सल्लाह मन्नी।”

40 ते प्रेरित अन्तर कुजेइतां तैन डंडेइं बावैहीतां तैन ज़ोवं, कि अज़ेरां बाद यीशुएरे नव्वे सेइं कोई गल न केरथ, ते तैना हथरां छुडे।

41 प्रेरित महासभा मारां च़ले जे, तैना एस गल्ली पुड खुशी थिये, कि असां यीशुएरे नव्वे सेइं वेइज़त भोनेरे कावल त भोए।

42 तैनेई शिक्षा देनेी बंद न की, बल्के रोज़ मन्दरे मां गोइतां ते घर-घर गोइतां लगातार खुशखबरी शुनाते राए कि यीशु ही मसीह आए।

6



1 ई गल तेइसेरीए ज़ेइस च़ेले केरि गिनती बधने लगेरी थी, यूनानी भाषा ज़ोनेवालो यहूदी च़ेलेई इब्रानी भाषा ज़ोनेबाले यहूदी च़ेलां केरि शकैइत केरने लगे, कि हर दिहैडरे सेवाई मां विधवां केरि खबर न की गाए।

2 एन शुन्तां 12 प्रेरितेई सारे यरूशलेमेरे सारे विश्वासी लोक (चेले) अकोट्टे किये, ते ज़ोवं, “इश्शो लेइ एन मुनासब नई कि अस परमेशेरी वचनेरू प्रचार केरनो छे, डतां खाने पीनेरी सेवाई मां लगगम

3 एत्हेरेलेइ हे मेरे द्लाव, अपने लोकन मरां सत भलमानस मैन्हु चुना, ज़ैना पवित्र आत्माई सेइं भरपूर ते अक्लमन्द भोन, ताके आस तैन एस कम्मेरी ज़िमेबारी सॉफम ।”

4 पन अस त प्रार्थना केरने ते बच्चन शुनानेरी ते शिक्षा देनेरी सेवाई मां लगगोरो रानेम ।

5 ए गल सारे लोकन पसंद आई, ते तैनेई अक स्तिफनुस ज़ै विश्वास ते पवित्र आत्माई सेइं भरपूर थियो चुनो, ते हारे ज़ैना चुने तैन केरां नव्वां इना आन, फिलिप्पुस परुखुरुस, नीकानोर, तीमोन, परमिनास ते नीकुलाउस ज़ै अन्ताकिया नगरेरो रानेबालो थियो, ते यहूदी फिरके मां ओरो थियो ।

6 ते तैना प्रेरितन कां हाज़र किये, ते तैन केरे लेइ तैनेई प्रार्थना की, ते तैन पुइ हथ रखे ।

7 एन्त्रे सेइं परमेशेरेरू बच्चन फैलतु जेवं, ते यरूशलेम नगरे मां चेलां केरि गिनती बद्धती जेई, ते याजकां केरि अक टोली विश्वासे मां आई ते मसीही भोइजेइ ।

~~~~~

8 स्तिफनुस अनुग्रह ते शेक्ति सेइं भरपूर भोइतां लोकन चमत्कार ते निशान हिरातो थियो ।

9 आज़ाद भोरे यहूदी लोकां केरू अक प्रार्थना घर थियूं, कुरेनी ते सिकन्दरिया ते किलिकियारे ते आसियारे किछ लोकन मरां किछ स्तिफनुसे सेइं बेंस केरने लगे ।

10 तैना तैन गल्लां केरो जुवाब न देइ बटे, ज़ैना पवित्र आत्मा तैस ज़ोनेरी समझ दिती ।

11 तैखन तैनेई किछ लोक शिखाले, कि तुस झूठ ज़ोइयथ कि, “असेई स्तिफनुस मूसेरे त कने परमेशेरे खलाफ तुहीन केरते शुनोरोए ।”

12 तैखन तैनेई किछ लोक, बुज़ुर्ग ते शास्त्री स्तिफनुसेरां खलाफ बमकाए ते तै दलेइतां महासभा मां पैश कियो ।

13 तैनेई बड़े झूठे गवाह पैश किये, “ते तैनेई गवाही दिती कि ए मैन्हु पवित्र ठारारे ते मूसेरे कानूनेरे खलाफ तुहीन केरने करां बाज़ न एज़्जे ।

14 ते असेई एस मैन्हु करां एन भी ज़ोतू शुनु, कि यीशु नासरी इस मन्दरे डोलेलो, ते तैना रसमां ज़ैना मूसा नेवे दितोरिन बदलेलो ।”

15 तैखन लोक ज़ैना महासभा मां विश्शोरे थी, तैसेरे पासे तककू कि तैसेरू तुतर स्वर्गदूतेरे ज़ेरू लेइहोतू थियूं ।

## 7

~~~~~

1 तैखन महायाजके स्तिफनुस सवाल पुछो, “कुन एना इलज़ाम सच्च्चे आन?”

2 तैनी ज़ोवं, “हे द्लाव ते मेरे बुज़ुर्गाव, मेरी गल शुना, इश्शो पूर्वज अब्राहमे हारान नगरे मां बसने करां पेइलो मेसोपोटामिया इलाके मां थियो, ते महिमा बाले परमेशेरे तैस दर्शन दिचू

3 ते परमेशेरे तैस सेइं ज़ोवं, अपनो देश त अपने रिशतेदारन शैरतां तैस मुलखे मां गा, ज़ै अवं तीं हेइलो ।

4 ताए तै कसिदी केरे मुलखे शैरतां हाराने मां बसोरो थियो, तैसेरे बाजरे मरनेरां पत्ती परमेशेरे तै तैस मुलखे मां आनो ज़ैस मां अज़ तुस बसोरेथ ।

5 पन परमेशेरे तैस इडी किछ भी जेइदात न दिती, बल्के पाव रखने जो भी ज़मीन न दिती, पन वादो ज़रूर कियो कि ई ज़मीन अवं तीं ते तेरी औलादी कब्जे मां देलो हालांकी तेइस अब्राहमे कोई औलाद न थी ।

6 परमेशेरे इन भी ज़ोवं, तेरी औलाद एक्की बखले देशे मां परदेशी भोली, तैना तैन गुलाम बनाले, ते 400 सालन तगर तैन दुख देले ।

7 फिरी परमेश्वर ज़ोवं, जै कौम तैन गुलाम बनानी तैन अवं सज़ा देइलो, ते तैसेरां बाद तैना तैस मुलखे मरां निस्सतां इडी एज्जले ते मेरी आराधना केरेले ।

8 ते परमेश्वर अब्राहमे सेइं करार कियो ते तैस सेइं ज़ोवं, कि निशानेरे रूपे मां सेब्भी घरानेरे नर मैन्हु केरो खतनो केर । ज़ैखन इसहाक ज़रमो ते अठे दिहैडी केरो भोव, त अब्राहमे तैसेरो खतनो कियो, ते एन्चरे इसहाके अपने मट्ठे याकूबेरो खतनो कियो, ते याकूबेरे अपने 12 मट्ठां केरो खतनो कियो ।

9 याकूबेरे मट्ठेईं जलनी सेइं अपने दूला यूसुफ मिस्र मुलखे जो गाने बालन जो बेचो, ते तैनेईं यूसुफ मिस्र मां नेइतां गुलाम बनाव? पन परमेश्वर यूसुफ सेइं साथी थियो ।

10 परमेश्वर तै सैरी मुसीबतन करां छुटेइतां, ते तैस बड़ी अक्ल दिती, ते मिस्ररे फ़िरौन राज़ेरे सामने बड़ी काबलीत दिती, ते फ़िरौन राज़े, यूसुफ मिस्र मुलखेरो ते अपने महलेरो गवर्नर बनाव ।

11 ज़ैस वक्ते यूसुफ थियो त मिस्र मुलख ते कनानारे सारे मुलखे मां काल पेव, ते बड़ी मुसीबत आई, ते इश्शे दादे-पड़दादन खाने जो अन न मैल्लु ।

12 ज़ैखन याकूबे शुनु कि मिस्र मां अन्न आए, त तैनी इश्शे पूर्वज मिस्र मुलखे मां पेइली वार भेजे, तैना यूसुफ सेइं मिले ते अन आनु पन तैनेईं तैन पिशानो ।

13 ज़ैखन तैना दुइयोवं फेरे मिस्र मुलखे मां अन्न आन्ने जे, त यूसुफे अपने आप तैन पिशानाव, ते फ़िरौने भी यूसुफेरी कौमरो पतो लगो कि ए इब्रानी आए ।

14 तैसेरां बाद यूसुफे अपने बाजी याकूब ते तैसेरे 75 मैन्हु केरू टब्बर मिस्र मुलखां मांजो एजनेरो बिस्तार भेजो ।

15 किछ वक्तेरां बाद याकूब मिस्र मुलखे मां जेव, ते तै त इश्शे दादे-पड़दादे तैडी मेरि जे ।

16 तैन केरि लाशां तैट्ठां इश्शे मुलख कनाने मां वापस एन्ही, ते तैनेईं याकूब, तैस ठैरी दफन कियो, जै ठार अब्राहमे चाँदी देइतां घिन्नोरी थी, ते याकूबेरां मट्ठां शेकेम नगररे तैस ठैरी दफन कियो, जै याकूबे हामोरेरी औलादी करां घिन्नोरी थी ।”

17 “परमेश्वर अब्राहमे सेइं अक वादो कियोरो थियो, तैस वादेरो पूरो भोनेरो मौको अव त मिस्रे मां इश्शे लोकां केरि गिनती भी बड़ी बेद्धी जेई ।

18 तैस मौके अक होरो राज़ो मिस्र देशे मां राज़ केरने लगो, जै यूसुफे न थियो ज़ानतो ।

19 तैनी इश्शो कौमी सेइं एरी चलाकी कि ते इश्शे दादन-पड़दादन सेइं एरी बदसलूकी की, तैना एतरे मजबूर किये कि तैना अपने ज़र्मते बच्चे बेइरोवं शारन तांके तैना मेरि गान ।

20 तेन्ने दिहैइन मां मूसा पैदा भोव, तै परमेश्वरेरी नज़री मां बड़ो रोड़ो थियो, ते तै टलाई महीन्न तगर अपने बाजरे घरे मां छेपतां पलतो राव ।

21 पन ज़ैखन जादे च़िरे तगर छुपेईं न बटे, तै दरियाए मां शारो त फ़िरौनेरे कुइयां तै नेव ते अपने मट्ठेरो ज़ेरो पालो ।

22 मूसा नवी मिस्री केरि सैरी शिक्षारो ते तैन केरि सैरी गल्लां केरि वाकफित भोइजेइ, ते गलवाती ते कम्म मां मज़बूत थियो ।”

23 “ज़ैखन मूसा नवी 40 सालां केरो भोव, त तैसेरे मने मां ए गल आई, कि अवं अपने इस्राएली दूलां केरो हाल पतो केरि ।

24 मूसा एक्की इस्राएली मैन्हु पुड़ ज़ुलम भोतो लाहू त तैनी तै बचाव, ते तै ज़ालम मिस्री मैरतां ज़ैस पुड़ ज़ुलम भोरो थियो बदलो घिंनो ।

25 तैनी सोचू, कि तैसेरे दूलां समझेले, कि परमेश्वर तैसेरे ज़िरिये सेइं तैन मिस्री केरि गुलैमी करां तैन मुक्ति देलो, पन तैनेईं न समझू ।

26 मूसा होरसां दूई इस्राएली एप्पू मामेईं लड़ते लाए, ते तैन समझानेरी कोशिश की, ते मूसा तैन ज़ोवं, हे जवानव तुस त एप्पू मामेईं दूला भोतथ, ते तुस किजो एक्की होरि पुड़ ज़ुलम केरतथ?

27 पन जै मैन्हू अपने पड़ोसी पुड़ ज़ुलम करेने लोरो थियो, त तैनी मैने मूसा जो धमकेइतां ज़ोवं, तू केनि असन पुड़ हुकूमत करेनेबालो या हाकिम बनेवरोस?

28 ज़ेन्चरे ती तै मिस्रेरो रानेबालो हीज मारोरो थियो, तेन्चरे तू अज मीं मारने चातस?

29 ए गल शुनते मूसा तैट्ठां नशशो, ते मिद्यान मुलखे मां परदेशी भोइतां राने लगे, ते तैड़ी तैसेरां दूई मट्ठां पैदा भुआं ।

30 40 साल मिद्यान मुलखे मां रानेरे बाद तैस सीनै पहाड़ेरे सुनसान ठारी मां एक्की झल्लेरी अग्गी स्वर्गदूत लाव, ते परमेशरे स्वर्गदूतेरे ज़िरिये तैस सेइं गल की ।

31 मूसा झल्लेरी अग्गी लेइतां कि झल फुकोने नईं लोरू त तै हैरान रेइ जेव, ते ज़ैखन तै हेरनेरे लेइ नेइं जेव त तैनी प्रभुएरी आवाज शुनी ।

32 'अवं तेरे दादे-पड़दादां केरो यानी अब्राहम, इसहाक ते याकूबेरो परमेशर आई,' तैखन मूसा डेरतां कम्बने लगे, इन तगर कि तैस हेरनेरी हिम्मत न भोइ ।

33 तैखन प्रभुए तैस जो ज़ोवं, अपने पांवां केरी जुट्टी खोल्ल, किजोकि ज़ैस ठैरी तू खड़ोस तै पवित्तर ठारे ।

34 मीं मिस्र मुलखे मां अपने लोकां केरि बुरी हालत हेरी, मीं तैन केरू कर लानू ते लेरां शुनोरिन, एल्हेरेलेइ अवं तैन छुटानेरे लेइ उन्ढो ओरोई, हुनी एई अवं तीं फिरी वापस मिस्र मुलखे जो भेजताईं ।

35 'एहे तै मूसो आए ज़ेसेरो इस्राएली लोकेईं पेइलो इन्कार कियोरो थियो, कि तू केनि असन पुड़ हुकूमत करेनेबालो या हाकिम बनेवरोस, ते एहे तै मूसा परमेशरे अपने स्वर्गदूतेरे ज़िरिये सेइं ज़े तैनी बलते झैल्लोए मां लाहोरो थियो, ते छुटानेबालो बनेइतां भेजो ।

36 एनी मैने मिस्र मुलखे ते लाल समुन्दरे मां 40 सालन तगर सुनसान ठैरी मां चमत्कार ते निशान हिराए ।

37 एनी मूसा इस्राएली लोकन सेइं ज़ोरू थियूं, परमेशर तुशे दलान मरां तुशे लेइ अक मेरो ज़ेरो नबी खड़ा केरलो ।

38 एहे मूसा, इशे दादा पड़दादां केरो नबी राव ज़ैखन तैन सुनसान ठारी मां अकोट्टे भोरोए, परमेशरे एक्की स्वर्गदूत सीनै पहाड़े पुड़ मूसे कानून दित्तो ते तैनी इशे दादे पड़दादन तैन कानून दित्तो, मूसे जिन्दगी देनेबाले वचन मैल्ले, तैनी तैना असन तगर पुज़ाए ।

39 पन इशे दादे-पड़दादेईं तैसेरो हुक्म न मन्नो चाव, बल्के इकारा कियो, ते तैना मिस्र मुलखेरे जो वापस गानू चाते थिये ।

40 तैनेईं मूसेरे दूलाए हारूने सेइं ज़ोवं, तू इशे लेइ अक देबतो बना, ज़ै असन अग्गी-अग्गी मिस्र मुलखे जो ज़ले, किजोकि अस न ज़ानम कि मूसा ज़ैनी असां मिस्र मुलखे मरां केदतां आनोरम, तैस कुन भोवं?

41 तैस वक्ते तैनेईं बछुड़ेरी अक मूरत बनाई, ते तैस कां बलिदान ज़ादू, ते अपने हथ्यां केरे बनेवरी मूरती कां बड़ी खुशी मनाने लाए ।

42 एल्हेरेलेइ परमेशरे तैन करां अपनू तुतर फिराव, ते तैना दिहाड़ेरी ते ज़ैदनरे ते अम्बेरे तारां केरि ईश्वरेरे रूपे मां तैन केरि आराधना केरनेरे लेइ शारे, ज़ेन्चरे नेबी केरि किताबी मां लिखोरूए, हे इस्राएली लोकव,

कुन तुस 40 सालन तगर सुनसान ठैरी मां जानवरां केरू बलिदान ते होरू बलिदान मेरे लेइ केरते राए?

43 बल्के तुसेईं एप्पू सेइं साथी भोलेक देबतेरी मूरती ते रिफान देबतेरे तारे छुइतां ज़लते थिये, एना तैना मूरतिन ज़ैन कां तुस मथ्थो टेकते थिये, एल्हेरेलेइ अवं तुसन बाबेले करां भी दूर बसेइलो ।"

44 “सुनसान ठारी मां इश्शे दादन पड़दादन कां गवाहेरो तेम्बु थियो, परमेशरे तै ठहराव ते तैनी मूसा सेइं ज़ोवं, ज़ेन्चरे तीं लोरूए तैसेरे मुताबिक बना।

45 बड़े सालना बाद तैए तेम्बु इश्शे दादे-पड़दादेईं यहोशू सेइं साथी इड़ी आनो, ज़ैस वक्ते तैनेईं गैर कौमन पुड़ अधिकार हासिल कियो, ज़ैना परमेशरे इश्शे दादे-पड़दादां केरे सामने कढे, ते तै तेम्बु दाऊद राज़ेरे वक्ते तगर राव।

46 दाऊद पुड़ परमेशरे अनुग्रह कियो, ते तैनी मिनत की, कि अवं याकूबेरे परमेशरेरे लेइ अक घर बनेईं।

47 पन तैसेरे मट्टे सुलैमाने तैसेरेलेइ मन्दर बनाव।

48 पन परमप्रधान परमेशर हथ्यां केरे बनेवरे मन्दरन मां न राए, ज़ेन्चरे यशायाह नेबेरे किताबी मां लिखोरूए,

49 प्रभु ज़ोते, स्वर्ग मेरो तखते,

ते ज़मीन मेरे पांवां केरि चौकीए,

तुस फिरी मेरे लेइ करू ज़ेरू मन्दर बनाले?

ते मेरे आराम केनेरी ठार केरही ज़ेरि भोली?

50 कुन मीं एप्पू सैरी चीज़ां नईं बनेवरी?

51 “हे ढीठ लोकव, तुस तैसेरी शुन्नी ते मन्नी न चाथ, तुस पवित्तर आत्मारी हमेशा खलाफत केरतथ। ज़ेन्चरे तुश्शे दादे-पड़दादे केरते थिये, तुस भी तेन्चरे केरतथ।

52 नेबन मरां को तुश्शे दादे-पड़दादेईं नईं स्तेवरो? ज़ैनेईं तैस एजनेबाले मसीहेरे बारे मां ज़ोवं ज़ै धर्मी आए, ते ज़ैखन मसीह अव ते तुसेईं धोखे सेइं तै टलुवेइतां मारो।

53 तुसन स्वर्गदूतन करां मूसेरे कानून त मैल्लो, पन तैस पुड़ अमल न कियूं।”

XXXXXXXXXXXXXXXXXXXX

54 ज़ैखन तेनेईं एना गल्लां शुनी त यहूदी लीडर फुकोईं जे, ते स्तिफनुसे जो दंत लगे ज़ापने।

55 पन तैनी पवित्तर आत्माईं सेइं भेरोइतां अम्बेरेरे पासे तक्कू, ते तैनी परमेशेरी महिमा ते यीशु परमेशेरे देइने पासे खड़खड़ो लाव।

56 तैनी ज़ोवं, “हेरा, अवं स्वर्ग खुल्लू लाताईं, ते मैनेरे मट्टे परमेशेरेरे देइने पासे खड़खड़ो लाताईं।”

57 एन शुन्तां तैना ज़ोरे सेइं चिन्डां मारने लगे, ते अक भोइतां सेभेईं तैस पुड़ हमलो कियो।

58 ते तै दीलतां यरूशलेम नगर करां बेइर नीयो ते तैस जो घोड़ेईं बाने लगे ते तै मारो, तैखन तैस पुड़ दोष लाने बालेईं अपने चोगे खोलतां शाऊल नव्वेरे एक्की मैन्हु कां रेखतां छड़डे।

59 ते ज़ैखन तैना स्तिफनुसे जो घोड़ेईं बाने लगगोरो थिये, ते तै स्तिफनुस इन ज़ोइतां प्रार्थना केने लगो, “हे प्रभु यीशु, मेरी आत्मा कबूल केर।

60 फिरी तैनी ज़ैधू केरे भारे विशतां ज़ोरे सेइं ज़ोवं, हे प्रभु एन इस पापेरो दोषी न बनेइयां।” एन ज़ोनेरां पत्ती तैनी प्राण दित्ते।

8

XXXXXXXXXXXXXXXXXXXX

1 शाऊल तैसेरी मौती सेइं राज़ी थियो। तैस्से दिहाड़े यरूशलेम नगरेरे कलीसियाईं पुड़ जुलम भोने लाव ते प्रेरितां केरे अलावा सारे लोक यहूदिया ते सामरियारे इलाकन मांजो तितर-वितर भोए।

2 किछ परमेशेरे भक्त मैनेईं स्तिफनुस नेइतां देवतां छड़डो, ते तैसेरे मरने पुड़ बड़ो शोग कियो।

3 पन शाऊल कलीसियाईं सताने लोरो थियो, ते तै घर-घर गातो थियो, ते विश्वासी मड़दन ते कुआन्शन बेइरोवं घसीटतो थियो, ते कैद केरतां छड़डतो थियो।

XXXXXXXXXXXXXXXXXXXXXXXXXXXXXXXXXXXX

4 पन ज़ैना विश्वासी तितर-वितर भाते थिये तैना खुशखबरी शुनाते ज़ले।

- 5 ते फिलिप्पुस सामरियारे एक्की नगर मां गेइतां मसीहेरो प्रचार करने लगो ।
 6 जैना गल्लां तैन लोकेई फिलिप्पुसेरी करां शुनी, ते जैना निशान तै हिरातो थियो, तैन हेरी-हेरी, तैनेई अक भोइतां मन लाव ।
 7 जैखन फिलिप्पुसे हुक्म दित्तो, त बडे लोकन मरां भूतां चिन्डां मैरतां निस्सी जेआं, ते बडे लोक अधरंगी ते टोंटे बेज्झोइ जे ।
 8 ते तैन केरे वजाई सेइं नगरेरे बडे लोक खुश भोइजेइ ।

?????? ???? ?

- 9 शमोन नव्वेरे एक्की मैने सामरियारे नगर मां सारे लोक अपने जैदेई सेइं हैरान कियारे थिये, ते अपने आपे बड्डो खास मैन्हु बनातो थियो ।
 10 निक्के बडे सब तैसेरे पासे भोइतां ज़ोने लगे, “ए मैन्हु परमेशेरी तै शक्ति ज़ैस ज़ो महान ज़ोतन ।”
 11 तैनी अपने जैदू सेइं बडे च़िरेरां देंते सब हैरान कियारे थिये, एल्हेरेलेइ तैना लोक तैसेरी बडी इज्जत करते थियो ।
 12 पन ज़ैखन फिलिप्पुसे परमेशेरे राज़ेरे ते यीशु मसीहेरी खुशखबरी प्रचार की त लोकेई विश्वास कियो, ते मडदेईं कुआन्शेईं बपतिस्मो नेव ।
 13 तैखन शमौने भी फिलिप्पुसेरे प्रचारे पुड़ विश्वास कियो, ते बपतिस्मो नेइतां फिलिप्पुसे सेइं साथी राने लगे ते तै बडे चमत्कार ते निशान हेरतां हैरान रेइ जेव ।

?????????? ???? ???? ???? ???? ???? ???? ???? ?

- 14 ज़ैखन यरूशलेम नगरे मां प्रेरितेईं शुनू कि सामरियारे लोकेईं परमेशेरू बच्चन कबूल कियोरूए ते तैनेईं पतरस त यूहन्ना तैन कां भेजे ।
 15 ज़ैखन तैना तैड़ी पुजे त तैनेईं तैन लोकां केरे लेइ प्रार्थना की, कि एन पुड़ पवित्र आत्मा उतरे ।
 16 एल्हेरेलेइ कि तैन पुड़ पवित्र आत्मा हेजू न थी उतरोरी, तैनेईं सिर्फ प्रभु यीशु मसीहेरे नव्वे सेइं बपतिस्मो निहीयोरो थियो ।
 17 तैखन यूहन्ना ते पतरस तैन पुड़ हथ रेखतां प्रार्थना की, ते तैन भी पवित्र आत्मा उतरी ।
 18 ज़ैखन शमौने हेरू कि प्रेरितां केरे हथ रखने सेइं पवित्र आत्मा उतरते, त शमौने पेंइसे एन्तां प्रेरितन कां पैश किये ।
 19 ते शमौन ज़ोने लगे, “मीं भी शक्ति देध, कि अवं भी ज़ैस पुड़ हथ रेख्खी त तैस पुड़ पवित्र आत्मा उतरे ।”
 20 पतरस तैस सेइं ज़ोवं, “तेरे पेइंसे तीं सेइं साथी गर्क भोन, किजोकि तू पेंइसन सेइं परमेशेरू दान धिन्नु चातस ।
 21 एस सेवाईं मां तेरो कोई भी हिस्सो नईं किजोकि तेरो मन परमेशेरे कां साफ नईं ।
 22 तू अपनि इस बुरेईं करां मनफिरा, ते प्रभु कां प्रार्थना केर, शैइद प्रभु तेरी इस बुरे खियाले माफ़ केरे ।
 23 मनफिरा अवं हेरताईं कि तू बडे जलनी ते पापेरी गुलैमी मां आस ।”
 24 तैखन शमौने ज़ुवाव दित्तो, “मेरे लेइ प्रभु कां प्रार्थना केरा, कि ज़ैन किछ तुसेईं ज़ोए, तैन मीं पुड़ न एज्जे ।”
 25 ते पतरस ते यूहन्ना गवाही देइतां ते प्रभु यीशुएरू वचन शुनेइतां यरूशलेम नगरे मां वापस आए, ते एइते बारे सामरी लोकां केरे बडे इलौव्वन मां खुशखबरी शुनाई ।

?????????????? ???? ???? ???? ???? ???? ???? ?

- 26 फिरी एरू भोवं कि परमेशेरे एक्की स्वर्गदूते फिलिप्पुसे सेइं ज़ोवं, “उठ ते दक्षिणेरे बत्तां गा, ज़ै यरूशलेम नगरेरां गाज़ा नगरे जो गातीए । ई रेगिस्तानी बत आए ।”

27 तै उठो ते ज़लो जेव, ते बत्ती मां तैस अक कूश मुलखेरो खोजो मैल्लो, जै कूशी केरि रानी कन्दाकारो खजानची थियो, तै आराधना केरने यरूशलेम नगरे मां ओरो थियो ।

28 तै अपने रथे पुड़ च्चेदतां अपने मुलखे जो वापस ओरो थियो, ते यशायाह नेबेरी किताब ज़ोरे-ज़ोरे सेइं पढ़ने लगगोरो थियो ।

29 पवित्र आत्मा फिलिप्पुसे सेइं ज़ोवं, “नेडे गोइतां रथे सेइं साथी च़ल ।”

30 फिलिप्पुस देवइतां रथे कां नेडे पुजो, त तैस करां यशायाह नेबेरी किताब पढ़ती शुनी, ते तैस पुच्छू, “तू ज़ैन पढ़ने लोरोस कुन तैन समझतस?”

31 तैनी ज़ोवं, “ज़ां तगर कोई मीं न समझाए त अवं केन्चरे सेमझी?” ते तैनी फिलिप्पुसे कां मिनत की, कि एई रथे पुड़ विश ।

32 पवित्रशास्त्रे मरां ज़ैन तै पढ़ने लगगोरो थियो, त तैन इन थियूं, “तैनेई तै भैडारो ज़ेरो मारने जो नीयो, ज़ेन्चरे गबडू अपनि उन्ना बरधाने बालां केरे सामने चुप राते, तेन्चरे तैनी भी अपनू आशी न खोल्लू ।”

33 तै घटया समझो जेव ते तैस कोई इन्साफ न मैल्लो, ते कोई भी तैसेरे वंशेरे बारे मां न ज़ोई सके, किजोकि धरती पुड़ तैसेरे वंश भोने करां तैस मारतन ।

34 खोजे फिलिप्पुसे पुच्छू, “अवं तीं कां मिनत केरतां, मीं सेइं ज़ो कि ए नबी कसेरे बारे मां ज़ोते, अपने या होरि केन्चरे बारे मां ज़ोते?”

35 तैखन फिलिप्पुसे ज़ोनू शुरू कियूं, तैनी पवित्रशास्त्रे करां शुरू केरतां यीशुएरो खुशखबरी शुनाई । खोजे तैना गल्लां शुनी ते विश्वास कियो ।

36 बत्तां च़लते-च़लते तैना एककी तालाबे कां पुजे, तैखन खोजे ज़ोवं, “इड़ी तालाब आए, हुनी मीं बपतिस्मो नेने करां कौन रोकी सकते?”

37 फिलिप्पुसे ज़ोवं, “अगर तू पूरे दिले सेइं विश्वास केरतस त बपतिस्मो नेही सकतस,” तैनी जुवाब दित्तो, “अवं विश्वास केरताई कि यीशु ही परमेशेरे मट्टूए ।”

38 फिरी तैनी रथे रोकनेरे लेइ हुकम दित्तो, ते खोजो ते फिलिप्पुस दुइये तालाबे मां जे, ते फिलिप्पुसे तैस बपतिस्मो दित्तो ।

39 ज़ेखन तैना पैनी मरां बेइर निस्से त प्रभुएरी पवित्र आत्मा फिलिप्पुस तैट्टां नेव, ते खोजे तै फिरी न लाव, परमेशेरे तै बचाव ते तै बड़ी खुशी सेइं वापस अपने मुलखे जो जेव ।

40 ते फिलिप्पुस अशदोदे मामेइं निसतो च़लतो सारे इलांवन मां खुशखबरी शुनातो कैसरिया मां पुजो ।

9

☞☞☞☞☞☞ ☞☞ ☞☞☞☞☞☞

(☞☞☞☞☞☞. 22:6-16; 26:12-18)

1 शाऊल प्रभुएरे चेलन धमकाने ते मारने मां मघन थियो, ते तै महायाजके कां जेव ।

2 ते तैस करां दमिश्क नगरेरे प्रार्थना घरां केरे लेइ चिट्ठी मेगगी, कि चाए कोई मइद भोए या कुआन्श ज़ै यीशु पत्ती च़लने बालो भोए, तैस टलेइतां यरूशलेम नगरे मां आने ।

3 ज़ैखन तै च़लतो-च़लतो दमिश्क नगरेरे नेडे पुजो, त अचानक अम्बरेरां लौ आई ते तैसेरे च़ेवरे पासन चमकने लगी ।

4 ते शाऊल ज़मीनी पुड़ खिरको, ते तैस प्रभुएरी आवाज़ आई, “हे शाऊल, हे शाऊल तू मीं किजो स्तातस?”

5 शाऊले एन पुच्छू, “हे प्रभु, तू कौन आस?” तैनी ज़ोवं, “अवं यीशु आई, ज़ैस तू सतातस ।

6 हुनी उठ ते नगरे मां गा, तैड़ी तीं सेइं ज़ोवं गालू, कि तीं कुन केरनूए ।”

27 पन बरनबासे शाऊल एप्पू सेइं साथी प्रेरितन कां आनो ते तैन ज़ोवं, कि केन्चरे दमिश्क नगरेरे बत्तां च़लते-च़लते एस प्रभु यीशु लेइहोरोए, ते प्रभुए एस सेइं गल्लां कियोरिन, ते एनी केतरे दिलेरी सेइं दमिश्क नगरे मां यीशुए नव्वेरो प्रचार कियोरोए।

28 प्रेरितेई बरनबासेरी गल्लां केरो विश्वास कियो, ते शाऊल तैन सेइं साथी राव, ते यरूशलेम नगरे मां गातो राव।

29 ते यूनानी भाषा केरनेबाले यहूदन सेइं भी गलवात केरतो थियो, दिलेर भोइतां प्रभुए प्रचार केरतो थियो, पन तैना तैस मारनेरी कोशिश मां रहते थी।

30 एल्हेरेलेइ विश्वासी ढूलाएई तै कैसरिया नगरे मांजो नीयो, ते तैट्टां तरसुसे नगरे जो भेजो।

31 त सारे यहूदिया इलाके मां ते गलील इलाके ते सामरिया इलाकेरी कलीसियान मां चैन भोव, ते तरक्की भोती जेई, ते तै प्रभुए डरे मां ते पवित्र आत्मार शैन्ति मां च़लती ते बडे लोकेई यीशु मसीह पुइ विश्वास कियो।

~~~~~

32 फिरी एरू भोवं कि पतरस सारे इलाके मां हंठतो फिरो, ते तैन पवित्र लोकन साथी भी पुजो, जैना लुद्दा नगरे मां रहते थिये।

33 त तैस तैडी ऐनियास नव्वेरो अक मैन्हु मैल्लो, तैस अधरंग थियो, ते अठे सालां केरो देतो खट्टी पुइ राहोरो थियो।

34 पतरसे तैस जो ज़ोवं, “हे ऐनियास! यीशु मसीह तीं बझाते, उठ अपनू बछान खडू केर,” तैखने तै बेज्जोइतां खडो भोव।

35 तैखन लुद्दा नगरेरे ते शारोनेरे राने बालेई एन हेरतां प्रभु यीशु पुइ विश्वास कियो।

36 याफा नगरे मां अक कुआन्श थी, ज़ेसारू नवं तबीता थियू (यूनानी भाषाई तैसेरू दोरकास थियू, ज़ेसेरो मतलब हिरनी) तै विश्वासी थी, ते रोड़ा-रोड़ा कम्मां करती ते गरीबां केरि मद्दत करती थी।

37 तैने दिहाइन मां ज़ेइस पतरस लुद्दा मां थियो, तै बिमार भोइतां मेरि जेई, ते तैसारी लाश नेइतां दोपररे कमरे मां रखोरि थी।

38 लुद्दा याफारे नेडे थियू, ते ज़ैखन चेलेई शुनू कि पतरस लुद्दा मां आए, त दूई मैन्हु भेजतां मिनत की, “कि असन कां एजने मां ठढ न ला।”

39 तैखन पतरस तैन सेइं साथी च़लो जेव, ते ज़ैखन तैडी पुजो त तै बा तैस कमरे मां नीयो, सैरी विधवां कुआन्शां लेरां देती थी, ते तैस इलखमेइं खेइ थी, ते तैना लिगडां जैना दोरकास सियोरां थियां हिराने लेगि।

40 पतरसे तैना सब बेइरोवं कढे, ते एप्पू ज़ैधू केरे भारे प्रार्थना केरने लगो, फिरी तैनी लाशारे पासे तुत्तर फरेइतां ज़ोवं, “हे तबीता, उठ।” तैखन तैसां अपनि एछ्छी खोल्ली, ते पतरसे तेकतां खडी भोइ।

41 पतरसे हथेरां टलेइतां खडी की, ते विश्वासी ते विधवां कुआन्शां कुजेइतां ज़ीती ते होशी मां तैन केरे सुपुर्द की।

42 एस गल्लेरी खबर सारे याफा नगरे मां फैली जेई, ते बडे लोकेई प्रभु यीशु पुइ विश्वास कियो।

43 पतरस किछ च़िरे तगर याफा नगरे मां शमीन नव्वेरो एक्की मैनेरे कां राव, ज़े चमडेरू कम केरतो थियो।

## 10

~~~~~

1 कैसरिया नगरे मां अक मैन्हु थियो, तैसेरू नवं कुरनेलियुस थियू, ते तै अक इतालियानी फौवजरो सूबेदार थियो।

2 कुरनेलियुस त तैसेरे घरे सारे लोक परमेशरे करां डरने बाले थिये, कुरनेलियुस यहूदी लोकन बडू दान देतो थियो, ते परमेशरे कां लगातार प्रार्थना केरतो रातो थियो।

3 एककी दिहाड़े कुरनेलियुस दीसां अक रोड़े चारे दर्शन हेरू, परमेशेरो अक स्वर्गदूत तैस कां अव, ते ज़ोने लगो, “हे कुरनेलियुस ।”

4 तैनी तै रोड़े-चारे लाव ते डेरतां ज़ोवं, “हे मालिक कुने?” तैनी तैस सेइं ज़ोवं, “तेरी प्रार्थना ते तेरू दान यादगैरेयर लेइ परमेशेरे कां पुज्जेरू आए ।

5 हुनी तू मैन्हु याफा नगरे मां भेजतां तैस मैन्हु ज़ेसेरू नवं शमौन पतरसे अपने घरे कुजा ।

6 तै शमौनेरे घरे बिशोरो थियो, ज़ै चमड़ेरू कम केरनेबालो थियो, ज़ेसेरू घर समुदरेरे बन्ने ।”

7 ज़ैखन स्वर्गदूत एना गल्लां केरतां ज़लो जेव, त कुरनेलियुस अपने दूई सेवकन ते अपने सिपेहिन मरां अक भक्त सिपाही कुजाव ।

8 ते तैन सारो बिस्तार ज़ोइतां याफा नगरे जो भेजे, कि पतरसे कुजान ।

XXXXXXXXXXXX

9 होरसां ज़ैखन तैना भेजोरे लोक ज़लते-ज़लते नगर नेड़े पुजे । तै दुपारहरां केरो वक्त थियो, तैस वक्ते पतरस बा छ्ती पुड़ प्रार्थना केरने लावरो थियो ।

10 तैस द्लुख लग्गी ते तै किछ खानू चातो थियो, पन ज़ैखन मैन्हु रोट्टी बनाने लगे त तैस बेहोशी ज़ेरि भोइजेइ ।

11 ते तैनी हेरू कि अम्बर खुल्लूए, ते अक च़ादर लाई ज़ै ज़ेवरे कूना टेंगोरी अम्बरेरे पासेरां उन्डी ज़मीनेरे पासे ओरी ।

12 ज़ैस मां ज़मीनेरे सारे जानवर ते पेटेरे भारे ज़लने बाले जन्तू ते अम्बेरां चुड़ोलू तैस च़ादरी मां थियां ।

13 तैखन अक आवाज़ आई, “हे पतरस, उठ ते मार ते खा ।”

14 पन पतरसे जुवाव दित्तो, “नई प्रभु, कधे नई, किजोकि मीं अज़ तगर कोई अपवित्तर ते भिट्टी चीज़ नई खोरी ।”

15 फिरी दुइयोवं बार तैनी आवाज़ शुनी, “ज़ैन किछ परमेशेरे शुद्ध कियोरूए, तू तैस जो भिट्टू न जो ।”

16 टलेइ बार ए आवाज़ आई, ते फिरी तै च़ादर अम्बरेरे पासे ज़ली जेई ।

17 पतरस दिले मां सोचने लगगोरो थियो, कि एस दर्शनेरो कुन मतलब भोइ सकते, ज़ैन अज़ मीं लाव, एतरे मां कुरनेलियुसेरे भेजोरे मैन्हु शमौनेरू घर तोपते-तोपते दारे मां पुजे ।

18 तैनेई हक देइतां पुच्छू, “शमौन ज़ैस जो पतरस ज़ोतन इडी तुशशे कां आए?”

19 हेजू पतरस दर्शनेरे बारे मां सोचने लगगोरो थियो, त पवित्तर आत्मा तैस जो ज़ोवं, “शमौन, हेर टलाई मैन्हु तीं पुच्छने लगोरेन ।

20 खड़ो उठ ते बुन गा, तैन सेइं साथी गाने करां न डेरां, किजोकि तैना मीं भेजोरेन ।”

21 पतरस बुन अव, ते तैन मैनु सेइं ज़ोने लगो, “ज़ैस मैन्हु तुस तोपने लगोरेथ तै अवं आई, ते तुस किजो ओरेथ?”

22 तैनेई जुवाव दित्तो, “असां कुरनेलियुस सूबेदारे ज़ै धर्मी ते परमेशेरे करां डरने बालोए, ते सारे यहूदी तैसेरी तारीफ़ केरतन, एक्के पवित्तर स्वर्गदूते तैस जो ज़ोरूए, तू शमौन पतरसे अपने घरे कुजेइतां तैसेरी गल्लां शुन ।”

23 तैखन पतरसे तैना अन्तर कुजाए, ते तैन केरि खातरदारी की । होरसां पतरस तैन सेइं साथी ज़लो जेव, ते याफा नगरेरे काई दलान मरां किछ तैस सेइं साथी ज़ले जे ।

XXXXXXXXXXXXXXXXXXXXXXXXXXXX

24 एग्री दिहाड़े तैना कैसरिया नगरे मां पुजे, कुरनेलियुस अपने रिशतेदारन ते अपने दोस्तन अकोट्टे केरतां तैन बलगने लाव ।

25 पतरस ज़ैखन कुरनेलियुसेरे घरे पुजो, त कुरनेलियुसे तैसेरी बड़ी आदर खातरी सेइं इज़्जत की, ते क्रोड़ी पव्वन कां रेखतां तैस कां मथ्यो टेको ।

26 पन पतरसे तै खडो कियो ते ज़ोवं, “खडो भो किजोकि अवं भी त अक मैन्हु आई।”

27 फिरी तै कुरनेलियुसे सेइं गल्लां केरतो अन्तर जेव, तैड़ी बडे लोक अकोट्टे बिशशोरे लेइतां,

28 तैस सेइं ज़ोवं, “तुसन पत्तोए इशशे यहूदी केरे लेइ गैर कौमी सेइं मिलनू जुलनु कानूनेरे खलाफे, पन परमेशोरे मीं सेइं ज़ोरूए कि अवं केन्ची मैन्हु जो अपवित्तर या भिट्टो ज़ोई।

29 एन्हैरेलेइ तुसेईं अवं कुजाव त अवं चुपचारे चलो अव। हुनी अवं तुसन पुछ्छताई कि तुसेईं अवं किजो कुजेवरोई?”

30 कुरनेलियुसे ज़ोवं, “अवं च़ेवरे दिहाइना पेइले अपने घरे मां इस मौके कोई टलेइ बजेईं प्रार्थना लोरो थियो केरने, त अचानक अक मैन्हु चमकतां लिगड़ां लगगोरो मेरे तुत्तरे अगर खडो भोव।

31 ते ज़ोने लगो, हे कुरनेलियुस, तेरी प्रार्थना परमेशोरे शुनोरीए ते तेरू दान भी कबूल कियोरूए।

32 एन्हैरेलेइ कोन्ची याफा नगरे मां भेजतां शमौन ज़ैस जो पतरस ज़ोतन, कुजा। तै शमौनेरे कांए ज़ै चमड़ेरू कम केरनेवालो, ते समुदरेरे बन्ने रहते। (ज़ैखन तै एज्जेलो त तै परमेशोरे बारे मां ज़ोलो)

33 तेखन मीं मैन्हु भेजे, ते तीं बडू रोडू कियू कि तू अव। हुनी अस परमेशोरे सामनेम, ताके ज़ैन किछ्छ परमेशोरे ज़ोरू तेन शुनम।”

XXXXXXXXXXXXXXXXXXXX

34 तेखन पतरस ज़ोने लगो, हुनी मीं याकीन भोव, कि परमेशर केन्चेरो तरफदार नई।

35 बल्के हर कौमी मरां ज़ै परमेशोरे करां डरते ते रोड़ां कम्मां केरते परमेशर तैस कबूल केरते।

36 इस्राएली लोकां केरे लेइ परमेशोरे भेजोरे सन्देशेरे बारे मां तुसन पतो आए। परमेशोरे यीशु मसीहेरे ज़िरिये सेइं ज़ै सेन्भी केरो प्रभुए ज़ैनतरी खुशखबरी शुनाई।

37 यहून्नारे बपतिस्मेरो प्रचार केरने करां लेइतां गलील इलाके करां शुरू भोइतां सारे यहूदिया इलाके मां कुन-कुन भोवं, तुस भी जानतथ।

38 केन्चरे प्रभु यीशु नासरी पवित्तर आत्माई सेइं ते शक्ति सेइं अभिषेक कियू, ते तै लोकां केरू भलू केरतो राव, तेनी सब ज़ैना शैतानेरे ज़ाले मां फासोरे थिये, तैना छुटाए, किजोकि परमेशर तैस सेइं साथी थियो।

39 तैनी ज़ैन किछ्छ यहूदी केरे मुलखे मां ते यरूशलेम नगरे मां कमाव, असां तैसेरे गवाह आम, ते तैए यहूदी लीडेरेई यरूशलेमे मां करूसे पुड़ टेंगेइतां माराव।

40 परमेशोरे तैए टलेइयोवं दिहाइे फिरी ज़ीतो केरतां हिराव।

XXXXXXXXXXXXXXXXXXXX

41 तै सैरी लोकेई नई बल्के गवाहैई लाव, ज़ैना परमेशोरे पेइले चुनतां रखोरे थिये, यानी असां ज़ेनेई तैसेरे मुडदन मरां ज़ीते भोनेरां बाद तैस सेइं साथी रोट्टी खोरीए।

42 ते तैनी असन हुक्म दित्तो कि लोकन मां प्रचार केरम ते गवाही देम, कि ई तैए ज़ै परमेशोरे ज़ीते ते फटरां केरो हाकिम भोए।

43 सारे नबी तैसेरे बारे मां गवाही देतन, कि ज़ै कोई तैस पुड़ विश्वास केरेलो त तैस तैसेरे नन्वे सेइं पापां केरि माफ़ी मैले।

44 पतरस हेजू एन ज़ोतो थियो, त पवित्तर आत्मा तैन पुड़ उतरी, ज़ैना बच्चन शुन्ने लोरे थिये।

45 ते ज़ेत्तरे यहूदी विश्वासी पतरसे सेइं साथी ओरे थी, तैना सब हैरान भोए कि गैर कौमन पुड़ भी पवित्तर आत्मा उतरोरीए।

46 किजोकि तैनेई तैना किसमे-किसमेरी भाषां केरते, ते परमेशोरी तारीफ़ केरते शुनोरी थिये, तैखन पतरसे ज़ोवं।

47 “ज़ेन्चरे परमेशोरे असन पवित्तर आत्मा दित्तोरीए तेन्चरे तैन भी दित्तोरीए, कुन कोई एन मैनन् पैनोरो बपतिस्मो नेने करां रोकी सकते?”

10 तै दुइयोवं पेरेहेदारे करां बेडर निस्तां अव, ते लोहेरे फाटके कां पुजो, जै नगरेरे पासे खुलतो थियो, तै फाटक तैन केरे लेइ अपने आप खुल्लो, ते तैना तैट्टां निस्तां दूर पुजे, स्वर्गदूत पतरसे तैड़ी पुजेइतां गैडव भोइ जेव ।

11 तैखन पतरस होशी मां अव, ते ज़ोने लगे, “हुनी मीं पूरू याकीन भोवं, कि परमेशेरे अपनो स्वर्गदूत भेजतां अवं हेरोदेसेरे हथ्ये मरां छुटाव, ते यहूदी लीडेरेई ज़ैन सोचेरू थियूं, तैन वन्ने न दित्तू ।”

12 ज़ैखन तै एस बारे मां सोचने लगगोरो थियो, त मरियमेरे घरे पुजो, जै यूहन्ना ज़ैस जो मरकुस ज़ोते थिये तैसेरी अम्मा थी। तैड़ी बडे विश्वासी लोक अकोट्टे भोइतां प्रार्थना करने लगगोरो थिये ।

13 पतरसे बेडरू दार गुडकावं त अक नौकरानी ज़ेसारू नवं रूदे थियूं, तै दार खोलने आई ।

14 तैसां पतरसेरी गल शुनी ते तैसां गल पिशानी ते बगैर दार खोलनेरां दौवडती खुशी भोइतां आई, ते ज़ोने लगी, पतरस बेडर दारे मां ओरोए ।

15 तैना मैन्हु ज़ोने लगे, “तू कुन पागल भोरिस ।” पन ज़ैखन तैसां रोडेचारे ज़ोवं, कि तै पतरसे, त तैना ज़ोने लगे “पतरस त नई पन पतरसेरो स्वर्गदूत भोलो ।”

16 ते पतरस बेडर दार गुडकातो राव, ते ज़ैखन तैनेई दार खोल्लू त पतरस लेइतां हैरान रेइजे ।

17 पतरसे तैन जो हथ्ये सेइं इशारो कियो, कि चुप राथ, ते फिरी अन्तर एइतां सारो बिस्तार शुनाव, कि अवं केन्चरे परमेशेरे कैदखाने मरां बेडर कढो, ते फिरी ज़ोवं, “याकूबे त तैसेरे होरि मसीह दलान भी पतो देइयथ ।” ते एप्पू केन्ची होरि जगाई जो ज़लो जेव ।

18 ज़ैखन झेझू भोइ त सिपेहिन एप्पू मांमेइं खलबली मेज्जि जेई, कि पतरस कोरां जेव ।

19 ज़ैखन हेरोदेसे तैस तोप्पनेरो हुक्म दित्तो त तैनी सिपेही केरू बियांन थिन्नेरां पत्ती तैन जो कतलेरो हुक्म दित्तो, ते पतरस यहूदिया इलाके मरां कैसरिया नगरे जो ज़लो जेव, ते किछ् चिरे तगर तैड़ी राने लाव ।



20 हेरोदेस मूर ते सैदारे नगरेरे लोकन पुड़ बडो नाराज थियो, तैखन तैना लोक मिलतां तैस कां आए, ते बलास्तुसे ज़ै राजेरो खास मैन्हु थियो, मनेइतां मेल केरनो चाव, किजोकि राजो एरे मुलखेरां तैन केरे मुलखे खर्चो मैलतो थियो ।

21 तैखन तैनी अक दिहाड़ी टुवहलाई ते हेरोदेस राजो अपना राजेरां लिगइं लेइतां आदालतरे तखते पुड़ विश्तां लोकन सेइं ज़ोने लगे ।

22 तैनेई ज़ैखन शुनू त ज़ोने लगे, “ए मैन्हु केरि आवाज नई बल्के परमेशेरेरी आवाजे ।”

23 किजोकि हेरोदेसे परमेशेरेरी तारीफ न की, तैल्हेरेलेइ तैस परमेशेरे स्वर्गदूतेरी एरी मार पेई कि तैसेरी सैरी जानी कीड़े लगगे, ते तै मेरि जेव ।

24 पन परमेशेरेरू बच्चन अग्रोवं बद्धतू जेवं, ते विश्वासी लोकां केरि गिनती बद्धती जेई ।

25 ज़ैखन बरनबास ते शाऊल अपनि सेवा ज़ै तैन केरे सुपुर्द कियोरी थी, तैनेई पूरी की त अन्ताकिया नगरेरां यरूशलेम नगरे जो वापस आए, ते यूहन्ना ज़ैस जो मरकुस ज़ोते थिये, एप्पू सेइं साथी आनो ।

13



1 अन्ताकिया नगरेरे कलीसियाई मां काई नबी ते गुरू थिये, मतलब बरनबास, शमौन ज़ैस जो नीगर भी ज़ोतन, लूकियुस कुरेनी, ते मनाहेम ज़ै मुलखेरे च़ेवरोवं हिसे पुड़ हाकिम थियो ज़े हेरोदेसेरो दुद्ध दला थियो, ते शाऊल थियो ।

2 जैखन तैना बरत रेखतां प्रभुएरी आराधना केरने लग्गोरो थिये, त पवित्तर आत्मा तैन सेइं ज़ोवं, “जैस सेवारे लेइ बरनबास ते शाऊल मीं कुजोरेन, तैसेरेलेइ तैन अलग केरा।”

3 तैखन तैनेई बरत रेखतां प्रार्थना की, ते तैन पुइ हथ रेखतां तैना परमेशेरे कम्मरे लेइ भेजे।

~~~~~

4 शाऊल ते बरनबास पवित्तर आत्माारी तरफां भेजोरे सिलूकिया नगरे जो जे, ते तैट्ठां तैना जिहाजे पुइ च्चेदतां साइप्रस टैपू जो ज़ले।

5 जैखन तैना सलमीसे मां पुजे, त तैड़ी तैना यहूदी केरे प्रार्थना घरे मां परमेशेरू वचन शुनाव, ते यूहन्ना मरकुस भी तैन केरि महत केरनेरे लेइ तैड़ी थियो।

6 जैखन तैनेई सारे ज़ोरे ते नगरन-नगरन मां हंटु फिरू, त तैना पाफुसे नगरे मां पुजे, त तैन केरि मुलाकात एक्की डैइनोडे यहूदी ते झूठे नेवी सेइं भोइ, जेसेरू नवं बार-यीशु थियू।

7 तै तैट्ठेरे हाकिम सिरिगियुस, पौलुस सेइं साथी थियो, जै अक अक्लमन्द मैन्हु थियो, ते तैनी बरनबास ते शाऊल कुजाए ते परमेशेरू वचन शुन्नू चाऊ।

8 पन एलीमास डैइनोडो (किजोकि तैसेरे नंवेरो मतलब डैइनोडो ए) तैन केरि खलाफत केरने लगो, तैन हाकिम यीशु पुइ विश्वास केरने करां रोकनो चाव।

9 तैखन शाऊल जेसेरू नवं पौलुस भी आए, पवित्तर आत्माई सेइं भेरोइतां ध्याने सेइं एलीमास डैइनोडेरे पासे तकने लगो, ते तैस सेइं ज़ोवं,

10 “हे शेतानेरे कोआ, तू हर किसमेरी पाखंडे सेइं ते ज़लैकी सेइं भरतस, ते नेकारो दुश्मन, कुन तू परमेशेरी बत बगाइने करां बाज़ न एज़स?”

11 हुनी प्रभु तेरे खलाफे, तू कानो भोइगानोस, ते किछ् ज़िरे तगर तू दिहाडो न लाएलो।” तैखने तैस आंधरू लेइयोने लगू, ते तै इरां-उरां तोपने लगो, ताके कोई तैस हथेरां टलेइतां ज़लाए।

12 तैखन हाकिमे एन हेरतां, ते प्रभुएरी शिक्षा शुन्तां हैरान राव, ते प्रभु यीशु पुइ विश्वास कमाव।

~~~~~

13 पौलुस ते तैसेरो साथी पाफुस नगरेरां जिहाजे मां पंफूलिया इलाकेरे पिरगा नगरे मां आए, ते यूहन्ना तैन शैरतां वापस यरूशलेम नगरे जो ज़लो जेव।

14 ते तैना पिरगा नगरेरां निस्तां पिसिदिया इलाकेरे अन्ताकिया नगरे मां पुजे जै गलतिया इलाके मां आए। ते आरामेरे दिहाडे प्रार्थना घरे मां गेइतां विश्शी जे।

15 मूसरो कानून ते नेवी केरि किताबी मां पढ़नेरे बाद तैट्ठेरे प्रार्थना घरेरे प्रधाने तैन ज़ोवं, “अगर मैन्हु केरि भलैइयरे लेइ तुस भी किछ् ज़ोनु चातथ त ज़ोथ।”

16 तैखन पौलुस खडो उठो ते हथ्थे सेइं इशारी केरो कि चुप रान ते ज़ोने लगो, “हे इस्राएली लोकव ते परमेशेरो डर मन्नेबाले गैर कौमां केरे लोकव मेरी गल शुना।

17 इन इस्राएली लोकां केरे परमेशेरे इश्शे दादे-पड़दादे चुने, जैखन तैना मिस्र मुलखे मां परदेशी भोइतां रहते थिये, तैन परमेशेरे तरक्की दिती, ते बडे श्रेक्ति सेइं तैट्ठां कडे।

18 ते तै सुनसान टैरी मां लगभग 40 सालन तगर तैन केरि झैल्लतो राव, तैना बार-बार हुक्म ट्लोइते राए।

19 कनान मुलखे मां परमेशेरे सत कौमां नाश केरतां तैन केरि ज़मीन अपने इस्राएली लोकन विरासती मां दिती।

20 एना गल्लां पूरी भोने लगभग 450 साल लगे, तैसेरां बाद परमेशेरे तैन केरे लेइ शमूएल नेबेरे वक्ते तगर हाकिम रखे।

21 जैखन हेजू शमूएल तैन केरो हाकिम थियो त तैन लोकेई राज़ो बनानेरे लेइ दरखुवास की, ते परमेशेरे बिन्ध्यामीनेरे गोत्रे मरां कीशेरू मट्टू शाऊल राज़ो बनावं ते तैनी 40 साल यरूशलेम नगरे मां राज़ कियूं।

22 फिरी तैनी शाऊल हटेइतां दाऊद तैसेरी ठैरी तैन केरो राज्जो बनाव, जेसेरे बारे मां तैनी गवाही दिती, मीं थियैरू मट्टू दाऊद मेरे मनरे मुताबिक मैलोरूए, तैस पुड़ अवं खुश आई, ते तैए मेरी मर्जी पूरी केरेलो ।

23 परमेशेरे अपने वादेरे मुताबिक तैसेरे वंशेरे मरां पापन करां मुक्ति देनेरे लेइ इस्राएले कां यीशु मसीह भेजो ।

24 जेसेरे एजने करां पेइले यूहन्ना इस्राएलेरे सारे लोकन प्रचार कियो, कि पापन करां मनफिराथ ते बपतिस्मो नेथ ।”

25 जैखन यूहन्नारू कम पूरू भोनेबालू थियूं, त तैनी ज़ोवं, “तुस मीं कुन समझतथ? ‘अवं मसीह नई!’ बल्के हेरा, तै मेरे बाद एजनेबालोए, किजोकि अवं त एस काबल नई कि तैसेरे बूटां केरे तसमे भी खोलीं सेखी ।”

26 “हे मेरे दलाव, तुस जैना अब्राहमेरे औलादारे लोकव, ते परमेशेरो डर मन्नेबाले गैर कौमां केरे लोकव, इस मुक्तरो बिस्तार तुसन कां भेजरोए ।

27 यरूशलेम नगरेरे रानेबाले लोकेई ते तैन केरे प्रधानेई यीशु मसीह न पिशानो, ते न नेवी केरि गल्लां सेमझी, जैना हर आरामेरे दिहाड़े पेढतां शुनेई गैती थी ।

28 हालांकी तैन मौतरी सजारे काबल सबूत न मैल्लू, पन फिरी भी तैनेई पिलातुस गवनेर कां दरखुवास की, कि ए मारो गाए ।

29 ते तैनेई सब किछु जैन तैसेरे बारे मां पवित्रशास्त्रे मां लिखोरू थियूं, पूरू कियूं, त तै कूरूसे पुड़ कील देइतां मारो, ते औसैलतां एककी कब्री मां छुड़डो ।

30 पन परमेशेरे तै मुड़दन मरां भी ज़ीतो कियो ।

31 ते जैना लोक गलील इलाके मरां तैस सेइ साथी यरूशलेम नगरे मां ओरे थिये, तैन चेलन काई दिहाड़न तगर यीशु लेइयोतो राव, ते हुनी तैना लोक जैनेई तै लाहोरोए गवाही देतन ।

32 असां तुसन खुशखबरी शुनातम, कि जै वादो परमेशेरे इश्शे दादे-पड़दादन सेइ कियोरो थियो ।

33 कि परमेशेरे यीशु मसीह मुड़दन मरां ज़ीतो केरतां तै वादो पूरू कियो, ते भजना केरि किताबी मां परमेशेर मसीहेरे बारे मां ज़ोते, तू मेरू मट्टूस ते अवं तेरो बाजी भोव ।

34 एन सच्चे, कि परमेशेरे तै मुड़दन मरां भी ज़ीतो कियो, ताके तै न शड़े, परमेशेरे बचने मां एन्ने बियांन कियोरूए,

कि अवं तीं पवित्र ते सच्ची बरकत देलो, जैन केरो वादो परमेशेरे दाऊदे सेइ कियोरो थियो ।

35 ते होरि भजने मां दाऊद ज़ोते,

तू अपने पवित्र मैन्हु शड़ने न देलो ।

36 किजोकि दाऊद त अपने वक्ते मां परमेशेरी मर्जी पूरी केरनेरां पत्ती मेरि जेव, ते अपने दादन-पड़दादन सेइ साथी दफन भोव, ते तैसेरी जान शैडी जेई ।

37 पन जै (यीशु मसीह) परमेशेरे मुड़दन मरां ज़ीतो कियो, त तैसेरे शड़नेरी नौबत न आई ।

38 “एल्हेरेलेइ, हे दलाव, बुझा कि यीशुएरे ज़िरिये सेइ तुसन पापां केरि मैफारी खबर शुनाई गाचे ।

39 तुस मूसा नेबेरे कानूने मुताबिक धर्मी न थी भोने, पन जै कोई यीशु पुड़ विश्वास केरे तै धर्मी भोए ।

40 “एल्हेरेलेइ खबरदार राथ, कोस्कोई एरू न भोए कि नेवी केरि ए गल तुसन पुड़ सच्चे बीते,

41 तुस जैना होरि केरि तुहीन करतथ, हेरा, ते हैरान भोथ, ते बरबाद भोथ,

किजोकि अवं तुश्शे ज़ीते ज़ागत एरू कम केरनेबालोई,

कि अगर कोई तुसन सेइ तैसेरे बारे मां गलवात भी केरे, त तुस कधे विश्वास न केरेले ।”

42 जैखन पौलुस ते बरनबास प्रार्थना घरे मरां चले, त लोक तैन कां मिनत केरतां ज़ोने लगे, कि होरि आरामेरी दिहाड़ी भी एन्ने गल्लां केरे बारे मां ज़ोवं गाए ।

43 जैखन लोक आराधनारे बाद बेइर निस्से, त बड़े लोक पौलुस ते बरनबासे पत्ती चले, ते तैन मां किछ यहूदी थिये, ते किछ नंब्वे यहूदी पंथ धारण कियारे थिये, ते तैनेई तैन सेइं गलबात केरतां तैन समझाव, कि परमेशरे अनुग्रहे मां बनारे राथ ।

44 होरि आरामेरे दिहाड़े लगभग सारू नगर परमेशेरू वचन शुन्नेरे लेइ अकोट्टू भोवं ।

45 जैखन यहूदी लीडरेई एतरे हछे लोक लाए त तैन जलन भोइ, ते पौलुसेरे खलाफ गल्लां लग्गे केरने ।

46 तैखन पौलुस ते बरनबासे दिलेर भोइतां तैन ज़ोवं, “ज़रूरी एन थियू, कि असां पेइले तुसन परमेशेरू बच्चन शुनाम, पन तुस त इन्कार केरने लोरिथ, ते अपनो आप हमेशारी ज़िन्दगरे कावल न समझथ, त हेरा हुनी असां गैर कौमां केरे पासे गातम ।

47 किजोकि प्रभुए असन ई हुक्म दित्तोरोए,

मीं तू मीं तू गैर कौमां केरे लेइ लौ बनोरस,
ताके तुशशे ज़िरिये सारे ज़मीनी पुइ मुक्ति आनी गाए, ते तू ज़मीनरे हर पासे मुक्तरू दार भोस ।”

48 इन शुन्तां गैर कौमां केरे लोक बड़े खुशी भोए, ते परमेशेरी तारीफ़ केरने लग्गे, ते ज़ैना परमेशेरे हमेशारी ज़िन्दगरे लेइ ठहरावरे थिये, तैनेई विश्वास कियो ।

49 ते प्रभुएरू बच्चन सारे मुलखे मां फैली जेवं ।

50 पन यहूदी लीडरेई बड़े भक्त ते इज़्जतदार कुआन्शां ते नगरेरे काई खास मैन्हु भइकाए, तैनेई पौलुस ते बरनबासे सितेइतां तैना तैस इलाके मरां भी केढी छडे ।

51 तैखन पौलुस ते बरनबासे तैन केरे सामने अपने पावां केरि धूइ टुइकतां* तैना इकुनियुम नगरे जो चले जे ।

52 ते चले इकुनियुम नगरे मां खुशी ते पवित्र आत्माई सेइं भरपूर भोते राए ।

14

1 इकुनियुम नगरे मां पौलुस ते बरनबास दुइये ज़ने प्रार्थना घरे मां जे, ते एरू भाषण केरने लग्गे ते बड़े यहूदी लोकेई ते यूनानी लोकेई विश्वास कियो ।

2 पन विश्वास न केरनेवाले यहूदेई, गैर यहूदी लोक भइकाए ते तैनेई विश्वासी मैन्हु विश्वासे करां दूर किये, ते तैन केरे खलाफ़ क्रोध पैदा कियो ।

3 ते पौलुस ते बरनबास काई दिहाड़े तैड़ी राए, ते प्रभुएरी भरोसे पुइ दिलेरी सेइं गल्लां केरते थिये, ते प्रभु तैन केरे ज़िरिये चमत्कार ते निशान करेइतां अपने अनुग्रहेरे वचने सच्चो साबत केरतो राव ।

4 पन नगरेरे लोकन एप्पू मामेइं फूट भोइजेइ, किछ लोक यहूदी केरे पासे भोए, ते किछ प्रेरितां केरे पासे भोए ।

5 यहूदी ते गैर यहूदी अपने प्रधान्न सेइं मिलतां तैन बेइज्जत केरने ते तै घोडेई बाने लग्गे ।

6 त तैन एस गल्लरो पतो लग्गे, तैना तैट्टां नेशशी जे, ते लुकाउनिया इलाकेरे नगरन लुस्त्रा ते दिरबे मां ते तैसेरे आसे-पासेरे इलाके मां चले जे ।

7 ते तैड़ी तैना खुशखबरी शुनाने लग्गे ।

8 लुस्त्रा नगरे मां अक मैन्हु विशारो थियो, जे पावां केरो कमाज़ोर थियो, तै ज़र्मनेरो टोन्टो थियो, ते तै कधी न थियो चलोरो ।

* 13:51 धूइ टुइकतां: इन हिरानेरे लेइ कि परमेशरे तेन लोकां केरो इन्कार कियोरोए ।

9 ते पौलुसेरी गल्लां ध्याने सेइं शुन्ने लगगोरो थियो, पौलुसे तैसेरे पासे ध्याने सेइं तककू त ज्ञानू, कि एसमां एतूरो विश्वासे कि ए बेज्झोइ सकते ।

10 ते पौलुसे तैस मैन्हु ज़ोरे सेइं ज़ोवं, “अपने पावन पुइ खडो भो ।” ते तै तैखने खडो भोव, ते च़लने लगो ।

11 ज़ैखन लोकेई पौलुसेरू एन कम हेरू त लुकाउनिया भाषाई मां ज़ोरे सेइं ज़ोने लगो, “कि देवतो असन कां मैनेरो शकली मां ओरोए ।”

12 ते तैन लोकेई बरनबासेरू नवं ज्यूस रख्वू, (जैन यूनानी देवतेरू नवं थियूं), ते पौलुसेरू हिमेंस नवं रख्वू, (जै होरि देवतां केरो विस्तार देने बालन मरां प्रधान थियो) किजोकि तै गल्लां केरने मां जादे माहिर थियो ।

13 ते ज्यूस देवतेरू मन्दर नगरेरे सामने थियूं, तैसेरो पुजारी दांत ते फूडू केरे हार एन्तां नगरेरे फाटके पुइ पुजो, किजोकि तैना लोक चाते थिये कि असां प्रेरितां केरे लेइ बलिदान केरन ।

14 ज़ैखन बरनबास ते पौलुस प्रेरितेई एन शुनू, त तैना दुखी भोए, ते तैनेई अपना लिगडां छिन्दां ते मैननू मां जे ते ज़ोरे-ज़ोरे ज़ोने लगो ।

15 “लोकव तुस एन कुन केरने लगोरेथ? असां भी तुशे ज़ेरे दुःख सुख झैल्लने वाले मैन्हु आम, ते तुसन खुशखबरी शुनातम, ताके तुस एना फुज़ूल चीज़ां शैरतां जीते परमेशेरे पासे एज्जथ, ज़ैनी धरती त कने अम्बर ते समुन्दरे ते ज़ैन किछ भी एसमां आए तैनी बनोरूए ।

16 तैनी वीतोरे वक्ते मां सैरी कौमन अपनि-अपनि बत्तां च़लने दित् ।

17 फिरी भी तैनी अपनो आप वेगवाह न बनाव, पन अपनि भलाई हेरानेरे लेइ तैनी अम्बेरां झइ दित्ती, ते फसलां केरे लेइ मौसम बनाए, ताके तुसन हछ्छ अन भोए ते तुशे दिल खुशी सेइं भरे ।”

18 एना गल्लां ज़ोइतां तैनेई लोक बेडि मुशकली सेइं रोके, कि एना इशे लेइ बलिदान न देन ।

19 तैखन किछ यहूदी अन्ताकिया नगरे ते इकुनियुम नगरे मरां आए, ते तैनेई लोक अपने पासे केरतां पौलुसे पुइ पथराव केरने लगो, ते तै मुओरो बुझतां नगर करां बेडरोवं घसीटतां नीयो ।

20 ज़ैखन च़ेले तैडी पुजे त तैनेई पौलुस घरे मां आनो ते तै खडो उटो ते वापस नगर मां अव, ते होरसां बरनबासे सेइं साथी दिरवे नगरे जो च़लो जेव ।

XXXXXXXXXXXXXXXXXXXX

21 पौलुस ते बरनबासे तैस नगर मां खुशखबरी शुनाई ते बडे च़ेले बनाए, ते तैसेरां बाद तैना लुस्तूरा ते इकुनियुम नगरे ते अन्ताकिया नगरे मां वापस आए ।

22 तैना हर एक्की नगरेरे च़ेलां केरे मन मजबूत केरते ते ई शिक्षा देते थिये कि विश्वासे मां बनोरे राथ, ते इन ज़ोते थी, “ते असेई बडो दुःख झैल्लतां परमेशेरे राज्जे मां दाखल भोनूए ।”

23 ते तैनेई हर कलीसियाई मां तैन केरे बुज़ुर्ग ठहराए, ते बरतां रेखतां प्रार्थना की, ते तैना परभुएरे सुपुर्द किये, ज़ैस पुइ तैनेई विश्वास कियोरो थियो ।

24 फिरी तैना पिसिदिया इलाके मरां निस्तां पंफूलिया इलाके मां पुजे ।

25 ते पिरगा नगरे मां वचन शुनेइतां त अत्तलिया नगरे मां आए ।

26 तैट्टां ज़िहाजे मां च़ेइतां वापस अन्ताकिया नगरे मां आए, ते तैडी तैनेई तैस सेवारे लेइ ज़ै तैनेई पूरी कियोरी थी, परमेशेरे अनुग्रहरे सुपुर्द कियोरी थी ।

27 अन्ताकिया नगरे मां पुजतां तैनेई कलीसियारे लोक अकोट्टे किये, कि परमेशेरे असन सेइं साथी भोइतां केरहां-केरहां बडां कम्मां कियां! ते गैर कौमां केरे लेइ बत खोल्ली, कि तैना भी यीशु पुइ विश्वास केरन ।

28 ते तैना च़ेलेन सेइं साथी बडे दिहाइन तगर राए ।

1 फिरि किछु लोक यहूदिया इलाके मरां आए, ते विश्वासी दलान ए शिक्षा देने लगे, “अगर मूसेरे रसमेरे मुताबिक तुश्शो खतनो नई भोरो त तुसन मुक्ति न मैल्ली बटे ।”

2 एस गल्ली पुड़ पौलुस ते बरनबासेरो तैन लोकन सेइ बड़ो मतभेद ते बड़ी बेंस भोइ, ते कलीसियारे लोकेई पौलुस ते बरनबास ते किछु होरे मैन्हु चुने कि तैना यरूशलेम नगरे मां गेइतां तैडी एस मसले पुड़ प्रेरितन ते बुजुर्गन सेइ गलबात केरतां हल कढन ।

3 तैखन कलीसियारे लोकेई तैना खर्चा देइतां भेजे, ते जैखन तैना फीनीके ते सामरियारे इलाकन मांमेइ चलोरे थिये, तैनेई ज़ोवं, कि केन्चरे गैर कौमां केरे लोक खुशखबरी शुन्तां मसीह पुड़ विश्वास कियो, ते कलीसियाई मां शामल भोए, एन शुन्तां सारे मसीह दला बड़े खुश किये ।

4 जैखन तैना यरूशलेम नगरे मां पुजे, त तैटेरी कलीसियारे लोक ते प्रेरित ते बुजुर्ग तैन सेइ बेइ खुशी सेइ मिले, ते तैखन पौलुस ते बरनबासे सब किछु बिस्तार दित्तो, कि परमेशरे तैन केरे ज़िरिये सेइ केत्रा-केत्रा कम्मां कियां ।

5 पन फरीसी पंथेरे किछु लोकेई जैनेई विश्वास कियोरो थियो, तैन मरां किछु ज़ोने लगे, “गैर कौमन मरां विश्वास केरनेवालां केरो खतनो कियोरो लोडे, ते एन मूसा नेबेरे कानून पुड़ अमल केरनेरो हुक्म दित्तोरो लोइते ।”

6 तैखन प्रेरित ते बुजुर्ग ए गलबात केरनेरे लेइ अकोट्टे भोए ।

7 बड़ी बेंस भोनेरे बाद पतरसे तैन खड़े भोइतां ज़ोवं, “हे मेरे दलाव, तुस ज्ञानतथ कि बड़े चिरे पेइले परमेशरे अवं तुसन लोकन मरां चुनो, ताके गैर कौमन मेरे ज़िरिये खुशखबरी शुनाई गाए ते तैना विश्वास केरन ।

8 परमेशर जै दिलेरो हाल ज्ञानते, तैनी तैन भी इश्शी ज़ेरि पवित्तर आत्मा देइतां इन हिराव, कि परमेशरे तैना अपने लोकां केरे ज़ेरे कबूल किये ।

9 ते विश्वास केरनेरे ज़िरिये सेइ तैन केरे मन पवित्तर केरतां असन मां ते तैन मां कोई फर्क न रखवो ।

10 त हुनी तुस परमेशेरी अज़मैइश किजो केरतथ? कि गैर कौमन मरां ओरे चलन (यानी विश्वासी लोकन) पुड़ एत्रो बोझ किजो रखतथ, जै न असेई छुइयोए ते न इश्शे दादे-पड़दादे छुइयोए ।

11 एरू केरनू ठीक नई, किजोकि इश्शू याकीन त इने कि प्रभु यीशु मसीहेरे अनुग्रह सेइ तैन केरे पापां केरि मुक्ति भोली, तेन्चरे इश्शी मुक्ति भोली, न कि मूसेरे कानून सेइ ।”

12 तैखन सारे लोक चुपचाप बरनबास ते पौलुसेरी गल्लां शुन्ने लगगे, कि परमेशरे केन्चरे गैर कौमन मां तैन केरे ज़िरिये केरहे-केरहे निशान ते चमत्कार किये ।

13 जैखन तैना चुप भोए त याकूब ज़ोने लगो, “मेरे दलाव मेरी गल शुना ।”

14 शमौन पतरसे रोइचारे ज़ोवं, कि परमेशरे पेइले केन्चरे गैर कौमन पुड़ सिद्धी नज़र की, ताके तैन मरां मैन्हु चुनतां अपने लोक बनाए ।

15 नेबी केरू बच्चन भी एसेरू ज़ेरू ज़ेन्चरे लिखोरूए कि ।

16 एसेरां बाद अवं फिरि एइतां दाऊदेरू राज बनेइलो, जैन तैसेरे दुश्मनेई नाश कियोरू थियू ।

17 ताके बाकी सारे लोक ते गैर कौमन समेत जैना मीं कुजोरेन मेरे लोक भोन, ते मीं तोप्पन ।

18 ए तैए प्रभु ज़ोते जै दुनियारे शुरुआती करां इन गल्लां केरि खबर देतो अब ।

19 “एल्हेरेलेइ मेरो खियाल ईए, गैर कौमन मरां जैना लोक परमेशरे कां एइतन, तैन अस यहूदी केरो कानून मन्नेरे लेइ मजबूर न केरम ।

20 बल्के तैन चिट्ठी लिखतां एन ज़ोम कि मूरतन कां चैद्वोरी चीज़ां करां दूर रान, ते बदमेशी ते गलचैटी देइतां मारोरे जानवरां केरू मास न खान ते खून न खान ।

21 किजोकि बड़े पेड़ले नगर-नगरे मां मूसेरे कानूनेरो प्रचार केरनेबाले भोते आए, ते तैना हर आरामेरे दिहाड़े प्रार्थना घरे मां पेढ़ी गाती थी।”

~~~~~

22 तैखन प्रेरित ते बुजुर्ग ते सारी यरूशलेमेरे सारे कलीसिया मिलतां एन रोडू समझू, कि असन मरां किछ मैन्हु चुने गान, मतलब यहूदा, जैस जो बरसब्बास ज़ोतन ते सीलास जैना दलान मां खास आन, ते तैन पौलुस ते बरनबासे सेइं साथी अन्ताकिया नगरेरे कलीसियाई मां भेज्रम।

23 ते तैनेई तैन केरे हथ्थे इन लिखतां भेज्रू, “अन्ताकिया नगरे ते सीरिया ते किलिकिया इलाकां केरे रानेबाले विश्वासी दलान जैना गैर कौमन मरां आन, प्रेरितां ते बुजुर्ग दलां केरू नमस्कार!

24 असेई शुनेरूए, कि किछ मैन्हु बगैर अजाजतां तुशे इड़ी आए, ते तैनेई अपनि गल्लेई सेइं तुशो दिल परेशान कियो।

25 एल्हेरेलेइ असेई एन ठीक समझू, कि इट्टां दूई मैन्हु अपने दलारे बरनबास ते पौलुस सेइं साथी तुसन कां भेज्रम।

26 एना एरे मैन्हु आन कि जैन इशे प्रभु यीशु मसीहेरे लेइ अपनि जानरी भी परवाह नई।

27 एल्हेरेलेइ असेई यहूदा ते सीलास भेज्रोरेन, ते तैना एप्पू भी एना गल्लां शुनाले।

28 पवित्र आत्मा, ते असेई एन ठीक समझू, कि इना ज़रूरी गल्लां केरे अलावा तुसन पुइ होरो बोझ न देम।

29 बस्सा तुस मूरतन कां चाढ़ोरे बलिदाने ते खून करां ते गल दुबेइतां मारोरे जानवरे करां ते बदमाशी केरने करां दूर राथ एन तुशे लेइ रोडू भोलू। अग्रोवं जो शुभकामना”

30 बस्सा तैना मैन्हु च़लते-च़लते अन्ताकिया नगरे मां पुजे, तैड़ी तैनेई कलीसियारे लोक अकोट्टे केरतां ए चिट्ठी तैन केरे हवाले की।

31 तैना चिट्ठी मां लिखोरी गल्लां पेढ़तां बड़े खुशी भोए।

32 यहूदा ते सीलास एप्पू भी नबी थिये, तैनेई तैट्टेरे विश्वासी दलान शिक्षा दित्ती ते तैना विश्वासे मां पक्के बनाए।

33 किछ दिहाड़ना बाद तैट्टेरे विश्वासी दलाएई आनन्दे सेइं ते प्रार्थना केरतां वापस भेजे, ताके अपने भेज्रने बालन कां वापस गान।

34 सीलास अन्ताकिया नगरे मां रानेरो फैसलो कियो ते यहूदा अकैल्लो वापस यरूशलेमे जो अव।

35 ते पौलुस ते बरनबास अन्ताकिया नगरे मां रुकी जे, तैड़ी तैना काई होरि लोकन सेइं मिलतां लोकन प्रभु यीशुएरे वचनेरी शिक्षा दैते राए ते खुशखबरी शुनाते राए।

~~~~~

36 किछ च़िरां बाद पौलुसे बरनबास सेइं ज़ोवं, “च़ल असां तैन सारे नगरन मां गाम, ज़ैड़ी असेई खुशखबरी शुनावरी थी, ते तैन विश्वासी दलान सेइं मुलाकात केरम, ते हेरम कि तैन केरो कुन हाले।”

37 तैखन बरनबासे यहून्ना ज़ैस जो मरकुस ज़ोतन, साथी नेनो चाव।

38 पन पौलुसे ठीक न समझू, कि यहून्ना तैन सेइं साथी गाए, किजोकि तै पंफूलिया इलाके मां कम शैरतां अलग भोरो थियो।

39 पौलुस त बरनबासे एप्पू मामेई बड़ी अनवन भोइ, ते तैना अलग भोए, बरनबास ते मरकुस ज़िहाजे मां साइप्रस जो च़लो जे।

~~~~~

40 पन पौलुसे सीलास एप्पू साथी नीयो, ते विश्वासी दलाएई तैन केरे लेइ प्रार्थना की, ते तैना परमेशेरे अनुग्रहेरे सुपुई कियो ते तैना तैट्टां च़ले जे।

41 पौलुस सीरिया ते किलिकिया इलाकन मामेइ निस्सो जलतो ते कलीसियां केरे विश्वासी लोकन मज्जवूत केरतो जेव ।

## 16

~~~~~

1 तेना फिरी दिरब नगरे ते लुस्तुरा नगरे मां आए, तैड़ी अक चेलो तीमुथियुस नव्वेरो रातो थियो, तैसेरी अम्मा यहूदी थी, ते तै मसीह पुड़ विश्वास केरती थी, पन तैसेरो बाजी यूनान मुलखेरो रानेवालो थियो ।

2 तीमुथियुस लुस्तुरा नगरे मां ते इकुनियुम नगरेरे विश्वासी दलान मां बड़ो रोड़ो मैन्हु थियो ।

3 पौलुसेरी इच्छा ई थी, कि तै तैस साथी ने, तैन यहूदी केरि वजाई जैना तैड़ी रहते तैसेरो खतनो कियो, किजोकि तैना सब ज्ञानते थी कि तैसेरो बाजी यूनान मुलखेरो रानेवालो थियो ।

4 पौलुस ते तैसेरे साथी नगर-नगरे मामेइ जलते जे, तैट्टेरे विश्वासी लोकन तैना हुक्मां केरे बारे मां ज्ञोते जे, जैना यरूशलम नगरे मां प्रेरितेई ते बुजुर्गेई मिलतां ठहरावरे थिये, ताके लोक तैन पुड़ अमल केरन ।

5 बस्सा कलीसियां विश्वासे मां पेक्की भोती जेई, ते तैन केरि कलीसियां केरि तैधात बद्धती जेई ।

~~~~~

6 पौलुस ते तैसेरे साथी फरुगिया ते गलातिया इलाकन मामेइ निस्तां जे, किजोकि पवित्र आत्मा तैना आसिया इलाके मां बच्चन शुनाने करां रोकोरे थिये ।

7 ते तैना मूसिया इलाकेरे नेडे पुजतां, वितूनिया इलाके मां गानू चाते थिये, पन यीशुएरे आत्मा गाने न दित्ते ।

8 एल्हेरलेइ तैना मूसिया इलाकेरे नेडेरां त्रोआस नगरे मांजो जले जे ।

9 राती पौलुसे अक मैन्हु दर्शने मां लाव, “तै मकिदुनी इलाकेरो थियो, तै खड़ो भोइतां पौलुसे कां मिनत केरने लोरो थियो, कि पार समुन्दरेरे मकिदुनिया इलाके मां एइते इश्शी महत् केर ।”

10 तैसेरे इस दर्शन हेरनेरां पत्ती लूशी अस पार मकिदुनिया इलाके मां गानेरे लेइ तियार भोइ जे, किजोकि असेई बुझ्कि परमेशेरी असां तैड़ी खुशखबरी शुनानेरे लेइ कुजवरेम ।

~~~~~

11 असां त्रोआस नगरेरां जिहाजे मां जे, ते पनेरू सफर केरतां सुमात्राके टैपू पुड़ आए, ते तैट्टां होरसां नियापुलिस नगरे मां आए ।

12 तैट्टां असां फिलिप्पी नगरे मां पुजे, जैन मकिदुनिया इलाके मां खास नगरे, ते रोमी केरि बेसती मांए, ते अस तैस नगरे मां किछ् दिहाडे एए ।

13 आरामेरे दिहाडे असां नगरेरे फाटके मरां निस्तां दरियाए पुड़ पुजे, किजोकि असन उमीद थी कि तैड़ी यहूदी केरि प्रार्थना केरनेरी कोई ठार भोनीए, असां तैड़ी गोइतां बिश्शी जे, तैड़ी किछ् कुआन्शां थी, असां तैन सेइं गल्लां केरने लगे ।

14 इश्शी गल्लां शुन्ने बैली कुआन्शन मां अक परमेशेरी भक्त लुदिया नव्वेरी थी, तै थुआतीरा नगरेरी राने वाली थी, ते बैंगनी लिगडां बेचने वाली थी, ते प्रभुए तैसेरो मन खोल्लो, कि तै पौलुसेरे गल्लन पुड़ ध्यान केरे ।

15 जैखन तैसां ते तैसाे पूरे टब्बेरे बपतिस्मो नीयो त तै विनती केरतां जोने लगी, “अगर तुस लोक मीं प्रभुएरी ईमानदार दासी समझतथ, त मेरे घरे चला ते बिश्शी राथ,” ते तैसारी मिनत शुन्तां असां खुशी भोए ।

~~~~~

16 एक्की फेर असां प्रार्थना केरनेरी ठारी जो जलारे थिये त असन अक दासी मैल्ली जै भूतां केरे महती सेइं एजनेवाले वक्तेरे बारे मां ज्ञोती थी । ते अपने मालिकां केरे लेइ बडे पेइसे कमाती थी ।

17 तै पौलुसे पत्ती ते असन पत्ती ज़ली ते ज़ोने लगी, “ए मैन्हु परमप्रधान परमेशेरो दासे, ते एना असन पापां केरि मुक्तरी बत हिरातन ।”

18 तै काई दिहाड़े एन्ने केरती राई, पन पौलुसे जिच भोव, ते मुडतां तैस भूते जो ज़ोवं, “अवं तीं यीशु मसीहेरे नंब्वे सेइं हुक्म देताई निस्सी गा, ते तै तैखने तैस मरां निस्सी जेई ।”

19 ज़ैखन तैसेरे मालिकेइं हेरू कि इशशी कमैइयरी उमीद टलुटी जेई, त तैनेई पौलुस ते सीलास टलेइतां चौके मां प्रधानां केरे हवाले किये ।

20 तैनेई पौलुस ते सीलास हाकिमन कां पैश किये, ते ज़ोने लगे, “एना यहूदीन ते इशशे नगर मां बड़ी खलबली मचाने लगोरेन ।

21 ते एरे रुवाजेरी शिक्षा देतन, ज़ैन केरू केरनू ते मन्नु असन रोमे मां रानेबालान केरे इशशे लेइ बिलकुल भी ठीक नई ।”

22 एन शुन्तां सारे लोक पौलुस ते सीलासेरे खलाफ अकोट्टे भोए, ते हाकिमेई तैन केरां लिगडां खोलतां छिन्दां ते सोटेई बानेरो हुक्म दित्तो ।

23 सिपैहीयेइं तैन खूब बेंतेइं बैही ते कैदखाने मां छुडे, ते कैदखानेरे प्रधाने हुक्म दित्तो, कि रोडेचारे परहो दित्तो गाए ।

24 तै हुक्म शुन्तां तैना आंधरी कोठी मां छुडे, ते तैन केरे पावन लेकडरी बेड़ि लेइ ।

????? ?? ?????????? ?????????? ????? ??????

25 एध्नी राती पौलुस ते सीलास प्रार्थना केरने मां मघन थिये, ते परमेशेरां भजना लोरे थी ज़ोने, ते होरे कैदी भी शुन्ने लोरे थिये ।

26 अचानक अक भुंजल अव, ते कैदखानेरे बुनीयाद हिल्ली ते सारां दारां खुल्ली जेआं, ते सैरी कैदी केरि बेड़ि भी खुल्ली जेई ।

27 कैदखानेरो प्रधान बीड़ो ते खडो उठो, ते तकने लगो, ते हेरते कि कैदखानेरां दारां खुल्ली जोरेन, त तैनी समझू कि सारे कैदी नशशोरेन, ते तैनी अपनि तलवार खिचची कि अवं अपनो आप मेरी छेड़डी ।

28 पन पौलुसे ज़ोरे सेइं ज़ोवं, “अपनो आप न मार किजोकि असां सब इडी आम ।”

29 तैखन तै दीयो बैलतां अन्तर जेव, ते पौलुसे ते सीलासेरे पावन पुड पेव,

30 फिरी तैनी तैना बेइर आने ते ज़ोने लगो, “जनाव अवं कुन केरि, कि मेरी मुक्ति भोए?”

31 तैनेई ज़ोवं, “प्रभु यीशु मसीह पुड विश्वास केर, त तीं ते तेरे टब्बरे पापन करां मुक्ति मैल्लनीए ।”

32 ते तैनेई तैस त तैसेरे टब्बरे प्रभुएरू वचन शुनाव ।

33 तैखने तैने राती पौलुस ते सीलास नेइतां तैन केरे ज़खम धोए, ते तैनी तैसेरे सारे टब्बरे बपतिस्मो नीयो ।

34 फिरी तैनी तैना अपने घरे ने, ते तैन खाने जो रोट्टी दित्ती, ते सारे टब्बरे परमेशेरे पुड विश्वास केरतां बड़े खुश थिये ।

35 होरसां झेझ हाकिमेई सिपाही भेजतां बिस्तार भेजो, कि तैन मैनु हथरां छेड़ी देथ ।

36 दरोगा पौलुसे जो ज़ोवं, “हाकिमे हुक्म दित्तोरोए कि पौलुस ते सीलास कैदखाने मरां हथरां छुडा, एन्हरेलेइ तुस खुशी सेइं चले गाथ ।”

37 पन पौलुसे तैन सेइं ज़ोवं, “तैनेई अस ज़ैना रोम मुलखेरे राने बालेम, बगैर कसूरे सेब्बी केरे सामने मारे कुटे ते कैदखाने मां छुडे, ते हुनी चुपचारे हथरां छुडने चाते? पन एन न भोइसखे, तै एप्पू एज्जे ते असन बेइर कढे ।”

38 सिपैहीयेइं गेइतां हाकिमन बिस्तार दित्तो, कि पौलुस ते सीलास रोम मुलखेरे राने बालेन, ते तैना डेरि जे ।

39 तैनेई तैड़ी एइतां तैन करां माफ़ी मग्गी, ते फिरी तैना कैदखाने मरां बेइर आने ते मिनत की, कि नगर मरां चले गाथ ।

40 बस्सा पौलुस ते सीलास कैदखाने मरां बेइर निस्से ते लुदियारे घरे जे, ते तैड़ी विश्वासी दलान सेइ मिले ते तैन शान्ति देइतां चले जे ।

## 17

???????????? ???? ???? ???? ? ???? ???? ?

1 पौलुस ते सीलास तैसेरां बाद अम्फिपुलिस ते अपुल्लोनिया नगरन मांमेइं गेइतां थिस्सलुनीके नगरे मां आए, तैड़ी यहूदी केरू अक प्रार्थना घर थियूं ।

2 पौलुस अपने रीतरे मुताबिक प्रार्थना घरे मां टलाई आरामेरे दिहाइन तगर पवित्रशास्त्रेरी किताबी मरां तैन सेइं बेंस करतो राव ।

3 पौलुस तैन केरो मतलब खोल्ली-खोल्ली समझातो थियो, “कि यीशु मसीहेरो दुःख झैल्लनो ते मुइदन मरां जीतू भोनू जरूरी थियूं, कि जैस यीशुएरे बारे मां अवं प्रचार करतम, तैए मसीह आए ।”

4 तैन मरां किछ यहूदी ते गैर कौमां केरे लोक जैनेई विश्वास कियोरो थियो, ते होरि भी बेइ भक्त कुआन्शां जैनेई विश्वास कियोरो थियो पौलुसे ते सीलासे सेइं मिली जेईं ।

5 पन यहूदेई जलनी सेइं काई नगरन मां बुरे लोक अकोट्टे केरतां हंगामो केरनो शुरू कियो । तैनेई यासोनेरे घरे पुइ हमलो कियो ताके पौलुसे ते सीलासे लोकां केरे सामने आनन ।

6 पन जैखन तैना न मैल्ले त यासोन त काई होरे विश्वासी दला घसीटतां नगरेरे हाकिमन कां आने, ते ज़ोरे-ज़ोरे सेइं ज़ोने लगे, “एन मैनेई हर टैरी परेशानी फैलावरी, ते अज़ इड़ी भी पुजोरेन ।

7 ते एना यासोने अपने घरे मां रखोरेन, ते एना लोक महाराजरे हुकमेरी खलाफत केरतन, ते ज़ोतन कि राजो त यीशु आए ।”

8 ए गल शुन्तां नगरेरे हाकिम ते सारे लोक परेशान भोए ।

9 ते तैनेई यासोन ते बाकी लोक ज़मानती पुइ हथरां छडे ।

???????? ???? ???? ???? ? ???? ?

10 इलोझां विश्वासी दलाएई पौलुस ते सीलास तैट्टां बिरीया नगरे जो भेजे, जैखन तैना तैड़ी पुजे त तैना यहूदी केरे प्रार्थना घरे मां जे ।

11 बिरीया नगरेरे लोक थिस्सलुनीके नगरेरे यहूदन करां भले थिये, तांए तैनेई खुशखबरी बेइ खुशी सेइं कबूल की, तैना रोज़ एना गल्लां केरे बारे मां गलबात केरते थिये, कि पौलुसेरी गल्लां सेञ्ची आन कि नई ।

12 एल्हेरेलेइ काई यहूदेई ते काई होरि यूनानी इज्जतदार कुआन्शेई भी यीशु पुइ विश्वास कियो ।

13 जैखन थिस्सलुनीके नगरेरे यहूदन पतो लगो कि पौलुस बिरीया नगरे मां परमेशेरू वचन शुनाते, ते तैना लोकन भटकाने ते हलचल मचाने लगगे ।

14 तैखन विश्वासी दलाएई पौलुस समुन्दरेरे बन्ने भेजो, पन सीलास त तीमुथियुस तैड़ी राए ।

15 ते पौलुसेरी मदत केरनेवाले एथंस नगरे तगर जे, ते सीलास ते तीमुथियुसेरे लेइ बिस्तार नेइतां चले जे, कि मीं कां जल्दी एज्जे ।

???????? ???? ???? ???? ?

16 जैखन पौलुस एथंस नगरे मां तैन बलगने लग्गोरो थियो, त एन तकते कि सारू नगर मूरती सेइं भेरतांए त तैसेरो दिल बड़ो उदास भोव ।

17 एल्हेरेलेइ तै प्रार्थना घरे मां यहूदन ते तैन सेइं जैना परमेशेरो डर मन्नेवाले (भक्त) गैर कौमन मरां यहूदन मां ओरे थिये चौके मां गेइतां मिलतो थियो, ते तैन सेइं रोज़ बेंस करतो थियो ।

18 किछ इपिकूरी ते किछ स्टोईकी उस्ताद तैस सेइ बेंस करेने लगे, ते तैन मरां किछ ज़ोने लगे, “बकवादी कुन ज़ोनु चाते?” ते किछ ज़ोने लगे, “ए त होरि देबतां करो पतो देनेबालो भोइ सकते, किजोकि पौलुस यीशुएरो ते कने ज़ीते भोनेरी खुशखबरी शुनातो थियो।”

19 तैखन तैनेई तै एप्पू सेइ साथी अरियुपगुस नव्वेरे मन्दरे मां नेव, ते तैस पुच्छू, “कुन अस ज़ैनी सकतम कि ज़ैस नव्वे पंथेरी तू शिक्षा देतस, तै कुने?

20 असां तेरे ऐशेरां बेड़ि आजीब गल्लां शुन्ने लोरेंम, ते असां एन ज़ाननू चातम कि एन केरो कुन मतलबे?”

21 (द्रासले मां एथेसेरे लोक कुन देशी कुन परदेशी अपनि फुरस्तरो सारो मौको होरि कम्मां केरे बजाहे सिफे नव्वीं-नव्वीं गल्लां ज़ोने ते शुन्ने मां गुज़ारते थियो।)

~~~~~

22 तैखन पौलुस अरियुपगुसे नव्वेरे मन्दरे मझाटे खडो भोइतां ज़ोने लगे, “हे एथेसेरे लोकव, अवं हेरताई कि तुस हर गल्ली मां देबतन बडो उच्चो दरजो देतथ।

23 ज़ैखन अवं तुशे नगर मां हंठतो फिरतो थियो, त मेरी नज़र तुशे पूजनेरी चीज़न पुड़ ते बलिदानेरी ठारी पुड़ पेई, ज़ैस पुड़ लिखोरू थियू, अनजान परमेशेरे लेइ, बस्सा तुस ज़ैस ज़ानथ नन्ना ते तैसेरी पूजा करतथ, अवं तुसन तैसेरे बारे मां ज़ोताई।

24 ज़ैनी परमेशेरे दुनिया ते सैरी चीज़ां बनेवरिन, तै धेरतरो ते अम्बेरो मालिके, तै हथ्यां केरे बनेवरे मन्दरन मां न राए।

25 तैस मैनेरे मद्दतरी ज़रूरत नई, किजोकि तै केन्ची चीज़री ज़रूरत नई, तै सैरन ज़िन्दगी ते सांस ते सब किछ देते।

26 तैनी एक्की मैन्हु सेइ हर कौमारे लोक पैदा किये, ताके सारे ज़मीनी पुड़ आबाद भोन, तैनी तैन केरि ज़िन्दगरे दिहाड़े बनाए ते रानेरे लेइ ठार बनाई।

27 परमेशेरे एन कियू ताके लोक तैस तोप्पन ते शैइद तोपते-तोपते तैन मैल्ली गाए, हालांकी तै असन केन्ची करां दूर नई।

28 किजोकि तै असन सेइ साथी आए ते ज़ीते रातम ते चलतम फिरतम, ज़ेन्चरे कि तुशे लिखने बालेई भी ज़ोरूए, ‘असां त तैसेरे बच्चेम।’

29 ते परमेशेरे बच्चे भोइतां सोचेरू लोड़े, कि ईश्वरत्व सोन्ने, चँदरी, या घोड़ेरी मूरतरीए ते ज़ै केन्ची मैनेरे हाथां केरि कारीगरीए ते खियाले सेइ आए।

30 एल्हेरेलेइ परमेशेरे लोकां अज्ञानतारे वक्ते पुड़ ध्यान न दित्तू, ते हुनी तै मैनन् सेब्मी टैरन हुकम देते कि मन फिरान।

31 किजोकि तैनी अक दिहाड़ी ठुवालेवरीए ज़ैखन तै सच्चे सेइ दुनियारो इन्साफ एक्की एरे मैनेरे ज़िरिये सेइ केरेलो, ज़ै तैनी रखखोरुए, ते तै तैनी मुडदन मरां ज़ीतो केरतां ए गल सैरी मैनन् साबत कियरीए।”

32 ज़ैखन तैनेई मुडदां केरि आदालतरे बारे मां शुनू त तैन मरां किछ एस गल्लरी मज़ाक बनाने लगे, ते किछेई ज़ोवं, “अस एस बारे मां फिरी कोस्कोई शुन्मले।”

33 एन हेरतां पौलुस तैटटां निस्तां ज़लो जेव।

34 पन किछ लोक तैस सेइ मिली जे, ते तैनेई प्रभु पुड़ विश्वास कियो, तैन मरां अक दियुनुसियुस ज़ै अरियुपगुसरो प्रधान थियो, ते अक कुआन्श थी, तैसारू नवं दमरिस थियू, ते तैन केरे अलावा होरे भी बड़े मैन्हु थियो।

18

~~~~~

1 तैसेरां बाद पौलुस एथेस नगरे मरां निस्तां कुरिन्थुस नगरे मां अव।

2 तैड़ी तैस अक यहूदी मैल्लो, तैसेरू नवं अक्विला थियूं, ते तै पुन्तुस इलाकेरो रानेबालो थियो, ते तैसेरी कुआन्शरू नवं पिरस्किल्ला थियूं, ते दुइये साथी इतालिया इलाकेरां ओरां थियां, किजोकि क्लौदियुस हाकिमे हुक्म दित्तोरो थियो, कि सारे यहूदी रोमे मरां चले गान ते पौलुस तैन कां जेव ।

3 किजोकि पौलुसेरो ते अक्विलारो तेम्बु बनानेरो बुपार थियो, तांए पौलुस तैस सेई साथी राव, तैना कम करने लगे ।

4 ते पौलुस हर आरामेरे दिहाडे तैन केरे प्रार्थना घरे मां गातो थियो, ते यहूदी लोकन ते यूनानी लोकन समझाने लगे कि, यीशु पुड़ विश्वास केरा ।

5 जैखन सीलास ते तीमुथियुस मकिदुनिया इलाके मां आए, त पौलुस वचन शुनाने मां मघन थियो, ते लगातार यहूदन सेइं एन ज़ोतो थियो कि यीशु ही मसीह आए ।

6 पन जैखन यहूदी खलाफत त कने तुहीन करने लगे, त पौलुसे अपना लिगडां टुडकां\* ते ज़ोने लगे, “तुशशो खून तुशशे दोगे पुड़ भोए! अवं बेइलज़ाम आई, अज़्जेरे बाद अवं गैर कौमन कां गोइलो ।”

7 तैखन प्रार्थना घरे मरां निस्तां तीतुस यूस्तुस नंब्बेरे एक्की परमेशेरे भक्त मैनेरे घरे जेव, जै गैर कौमी मरां थियो, जेसेरू घर प्रार्थना घरे सेइं साथी थियूं ।

8 एस प्रार्थना घरेरो प्रधान किरस्पुसे ते तैसेरे सारे टब्बेरे प्रभु पुड़ विश्वास कियो, ते बडे कुरिन्थिसेरे लोकेई शुन्तां विश्वास कियो ते बपतिस्मो नीयो ।

9 एक्की राती प्रभुए पौलुसे सेइं दर्शने मां गल की, ते ज़ोवं, “डर नन्ना ते तू ज़ो ते चुप न रा,

10 किजोकि अवं तीं सेइं साथी आई, ते कोई तीं पुड़ हमलो केरतां नुकसान न पुज़ेई सकेलो, किजोकि इस नगर मां बडे लोकन ज़ैना मीं पुड़ भरोसो रख्वेले ।”

11 पौलुस तैड़ी डेढ साल राव, ते तैन परमेशेरी खुशखबरी शिखालतो राव ।

12 जैखन गल्लियो, अखाया इलाकेरो हाकिम थियो, त यहूदेई मिलतां पौलुसे पुड़ हमलो कमाव, ते पौलुस टलेइतां आदालतरे तखते कां नीयो, ते ज़ोने लगगे ।

13 “एन लोकन समझाते, कि परमेशेरी आराधना एन्चरे केरा, जै मूसेरे कानूनेरे बिलकुल बरखलाफे ।”

14 पौलुस जैखन किछ ज़ोने बालो थियो, त गल्लियोए यहूदन सेइं ज़ोवं, “हे यहूदी लोकव, अगर केन्वी जुर्मेरी या कोई बड़ी बुरी गल भोधी त अवं तुशशी शुनेथो ।

15 पन तुशशो इलज़ाम त सिर्फ खाली गल्लां केरो ते नंब्वां केरो ते तुशशे कानूनेरे बारे मां आए, ते अवं न ज़ैनी, किजोकि अवं एन गल्लां केरो हाकिम बन्नो न चैई ।”

16 ते गल्लियो हुक्म दित्तो कि एन तखते करां बेइरोवं कढे ।

17 तैखन तैनेई सेब्भेई प्रार्थना घरेरो प्रधान सोस्थिनेस इन्साफेरे तखतेरे सामने कुटो, पन गल्लियोए एन गल्लां केरि किछ भी परवाह न कमाई ।

\*\*\*\*\*

18 पौलुस काई दिहाडे कुरिन्थुस नगरे मां राव, ते फिरी तै विश्वासी ढलान करां चलो जेव ते किखरया मां अपनि मिनत पूरी केरनेरे लेइ अपने दोगेरी टिंड बनाई । ते बादे मां समुन्दरी जिहाजे मां सीरिया इलाके जो चलो जेव, ते पिरस्किल्ला ते अक्विला भी तैस सेइं साथी थियां ।

19 जैखन तैना इफिसुस नगरे मां पुजे त पौलुसे पिरस्किल्ला ते अक्विला तैड़ी छडां, ते पौलुस एक्की प्रार्थना घरे मां जेव ते यहूदन सेइं बेंस करने लगे ।

20 जैखन तैन लोकेई तैस कां मिनत की, “कि तू हेजू किछ दिहाडे असन कां विश ।” त पौलुसे तैन सेइं मन्नु,

\* 18:6 लिगडां टुडकां: परमेशर तैन लोकन सेइं खुश न भोव एन्हरो ई निशान ।

21 पन ज़ैखन पौलुस तैट्टां चलो त तैनी तैन सेइं वादो कियो, “अगर परमेशेरी मर्जी भोइ त अवं फिरी तुसन कां एज्जेलो!” ते फिरी पौलुस ज़िहाजे मां ज़ेदतां इफिसुसे जो चलो जेव।

22 ते कैसरिया नगरे मां ज़िहाजे मरां ओस्सो त तैनी यरूशलेम नगरे मां गेइतां तैन केरि कलीसियारे लोकन सेइं मिलने जेव, ते फिरी तै अन्ताकिया नगरे मां अव।

????? ?????? ?????? ??? ?????????? ??? ?????

23 अन्ताकिया नगरे मां किछ् चिर बितनेरे वाद तै तैट्टां चलो जेव, ते गलातिया ते फूरुगिया इलाकां केरे सब चेलन मजबूत केरतो जेव।

??????? ??? ??? ??????????

24 अपुल्लोस नव्वेरे अक यहूदी थियो, तैसेरू जर्म सिकन्दरिया नगरे मां भोरू थियूं, तै बडो ज्ञानी मैन्हु थियो, ते पवित्रशास्त्रेरे बारे मां बडो ज्ञानकार थियो, तै इफिसुस मां अव।

25 तैनी प्रभुएरे बत्तरी शिक्षा शिखोरी थी, ते लगातार यीशुएरे बारे मां ठीक-ठीक शुनातो ते शिखालतो थियो, पन तै सिर्फ यूहन्नारे बपतिस्मे तगर ज्ञानतो थियो।

26 तै प्रार्थना घरे मां बेधड़क चारे ज़ोने लगो, पन पिरस्किल्ला ते अक्विला तैसेरी गल्लां शुन्तां, तैनेई तै अपने घरे नीयो, ते परमेशेरी बत्तारे बारे तैस होरू भी रोडे चारे ज़ोवं।

27 ज़ैखन तैनी थापू कि पार ओस्तां अखाया इलाके जो गाए ते विश्वासी दूलाएई तैस हिम्मत दित्तो, ते तैट्टेरे चेलन जो चिट्ठी लिखी, कि एस सेइं रोडेचारे मिलाथ, ते तैनी तैड़ी पुजतां तैन केरि बड़ी मद्दत की, ज़ैनेई अनुग्रहरे वजाई सेइं विश्वास कियोरो थियो।

28 किजोकि तै बडे ज़ोरे शोरे सेइं यहूदन सेइं बेंस केरतां खुल्ले आम पवित्रशास्त्रे सेइं सावत केरतो थियो, कि यीशु ही मसीहे।

## 19

??????? ??? ??? ?????

1 ज़ैखन अपुल्लोस कुरिन्थुस नगरे मां थियो, त पौलुस बेइए सारे इलाकन मेइं इफिसुस नगरे मां अव, तैसेरी तैड़ी होरे भी काई चेलन सेइं मुलाकत भोइ।

2 तैनी तैन पुच्छ्, “कुन विश्वास केरते वार तुसन पुड़ पवित्र आत्मा उतरोरी थी?” तैनेई जुवाब दित्तो, “असेई त पवित्र आत्माेरे बारे मां शुनेरू भी नई।”

3 तैखन पौलुसे ज़ोवं, “फिरी तुसेई कोस किसमेरो बपतिस्मो नीयो?” तैनेई जुवाब दित्तो, “यूहन्नारो।”

4 पौलुसे ज़ोवं, “यूहन्ना त तैन लोकन बपतिस्मो दित्तो ज़ैनेई पापन करां मनफिराथ, ते यूहन्ना इस्राएली लोकन ज़ोवं, ज़ै मेरे बाद एजनेबालोए, तैस पुड़ विश्वास केरा, ज़ै मसीहे आए।”

5 एन शुन्तां तैनेई प्रभु यीशु मसीहेरे नव्वे सेइं बपतिस्मो नीयो।

6 ते ज़ैखन पौलुसे तैन पुड़ हथ रखे त पवित्र आत्मा तैन पुड़ उतरी, त तैना अलग-अलग भाषा केरने लगे, ते भविष्यवाणी केरने लगे।

7 एना सब लगभग 12 मैन्हु थिये।

8 फिरी पौलुसे प्रार्थना घरे मां गेइतां टलेइ महीन्न तगर बडे निडर भोइतां परमेशेरे राज़ेरे बारे मां लोकन सेइं बेंस केरने समझाने लाव।

9 पन तैन मरां किछ् सकत दिलेरे भोइ जे, ते तैनेई विश्वास केरनेरे बजाहे इन्कार कमाव, ते एस पंधेरे बारे मां बुरू ज़ोने लगे, एल्हेरेलेइ पौलुस तैन करां कनारे भोइ जेव, ते चले भी कनारे किये ते तुरन्नुसेरे सुकुले मां बेंस केरतो ते तैन शिखालतो राव।

10 दूई सालन तगर एरू भोटू राव, एड़ी तगर कि आसिया इलाकेरे रानेबाले कुन यहूदी ते कुन यूनानी सेभेई प्रभुएरू बच्चन शुनू।

11 ते परमेशर पौलुसेरे ज़िरिये सेइं बडां-बडां कम्मां ते चमत्कार हिरातो थियो।





31 ते आसिया इलाकेरे हाकिमन मरां भी तैसेरे काई दोस्तेई तैस जो बिस्तार भेजतां ते मिनत केरतां ज़ोवं, कि तमाशो हेरेन न गेइयां किजोकि तैड़ी बड़ो खतरोए ।

32 तैड़ी पैन्चयती मां खलबली मन्चौरी थी, किजोकि किछ लोक नहरे देते थियो, ते बड़े लोकन पतो न थियो कि तैना तैड़ी किजो अकोट्टे भोरेन ।

33 तैखन तैनेई सिकन्दर, जै यहूदी लोकेई खड़ो कियोरो थियो, भीड़ी मरां किछ लोकेई तै अग्रोवं कियो, ते सिकन्दर हथ्थे सेइं इशारो केरतां लोकां केरे सामने जुवाब देनो चातो थियो ।

34 पन ज़ेरो लोकन पतो लगो कि ए यहूदी आए, त सब ज़ोरे-ज़ोरे लगभग दूई घंटन तगर चिन्डां मारने लगगे, “इफिसुस नगरेरे देबी अरतिमिस, महान आए ।”

35 तैखन एक्की मन्त्री नगरेरे लोकन चुप करेइतां ज़ोने लगगे, “कि इफिसुस नगरेरे रानेबालो कौन न ज़ाने कि इफिसुस नगर लोक अरतिमिस देवारू मन्दरे, ते एसेरे मूरतरो बड़ो रखवालेन, ज़ैन अम्बेरेरां विछड़ोरो थी ।

36 ज़ैखन एना गल्लां केरे खलाफ केन्चे किछ न ज़ोवं त ठीक थियूं कि तुस चुप राथ ते बगैर सोच सेमझतां किछ न केरेथ ।

37 तुसेईं ज़ैना मैन्हु इड़ी आनोरेन तैनेई न मन्दरे लुटेरूए न इश्शी देवारे खलाफ तुहीन कियोरीए ।

38 अगर दिमेत्तियुस ते एसेरे कारीगिरन केन्ची पुड़ दाओ केरनोए त आदालतरू दार खुल्लूए, ते हाकिम भी आन, ज़ैड़ी तुस एक्की होरि पुड़ दाओ केरि सकतथ ।

39 पन अगर तुस होरि कोन्ची चीज़रे बारे मां पुछनू चातथ त तैसेरो फैसलो भी पंचैइती मां कियो गालो ।”

40 मीं इस गल्लरो डरे कि अगर हाकिम इस हंगामेरे बारे मां शुनेलो त ज़ोलो कि अस रोमी सराकारारी खलाफरज़ी केनेरी कोशिश केरने लोरेम, ते अस एतरे लोकां केरे अकोट्टे भोनेरो कुन जुवाब देमेले ।

41 एन ज़ोनेरां बाद तैनी पैन्चैयत खतम कमाई ।

## 20

~~~~~

1 ज़ैखन हंगामो मुक्को त पौलुसे चेल कुजाए ते तैन केरो होसलो बधव, ते तैन विशशा ज़ोइतां मकिदुनिया इलाके जो ज़लो जेव ।

2 तैस सारे मुलखे मांमेइं चेलन होसलो देइतां यूनान इलाके मां (ज़ैस जो अखाया इलाको भी ज़ोतन) अव ।

3 तैड़ी तै टलाई महीने राव, ते ज़ैखन तै समुन्दरी ज़िहाजे मां सीरिया इलाकेरे पासे गानेबालो थियो, त यहूदी केरे लीडरेई तैस बत्तां मारनेरी साज़िश बनाई, तैस पतो लगो त एल्हेरेलेइ तैनी एन रोड़ समझू कि मकिदुनिया इलाके मांमेइं जो सीरिया इलाके जो गाए ।

4 बिरिया नगरेरे रानेबाले पुरुसरू मदट्टू सोपतरुस, ते थिस्वलुनीकि मांमेइं अरिस्तरुस ते सिकुन्दुस ते दिरवे नगरेरो गयुस, ते तीमुथियुस ते आसियारो तुखिकुस ते त्रुफिमुस आसिया इलाके तगर असन सेइं साथी ज़ले जे (लूका भी तैन सेइं साथी थियो) ।

5 पन तैना अग्रोवं गेइतां त्रोआस नगरे मां असन बलगतरे राए ।

6 ते अस अखमीरी रोट्टी केरे तिहारे बाद फिलिप्पी नगरे मरां सफर केरतां पंच दिहैड़ी मां त्रोआस नगरे मां तैन कां पुजे, ते रात दिहैड़ी तैड़ी राए ।

~~~~~

7 हफतेरे पेदले दिहाड़े असां प्रभु भोजेरे लेइ अकोट्टे भोए, ते पौलुसे होरसां तैट्ठां अग्रोवं गानू थियूं, त एल्हेरेलेइ तै तैन सेइं गल्लां केरने लाव ते एब्धी राती तगर तैन शिक्षा देने लाव ।

8 दोपरे ज़ैड़ी असां सब अकोट्टे विशशोरे थियो, त तैड़ी काई दीये बलते थियो ।

9 त अक नौजवान दैरी मां बिशोरो थियो, ते तैसेरू नवं यूतुखुस थियूं, तै पौलुसेरो प्रचार ठड्डी तगर शुन्तां तैस निड्ल आई, ते टलेइयोवं छतरां उन्ढो खिरको, ते तै मेरि जेव ।

10 पौलुस बुन अव ते तै नौजवान टलेइतां तैस सेइं लिपटो ते ज़ोने लगो, “कि डरा नन्ना ए ज़ीतोए ।”

11 फिरी तैनेई वा गोइतां सेभेई मिलतां रोट्टी खाइ, ते फिरी टलेकडोने तगर बच्चन शुनाने लगो, तैखन तै तैटटां चलो जेव ।

12 लोकेई तै नौजवान ज़ीतो घरजो नीयो, ते तैन बडी खुशी भोइ ।

~~~~~

13 असां अगगर गोइतां ज़िहाज्जे मां सुवार भोइ जे, ते अस्सुस नगरे जो चले जे, ताके तैडी पौलुसे भी ज़िहाज्जे मां चादम, किजोकि पौलुसे पेइले पैदल गानेरो बिस्तार कियोरो थियो ।

14 ज़ैखन तै असन अस्सुस नगरे मां मैल्लो त तै असेई ज़िहाज्जे मां चादो ते असां मितुलेन नगरे मां आए ।

15 तैटटां असां ज़िहाज्जे मां सुवार भोइ जे ते अस खियुस ज़ीरेरे सामने पुजे, ते अगरी दिहाडे असां सामुसे मां पुजे, ते होरसां अस मीलेतुस नगरे मां आए ।

16 पौलुसे थापेरू थियूं, कि अवं इफिसुस नगरे मां उतरेलो, किजोकि तै आसिया इलाके मां जादे वक्त बीतानो न थियो चातो, किजोकि तै जल्दी मां थियो, कि अगर भोइसखे, त तै पिन्तेकुस्त तिहारेरे दिहाडे यरूशलेम नगरे मां राए ।

~~~~~

17 ज़ैखन अस मीलेतुस नगरे मां ओस्स, त पौलुसे इफिसुस नगरेरे कलीसियारे वुजुर्गन जो बिस्तार भेजो कि तैना एज्जन ।

18 ज़ैखन तैना तैस कां आए, त तैनी तैन सेइं ज़ोवं, तुस ज़ानतथ कि पेइले दिहाडेरां ज़ैखन अवं आसिया इलाके मां पुजो, अवं तेइसेरो देंतो अज तगर हर वक्त तुसन सेइं साथी केन्चरां राव ।

19 मतलब बडे नेरमी सेइं, ते ऐंखरू बछो डी-बछो डी, ते तैन अजमैइश मां ज़ैना यहूदी केरि चलेकी सेइं मीं पुइ एई, अवं प्रभुएरी सेवा केरतो राव ।

20 ते ज़ैना-ज़ैना गल्लां तुशशे लेइ फैइदेरी थी, तैना मीं तुसन सेइं बगैर केन्चेरे डरे तुसन सेइं ज़ोई छेइडी, ते बल्के ज़ैन किछ भी शिखालु दिले सेइं ते घर-घर गोइतां शिखालु ।

21 बल्के अवं यहूदी लोकां ते यूनानी लोकां केरे दुइयां केरे सामने गवाही देताई कि तैना परमेशेरे सामने पापन करां मन फिरान, ते इशशे प्रभु यीशु मसीह पुइ विश्वास केरन ।

22 हेरा हुनी अवं पवित्तर आत्मारि गल मेन्तां यरूशलेम नगरे जो गाताई, ते मीं पतो नई कि तैडी मीं पुइ केरि-केरि गुजरेली ।

23 अवं सिर्फ एतूरू ज़ानताई कि पवित्तर आत्मा मीं हर नगर मां एन ज़ोती राई, कि बन्धना ते मुसीबत मेरे लेइ तियारन ।

24 पन मेरी जान, मेरे लेइ कोई कदर कीमत न रखे, त बस्सा अवं एन चाताई कि मेरी दौड पूरी भोए ते तैस सेवाई पूरी केरि, ज़ै मीं परमेशेरे अनुग्रहेरे खुशखबरी पुइ गवाही देनेरे लेइ प्रभु यीशु करां मैल्ली ।

25 ते हुनी अवं ज़ानताई, कि तुसेई अवं ज़ैन मां परमेशेरे अनुग्रहेरी खुशखबरी हर पासे शुनातो राव, त मीं फिरी न लाएले ।

26 एन्हेरेलेइ अवं तुसन साफ-साफ ज़ोई छेइताई, कि ज़ैना लोक यीशु पुइ विश्वास केरने बगैर मेरेले, त अवं तैन केरे जिमेवार नई ।

27 किजोकि अवं बगैर केन्ची डेरेरां तुसन शिखालतो राव, कि परमेशेरी मर्जी तुशशे लेइ कुने ।

28 बस्सा अपनो ते सारे विश्वासी लोकां केरो खियाल रखा, जेसेरे लेइ तुस पवित्तर आत्मारि तरफां चुनोरेथ, कि परमेशेरी कलीसियारी रखवाली केरा, ज़ै लोक तैनी अपने खूने सेइं घिन्नेरन ।

29 अवं ज्ञानताई कि मेरे गानेरां बाद झूठे उस्ताद मारने बालां गिदां केरे जेरे तुसन मां एज्जले, ते जेन्चरे तैना भैड्डन मारतन तेन्चरे तैना झूठे उस्ताद तुसन नुकसान पुज्जाले।

30 बल्के तुसन मरां भी एरे लोक खडे भोले जैना सन्न द्लोड मरोड केरतां छुडेले, ताके चलन अपने पासे केरन।

31 एल्हेरेलेइ वीझे राथ ते याद रखा, कि अवं द्लाई साल लेरां देंतो रात दिहैडी हर एककी तैन खबरदार केरतो राव।

32 हुनी अवं तुसन परमेशेरे, ते तैसेरे अनुग्रहरे वचनेरे सुपुर्द केरताई, कि जै तुसन विश्वासे मां मज्जबूत केरि सकते, ते तुसन तैस जागिरारो हकदार बनेइ सकते, जेसेरो वादो तैनी कियोरोए जैनी तुस पवित्र कियोरेथ।

33 मीं केन्चरे सोन्ने चेंदारू या लिगडां केरू लालच नई कियेरू।

34 तुस एप्पू ज्ञानतथ कि मीं अपने हथेई सेई अपने ते अपने सैथी केरि हर अक जरूरत पूरी कियोरीए।

35 मीं तुसन सब किछु केरतां हिराव, कि एन्चरे सेईं कमजोरन समैली सकतम, कि प्रभु यीशु मसीहेरी गल्लां याद रखम, “कि देनू नेने करां जादे धने।”

36 एन गल्लां केरे बाद पौलुसे जैधू केरे भारे बिश्तां तैन सेब्बन सेईं साथी प्रार्थना की।

37 तैना सब गले मिलतां लेरां देने लगे, ते पौलुसे फुम्मड़ी देने लगे।

38 खास केरतां तैना इस गल्ली सेईं दुखी थी, जैना तैनी ज़ोरी थी, कि तुस मीं फिरी कधी न लाएले, ते तैनेईं तै जिहाजे तगर पजाव।

## 21

### XXXXXXXXXXXX

1 जैखन असां तैन करां चले जे त समुन्दरेरे सफर शुरू कियू, त सिधे बत्तां कोस जज़ीरे मां आए, ते होरसां अस रूदुस मां पुजे, ते फिरी तैटटां पतरा जज़ीरे मां चले जे।

2 ते अक जिहाजे फीनीके इलाके जो गांतू मैल्लू, त असां तैस पुड चेटतां सफर शुरू कियू।

3 जैखन इश्शी नजर साइप्रेस जज़ीरे पुड पेई, त अस तैस बाए हथे ओसैलतां सीरिया इलाके जो चले जे, सूर नगरे मां ओस्से, किजोकि इश्शे जिहाजे तैडी किछु बोझ उसालनो थियो।

4 तैडी असन चले मैल्ले ते तैन कां असां सत दिहाडे राए। तैनेईं पवित्र आत्मारो ज़ोने मुताबिक पौलुसे यरूशलेम नगरे मां गानेरे लेइ ठाको।

5 सत दिहैडना बाद कुआन्शां मट्टन समेत नगरेरे बेइर तगर साथी आए, ते समुन्दरेरे बन्ने पुजतां असेईं जैधू केरे भारे बिश्तां प्रार्थना की।

6 फिरी असां तैन करां अलग भोए त जिहाजे मां चेटतां चले जे, ते तैना भी अपने-अपने घरजो चले जे।

7 जैखन असां सूर नगरे मरां सफर पूरू केरतां पतुलिमयिस मां पुजे, ते विश्वासी दलान जो नमस्कार केरतां तैन सेईं साथी अक दिहाड़ी राए।

8 ते होरसां असां तैटटां चेलतां कैसरिया नगरे मां आए, ते फिलिप्पुस खुशखबरी प्रचार केरनेबालेरे घरे जे ते तैडी राए, जै सत्तन मरां अक थियो।

9 तैसेरी चेटरे कुवैरी कुइयां थी, ते तैना भविष्यवाणी केरती थी।

10 जैखन अस तैडी काई दिहाडे राए, त तैडी अक नवी थियो, जेसेरू नवं अगबुस थियू, तै यहूदिया इलाकेरां ओरो थियो।

11 तैनी असन कां एइतां पौलुसेरे मजे सेईं अपने हथ पाव बंधे ते ज़ोने लगे, “पवित्र आत्मा इन ज़ोतीए कि जैस मैनेरू इन मज्ज आए, तैस यरूशलेम नगरेरे यहूदी इसेरे ज़ेरे बंधेले, ते गैर कौमां केरे लोकां केरे हवाले केरेले।”



31 जैखन तैना तैस मारनेरी कोशिश करने लवरे थिये, त फौजी टोलरे सरदारो कां खबर पुज्जी, कि बड़े लोकेई यरूशलेम नगरे मां खलबली मन्त्रोरीए ।

32 तैखन तैना सिपेहिन ते सूबेदारन एन्तां तैन कांजो दौडो, ते तैनेई फौजी टोलरे सरदारो ते सिपाही लेइतां पौलुस मारनो कुटनो बंद कियो ।

33 फौजी टोलरे सरदारो नेडे गेइतां पौलुस अपने कब्जे मां कियो, ते तैस दूई शांगलेइं सेइं बंधनेरो हुकम दित्तो, ते फिरी तैनी पुच्छ्छ, “ए मैन्हु कौने ते एनी कुन कियेरू आए?”

34 तैस भीड़ी मां किछ्छ लोक चिन्डां मारते थिये, ते एतरी शौर मन्त्रोरी थी, कि तैस पूरो पतो न लगो ते तैनी हुकम दित्तो, कि पौलुसे किल्लै मां पुजाथ ।

35 जैखन पौलुस सिपाहीयेइं पेवड़न उबरो चलेवरो थियो, त लोकां केरे वजाई सेइं सिपाहीयेइं पौलुस उबरो छुइतां नेव ।

36 सारे लोक जैना पौलुसे पत्ती पेवरे थिये, तैना चिन्डां मारते थिये, “एस मार !”

37 पौलुसे सिपाही किल्लै मां पुज्जाने बाले थिये, त तैनी फौजी टोलरे सरदारो सेइं ज़ोवं, “कुन मीं अज़ाज़ते कि अवं तीं सेइं किछ्छ ज़ोई?” ते तैनी पुच्छ्छ, “तू यूनानी भाषा ज्ञानतस?”

38 कुन तू तै मिस्र मुलखेरो रानेबालो नई, जैनी किछ्छ चिरे पेइले सरकारी खलाफत कियोरी थी, ते 4000 मैनन् जैन कां हथियार थिये तैना जंगले मां नीयोर थिये?

39 पौलुसे ज़ोवं, “अवं त यहूदी आई, ते तरसुस नगरेरो राने बालोई, जैन किलिकिया इलाकेरू मुशूर नगर, अवं तीं कां मिनत करताई मीं लोकन सेइं गल करने दे ।”

40 जैखन तैनी अज़ाज़त दिती, त पौलुस पेवड़न पुड़ खडो भोइतां लोकन जो हथ्ये सेइं इशारो कमाव कि चुप रान । ते जैखन तैनेई चुप कमाई त पौलुसे इब्रानी भाषाई मां ज़ोनू शुरु कमाव:

## 22

~~~~~

1 “मेरे दूलाव ते बुज़ुगांव, मेरी गल शुना, जे अवं अपनि सफैई मां पैश लोरोई करेने ।”

2 जैखन लोकेई तैस करां इब्रानी भाषा ज़ोती शुनी त तैना चुप रेइजे, तैखन पौलुसे ज़ोवं:

3 “अवं त यहूदी आई, ते अवं किलिकिया इलाकेरे तरसुस नगरे मां ज़रमो, पन इस नगर मां गमलीएल करां शिक्षा हासिल की, ते अपने दादां-पड़दादां केरे कानूने ठीक तरीके सेइं शिखोरीए, ते अवं भी परमेशरेरे लेइ एरो मघन थियो, जेरे अज़ तुस आथ ।

4 मीं मडदन ते कुआन्शन बंधतां, ते कैद केरतां, ई पंथ इड़ी तगर सताए, ते तैना माराए भी ।

5 एप्पू महायाजक ते सब बुज़ुर्ग एस गल्लेरे गवाह आन, कि मीं दमिश्क नगरे मां रानेबाले यहूदी दूलां केरे लेइ चिट्ठी एन्होरी थी, ते अवं तैड़ी एस नीती सेइं जोरो थियो, ते जैना तैड़ी भोन तैन सज़ा देनेरे लेइ बेन्धतां यरूशलेम नगरे जो नेही ।”

~~~~~

(~~~~~ 9:1-19; 26:12-18)

6 “अवं जैखन सफर केरते-केरते दमिश्क नगरेरे नेडे पुजो, त तै दुपाहरां केरो मौको थियो । ते अम्बेरां अक बड़ी लौ आई ते मेरे च़ेवरे पासन बलने लगी ।

7 ते अवं तल्ले बिछ्छड़ी जेव, ते मीं अक आवाज़ शुनी, जै मींजो ज़ोने लोरी थी, हे शाऊल, हे शाऊल तू मीं किजो स्तातस?

8 त मीं पुच्छ्छ, हे परभु तू कौन आस? त तैनी मींजो ज़ुवाब दित्तो, अवं यीशु नासरी आई, जैस तू सतातस ।

9 मेरे सैथेई लौ त लाई पन तैन कोई गल न समझी, कि तै आवाज़ मीं सेइं कुन लोरीए ज़ोने?

10 त मीं पुच्छ्छ, हे परभु अवं कुन कम्मेई, परभुए ज़ोवं, उठ दमिश्क नगरे मां गा तैड़ी तीं जैन तेरे केरनेरे लेइ रखेरूए तैड़ी तीं सेइं ज़ोवं गालू ।

11 मेरे सैथेई अवं हथ्येरां ट्लेइतां दमिश्क नगर मां पुज्जाव । किजोकि तैस बडे महिमारे वजाई सेई मीं किछ न लेइयोवं ।”

12 “तैड़ी अक मैन्हु हनन्याह नव्वेरो कानूनेरे मुताबिक भक्त मैन्हु अव, ते तैट्टेरे यहूदन मां बडो इज्जतदार थियो ।

13 ते मीं कां खडो भोइतां ज़ोने लगो, हे दूला, शाऊल, अपनि एछ्छी खोल्ल, ते मेरी एछ्छी तैखन खुल्ली जेई, ते अवं तैस लहने लगो ।

14 तैखन तैनी ज़ोवं, इश्श बुजुरगां केरे परमेशेरे तू चुनोरोस, ताके तू तैसेरी मर्जी पूरी केरस ते मसीह लास ते तैसेरी गल्लां शुनस ।

15 किजोकि तू सैरी लोकन मां तैसेरो गवाह भोलो, ते तैन ज़ोलो कि तीं कुन लाहेरूए ते कुन शुनेरूए ।

16 हुनी च़िर किजो लातस? उठ, ते बपतिस्मो ने ते तेरे पाप माफ़ भोन ।”

**एक एक एक एक एक**

17 “ते ज़ैखन अवं यरूशलेम नगरे मां वापस अव, ते अवं मन्दरे मां प्रार्थना केरने लोरो थियो, त मीं दर्शन लावं ।

18 ते तै लाव ते एन ज़ोतू शुनू कि लूश केर, ते यरूशलेम नगरे मरां लूशी निस, किजोकि एना लोक मेरे बारे मां तेरी गवाही कबूल न केरेले ।

19 मीं ज़ोवं, हे परभु एना लोक ज़ानतन कि अवं हर प्रार्थना घरे मां गातो थियो, ते केन्चरे अवं तेरे मन्ने बालन कैद केरतो ते कुटतो थियो ।

20 ते ज़ैखन तेरे गवाह स्तिफनुस मारने लोरे थिये, त अवं भी तैड़ी थियो, ते तैसेरे मारने मां खुशी थियो । ते अवं मारने बालां केरां लिगडं पहरतो थियो ।

21 ते परभुए मीं सेई ज़ोवं, गा अवं तीं गैर कौमन कां दूर-दूर भेजेलो ।”

22 सारे लोक तैसेरी गल्लां शुन्ने लोरे थिये, पन ज़ैखन तै इड़ी तगर पुजो त सारे लोक ज़ोरे-ज़ोरे चिन्डां मारने लगे, “ए ज़ीतो रखनेरे काबल नई!” एस मार ।

23 ज़ैखन लोकां केरि शौर ते चिन्डां च़ेलती रेइ, त तैना चोगे शैरतां धूड़ आसमाने उडारने लगे ।

24 त फौजी पलटनरे सरदारो पौलुस किल्लै मां नेनेरो हुक्म दित्तो, “एस कोडेई सेई बाथ ते एसेरू बियांन घिन्ना ताके पतो लगे, कि लोक किजो चिन्डां मारने लोरेन ।”

25 ज़ैखन तैना कोडेई सेई बानेरे लेइ पौलुस रेसी सेई बंधो, त तैनी एक्की सूबेदारो सेई ज़ोवं ज़े तैड़ी नेडे थियो । “कुन अक रोमी नगरेरे मैन्हु बगैर कसूरे झुसनो जेइजे?”

26 ज़ैखन तैनी सूबेदारो एन शुनू त तै फौजी पलटनरे सरदारो कां जेव, “तू कुन ज़ोतस? ए त अक रोमी मैनुए ।”

27 फौजी पलटनरे सरदारो पौलुसे कां एइतां पुच्छ, “कुन तू रोमीस?” तैनी ज़ोवं, “हाँ ।”

28 इन शुन्तां फौजी पलटनरे सरदारो ज़ोवं, “कि मीं रोमी भोनेरी पदवी बडे पंडेस देइतां हासिल कियोरीए ।” ते पौलुसे ज़ोवं, “पन अवं त ज़र्मनेरो रोमी ।”

29 ज़ैना लोक पौलुसेरू बियांन घिन्ने बाले थिये, तैना नेश्शी जे, फौजी पलटनरे सरदारो भी इन बुझतां कि ई रोमीए, ते तैनी तै बंधो, ते डेरि जेव ।

**एक एक एक एक एक**

30 हारसां तै ठीक-ठीक ज़ान्नेरी इच्छा सेई कि यहूदी तैस पुड़ किजो दोष लातन, एल्हेरेलेइ तैनी तै खोल्लो, ते प्रधान याजक ते सारी महासभा अकाट्टी केरनेरो हुक्म दित्तो, ते पौलुस बुन गेइतां तैन केरे सामने खडो कियो ।

## 23

1 पौलुसे महासभारे लोकां केरे पासे रोडेच़ार तेकतां ज़ोवं, “हे दूलाव अवं बेइ नेक नीती सेई परमेशेरे हुक्मां केरे मुताबिक ज़िन्दगी गुज़ारतो ओरोई ।”

2 महायाजक हनन्याह पौलुसेरी एना गल्लां शुन्तां पौलुसे कां खडे भोरे लोकन हुक्म दित्तो, कि एसेरे तुत्तरे पुड थप्पड् बाथ ।

3 पौलुसे तैस सेइं ज़ोवं, “हे पाखंडी, परमेशर तीं बाए । तू इडी विशोरोस कि मूसेरे कानूनेरे मुताबिक मेरो इन्साफ केरस, ते कुन तू मूसेरे कानूनेरे खलाफ बानेरो हुक्म देतस?”

4 ज़ैना तैडी खडखडे थियो, त तैना ज़ोने लगे, “कुन तू परमेशोरे महायाजकेरी तुहीन केरतस?”

5 पौलुसे तैन सेइं ज़ोवं, “द्लाव मीं पतो न थियो, कि ए महायाजक, किजोकि लिखोरूए, तू अपने लोकां केरे प्रधाने जो बुरू न ज़ो ।”

6 पौलुस ज़ानतो थियो, कि तैन मां किछ् सद्की भी आन, ते किछ् फरीसी लोक भी आन ते तै महासभाई मां ज़ोरे सेइं ज़ोने लगे, “हे द्लाव अवं त फरीसी लोकां केरे खानदनी मरां आई, ते मीं पुड एनेई एल्हेरेलेइ मुकदमो चलेवरोए, कि अवं उमीद रखताई कि मुड्दे फिरी ज़ीते भोले ।”

7 पौलुसेरू एन ज़ोते फरीसी ते सद्की लोकन एप्पू मामेईं लडाईं शुरु भोइजेइ, ते सेबनन एप्पू मामेईं खल बनो ।

8 किजोकि सद्की ज़ोतन कि मुड्दे ज़ीते नईं भोने, ते न स्वर्गदूतन ते न कोई आत्मा आए, पन फरीसी लोक एन दुइये गल्लन पुड विश्वास केरतन ।

9 तैखन तैना बेंस केरने लगगे, शास्त्री लोकन मरां ज़ैना फरीसी लोकन मां थियो, तैना खडे भोइतां लडाईं केरतां ज़ोने लगे, “असां इस मैन्हु मां कोई कसूर न लहम, अगर केन्ची आत्मा या स्वर्गदूते एस सेइं कोई गल कियोरीए त फिरी कुन भोवं?”

10 गल एत्री बेद्धी जेई, कि फौजी पलटनरे सरदारो बुझू, कि एरू न भोए कि पौलुसेरे टोटे-टोटे बनान, त तैनी हुक्म दित्तो कि बुन गाथ ते पौलुसे ज़बरदस्ती तैट्टां कढा ते किल्लै मांजो आनां ।

11 तैस्से राती प्रभु यीशुए पौलुसे कां एइतां ज़ोवं, “हे पौलुस हिम्मत रख ज़ेन्चरे तीं यरूशलेम नगरे मां मेरी गवाही दित्तोरीए, तेन्चरे तीं रोमे मां भी गवाही देनी भोली ।”

### CHAPTER 23

12 होरसां झेइं किछ् यहूदी मैनेईं मिलतां फैसलो कियो, ते कसम कमाईं कि ज़ांतगर असां पौलुसे कत्ल न केरम, तांतगर किछ् न खाम ते न पीम ।

13 एस साज़िशो मां 40 मैनन् करां जादे थियो ।

14 तैना प्रधान याजकन ते बुज़ुर्गन कां जे, ते ज़ोने लगे, “असन पुड लानत भोए, अगर असां पौलुसे मारनेरे बगैर किछ् खाम या पीम, असेईं त तैस खतम केरनेरी कसम कमेवरीए ।

15 एल्हेरेलेइ तुस सब महासभा मां मिलतां फौजी पलटनारे सरदारो कां दरखुवास देथ, कि तै पौलुसे लोकां केरे सामने आने, ताके एस मुकदमेरी सारी हकिकत फिरी पतो चले, एस करां पेइले पौलुस इडी पैश कियो गाए, असां तियार आम, कि तैस मारम ।”

16 पन ज़ैखन पौलुसेरे बेइनारे मट्टे एस साजशरो पतो लगे, त तैनी किल्लै मां गेइतां पौलुसे पतो दित्तो, कि तैना लोक तैस मारनो चातन ।

17 तैखन पौलुसे सूबेदारन मरां अक कुजाव, ते तैस सेइं ज़ोवं, “कि इस जवाने फौजी पलटनरे सरदारो कां नेथ, किजोकि ए किछ् ज़ोनेरे लेइ ओरोए ।”

18 बस्सा, तैनी तै फौजी पलटनरे सरदारो कां साथी नीयो, ते ज़ोने लगे, “अवं पौलुसे ज़ै कैदी आए, तैनी अवं कुजाव, ते तैनी मीं कां दरखुवास कियोरीए, कि इस जवाने अवं तीं कां एन्ही, किजोकि ए किछ् तीं सेइं ज़ोनु चाते ।”

19 फौजी पलटनरे सरदारो तैस जवानेरो हथ टलेइतां तै कनारे ज़ेरे नीयो ते तैस पुच्छने लगे, “तू मीं सेइं कुन ज़ोनु चातस?”

20 तैनी जवाने ज़ोवं, “यहूदी लीडरेईं अकोट्टे भोइतां तीं कां दरखुवास देनेरो फैसलो कियोरोए । कि तू पौलुसेरी पुछ् गन केरनेरे बहाने तैस महासभा मां आनस ।

21 नू तैन केरि गल न मेन्ना, किजोकि कोई 40 मैन्न करं जादे यहूदी तैस पुड़ हमलो केरनेरी कोशिश्री मां आन, तैनेई कसम कमेवरी कि ज्ञांतगर असां पौलुसे न मारम तांतगर असां किछ्ख, खाम या पीम, त असन लानत भोए, हुनी तैना तियारन, सिर्फ तेरे वादेरो इंतज़ारे ।”

22 फौजी पलटनरे सरदारो ते जवान वापस भेजो, ते तैस ज़ोवं कि गा, “एना गल्लां केरो ज़ैना तीं मीं सेइं ज़ोई, होरि केन्वी पतो न लोड़ी लगगोरो ।”

?????? ?????????? ??? ???????

23 तैखन तैनी दूई सूबेदार कुजाए, ते तैन सेइं ज़ोवं, “तुस 200 सिपाही ते 70 सुवार ते 200 भाले च़लानेबाले तियार रख्खा, तैनेई राती 9 बजेई कैसरिया नगरे मां गानूए ।

24 ते पौलुसेरे लेइ धोड़े तियार रखा, ताके ते गवर्नर फेलिक्स कां हफ़ाज़ती सेइं पुज़ाव गाए ।”

25 ते फौजरे प्रधाने अक चिट्ठी एस तरिकेरी लिखी ।

26 “श्रीमान फेलिक्स गवर्नर क्लौदियुस लूसियासे जो नमस्कार ।

27 ए तै मैनुए, ज़े यहूदेई ट़लातोरो थियो, ते एस तैना मारनेबाले थिये, त अवं सिपाही नेइतां साथी जेव, ते तै छुटाव, किजोकि मीं पतो थियो, कि तै अक रोमेरो रानेबालोए, त फौजी पलटन नेइतां छुटाव ।

28 लिहाज़ा एन ज़ान्नेरी केरनेरे लेइ कि तैना तैस पुड़ कुन इलज़ाम लातन, मीं तै तैन केरि महासभा मां पेश कियो ।

29 ते पतो लगो, कि तैन केरो इलज़ाम तैन केरे कानूनेरे मुताबिक एसेरे खलाफ कोई एरो इलज़ाम नई, कि ज़ेसेरे ज़िरिये सेइं असां तैस कैद केरम या मौतरी सज़ा देइ सखम ।

30 मीं पतो लगगोरोए कि एसेरे खलाफ कोई साज़िश भोइ राहोरीए, ते मीं ए ज़ल्दी तीं कांजो भेजोरोए, ते मीं तैस पुड़ दाओ केरनेबालन भी ज़ोरूए, कि तैना भी तीं कां अपनो मुकदमो पेश केरन ।”

31 सिपाही, फौजी पलटनरे सरदारोरे हुक्मेरे मुताबिक पौलुसे एप्पू सेइं साथी नेइतां रातो रात अन्तिपतिरस नगरे मां पुज़ाव ।

32 होरसां दीसां धोड़ सुवारन तैस सेइं साथी अग्री-अग्री गानेरो हुक्म दित्तो, ते तै एप्पू किल्लै मांजो वापस च़लो जेव ।

33 ज़ैखन धोड़ सुवार कैसरिया नगरे मां पुजे त तैनेई गवर्नर कां चिट्ठी देइतां पौलुस तैस कां पेश कियो ।

34 गवर्नर चिट्ठी पेढ़तां पुच्छ्छ्, “ए कौस इलाकेरो रानेबालोए?” ज़ैखन तैस पतो लगो कि ए किलिकिया इलाकेरो रानेबालोए ।

35 त तैनी ज़ोवं, कि अवं तेरो मुकदमो तैखन शुनेलो, “ज़ैखन तीं पुड़ दोष लाने बाले भी इड़ी हाज़र भोले ।” तैखन तैनी हुक्म दित्तो कि पौलुसे हेरोदेसेरे पहेरे मां रख्खा ।

## 24

???????? ?????????????? ??????? ???????

1 पन्ने दिहेइना बाद हनन्याह महायाजके किछ्ख बुज़ुर्ग ते तिरतुल्लुस नंबेरो वकील साथी कैसरिया नगरे मां पुजे, ते गवर्नर कां पेश भोइतां पौलुसेरां खलाफ फरयाद कमाई ।

2 ज़ैखन पौलुस पेश कियो त तिरतुल्लुस इलज़ाम लेइतां ज़ोने लाव, “हे महान फेलिक्स, तेरे वजाई सेइं अस बड़े खुशी सेइं रातम, ते तेरे ज़िरिये सेइं इस कौमरी केतरी बुरैई सुधैरी गैतिन ।

3 एन अस हर टैरी हर किसमे सेइं मन्तम ।

4 पन हुनी अवं तेरो जादे वक्त्त नेनो न चैई, अवं तेरी मिनत केरताई कि इश्शी अक दूई गल शुन ।

5 असेई लाहेरूए कि ई मैन्हु बड़ो फसाद केरनेबालोए, ई दुनियारे सारे यहूदन मां फितनाबाजे, ते नासरी कुपंधेरो प्रधान आए ।





26 तैस पौलुसे करां किछ् मैलनेरी उमीद थी, एल्हेरेलेइ तै तैस बार-बार कुजातो थियो, ते तैस सेइं गल्लां केरतो थियो ।

27 पूरे दूई सालना बाद पुरकियुस फेस्तुस, फेलिक्सेरे ठैरी गवर्नर बनो, ते फेलिक्से यहूदी खुश केरनेरे लेइ पौलुस कैदखाने मां रखवो ।

## 25

??????????

1 फेस्तुस तैस इलाके मां पुजतां टलेइ दिहैइना बाद कैसरिया नगरेरां यरूशलेम नगरे मांजो जेव ।

2 जैड़ी प्रधान याजकेई ते यहूदी लीडर तैस कां एइतां पौलुसेरे खलाफ दोष लाने लगे ।

3 तैना तैस कां मिनत केरने लगे, कि लूशी पौलुसे यरूशलेम नगरे मां हाज़र भोनेरो हुक्म दे, द्रासले मां तैनेई तैस बत्तां मारनेरी साज़िश कियोरी थी ।

4 फेस्तुसे जुवाव दित्तो, “पौलुस कैसरिया नगरे मां कैदे, ते अवं भी तैड़ी लूशी गाने वालोई ।”

5 फिरी ज़ोवं कि तुसन मरां किछ् खास अधिकार रखनेवाले मीं सेइं साथी ब्रलन, “अगर सच्चे तैनी कोई गलत कम कियेरू भोए त तैस पुइ दोष लान ।”

6 ते फेस्तुस अठ दश दिहाड़े यरूशलेम नगरे मां राव, ते फिरी कैसरिया नगरे जो ब्रलो जेव, तैड़ी ते दुइयोवं दिहाड़े आदालतरी तखते पुइ बिशुओ, ते हुक्म दित्तो कि पौलुसे हाज़र केरा ।

7 जैखन पौलुस हाज़र भोव, त यरूशलेम नगरेरे यहूदी लीडरेई तैस चुफुरतां घेरो देइतां बड़े झूटे इलज़ाम लाने शुरू किये । पन कोई पक्कू सबूत न मैल्लु ।

8 पौलुसे अपनि सफाई देंते बार यहूदी केरे झूटे इलज़ामा केरे लेइ इन्कार कियो, ते ज़ोवं, “मीं त यहूदी केरे कानूनेरे खलाफ कोई कसूर नई कियोरो, ते न मन्दरेरे खलाफ ते न महाराज़ेरे खलाफ कोई कसूर कियोरोए ।”

9 पन फेस्तुस एप्पू यहूदी लीडरन खुश केरनेरे लेइ पौलुसे पुच्छ्, “तीं यरूशलेम नगरे जो गानू मन्जुरे, ताके अवं एस मुकदमेरो फैसलो तैड़ी केरि?”

10 पौलुसे ज़ोवं, “अवं इड़ी महाराज़ेरे इन्साफेरे तखतेरे सामने खड़ी आई, ते मेरे मुकदमेरो फैसलो इस्से ठैरी भोरो लोइते, जैड़ी रोमी मैनेरो इन्साफ भोरो लोइ, तू एप्पू भी रोइचारे ज्ञानतस कि मीं यहूदी केरो कोई कसूर नई कियोरो ।

11 अगर अवं कुसुरवार आई त मौतरी सज़ारे काबल आई त मेरो मरनेरो इन्कार नई, पन अगर जैना झूटे इलज़ाम यहूदी मीं पुइ लाने लगोरंन ते अगर तैना झूटेन त केन्ची हक नई कि मीं तैन केरे हवाले केरे । ते अवं इड़ी महाराज़े कां बिनती केरताई, कि मेरो इन्साफ इड़ी कियो गाए ।”

12 तैखन फेस्तुस सल्लाकारन करां मुशोरो केरतां जुवाव दित्तो, “तीं महाराज़े कां बिनती कियोरीए त तू महाराज़े कां गालो ।”

????????????????

13 किछ् दिहैइना बाद अगिरप्पा राज़ो ते तैसेरी निकड़ी बेडन बिरनीके कैसरिया नगरे मां एइतां फेस्तुसे सेइं मुलाकात की ।

14 तैन केरे बड़े दिहाड़े तैड़ी रानेरे बाद फेस्तुसे पौलुसेरे बारे मां राज़े ज़ोवं, “अक मैन्हु आए, जै फेलिक्से कैद कियोरोए ।

15 जैखन अवं यरूशलेम नगरे मां थियो, त प्रधान याजक ते यहूदी बुज़ुर्ग तैस पुइ दोष लगे लाने, कि एस सज़ा दित्ती गाए ।

16 पन मीं तैन ज़ोरू थियू, कि रोमी केरे दस्तूरेरे मुताबिक कोई मैन्हु सज़ा देनेरे लेइ हवाले न कियो गाए, ज़ातगर तैस अपने मुदेइ केरे सामने तैन इलज़ामा केरे बारे मां अपनि सफाई पैश केरनेरो मौको न दित्तो गाए ।



9 “पेडले अवं भी समझतो थियो, कि यीशु नैसरेरे नव्वेंरी हर तरीके मुखालफत केरनि मेरो फरजे ।

10 एल्हेरेलेइ अवं यरूशलेम नगरे मां एन्ने केरतो राव, मीं प्रधान याजकन करां अजाजत एन्तां बडे परमेशेरे सेवक कैद केरतां छडे, ते जैखन तैना मारे गाते थिये, त अवं भी तैडी खलाफत केरतो थियो ।

11 अवं प्रार्थना घरन मां गातो थियो, ते तैन केरि तुहीन केरतो थियो । ते लोकन यीशुएरे खलाफत तुहीन केरनेरे लेइ मजबूर केरतो थियो । ते मसीही लोकां केरि मुखालफत केरने सेइं मीं एतरी खुशी भोती थी, कि अवं दूर-दूर नगरन मां गेइतां तैन सतातो थियो ।”

एन्ने एन्ने एन्ने एन्ने एन्ने एन्ने  
(एन्ने एन्ने. 9:1-19; 22:6-16)

12 “एक्की बार प्रधान याजकन करां अधिकार एन्तां एस्से कम्मरेरे लेइ दमिश्क नगरेरे सफर केरने लगगोरो थियो ।

13 त हे राजा अवं हेजू बत्तां थियो, त मीं दुपहरां केरे मौके अम्बरेरां अक लौ एंडती लाई, जै दिहाडेरी लौई करां भी जादे थी, ते तै इशेरे चेवरे पासन चमकने लगी ।

14 असां सब ज़मीनी पुइ विछड़ी जे, ते मीं अक आवाज शुनी, जै मीं सेइं इब्रानी भाषाई मां एन जोने लगोरी थी । कि हे शाऊल हे शाऊल तू मीं किजो स्तातस? मीं सेइं लडाई केरनि तेरे लेइ बेकारे ।

15 “त मीं जुवाब दित्तो, हे परभु तू कौन आस, त परभुए मीं जुवाब दित्तो अवं यीशु आई जैस तू सतातस?

16 पन उठ ते अपने पवन पुइ खडो भो, किजोकि मीं तीं एल्हेरेलेइ दर्शन दित्तोरूए, कि तीं अवं अपनो सेवक बनेइं, ते जैन किछ तीं लाहेरूए तू तैसेरो गवाह बनस ।

17 अवं तीं तेरे लोकन करां ते गैर कौमन करां बत्तांतो रेइलो अवं तीं तैन मां भेजताई ।

18 ताके तू तैन केरि एछछी खोल्लस ते तैन आंधरे मरां लौई मां आनस ते कने शैताने करां छुटेइतां परमेशेरे पासे आनस, ताके तैना मीं पुइ विश्वास केरन ते परमेशर तैन केरे पाप माफ़ केरे, ते तैन लोकन मां शामिल भोन जैना पवित्र कियोरेन, तैना विरासत हासिल केरन ।”

एन्ने एन्ने एन्ने एन्ने एन्ने एन्ने

19 ते एल्हेरेलेइ, “हे अगिरप्पा राजा मीं एस स्वगेरि दर्शनेरो इन्कार नई कमेवरो ।

20 ते पेडले मीं दमिश्क नगरेरे लोकन मां ते फिरी यरूशलेम नगरेरे ते सारे यहूदिया इलाकेरे रानेवालो ते गैर कौमन भी प्रचार केरतो कियो । कि पापन करां मनफिराथ, ते परमेशेरे पासे फिरा ते अपने स्भावे सेइं साबत केरा कि तुसेई पापन करां मन फिरावरोए ।

21 एन्ने गल्लां केरे लेइ यहूदेई अवं मन्देरे मां टलातो ते मारनेरी कोशिश की ।

22 “पन अवं परमेशेरेरी किर्पाई सेइं अज तगर जीतोई, ते सेब्मी निक्के बड्डन कां अवं गवाही देताई, कि जैना गल्लां अवं ज़ोताई कि जैना नेबेई ज़ोरी थी, ते मूसा नेबे भी ज़ोरी थी ।

23 कि मसीह बडो दुख भोगेलो, ते सेब्बन करां पेइलो मुड्डन मरां जीतो भोइतां यहूदी कौमी त गैर कौमां केरे लोकन बच्चालो जै लौअरो जेरो आए ।”

24 जैखन पौलुस एन जोने लगगोरो थियो, त फेस्तुस ज़ोरे सेइं ज़ोवं, “तू पागल भोइ जेव । जादे ज्ञाने सेइं तू पागल भोइजेवरोस ।”

25 पौलुसे जुवाब दित्तो, “जनाब फेस्तुस साहब अवं पागल नई भोरो, अवं जैन किछ ज़ोने लगगोरोइ तैन सच्चे ते ज्ञाने सेइं आए ।

26 राज़ो भी ज़ेसेरे सामने अवं निडर भोइतां एन गल्लां ज्ञानते, ते मीं याकीने कि एन मरां कोई भी गल तैस करां छुपौरी नई, किजोकि ए चमत्कार कोई एरो नई भोरो ।

27 हे अगिरप्पा राज़ा कुन तू नेबी केरो, अवं ज्ञानताई कि तू मनतस?”

28 अगिरप्पा राज़े पौलुसे सेइं ज़ोवं, “कुन तू थोड़ी ज़ेरि गल्लेई सेइं मीं तू मसीही बनानो चातस?”

29 पौलुसे जुवाव दित्तो, चाए थोड़ी ज़ेरि या जादे गल्लेई सेइं, “पन अवं त परमेशेरे कां पुरार्थना केरताई कि, न सिर्फ तू बल्के ज़ेत्तरे भी अज मेरी गल्लां शुनी रावरेन सब मेरे ज़ेरे मसीही भोन, पन इन शंगलां केरे बगैर।”

30 तैखन अगिरप्पा राज्जे ते गवर्नर ते बिरनीके ते तैस सेइं साथी होंरे भी खड़े भोए ते चले जे।

31 ते बेइर निस्तां एक्की होरि सेइं ज़ोने लगे, “कि ए मैन्हु कोई एरू कम त नई लोरो केरने, कि एस मौतरी सज़ा दित्ती गाए, या कैदखाने मां रखवो गाए।

32 अगिरप्पा राज्जे फेस्तुस सेइं ज़ावं, अगर एनी मैने महाराज्जे कां फरयाद न भोथी कियोरी त ए छुटी सकतो थियो।”

## 27

?????? ???? ? ? ???? ???? ?

1 ज़ैखन फिस्तुस हाकिमेरे ज़िरिये ए बिस्तार बनो कि असां लोक ज़िहाज़े मां इतालिया जो गाम, त पौलुस त होंरे कैदी यूलियुस नव्वे औगुस्तुस फौजी पलटनरे सरदारोरे एक्की सूबेदारोरे सुपुर्द किये।

2 असां अदरमुत्तियुम नगरेरां एक्की समुन्दरी ज़िहाज़े मां च़ेदतां आसिया इलाकेरे नेड्डे ठैरी गानेबाले थिये, त अरिस्तर्खुस नव्वे थिस्सलुनीके नगरेरो अक मकिदुनी असन सेइं साथी थियो।

3 होरसां ज़ैखन ज़िहाज़े सैदा मां रुकी जेवं, त यूलियुसे पौलुसे पुड़ महरबानी केरतां तैस अपने दोस्तन सेइं मुलाकात केरनेरी अज़ाज़त दित्ती, ताके तैसेरे ज़िरिये सेइं पतो लगगे।

4 तैट्टां फिरी असां ज़िहाज़े मां च़ेदतां च़ले जे, ते साइप्रसेरे आडी मांमेइं निस्से, किजोकि हवा बड़ी ज़बरदस्त थी।

5 फिरी किलिकिया नगरे ते पंपूलिया नगरेरे नेडे समुन्दरेरी बत्तां निस्तां अग्रोवं च़ले जे, त लूसिया इलाकेरे मूरा नगर मां ओस्से।

6 तैडी सूबेदारोरे सिकन्दरिया नगरेरू अक ज़िहाज़े इतालिया इलाके जो च़लेरू मैल्लू, तैनी असां तैस मां च़ादे।

7 असां बडे दिहाइन तगर बल्हे-बल्हे अग्रोवं च़लते राए, ते कनिदुस नगरेरे सामने पुज़े। पन तेज हवा च़लने सेइं असन अग्रोवं गानेरी मुशकिल भोइजेइ, ते एल्हेरेलेइ असां सलमोनेरे सामने निस्तां करेतेरी आडी मां निस्से।

8 ते वेइ मुशकली सेइं समुदरेरे बन्ने-बन्ने अग्रोवं च़लते शुभलंगरवारी नव्वेरी एक्की ठैरी पुज़े, ज़ैट्टां लसया नगर नेड्डे थियूं।

9 तैडी असन केही दिहाडे बीते, पैनेरे सफरे मां मुशकिल एल्हेरेलेइ भोती थी, कि छुटकारेरी दिहाडी तिहारोरे बरतेरे दिहाडो बीतोरे थी, ते पौलुसे तैन एन ज़ोइतां खबरदारी दित्ती,

10 “जनाव मी एरू लगगते कि इश्शू सफर बडू खतरनाक भोल्, कि न सिर्फ इश्शे माल सबाव ते ज़िहाज़े बल्के इश्शी जानी भी खतराए।”

11 पन सूबेदारो कपताने ते ज़िहाज़ेरे मालिकेरी गल पौलुसेरी गल करां जादे मन्नी।

12 किजोकि तै बंदरगह ठंढारो मौसम कटनेरे लेइ रोड़ी न थी, एल्हेरेलेइ इश्शो फैसलो ए थियो, कि असां केन्वी तरीके अग्रोवं निस्सम ते असन उमीद थी, कि फीनिक्स मां पुजतां हीवतडेरो मौसम तैडी गुज़ेरी गामेले। ए करेते अक बंदरगह थी, ज़ैसेरां दारां क्षिण-पश्चिम ते उत्तर-पश्चिम पासे खुलतां थियो।

???????? ???? ?

13 ज़ैखन दक्षिणी पासेरां हवा च़लने लगी, त तैनेई सोचू कि तैन केरि मर्जी पूरी केरनेरे लेइ रोडो वक्ते, ते तैनेई ज़िहाज़ेरू लैगर तैट्टां खडू कियूं, ते समुन्दरेरे बन्ने अग्रोवं च़लते जे।

14 पन लूशी अक बड़ी तूफानी हवा च़ली ज़ैस जो यूरकुलीन ज़ोतन।

15 जैखन तैने ज़िहाज़ अपने पलैट्टे मां कियूं, ते ज़िहाज़ दलैक्कां खाने लगू, ते असेई ज़िहाज़ हावारे बहावे पुड़ छड़ू ।

16 तैखन कौदा नव्वेरो अक निकडो टैपू अव, त असेई भी रुइते-रुइते तै डुंगी ज़ै ज़िहाज़ेरे पत्तोरां बंधोरी थी, त बेड़ि मुशकली सेइं कैवू मां की ।

17 ते ज़िहाज़ेरे टोलरे मैनेई तै उबरी च्चेदतां ज़िहाज़ टलुटने करां बचानेरे लेइ रेस्सेइं सेइं बंधतां छड़ू । किजोकि तैन डर थियो, कि एरू न भोए, कि ज़िहाज़ सुरतिसेरे रेती मां डुबी गाए, एल्हेरेलेइ तैनेई भारी सामान ओसालू ते ज़िहाज़े मां रुइते-रुइते चले जे ।

18 जैखन तूफानी हवाई सेइं ज़िहाज़ जादे दलैक्कां खाने लगू, त होरसां असेई ज़िहाज़ेरो माल समुन्दरे मांजो शारनो शुरू कियो,

19 टलेइयोवं दिहाड़े तैनेई ज़िहाज़ेरू सामान भी समुन्दरे मांजो शैरी छड़ू ।

20 त काई दिहाड़े न असेई दिहाड़ो लाव ते न तारे ते तूफान भी मन्ना जादे ज़ोर करेने लगगोरो थियो, ते असन बचनेरी हुनी कोई उमीद न राई ।

21 रोट्टी खाने काई दिहाड़े भोरे थिये, एल्हेरेलेइ पौलुसे तैन मां खड़े भोइतां ज़ोवं, “दलाव अगर तुसेईं मेरू ज़ोनू मन्नोरू भोथू, ते क्रेते मरां अग्रोवं न ओरे भोथे, त ईं नुकसान ते ईं तकलीफ किजो भोनी थी?”

22 “पन अवं तुसन कां मिनत केरताई कि, हिम्मत न हारा तुसन मरां कोई भी न मरेलो, चाए ज़िहाज़ डुबी किना गाए ।

23 किजोकि ज़ैस परमेशेरी अवं आराधना केरताई, तैसेरो स्वर्गदूत हीज राती मीं कां ओरो थियो ।

24 ते तै ज़ोने लगो, हे पौलुस डर नन्ना तू महाराजे कां ज़रूर पैश भोलो ते परमेशर तेरी वजाई सेइं एन सेब्भी केरि जान बचालो, जैना ज़िहाज़े मां तीं सेइं साथी आन ।

25 एल्हेरेलेइ हे जनाब तुस हिम्मत रखा कि मेरे परमेशेरे ज़ैन किछ् मीं सेइं ज़ोरूए तैन्ने भोलू ।

26 असां ज़रूर केन्ची टैपू पुड़ पुज़ी गामेले ।”



27 च्चेवधोवं राती जैखन असां अदिरया समुन्दरे मां इरां उरां फिरते थिये, त ज़िहाज़े बाले मैनेई अंदाज़ो लाव कि असां बन्नेरे नेड़े पुज़ी जोरेम ।

28 तैनेई पानी रेसी सेइं नापू त 37 मीटर निससू ते थोड़े अगगर गोइतां नापू त 27 मीटर निससू ।

29 एस डरे सेइं कि कोस्कोई शफ़्डी सेइं न बज्म, ते तैनेई ज़िहाज़ेरे पैतरीं पासे च्चेवरे लैंगरां समुन्दरे मां छड़्ठां ते झेझेरे लौअरे लेइ प्रार्थना करेने लगे ।

30 ज़िहाज़ च़लानेबाले मुझाटेरां बेइरोवं निसनेरे लेइ डोंगी उन्डी ओसाली । पन तैना ज़िहाज़ेरे एग्रीं पासेरां लैंगर पैनी मां छड़न्नु चाते थिये ।

31 तैखन पौलुसे सूबेदारो ते सिपेहिन सेइं ज़ोवं, “अगर इना लोक ज़िहाज़े मां न भोले त तुशशू लोकां केरू बचनू मुशकले ।”

32 एल्हेरेलेइ सिपेहीयेइं डूगारी रेस्सी केरतां समुन्दरे मांजो शैरी दिती ।

33 झेझ भोने करां पेइले पौलुसे सेब्भन कां मिनत कमाई, कि तुस किछ् रोट्टी खाथ । तैनी ज़ोवं, “तुस च्चेवधे दिहैड़ी केरे देंते बचनेरे खियाले मां पेवरेथ, ते तुस रोट्टी सेइं हुरोरे भी नई ।

34 अवं तुसन कां मिनत केरताई कि तुस रोट्टी खाथ, किजोकि तुशशे लेइ रोडू एन्ने कि याकीन केरा कि तुशशो बाल बिगो न भोलो ।”

35 जैखन तैनी एन ज़ोवं, त तैनी रोट्टी ट्लाई ते सेब्भी केरे सामने परमेशेरू शुक्र केरतां टलोड़ी ते खाने लगो ।

36 तैस करां लेइतां होरन भी हिम्मत आई, ते तैना भी रोट्टी खाने लगे ।

37 असां सब मिलतां कोई 276 मैन्हु थिये, जैना इस ज़िहाज़े मां सुवार थिये ।



15 तैट्टेरे मसीही दलान पतो लगे, कि असां ओरेम त तैना असन अग्राने अप्पियुसेरे चौके ते द्लेइ धर्मशालन तगर आए, पौलुसे तैना लेइतां परमेशेरे शुक्र कियूं ते तैस बड़ी हिम्मत भोइ ।

16 जैखन अस रोम नगरे मां पुज्जे ते पौलुसे अजाजत मैल्ली, कि तै एक्की पैरहेदारी निगरेनी मां जैड़ी चाए गोइ सकते ।

**एक एक एक एक एक**

17 जैखन दलाई दिहाइ बीते त पौलुसे यहूदी केरे प्रधान कुजाए, ते जैखन तैना अकोट्टे भोए त पौलुसे तैन सेइं ज़ोवं, “दलाव मीं अपनि कौमरे ते अपने दादे-पड़दादां केरि रसमरे खलाफ कोई कम नईं कियेरू त फिर भी अवं पाबंद केरतां यरूशलेम नगरे मां रोमी सरकारे हवाले कियो ।

18 तेनेईं पुछ्छ गन केरनेरे बाद अवं हथरां छडनो थियो । किजोकि मीं कोई एरू कम न थियूं कियेरू कि जैस सेइं मीं मौतरी सजा देथे ।

19 पन जैखन यहूदेईं मुखालफत की, त मीं महाराजे कां बिनती की । पन एल्हेरेलेइ नईं कि अवं अपनि कौमी पुड़ कोई इलजाम लांनो चातो थियो ।

20 एल्हेरेलेइ मीं एन रोड़ समझ्, कि तुसन सेइं मिलतां गल केरि, अवं इस्राएलेरी एक्की उमीदी जै मसीह आए शांगलन सेइं बंधोरोइं ।”

21 तेनेईं तैस सेइं ज़ोवं, “असन यहूदन करां न कोई चिट्ठी मैल्ली ते न तैट्टां एजनेवाले इशशे लोकेईं तेरे बारे मां कोई खबर दिती, ते न तेरे खलाफ किछ् ज़ोवं ।

22 पन असां तेरे बारे मां ज्ञाननू चातम, ए त असन पत्तोए, कि लोक सेब्मी टैरन एस पंथेरे खलाफ गल्लां केरतन ।”

23 तैखन यहूदी लोकेईं पौलुसेरी गल्लां शुन्नेरे लेइ अक दिहाड़ी ठुवहलाई, जैखन तै दिहाड़ी आई, त लोक पेइले लोकन करां भी जादे अकोट्टे भोए । पौलुसे तैन परमेशेरे राज्जेरे बारे मां समझाव, ते साथी यीशुएरे बारे मां मूसेरे कानूने ते नेबी केरे किताबन मरां तैन रोडेचारे समझेइतां झेझां करां इलोझी तगर गल्लां शुनातो राव ।

24 किछ् तैसेरी गल्लां शुन्तां मघन भोइ जे ते मन्नु ते किछ्ईं विश्वास भी कियो ।

25 जैखन तैना एप्पू मामेइं अक न भोए, त पौलुसे तैन गाने करां पेइले अक गल ज़ोई, “पवित्र आत्मारे ज़िरिये यशायाह नबी तुशशे दादे-पड़दादां केरे बारे मां ठीके ज़ोरू थियूं ।”

26 एन लोकन कां गा, ते एन ज़ो कि,

“तुस शुन्ते त राले, पन समझेले न,

ते तकते त राले पन पिशानेले न ।

27 किजोकि एन लोकां केरे दिले मोट्टे भोरोरन,

ते एना टोव्ने भोरोरन,

ते एनेईं अपनि एछ्छी निकोल कियोरिन ।

किजोकि एरू न भोए,

कि एना लहन ते कन्न सेइं शुन्न ते दिले सेइं समझन,

ते एना मेरे पासे फिरन ते अवं एन शिफा देई ।

28 “एल्हेरेलेइ अवं चाताईं कि तुस ज्ञानथ कि परमेशेरेरी मुक्ति गैर कौमन कां भी भेजोरोए ते तैना तैस शुनेले ।”

29 जैखन पौलुसे एन ज़ोवं, त यहूदी एप्पू मामेइं बेंस केरते तैट्टां ज़ले जे ।

30 पौलुस पूरे दूईं सालन तगर करेइयेरे मुकाने मां राव,

31 ते जै भी तैस सेइं मिलने एइतो थियो, पौलुस तैस सेइं मिलतो थियो, ते बेधड़क भोइतां परमेशेरे राज्जेरी खुशखबरी शुनातो थियो, ते प्रभु यीशु मसीहेरे बारे मां शिक्षा देंतो राव ।



## रोमियो

~~~~~

1 अवं पौलुस यीशु मसीहेरो दास आई, ते प्रेरित भोनेरे लेइ परमेशेरे चुनोरोई, ते परमेशेरी खुशखबरी प्रचार केरनेरे लेइ ठहरावरो आई।

2 जेसेरी तैने पेइले अपने नेबी केरे जिरिये पवित्रशास्त्रे मां,

3 अपने मट्टे इश्शे प्रभु यीशुएरे बारे मां वादो कियोरो थियो, जै जिसमेरे मुताबिक त दाऊदेरे खानदाने मरां पैदा भोव।

4 ते पवित्र आत्मारो जिरिये सेइं मुइदन मरां ज़ीतो भोनेरे वजाई सेइं तै शक्ति सेइं परमेशेरू मट्टू भोव।

5 जेसेरे जिरिये असन अनुग्रह ते प्रेरिताई मैल्ली; कि तैसेरे नव्वे सेइं सब कौमां केरे लोक विश्वास केरतां तैसेरी मन्न।

6 जैन मरां तुस भी यीशु मसीहेरे भोनेरे लेइ कुजोरेथ।

7 अवं ई चिट्ठी तुश्शे सेब्मी केरे नव्वे लिखताई, जैना तुस रोम नगरे मां रातथ, ते परमेशेरे ट्लारेथ, ते पवित्र भोनेरे लेइ चुनोरेथ। इश्शे बाजी परमेशर ते प्रभु यीशु मसीहेरे तरफां तुसन शान्ति ते अनुग्रह मैलतो राए।

~~~~~

8 पेइलो अवं तुश्शे सेब्मी केरे लेइ यीशु मसीहेरे जिरिये परमेशेरू शुकर केरताई, किजोकि तुश्शो विश्वास जै यीशु मसीह पुइ आए, तैसेरी चर्चा हर पासे भोने लोरी।

9 परमेशर जेसेरी सेवा अवं अपने पूरे दिले सेइं तैसेरे मट्टेरी खुशखबरी प्रचार केरतां केरताई, तै मेरो गवाहे; कि अवं तुसन कोस तरीके सेइं लगातर प्रार्थनाई मां याद केरताई।

10 ते लगातार अपने प्रार्थनान मां बिनती केरतो राताई, कि केन्चरे हेजू भी तुसन कां एजनेरे लेइ मेरू सफर परमेशेरे तरफां कामयाब भोए।

11 किजोकि अवं तुसन सेइं मिलनेरे लेइ कोशिश केरताई, कि अवं तुसन कोई आत्मिक वरदान देई, जैस सेइं तुस विश्वासे मां मजबूत भोथ।

12 मतलब इन, कि अवं तुसन कां एइतां तुसन सेइं साथी तैस विश्वासेरे जिरिये, जै मीं मां ते तुसन मांए, तैसेरे जिरिये अस हिम्मत हासिल केरम।

13 ते दूलाव ते बेइनव, अवं चाताई तुस जानथ, कि मीं तुसन कां बार-बार एजनु चाव। जेन्चरे मीं गैर कौमरे लोकन विश्वास केरनेरे लेइ बद्धनेरी मद्दत की, तेन्चरे तुश्शी भी मद्दत केरि, पन हुना तगर रुकोरो राव।

14 अवं संस्कारी लोकन ते असंस्कारी लोकन, पढोरे लोकन या अनपइ लोकन सेबन खुशखबरी शुनेडलो।

15 ते अवं तुसन भी जैना रोम नगरे मां रातथ, खुशखबरी शुनानेरे लेइ हर वक्त तियार आई।

~~~~~

16 किजोकि अवं यीशु मसीहेरी खुशखबरी प्रचार केरने करां न शरमेई, एल्हेरेलेइ परमेशर अपने शक्ति सेइं तैन लोकन मुक्ति देते, जैना खुशखबरी पुइ विश्वास केरतन, पेइले यहूदन फिरी गैर यहूदन।

17 किजोकि खुशखबरो जिरिये परमेशर असन अपने नज़री मां धर्मी बनाते, जैन शुरू करां आखरी तगर विश्वासे सेइं भोते। जेन्चरे पवित्रशास्त्रे मां लिखोरूए, “जै मैन्हु विश्वासेरे जिरिये सेइं परमेशेरे सामने धर्मी बनाव गाते तैए ज़ीतो रालो।”

~~~~~

18 परमेशेरो कुरोध तैन लोकन पुड़ स्वर्गेरां एइते, जैना बुरां ते दुष्टेरां कम्मां केरतन, ते जैना सच्चे अधर्मे सेइं दबेइतां रखतन।

19 किजोकि परमेशेरे बारे मां ज्ञान तैन मैन्हु केरे मन्न मां बांदए, एल्हेरेलेइ कि परमेशेरे तैन पुड़ बांदू कियोरूए।

20 किजोकि तैसेरे आहरे गुण, मतलब तैसेरी सदारी शक्ति, ते परमेशेरो सुभाव दुनियाई बनानेरे वक्तेरे देंतो तैसेरे कम्मन सेइं हेरने मां एइते, इड़ी तगर कि तैन लोकन कां कोई बहानो नई।

21 हांलाकि तैनेई परमेशर त पिशानो, पन परमेशेरी तैस काबल बडयाई न की, ते न शुक्र कियूं, पन बेकार सोचने लाए, इड़ी तगर कि तैन केरो बेअक्ल मन आंधरो भोव (मतलब तैना गलत सोचने लगे)।

22 तैना अपने आपे अक्लमन्द सेमझतां बेवकूफ बने।

23 ते न मरने वाले परमेशेरी महिमा मरने वाले मैन्हु, ते चुड़ोलू ते जानवरां, ते पेटेरे भारे जलने वाले जीपां केरे मूरतन मां बदली।

24 एल्हेरेलेइ परमेशेरे तैना तैन केरे मनरे खुवैइशां केरे मुताबिक अशुद्ध भोनेरे लेइ शारे कि, एप्पू मांमेइं अपने जानां केरी अनादर केरन।

25 किजोकि तैनेई परमेशेरी सच्चैई बेदलतां झूट बनाई, ते सृष्टारी पूजा ते आराधना केरि, न कि तैस बनाने वालेरी, जै हर वक्त धन ते रोड़ोए। आमीन।

26 एल्हेरेलेइ परमेशेरे तैना नीच खुवाइशन मां शारे, इड़ी तगर कि तैन केरि कुआन्शेई भी स्भाविक कम्मां बेदलतां तैन केरे जैना स्भाविक आनू तैन केरे खलाफ बदला।

27 तेन्चरे तैन केरे मड़द भी कुआन्शन सेइं सुभाविक कम्मां शैरतां एप्पू मांमेइं गंदे कम्मन मां मसत भोए, मतलब कि मड़देइं, मड़दन सेइं रिशतो रेखतां प्रभु करां ठीक बदलो नेव।

28 ते तैनेई इन जेइज न समझू कि परमेशेरे कबूल केरन, एल्हेरेलेइ परमेशेरे भी तैना तैन केरे मनरे हालती पुड़ शारे; कि बुरां कम्मां केरन।

29 ते तैना हर किसमेरे अधर्मे, दुष्टे, लालचे, वैरे सेइं भेरोई जे; ते कपट, ते खून केरनो, ते लड़ाई केरनि, ते धोखो देनो, ते जलनी सेइं भेरोए, ते चोगलखोर,

30 बदनाम केरनेवाले, परमेशेरे सेइं नफरत केरनेवाले, जैन केरि इज्जत केरी लोडे तैन केरि इज्जत न केरनेवाले, घमण्डी, बड़कां मारनेवाले, बुरी-बुरी गल्लां बनाने वाले, अम्मा बैपू केरो हुक्म न मन्नेवाले।

31 बेवकूफ, धोखो देनेवाले, सच्चे प्यारे करां खाली, दया न केरनेवाले भोइजेइ।

32 हालांकी तैना परमेशेरो ई हुक्म ज्ञातन, कि एरां जेरां कम्मां केरनेवाले मौतरे सजारे लाइकन, फिरि भी न सिर्फ एप्पू एरां कम्मां केरतन बल्के एरां कम्मां केरनेवालन सेइं भी खुश भोतन।

## 2

### ??????????

1 एल्हेरेलेइ हे दोष लाने वाला, तू कोई की न भोस; तीं कां कोई बहानो नई, किजोकि जैस गल्लरो तू होरन पुड़ दोष लातस, तैस्से गल्ली पुड़ तू अपनो आप भी दोषी बनातस, एल्हेरेलेइ तू एप्पू भी तैन्ने कम केरतस।

2 ते अस ज्ञानतम कि, जैना एरां कम्मां केरतन परमेशर तैन केरो इन्साफे केरतां तैन सजा देते।

3 ते हे मैन्हु, तू जै बुरां-बुरां कम्मां केरनेवालन पुड़ दोष लातस, ते एप्पू भी तैन्ने कम केरतस; कुन तू समझतस, कि तू परमेशेरे सजाई करां बचेलो?

4 कुन तू परमेशेरी कृपा, ते बरदाश केरनू, ते सबरारू धन घटया समझतस, ते कुन इन न समझस, कि परमेशेरी कृपा तीं पापन करां मन फिरानो शिखालतीए?

5 पन तू ज़िद्दी आस ते अपने पापन करां मन फिरानेरो इन्कार केरतस, जैस दिहाड़े परमेशर अपनो क्रोध हिरालो, तैस मां परमेशेरो सच्चे इन्साफ बांदो भोलो, त परमेशर तेरो रोड़ेचारे इन्साफ केरेलो।

6 परमेशर हर एक्की तैसेरे कम्मां केरे मुताबिक बदलो देलो।

7 जैना लोक रोड़ा कम्मां केरतां परमेशेरी तरफां मैलने बैली महिमा, ते आदर, ते कधे न खतम भोने वाली ज़िन्दगरे तोपी मां रातन, परमेशेरे तैन हमेशारी ज़िन्दगी देलो।

8 पन जैना खुदगरजन, ते सच्चे न मन्नेबालेन, बल्के बुराई केरनि चातन, तैन पुड़ परमेशेरो क्रोध, ते कोप एज्जेलो।

9 ते मुसीबत ते दुःख हर एक्की मैन्हु पुड़ एज्जेलो जै बुराई केरते। परमेशर पेइलो यहूदी लोकां केरो इन्साफ केरेलो फिरी गैर यहूदी लोकां केरो इन्साफ केरेलो।

10 हर अक मैन्हु जै रोड़ा कम्मां केरते तैस महिमा, आदर, ते शान्ति मैलेली, पन परमेशर इना सैरी चीजां पेइले यहूदी लोकन देलो फिरी गैर यहूदी लोकन।

11 किजोकि परमेशर केन्चेरी तरफदारी न केरे।

12 एल्हेरेलेइ कि जैन गैर कौमारो लोकेई बगैर मूसेरो कानून मेलतां पाप कियो, परमेशर तैन बगैर मूसेरो कानूने सज़ा देलो, ते जैनई मूसेरो कानून मेलतां पाप कियो, परमेशर तैन सज़ा भी मूसेरे कानूनेरे मुताबिक देलो।

13 किजोकि परमेशेरे नज़री मां मूसेरो कानून शुनेने वाले धर्मी नई, बल्के मूसेरे कानूने पुड़ चलने वाले धर्मी ठहराए गानेन।

14 फिरी जैखन होरि कौमां केरे लोक जैन कां मूसेरो कानून नई, सुभावे सेई किछ् मूसेरे कानूनेरे गल्लन पुड़ चलतन, ते मूसेरो कानून तैन कां न भोनेरे बावजूद भी अपने लेइ एप्पू कानून आन।

15 तैना इन हिरातन कि परमेशेरो कानून तैन केरे दिलन मां लिखोरोए, ते तैन केरे ज़मीर भी इस गल्ली पुड़ गवाही देतन, किजोकि तैन केरे अपने खियाल भी तैन पुड़ दोष लातन या बेइलज़ाम ठहरातन।

16 एरू तेइस भोलू ज़ेइस परमेशर जै खुशखबरी मीं शुनावरीए तैसेरे मुताबिक यीशु मसीहेरे ज़िरिये मैन्हु केरि छेपोरी गल्लां केरो इन्साफ केरेलो।

### ????? ? ? ? ? ? ? ? ? ? ? ?

17 तू एप्पू जो यहूदी ज़ोतस, ते मूसेरे कानूने पुड़ तेरो विश्वासे, ते तू अपने आपे पुड़ घमण्ड केरतथ, कि तू परमेशेरो खास मैन्हु आस।

18 ते तू परमेशेरी मर्ज़ी ज़ानतस, ते तू इन भी ज़ानतस कि कोनां गल्लां रोड़ी आन, किजोकि तीं इना गल्लां केरू ज़ान मूसेरे कानूने करां मैलोरिन।

19 ते तू भरोसो रखतस, कि तू कान्न परमेशेरी बत हिरानेबालोस, ते जैना आंधरे मां आन तैन केरे लेइ लोअरो ज़ेरे आस।

20 ते बेअक्लन शिखालने बालोस, ते बच्चां केरो उस्तादातस, ते तीं पक्को पतो कि परमेशेरो कानून तीं पूरू ज़ान ते सच्चाई शिखालते।

21 ते जैन तू होरन शिखालतस, अपने आपे की न शिखालस? तू होरन शिक्षा देतस कि चोरी नई केरनि, कुन तू चोरी केतस?

22 तू जै ज़ोतस, “बदमाशी नई केरनि,” कुन तू बदमाशी केरतस? तू जै मूरतन सेई नफरत केरतस, कुन तू मन्दरन लुटतस?

23 तू जै घमण्ड केरतस कि तू परमेशेरे कानूने ज़ानतस, एप्पू किजो कानून न मेन्तां, परमेशेरी तुहीन केरतस?

24 “किजोकि तुशे यहूदी लोकां केरे वजाई सेई गैर कौमन मां परमेशेरे नब्बेरी तुहीन भोतीए,” एल्हेरेलेइ पवित्रशास्त्रे मां एरू लिखोरूए।

25 अगर तू मूसेरे कानून पुड़ च़लस, त खतनो कराने सेइं तीं फैइदो त आए, पन अगर तू मूसेरो कानून न मन्स त तीं मां ते तैस मां, ज़ेसेरो खतनो नईं भोरो कोई फर्क नईं ।

26 ते अगर कोई मैन्हु ज़ेसेरो खतनो न भोए भोरो, त तै मूसेरे कानून पुड़ च़ले, त परमेशेरे लेइ तै मैन्हु ते ज़ेसेरो खतनो भोरोए दुइये बराबर आन ।

27 ते ज़ैस मैनेरो खतनो नईं भोरो, अगर तै मूसेरे कानून पूरू केरे, त तै तीं दोषी ठहरालो । किजोकि तीं कां मूसेरो कानून ते तेरो खतनो भी भोरोए, पन फिरी भी तू कानून पुड़ न च़लस ।

28 किजोकि सच्चो यहूदी तै नईं ज़ेसेरू जर्म यहूदन मां भोरू या ज़ेसेरो खतनो भोरोए ।

29 बलके सच्चो यहूदी तैए, ज़ेसेरो मन परमेशेर कां सच्चोए, ते सच्चो खतनो तैए ज़ै पवित्र आत्मारे कम्मां केरे ज़िरिये दिलेरो भोरोए, न की मूसेरो कानून मन्ने सेइं भोरोए । एरे लोकां केरि बड़याई लोक नईं बल्के परमेशेर एप्पू करते ।

### 3

1 (किछ़ लोक पुछ़तन) यहूदी केरि कुन बड़याई, या खतनेरो कुन फैइदो?

2 हर किसमे सेइं बड़ किछ़ । पेइलू त इन कि सारू परमेशेरू वचन तैन सॉफू ।

3 अगर किछ़ यहूदी परमेशेर कां ईमानदार न निस्से त कुन भोवं? कुन तैन केरे ईमानदार न राने सेइं परमेशेर तैन केरे लेइ अपने वादे पूरे केरने मां झूठो भोव?

4 नईं, कधे नईं! बल्के परमेशेर हमेशा सन्न ज़ोते, ते हर अक मैन्हु झूठो भोव, ज़ेन्च़रे पवित्रशास्त्रे मां परमेशेरे बारे मां लिखोरूए,

“ज़ैस सेइं तू अपनी गल्लन मां धर्मी भोस,

ते इन्साफेरे वक्ते तीं ज़ींत मैल्ले ।”

5 अगर इश्शां बुरां कम्मां परमेशेरी धार्मिकता ठहराते, त अस कुन ज़ोम? कुन इन कि परमेशेर क्रोध केरते ते असन सज़ा देते । (इन अवं इन्सानेरी रीति पुड़ ज़ोताई) ।

6 नईं, कधे नईं! अगर परमेशेर इश्शो यहूदी केरो इन्साफ रोड़े च़ारे न केरेलो, त तै किजो दुनियारो इन्साफ केरेलो?

7 किछ़ ज़ोतन, अगर मेरे झूठेरे वज़ाई सेइं परमेशेरी सच्च़ाई बांदी भोतीए ते तैसेरी महिमा भोतीए, त फिरी किजो पैपी केरो ज़ेरो मीं पुड़ हुक्म दित्तो गाते?

8 “एज्जा, अस बुराई केरम, कि इस सेइं भलाई पैदा भोए?” पन असन पुड़ दोष भी लव गाते, ते केत्रे ज़ोतन, कि एन केरू भी एने ज़ोनू आए । पन एरे ज़ेरेन पुड़ दोष लानो ठीक आए ।

*~~~~~*

9 त फिरी अस कुन ज़ोम? कुन अस यहूदी होरन करां रोडेम? नईं, कधी नईं; किजोकि असेईं यहूदी लोकन पुड़ ते गैर यहूदी लोकन पुड़ ई दोष लोरोए, कि तैना सारे पापेरे कञ्जे मां आन ।

10 ज़ेन्च़रे पवित्रशास्त्रे मां लिखोरूए,  
“कोई परमेशेरे सामने धर्मी नईं, अक भी नईं ।

11 कोई सच्च़े समझदार नईं,  
कोई परमेशेर तोपने बालो नईं ।

12 सारे परमेशेर करां दूर भोरेन, सारे निकम्मे बनोरेन,  
कोई भलाई केरनेवालो नईं, अक भी नईं ।

13 तैन केरू गल खुल्ली कबरे,  
तैनईं अपने ऐशी सेइं धोखो दित्तो,  
तैन केरे ओठन पुड़ सप्यां केरू ज़ेरे ।

14 ते तैन केरू भाषण लानती, ते टूलिठे सेइं भेरतांए ।

15 तैन केरे पव खून केरने लेइ तेज़न ।

16 तैना ज़ेरां भी गातन तुवाही ते कलेश तैन पत्ती गाते ।

17 तैन न ज्ञानन् शैन्ति सेइं केन्त्रां ज़ीतन ।

18 तैन मां परमेशेरो डर बिलकुल भी नई ।”

19 अस ज्ञानतम, कि मूसेरो कानून ज़ैन किछ ज़ोते, तैन्ने सेइं ज़ोते, ज़ैना तैस मन्तन, एल्हेरेलेइ कि केन्वी कां कोई बहाना न भोए, ते सारी दुनिया परमेशेरे सज़ारे लायिक भोए ।

20 किजोकि मूसेरे कानूनेरे मुताबिक कम्मां केरने सेइं कोई मैन्हु परमेशेरे सामने धर्मी नई भोनो, एल्हेरेलेइ कि मूसेरे कानूने सेइं पिशान भोतीए कि अस पापी आम ।

~~~~~

21 पन हुनी बगेर मूसेरो कानून मन्ने सेइं तै धार्मिकता बांदी भोरीए ज़ै परमेशेरे तरफां एइतीए, ज़ेसेरे बारे मां मूसेरे कानूने ते नेबी केरि किबातन मां लिखोरूए ।

22 मतलब परमेशेरी तै धार्मिकता ज़ै यीशु मसीह पुड़ विश्वास केरनेबालां केरे लेइए; किजोकि तैन मां किछ भेद भाव नई ।

23 एल्हेरेलेइ कि सेब्भेई पाप कियो, ते तैस महिमा करां दूर आन ज़ै परमेशर देते ।

24 पन परमेशेरे अपने अनुग्रहे सेइं अस पापां केरि सज़ाई करां यीशु मसीहेरे ज़िरिये छुटाए ते मुफ्ते मां धर्मी ठहराए ।

25 परमेशेरे मसीहेरे खुनेरे वजाई सेइं अक एरो छुटकारो ठहराव, ज़ै विश्वास केरने सेइं फैइदामंद भोते, कि ज़ैना पाप पेइले केरे, ते ज़ैना परमेशेरे अपने बर्दाशती सेइं टाले; तैन केरे बारे मां तै अपनि धार्मिकता बांदी केरते ।

26 बल्के इस्से वक्ते तैसेरी धार्मिकता बांदी भोए; कि ज़ैस सेइं तै एप्पू धर्मी ठहरे, ते ज़ै यीशु पुड़ विश्वास केरे, तैसेरो धर्मी ठहराने बालो भोए ।

27 ते घमण्ड केरनु कोइ राव? तैसेरी त ठारे नई । कोस कानूनेरे वजाई सेइं? कुन मूसेरो कानून मन्ने सेइं? नई, बल्के विश्वासेरे वजाई सेइं ।

28 एल्हेरेलेइ अस ज्ञानतम, कि मैन्हु मूसेरो कानूनेरे मुताबिक कम्मां केरनेरे बगेर यीशु मसीह पुड़ विश्वास केरने सेइं धर्मी भोते ।

29 कुन परमेशर सिर्फ यहुदी केरोए? कुन गैर कौमां केरो नई? हाँ गैर कौमां केरो भी आए ।

30 किजोकि अक्के परमेशेरे, ज़ै खतने बालन भी विश्वासे सेइं, ते ज़ैन केरो खतनो नई भोरो तैन भी विश्वासे सेइं धर्मी ठहरालो ।

31 ते कुन अस विश्वासे सेइं मूसेरे कानूने रद केरतम? नई, कधे नई; बल्के मूसेरे कानूने बनोरू रखतम ।

4

~~~~~

1 त अस कुन जोम, कि इश्श पूर्वज अब्राहमे कुन मैल्लू?

2 किजोकि अगर अब्राहम रोड़ कम्मन सेइं धर्मी ठहरावरो भोथो, त तैस घमण्ड केरनेरी ठार भोथी, पन रोड़ां कम्मां केरू घमण्ड परमेशेरे सामने नई ।

3 पवित्रशास्त्र कुन ज़ोते, इन कि “अब्राहमे परमेशेरे वादन पुड़ विश्वास कियो, ते तै तैसेरेलेइ धार्मिकता गनो जेव ।”

4 कम केरनेबालेरी मज़दूरी देनी दान नई, पन हक समझू गाते ।

5 पन ज़ै (पुन्नेरू) कम न केरे बल्के पापी मैन्हु धर्मी ठहराने बाले पुड़ विश्वास केरते, तैसेरो विश्वास तैसेरेलेइ धार्मिकता गनो गाते ।

6 ज़ैस परमेशर बगेर (पुन्नेरे) कम्मां केरे धर्मी ठहराते, तैस दाऊद भी धन ज़ोते ।

7 “धने तै ज़ेसेरे अधर्म माफ़ भोए,

ते ज़ैन केरे पाप ढके जे ।

8 धने तै मैन्हु ज़ैस परमेशर पापी न ठहराए ।”

9 ते इन धन ज़ोनू, कुन खतने बालां केरे लेइ आए, या ज़ैन केरो खतनो नई भोरो तैन केरे लेइ भी आए? अस पवित्त्रशास्त्रे मरां ज़ोतम, “अब्राहमे परमेशेरे वादन पुइ विश्वास कियो ते तै तैसेरेलेइ धार्मिकता गनो जेव ।”

10 इन तैसेरो खतनो भोने करां पेइलू भोव न कि खतनो भोनेरे बाद ।

11 परमेशेरे तै पेइलो कबूल कियो ते धर्मी ठहराव, जेइस हेजू तैसेरो खतनो न थियो भोरो, ते तैस खतनेरो निशान मैलो, कि तैस धार्मिकता पुइ छाप भोए, किजोकि तै तैन सेब्भी केरो (आत्मिक) बाजी ठहरे ज़ैना विश्वास त केरतन पन तैन केरो खतनो नई भोरो । तैना भी तैन केरे विश्वासेरे वजाई सेई धर्मी भोन ।

12 ते ज़ैन केरो खतनो भोरोए तैन केरो पूर्वज भोए, ज़ैन केरो न सिर्फ खतनो कियोरोए, पन ज़ैन इश्शे पूर्वज अब्राहमेरो ज़ेरो विश्वास आए, ज़ै तैनी बगैर खतनेरी हालती मां कियोरी थियो ।

### XXXXXXXXXXXX

13 परमेशेरे अब्राहमे ते तैसेरे वंश सेई वादो कियोरो थियो कि तैना दुनियारे वारस भोले । ई वादे एल्हेरेलेइ नई दित्तोरो कि अब्राहमे मूसेरो कानून मन्ने, बल्के तैसेरो विश्वास ज़ै परमेशेरे पुइ थियो तैसेरे वजाई सेई तै धर्मी ठहराव जेव ।

14 ज़ै वादो परमेशेरे दित्तोरो थियो कि तैना दुनियारे वारस भोले अगर मूसेरो कानून मन्ने सेई आए, त फिरि विश्वास बेमतलब, ते वादो बेकार भोव ।

15 परमेशेरे तैस पुइ क्रोध केरते ज़ै कानून रोडे च़ारे न मन्ने, ते ज़ैडी कानून नई, तैडी तैसेरू टलोइन् भी नई ।

16 एल्हेरेलेइ परमेशेरे वादे विश्वासेरे ज़िरिये हासिल भोतन, ताके तैना वादे अनुग्रहरे ज़िरिये पक्के भोन, ते सारे वादे अब्राहमेरे वंशेरे लेइ आन, न सिर्फ यहूदी केरे लेइ, ज़ैना मूसेरू कानून मन्तन बल्के तैन सेब्भी केरे लेइ भी आन, ज़ैना अब्राहमेरो ज़ेरो विश्वास केरनेबालन, तैए इश्शो सेब्भी केरो पूर्वजे ।

17 ज़ेन्न्वेरे पवित्त्रशास्त्रे मां लिखोरूए, “मीं तू बेडि कौमां केरो पूर्वज बनेवरोस” परमेशेरे पुइ तैने विश्वास कियो, ते ज़ै मुइदन ज़ीतो केरते ते ज़ैना चीज़ां वाजूद नई, तैन भी हाज़र केरते ।

18 परमेशेरे वचनेरे मुताबिक कि “तेरू खानदान एरू भोलू” तैना बेडि कौमां केरे पूर्वज भोन । तैनी न उमीदी मां भी उमीदी रेखतां विश्वास कियो,

19 ते अब्राहम ज़ै लगभग 100 सालेरो थियो, अपने मरें जानी, ते सारारे मरें पेटेरे हालीती पुइ भी विश्वासे मां कमज़ोर न भोव ।

20 ते गैर विश्वासी भोइतां परमेशेरे वादे पुइ शक न की, पन विश्वासे मां मज़बूत भोइतां परमेशेरी बड़याई की ।

21 ते तैस पूरो भरोसो भोव, कि ज़ैस गल्लरो वादो परमेशेरे कियोरोए, तै तैस पूरो केरनेरी शक्ति भी रखते ।

22 अब्राहमेरो विश्वास तैसेरेलेइ धार्मिकता गनो जेव ।

23 ते ई वचन, “विश्वास तैसेरेलेइ धार्मिकता गनो जेव,” न सिर्फ तैसेरेलेइ लिखो जेव ।

24 बल्के इश्शे लेइ भी ज़ैन केरे लेइ विश्वास धार्मिकता गनो जेव, मतलब इश्शे लेइ ज़ैना अस परमेशेरे पुइ विश्वास केरतम, ज़ैने इश्शो प्रभु यीशु मसीह मुइदन मरां ज़ीतो कियो ।

25 यीशु इश्शे पापां केरे लेइ मारनेरे लेइ टलुवाव जेव, ते असन धर्मी ठहरानेरे लेइ परमेशेरे ज़ीतो भी कियो ।

## 5

### XXXXXXXXXXXX

1 एल्हेरेलेइ असां विश्वासे सेई धर्मी भोए, ते ज़ैन किछ इश्शे प्रभु यीशु मसीहे इश्शे लेइ कियोरू तैसेरे ज़िरिये इश्शो मेल मलाप परमेशेरे सेई भोरोए ।

2 ते इश्रणे विश्वासेरे वजाई सेइं मसीहे अस इस अनुग्रहे तगर पुजाए, जैडी अज अस खडे भी आम, ते असां पूरे याकीने ते आनन्दे सेइं परमेशेरी महिमा बंटनेरे लेइ उमीदी मां रातम ।

3 सिर्फ एन्ने नई, बल्के मुसीबतन मां भी अस आनन्द केरम, किजोकि अस ज्ञानतम कि मुसीबतन सेइं सबर बद्धती ।

4 परमेशर असन रोडे समझते किजोकि केन्त्रे सबर केरनि असेईं शिखोरीए, ते तै असन रोडे समझते तांए असन उमीदे ।

5 ई उमीदी असन शरमिन्दा न केरे, किजोकि पवित्र आत्मा जै परमेशेरे असन दित्तोरोए तैसेरे जिरिये सेइं तैसेरो प्यार इश्रणे दिलन मां भरोरोए ।

6 किजोकि जैखन अस अपनो आप बचानेरे लेइ कमजोर थिये, त मसीह परमेशेरे ठहरावरे वक्ते पुड़ इश्रणे पैपी केरे लेइ मरो ।

7 केन्ची धर्मी मैनेरे लेइ भी कोई मरे, इन बडू मुशकले, पन शैइद केन्ची धर्मी मैनेरे लेइ कोई अपनि जान देनेरी जुरत केरे ।

8 पन परमेशेरे अपनो महान प्यार एन्त्रे बांदो कियो, कि जैखन असां पापी थिये तैखन मसीह इश्रणे लेइ मरो ।

9 ते अस तैसेरे खूने सेइं धर्मी ठहरे, त मसीहेरे जिरिये सेइं परमेशेरे हमेशारी सजाई करां जरूर बचमेले

10 किजोकि जैखन अस परमेशेरे दुश्मन थिये त तैसेरे मटठरे मौती सेइं इश्रणो मेल तैस सेइं भोव, ते फिरी मेल मलाप भोरोए त तैसेरे जिन्दगी सेइं असन पक्की मुक्ति मैलेली ।

11 ते सिर्फ इन्ने नई, पन हुनी प्रभु यीशु मसीहेरे जिरिये सेइं इश्रणो मेल परमेशेरे सेइं भोरोए, एल्हेरेलेइ अस परमेशेरे मां आनन्द केरतम ।

### \*\*\*\*\*

12 एल्हेरेलेइ जेन्त्रे एक्की मैनेरे जिरिये यानी आदमेरे जिरिये पाप दुनियाई मां अव, ते पापे सेइं मौत आई, ते एन्त्रे मौत सेब्भी मैनन् मां फैली । किजोकि सेब्भेई पाप केरो ।

13 मूसेरो कानून देने करां पेडले पाप दुनियाई मां त थियो, पन जैडी कानून नई, तैडी पाप गनो न गाए ।

14 फिरी भी आदमे करां मूसा तगर सेब्भी लोकेई पाप कियो ते सब लोक मरे, जैन लोकेई तैस आदमेरो जेरो पाप न कियो तैना भी मरे, आदम मसीहेरो जेरो थियो, जै मसीह एजनेवालो थियो ।

15 पन परमेशेरू वरदान आदमेरे पापेरू जेरू नई, इन सच्चे कि एक्की मैन्हु यानी आदमेरे पापेरे वजाई सेइं बडे लोक मरे । पन परमेशेरे अनुग्रह त कने तैसेरू वरदान बडे लोकां केरे लेइ महान आए जैन एक्की मैन्हु यानी यीशु मसीहेरे अनुग्रहे सेइं एइते ।

16 जैन वरदान परमेशेरे असन दिन्तू तैन आदमेरे पापेरू जेरू नई, किजोकि एक्की मैनेरो पाप सजा घिन्तां अव । पन हालांकी असेईं भी बडे पाप कियोरेन फिरी भी परमेशेरे असन एरू वरदान दित्तोरूए जैन असन परमेशेरी नजरी मां धर्मी ठहराते ।

17 किजोकि एक्की मैनेरे पापेरे वजाई सेइं सब लोक मरे, त जैन लोकन अनुग्रहेरू ते धार्मिकतारू बडू वरदान एक्की मैनेरे जिरिये मैलते, तैना लोक जीते राले ते एक्की मैन्हु यानी यीशु मसीहेरे जिरिये राज़ केरेले ।

18 एल्हेरेलेइ जेन्त्रे एक्की मैनेरो पाप सेब्भी मैनेरू केरे लेइ सजा आनते, तेन्त्रे मसीहेरे धार्मिकतारू कम सेब्भी मैनेरू केरे लेइ धर्मी ठहराने लेइ वजा बनू, जैस सेइं जिन्दगी मैलतीए ।

19 किजोकि जेन्त्रे एक्की मैनेरे हुकम न मन्ने सेइं बडे लोक पापी भोए, तेन्त्रे एक्की मैनेरे हुकम मन्ने सेइं बडे लोक धर्मी भोले ।

20 मूसेरो कानून एल्हेरेलेइ दित्तोरो थियो कि सारे लोकन पतो लगगे कि तैना केतरे पापिन । पन जेन्त्रे लोकेई जेतरे जादे पाप किये तेन्त्रे परमेशेरो अनुग्रह तैस करां भी बडो जादे भोवं,

21 कि जेन्चरे सेब्भी लोकेई पाप किये ते मरे, तेन्चरे परमेशेरो अनुग्रह राज़ केरते ते परमेशेरे अस इशशे प्रभु यीशु मसीहेरे वजाई सेइं धर्मी ठहरावरेम । मतलब असन हमेशारी जिन्दगी मैलेली ।

## 6

?????? ?? ???? ?? ??????? ?? ???? ?

- 1 त अस कुन ज़ोम? कुन अस पाप केरते रहम, कि परमेशेरो अनुग्रह बद्धतो गाए?
- 2 नई, कधी नई! अस ज़ैखन पापेरे लेइ मरे ते फिरी किजो अग्रोवं जो पापे मां जिन्दगी वीताम?
- 3 तुस ज़ानतम कि ज़ैखन असेईं सेब्भी लोकेई यीशु मसीहे सेइं साथी अक भोनेरे लेइ बपतिस्मो नीयोरो थियो, तैखन अस तैस सेइं साथी मरे थिये ।
- 4 ज़ैखन असेईं बपतिस्मो नीयोरो थियो तैखन अस मसीह सेइं साथी मरे ते दबे जे, ताके अस भी नव्वीं जिन्दगी जीम, जेन्चरे मसीह बाजी परमेशेरी महिमा सेइं मुडदन मरां जीतो कियो ।
- 5 किजोकि अगर अस बपतिस्मेरे ज़िरिये मसीहेरी मौती मां शामिल भोरेम, त अस भी पक्के तैसेरे ज़ेरे जीते भोमेले ।
- 6 अस ज़ानतम कि इशशी पुरानी इन्सानयत यीशु मसीह सेइं साथी क़रूसे पुड चादोरीए, ताके पापेरो जिसम बेफाइदो भोए, ते अस अग्रोवं जो पापेरे गुलैमी मां न रहम ।
- 7 ज़ैखन मैन्हु मरते त तैखन तै पापेरी शेक्ति करां आज़ाद भोते ।
- 8 एल्हेरेलेइ अगर अस मसीह सेइं साथी मरे, ते इशशो विश्वास ईए कि तैस सेइं साथी जीते भी भोमेले ।
- 9 किजोकि अस एन ज़ानतम, कि मसीह मुडदन मरां जीतो भोरोए ते तै फिरी न मरेलो, ते तैस पुड फिरी मौतरू राज़ नई भोनू ।
- 10 ज़ैखन मसीह मरो त तै एक्की बार सेब्भी केरे पापेरे लेइ मरो; पन हुनी तै जीतोए, ते सिर्फ परमेशेरे लेइ जीतोए ।
- 11 एन्चरे तुस अपने बारे मां भी सोचा कि तुस पापेरे लेइ त मरोरेथ, पन यीशु मसीहे तुसन जिन्दगी दितोरीए ते तुस परमेशेरे लेइ जीते आथ ।
- 12 एल्हेरेलेइ तुस अपने जानी मां पापेरी इच्छान राज़ केरने न देथ, ते तुस तैन केरे मुताबिक न चला ।
- 13 ते अपने जिसमेरे अंगन बुरे कम्मां केरे लेइ पापे न सोंफा, पन अपने आपे मुडदन मरां जीते सेमझतां परमेशेरे सोंफा । ते अपने जिसमेरे अंगन धार्मिकतारे कम्मां केरे लेइ परमेशेरे सोंफा ।
- 14 ते तुसन पुड पापेरू राज़ न भोलू, किजोकि तुस मूसेरे कानूनेरे अधीन नई बल्के अनुग्रहेरे अधीन आथ ।

?????????? ?? ?

- 15 त कुन भोव कि अस एल्हेरेलेइ पाप केरम, कि असां मूसेरे कानूनेरे अधीन नई बल्के अनुग्रहेरे? नई, कथे नई ।
- 16 तुस ज़ानथ, कि ज़ैखन तुस ज़ेसेरो हुक्म मन्नेरे लेइ अपनो आप गुलामां केरे ज़ेरे सोफतथ त तुस तैसेरे गुलाम आथ । चाए पापेरी ज़ेसेरो अन्त मौते, चाए हुक्म मन्नेरे ज़ेसेरो अन्त धार्मिकताए ।
- 17 तुस त पेइले पापेरे गुलाम थिये पन हुनी तुसन ज़ै शिक्षा मैलोरी थी तैस पूरे दिले सेइं मन्नेबाले भोए, एल्हेरेलेइ अवं परमेशेरेरू शुक्र केरताई ।
- 18 ते हुनी परमेशेरे तुस पापेरी शेक्ति करां छुटेइतां आज़ाद किये, ते तुस परमेशेरे गुलाम बने ताके तुस ज़ैन रोडू तैन केरि बटथ ।
- 19 अवं ई मिसाल एल्हेरेलेइ इस्तेमाल केरने लोरोई, किजोकि तुशशे लेइ इन समझनू मुश्किले । जेन्चरे तुसेईं पेइले अपनो आप गुलामेरे ज़ेरो बुरां कम्मां केरे लेइ अधर्म ते बुरेइरे लेइ सोंफोरे थियो, तेन्चरे हुनी तुस अपने आपे परमेशेरी सेवारे लेइ सोंफा ताके तुस पूरे तरीके सेइं तैसेरे भोथ ।
- 20 ज़ेइस तुस पापेरे गुलाम थिये, त तुसन परमेशर खुश केरनेरी कोई ज़रूरत न थी ।



21 तुसन पुरैनी ज़िन्दगी सेइं कुन फैइदो मैलो? सिर्फ तुस शरमातथ, किजोकि जैन तुसेईं कियूं तैसेरो नितीजो सिर्फ मौते।

22 पन हुनी तुस पापे करां आज़ाद भोरेथ ते तुस परमेशेरे दास बनोरेथ। किजोकि इना गल्लां तुसन पवित्तर बनैली ते तुसन हमेशारी ज़िन्दगी मैलेली।

23 किजोकि पापेरी मज़दूरी त मौते, पन परमेशेरू वरदान इश्शे प्रभु यीशु मसीह मां हमेशारी ज़िन्दगी आए।

## 7

### ?????? ?????????? ?????

1 हे दूलाव ते बेइनव, कुन तुस न ज़ानथ अवं मूसेरो कानून ज़ान्ने बालन सेइं ज़ोताई, कि ज़ांतगर मैन्हु ज़ीतो रहते, तांतगर तैस पुइ मूसेरे कानूनेरो अधिकार भोते?

2 मिसालेरे तोरे पुइ, इलावरी कुआन्श कानूनेरे मुताबिक ज़ांतगर तैसेरो मुन्श ज़ीतोए तांतगर तैसेरी पाबंदे। पन अगर मुन्श मेरि गाए, त तै मुन्शेरे कानूने करां छुटी जेई।

3 ते अगर मुन्श हेजू ज़ीतो ते होरि मइदेरी भोए त तै बदमाश भोतीए, पन मुन्श मेरि गाए, त तैसेरे कानूने करां छुटी, इडी तगर कि होरि मइदेरी भोए, फिरी भी बदमाश न ठहरेली।

4 हे दूलाव ते बेइनव, ज़ैखन तुस मसीह सेइं साथी मेरे, त तुस कानूनेरे लेइ मरे। हुनी तुस मसीहेरे आथ ज़ै मुइदन मरां ज़ीतो कियोरोए, ताके तुस परमेशेरे लेइ फलदार ज़िन्दगी ज़ीथ।

5 किजोकि ज़ेइस अस अपने सुभावेरे मुताबिक ज़लते थियो, त पापी सुभाव असन मां कम केरतो थियो, ते कानूने तैना पापी इच्छां उकसेइं, ते ज़ैन किछ्छ असेईं कियूं तैसेरो फल मौत थियो।

6 पन ज़ेसेरे बंधने मां अस थियो, तैसेरेलेइ मेरतां, हुनी कानूने करां एरे छुटोरम, पन आत्मार नव्वे तरीके पुइ सेवा केरतम, न कि लफसन सेइं।

### ?????? ????? ?? ???

7 त अस कुन ज़ोम? कुन मूसेरो कानून पापे? नई, कधी नई! बल्के बगैर मूसेरे कानूने अवं पापे न पिशैनी, अगर मूसेरो कानून न ज़ोथो कि “लालच न केर” त अवं लालच न ज़ैनेथो।

8 पन पापे मौको लेइतां हुकमे सेइं मीं मां हर किसमेरू लालच पैदा कियूं, किजोकि बगैर मूसेरे कानूने पाप मरों आए।

9 अवं त मूसेरे कानूने बगैर पेइलो ज़ीतो थियो, पन ज़ैखन हुकम अव, त पाप ज़ीतो भोव ते अवं मरो।

10 ते तैए हुकम ज़ै ज़िन्दगरे लेइ थियो, मेरे लेइ मौतरी वजा बनो।

11 किजोकि पापे मौको मेलतां हुकमे सेइं मीं धोखो दिचो, ते तैस सेइं अवं आत्मिक तोरे पुइ मरो।

12 एल्हेरेलेइ मूसेरो कानून पवित्तर आए, ते हुकम भी पवित्तर, ठीक ते रोडोए।

13 ते कुन ज़ै चीज़ रोडी थी मेरे लेइ मौत बनी? नई, कधे नई! पन पापे तैस रोडी चीज़ी सेइं मेरे लेइ मौत पैदा केरतां अवं मारो, कि तैसेरो पाप भोनी बांदो भोए, ते हुकमे सेइं पाप बडो जादे बुझोए।

### ?????? ????? ??? ??? ?????

14 किजोकि अस ज़ानतम कि मूसेरो कानून त आत्मिके, पन अवं जिसमानी ते पापेरो गुलाम भोनेरे लेइ बिकोरोई।

15 ते ज़ैन अवं केरताई, तैस न ज़ैनी, किजोकि ज़ैन अवं चाताई, तैन न केरि, पन ज़ैस सेइं मीं नफरते, तैन्ने केरताई।

16 ते अगर, ज़ैन अवं न चैई तैने केरताई, त अवं मनताई, कि मूसेरो कानून रोडो आए।

17 ते एस हालती मां बुरी चीज़ां केरनेबालो अवं नई, बल्के पापे, ज़ै मीं मांए।

18 किजोकि अवं ज्ञानताई, कि मीं मां मतलब मेरे जिसमे मां कोई रोड़ी चीज नई, रोडू केरनेरी इच्छा त मीं मां आए, पन मीं करां न केरोए।

19 किजोकि ज़ैस रोडे कम्मरी इच्छा अवं केरताई, तैन मीं करां न बने, पन ज़ैस बुरैइयरी इच्छा भी न केरि तैस केरताई।

20 पन अगर अवं तैन्ने केरताई, ज़ेसेरी इच्छा न केरि, ते तैन केरनेवालो अवं नई, बल्के पापे ज़ै मीं मांए।

21 ते मीं ई कानून मैलते, कि ज़ैखन रोडे कम्मरी इच्छा केरताई, त अवं बुराई केरताई।

22 किजोकि अवं ज़मीरे सेई त परमेशेरे कानूने सेई बड़ो खुश भोताई।

23 पन मीं अपने जिसमेरे अंगन मां होरि ज़ेरो कानून लेइहोते, ज़ै मेरी अकलरे कानूने सेई लड़ते, ते मीं पापेरे गुलैमेरे कानूने मां छुडते ज़ै मेरे जिसमेरे अंगन मांए।

24 अवं केरो नुभाघ मैन्हु आई, मीं इस जिसमे करां ज़ै मौतरे पासे नेते कौन छुटालो?

25 अवं परमेशेरे शुकुर केरताई ज़ैने यीशु मसीहेरे ज़िरिये अवं बचाव, ते अवं अपनि अकली सेई त परमेशेरे कानूनेरो इस्तेमाल केरताई, पन अपने जिसमे सेई पापेरी कानूनेरो इस्तेमाल केरताई।

## 8

?????? ??????? ??????? ???????

1 एल्हेरलेइ हुनी ज़ैना मसीह यीशु मां आन, तैन पुड़ सज़ारो हुकम नई।

2 किजोकि पवित्तर आत्मा तुसन ज़िन्दगी देलो, ज़ै यीशु मसीह करां एइती ते तै तुसन पाप ते मौती करां आज़ाद केरेलो।

3 किजोकि ज़ैन कम कानूने इश्शे पापी सुभावेरे वजाई सेई कमज़ोर भोइतां न केरि बटु, तैन परमेशेरे कियू, मतलब अपने मटटे इश्शे पैपी केरो ज़ेरो भोनेरे लेइ, ते पापेरे बलिदानेरे लेइ भेजू, परमेशेरे मसीहेरे जिसमे मां पापेरी सज़ा दिती।

4 परमेशेरे एन एल्हेरेलेइ कियू ताके अस अपने पापी सुभावेरे मुताबिक नई, पन पवित्तर आत्माेरे मुताबिक च़लतां ज़ै हुकम कानून देते तैस केरि बटम।

5 किजोकि ज़ैना लोक पापी सुभावेरे मुताबिक ज़िन्दगी बीतातन, तैना पापेरे बारे मां सोचतन, पन ज़ैना लोक पवित्तर आत्माेरे मुताबिक ज़िन्दगी बीतातन, तैना आत्मिक गल्लां केरे बारे मां सोचतन।

6 अगर इश्शो मन इश्शे पापी सुभावेरे मुताबिक च़लते त अस मरमेले, पन अगर इश्शो मन आत्माेरे मुताबिक च़लते त असन कां ज़िन्दगी ते शान्ति मैलेली।

7 किजोकि पापी सुभावेरे मुताबिक च़लनू परमेशेरे सेई बैर रखनोए, किजोकि न त पापी सुभाव परमेशेरे कानूनेरे अधीने, ते न कानूनेरे मुताबिक च़लि बटते।

8 ते ज़ैना पापी सुभावेरे मुताबिक च़लतन तैना परमेशेरे खुश न केरि बटन।

9 पन ज़ैखन परमेशेरो आत्मा तुसन मां बस्सते, ते तुस पापी सुभावेरे मुताबिक न च़लथ बल्के पवित्तर आत्माेरे मुताबिक च़लतथ, अगर कोन्वी मां पवित्तर आत्मा नई त तै मसीहेरो मैन्हु नई।

10 ते अगर मसीह तुसन मांए, त जिसम पापेरे वजाई सेई मरेलो, पन आत्मा धार्मिकतारे वजाई सेई जीतीए।

11 ते अगर तैसेरी आत्मा ज़ैने यीशु मुड़दन मरां जीतो कियो तुसन मांए। ते ज़ै मसीह तैन मुड़दन मरां जीतो कियो, तैए तुश्शे भी नाश भोनेवाले जिसमे अपनि आत्मा सेई जीतो केरेलो, ज़ै तुसन मांए।

12 हे द्वालाव ते बेइनव, असेई एन्चरे न लोडे ज़ीयेरू ज़ेन्चरे अस अपने पापी सुभावेरे मुताबिक ज़ीनू चातम, पन असेई एन्चरे ज़ीयोरू लोडे ज़ेन्चरे परमेशेरो आत्मा चाते।

13 किजोकि अगर तुस अपने पापी सुभावेरे मुताबिक ज़ीले त तुस मरेले, पन अगर तुस पवित्तर आत्माेरे मुताबिक च़लले त तुस अपने पापी सुभावेरां कम्मां केरनां बंद केरेले ते फिरी तुस जीते राले।

14 किजोकि जेतरे परमेशेरे आत्मा रे जलाने सेइं जलतन तैन्ना परमेशेरे बच्चेन ।

15 किजोकि जै आत्मा तुसन मैलोरोए तुसन फिरी गुलाम बेनतां रानेरे लेइ नई, बल्के तै तुसन परमेशेरे बच्चे बनाते । तैसेरे जिरिये अस परमेशेरे जो हे अब्बा, हे बाजी ज़ोतम ।

16 पवित्र आत्मा एप्पू इशशी आत्मा सेइं मिलतां गवाही देते, कि अस परमेशेरे बच्चेम ।

17 किजोकि अस परमेशेरे बच्चेम ते असां तैना बरकतां हासिल केरमेले जैना परमेशर अपने लोकां केरे लेइ रेखोरिन, ते मसीहेरे लेइ भी जैन परमेशेरे रेखोरूए, तैन भी अस मसीह सेइं साथी हासिल केरमेले; किजोकि अगर अस मसीहेरे जेरे दुःख झैलमेले ते अस भी मसीह साथी महिमा हासिल केरमेले ।

XXXXXXXXXX XXXXX

18 मीं पूरू याकीने, कि जैना दुःख अस झैल्लने लोरेम, तैस महिमारे सामने, जै परमेशर असन देनेवालोए, किछ भी नई ।

19 किजोकि सैरी रचनारी चीजां बडे बे सबरी सेइं तैस वक्तेरो इंतज़ार करने लोरिन, कि ज़ेइस परमेशेरे इन बांदो करनू तैसेरे सच्चे बच्चे कौन आन ।

20 किजोकि जैन किछ परमेशेरे बनाव, तैन सैरी चीजेइं अपनि कीमत गवाइ, एल्हेरेलेइ नई कि तैना अपने आप चैती थी, पन परमेशेरे एन भोने दित्तू । पन फिरी भी उमीदे ।

21 कि सृष्टि एप्पू भी खुश आए कि विनाशे करां छुटकारो हासिल केरतां, परमेशेरे बच्चां केरे महिमारी अज़ैदी मां खुशी मनाली ।

22 किजोकि अस ज्ञानतम कि सारी सृष्टि मिलतां हुना तगर कर लातीए ते तकलीफी मां तडफतीए, जेन्वरे दोज़ींती गल्हे बिशनेरी तकलीफ भोतीए ।

23 सिर्फ तैन्ना नई पन अस भी जैन एजने बैली महिमारो पेइले फलेरो स्वाद बखनेरे लेइ पवित्र आत्मा दित्तो, पन अस हेजू भी परमेशेरे वक्ते बलगने लोरेम जैखन परमेशर अपने बच्चे केरे रूपे मां कबूल केरलो, ते असन जिसमेरे बुरैई करां छुटकारो देलो ।

24 हुनी परमेशेरे असन मुक्ति दित्तोरीए, असन ई उमीदे । पन अगर तुस कोन्वी चीजी हासिल केरनेरे लेइ उमीद केरथ जै तुसन कां पेइली आए, त फिरी तै उमीद नई । किजोकि जैस चीजी कोई हेरने लोरोए तैसेरी उमीद कुन केरे ?

25 पन जैस चीजी अस न लहम, अगर तैसेरी उमीद रखतम, त सबरी सेइं तैस बलगते भी रातम ।

26 एन्वरे पवित्र आत्मा इशशी महत् करेते जैखन अस परमेशेरे पुइ भरोसो रखने मां कमज़ोर भोतम, किजोकि अस न ज्ञानम, कि प्रार्थना केन्वरे केरतन; पन पवित्र आत्मा एप्पू कर लेइतां जै बयानेरे बेइरे, इशशे लेइ विनती केरतीए ।

27 ते परमेशर जै मनां केरो ज्ञानने बालोए ज्ञानते, कि पवित्र आत्मा कुन लोरो ज़ोने । किजोकि तै पवित्र लोकां केरे लेइ परमेशेरे मेर्जी सेइं विनती केरते ।

28 ते अस ज्ञानतम, कि जैना लोक परमेशेरे सेइं प्यार केरतन, परमेशर तैन केरे लेइ सब गल्लां केरे ज़िरिये भलाई पैदा करेते; मतलब तैन केरे लेइ जैना तैनी अपने मेरज़ारे मुताबिक चुनोरिन ।

29 किजोकि तैन जैना पेइले चुने, ते पेइले ठहराए भी कि तैसेरे मट्टेरे रूपे मां भोन, ताके तै बडे दूलान मां ज़ेठो भोए ।

30 फिरी जैना तैन पेइले ठहराए, तैना चुने भी, ते जैना चुने, तैना धर्मी भी ठहराए, ते जैना धर्मी ठहराए तैन महिमा भी दित्तोरीए ।

XXXXXXXXXX XXXXX

31 ते अस एन गल्लां केरे बारे मां कुन ज़ोम? अगर परमेशर इशशे पासे, ते इशशो खलाफ कौन भोइ बटते ?

32 परमेशेरे अपनू मट्टू भी अपने लेइ न रखवू, बल्के तैन इशशे सेब्मी केरे लेइ तैसेरे दुश्मना केरे हवाले दित्तू, ते तै मसीह सेइं असन तैन सब किछ देलो ज़ेसेरो वादो तैन असन सेइं कियोरोए ।

33 अस परमेशेरे चुनोरम, कोई असन पुड़ परमेशेरे सामने दोष न लेई बटे, किजोकि तैए ज़ैने अस धर्मी ठहरावरेम।

34 फिरी कौने ज़ै सज़ारो हुक्म देलो? कोई नई, यीशु मसीह तैए ज़ै मरो, बल्के मुड़दन मरां ज़ीतो भोव, ते परमेशेरे देइने पास, ते इशे लेइ बिनती भी केरते।

35 कौन असन मसीहेरे प्यारे करां अलग केरि बटते? मुसीबत या तंगी, या जुलम, या काल, या नगूपन, या खतरो, या तलवार? इन मरां कोई भी चीज़ असन मसीहेरे प्यारे करां अलग न केरि बटे।

36 ज़ेन्वरे पवित्रशास्त्रे मां लिखोरूए, “तेरे लेइ अस हर वक्त मौतरे खतरे मां रातम; अस मेरोने बैली भेड़डां केरे ज़ेरे गने जोरेम।”

37 पन ज़ैने असन सेइं प्यार कियोरोए, तैसेरे ज़िरिये असन पूरे तरीके सेइं एन सैरी बुरी गल्लां पुड़ ज़ीत हासिल आए।

38 किजोकि मीं पूरू याकीने, किन मौत, न ज़िन्दगी, न स्वर्गदूत, न हक़ोमतां, न ज़ै वक्त बल्लोरोए, न एजनेबालो वक्त, न शेक्ति, न उचार,

39 न डुघार ते न कोई होरि सृष्टि, असन परमेशेरे प्यारे करां ज़ै इशे प्रभु यीशु मसीह मांए अलग केरि सकेली।

## 9

### ????????? ??????? ???

1 अवं मसीह मां सच्च ज़ोताई, झूठ न ज़ोई, ते मेरो ज़मीर भी पवित्र आत्माई मां गवाही देते।

2 कि मीं बड़ो दुःखे, ते मेरो दिल लगातार मेरे लोकां केरे लेइ उदास भोते।

3 किजोकि मेरे यहूदी दूला ते बेइनां केरे लेइ, अवं हमेशेरे लेइ श्रापित भोथो ते मसीह करां अलग भोथो अगर तैन इस वजाई सेइं तैन मुक्ति मैलती।

4 तैना इस्राएलिन; ते तैना परमेशेरे लेपलक बच्चे भोनेरे लेइ चुनोरेन, ते परमेशेरे अपनि महिमा तैन पुड़ बांदी की। ते तैनी तैस सेइं करार कियो, ते तैन मूसरो कानून दित्तो। ते तैनी तैन अपनि आराधना ते अपने खूबसूत वादे पूरे केरनेरे लेइ हासिल केरनेरो मौको दित्तो।

5 अब्राहम, इसहाक ते याकूब तैन केरे दादे पड़दादे थिये, ते मसीह भी जिसमेरे लिहाजे सेइं तैन मरां अवं, तै परमेशेरे ते सेबन करां बाए ज़ै सेबन पुड़ राज़ केरते, तैसेरी महिमा हमेशा भोती राए। आमीन।

6 पन इन नई, कि परमेशेरू वचन टलू कि, सारे ज़ैना इस्राएलेरे वंशन, तैना सब सच्चे इस्राएली नई।

7 ते न अब्राहमेरे वंश मां ज़र्म भोने सेइं सब परमेशेरे बच्चे भोन। पन पवित्रशास्त्रे मां परमेश अब्राहमे सेइं ज़ोते, “ज़ैना इसहाकेरे वंशे मरां पैदा भोले तैन्ने तेरू वंश मन्नू गालू।”

8 मतलब ज़ैना कुदुरती तरीके सेइं ज़र्म धिन्तन तैना परमेशेरे बच्चे नई, पन सिर्फ वादेरे बच्चे अब्राहमेरे बच्चे गने गातन।

9 किजोकि वादेरू वचन इने, “अवं एग्री साल इस वक्ते फिरी एज्जेलो, ते सारारू अक मट्टू भोनुए।”

10 ते सिर्फ एन नई, पन ज़ेइस रिबका भी एक्की सेइं मतलब इसहाके सेइं दोज़ीती थी ते तैसेरे पेटे मां दूई बच्चे थिये।

11-12 ते हेज़ तगर तैना बच्चे न थिये ज़र्मोरो, ते न तैनेई रोडू या बुरू कियेरू थियूं, कि परमेशेरे रिबका सेइं ज़ोवं, तेरू बड़डू मट्टू निकड़ेरी सेवा केरेलू। परमेशेरे एन एल्हेरेलेइ ज़ोवं कि एन हिराए, कि तै अपनि मेज़ीं सेइं फैसले केरते ते इन तैन मट्टां केरे रोडां या बुरे कम्मां केरे वजाई सेइं न थियूं।

13 ज़ेन्वरे पवित्रशास्त्रे मां लिखोरूए, “मीं याकूबे सेइं प्यार कियो, पन एसावेरो इन्कार कियो।”

14 ते अस कुन ज़ोम, कि परमेश अइन्साफे कि तै ज़ैस चाते चुनते? नई, कधे नई!

15 किजोकि परमेश्वर मूसे सेइं ज़ोते, “अवं ज़ैस केन्ची पुड़ दया केरनि चैई, तैस पुड़ दया केरेलो ते ज़ैस पुड़ तरस केरनो चैई तैस पुड़ तरस केरेलो।”

16 एल्हेरेलेइ परमेश्वर तैस चुनेलो ज़ैस पुड़ तै दया हिरानी चाते; तैसेरी इच्छा लोक ज़ैन चातन या केरनेरी कोशिश केरतन तैस पुड़ निर्भर नई।

17 किजोकि पवित्रशास्त्रे मां परमेश्वरे मिस्ररे राजे फ़िरौन\* सेइं ज़ोवं, “मीं तू एल्हेरेलेइ राज़ो बनोरोस, कि तीं मां अपनि शक्ति हिरैई, ते मेरे नव्वेरो प्रचार सैरी ज़मीनी पुड़ भोए।”

18 ते ज़ैस पुड़ तै चाते, तैस पुड़ दया केरते; ते ज़ैस चाते ढीठ केरते।

XXXXXXXXXX XXX XX XXXXX

19 ते किछ लोक मीं सेइं ज़ाले, “अगर एन्चरे, त फ़िरी परमेश्वर केन्चरे फैसलो केरि बटते कि अस गलत आम? एल्हेरेलेइ कोई भी तैस ज़ैन तै चाते केरने करां न रोकी बटे।”

20 हे मैन्हु, तू कौन आस, ज़ै तू परमेश्वरे सेइं बेंस केरतस? कुन वानोरी चीज़ बनाने बाले सेइं ज़ोई बटतीए, “तीं अवं एरी किजो बनाई?”

21 कुन कुम्हारे मित्ती पुड़ अधिकार नई, कि एक्की लुनदे मरां, अक भांड आदरारे लेइ बनाए, ते होरू नरादराए लेइ बनाए?

22 (परमेश्वरे अपने बनावरो लोकन सेइं ज़ैन तै चाए तैन केरनेरो अधिकारे) ज़ैना नाश भोनेरे काबल थिये, तैन केरे खलाफ परमेश्वर अपनो क्रोध हिरानो ते अपनि सामर्थ बांदी केरनेरी चातो थियो, पन तैसेरे बदले मां तैनी सबर की।

23 (तेनी एन कियू) किजोकि तै हिरानू चातो थियो (मसीहरे मौतरे बलिदानेरे ज़िरिये) तै केतूरो महान आए, ज़ैखन तै तैन लोकन पुड़ दया केरते ज़ैना तैनी अपनि महिमा मां शामिल भोने लेइ चुनोरेन।

24 मतलब असन पुड़ ज़ैना तैने न सिर्फ़ यहूदन मरां बल्के गैर कौमन मरां भी चुने।

25 ज़ेन्चरे तै होशे नेबरे किताबी मां ज़ोते,

“ज़ैना मेरे लोक न थी, तैन अवं अपने लोक ज़ोलो।

ते ज़ैना लोक मेरे टलारे न थिये, तैन जो टलारे ज़ोइलो।

26 ते तैस्से ठैरी ज़ैडी परमेश्वरे ज़ोरू थियू, तुस मेरे लोक नई,

तैस्से ठैरी ज़ीतो परमेश्वर तैन ज़ोलो तुस मेरे बच्चे।”

27 ते यशायाह नबी इस्राएली लोकां केरे बारे मां ज़ोते, “चाए इस्राएलेरी कुटमेरी गिनती समुदरेरे किनारे रतरी ज़ेरि बड़ी जादे भोली फिर भी तैन मरां थोड़े बच्चेले।

28 किजोकि प्रभु जल्दी दुनियारे सेब्नी लोकां केरो सेखती सेइं इन्साफ केरेलो।”

29 ज़ेन्चरे यशायाह नेबे पेइलू भी ज़ोरू थियू, “कि सर्वशक्तिमान परमेश्वरे इश्शे लेइ इश्शू वंश न बाज़ाथो, त अस सदोम ते अमोरा नगरां केरे ज़ेरे भोने थिये, ज़ैना परमेश्वरे पूरे तरीके सेइं बरबाद कियां।”

XXXXXXXXXXXXXXXXXXXXXXXXXXXX

30 ते अस कुन ज़ोम? इन कि ज़ैना गैर कौमां केरे लोक ज़ैना धार्मिकता न थी तोपते, तैनेई धार्मिकता हासिल की, मतलब तै धार्मिकता ज़ै विश्वासे सेइं आए।

31 पन इस्राएली लोक मूसेरो कानून मेन्तां परमेश्वरेरे करां धर्मी ज़ुवानू चाते थिये, पन तैन न भोइ बटु।

32 किजो नई? एल्हेरेलेइ कि तैना विश्वासे सेइं नई, पन मूसेरो कानून मेन्तां धर्मी भोनेरी कोशिश केरते थिये, तैनेई तैस ठोकर खानेबाले घोड़े सेइं ठोकर खाइ।

33 ज़ेन्चरे पवित्रशास्त्रे मां लिखोरूए; “तका अवं सिथ्योने मां अक ठेस लानेबालो घोड़, ते ठोकर खाने वाली चट्टान रखताई; ते ज़ै तैस पुड़ विश्वासे केरेलो, तै शरमिन्दा न भोलो।”

\* 9:17 फ़िरौन: फ़िरौन मेनेरू नवं नई, मिस्ररे राज़ेरे पेदवरू नवं आए।

## 10

1 हे ढूलाव ते वेइनव मेरे मनरी इच्छा ते इस्राएली लोकां केरे लेइ परमेशेरे कां मेरी ई प्रार्थनाए, कि तैन मुक्ति मैल्ले ।

2 अवं ज्ञानताई कि तैना परमेशेरे लेइ जोशे मां रहतन, पन सच्चे ज्ञाने सेइं नई ।

3 किजोकि तैना तैस धार्मिकताई करां अनजान राए जै परमेशेरे तरफां मैलतीए, ते तैनेई अपनि धार्मिकता बनानेरी कोशिश की, एल्हेरेलेइ तैनेई अपनो आप परमेशेरेरी धार्मिकतारे अधीन न कियो ।

4 किजोकि मसीहे ते मकसद पूरो कियोरोए जेसेरे लेइ मूसेरो कानून दित्तोरो थियो, ताके जै कोई मसीह पुड़ विश्वास केरे तै परमेशेरेरी नजरी मां धर्मी भोए ।

**\*\*\*\*\***

5 किजोकि मूसे इन लिखोरूए, “जै मैन्हू तैस धार्मिकता मुताबिक चलते जै कानूनेरे जिरिये आए, ते तैसेरे जिरिये सेइं जीतो रालो ।”

6 पन जै धार्मिकता विश्वासे सेइं आए, तैसेरे बारे मां पवित्रशास्त्र इन ज़ोते, “तू अपने मने मां इन न ज़ोडयां कि स्वर्गे पुड़ कौन चढ़ेलो?” (मतलब मसीह आन्ने)

7 या इन न ज़ोडयां “पाताले मां कौन गालो?” (मतलब मसीह मुडदन मरां जीतो केरतां वा आने)

8 पन पवित्रशास्त्र इन ज़ोते “परमेशेरे वचन तेरे नेडे, ते तेरे ऐशी मां ते मने मां आए,” इन तैन वचने जैन असन परमेशेरे पुड़ विश्वास केरनेरे बारे मां ज़ोते, जेसेरो अस प्रचार केरतम ।

9 अगर तू अपने ज़बाना यीशुए, प्रभु जेनतां मन्नस ते अपने दिल सेइं विश्वास केरस, कि परमेशेरे ते मुडदन मरां जीतो कियो, त तीं परमेशर पक्की मुक्ति देलो ।

10 किजोकि इश्शे विश्वासेरे जिरिये सेइं अस परमेशेरेरी नजरी मां धर्मी भोतम, ते इश्शे इकरार केने सेइं मुक्ति मैलोरीए ।

11 किजोकि पवित्रशास्त्र इन ज़ोते, “जै कोई तैस पुड़ विश्वास केरे, तै शरमिन्दो न भोलो ।”

12 इन एल्हेरेलेइ आए कि यहूदन ते गैर कौमन मां कोई फर्क नई, किजोकि परमेशर सेब्बी केरो प्रभुए; ते जैना तैसेरू नवं घिन्तन ते तैन बरकत देते ।

13 जेन्चरे पवित्रशास्त्र ज़ोते, “जै कोई प्रभुएरू नवं घिन्नेलो, तैस मुक्ति मैलेली ।”

14 पन प्रभु पुड़ लोकेई विश्वास न कियो त तैना तैसेरू नवं किजो घिन्न? ते जेसेरे बारे मां तैनेई शुनोरू नई तैस पुड़ केन्चरां विश्वास केरेले? ते अगर तैसेरे बारे मां कोई प्रचार न केरे त तैना केन्चरां शुनी बटतन?

15 ते अगर कोई प्रचार केरनेरे भेजो न गाए त तैना केन्चरे शुनेई बटतन? जेन्चरे पवित्रशास्त्र ज़ोते, “तैन केरे पव केतरे रोडेन, जैना खुशखबरी शुनातन!”

16 पन सेब्भेई तै खुशखबरी कबूल न की । यशायाह नबी ज़ोते, “हे प्रभु कोई इश्शे सन्देशे पुड़ विश्वास न केरे ।”

17 एल्हेरेलेइ मसीहेरे बारे मां सन्देशे शुन्नेरे बगैर कोई भी तैस पुड़ विश्वास न केरि बटे ।

18 पन अवं पुछ्ततई, “कुन इस्राएली लोकेई न शुनू?” हाँ तैनेई ज़रूर शुनु, पन पवित्रशास्त्रे मां लिखोरूए “तैन केरू वचन सैरी ज़मीनी पुड़, ते तैन केरि गल्लां दुनियारे हर पासे पुजोरिन ।”

19 अवं फिरी पुछ्ततई, कुन इस्राएली लोकेई तैन वचन न समझू? पेडलो त प्रभुए मूसेरे जिरिये ई जुवाब देते, “अवं तैन केरे जिरिये जै कौम नई, इस्राएली लोकन जलन करालो, अवं बेवकूफ गैर कौमां केरे लोकां केरे जिरिये तुसन सरकालो ।”

20 फिरी यशायाह बडे दिलेरी सेइं परमेशेरे लेइ ज़ोते, “जैना मीं न थी तोपते, तैन अवं मैलो, ते जैना मीं पुछ्ते भी न थी, तैन पुड़ अवं बांदो भोव ।”

21 पन इस्राएलेरे बारे मां परमेशर इन ज़ोते, “अवं हुक्म न मन्नेबाले ते बेस केनेबाले लोकन सैरी दिहैड़ी कुजातो राव ।”

## 11

~~~~~

1 एल्हरेलेइ अवं पुछ्तई, कुन परमेशेर अपने लोक शारे? नई, कधे नई! अवं भी त इस्राएली आई, अब्राहमेरे खानदाने ते बिन्यामीनेरे गोत्रे मरां आई ।

2 परमेशेर अपने तैना लोक न शारोरे, जैना तैने पेइले चुने, कुन तुस न जानथ, कि पवित्रशास्त्र एलिय्याहेरे बारे मां कुन ज़ोते, कि एलिय्याह नेबे इस्राएली लोकां केरे खलाफ परमेशेर कां बिनती केरते?

3 तैने ज़ोवं “हे पूरभु, तैनेई तेरे नबी मारे, ते तेरी बलिदान केरनेरी ठारां बरबाद की, ते सिर्फ अवं ए ऐकेलो बच्चोरोई ज़ै तीं मन्ने बालोई, हुनी तैना मीं भी मारने चातन ।”

4 पन परमेशेर एलिय्याहे जुवाब दितो, “मीं अपने लेइ 7000 मइद रखोरेन, ज़ैनेई बाल देवतेरे मूरती कां मथ्यो नई टेकोरो ।”

5 एन्चरे इस वक्ते भी थोडे ज़ेरे लोक बज़ोरेन, ज़ैना परमेशेर अपने अनुग्रह वजाई सेइं चुनोरेन ।

6 अगर इन परमेशेरे अनुग्रहे सेइं भोरूए, ते फिरी मूसेरे कानूनेरे मुताबिक कम्मन केरने सेइं नई, नई त फिरी अनुग्रह, अनुग्रह न राव ।

7 ते फिरी नितीजो कुन भोव? कि इस्राएली ज़ेसेरी तोपी मां आन, तै तैन न मैलो; पन चुनोरेन मैलो, ते होरे बाकी लोक सखत कियोरेन ।

8 ज़ेन्चरे पवित्रशास्त्रे मां लिखोरूए, “परमेशेर अज़ेरे दिहाडी तगर तैन केरो मन ते दिल सुस्त कियो, ते एरी एछ्छे दिती कि ताके तैना लेई न बटन, ते एरे कन ताके तैना शुनी न बटन ।”

9 ते राज़ो दाऊद ज़ोते,

“अवं परमेशेर कां प्रार्थना केरताई कि तै तैन केरे तिहारन मां टलेइ बटे ते फसाए, ते परमेशर तैन झुकाए ते तैन सज़ा देइ बटे ।

10 ते तैन केरि एछ्छन पुइ आंधरू भोए, ताके तैना लेई न बटन, ते परमेशर तैन, तैन केरि परेशेनी केरे वजाई सेइं दुखी केरि बटे ।”

11 त अवं पुछ्तई, कुन यहूदी लोक टोकर लगनेरे वजाई सेइं हमेशेरे लेइ विछ्छे? नई, कधे नई! पन तैन केरे विश्वास न केरनेरे वजाई सेइं गैर कौमन मुक्ति मैल्ली ताके तैन जलन भोए ।

12 ते अगर तैन केरे विश्वास न केरनेरे वजाई सेइं गैर कौमरे लोकां केरू भलू भोवं, हकीकत मां गैर कौमां केरे लेइ बडू रोडू भोल् ज़ेइस यहूदी लोक परमेशेर कां वापस एज्जले ।

~~~~~

13 अवं तुसन गैर कौमरे लोकन सेइं एन ज़ोताई । कि अवं गैर कौमरे लोकां केरो प्रेरित आई, ते अपने सेवारे बारे मां घमण्ड केरि ।

14 ताके अवं कोन्वी तरीके सेइं अपने लोकन जलन करेइतां तैन मरां किछन मुक्ति दूवेई ।

15 किजोकि इस्राएली लोकां केरू शारू गानू दुनियारे लोकां केरे लेइ मेल मिलापेरी वजा बनी, ते तैन केरू यीशु कबूल केरनू कि तै मसीह आए, एन एरू भोल् ज़ेन्चरे मुइदेरू जीतू भोन्!

16 ते किजोकि पूर्वज अब्राहम ते दादे पड़दादे पवित्र थिये ते तैन केरि खानदानी भी पवित्र भोली, ज़ैखन चड़तलोरे पेइलो पेइडो परमेशेरे लेइ च़ाढ़नेरे वजाई सेइं पवित्र भोरोए, त पूरू सन्नोरू अट्टू भी पवित्र भोरूए, ते ज़ैखन ज़ील पवित्र भोवं, त डाल भी पवित्ररन ।

17 इस्राएली लोक ज़ैतूनेरे बुटेरे डैलडी केरे ज़ेरे आन ते इश्शे दादे पड़दादे अब्राहम, इसहाक ते याकूब एस बुटेरे ज़ीलां केरे ज़ेरे आन, ते अगर किछ डैलडी टलोडी ज़ेई, त तुस गैर कौमरे लोक जंगली ज़ैतूनेरे ज़ेरे आथ, ते तुस तैस असली ज़ैतूने मां कलम कियोरेथ ते ज़ीलां केरे खुराकारे हकदार भोरेथ ।

18 त तीं तैन डैलडन पुइ ज़ैना टलोडी ज़ेई ते शैरी ज़ेई तैन पुइ घमण्ड न लोडे कियोेरू, ते अगर तू घमण्ड केरस त याद रख कि तू ज़ीलन नई, पन ज़ील तीं सुमभालते ।

19 फिरी तू ज़ोलो, “डैलडी एल्हेरेलेइ टलोडी, कि अवं कलम भोई।”

20 इन सच्चे, तैना त विश्वास न केरनेरे वजाई सेइं टलोडी जेई, पन तू विश्वासे सेइं बनोरो रातस, एल्हेरेलेइ घमण्ड न केर, पन डर केर।

21 किजोकि परमेशरे असली डैलडन पुड़ दया न की, त तुसन पुड़ भी दया न केरेलो ज़ैना कलम कियोरेथ।

22 एल्हेरेलेइ परमेशेरी दया ते सखती हेर! ज़ैना पाप केरनेरे वजाई सेइं झडे तैन पुड़ सखती, पन तेरे लेइ दया, ते तू अपने आपे पुड़ तैसेरी दया बनोरी राने दे, नई त तू भी कटो गालो।

23 ते अगर यहूदी लोक फिरी विश्वास केरन, त कलम केरे गानेन किजोकि परमेशर एन केरनेरे लेइ शेक्ति बालो आए।

24 किजोकि अगर तू तैस ज़ैतून, ज़ै सुभावे सेइं जंगलीए कटो जेव, ते ज़ै असलीए तैसेरे खलाफ रोडे ज़ैतूने मां लव जेव, ते इना असली डैलडी आन अपने ज़ैतून मां किजो न लेई गैली।

~~~~~

25 हे दूलाव ते बेइनव, अवं न चैई कि तुस गैर कौमरे लोक अपने बारे मां घमण्ड केरेथ। इस्राएली लोकन सेइं कुन भोव, अवं एस भेदेरे बारे मां तुसन सेइं ज़ोताई, कि ज़ांतगर गैर कौमां केरे बड़े लोक मसीह कां न एजन, तांतगर किछ इस्राएली लोकां केरो दिल सखत रालो।

26 ते एन्चरे सैरी इस्राएली लोकन मुक्ति मैल्लनीए; ज़ेन्चरे पवित्रशास्त्रे मां लिखोरूए, “छुटानेबालो सिव्योनेरां (यरूशलेम) एज्जेलो, ते अभक्ति इस्राएली लोकन करां दूर केरेलो।

27 ते तैन सेइं मेरो ई करार भोलो, कि अवं तैन केरे पाप माफ़ केरेलो।”

28 खुशखेबारे वजाई त तैना तुशशे लेइ परमेशेरे बैरिन, पन परमेशेरे चुनेरे वजाई सेइं ते तैन केरे बुजुर्गन दिचोरे वचनेरे वजाई सेइं परमेशर तैन सेइं हेजू भी प्यार केरते।

29 किजोकि परमेशरे अपने वरदान्न करां ते अपने कुजाने करां कधे अपनी मन न बदले।

30 किजोकि ज़ेन्चरे पेइले तुसेईं परमेशेरो हुक्म न थियो मनोरो, पन हुना इस्राएली लोकां केरे हुक्मन मन्ने सेइं तुसन पुड़ दया भोइ।

31 तैना हेजू भी हुक्म न मन्नेबालेन कि ज़ै दया तुसन पुड़ भोरीए तैन पुड़ भोली।

32 किजोकि सेब्भी लोकेई हुक्म नई मन्नोरो एल्हेरेलेइ तैना कैदी केरे ज़ेरे बनोरेन। पन परमेशेरे एन एल्हेरेलेइ कियूं ताके तैन सेब्भन पुड़ दया केरि बटे।

~~~~~

33 वाह! परमेशर सेब्भी केरे लेइ भलो आए ते ज्ञानी ते अक्लमन्दे, कोई भी तैसेरे खियालन वियांन न केरि बटे ते कोई तैसेरी बत्तां न सेमझी बटे।

34 ज़ेन्चरे पवित्रशास्त्रे मां लिखोरूए “कोई न ज़ाने प्रभुएरे मने मां कुने या तैस सलाह देनेबालो कौने?

35 या केने पेइले तैस किछ दिचू ज़ेसेरो बदलो तैस दिचो गाए?”

36 किजोकि सब किछ परमेशेरी तरफां आए। तैन्नी सब किछ बनाव, ते तैसेरे ज़िरिये, ते तैसेरेलेइ सब किछे। तैसेरी आदर सदा भोती राए। आमीन।

## 12

~~~~~

1 एल्हेरेलेइ हे दूलाव ते बेइनव, अवं तुसन कां परमेशेरी दया याद केरताई विनती केरतां ज़ोताई, कि अपनि ज़िन्दगी पवित्र, ते ज़ेरू परमेशेरे पसंद एइते, बलिदान केरतां चाढ़ा; ईए परमेशेरी आराधना केरनेरो सही तरीको आए।

2 ते इस दुनियारे तरीके पुड़ न चला, पन परमेशर तुशशी सोच बदलेरे ज़िरिये सेइं तुशशो चालचलन भी बदलोए, ताके तुस ज्ञानथ कि परमेशर तुसन करां कुन चाते, या ज़ै रोड़ी ते ज़ैन तैस पसंद एडते, ते सिद्ध आए ।

3 किजोकि अवं तैस परमेशरेरे अनुग्रहेरे वजाई सेइं ज़ै मीं मैलो, तुसन मरां हर एक्की सेइं ज़ोताई, कि ज़ेन्चरे समझोरू लोडे, तैस करां कोई भी अपनो आप जादे न समझे, यानी कि ज़ेतरो विश्वास परमेशरे तुसन दित्तोरौए तैसेरे मुताबिक अपने आपे समझा ।

4 किजोकि ज़ेन्चरे इशशे एक्की जिसमे मां बड़े अंगन, ते सेभी अंगां केरू अक्कां ज़ेरू कम नई ।

5 तेन्चरे अस ज़ैना मसीह पुड़ विश्वास केरतम, अस भी तैसेरे जिसमेरे ज़ेरे बने, ते अस तैसेरे अंग आम ते अस एक्की होरि सेइं ज़ुडोरैम ।

6 ते ज़ैखन कि तैस अनुग्रहेरे मुताबिक ज़ै परमेशरे असन दित्तोरौए, असन अलग-अलग वरदाना मैलोरन । ते ज़ैस भविष्यवैनरू वरदान मैलोरूए, तै विश्वासेरे मुताबिक भविष्यवाणी केरे ।

7 अगर सेवा करनेरू वरदान मैलेरूए, त होरि केरि सेवाईं मां लगगोरौ राए, अगर कोई शिखालने बालो भोए, त शिखालने मां लगगोरौ राए ।

8 अगर तुशशू वरदान हिम्मत देने बालू भोए त तुसेईं हिम्मत देती लोडे रावरी, अगर कोन्ची दान देनेरू वरदान मैलोरू भोए तैने खुल्ले दिले सेइं लोडे दितोरू, अगर केन्ची अगवाईं करनेबालोए, तै जोशे सेइं अगवाईं केरे, ते ज़ै दया केरे तै खुशी सेइं दया केरे ।

9 तुशशो प्यार सच्चो भोए; बुरैईं सेइं नफरत केरा; भलाईं केरने मां लगगोरौ राथ ।

10 भाईचारेरे प्यारे सेइं एक्की होरि सेइं प्यार केरा; आदरी सेइं होरन एप्पू करां रोड़ी समझा ।

11 मेहनत केरने मां आलस न केरा; आत्मिक जोशे सेइं भेरोरे राथ; पूरे दिले सेइं प्रभुएरी सेवा केरते राथ ।

12 ज़ै उमीद तुसन आए तैस मां मघन राथ; मुसीबती मां मजबूत राथ; प्रार्थना केरने मां लगातार लगगोरौ राथ ।

13 परमेशरेरे लोकन ज़ैन किछ ज़रूरी भोए, तैस मां तैन केरि मद्दत केरा; मेहमानां केरि आदर केरते राथ ।

14 अपने सताने बालन बरकत देथ; बरकत देथ फिटकार न देथ ।

15 आनन्द केरनेबालन सेइं साथी आनन्द केरा, ते लेरां देने बालन सेइं साथी लेरां देथ ।

16 एप्पू मामेईं मेल मलाप रखा; घमण्ड न केरा; गरीब लोकन सेइं साथी साथ रखा; इन न समझा कि तुस बड़े अक्लमन्द आथ ।

17 बुरैइयरे बदले केन्ची सेइं बुराईं न केरा; ध्यान देथ ते तैन्ने केरा ज़ैन गल्लां सेभी केरि नज़री मां रोड़िन ।

18 ज़ेतूरू भोइ सकते, सेभी मैनन् सेइं साथी मेल मलाप रखा ।

19 हे दलारव अपनो बदलो न नेथ; पन परमेशरे तुशशे लेइ बदलो नेने देथ, किजोकि पवित्रशास्त्रे मां प्रभु ज़ोते, “बदलो नेनो मेरू कम्मे, ते अर्वे बदलो देइलो ।”

20 पन पवित्रशास्त्र ज़ोते


“अगर तेरो दुश्मन दलुखोरौ त तैस रोट्टी खूवा;

अगर दलिशोरौ भोए, त तैस पानी पीया;

किजोकि एरू केरने सेइं तू तैस शरमिन्दो केरतस ।”

21 बुरैईं करां न हारा पन बुराईं भलाईं सेइं ज़ीतां ।

13



1 हर कोई मेन्हु प्रधान अधिकारी केरे अधीन राए; किजोकि कोई अधिकार एरो नई, ज़ै परमेशरेरे तरफां न भोए; ते ज़ैना अधिकारी आन, तैना परमेशरे ठहरावरेन ।

6 जै कोन्वी दिहाड़े मन्ते, तै प्रभुए इज्जत देनेरे लेइ मन्ते। जै सब किछ् खाते, तै भी प्रभुए इज्जत देनेरे लेइ खाते, किजोकि तै परमेशेरू शुक्र करते, ते जै सब किछ् न खाए, प्रभुएरे लेइ न खाए ते परमेशेरू शुक्र करते।

7 किजोकि असन मरां कोई न अपने लेइ ज़ीते, ते न कोई अपने लेइ मरते।

8 किजोकि अगर अस ज़ीतेम त, प्रभुएरे लेइ ज़ीतेम; ते अगर अस ज़ीम या मरम, अस प्रभुएरेम।

9 किजोकि मसीह एल्हेरेलेइ मरो ते ज़ीतो भी भोव, ताके मरारे ते ज़ीतां दुइयां केरो प्रभु भोए।

10 तू अपने विश्वासी द्वाए पुइ किजो दोष लातस? या तू फिरी किजो अपने विश्वासी द्वाए घटिया समझतस? अस सब परमेशेरे आदालतरे तखतरे सामने खड़े भोनेम।

11 जेन्चरे पवित्रशास्तरे मां लिखोरूए,

कि प्रभु ज़ोते, “अवं एप्सू तुसन सेइं वादो केरताई,

हर कोई मीं कां जैधू टिकेलो,

ते हर अक जिभ परमेशेरी इकारा केरेली।”

12 ते असन मरां हर केन्वी अपने-अपने कम्मां केरो लेखो परमेशेरे देलो पेनोए।

~~~~~

13 एल्हेरेलेइ अग्रोवं जो अस एक्की होरि पुइ दोष न लाम, पन तुस एने थापा, कि कोई भी तुशेरे वजाई सेइं तुशेरो विश्वासी द्वा या बेइन पाप न केरे।

14 अवं ज्ञानताई, ते प्रभु यीशुएरे तरफां मीं पक्कू याकीन भोवं, कि कोई खानेरी चीज अपने आपे सेइं अशुद्ध नई, पन जै तैस अशुद्ध समझते, तैसेरेलेइ अशुद्ध आए।

15 अगर तेरो विश्वासी द्वाए या बेइन तेरे खाने सेइं दुःख पुजे ते तै अग्रोवं जो परमेशेरे पुइ विश्वास केरनो शारे, त फिरी तू प्यारेरे रीति पुइ न ज़लस, एरी चीजां न खा। जेसेरे लेइ मसीह मरो ते तू अपने खाने सेइं तैस नाश न केर।

16 एल्हेरेलेइ जैन कम तुशेरे लेइ रोडू आए ते जेइजे, तैसेरे बारे मां होरन तुहीन केरनेरो मौको न दे।

17 किजोकि परमेशेरे राज्जे मां खानू पीनू माईने न रख्खे; माईने रखते धार्मिकतारी जिन्दगी ज़ीनी ते मेल मलाप, ते आनन्द तै आए जै पवित्र आत्मा देते।

18 जै कोई इस रीति सेइं मसीहरी सेवा करते, तैस सेइं परमेशेरे खुश भोते, ते मैन्हु भी तैसेरे बारे मां रोडू ज़ोतन।

19 एल्हेरेलेइ असेईं तैना कम्मां कियोरां लोइन जैन सेइं लोक मेल मिलापे सेइं रेइ बटन, ते एक्की होरि विश्वासे मां मज़बूत केरम।

20 तुस ज़ेरू खानू चातथ तैसेरे वजाई सेइं परमेशेरू कम न बगाड़ा। सब किछ् शुद्ध त आए, पन तुशेरे खाने सेइं अगर होरो कोई मैन्हु परमेशेरे पुइ विश्वास केरनो शारे त तैसेरेलेइ बुरू आए।

21 रोडू त इन्ने, कि तू न मास खास, ते न शराब पीस, जेसेरे वजाई सेइं तेरे द्वा या बेइन पाप केरे।

22 तेरो इन चीजां केरे बारे मां जै विश्वासे, तै तेरे ते परमेशेरे दरमियाने मां आए, धने तैए, जै तैस गल्ली मां, जै तै ठीक समझे, अपने आपे दोषी न ठहराए।

23 पन जै शक केरतां खाते, ते सज़ारे काबल भोइ जेव, किजोकि तै विश्वासे सेइं न खाए, ते जैन किछ् केरस ते विश्वास केरस कि एन ठीक नई त तू पाप केरतस।

15

~~~~~

1 एन्चरे अस जैना विश्वास मां मज़बूत आम, असेईं एन कियोरू लोडे कि जैना विश्वासे मां कमज़ोर आन तेन केरि महत्त केरम; न कि अपनो आप खुश केरम।

2 असन मरां हर कोई अपने विश्वासी ढलान ते बेइन्न खुश केरनेरे लेइ मद्दत केरे जैस सेइं तैन केरो विश्वास मजबूत भोए ।

3 किजोकि मसीहे भी अपनो आप खुश न कियो, पन जेन्चरे पवित्रशास्त्रे मां लिखोरूए, “तेरे तुहीन केरनेबालोई मेरी भी तुहीन की ।”

4 जेत्ती गल्लां पेइली पवित्रशास्त्रे मां लिखोरिन, तैना इश्शे शिक्षारे लेइ लिखोरिन, कि अस सबरी ते पवित्रशास्त्रे करां हिम्मत हासिल केरम ताके असन उमीद भोए (परमेशर तैन्ने केरेलो जेसेरे बारे मां तैनी वादो कियोरोए) ।

5 अवं प्रार्थना केरताई कि परमेशर तुसन सबर ते हिम्मत दे, ताके तुस यीशु मसीह पत्ती चलते-चलते अक भोइतां जीथ ।

6 ते तुस सारे अकोट्टे भोइतां अक भोइतां एक्की आवाजी मां परमेशर, इश्शे प्रभु यीशु मसीहेरे वाजेरी बड़याई केरा ।

~~~~~

7 एल्हेरेलेइ, एक्की होरि कबूल केरा, जेन्चरे मसीहे तुस कबूल कियोरेथ; एल्हेरेलेइ एन केरा ताके लोक परमेशेरी बड़याई केरन ।

8 अवं ज़ोताई, कि ज़ैना वादे दादन पड़दादन दित्तोरे थिये, तैना वादे पूरे केरनेरे लेइ ते इन बांदू केरनेरे लेइ कि परमेशर सच्चो, मसीह खतनो कियोरे लोकां केरो (यानी यहूदी केरो) सेवक बनो ।

9 ते गैर कौमां भी परमेशेरे दयारे वजाई सेइं परमेशेरी बड़याई केरन, जेन्चरे पवित्रशास्त्रे मां लिखोरूए,

“गैर कौमन मां अवं तेरू शुकर केरेलो,

ते तेरे नव्वेरू भजन केरेलो ।”

10 फिरी होरि ठेरी लिखोरूए,

“हे गैर कौमां केरे लोकव, परमेशेरे लोकन सेइं साथी आनन्द केरा ।”

11 ते फिरी पवित्रशास्त्रे ज़ोते,

“हे गैर कौमां केरे लोकव, प्रभुएरी बड़याई केरा;

ते हे मुलखां-मुलखां केरे सब लोकव; तैसेरी बड़याई केरा ।”

12 ते फिरी यशायाह नबी पवित्रशास्त्रे मां लिखोरूए;

“यिश्शेरू अक वंश निसेलू,

ते तै गैर कौमन पुड़ ह्कामत केरेलो ।

तैस पुड़ गैर कौमां उमीद रेखेली ।”

13 अवं प्रार्थना केरताई परमेशर जै उमीदरो देनेबालोए तुसन तैस पुड़ विश्वास केरनेरे वजाई सेइं सब किसमेरे आनन्द ते शैनति सेइं भरे, कि पवित्र आत्माारी शक्ति सेइं तुश्शी उमीद बद्धती गाए ।

~~~~~

14 हे मेरे ढलाव ते बेइनव, अवं एप्पू भी तुश्शे बारे मां जानताई, कि तुस भी भलैई सेइं भेरतथ, ते तुसेईं कुन कियेरू लोडे तुस रोडे ज़ारे जानतथ ते एक्की होरि शिखैली बटतथ ।

15 फिरी भी मीं ज़ैसन कैसन याद करानेरे लेइ तुसन बड़े दिलेरी सेइं लिखू, इन तैस अनुग्रहेरे वजाई सेइं भोवं, जै परमेशेरे मीं दित्तोरोए ।

16 कि अवं गैर कौमां केरे लेइ यीशु मसीहेरो सेवक भोइतां परमेशेरे खुशखेबरायी सेवा याजकेरी ज़ेरि केरि; ज़ैस सेइं गैर कौमां केरे लोक परमेशेरे दानेरे रूपे मां दित्ते गाले, ज़ैस सेइं तै खुश भोलो, ज़ैना पवित्र आत्मा पवित्र बनोरेन ।

17 अवं यीशु मसीहेरे वजाई सेइं परमेशेरी सेवाई पुड़ घमण्ड केरि बटताई ।

18 किजोकि तैन गल्लां केरे अलावा मीं होरि कोन्वी गल्लां केरे बारे मां ज़ोनेरी दिलेरी नई, ज़ैना मसीहे गैर कौमन केरे लेइ वचन, ते कर्म,

19 ते निशान ते बड़े-बड़े कम्मां केरे शक्ति सेइं, ते पवित्र आत्मारे शेक्तेरे जिरिये कियां, इडी तगर कि मीं यरूशलेम नगरे मरां देइतां च़ेवरे पासन इल्लुरिकुम इलाके तगर मसीहेरो खुशखेबरांरो पूरो-पूरो प्रचार कियो।

20 पन मेरे मनेरी उमंगे, कि ज़ैडी-ज़ैडी यीशु मसीहेरी खुशखबरी प्रचार नई भोरो, तैडी खुशखबरी शुनेई; एरू न भोए होरेरे मुनीयादी पुड़ घर बनेइं।

21 पन ज़ेन्च़ेरे पवित्रशास्त्रे मां लिखोरूए, तेन्च़ेरे भोए,
“ज़ैन तैसेरे बारे मां कधी नई ज़ोरू, तैना लालहे,
ते ज़ैनेई तैसेरे बारे मां नई शुनोरू तैना समझेले।”

~~~~~

22 एल्हेरेलेइ अवं तुसन कां एजनेरे लेइ बार-बार रुकोरो राव।

23 पन हुनी मीं इन इलाकन मां तैन लोकन खुशखबरी शुनेइतां अपनु कम पूरू कियूं, ज़ैनेई मसीहेरे बारे मां न थियूं शुनोरू, ते मीं बड़े सालां केरि तुसन कां एजनेरी इच्छाए।

24 एल्हेरेलेइ ज़ैखन अवं इसपानिया मुलखे मां गेइ त तुसन मेइं एइते गेइलो, किजोकि मीं उमीदे, कि तैस सफ़रे मां तुसन सेइं मिली, ते ज़ैखन तुसन सेइं मिली त अवं खुश भोई, ते अवं चाताई तुस मेरे इसपानिया गानेरे सफ़रेरे लेइ मेरी मद्दत केरा।

25 पन हुनी त परमेशेरे लोकां केरि सेवा केरनेरे लेइ यरूशलेम नगरे गाताई।

26 किजोकि मकिदुनिया ते अखाया इलाकेरे केरे विश्वासी लोकन इन रोड़ू लग्गू, कि यरूशलेम नगरेरे परमेशेरे लोकां केरे लेइ ज़ैना गरीब आन, किछ् चन्दो केरन।

27 तैनेई एन खुशी सेइं कियूं, तैना यरूशलेम नगरेरे लोकां केरे कर्जदारन, यहूदी लोकेई गैर कौमरे लोकन परमेशेरे तरफां रोड़ी चीज़ां दिती, ते इन रोड़ी कि गैर कौमां केरे लोक इस दुनियारी रोड़ी चीज़ां यहूदन देन।

28 अवं पेइलो यरूशलेम नगरे जो च़लरोई ताके ज़ै चन्दो अकोटो कियोरोए तैन देई, तैट्ठां पत्ती अवं तुसन कां रोम नगरे मां एइतां इसपानिया मुलखे जो गेइलो।

29 ते अवं ज़ानताई, कि ज़ैखन तुसन कां एज्जेलो, त मेरे एजनेरे वजाई सेइं मसीह तुसन पूरे तरीके सेइं बरकत देलो।

30 ते हे दूलाव ते बेइनव, परभु यीशु मसीह पुड़ इश्ये विश्वासेरे वजाई सेइं ते पवित्र आत्मारे दित्तारे प्यारेरे वजाई सेइं अवं तुसन कां बिनती केरताई, कि मीं सेइं साथी मेरे लेइ परमेशेरे कां लगातार प्रार्थना केरा।

31 कि अवं यहूदिया इलाकेरे गैर विश्वासी लोकन करां बच़ोरो रेई, परमेशेरे तैना लोक ज़ैना यरूशलेम नगरे मां आन खुशी सेइं तै मद्दत कबूल केरन ज़ै अवं तैन कां नेइलो।

32 ते अवं परमेशेरी मेर्जी सेइं आनन्दे कां एज्जी ते मीं तुसन साथी आराम मैल्ले।

33 अवं प्रार्थना केरताई, कि शान्ति देनेवालो परमेशर तुसन सेबन सेइं साथी भोए। आमीन।

## 16

~~~~~

1 अवं तुसन सेइं फीबेरे बारे मां, ज़ै इश्यी विश्वासी बेइने ते किख़रया नगरेरे कलीसियारी सेवकाए, अवं चाताई तुस तैसेरी इज्जत केरा।


2 कि तुस ज़ेन्च़ेरे पवित्र लोकन सेइं कियेरू लोडे, तैस परभु मां कबूल केरा; ते ज़ैस गल्ली मां तैस तुसन करां केन्चेरी मद्दतरी ज़रूरत भोए, तैसेरी मद्दत केरा; किजोकि तै भी बड़ां केरि मद्दत केरनेवाली बल्के मेरी भी मद्दत केरनेवाली भोरीए।

3 प्रिस्किल्ला ते अक्विला ज़ैना परभु यीशु मसीह मां मेरे मद्दगारन, नमस्कार।

- 4 तैनेई मेरे जान बचानेरे लेइ अपनि जान खतरे मां रखोरि थी। सिर्फ अवं ए नई, बल्के गैर कौमां केरि सैरी कलीसियां भी तैन केरू शुक्र करतिन।
- 5 ते तैस कलीसिया भी नमस्कार जैना तैन केरे घरे मां अकोट्टी भोतीए। मेरे टलारे इपैनि तुसे भी जै आसिया इलाकेरो मसीह पुइ विश्वास केरनेबालो पेइलो विश्वासी ए, नमस्कार।
- 6 मरियम जैसां तुश्शे लेइ बड़ी मेहनत केरि, नमस्कार।
- 7 अन्दरूनीकुस ते यूनियासे जै मेरो कुटमेरोए, ते मीं सेइं साथी कैद भोरो थियो, ते प्रेरितन मां मुशूर, ते मीं करां पेइले मसीह मां थी, नमस्कार।
- 8 अम्पलियातुसे, जै प्रभु मां मेरो टलारोए, नमस्कार।
- 9 उरवानुसे, जै मसीह मां इश्शो महतगार, ते मेरे टलारो इस्तखुसे नमस्कार।
- 10 अपिल्लेसे जै मसीह मां ईमानदार निस्सो, नमस्कार। अरिस्तुबुलुस ते तैसेरे टब्बरे जो नमस्कार।
- 11 मेरे कुटमेरे हेरोदियोने नमस्कार। नरकिस्सुसेरे टब्बरे जैना लोक प्रभु मां आन, तैन नमस्कार।
- 12 तूरूफैना ते तूरूफोसा जैन कुआन्शेई प्रभु मां बड़ी मेहनत की, नमस्कार। टलारी मसीही बेइन पिरसिस जैसां प्रभु मां बड़ी मेहनत की नमस्कार।
- 13 रूफुसे जै प्रभु मां चुनोरोए, ते तैसेरी अम्मा जै मेरी अम्मारी जेरि ए, दुइयन नमस्कार।
- 14 असुकिरतुस ते फिलगोन ते हिर्मास ते पत्रुबास ते हर्मास ते तैन केरे सैथी विश्वासी लोकन नमस्कार।
- 15 फिलतुगुस ते यूलिया ते नेर्युस ते तैसेरी बेइन, ते उलुम्पास ते तैन केरे साथी सब परमेशेरे लोकन नमस्कार।
- 16 मसीहरे प्यारे सेइं एक्की होरि जो नमस्कार केरा। तुसन भी मसीहरे सैरी कलीसियारे तरफां नमस्कार।



- 17 हुनी हे ढूलाव ते बेइनव, अवं तुसन कां बिनती केरताई, कि जैना लोक तैस शिक्षारे खलाफ जै तुसन मांए, खलबली बनातन, ते ठोकर खानेरी वजा भोतन, तैन करां खबरदार राथ; ते तैन करां दूर राथ।
- 18 किजोकि एरे लोक इश्शे प्रभु यीशु मसीहरी नई, पन अपने फैइदरे लेइ सेवा केरतन; ते तैना रोड़ी-रोड़ी गल्लां केरतन ते चापलूसी सेइं सिधे सादे लोकन धोखो देतन।
- 19 तुश्शे हुक्म मन्नेरे बारे मां सेभी लोकन पतो ज़लोरुए; एल्हेरेलेइ अवं तुश्शे बारे मां आनन्द केरताई; पन अवं इन चाताई, कि तुस भलाई केरनेरे लेइ अक्लमन्द बना, पन बुराई केरनेरे लेइ सादे बना।
- 20 शान्ति देनेबालो परमेशर शैताने जल्दी तुश्शे पवन सेइं इलेन्चालो। इश्शे प्रभु यीशु मसीहरो अनुग्रह तुसन पुइ भोतो राए।
- 21 तीमुथियुस जै मीं सेइं साथी कम केरते, ते लूकियुस ते यासोन ते सोसिपत्रुस मेरे कुटुमबी केरे तरफां तुसन नमस्कार।
- 22 मेरे चिट्टी लिखने बाले तिरतियुसेरू प्रभु मां तुसन नमस्कार।
- 23 गयुस भी तुसन नमस्कार ज़ोते ज़ेसेरे घरे मां अवं राताई, तैड़ी कलीसियारे लोक अकोट्टे भोतन। इरास्तुस जै नगरेरो भण्डारीए, ते ढूला क्वारतुसेरू तुसन नमस्कार।
- 24 अवं प्रार्थना केरताई, इश्शे प्रभु यीशु मसीहरो अनुग्रह तुसन पुइ भोतो राए। आमीन।



- 25 हुनी तुसन जे खुशखबरी मीं प्रचार की, मतलब यीशु मसीहरे प्रचारेरे मुताबिक विश्वासे मां मजबूत केरि बटते, तैस भेदरे प्रकाशेरे मुताबिक जै बड़े पेइलो देंतो छप्पोरो राव।
- 26 पन हुनी बांदो भोइतां सनातन परमेशेरे हुक्मे सेइं नेवी केरे कितावां केरे ज़िरिये सेभी कौमन ज़ोवरोए, कि तैना विश्वासेरे ज़िरिये सेइं हुक्म मन्नेबाले भोइ गान।
- 27 तेस्से एक्की बड़े अक्लमन्द परमेशेरी यीशु मसीहरे ज़िरिये सदा महिमा भोती राए। आमीन।

1 कुरिन्थियों

??????

1 अवं पौलुस ई चिट्ठी लिखने लोरोई । अवं, यीशु मसीहेरो प्रेरित भोनेरे लेइ परमेशेरे मेर्जी सेइ कुजावरोई । मेरो विश्वासी साथी सोस्थिनेस भी मीं सेइ साथी आए (जै मेरी मद्दत केरने लोरोए) ।

2 तुस जैना कुरिन्थुस नगरेरे कलीसियारे विश्वासी आथ, परमेशेरे तुस यीशु मसीह मां अपने लोकां केरे रूपे मां अलग कियोरथ, ते कने पवित्र भोनेरे लेइ कुजोरथ । तैन सेब्भी केरां नव्वे जैना हर टैरी इश्शे त कने अपने प्रभु यीशुएरे नव्वे सेइ प्रार्थना केरतन ।

3 इश्शे बाजी परमेशर, ते प्रभु यीशु मसीहेरे तरफां तुसन अनुग्रह ते शान्ति मैलती राए ।

???? ???? ?

4 अवं तुश्शे बारे मां अपने परमेशेरू हर वक्त शुक्र केरताई, एल्हेरेलेइ कि परमेशेरो ई अनुग्रह तुसन पुइ यीशु मसीह मां भोव ।

5 किजोकि तुसेई हर लिहाजे सेइं बेडि बरकतां हासिल कियोरिन, किजोकि तुस मसीह सेइं साथी अक आथ । एल्हेरेलेइ तैने तुसन अपनू वचन ज़ोनेरी ते समझनेरी खास काबलीत दित्तोरिए ।

6 एन्चरे परमेशेरे तुश्शे लेइ पक्कू कियू, कि मसीहेरे बारे मां सन्देश सच्चे ।

7 हुनी तुसन कां सारां आत्मिक वरदानां आन, किजोकि तुस इश्शो प्रभु यीशु मसीह बांदो भोनेरे बडे इंतज़ारे मां आथ ।

8 परमेशर तुसन आखरी तगर विश्वासे मां मजबूत भी केरेलो, कि तुस इश्शे प्रभु यीशु मसीहेरे वापस एजनेरे दिहाडे बेइलज़ाम भोथ ।

9 परमेशर एन्चरे केरेलो, किजोकि ज़ैन किच्छ तै ज़ोते, तैस केरनेरे मां तै वफादारे । ते तैन्ने तुस अपने मट्टे इश्शे प्रभु यीशु मसीहेरे संगती मां कुजावरेथ ।

?????? ???? ?

10 हे दलाव ते बेइनव, अवं इश्शो प्रभु यीशु मसीहेरे अधिकारे सेइं इन केरनेरी बिनती केरताई, कि सब एक्की होरि सेइं राज़ामंद भोथ; ते तुसन मां फिरके न भोन, पन अक मन भोथ, ते अक्के खियाल रख्वा ।

11 किजोकि हे मेरे दलाव ते बेइनव, खलोएरे टब्बेरे लोकेई मीं तुश्शे बारे मां ज़ोवरूए, कि तुसन मां लड़ाई लोरिन भोने ।

12 मेरू ज़ोनेरो मतलब ई आए, कि तुसन मरां कोई त अपनो आप, “पौलुसेरे ज़ोते,” कोई “अपुल्लोसेरो,” कोई “कैफारो,” कोई “मसीहेरो ज़ोते ।”

13 ज़ैन तुस केरतथ तैन ठीक नई, कुन मसीह बेनटोव? कुन पौलुस क़रूसे पुइ ज़ादो जेव? या तुसन पौलुसेरे नव्वे पुइ बपतिस्मो मैलो?

14 अवं परमेशेरू शुक्र केरताई, कि किरस्पुस ते गयुसेरू अलावा, मीं तुसन मरां केन्ची बपतिस्मो नई दित्तोरो ।

15 कि एरू न भोए, कोई ज़ोए, कि तुसन मेरे चेले बन्नेरे लेइ बपतिस्मो मैलो ।

16 हाँ मीं याद आऊं, मीं स्तिफानासेरे टब्बेरे भी बपतिस्मो दित्तो; एन केरे अलावा, अवं न ज़ैनी कि मीं होरि केन्ची बपतिस्मो दित्तो ।

17 किजोकि मसीहे अवं बपतिस्मो देनेरे लेइ नई, बल्के खुशखबरी शुनानेरे लेइ भेजोरोई, ज़ैखन अवं लोकन परमेशेरो सन्देश शुनाताई त अवं मैन्हु केरे ज़लाक खियालां केरो इस्तेमाल न केरि, एरू न भोए कि मसीहेरू क़रूसे बेफैइदू भोए ।

???? ?

18 किजोकि करूसेरी कथा नाश भोने भालां केरे लेइ बेवकूफीए, पन असन मुक्ति मैलने बालां केरे लेइ परमेशेरी शक्ति आए ।

19 किजोकि पवित्रशास्त्रे मां परमेशर ज़ोते, “अवं इन हिरेइलो दुनियारे लोकां केरे खियालन कि तैना सोचतन कि तैना ज्ञानी आन, हकीकति मां तैना बेकार खियाल आन ।

अवं साबत केरेलो कि तैना अक्लमन्द नई ।”

20 त फिरी, अक्लमन्द मैन्हु केरे बारे मां अस कुन ज़ोम? यहूदी केरे कानूनेरे महिर मैन्हु केरे बारे मां अस कुन ज़ोम? इस दुनियारे लोकां केरे बारे मां कुन ज़ोम ज़ैना ज़ोने मां ज़लाकन? परमेशेरे तैना सारे बेवकूफ बनाए ते तैन केरि अक्ल बेफैइदी बकवास साबत की

21 किजोकि ज़ैखन परमेशेरे ज्ञानेरे मुताबिक दुनियां ज्ञान सेइं परमेशर न ज़ानो, त परमेशेरे इन रोडू लग्गू, इस प्रचारेरे बेवकूफेरे मुताबिक विश्वास केरनेबालन मुक्ति दे ।

22 यहूदी त निशान चातन, ते गैर कौमां ज्ञानेरे तोपी मां आन ।

23 पन अस त तैस करूसे पुड़ च़ाढ़ेरे मसीहेरो प्रचार केरतम ज़ै यहूदी केरे लेइ टोकरारी वजाए, ते गैर कौमां केरे लेइ बेवकूफीए ।

24 पन ज़ैना परमेशेरे (अपने लोक भोनेरे लेइ) कुजोरेन, कुन यहूदी, कुन गैर कौमां, तैन केरे लेइ मसीह परमेशेरी शक्ति, ते परमेशेरेरू ज्ञाने ।

25 किजोकि परमेशेरी बेवकूफी मैन्हु केरे ज्ञाने करां जादे ज्ञान बालीए; ते परमेशेरी कमज़ोरी मैन्हु केरे शेक्ति करां जादे ज़ोरे बालीए ।

26 हे ढ़लाव ते बेइनव, इस बारे मां सोचा ज़ेइस परमेशेरे तुस कुजाए तुस केरे थिये, कि न जिसमेरे मुताबिक बडे ज्ञानी, ते न बेइ शेक्तिबाले, ते न इज़्जतदार घरेरे कुजाए ।

27 ज्ञाने बालन शरमिन्दा केरनेरे लेइ परमेशेरे तैना चुने ज़ैना दुनियारे नज़री मां बेवकूफन । ते ताकतबरन शरमिन्दा केरनेरे लेइ परमेशेरे तैना चुने ज़ैना दुनियारे नज़री मां कमज़ोरन ।

28 परमेशेरे तैना चुने ज़ैना दुनियारी नज़री मां नीन्न ते घटिया आन, बल्के ज़ैना अथ्थी भी नई तैना भी चुने, कि तैन ज़ैना आन, बेकार केरन ।

29 परमेशेरे एन केरू ताके कोई प्राणी परमेशेरेरे सामने घमण्ड न केरि सके ।

30 पन परमेशेरे तुस यीशु मसीह सेइं अक कियोरेथ, ते मसीहेरे ज़िरिये तैने अपनू ज्ञान दित्तेरूए । परमेशर अपने नज़री मां असन धर्मी भी बनाते । मसीहेरे ज़िरिये अस पवित्र किये जे, ते तै असन इशे पापन करां आज़ाद केरते ।

31 ताके ज़ेन्चरे पवित्रशास्त्रे मां लिखोरए, तेन्चरे भोए, “कि ज़ै घमण्ड केरे तै तैस पुड़ घमण्ड केरे ज़ैन प्रभुए कियोरूए ।”

2

~~~~~

1 हे ढ़लाव ते बेइनव, ज़ैखन मां तुसन परमेशेरेरे बारे मां सन्देशे शुनव, त मीं बेइ गल्लां इस्तेमाल न की, कि अवं अपने आपे ज्ञानी हिरेईं ।

2 किजोकि मीं इन थापेरू थियूं, कि तुसन मां यीशु मसीह, बल्के करूसे पुड़ च़ाढ़ेरे मसीहेरे अलावा होरि कोई गल न केरि ।

3 ते कमज़ोरी ते डेरे सेइं तुसन सेइं साथी, ते बडो थरकतो तुसन सेइं साथी राव ।

4 ते मेरे शिक्षाई, ते मेरे प्रचारे मां ज्ञानेरी लालचानेरी बैली गल्लां न थी; पन पवित्र आत्मा शेक्ति सेइं इन हिराव कि ज़ै सन्देशे मीं शुनव तै सन्न थियो ।

5 एल्हेरेलेइ की तुशो विश्वास मैन्हु केरे ज्ञाने सेइं नई, पन परमेशेरेरे शेक्ति पुड़ निर्भर भोए ।

~~~~~


6 फिरी भी अवं आत्मिक सिद्ध लोकन ज्ञानेरो सन्देश शुनाताई, पन इस दुनियारे लोकां केरो नई, ते इस दुनियारे हाकिमां केरू नई जैना नाश भोनेन।

7 पन अस परमेशेरू तैन छपोरू ज्ञान भेदेरे रीति पुड़ ज़ोतम, जैन परमेशेरे दुनिया बनाने करां पेइलू इशशे महिमारे लेइ ठहराव।

8 परमेशेरेरो ई मकसद इस दुनियारे हाकिमन मरां केन्चे भी न समझो, किजोकि अगर समझते भोथे, त महिमा बालो प्रभु कूरूसे पुड़ न च्छादथे।

9 पन जेन्चरे पवित्रशास्त्रेरे मां लिखोरूए,

“कि जैन न एछ्छेई लाव,

न कन्नेई शुनु,

ते जैना गल्लां मैन्हु केरे दिले मां न एई,

तैना सब परमेशेरे तैन केरे लेइ तियार की, जैना तैस सेइ प्यार केरतन।”

10 पन परमेशेरे पवित्र आत्माेरे ज़िरिये सेइ असन पुड़ बांदू कियूं; किजोकि पवित्र आत्मा सब गल्लां, बल्के परमेशेरेरी डुगी गल्लां ज्ञानते।

11 मैननु मरां कौन केसेरी गल्लां ज्ञानते, सिर्फ मैनेरी आत्मा जै तैस मांए, तेन्चरे परमेशेरेरी गल्लां भी कोई न ज्ञाने, सिर्फ परमेशेरेरो आत्मा।

12 पन असन दुनियारी आत्मा नई, पन तै आत्मा मैलोरोए, जै परमेशेरे तरफांए, कि आस तैन गल्लन समझम, जैना परमेशेरे असन दित्थोरिन।

13 एल्हेरेलेइ अस मैन्हु केरे ज्ञानेरी शिखैलोरी गल्लन मरां नई, पन पवित्र आत्माेरे शिखैलोरी गल्लन मरां आत्मिक गल्लां आत्मिक ज्ञाने सेइ समझातम।

14 पन जिसमानी मैन्हु परमेशेरे आत्माेरी सच्च्छाई कबूल न केरे, किजोकि तैसेरेलेइ तै बेवकूफीए, ते न तै तैन सेमझी सके, किजोकि तैना सिर्फ पवित्र आत्माेरे ज़िरिये सेमझी गैतिन।

15 पन जैन लोकन पवित्र आत्मा मैलोरो तैना, तैन सैरी गल्लन परखतन जैना पवित्र आत्मा शिखालते। पन जैन लोकन पवित्र आत्मा नई मैलोरो तैना, तैन न सेझी बटन जैन पवित्र आत्मा मैलोरोए।

16 इन सच्च्छ आए, किजोकि पवित्रशास्त्र ज़ोते,

“कोई न ज्ञाने प्रभुएरे मने मां कुने।”

पन पवित्र आत्मा असन विश्वासी लोकन मसीहेरो मने दित्थोरोए।

3

~~~~~

1 हे दूलाव ते बेइनव, जेखन अवं तुसन कां थियो त तुसन सेइ एन्चरे सब गल्लां न केरि बटो, जेन्चरे आत्मिक लोकन सेइ; पन जेन्चरे तैन सेइ जैना मसीह मां बच्चेन।

2 मी तुसन परमेशेरे वचने मरां सिर्फ बुनियादी गल्लां केरि शिक्षा दिती ते डुग्धी सच्च्छाई नई। किजोकि तैस वक्ते तुस तै शिक्षा हासिल केरनेरे ते समझनेरे काबल न थिये, बल्के हेजू भी हासिल केरनेरे काबल नई।

3 किजोकि हेजू तगर भी गैर विश्वासी केरे जेरे आथ। एल्हेरेलेइ कि जेखन तुसन मां बैर, ते लड़ाइयन, त कुन तुस गैर विश्वासी केरे जेरे न भोए? तुस एरे लोकां केरि जेरि ज़िन्दगी जीने लोरेथ, जैन केरो रिशतो प्रभु सेइ न भोए।

4 एल्हेरेलेइ अक ज़ोते, “अवं पौलुसेरोई,” ते होरो ज़ोते, “अवं अपुल्लोसेरो आई,” त कुन तुस एरे लोकां केरि जेरि ज़िन्दगी जीने बाले न भोए, जैन केरो रिशतो प्रभु सेइ न भोए।

5 अपुल्लोस कौने? ते पौलुस कौने? सिर्फ सेवक, जैन केरे ज़िरिये तुसेई प्रभु पुड़ विश्वास कियो, असन मरां हर केन्चे कम कियूं जेन्चरे परमेशेरे केरनेरे लेइ दित्तू।

6 अगर अवं तुशशी तुलना ऊडारे सेइ केरि त मी बीज बेवं, अपुल्लोसे सगू, पन परमेशेरे बडावं।

- 7 एल्हेरेलेइ न त लानेवालो किछे, ते न सगगेने वालो किछे, पन परमेशर ज़ै बडाने वालोए ।
- 8 लानेवालो ते सगगेने वालो दुइये अक्कन; पन हर मैन्हु अपने-अपने मज्दूरारो फल मैलनोए ।
- 9 किजोकि अस परमेशरे सेइं साथी कम केरनेवाले आम, तुस एरे ऊडांरां केरे ज़ेरे आथ ज़ैन केरो तलक परमेशरे सेइं आए, ते इसेरे आलाव तुप्रशी तुलना एरे घरे सेइं केरताई ज़ैन परमेशरे बनावरूए ।
- 10 परमेशरे ज़ैन कम मीं केरनेरे लेइ दितोरू थियूं, मीं तैन अक्कलमन्दी सेइं कियूं; अवं माहिर मिसरेरो ज़ेरो आई, मीं तुप्रशे नगरे मां खुशखबरी प्रचार की ते शुरु मां तुसन यीशु पुइ विप्रवास केरनेरे लेइ मद्दत की, तैट्टां बाद ज़ैस कम्मेरी शुरुआत मीं कियोरी थी, होरे मसीही सेवा केरनेवाले तैस बुनियादी पुइ लगातार कम केरते राए । पन असन मरां हर एक्की कम केरनेवाले ध्याने सेइं सोचोरू लोडे, कि असेई परमेशेरू कम केन्चरे लोडे कियोरू ।
- 11 किजोकि यीशु मसीह सच्च्ची बुनियाद आए, ते होरो कोई होरि बुनियाद न बनेइ सके, तैन इन आए, कोई तुसन मुक्ति हासिल केरनेरे लेइ नर्वीं शिक्षा न शिखेली बटे, मीं तुसन सेइं पेइलू ज़ोवरू कि परमेशर असन यीशु मसीहेरे ज़िरिये मुक्ति देते ।
- 12 ते अगर कोई इस मुनीयादी पुइ सोन्नु चाँदी या कीमती घोइ या कैडु या घास फूसेरो रट्टो रखते ।
- 13 ज़ैखन मसीह फिरी वापस एज्जेलो, त अग हर एक्केरे कम्मे परखेली, ते अग हर मैनेरे कम्मेरी कीमत हिराली ।
- 14 ज़ेसेरू कम तैस अगगी सेइं न फुकोलू, तैस मज्दूरी मैलनीए ।
- 15 ते अगर केन्चेरू कम फुकोलू, त तैस नुकसान भोलो; पन तै एप्पू बच्चनोए पन फुकोते-फुकोते ।
- 16 कुन तुस न ज्ञानथ, कि तुस परमेशेरू मन्दरथ, ते परमेशेरो आत्मा तुसन मां रहते?
- 17 अगर कोई तुसन नुकसान पुज्जाए, त परमेशर तैस नाश केरेलो; किजोकि परमेशेरू मन्दर पवित्रे, ते तैन तुस आथ ।
- 18 कोई अपने आपे धोखो न दे, अगर तुसन मरां कोई इस दुनियारे लोकन मां अपना आप अक्कलमन्द समझे, त तैस दुनियारी नज़री मां बेवकूफ बनोरू लोडे; ताके परमेशेरे नज़री मां सच्च्चे ज्ञानी बने ।
- 19 किजोकि इस दुनियारी अक्कल परमेशेरे कां बेवकूफीए, ज़ेन्चरे पवित्शास्त्रे मां लिखोरूए; “परमेशर ज़ैन्न तैन केरे च़लैकी मां फसाते ।”
- 20 ते फिरी पवित्शास्त्र इन भी ज़ोते, “परभु ज़ैनी केरे खियालन ज्ञानते कि बेफैइदेन ।”
- 21 एल्हेरेलेइ कोई मैनन् पुइ घमण्ड न केरे, किजोकि किछ परमेशेरे तुप्रशू भलेरे लेइ दितोरूए ।
- 22 तैन इन आए कुन अवं पौलुस, कुन अपुल्लोस, कुन कैफा, कुन दुनिया, कुन ज़ीनू, कुन मरनू, कुन ई वक्त, कुन एजनेवालो वक्त, सब किछ तुप्रशूए ।
- 23 ते तुस मसीहेरथ, ते मसीह परमेशेरोए ।

4

???????? ????????

- 1 मैन्हु असन मसीहेरे सेवक, ते परमेशेरे भेदां केरे भण्डारी समझन ।
- 2 ज़ेन्चरे कि ज़ैस मैन्हु तैसेरे मालिके ज़ैन कम दित्तोरे भोए, तैने तैन कम केरने मां वफादार लोडे रावरू, ज़ेसेरो तैस हुक्म दित्तो जेवरोए ।
- 3 पन मेरे खियाले मां ई गल निकडीए, कि तुस या मैनन् मरां कोई फैसलो केरनेवालो मीं परखे, बल्के अवं अपने आपे न परखी ।
- 4 किजोकि मेरो ज़मीर मीं कोन्ची गल्ली मां दोषी न ठहराए, पन इस सेइं अवं बेइलजाम न ठहरी, किजोकि मेरो परखने वालो प्रभुए ।

5 ते ज्ञातगर प्रभु वापस न एज्जे, पेइली केन्चेरो इन्साफ न केरा, तैए लोकां केरे सारे खियाल साफ तरीके ज़ोलो, ज़ैन केरे बारे मां होरो कोई तैन न ज्ञाने, ते तैन केरे दिलां केरे इरादे बांदे केरेलो। तैखन परमेशेरी तरफां हर केन्चेरी तारीफ़ भोनीए।

6 हे दूलाव ते बेडनव, मीं इन गल्लन मां तुशशे लेइ अपनि ते अपुल्लोसेरी बेंस, मिसालारे रीति पुइ कियोरीए, एल्हेरेलेइ कि तुस इशशे ज़िरिये सेइं शिखा, कि ज़ैन पवित्रशास्त्रे मां लिखोरे करां अगरोवं न बधा, ते एक्केरे पासे ते होरेरे खलाफ़ घमण्ड न केरथ।

7 केन्चे तू होरन करां रोडो नई बनोरो। सब किछ् तीं परमेशेरे तरफां दित्तू जोरूए, अगर तीं सब किछ् परमेशेरे दितोरू ते तुसन घमण्ड केनेरो अधिकार नई।

8 तुस त रज़ोरेथ; तुस दौलतमन्द भोइजेइ, तुसेई इशशे बगैर राज़ कियू; पन रोडू भोथू कि तुस राज़ केरेथे ते अस भी तुसन सेइं साथी भोथे!

9 मेरी समझी मां परमेशेरे अस पुरेरित लोक सेब्बना पत्ती तैन लोकां केरे ज़ेरे ठहरावरेम, ज़ैन केरे मौतरो हुक्म भोइ जेवरोए; किजोकि अस दुनियारे ते स्वर्गदूतां, ते मैन्हु केरे लेइ अक तमाशो बनोरेम!

10 लोक असन बेवकूफ़ समझतन किजोकि अस मसीहेरे बारे मां प्रचार केरतम, पन तुस गेतली सेइं सोचतथ कि तुस अक्लमन्द मसीही आथ! बडे लोक समझतन कि असन कां कोई अधिकार नई। पन तुस घमण्ड सेइं ज़ोतथ कि तुसन कां परमेशेरे तरफां शक्ति आए, तैना इशशी आदर न केरन पन तुशशी आदर केरतन।

11 अस इस वक्ते तगर नियन्ने-ट्लिशोरे, ते छिनदोरे लिगडन मां आम, ते धक्के खातम, ते असन कां घर नई;

12 ते अपने हथेइं सेइं कम केरतां मेहनत केरतम। लोक बुरू ज़ोतन, अस तैन बरकत देतम; तैना सतातन, अस झैल्लतम।

13 तैना बदनाम केरतन, अस नेरमी सेइं गल केरतम, इडी तगर कि, अज़ तगर लोक हेजू भी इशशी इज्जत न केरन, तैना ज़ोतन कि इशशी कोई कीमत नई।

14 मेरी इना गल्लां लिखनेरो मकसद ई नई कि तुसन छिथेई, पन अवं तुसन सुधारने चाताई, किजोकि तुस मेरे बच्चां केरे ज़ेरे आथ ज़ैन सेइं अवं प्यार केरताई।

15 किजोकि अगर मसीह मां तुशशे शिखालनेवाले दश हज़ार भी भोथे, फिरी भी तुशशे बडे बाजी नई, एल्हेरेलेइ कि मसीह यीशु मां खुशखेबरी सेइं अवं तुशशो बाजी केरो ज़ेरो भोव।

16 एल्हेरेलेइ अवं तुसन कां मिनत केरताई, कि मेरी ज़ेरि चाल च़ला।

17 एल्हेरेलेइ मीं तीमुथियुसे ज़ैन प्रभु मां मेरू ट्लारू, ते वफादार मट्टूए, तुसन कां भेजोरूए, ते तै तुसन यीशु मसीह मां मेरू चालचलन याद करालो, ज़ेन्चरे कि अवं हर एककी ठैरी हर कलीसिया मां शिक्षा देताई।

18 तुसन मरां बडे लोक सोचतन कि अवं तुसन कां नई एजनो, एल्हेरेलेइ तैना घमण्ड केरतन।

19 पन प्रभु चाए त मीं तुसन कां जल्दी एजनूए, ते न सिर्फ़ तैन घमण्ड केनेवालां केरि गल्लां नई, पन तैन केरि शक्ति भी ज़ैनेलो।

20 किजोकि परमेशेरे राज़ गल्लां केरू नई, पन शक्ति मांए।

21 अगर हेजू भी तुसेई बुरी बत नई शारोरी, अवं तुस सेखती सेइं झिङक देइलो। पन अगर तुसेई बुरी बत शारी त अवं तुसन सेइं नेरमी त कने प्यारे सेइं बर्ताव केरेलो।

5

1 इडी तगर शुन्ने मां ओरूए, कि तुसन मां बदमाशी भोचे, मतलब एरी बदमाशी ज़ेरि गैर विश्वासी लोकन मां भी न भोए, कि अक मैन्हु अपने बेवानी-अम्मा रखते।

2 तुसेई त दुःख कियोरो लोइतो थियो ते उदास भोरू लोइतू थियू, ते ज़ैनी मैने एरू कियू तै कढोरो लोइतो थियो, पन इसेरे बदले तुस घमण्ड केरतथ।

3 चाए अवं तुस सेइं साथी नई, पन मेरे विचार तुसन सेइं साथी आन, चाए अवं तैडी नई, फिरी भी मने मां इन आए, कि एरू कम करनेवालेरे बारे मां फैसलो करने लोरोईं।

4 इन तैन आए ज़ैन केरनेरी जरूरत आए। हकीकति मां इशशे प्रभु यीशु मसीहेरो अधिकार तुसन कां आए, इन पिशैतनां विश्वासी केरे रूपां अकोट्टे भोथ। इन एरू आए कि अवं भी अपने मने मां तैडी आई। ते फिरी प्रभु यीशु मसीहेरे ज़िरिये।

5 तैस मैन्हु ज़ैन पापी बर्ताव कियोरो, तैस अपने टोली मरां कढा ते तैस मैन्हु शैतानेरे अधिकारे मां वापस देथ, इस उमीदी सेइं कि तै अपने पापन करां मन फिरालो। किजोकि अगर तै पापन करां मन फिरालो त तैस प्रभु यीशु मसीहेरे इन्साफेरे दिहाड़े मुक्ति मैलेली।

6 घमण्ड केरनू बंद केरा, कि तुस न ज्ञानथ, कि थोडू ज़ेरू खमीर पूरे सन्नोरे अट्टे खमीर करते।

7 परानू खमीर केढतां, अपनो आप साफ केरा, कि नंवू सनोरू अट्टू बना; ताके तुस अखमीर राथ, किजोकि इशशो भी फ़सह ज़ै मसीहे, तै बलिदान भोरोए।

8 ते एज्जा अस तिहारे मां आनन्द मनाम, न पुराने खमीर सेइं न बुरेई, ते दुष्टरे खमीर सेइं, पन सिधीयैई, ते सञ्चैइयरे बगैर खमीररे रोट्टी सेइं।

9 मीं अपने पेइले चिट्टी मां लिखोरूए, कि बदमाशी केरनेवालां केरि संगती न केरथ।

10 इन नई, कि तुस बिलकुल इस दुनियारे बदमाशी केरनेवाले, या लालच केरनेवाले, या धोखो केरनेवालन, या मूरती पुजने वालां केरि संगती न केरा; किजोकि एन्चरे तुसेईं इस दुनियाई मरां निसनू पेथू।

11 मेरू ज़ोनू त इन्ने, कि अगर कोई अपने आपे विश्वासी ज़ोते, ते बदमाशी केरनेवालो, या लालच, या मूरती पुजने वालो, या गैई देनेवालो, या पीने वालो, या धोखो केरनेवालो भोए, त तैस सेइं साथ न रेखतथ, बल्के एरे मैन्हु सेइं साथी रोट्टी भी न खेइयथ।

12 ई मेरी ज़िमेबारी नई, कि ज़ैना लोक विश्वासी नई तैन केरि निन्दा केरि। पन हकीकति मां तुसेईं तैन लोकन सज़ा दितोरी लोड ज़ैना तुशशे कलीसियारे हिस्सो आन।

13 पन ज़ैना विश्वासी नई तैन केरो इन्साफ परमेशर करते पन पवितरशास्त्र ज़ोते, बुरू कम केरनेवाले मैन्हु अपने टोली मां एजने न देथ।

6

XXXXXXXXXXXX

1 अगर तुसन मरां केन्चरी हारि विश्वासी सेइं लडाई भोए, त तुसेईं फैसलेरे लेइ अधर्मी हाकिमन कां न लोडे ज़ोवरू; तुसेईं अपने कलीसियारे विश्वासी लोकन ज़ोवरू लोडे कि तैना तुशशे मुकदमेरो फैसलो केरन कि कौन सही ते कौन गलते।

2 कुन तुस न ज्ञानथ, कि परमेशरेरे लोकेईं दुनियारे लोकां केरो इन्साफ केरनोए? ते अगर तुसेईं दुनियारे लोकां केरो इन्साफ केरनोए, ते कुन तुस निकडे करां निकडे लडेइयरो फैसलो केरनेरी कावल नई?

3 तुस ज्ञानतथ कि एजनेवाले वक्ते मां असेईं तैन स्वर्गदूतां केरो इन्साफ केरनोए ज़ैना स्वर्ग मरां शारोरे थिये, त पक्को तुस रोज़ेरी आम गल्लां केरो फैसलो केरि बटतथ।

4 अगर एरी गल्लां भोन, त तुसेईं तैन केरो फैसलो केरनेरे लेइ तैन कां न लोडे जेवरी ज़ैन केरि आदर कलीसियारे लोकन मां न की गाए।

5 अवं तुसन छिथानेरे लेइ इन ज़ोताई, कि सञ्चै तुसन मां अक भी अक्लमन्द न मैल्लो, ज़ै विश्वासी लोकां केरो फैसलो केरे।

6 बल्के विश्वासी लोकन एपू मांमेईं मुकदमे भोतन, ते तैना भी गैर विश्वासी लोकां केरे सामने।

7 पन सञ्चै तुसन मां बडो दोष त ईए, एपू मांमेईं मुकदमे केरतथ, बल्के बेइन्साफ किजो न झैल्लथ? अपनो नुकसान किजो न झैल्लथ?

8 बल्के बेइन्साफ केरतथ, ते नुकसान पुज्जातथ, ते तै भी विश्वासी लोकन।

9 कुन तुस न ज्ञानथ, कि बेइन्साफ लोक, परमेशेरे राज्जेरे बारिस नई भोने? धोखो न खाथ, न वेश्यागामी, न मूरती केरि पूजा करनेबाले, न आयाश, न लुच्चे, न तैना जैना मडद मडदन सेइं जिसमानी रिश्तो रखतन।

10 न चोर, न लालच्ची, न पीने बाले, न गैई देनेबाले, न अधेर करनेबाले परमेशेरे राज्जेरे बारिस भोनेन।

11 तुसन मरां पेइले किछ एरे थिये, पन प्रभु यीशु मसीहेरे नन्वे ते इश्शे परमेशेरे आत्माई सेइं तुश्शे पाप धोए जे, ते तुस पवित्र भोए ते धर्मी ठहराए।

~~~~~

12 तुसन मरां किछ ज़ोई बटन, कि सब चीजां मेरे लेइ जेइज त आन, पन सब चीजां फैइदेरी नई, सब चीजां मेरे लेइ जेइज त आन, पन अवं कोन्वी भी चीजरो गुलाम बेनेलो।

13 तुसन मरां किछ ज़ोई बटन, खानू पेटेरे लेइए, ते पेट खानेरे लेइ, एन सच्चे, पन परमेशर रोटी भी ते पेटे भी नाश केरेलो, पन जिसम बदमाशी केनेरे लेइ नई, बल्के प्रभुएरे लेइए; ते प्रभु जिसमेरे लेइए।

14 ते परमेशेरे, प्रभु यीशु अपने शेक्ति सेइं जीतो करो, ते तै असन भी जीतो केरेलो।

15 कुन तुस न ज्ञानथ, कि तुश्शी जाना मसीहेरे अंगन? ते कुन अवं मसीहेरे अंगन वेश्यारे अंगन सेइं शामिल केरि? नई, कधी नई।

16 कुन तुस न ज्ञानथ, कि ज़े कोई वेश्याए सेइं न जेइज रिश्तो रखते, तै तैस सेइं अक जान भोते? किजोकि पवित्रशास्त्र ज़ोते, “कि तैना दुइये अक जान भोलां।”

17 ते ज़े प्रभुएरी संगती मां रहते, तै तैस सेइं साथी अक आत्मा भोते।

18 बदमाशी करने करां दूर राथ, ज़ेत्तरे होरे पाप मैन्हु करते, तैना जानरे बेइरन, पन बदमाशी करनेबालो अपने जानरे खलाफ पाप करते।

19 कुन तुस न ज्ञानथ, कि तुश्शी जान पवित्र आत्मारू मन्दरे; ज़े तुसन मां आए, ते तुसन परमेशेरी तरफां मैलोरोए? ते तुस अपने नई पन तुस परमेशेरे आथ;

20 किजोकि प्रभुए अपनि जानरी कीमत देइतां तुस धिनोरेथ, एल्हेरेलेइ अपने जानरे जिरिये सेइं परमेशेरी आदर केरा।

## 7

~~~~~

1 हुनी अवं तुश्शे तैन सवालां केरो जुवाब देताई, जैना तुसेईं अपने चिट्ठी मां पुच्छे, तुसेईं पुच्छे, इन रोडू आए कि लोक इला न बनान?

2 हाँ इन ज़रूरी आए कि बदमाशी केनेरे डरे सेइं हर मडदेरी कुआन्श, ते हर कुआन्शरो मुन्श भोए।

3 मुन्श अपने कुआन्शरू हक पूरू केरे; ते तेन्चरे कुआन्श भी अपने मुन्शरू।

4 कुआन्शी अपने जिसमे पुइ अधिकार नई, पन तेसेरे मनशेरो अधिकारे; तेन्चरे मुन्शे भी अपने जिसमे पुइ अधिकार नई, पन कुआन्शी।

5 तुस एक्की होरि करां अलग न भोथ; पन सिर्फ थोडे जिरेरे लेइ बिस्तारे सेइं कि प्रार्थनारे लेइ फुसंत मैल्ले, ते फिरी अकोट्टे भोथ, कि एरू न भोए, शैतान तुसन परखे।

6 पन ज़ैन अवं इन ज़ोने लोरोई ई सुझावे, न कि हुक्म।

7 अवं इन चाताई, कि ज़ेरो अवं अइलाव आई, तेरहे सब मैन्हु भोन; पन परमेशेरे किछन इला केरनू वरदान दितोरूए, ते किछन अकैल्लू रानेरू वरदान दितोरू।

8 मेरी सल्लाह अइलां ते विधवां केरे ई आए, कि तैना अइलाए रान, ज़ेन्चरे अवं आई।

9 पन अगर तैना अपना आप कैवू न केरि बटन, त इला बनान, किजोकि इला बनानो इच्छान मां मसत राने करां रोडोए।

10 जैन केरो इला भोरोए, तैन केरे लेइ अवं नई, बल्के प्रभु हुकम देते, कि कुआन्श अपने मुन्शे करां अलग न भोए ।

11 (अगर अलग भोइ गाए, त होरो इला न बनाए; या अपने मुन्शे सेइं फिरी मेल मिलाप केरे) ते मुन्श अपने कुआन्शी न शारे ।

12 होरन सेइं प्रभु नई, पन अवं ज़ोताई, अगर केन्वी विश्वासी द्वालाएरी कुआन्श विश्वासी न भोए, ते तै कुआन्श तैस साथी राने सेइं खुश भोए, त तै तैस न शारे ।

13 ते ज़ैस कुआन्शरो मुन्श विश्वासी न भोए, ते तै मैन्हु तैस साथी राने सेइं खुश भोए; तै मुन्शे न शारे ।

14 किजोकि एरो मुन्श ज़ै विश्वासी न भोए, परमेशर तैस सेइं एरो बतावं केरते ज़ेन्चरे अपने लोकन सेइं, किजोकि तैसेरी कुआन्श मसीही आए, ते एरी कुआन्श ज़ै विश्वासी न भोए, परमेशर तैस सेइं एरो बतावं केरते ज़ेन्चरे अपने लोकन सेइं, किजोकि तैसेरो मुन्श मसीही आए । अगर एरू न भोथू कि विश्वास न केरनेबालो मुन्श या कुआन्श परमेशररे लोक न भोथे, तैखन तुशशे बच्चे भी परमेशररे न भोथे । पन हुनी तुशशे बच्चे भी परमेशररे भोइ जे ।

15 पन ज़ै मइद ते कुआन्श विश्वासी न भोए, अगर तैना अलग भोन, त अलग भोने देथ, एस हालती मां कोई विश्वासी द्वालाए या बेइन बन्धने मां नई । पन परमेशरे अस कुजोरिम कि सुखे सेइं ज़ीम ।

16 हे कुआन्शव तुस इस गल्ली याद रखा कि तुशशे मुन्श तुशशे वजाई सेइं मुक्ति हासिल केरि बटतन, ते हे मुन्शव तुस याद रखा कि तुशशे वजाई सेइं तुशशी कुआन्शां मुक्ति हासिल केरि बेटतिन ।

XXXXXXXXXXXXXXXXXXXXXXXXXXXX

17 ज़ैन किछ अवं ज़ोने लोरोई तैसेरो नचोइ ई आए: हर मैन्हु तैस हालती मां रावरो लोडे ज़ै प्रभुए तैस दित्तोरीए ज़ेइस तैनी परमेशररू कुजानू शुनू । अवं इन सेन्भी कलीसियान मां एन्चरे टहराताई ।

18 अगर कोई मैन्हु ज़ै खतनो कियोरे कुजोरो; त तै प्रभु यीशु पुइ विश्वास केरते, तैस अपना आप बगैर खतने बालो हिरानेरी ज़रूरत नई; ते अगर कोई मैन्हु ज़ेसेरो खतनो नई भोरो, ते तै प्रभु यीशु पुइ विश्वास केरते, तैस खतनो कराने ज़रूरत नई ।

19 न खतनो किछ चीजे, ते न खतनो न करानो, बल्के परमेशररे हुकम मन्ने बडे ज़रूरिन ।

20 हर अक ज़ैस हालती मां कुजावरोए, तेन्चरे राए ।

21 तू गुलाम थियो ज़ेइस परमेशरे कुजावरो थियो, फिरी भी परेशान न भोथ; पन अगर तू आज़ाद भोइ सकतस, त भो ।

22 किजोकि ज़ैना गुलामरे हालती मां कुजोरिन, तैना प्रभु मां आज़ादन, तेन्चरे ज़ैना प्रभु मां आज़ाद कुजोरिन, तैना मसीहेरे गुलामन ।

23 परमेशरे तुस बडी कीमत देइतां धिनोरेथ, मैन्हु केरे गुलाम न बना, पन परमेशररे गुलाम बना ।

24 हे द्वालाव ते बेइनव, ज़ै ज़ैस हालती मां परमेशरे कुजवरोए, तै तैस्से हालती मां परमेशरे सेइं साथी राए ।

XXXXXXXXXX XX XXXXXXXX

25 कुवेरी केरे लेइ मीं प्रभु करां कोई हुकम नई मैल्लेरो, पन प्रभुए दयाई सेइं मीं अक्ल दित्तोरीए, ज़ैस पुइ भरोसो कियो गाते, ते अवं ई सलाह देताई ।

26 किजोकि इन दिहाइन मां विश्वासी लोकां केरे लेइ बुरू गल्लां भोने लोरिन, एल्हेरेलेइ मीं लगते कि इन तुशशे लेइ रोइए, अवं ई सलाह देताई कि ज़ैना ज़ेरे आन तैना एन्चरे रान ।

27 अगर तेरी कुआन्शे, त तू तैस करां अलग भोनेरी कोशिश न केर, ते अगर तेरी कुआन्श नई त तू कुआन्शी न तोप ।

28 पन अगर तू इला भी केरस, त पाप नई; ते अगर कुवारी इलाई गाए त कोई पाप नई; पन एरे लोकन इस दुनियाई मां बड़ी परेशैनी भोली, ते अवं बचाने चाताई।

29 हे दलाव ते बेइनव, अवं इन ज़ोताई, इश्शो इस दुनियाई मां जादे वक्त नई रावरो, एल्हेरेलेइ जादे फिकर न केरा कि तुश्शी कुआन्शां आन या नई, पन प्रभुएरी सेवारे बारे मां सोचते राथ।

30 ते तैना ज़ैना लेरां देतन या ज़ैना खुश आन, या ज़ैना अपनि बनानेरे लेइ चीज़न घिन्तन, इन सेब्भी गल्लां केरे बारे मां जादे लोड़े सोचोरू (किजोकि इना सब गल्लां प्रभुएरी सेवा केरनि विसरैली)।

31 तैना ज़ैना दुनियारी चीज़ां इस्तेमाल केरतन, तैनेई तैन सेई लगाव न लोड़े रखोरो, किजोकि ज़ेन्चरे अस जानतम ई दुनिया जल्दी खतम भोनेबालीए।

32 मेरी इच्छा ई आए कि तुस दुनियारे ज़िन्दगरी खुवाइशन करां आज्ञाद राथ, अइलाव मैन्हु प्रभुएरी सेवा केन्चरे केरनि ई फिकर केरते कि प्रभुए खुश केरे।

33 पन इलावरो मैन्हु दुनियारी गल्लां केरि फिकरी मां रहते, कि केन्चरे अपने कुआन्शी खुश रखे।

34 तैने दूई चीज़ां केरे बारे मां सोचोरू लोड़े, अपनि कुआन्श खुश केरनेरे बारे मां ते प्रभु खुश केरनेरे बारे मां। इलावरी ते अइलाई मां भी फर्के, अइलाई प्रभुएरी फिकरी मां रहतीए, कि केन्चरे अपनि आत्मा, ते जिसम दुइये पवित्तर रखे, पन इलावरी दुनियारे फिकरी मां रहतीए, कि अपने मुन्शे खुश रखे।

35 ई गल तुश्शे फेइदेरे लेइ ज़ोताई, न कि तुसन फसानेरे लेइ, बल्के एल्हेरेलेइ ज़ेन्चरे लोड़े तेन्चरे कियूं गाए, ताके तुस अक मन भोइतां प्रभुएरी सेवाई मां लोगोरे राथ।

36 ते अगर कोई इन समझे कि, अवं एपनी तैस कुवैरारू हक लोरोई मारने ज़ेसेरी जवानी लोरी ढलने, त ज़ेन्चरे चाए तै केरे, इस मां पाप नई, तै तैसरो इला भोने दे।

37 पन अगर ज़ैने बाजी अपने मने मां पक्को फैसलो कियोरोए, कोन्ची होरेरे दबावेरे अलावा ते केरते, त तैस कां तै अधिकारे ज़ैन तै केरनु चाते। ते अगर तै फैसलो केरते कि तैसेरी कुई ज़ेरि आए तेरही रखे, तै परमेशेरी नज़री मां रोडू कम केरेलो।

38 ज़ै अपनि कुवैरारो इला कराते, तै रोडू केरते, ते ज़ैन न कराए तै भी रोडू केरते।

39 ज़ांतगर कोन्ची कुआन्शरो मुन्श ज़ीतो रहते, तांतगर तैस सेई साथी रावरू लोड़े, पन ज़ेइस तैसेरो मुन्श मेरि गाए, ज़ैस सेई चाए इला केरि बटतीए, सिर्फ विश्वासी लोकन मां।

40 पन अगर तै फिरी दुबारां इला न केरे, त मेरे खियाले मां बड़ी धने ते अवं समझताई, कि परमेशेरो आत्मा मीं च़लाने लोरीए।

8



1 तुसेई अपने चिट्ठी मां मूरतन कां ज़ादोरी चीज़ां केरे बारे मां पुछोरू थियू, इस बारे मां अस जानतम, पन ज्ञान असन अपने बारे मां धमण्डी बनाते, पन प्यार सेई होरि केरि तरक्की भोतीए।

2 अगर कोई समझे, कि अवं किछ ज्ञानताई, ते ज़ेरू ज्ञानेरू लोड़े तेरू हेजू तगर न ज्ञाने।

3 पन अगर कोई परमेशेरे सेई प्यार केरते, ते तैस परमेशर पिशानते।

4 एल्हेरेलेइ अवं खानेरे बारे मां जुवाव देनो चाताई, अस मूरती केरे सामने बलिदान कियोरी चीज़ां केरे खानेरे बारे मां जानतम, कि अस जानतम कि मूरती सच्चो परमेशर नई, सिर्फ एक्के सच्चो परमेशेरे।

5-6 पन फिरी भी अम्बरे ते धेरतली पुड़ लोक बड़े देबते ते प्रभु ज़ोतन, पन इश्शे लेइ अक्के परमेशर, ते इश्शो बाजी आए। तैने सेरी चीज़ां बनेइ, अस तैसेरे ज़िरिये ज़ीते रातम। एन्चरे असन कां अक्के प्रभुए ते तै प्रभु यीशु मसीहे। तैसेरे ज़िरिये सब किछ बनवं जेवं, अस तैसेरेलेइ ज़ीतेम।

7 पन सेब्भी विश्वासी लोकन इसेरू ज्ञान नई; पन किछ लोक हेजू तगर मूरतन असली भोनेरी सोचनेरी आदते, एल्हेरेलेइ जैखन लोक मूरतिन कां च़ाढ़तन, त तैना असली देबतन पूजा केरे रूपे मां सोचतन ते तैन केरो ज़मीर कमज़ोर भोइतां अशुद्ध भोइ गाते।

8 पन खानू असन परमेशेरे कां न पुजाए, अगर अस न खाम, त असन किछ नुकसान नई, ते अगर खाम त कोई फैइदो भी नई।

9 पन हुशार राथ, एरू न भोए, कि तुशशी ई आज़ादी कमज़ोर विश्वासे वालां केरे लेइ पाप केरनेरे लेइ वजा बने।

10 किजोकि अगर तीं ज़ैनी मन्देरे मां मूरतन कां च़ाढ़ेरू खातो लाए, ते तै विश्वासे मां कमज़ोर मैन्हू भोए, ते कुन तैसेरे ज़मीरे मां मूरती केरे सामने च़ैढोरी चीज़ां केरे खानेरी दिलेरी न भोली।

11 एस रीति सेइं तेरे ज्ञानेरे वजाई सेइं तै विश्वासे मां कमज़ोर ढ़ला ज़ेसेरे लेइ मसीह मरो तै मसीह पुइ विश्वास केरनो न शारे।

12 एन्च़ेरे तुस अपने विश्वासी लोकन ठोकर पुजेइतां न सिर्फ़ तैन केरे पापी भोए, बल्के मसीहेरे भी पापी भोले।

13 इस वजाई सेइं अगर खानू कोन्ची विश्वास केरनेबालेरे लेइ ठोकर भोए, ते अवं कोन्ची तरीके सेइं कधी मास न खेइलो, एरू न भोए कि मेरू खानू कोन्ची विश्वास केरनेबालेरे लेइ ठोकरारी वजा बने।

9

????????? ???? ?????? ?? ???? ?

1 अवं ज़ैन केरनू चाताई तैन केरनेरे लेइ आज़ाद आई। अवं अक प्रेरित आई, मीं प्रभु यीशु लावरोए ज़े इशशो प्रभुए, ज़ैन कम मीं प्रभुएरे लेइ कियूं तुस तैसेरो नतीजोथ।

2 अगर होरे लोक इस गल्ल्ती न मनन कि अवं प्रभु यीशुएरो प्रेरित आई, त ढ़लाव तुसेईं त लोडे मनोरू। किजोकि मीं ए तुसन कां खुशखबरी आनोरी थी। तुशशो प्रभु विश्वास इस गल्ल्ती साफ़ केरते कि अवं हकीकति मां तैसेरो प्रेरित आई।

3 ज़ैना लोक मेरे प्रेरित भोनेरे अधिकारे पुइ सवाल पुच्छतन, तैन केरे लेइ मेरो ईए फैसलो आए।

4 कुन असन खाने पीनेरू हक नई?

5 कुन असन अधिकार नई, कि कोन्ची मसीही कुआन्शी सेइं इला बनाम, ज़ेन्च़ेरे होरे प्रेरित, ते प्रभुएरे ढ़ला ते कैफ़ा (थानी पतरस) केरतन?

6 या सिर्फ़ मीं ते बरनबासे ज़िन्दगी ज़ीनेरे लेइ कम कियोरू लोडे?

7 को ज़ेरो फौजी अपनू खेइतां जंग केरते? या कौन बाग लेइतां तैसेरो फल न खाए? कौन भैड्डां रेखतां तैन केरू दुद्ध न पीए?

8 अवं इना गल्ल्तां मैन्हू केरि रीति पुइ नई लोरो ज़ोने, मूसेरो कानून भी इन्ने ज़ोते।

9 एल्हेरेलेइ मूसेरो कानून ज़ोते, तैस मां इन लिखोरूए, “तुस खल्ले मां च़लते बार दांतेरू आशी न बेंदथ।” कुन परमेशर दांतां केरि फिकर केरते? नई।

10 या खास केरतां इशशे बारे मां लिखोरू, हाँ इशशे लेइ लिखोरूए, किजोकि ठीके कि जोट्लने बालो उमीदी सेइं जोट्ले, उपाने बालो उमीदी सेइं उपाए।

11 असेईं तुसन परमेशेरेरो सन्देश शुनोवरोए। ज़ेन्च़ेरे लोक बीज़ बेतन तेन्च़ेरे असेईं तुसन मां परमेशेरेरे वचनेरू बीज़ बेव। एल्हेरेलेइ तुशशो फरजे कि इशशे रोज़ेरो खर्चो असन देथ।

12 ज़ां कि तुसेईं होरि लोकां केरि मद्दत की, ज़ेनेईं तुसन प्रचार कियो, त मेरू त कने बरनबासेरू जादे हके। किजोकि अस तुशशे पेइले प्रेरित आम, फिर भी असेईं अपने ज़रूरतेरे चीज़ां केरे लेइ ज़बददस्ती न की, तैसेरे बदले अपने मेर्जी सेइं सब किछ झैल्लू कि मसीहेरे खुशखबरी पुइ विश्वास केरनेरे लेइ केन्च़ेरे लेइ रुकावट बनम।

13 कुन तुस न ज्ञानथ कि जै पवित्र चीजां केरि सेवा करते; तै मन्दरे मरां खाते; ते जै बलिदान केरनेरे ठारारी सेवा करते; तै बलिदान केरनेरे ठारी सेइं शामिल भोते ।

14 एन्चरे प्रभुए ठहराव, कि जैना लोक खुशखबरी शुनान, तैन केरि जिन्दगरो गुज्जारो भी तैन लोकन करां लोड़े भोरों जैना लोक खुशखबरी शुन्तन ।

15 पन मीं इन अधिकारन मरां कोई भी इस्तेमाल न कियो । ते मीं एना गल्लां एल्हेरेलेइ नईं लिखोरी, कि मेरे लेइ एरू कियूं गाए । बिलकुल नईं! किजोकि इस करां त मेरू मरनू रोडूए; कि कोई मेरू घमण्ड वैफैइदू ठहराए ।

16 ते अगर अवं खुशखबरी शुनेई, त मेरू किछ घमण्ड नईं, किजोकि इन त मेरे लेइ जरूरीए, ते अगर अवं खुशखबरी न शुनेई, त मीं पुड़ अफसोस ।

17 किजोकि अगर अवं इन कम अपने मेर्जी सेइं केरताई, त मीं इनाम मैलेलू । पन अगर इन मेरी मेर्जी सेइं नईं, पन अगर परमेशरे ई जिमेदारी दित्तोरीए, त अवं कोन्ची इनामेरी उमीद न रेख्वी वेटि ।

18 ते फिरि मेरू कुन इनामे? कि खुशखबरी शुनाने मां मसीहेरी खुशखबरी मुफ्त बेंटी; इड़ी तगर कि जैन खुशखबरी मां मेरू हक्के, तैसरो पूरो इस्तेमाल केरि ।

19 किजोकि सेभन करां आजाद भोने पुड़ भी मीं अपनो आप सेभी केरो गुलाम बनाव; कि जादे करां जादे लोकन खिचतां ऐनीं ।

20 अवं यहूदी केरे लेइ यहूदी बनो ताके यहूदन खिचतां मसीह मां ऐनीं, जैना लोक यहूदी केरे कानूनेरे अधीन्न तैन केरे लेइ कानूनेरे अधीन न भोने पुड़ भी अधीन भोव, कि तैन जैना कानूनेरे अधीन्न तैन खिचतां मसीह मां ऐनीं ।

21 जैना कानूनेरे अधीन नईं तैन केरे लेइ अवं (पन अवं ज्ञानताई कि अवं परमेशरे कानूने करां हीन नईं, किजोकि अवं मसीहेरे कानूनेरे अधीन आई) तेरो बनो, कि तैन खिचतां मसीह कां ऐनीं ।

22 अवं विश्वासे मां कमजोरों केरे लेइ कमजोर बनो, ताके कमजोरन खिचतां मसीह मां ऐनीं, अवं सेभी मैन्दु केरे लेइ सब किछ बनो, कि कोन्ची न कोन्ची तरीके सेइं लोकन मुक्ति मैल्ली ।

23 ते अवं सब किछ मसीहेरे खुशखबरे लेइ केरताई, कि अवं होरन सेइं साथी तैन बरकतां केरो हिसदार भोई ।

~~~~~

24 कुन तुस न ज्ञानथ, कि दौड़ी मां त सब दौड़तन, पन इनाम अक्के नेते, तुस तेरहु दौड़ा, कि जीतथ ।

25 ते हर अक पलवान हर किसमेरो परेज रखते, तै त अक शुकने वाले ताजेरे लेइ इन सब किछ केरते, पन अस त तैस ताजेरे लेइ केरतम जैन कधी नईं शुकनू ।

26 एल्हेरेलेइ अवं एन्चरे दौड़ताई, पन बगैर मकसदे नईं, अवं भी एन्चरे मुकन सेइं लड़ताई, पन तैसरो जेरो नईं जै हवाई मां लड़ते ।

27 पन अवं अपने जानरी खुवैइशन मारताई, ते कैबू मां केरताई; एरू न भोए कि होरन प्रचार केरि, ते मीं इनाम न मैलेले ।

## 10

~~~~~

1 हे ढ्लाव ते बेइनव, अवं तुसन याद करानू चाताई, इशे दादे-पड़दादन सेइं बड़े पेइले सुनसान टैरी मां कुन भोवं, परमेशरे तैन केरे अग्री-अग्री बिदलार भेजतां तैन सेभन बत हिराई, ते तैना सब लाल समुन्दरे पैनौ मांमेइं एन्चरे पार किये जेन्चरे शुक्कोरी ज़मीनी मांमेइं ।

2 ते तैन सेभेई बिदलारी मां, ते समुन्दरे मां मूसरो बपतिस्मो नेव ।

3 ते तैन सेभेई तै रोटी खाइ, जे परमेशरे तैन स्वर्गां दित्ती ।

4 तैन सेबेई अक्के पानी पिव जैन परमेशर तैन दित्तू, किजोकि तैना आत्मिक चट्टानी मरां पीते थिये, जै तैन सेइं साथी-साथी चलती थी; ते तै चट्टान मसीह थियो।

5 पन परमेशर तैन मरां बड़न सेइं खुश न भोव, एल्हरेलेइ तैना रेगिस्ताने मां मेरि जे।

6 इना गल्लां इश्शे लेइ खबरदारी भोइ, कि जेन्चरे तैनेईं लालच कियू, तेन्चरे अस बुरी चीजां केरू लालच न केरम।

7 ते न मूरती केरि पूजा केरनेबाले बनम; जेन्चरे तैना किछ् बनोरे थिये, जेन्चरे पवित्रशास्त्रे मां लिखोरूए, “लोक तिहारे मां खाने पीने विश्शे, ते फिरी बुरू केरनेरे लेइ उटे।”

8 ते न असां बदमाशी केरम; जेन्चरे तैन मरां किछ्ई की, कि एक्की दिहाड़ी मां 23000 मरे।

9 ते न अस प्रभु यीशु मसीह अजमाम; जेन्चरे तैन मरां किछ्ई अजमाव, ते तैना सपन सेइं मेरि जे।

10 ते न तुस कुडकइथ, जेन्चरे तैन मरां किछ्ई कुडकइव, ते परमेशरे तरफां भेजोरे स्वर्गदूते तैना मारे।

11 पन इना सब गल्लां, जैना तैन पुइ बीती, तैना खबरदारी जेरि थी, ते तैना इश्शी लेइ हदैइयत भी आन, जैना अस दुनियारे आखरी वक्ते मां रातम लिखी जेई।

12 एल्हरेलेइ जै विश्वासी समझते, “कि अवं विश्वासे मां मजबूताई,” तै खबरदार राए; कि तैस्से पापे मां फिरी न बिछ्ड़े।

13 तुसन पुइ एरी अजमैइश नई ओरी, जै मैन्हु केरे झल्लनेरे बेइरे, परमेशर वाफदार, तै तुसन शेक्ति करां जादे अजमैइशी मां गाने न देलो, बल्के अजमैइशी सेइं साथी तैस मरां कढेलो भी; कि तुस झेल्ली भी बटथ।

~~~~~

14 एल्हरेलेइ, हे मेरे दलाराव, मूरती पूजने करां बँचते राथ।

15 अवं समझदार बुझतां, तुसन सेइं ज़ोताई, जैन अवं ज़ोताई, तुस तैसेरे बारे मां सोचा कि सही आए या नई।

16 जैखन अस यीशु मसीहरे मौती याद केरनेरे लेइ अकोट्टे भोतम, त अस दाछारो रस कटोरे सेइं पीतम, जेसेरे बारे मां असेईं परमेशेरू शुक्र कियोरूए, ते अस दलोडोरी रोट्टी भी खातम, ई तैन बरकतन मां शामिल भोनेरो निशाने, जैना मसीहरे जानी ते खूने करां एइतिन?

17 एल्हरेलेइ, कि अक्के रोट्टीए जै मसीहे, चाए अस बडेम, अस अक जान भोतम किजोकि अस तैए अक्के रोट्टी खातम।

18 इस्राएलरे लोकां केरे बारे मां सोचा, जैखन सारे लोक परमेशरेरे लेइ चादोरी रोट्टी खातन, तैना परमेशरेरे आराधनारे हिस्सेदार भोतन, तेन्चरे जैना लोक मूरतन कां बलिदान कियोरी चीजन खातन तैना मूरती केरि पूजाई मां हिस्सेदार भोतन।

19 फिरी अवं कुन ज़ोताई? कि मूरतरी बलिदान किछ्, या मूरती किछ्?

20 नई, बल्के इन, कि तैना जैन बलिदान केरतन, तैना परमेशरेरे लेइ नई, पन भूतां केरे लेइ केरतन, ते अवं न चैई कि तुस भूतन सेइं साथी शामिल भोथ।

21 तुस प्रभुएरे कटोरे, ते भूतां केरे कटोरे दुइयन मरां न पी बटथ! तुस प्रभुएरे मेजे ते भूतां केरे मेजे मां शामिल न भोइ बटतथ।

22 कुन अस प्रभु सरकातम? कुन अस तैस करां जादे शेक्ति बालेम?

~~~~~

23 तुस ज़ोतथ, अस किछ् भी केरनेरे लेइ आज़ाद आम, हाँ, पन सब किछ् इश्शे लेइ रोडू नई। अस किछ् भी केरनेरे लेइ आज़ाद आम, पन सब किछ् इश्शे विश्वासे जै परमेशरे पुडे मजबूत न केरे।

24 कोई अपने भलेरे बारे मां न सोचे बल्के होरि केरे भलेरे लेइ सोचे।

15 पन अगर कुआन्श लमो दोग रखे; ते तैसेरेलेइ शोभाए किजोकि बाल तैसेरे दकनेरे लेइ दित्तोरिन।

16 पन अगर कोई मीं सेई राजी न भोए, त इन समझे न इशशी न इशशे परमेशेरी कलीसियां केरि एरी रीतए।

☞☞☞☞ ☞☞☞☞☞☞ ☞☞☞☞ ☞☞☞☞

(☞☞☞☞ 26:26-29; ☞☞☞☞ 14:22-25; ☞☞☞☞ 22:14-20)

17 इस बारे मां अवं तुसन इन ज़ोताई, अवं तुशशी तारीफ़ न केरि, एल्हेरेलेइ कि तुशशे अकोट्टे भोने सेई भलाई नई, बल्के नुकसान भोते।

18 किजोकि पेइलू त अवं इन शुनताई, कि ज़ैखन तुस कलीसिया मां आराधनारे लेइ अकोट्टे भोतथ, त तुसन मां अन-बन भोतीए ते अवं किछ्छ हदी तगर याकीन केरताई।

19 पन, बिलकुल तुसन मां बटवारे भोरो लोड़े, ताके तुसन ज़ैन कां परमेशेरी मन्ज़ूरीए पिशाने गाथ।

20 ते ज़ैखन तुस इशशे प्रभु यीशुएरी मौती याद केरनेरे लेइ एक्की ठैरी अकोट्टे भोतथ, त तुशशे बर्तावे सेई इन न लगगे कि प्रभु भोज खानेरे लेइ अकोट्टे भोरिथ।

21 किजोकि खानेरे वक्ते हर कोई अपनो इलाच्छड़ो होरन करां पेइलो खाते, ते किछ्छ त नियन्नो रहतन, ते किछ्छ मतवालो भोइ गाते।

22 कुन खाने पीनेरे लेइ तुसन घर नई या परमेशेरी कलीसियाई घटिया समझतथ, कि ज़ैन कां नई तैन छिंतातथ अवं तुसन कुन ज़ोई? कुन इस गल्ली मां तुशशी तारीफ़ केरि? अवं तारीफ़ न केरि।

23 ज़ै शिक्षा मीं प्रभु करां पुज़ी तै शिक्षा मीं तुसन दित्ती, कि प्रभु यीशुए ज़ैस राती तै दलुवाव जेव तैने रोट्टी नी।

24 ते शुकर करतां टलोड़ी, ते ज़ोवं; “कि ई रोट्टी मेरे जानी हिराती, ज़ै तुशशे मुक्तेरे लेइ बलिदान की गातीए, मेरी यादी मां इन्ने केरा।”

25 ते एन्चरे ज़ैखन तैनेई रोट्टी खाइ, यीशुए दाछारो कटोरु भी नेव, ते ज़ोवं; “ई कटोरु मेरे खूने मां नंव्यो कराए, ज़ैखन भी पीथ, मेरे यादी मां इन्ने केरा।”

26 किजोकि ज़ैखन ई रोट्टी खाथ, ते इस कटोरे मरां पीथ, त प्रभुएरे मौती ज़ांतगर तै न एज्जे, इस बारे मां ज़ोते राथ।

27 एल्हेरेलेइ ज़ै कोई प्रभुएरे रोट्टी नाजाइज तरीके सेई खाए, या प्रभुएरे कटोरे मरां पीये, तै प्रभुएरे जानरो ते खूनेरे खलाफ़ पापी भोलो।

28 एल्हेरेलेइ मैन्हु अपने बर्तावे परखे ते एन्चरे इस रोट्टी मरां खाए, ते इस कटोरे मरां पीये।

29 किजोकि ज़ै इस रोट्टी खाते ते कटोरे मरां पीते बार इन न पिशाने कि तैसेरो रिशतो प्रभुएरी जानी सेई केरोए, तै इस खाने पीने सेई एप्पू पुड़ आफत आनते।

30 एल्हेरेलेइ तुसन मरां बड़े कमज़ोर ते रोगी आन, ते बड़े मेरि भी जे।

31 एल्हेरेलेइ अगर अस पेइले अपनो आप परखम त परमेशर असन सज़ा न देलो।

32 पन प्रभु असन सज़ा देइतां शिखालते एल्हेरेलेइ कि अस दुनियाई सेई साथी दोषी न भोम।

33 ते हे मेरे द्वाव ते बेइनव, ज़ैखन तुस प्रभुएरी रोट्टी खानेरे लेइ अकोट्टे भोतथ, एक्की होरि बलगा।

34 अगर कोई नियन्नो भोए त अपने घरे मां खाए, ज़ैस सेई तुस अकोट्टे भोथ, रोड़े च़ारे बर्ताव केरा, ज़ैस सेई प्रभु तुसन सज़ा न दे, ते होरि गल्लां अवं एइतां ठीक केरेलो।

12

☞☞☞☞☞☞ ☞☞☞☞☞☞

1 हे मेरे द्वाव ते बेइनव, हुनी तुशशे तैस सवालारे बारे मां ज़ै तुसेई पवित्र आत्मार वरदानां केरे बारे मां पुच्छो, अवं चाताई तुस रोड़े च़ारे समझा।

2 तुस ज्ञानतथ, कि तुस विश्वास करने करां पेइले तुसन जेन्चरे ज़ीते थिये तुसन पुड़ भूतां केरो अस्सर भोतो थियो, कि तुस मूरती केरि पूजा करथ, ज़ैना ज़ीती न भोन ।

3 एल्हेरेलेइ अवं चाताई तुस ज्ञानतथ, कि ज़ै कोई परमेशेरे आत्मा रे जुवाने सेइं ज़ोते, तै न ज़ोए, कि यीशु लानतीए, सिर्फ एककैलो पवित्र आत्मा आए, ज़ै इस काबल बनाते, कि कोई भी इन ज़ोईं सकते कि “यीशु प्रभुए ।”

4 वरदाना त बड़े किसमां केरन, पन इना सब परमेशेरो आत्मा देते ।

5 अस बड़े किसमां केरू कम परमेशेरे लेइ केरतम, पन अस तैस्से एक्की प्रभुएरी सेवा केरतम ।

6 परमेशर इश्शे ज़िन्दगी मां अलग-अलग किसमे सेइं कम केरते, पन तैए परमेशर ज़ै असन सेब्बन तैसेरेलेइ कम केरनेरी काबलीत देते ।

7 असन सेब्बन अक एरी काबलीत दित्तोरीए, ज़ैस सेइं पवित्र आत्माही हज़ूरी साबत भोती, ताके अस अपने सैथी विश्वासी लोकां केरि मद्दत केरम ।

8 किजोकि परमेशेरे आत्मा रे ज़िरिये एक्की मैन्हु समझदैरारो सन्देश शुनानेरी काबलीत दित्तोरीए, ते होरि मैन्हु तैस्से आत्मा रे ज़िरिये सेइं ज्ञानेरो सन्देश शुनानेरी काबलीत दित्तोरीए ।

9 तैए आत्मा एक्की मैन्हु मसीह पुड़ मज़बूती सेइं विश्वास केरनेरी काबलीत देते, ते तैए होरि मैन्हु, बिमार लोकन बझानेरी काबलीत देते ।

10 आत्मा एक्की मैन्हु चमत्कारेरां कम्मां केरनेरी शक्ति देते, ते होरि परमेशेरो सन्देश शुनानेरू वरदान, ते कोन्ची आत्मां केरि परख, ते कोन्ची मैन्हु बड़े किसमां केरि भाषां ज़ोनेरी काबलीत दित्ती, ज़ैना तैने नई पेदोरी, ते होरि मैन्हु तैन भाषां केरो मतलब समझानेरी काबलीत दित्ती, ज़ैना तैनेई नई पेदोरी ।

11 सब वरदानां तैस्से एक्की पवित्र आत्मारू कम्मे । तैए ज़ेन्चरे चाते सेब्बी विश्वासी लोकन वरदान देते ।

???? ? ? ? ? ? ? ? ?

12 किजोकि ज़ेन्चरे इश्शे जिसम त अक्के ते तैसेरे अंग बडेन, ते तैस एक्की जिसमेरे अंग हछ्छे भोने सेइं भी सब मिलतां अक्के जिसमे, तेन्चरे मसीह भी आए, ते तैना भी ज़ैना तैस पुड़ विश्वास केरतन ।

13 किजोकि असेईं सेब्बेईं कुन यहूदी, कुन गैर कौमां, कुन गुलाम, कुन आज़ाद अक्के आत्मा रे ज़िरिये अक जिसम भोनेरे लेइ बपतिस्मो नेवरोए, ते असन सेब्बन अक्के आत्मा मैल्ली ।

14 इश्शे जिसमे मां अक्के अंग नई, बल्के बडेन ।

15 अगर पव ज़ोए अवं हथ नई, एल्हेरेलेइ अवं जिसमेरो अंग नई । त कुन तैसेरे ज़ोने सेइं तै जिसमेरो अंग न राए?

16 ते अगर कन्न ज़ोए; “अवं अछ नई, एल्हेरेलेइ अवं जिसमेरो अंग नई,” त कुन तैसेरू एरू ज़ोने सेइं तै जिसमेरो न राए?

17 अगर सारो जिसम अछ्छे भोथी त शुन्नु कोट्टां भोथू? ते अगर सारो जिसम कन्न भोथो त शींघनु कोट्टां भोथू?

18 पन सच्चे परमेशेरे इश्शे जिसमे मां अंग अपने मेर्ज़ी सेइं अक-अक केरतां इश्शे जिसमे मां अपने-अपने ठैरी रखोरेन ।

19 अगर तैना सभे अक्के अंग भोथे, त फिरी जिसम न भोथो ।

20 एल्हेरेलेइ, जिसमेरे बड़े अंग भोने सेइं अक जिसम बनते ।

21 अछ्छे हथ्ये सेइं न ज़ोईं सके, “मीं तेरी ज़रूरत नई,” ते न क्रोड़ी पवन सेइं ज़ोईं बटतीए, “मीं तेरी ज़रूरत नई ।”

22 पन जिसमेरे अंग ज़ैना होरन करां कमज़ोर लेइहोतन, बड़े ज़रूरिन ।

23 ते जिसमेरे ज़ैन अंगन अस आदरारे काबल न समझम तैन केरि अस जादे आदर देतम; ते इश्शे अशोबते अंग होरे भी रोड़ भोतन ।

24 फिरी इशशे शोबते अंगन एसेरी जरूरत नई, पन परमेशरे जिसम बनोवरोए, कि जैस अंगे घटी थी तैस होरि भी जादे आदर भोए।

25 परमेशरे एन कियू ताके जिसमेरे अंगन मां अन-बन न भोए, पन तैना एक्की होरेरी देख-भाल केरन।

26 एल्हेरेलेइ अगर जिसमेरे एक्की अंगे दुःख मैलते, त सारी जान ते सब अंग तैस सेई साथी दुखी भोतन; ते अगर एक्की अंगेरी बड़याई भोतीए; त तैस साथी सब अंग आनन्द केरतन।

27 एन्त्रेरे तुस सब मिलतां मसीहेरो जिसमथ, ते तैसेरे जिसमेरे अंगथ।

28 मसीहेरी जानी मां यानी कलीसियाई मां, परमेशरे असन अलग-अलग कम केरने जो दितीरुए, पेइले प्रेरित, दुइयोवं नबी, टलेइयोवं शिक्षा देनेवाले, फिरी तैना, जैन चमत्कार केरनेरो अधिकार दितीरोए। फिरी तैनी तैना जैन बझानेरो अधिकार दितीरोए, ते तैना जैन होरि केरि मद्दत केरनेरी काबलीत दितीरोए, जैना प्रधानन, तैना जैन पवित्र आत्मां तरफां अलग-अलग किसमां केरि भाषां जौनेरी काबलीत मैली।

29 हर कोई प्रेरित नई। हर कोई नबी नई। हर कोई शिक्षा देनेवालो नई। हर कोई चमत्कार केरनेवालो नई।

30 कुन सेबन बझानेरु वरदान मैलेरु। हर कोई अलग-अलग भाषां केरनेवालो नई। हर कोई भाषां केरो मतलब समझानेवालो नई।

31 सेबन कां तरजमां केरनेरी काबलीत नई, रोडू त इन आए पवित्र आत्मां करां वरदानां हासिल केरनेरी बेडि इच्छाई मां राथ। पन सच्चे रोडू कुने, तैन अवं हुनी जौताई।

13

1 अगर अवं मैन्दु, ते स्वर्गदूतां केरि भाषां केरि, ते प्यार न रेख्खी, त अवं ठन-ठन केरनेवाली पितल, ते झन-झन केरनेवाली झाझाई।

2 ते अगर अवं भविष्यवाणी केरि सेखी, ते सब भेद जैनी ते, मीं इडी तगर पूरो विश्वास भोए, कि पहाड़न घासेई, पन प्यार न रेख्खी, त अवं किछ भी नई।

3 ते अगर अवं अपनि सारी जेइदाद कंगालन देई, या अपनो जिसम फुकनेरे लेइ देई, ते प्यार न रेख्खी, त इन मेरे कोन्वी कम्मेरु नई।

4 जैना लोक होरन सेई प्यार केरतन तैना सबर ते दयाई सेई कम केरतन, तैना जलन न केरन, तैना अपनि बडीयाई न केरन, ते न घमण्ड केरन।

5 तैना होरन बेइज्जत न केरन, तैना खुदगरज न भोन, जल्दी क्रोध न केरन ते जैना बुरी गल्लां तैन केरे खलाफ भोइ, तैन तैना याद न केरन। ते तैन केरे खलाफ जैना पाप केरतन तैना, तैन बडे आसान तरीके सेई माफ केरतन।

6 तैना खुश न भोन जैखन लोक बुरु केरतन, पन तैना तैखन खुश भोतन जैखन लोक तैन केरतन जैन ठीक ते सच्चू।

7 तैना सब गल्लां झैल्लतन, प्यार विश्वास कधी न गुवाए, ते असन परमेशरे पुड़ भरोसो केरनेरे काबल बनाते, मुशकलन ते तकलीफन मां सबर रखते।

8 भविष्यवेनी ते गैर भाषां ते खास ज्ञान बेकार भोलू। पन प्यार हमेशारे लेइ रालो!

9-10 किजोकि इशू ज्ञान ते इशू भविष्यवाणी केरनेरी काबलीत अर्धीए, पन जैखन सिद्ध एज्जेलो, त जैन अधूरुए तैसेरी जरूरत नई।

11 इन मैनेरे बेडोनेरु जेरु आए। जैखन अवं बच्चो थियो, त बच्चां केरो जेरो जौतो ते सोचतो ते समझतो थियो। पन जैखन अस बड्डे भोतम, त बच्चां केरि गल्लां शारतम।

12 एन्त्रेरे असन सेई भी आए जैना अस विश्वास केरतम, किजोकि अस तैस मैनेरे जेरे आम जै खराब शीशे मां शकल हेरते, (किजोकि अस सब किछ रोडे चारे न ज्ञानम) सिर्फ एजनेवाले वक्ते मां,

अस सब किछ समझमेले, एल्हेरेलेइ असेई परमेशर आमने सामने हेरनोए । हुना मेरू ज्ञान पूरू नई । पन तैस एजनेवाले वक्ते मां (जैखन तै दिहाड़ी एज्जेली) रोडेचारे जैनेलो, परमेशर भी मीं ज्ञानेलो ।

13 लिहाज्जा, हुनी, ट्लाई किसमां केरि चीजन जैना असेई जरूरी केरनिन, परमेशरे पुइ विश्वास, परमेशरेरे वादन पुइ उमीद, ते परमेशरे ते होरन सेइं प्यार । पन इन ट्लाई गल्लन मां जै महाने, तै ई आए: परमेशरे ते होरन सेइं प्यार केरन ।

14

?????????????? ?? ??? ???? ?

1 एककी हारि सेइं प्यार केनेरी कोशिश केरा । ते आत्मिक वरदानां केरि बड़ी इच्छा रखा, खास केरतां इन, कि भविष्यवाणी केरा ।

2 किजोकि, जै गैर भाषाई मां गल्लां करते; तै मैनन् सेइं नई, बल्के परमेशरे सेइं गल्लां करते; एल्हेरेलेइ कि तैसेरी कोई न समझे; किजोकि तै भेदेरी गल्लां पवित्तर आत्मारे शक्ति सेइं ज्ञोते ।

3 पन जै परमेशरेरे तरफां सन्देशे शुनाते, तै विश्वासी लोकन, विश्वासे मां मज्जबूत भोनेरे लेइ मद्दत करते, ते हारि विश्वासी लोकां केरि हिम्मत बढ़ाते ते तस्सली देते ।

4 जै गैर भाषाई मां ज्ञोते, तै अपने विश्वासे मज्जबूत करते । पन जै भविष्यवाणी केरते, तै कलीसियारे विश्वासी लोकां केरे विश्वासे मज्जबूत केरते ।

5 अवं चाताई, कि तुस गैर भाषाई मां गल्लां केरा, पन जादे इन चाताई कि भविष्यवाणी केरा: किजोकि अगर गैर भाषा ज्ञोनेवालो कलीसियारे विश्वासी लोकां केरे विश्वासे मां मज्जबूत भोनेरे लेइ तरजमो न केरे त भविष्यवाणी केरनेवालो तैस करां जादे खास कम केरि रावरोए ।

6 एल्हेरेलेइ हे दलाव ते बेडनव, अगर अवं तुसन कां एइतां गैर भाषाई मां गल्लां केरि त तुसन मीं करां कुन फैडदो भोलो । पन अगर अवं प्रकाश या खास ज्ञान, या परमेशरेरो सन्देशे शुनेई या शिक्षा देई त इस सेइं तुशशी मद्दत भोली ।

7 एन्चरे, अगर तुस बाजो बजाथ जेन्चरे बेइशोई या सारंगी, अगर तैन रोडे चारे न बजाव गाए त जैन बजाव लावरू गाने त तैन केन्चरे पिशानेले बेइशोई या सारंगी मां कुन लावरू बजने ।

8 जंगी मां अगर नइशिनोरी आवाज साफ न भोए, त फौजी जंगरे लेइ तियार न भोइ सकन ।

9 एन्चरे, जैखन तुस तैना गल्लां केरथ जैना हारि लोकन समझ न एजन, त जैन किछ ज्ञोवं गाते तैसेरी कोई कीमत नई ।

10 दुनियाई मां बेइ भाषा आन, त हर भाषारो मतलबे ।

11 पन अगर अस तैस भाषाई न समझम जै होरे ज्ञोने लोरेन, त एन एरू भोलू, कि जेन्चरे तैना इशशे लेइ परदेशी भोले ते अस तैन केरे लेइ परदेशी भोले ।

12 एन्चरे तुस भी जैखन पवित्तर आत्मारे वरदानां केरे लेइ बड़ी इच्छा रखतथ, त तैन वरदानां केरि इच्छा रखा जैन सेइं कलीसियारे विश्वासी लोक विश्वासे मां मज्जबूत भोन ।

13 एल्हेरेलेइ जै गैर भाषा केरते, तै प्रार्थना केरे, कि जैन किछ तैने ज्ञोवं, तैसेरो मतलब समझेनेरे कावल भी भोइ सके ।

14 किजोकि अगर अवं गैर भाषाई मां प्रार्थना केरने लोरोई, त मेरी आत्मा प्रार्थना केरतीए, पन मेरी सोचरे लेइ फैडदो नई, किजोकि इन मीं समझ न एज्जे ।

15 त फिरि मीं कुन कियोरू लोडे? एरो भी वक्ते भोते जैखन मीं अपने आत्माई सेइं प्रार्थना कियोरी लोडे, एरो वक्ते भी भोते जैखन मीं अपने अक्ली सेइं भी प्रार्थना कियोरी लोडे । किछ वक्ते मीं अपने आत्माई सेइं गीतां ज्ञोवरां लोडे, ते हारि वक्ते मीं अक्ली सेइं भी गीत ज्ञोवरां लोडन ।

16 मन्ना कि जैखन किछ आम मैन्हु तुशशे आराधनाई मां एजन, जैखन तुस अपने आत्माई सेइं परमेशरी बडयाई केरथ । अगर तैना तुशशी न समझे, त तुशशे परमेशरू शुकर केरनेरे बाद तैना केन्चरे बुझेले कि किताली, “आमीन” ज्ञोनू, किजोकि तैना न समझे तुस कुन लोरेथ ज्ञोने ।

17 तुशू परमेशेरू शुक्र करनू रोडूए, पन इन होरि केरे विश्वासे मज़बूत केरनेरे लेइ मद्दत न केरेलू ।

18 अवं अपने परमेशेरू शुक्र केरताई, कि अवं तुसन सेबन करां जादे गैर भाषां केरताई ।

19 पन कलीसियाई मां गैर भाषा केरने मां दश हज़ार गल्लां केरे ज़ोनेरे केरतां इन मीं होरू भी रोडू लगते, कि होरन शिखालनेरे लेइ अक्ली सेइं पंचे गल्लां ज़ोई ।

20 हे दूलाव ते बेइनव, तुस इना गल्लां समझने मां बच्चे न बना, पन बुरैई केरनेरे लेइ बच्चां केरे बना, पन इस किसमेरी गल्लां समझनेरे लेइ समझदार बना ।

21 कानूने मां प्रभु ज़ोते;


“अवं बखलां केरे ज़िरिये ज़ोइलो,
ज़ैना गैर भाषां केरेले, पन फिरी भी तैना मेरी न शुनेले ।”

22 एल्हेरेलेइ असन मरां किछ् गैर भाषा केरन ज़ै पवित्र आत्मारो तरफां आए, इशे शब्द तैन लोकां केरे लेइ प्रभुएरे शक्तिरो निशाने, ज़ैना प्रभु पुइ विश्वास न केरन ।

23 ते अगर कलीसिया एक्की ठेरी अकोट्टी भोए, ते सब गैर भाषा केरन, त आम लोक ज़ैना ई भाषा न समझन या गैर विश्वासी लोक अन्तर एजन त कुन तैना इन न सोचले कि तुस पागल आथ ।

24 ते अगर सब भविष्यवाणी केरन, ते आम लोक या गैर विश्वासी लोक अन्तर एजन, त तैन एसास भोलो कि तैना पापिन, ते ज़ैन तैनेई ज़ोवं तैसेरे वज़ाई सेइं अपनि बत बदलेले ।

25 ते परमेशेरूरे सन्देशे सेइं तैन एसास भोलो कि तैनेई बुरू कियोरू तैन केरे मनेरे भेद बांदो भोइ गाले, ते तैन एसास भोलो कि तैना पापी आन त कने पापन करां मन फिराले । ते तैना मथ्यो टेकतां परमेशेरूरी आराधना केरेले, ते मनेले कि परमेशर तुसन मां आए ।



26 हे दूलाव ते बेइनव कुन कियोरू लोडूए? ज़ैखन तुस आराधना केरने लेइ अकोट्टे भोतथ, त किछ् भजन ज़ोन, किछ् उपदेश देन, ते किछ् ज़ैन प्रकाशन परमेशेरूरे तरफां आए तैस देन, ते किछ् गैर भाषाई मां गल्लां केरन ते किछ् तैसेरो तरजमो केरन, तुस इन सब एल्हेरेलेइ केरा कि कलीसियारे लोकन विश्वासे मां मज़बूत भोनेरे लेइ मद्दत भोए ।

27 अगर कोई गैर भाषाई मां ज़ोने लोरोए, त दूई या ट्लाई ज़ने बैरी-बैरी सेइं ज़ोन, ते इन ज़रूरी कि अक मैन्दू तैस भाषारो मतलब ज़ोए ।

28 पन अगर तरजमो केरनेबालो न भोए, ते गैर भाषा ज़ोने बालो कलीसियाई मां चुप राए, ते चुपचारे अपने मने सेइं परमेशेरू सेइं गल्लां केरे ।

29 नेबन मरां दूई या ट्लाई ज़ोन, इन ज़रूरी आए कि हर कोई शुने, ते सोचन ते परखन कि ज़ैन किछ् ज़ोवं लोरू गाने सही आए या नई ।

30 पन अगर कोई ज़ै तैड़ी सभाई मां बिशोरुए, तैस परमेशेरूरे तरफां सन्देश मैल्ले, त ज़ै ज़ोने लोरोए तै चुप भोए, ते तैस ज़ोने दे ।

31 किजोकि तुस सब अक-अक भविष्यवाणी केरि बटतथ, पन अक-अक भोइतां ताके सब शिखन, ते हिम्मत बद्धे ।

32 ज़ै नबी परमेशेरूरो सन्देशे शुनाते, तै अपने आपे वशे मां रखते । तै इस काबले कि अपने मेज़ीं सेइं ज़ोई बटते ते चुप रेइ बटते ।

33 किजोकि परमेशर गड़बड़ केरनेबालो नई, पन शान्ति देनेबालोए; ई तै कानूने ज़ैस परमेशेरूरे सैरी कलीसियारे लोक मन्तन ।

34 कुआन्शां कलीसियारे सभाई मां चुप रान, किजोकि तैन गल्लां केरनेरो हुकम नई, ज़ेन्चरे कानूने मां लिखोरू भी आए ।

35 ते अगर तैना किछ् सवाल पुच्छने चान, त सभाई मां न पुच्छन पन घरे अपने-अपने मुन्शन पुच्छन, किजोकि कलीसिया मां कुआन्शां केरि जादे गल्लां केरनि ठीक नई ।

36 एरू किजो आए तुसन मरां किछ् लोक पेइले ज़ोरे नियमन किजो न मन्नु चान? कुन तुस सोचतथ कि तुस पेइले लोक आथ ज़ैनेई परमेशेरू वचन दित्तू? या सिर्फ तुसन दित्तू?

37 अगर कोई मैन्हु अपनो आप नवी समझे, या इन समझे कि मीं पवित्र आत्मारे तरफां वरदान मैलोरूए, त इन समझे, कि ज़ैना गल्लां अवं तुसन लिखताई, तैना प्रभुएरे हुक्मन।

38 पन अगर कोई इन गल्लन न मन्ने, त तैन पुड़ विश्वास न केर।

39 एल्हेरेलेइ हे द्लाव ते बेइनव, भविष्यवाणी केरनेरी बड़ी इच्छा रखा, ते गैर भाषाई केरनेरे लेइ न टाका।

40 पन तैन सब किछ् ज़ैन तुस कलीसियाई मां केरतथ तरीके सेइं कियूं गाए।

15

~~~~~

1 हे द्लाव ते बेइनव, अवं तुसन तैए खुशखबरी याद कराताई ज़ै मीं तुसन शुनावरी थी, ते ज़ैस सन्देशे पुड़ तुसेई विश्वास कियोरो थियो, ते ज़ैस पुड़ तुस तुसेई लगातार भरोसो रखबोरुए।

2 अगर तुस तैस खुशखबरी पुड़ लगातार विश्वास केरते राले, ज़ै मीं प्रचार की, त परमेशर तुसन बज्जालो। नई त तुशशो विश्वास केरनो बेफैइदो भोव।

3 एल्हेरेलेइ मीं तुसन खास सन्देश दित्तो, ज़ै मीं प्रभु यीशु मसीह करां मैल्लो। तै सन्देश ई आए, कि पवित्रशास्त्रेरे मुताबिक यीशु मसीह इशशे पापां केरे लेइ मरो

4 ते दवो जेव, ते पवित्रशास्त्रेरे मुताबिक टलेइयोवं दिहाड़े मुड़दन मरां ज़ींतो भोव।

5 ते कैफा (यानी पतरस) ते 12 चलन लेइहोव।

6 फिरी 500 करां जादे चलन एक्की साथी लेइहोव, ज़ैन मरां हेजू बड़े ज़ींतन ते किछ् मेरि ज़ोरेन।

7 फिरी याकूबे लेइहोव फिरी सेब्भी परेरितन लेइहोव।

8 ते आखरी मां तैनी अपनो आप मीं पुड़ भी पुड़ बांदो कियो, अवं ज़ै तैस वच्चेरे ज़ेरो आई ज़ै ठीक वक्ते पुड़ नई ज़र्मोरू।

9 किजोकि अवं परेरितन मरां सेब्बना निकोडोई, बल्के परेरित ज़ूवानेरे कावल भी नई, किजोकि अवं परमेशेरे कलीसियारे विश्वासी लोकन सतातो थियो।

10 पन परमेशेरे अनुग्रह सेई अवं परेरित आई। ते तैसरो अनुग्रहरो अस्सर ई भोव कि, मीं तैन होरि परेरितन करां बेद्धतां मेहनत भी की, ते ई मेहनत मीं अपने तरफां न की, बल्के परमेशेरे मेरी मद्दत की, कि अवं इन केरि।

11 ते चाए अवं भोइ, चाए होरे परेरित भोन, अस तैस मसीहेरे बारे मां सन्देश प्रचार केरतम, ते इस्से पुड़ तुसेई भी विश्वास कियो।

~~~~~

12 एल्हेरेलेइ हुनी अवं पुछ्छताई, ज़ैखन मसीहेरो ई प्रचार कियो गाते, कि तै मुड़दन मरां ज़ींतो भोव, ते तुसन मरां किछ् किजो ज़ोतन, कि मुड़दां केरू ज़ींतू भोनू अथ्थी नई?

13 अगर मुड़दां केरू ज़ींतू भोनू अथ्थी नई, ते फिरी मसीह भी नई ज़ींतो भोरो।

14 ते अगर मसीह भी मुड़दन मरां ज़ींतो नई भोरो, त फिरी इशशो सन्देश प्रचार केरनो भी बे फैइदोए; ते तुशशो मसीह पुड़ विश्वास केरनो भी बे फैइदोए।

15 अगर मुड़दे ज़ींते न भोन, त असेई इन ज़ोइतां परमेशेरे बारे मां झूठ ज़ोवं, कि परमेशेरे मसीह ज़ींतो कियो ज़ैन तैनी हकीकत मां नई कियोरू।

16 अवं दुबारां फिरी ज़ोताई, अगर कोई मुड़दन मरां ज़ींतो न भोए, ते फिरी मसीह भी मुड़दन मरां ज़ींतो नई भोरो।

17 ते अगर मसीह मुड़दन मरां ज़ींतो नई भोरो, त तुशशो मसीह पुड़ विश्वास भी बे फैइदोए, ते तुस हेजू तगर अपने पापन मां ज़ींते लोरेथ।

18 बल्के ज़ैना मसीह पुड़ विश्वास केरनेबाले मरेंन, तैना भी नाश भोए।

19 अगर अस सिर्फ इस ज़िन्दगी मां मसीह करां उमीद रखतम ते फिरी अस सेब्भी मैनुन् करां नुभागम ।

20 पन सन्न त इन आए कि परमेशेरे मसीह मुडदन मरां इन साबत केरनेरे लेइ ज़ीतो कियोरो, ते ज़ैना मर्रन, तैन मां पेइलो फल भोए ।

21 किजोकि ज़ैन पेइले मैने यानी आदमे कियूं, तैसेरे वजाई सेइं सब मैन्हु मरे, एन्त्रेरे ज़ैना विश्वासी लोक एजनेबाले वक्ते मां मुडदन मरां ज़ीते किये गाले, तैन भी एक्की मैनेरे केरनेरे वजाई सेइं आए, ते तै मैन्हु मसीह आए ।

22 एल्हेरेलेइ एक्की मैनेरे पापेरे यानी आदमेरे वजाई सेइं सब मैन्हु मरतन, तेन्त्रेरे एक्की मैनेरे केरनेरे सेइं यानी यीशु मसीहे वजाई सेइं सारे फिरी मुडदे ज़ीते किये गाले ।

23 पन हर कोई ठीक तरीके सेइं ज़िन्दगरे लेइ वापस एज्जेलो, पन मसीह मुडदन मरां ज़ीतो भोनेबालो पेइलोए, फिरी ज़ैन लोकां केरो रिशतो तैस सेइं साथी आए, तैना भी ज़ीते भोले ।

24 एसेरां पत्ती, मसीह सैरी दुष्ट शेक्ति नाश केरेलो ज़ैना परमेशेरी खलाफत केरतन । ते दुनियारां खातमां भोलो । तैखन मसीह, अपने बाजी परमेशर अपनू राज, राज केरनेरे लेइ पूरे तरीके सेइं देलो ।

25 मसीहे तेइस तगर राजेरू ज़ेरू राज केरनू ज़रूरीए, ज़ांतगर परमेशर तैसेरे सारे दुश्मन् तैसेरे अधीन न केरे ।

26 सेब्भना आखरी ज़ै दुश्मन खतम कियो गालो तै मौते ।

27 ज़ैखन पवित्तरशास्त्र ज़ोते परमेशेरे सब किछ तैसेरे अधीन मां केरेलो त इस मां परमेशर नई, किजोकि सब किछ मसीहेरे अधीन केरनेबालो परमेशेरे ।

28 ते सब किछ परमेशेरे मट्ठेरे अधिकारे मां केरनेरे बाद, तैखन तै अपनो आप रोडे चारे परमेशेरे अधिकारे मां केरेलो, ज़ैने तैस अधिकार दित्तो । सिर्फ परमेशर अकैल्लो प्रभुए तैए हर एक्की मां, ते हर गल्ली मां कम केरते ।

29 हुनी तुस इस बारे मां सोचा, तुसन मां किछ एरे आन ज़ैना मर्र लोकां केरे लेइ बपतिस्मो नेतन, ते कोई तैन बपतिस्मो देते, अगर जेन्त्रेरे किछ लोक ज़ोतन, विश्वासी लोक मुडदन मरां ज़ीते नई भोने, त फिरी एन केरनेरी कोई कीमत नई ते फिरी एन केरनेरी वजा नई ।

30 ते इश्शे लेइ, अगर मुडदे ज़ीते किये गान त अपनो आप खतरे मां रखनो बेवकूफी आए ।

31 हे दूलाव ते बेइनव, इन पक्कू आए कि तुश्शे बारे मां घमण्ड केरताई, किजोकि तुस इश्शे प्रभु यीशु मसीह मां आथ, इन भी पक्कू आए कि अवं रोज मौतरे खतरे मां राताई ।

32 मीं इफिसुस नगरे मां बेइ तैन केरे वजाई सेइं मुशकलां झैल्ली ज़ैना मेरी खलाफत केरते थिये, तैना जंगली जानवरां केरे ज़ेरे थिये । लोकां केरे खियाले सेइं मीं तैन मुशकलन सेइं कुन हासिल कियूं? किछ भी नई । एल्हेरेलेइ इन साफे कि मुडदे दुबारां ज़ीते न किये गान, त इन रोडूए ज़ैन लोक ज़ोने लोरेन, “एज्जा, खाम पीम, किजोकि असेईं कालां मरनू आए ते इन सब खतम भोनू ।”

33 ज़ैना एरी गल्लां ज़ोतन तैन केरे वजाई सेइं बेवकूफ न बना, “बुरी संगती रोडे चाल-चलने बगाडतीए ।”

34 तुस अपने सोचरे रोड़ी बत्तां वापस एज्जा ते पाप केरनो शारा । किजोकि तुसन मां किछ एरे आन ज़ैन केरो रिशतो परमेशेरे सेइं साथी नई । अवं तुसन छिथानेरे लेइ इन ज़ोताई ।

~~~~~

35 पन किछ पुछतन, “कि मुडदे केन्त्रेरे ज़ीते भोतन, ते केरहे जिसमे मां एडतन?”

36 हे बे समझाव, बीजे पुड ध्यान देथ, ज़ैखन बीज बेवं गाते, त पोदो बन्ने करां पेइलू तैस मरनू पते ।

37 ते ज़ैन तू बेतस, चाए इन गेहुं भोन या होरू किछ । इन ज़ै भोनेबालो पोदोए एन तैसेरू ज़ेरू नई ।

38 तैस बेनेरे पत्नी परमेशर तैस एपनी मेरजरे मुताबिक बडाते ज्ञातगर गेहुं केरि या होरि आन्नेरे डाल बांदे न भोन ।

39 इस दुनियाई मां हर जीती चीजां अलग-अलग आन इन सेब्मी केरो जिसम अक्कां ज़ेरे नई । मैन्हु केरो जिसम केरो जिसम जानवरां केरो ज़ेरो नई । च़ल्लोडू केरो जिसम, मेछली केरो जिसम करां अलगे ।

40 ज़ेन्च़रे इस धेरतली पुड बडे किसमां केरे जिसम भोतन तेन्च़रे अम्बरे मां भी दिहाडो चाँदनी, ते तारे आन, पन अम्बेरी चीजां केरि शोभा होरि ज़ेरीए ते धेरतरे चीजां केरि शोभा होरि ज़ेरी आए ।

41 ते दिहाड़ेरी शोभा होरीए, चँदनरी शोभा होरीए, ते तारां केरि शोभा होरीए, किजोकि तारे-तारेरी शोभाई मां फ़र्के ।

42 मुडदां केरू ज़ीतू भोनु भी एरू आए । ज़ै जिसम नाश भोनेरे हालती मां दबो गाते, पन ज़ैखन ज़ीतो कियो गालो त कधी नाश न भोलो ।

43 ज़ैखन अस मरतम (इश्शो जिसम) बदसूरत ते कमज़ोर भोतन । पन ज़ैखन तै दुबारां ज़ीतो भोतो त तै बडे खूबसूत ते मज़बूत भोते ।

44 ज़ेन्च़रे इश्शे जिसमे मास ते खूने सेई आन, एरे जिसम आन ज़ैन परमेशेरो आत्मा ज़िन्दगी देते । ते इश्शे जिसम ज़ै मासे त कने खूनेरोए तैस जिसमे मां बेदलोलो, ज़ै परमेशेरो आत्माए तरफ़ां दित्तो गाते ।

45 पवित्रशास्त्रे मां इन भी लिखोरूए, “कि पेडलो मैन्हु, मतलब आदम, ज़ीतो प्राणी बनो,” त आखरी आदम, यानी मसीह, हमेशारी ज़िन्दगी देनेवालो बनो ।

46 मासे ते खूने सेई साथी पेडले जिसम वजूदे मां आए फ़िरी तैना जिसम ज़ैना परमेशेरो आत्मा देते ।

47 पेडलो मैन्हु ज़मीनरो मतलब मित्ती सेई बनोरो थियो, तेन्च़रे दुइयोव मैन्हु यानी मसीह, स्वर्गेंरां ओरो थियो ।

48 लोक ज़ैना इस धेरतरेन तैना धेरतरे पेडले मैन्हु आदमेरे ज़ेरेन । पन ज़ैना लोक स्वर्गेरिन तैना स्वर्गेरि मैन्हु यानी मसीहेरे ज़ेरे आन ।

49 ते ज़ेन्च़रे असेई तैसेरू रूप ज़ै मितारो थियू धारण कियू, तेन्च़रे तैस ज़ै स्वर्ग़ेरोए तैसेरू रूप धारण केरमेले ।

50 हे दूलाव ते बेडनव, इश्शे जिसम इस धेरती पुड मास ते खूने सेई बनोरो भोते, अस एरे ज़ेरे जिसमे सेई साथी स्वर्गे मां परमेशेरे राज़े मां रानेरे काबल न भोलें । अस स्वर्गे मां अपने मरने वाले जिसमे सेई साथी न रेड बटमेले, ज़ै मरते, किजोकि तैडी कोई मौत नई ।

51 शुना, अवं तुसन सेई भेदेरी गल ज़ोताई, अस सब नई मरने, पन ज़ैखन आखरी नइशिंगेरी आवाज़ भोली, त अस सब एक्की पले मां बेदलोनेम,

52 ते इन एक्की पले मां, ज़ेन्च़रे कोई चिप केरते, ज़ैखन आखरी नइशिंगो बजाव गालो त ज़ैना मरें थिये तैना ज़ीते भोनेन ताके हमेशारे लेड ज़ीते रान, ते अस ज़ैना ज़ीतेम, इश्शे जिसम बेदलोनेन ।

53 किजोकि इश्शो जिसम ऐसैनी सेई मरते ते शडते, ते ई तैस जिसमे मां बेदलोई गालो ज़ै कधे न मरे ते न शडे ।

54 ज़ैखन इन भोलू, तैखन पवित्रशास्त्रे मां लिखोरू परमेशेरेरू तैन वचन पूरू भोलू, ज़ैन ज़ोते, “मौत रोडे च़ारे हाराई गाली ते तैसेरू कोई वजूद न रालू ।”

55 एन्च़रे ज़ैन पवित्रशास्त्रे मां लिखोरू तैन पूरू भोलू,

“हे मौत तेरी ज़ीत कोडि राई?

हे मौत तेरो डस कोडि राव?”

56 मौती तकलीफ़ देनेरी शक्ति पापे करां मैलतीए, ते पापे कानूने करां शक्ति मैलतीए ।

57 पन परमेशेरेरू शुक्र भोए, ज़ै इश्शे प्रभु यीशु मसीहेरे ज़िरिये पापे ते मौत पुड ज़ीत देते ।

58 हे मेरे दलारे दूलाव ते बेइनव, विश्वासे मां मजबूत राथ ते गलत शिक्षाई सेइं न टेपलोथ, ते हमेशा प्रभुएरू कम जोशे सेइं केरा, किजोकि तुस इन ज्ञानतथ, कि जैन किछ तुसेईं प्रभुएरे लेइ कियूं तैन वेफेइद् नईं ।

## 16

~~~~~

1 हुनी तुश्र तैस चन्देरे सवालरे बारे मां जे यरूशलेम नगरेरे परमेशेरेरे लोकां केरे लेइ कियो गाते, तुसेईं भी तेन्चरे कियेरू लोडे जेन्चरे मीं गलातियारे कलीसियान हुक्म दिवतो ।

2 हफतेरे पेइले दिहाडे तुसन मरां हर कोई अपने आमदनेरे मुताबिक किछ एप्पू कां रखा, कि मेरे एजने पुइ चन्दो अकोट्टो न केरनो पे ।

3 जैखन अवं तैडी भोईं, अवं किछ लोकन भेजेलो जैन तुस चुनेले कि एना भरोसेरे काबलन, चन्दो धिन्तां यरूशलेम नगरे जो गान । अवं तैन कां चिट्टी भी भेजेलो ताके विश्वासी लोक तैन केरे बारे मां ज्ञानन् ।

4 ते अगर मेरू भी गानू जरूरीए, त तैना मीं सेइं साथी गाले ।

~~~~~

5 ते मकिदुनिया गानेरे बाद अवं तुसन कां एज्जी रावराई, किजोकि मीं मकिदुनिया मेइं गानेरो विस्तार बनोराए ।

6 भोइ सकते, अवं तुसन सेइं साथी किछ चिरे रुकेलो, शैइद पूरे हिवतडो, फिरी तुस जेरां मीं गानू भोल्, तेरहां मीं भेज्रां ।

7 अगर ई परमेशेरी मर्जी भोली, ते मीं उमीदे अवं बादे मां जादे चिरेरे लेइ तुसन कां एज्जेलो, न कि इस वक्ते थोडे चिरेरे लेइ ।

8 पन अवं पेन्तिकुसत तिहारे तगर इफिसुस नगरे मां रानोईं ।

9 किजोकि मीं बडो रोडो रोडो मौको मैलोरे जैस सेइं अवं तैन कम केरि सकताई जेसेरो अस्सर बडोए, चाए बडे लोक मेरी खलाफत केरनेवाले आन ।

10 अगर तीमुथियुस एज्जे, त तैस कबूल केरा, तैसेरी रोडे चारे आदर केरा, किजोकि तै मेरो जेरो प्रभुएरू कम केरते ।

11 एल्हरेलेइ कोई तैस घटिया न समझे, पन तैन केरे सफेरेरे लेइ जै जरूरेते तैन खुशी सेइं देथ । ताके मीं कां एज्जन, किजोकि अवं तैस लोरोईं बलगने, कि तै विश्वासी दूलान सेइं साथी एज्जे ।

12 ते विश्वासी साथी अपुल्लोसे सेइं मीं बडी बिनती की, कि तुसन कां होरि विश्वासी मैनन् सेइं साथी गाए जैना तुसन सेइं मिलने ओरेन । पन तैनी इस वक्ते गानू न चाव, पन जैखन ठीक वक्त भोलो, तैखन एज्जेलो ।

~~~~~

13 खबरदार राथ, विश्वासे मां मजबूत भोथ, हिम्मत रखा, मजबूत भोथ ।

14 जैन किछ केरतथ तैन प्यारे सेइं केरा ।

15 हे दूलाव ते बेइनव, तुस स्तिफनासेरे टब्बरे ज्ञानतथ, कि तैना अखाया इलाकेरे, पेइले मसीह पुइ विश्वास केरनेवालेन, ते परमेशेरेरे लोकां केरि महत केरनेरे लेइ जैन किछ केरि बटते थिये तैनेईं तैन कियूं ।

16 अवं तुसन कां बिनती केरताई कि एरे लोकां केरे अधीन राथ, बल्के तैन केरे भी जैना इस कम्मे मां मेहनत केरतन ते महत केरनेवालन ।

17 ते अस स्तिफनास ते फूरतूनातुस ते अखइकुसेरे एजने सेइं खुश आई, किजोकि जेइस तुस इडी न थिये, तैनेईं मेरी जरूरतां पूरी केरनेरे लेइ मेरी महत की ।

18 जेन्चरे तुसेईं अवं खुश कियो, तेन्चरे तैनेईं भी अवं खुश कियो, एल्हरेलेइ एरे लोकां केरि तारीफ केरा ।

19 आसिया इलाकेरे कलीसियां केरे सारे विश्वासी लोकां केरे तरफां तुसन नमस्कार; अक्वला ते तैसेरी कुआन्श पिरस्कारे तरफां ते तैन केरे घरे कलीसियाई भी तुसन प्रभु मां हछु-हछु नमस्कार ।

20 इट्टेरे विश्वासी लोक तुसन नमस्कार ज़ोतन, मसीहेरे प्यारे सेइं एक्की होरि जो नमस्कार केरा ।

21 अवं पौलुस अपने हथ्थे सेइं नमस्कार लिखताई ।

22 अगर कोई प्रभु सेइं प्यार न रखे तै लानती भोए, हे इश्शे प्रभु एई !

23 प्रभु यीशुएरो अनुग्रह तुसन पुड़ भोतो राए ।

24 अवं तुसन सेबन सेइं प्यार केरताई ज़ैन केरो रिश्तो यीशु मसीह सेइं साथीए । आमीन ।

2 कुरिन्थियों

XXXXXXXXXX

1 अवं पौलुस परमेशेरे मेर्जी सेइं यीशु मसीहेरो परेरिताई, मेरे त कने ढला तीमुथियुसेरे तरफां ई चिट्ठी परमेशेरेरी तैस कलीसियारे नंवे, जै कुरिन्थुस मांए, ते सारे अखाया इलाकेरे सब पवित्र लोकां केरे नंवे,

2 इश्शे बाजी परमेशर ते परभु यीशु मसीहेरे तरफां तुसन अनुग्रह ते शान्ति मैलती राए।

XXXXXXXXXX XXXXX XXXXX

3 परमेशेरू शुक्र भोए जै इश्शे परभु यीशु मसीहेरो बाजी, जै दया केनेवालो बाजीए, ते जै असन हमेशा तसल्ली देनेवालो परमेशर।

4 तै इश्शे सेब्भी मुसीबतन मां असन तसल्ली देते; ताके अस तैस तसेल्लेरे वजाई सेइं जै परमेशर असन देते, तैन भी तसल्ली देइ बटम, जैना कोन्वी वजाई सेइं मुसीबतन मां आन।

5 किजोकि जेन्चरे मसीहे दुःख झैलोरेन तेन्चरे अस भी दुःख झैल्लतम, एल्हेरेलेइ असन तसल्ली भी मसीहेरे जिरिये जादे भोतीए।

6 अगर अस दुःख झैल्लतम, ते ई तुश्शे तसल्लेरे ते तुश्शे मुक्तेरे लेइए ते अगर असन तसल्ली मैलतीए, ते ई तुश्शे तसल्लेरे लेइ आए; जेसेरे अस्सेरे सेइं तुस सबरी सेइं तैना दुखन झल्लतथ, जैना अस भी झल्लतम।

7 ते इश्शी उमीद तुश्शे बारे मां पक्कीए; किजोकि अस जानतम, कि जेरे दुःखन तुसेईं असन सेइं साथी झैल्ले, तेरी तसल्ली तुसन भी असन सेइं साथी मैलेली, जै असन परमेशर देलो।

8 हे ढलाव ते बेडनव, अस न चाम कि तुस इश्शे तैस दुखे करां अनजान राथ, जै आसिया इलाके मां असन पुड़ अव, कि एरो भारी बोझ असन पुड़ ओरोए थियो, जै इश्शे लेइ छूनो मुशकिल थियो, इड़ी तगर कि असन अग्रोवं जो ज़िनेरी कोई उमीद न थी।

9 बल्के असेईं अपने मने मां समझोरू थियूं, कि अस मारे गानेम ते अस अपनो भरोसो न रखम, बल्के परमेशेरे पुड़ भरोसो रखम जै मुड़दन जीते केरते।

10 तैने अस एतरे बडे मौतरे खतरे करां बचाए, ते बचालो; ते तैस करां इश्शी ई उमीदे, कि तै अग्रोवं भी बचातो रालो।

11 तुस भी मिलतां प्रार्थनाई सेइं इश्शी मद्दत केरेले, कि जैना बरकतां असन बड़ां लोकां केरे जिरिये मैली, किजोकि परमेशेरे अनुग्रह सेइं इश्शी हाफजतरे लेइ वेड़ि प्रार्थनां शुन्नी, तैल्हेरेलेइ बडे लोक इश्शू भोतू परमेशेरू शुक्र केरन।

XXXXXXXXXX XXXXX XXXX XXX XXXXX XXXXXXX

12 किजोकि अस अपने इस ज़मीरेरे गुवेही पुड़ घमण्ड करतम, कि दुनियाई मां, खास केरतां तुसन मां इश्शो चालचलन परमेशेरे लायिक ते पवित्रतैई ते सचैई सेइं थियो। जै दुनियारे ज्ञाने सेइं नई, बल्के परमेशेरेरे अनुग्रह सेइं साथी थियो।

13 अस हमेशा तुसन इन लिखतम ताके तुस पढथ ते समझथ, ते मीं उमीदे, कि आखरी तगर समझते भी राले।

14 जेन्चरे तुसन मरां केतरेईं मनोरू भी आए, कि अस तुश्शे धुमण्डेरी वजाम; तेन्चरे तुस भी परभु यीशुएरे वापस एजनेरे दिहाड़े इश्शे लेइ घमण्डेरी वजा भोले।

XXXXX XXX XXXXX

15 ते इस भरोस सेइं, अवं चातो थियो कि पेइलो तुसन कां एज्जी; कि तुसन दुगनी बरकत मैल्ले।

16 ते तुसन मेइं निस्तां मकिदुनिया इलाके जो गेईं ते फिरी मकिदुनयारां तुसन कां एज्जी, ते तुस मेरी सफेरी ज़रूरतरे मुताबिक मद्दत केरतां यहूदिया इलाकेरे पासे किछू दूर पुजाथ।

17 एल्हरेलेइ मीं जैने ई इच्छा कियोरी थी कुन मीं चंचलता हिराई? या जैन केरनू चाताई कुन दुनियारे लोकां केरे जेरू केरनू चाताई, कि अवं गल्ली मां हाँ, हाँ भी केरि; नई, नई भी केरि?

18 जेन्चरे परमेशर वफादार, तेन्चरे कि इश्शे तैस वचने मां जै तुसन सेइं ज़ोवं, “हाँ” ते “नई” दुइये न मैल्ले ।

19 किजोकि परमेशेरू मटटू यीशु मसीह जेसेरो इश्शे ज़िरिये मतलब मेरे ते सिलवानुस ते तीमुथियुसेरे ज़िरिये तुसन मां प्रचार भोव; तैस मां “हाँ” ते “नई” दुइये न थी; पन तैस मां “हाँ” ए “हाँ” भोइ ।

20 किजोकि परमेशेरू जेत्ते वादेन, मसीह मां हांए सेइं आन, एल्हरेलेइ मसीहेरे ज़िरिये आमीन भी भोइ, कि इश्शे ज़िरिये परमेशेरू महिमा भोए ।

21 ते जै असन तुसन सेइं साथी मसीह मां मज़बूत केरते, ते जैने इश्शू अभिषेक कियोरूए, तैए परमेशेरू ।

22 जैने असन पुइ छाप भी की, ते जेन्चरे कोन्ची चीज़रे लेइ साईं देतन तेन्चरे तैनी पेइली आत्मा इश्शे मने मां दिती ।

23 परमेशर मेरे इस सच्चेइयरो गवाहे कि अवं कुरिन्थुस नगरे मां दुबारां एल्हरेलेइ नई ओरोए कि अवं तुसन दुःख देनो चातो थियो ।

24 इन नई, कि अस विश्वासेरे बारे मां तुसन पुइ राज़ केरनू चातम; पन तुश्शे आनन्दे मां तुश्शी मद्दत केरनेवाले आम, किजोकि तुस विश्वासे सेइं मज़बूत रातथ ।

2

1 मीं अपने मने मां इन थापेरू थियूं, कि फिरी तुसन कां एइतां तुसन दुख न देई ।

2 किजोकि अगर अवं तुसन दुखी केरि, त मीं आनन्द देनेवालो कौन भोलो, सिर्फ तैए जै मीं दुखी कियोरोए?

3 ते मीं ई गल तुसन एल्हरेलेइ लिखी, कि एरू न भोए, कि मेरे एजने पुइ जैन सेइं आनन्द मैल्लेरो लोइतो थियो, अवं तैन करां दुखी भोई; किजोकि मीं तुसन सेबन पुइ इस गल्लरो भरोसोए, कि जै मेरो आनन्दे, तैए तुश्शो सैरी केरो भी आए ।

4 मीं बड़े दुःख, ते मनरे कष्टे सेइं, बड़े ऐंखरन सेइं तुसन चिट्ठी लिखोरी थी, एल्हरेलेइ नई, कि तुस दुखी भोथ, पन एल्हरेलेइ कि तुस तैस बड़े प्यारे जानथ, जै मीं तुसन सेइं आए ।

~~~~~

5 ते अगर केन्चे दुखी कियोरोई, त अवं नई बल्के (तैस सेइं बड़ी सखती न केरि) किछ-किछ तुस सब दुखी कियोरेथ ।

6 एरे मेनेरे लेइ ई सज़ा जै विश्वासी हलान मरां बड़ेई दिती, सुद्धी आए ।

7 एल्हरेलेइ इस करां इन रोइए कि तैसेरो पाप माफ़ केरा; ते तैस तसल्ली देथ, एरू न भोए कि एरो मैन्हू उदैसी मां डुबे ।

8 एल्हरेलेइ अवं तुसन कां बिनती केरताई, कि तैस अपने प्यारू सबूत देथ ।

9 किजोकि मीं एल्हरेलेइ भी लिखो रू थियूं, कि तुसन पेरखी, कि तुस मेरे सब गल्लां मन्नेरे लेइ तियार आथ या नई ।

10 जैस तुस माफ़ केरतथ तैस अवं भी माफ़ केरताई, किजोकि मीं भी जैन किछ माफ़ कियोरूए, अगर कियेरू भोए, त तुश्शे वजाई सेइं मसीहेरे ठैरी भोइतां कियोरूए ।

11 कि शैतानेरो असन पुइ दावो न चले, किजोकि अस तैसेरी चालन करां अनजान नई ।

~~~~~

12 ते जैखन अवं मसीहेरी खुशखबरी शुनाने तरोआस नगरे मां अव, ते प्रभुए मेरे लेइ अक बत खोल्ली ।

13 त मेरे मने मां चैन न भोइ, एल्हेरेलेइ कि मेरे विश्वासी दूला तीतुसे तुश्शे एट्टां कोई खबर घिन्तां न अव; ते अवं त्रोआसरे विश्वासी लोकन करां अलग भोइतां अवं वापस मकिदुनिया इलाके मां अव ।

████████████████████

14 परमेशेरू शुक्र भोए, जै मसीह मां सदा असन ज़ीतारे जशने मां चलाते, ते अपने ज्ञानेरे खुशबू इश्शे ज़िरिये हर ठेरी फैलाते ।

15 किजोकि अस परमेशेर का मुक्ति मैलने बालां, ते नाश भोने बालन कां, दुइयां केरे लेइ मसीहेरी खुशबू आम ।

16 केत्रा केरे लेइ त मरनेरे मुशक, ते केत्रन जो ज़िन्दगरे लेइ ज़िन्दगरी खुशबू, ते इन गल्लां केरे काबल कौने?

17 किजोकि अस तैन केरे ज़ेरे नई, जैना परमेशेरू वचन पेईसां केरे लेइ प्रचार केरतन, पन अस मनेरी सच्चैई सेइ, ते परमेशेररे तरफां परमेशर हाज़र सेमझतां मसीह मां ज़ोतम ।

3

████████████████████

1 कुन अस दुवारा फिरी अपनि बडयाई करेने लगम? या असेई केत्रा केरि ज़ेरि सुपारशारी चिट्ठी तुसन कां ऐनिन या तुसन करां नेनिन?

2 तुस एप्पू इश्शी लेइ चिट्ठी केरे ज़ेरेथ, जैना इश्शे लेइ सुपारश केरतन, जैना इश्शे दिले पुड लिखोरिथ, तैन हर कोई पेढी सकते ते जैना रोड़ां कम्मां असेई कियोरन, तैन लोक पिशेनी सकतन ।

3 इन बांदूए, कि तुस मसीहेर चिट्ठी केरे ज़ेरेथ, जैना असेई सेवकां केरि ज़ेरि लिखी; ते जैना शैही सेइ नई, पन ज़ीते परमेशेररी आत्माई सेइ घोड़ां केरे तेख्ती पुड नई, बल्के दिलेरे मासरे तेख्ती पुड लिखोरिन ।

4 अस मसीहेरे ज़िरिये परमेशेर पुड एरू याकीन रखतम ।

5 इन नई, कि अस अपने आपे सेइ इस काबलम, कि एप्पू कोन्ची गल्लेरे बारे मां सोची बटम; पन इश्शी काबलीत परमेशेर तरफां आए ।

6 जैनी अस नव्वे करारेरे सेवक भोनेरे काबल भी किये, मूसेरे कानूनेरे सेवक नई बल्के पवित्र आत्मा सेइ; किजोकि मूसेरो कानून न मन्नेरो नितीजो मौत भोते, पन पवित्र आत्मा हमेशारी ज़िन्दगी देते ।

7 ज़ैखन मूसेरो कानून ज़ेसेरे ज़िरिये मौत एइती ज़ेसेरे लफस घोड़ां केरे तेखतन पुड घेइतां लिखोरे थियो, इड़ी तगर महिमा बाले भोए, कि इस्राएली लोक मूसेरे तुतरेरां तेकि न थी बटते, पन तै जादे वक्ते तगर न राव,

8 ते आत्मारो करार होरो भी महिमा बालो किना भोलो?

9 किजोकि दोषी ठहराने बालो करार महिमा बालो थियो, ते धर्मी बाने बालो करार होरो भी महिमा बालो किना भोए!

10 ते ज़ै पुरानो महिमा बालो करार थियो, तै नव्वे करारे करां महिमा बालो न भोव ।

11 किजोकि मूसेरू कानूने ज़ेसेरी महिमा थोड़े वक्तेरे लेइ थी, महिमा बालो थियो, त तै नव्वों करार ज़ै कायम रालो, होरू भी महिमा बालू किजो न भोलो!

12 एल्हेरेलेइ एरी उमीद रेखतां अस दिलेरी सेइ ज़ोतम ।

13 अस मूसेरे ज़ेरे नई, जैने अपने तुतरे पुड पड़दो रखोरो थियो ताके इस्राएली लोक तैस घटने बैली महिमारो अन्त न लहन ।

14 पन तैन केरे मन सखत भोए, किजोकि अज़ तगर पुरानो नियम पढ़ते बार तैन केरे मन्न पुड तैए पड़दो रहते; पन पड़दो सिर्फ तै मसीह पुड विश्वास करेने सेइ उठते ।

15 ते अज़ तगर ज़ैखन भी मूसेरो कानून पढ़ो गाते, ते तैन केरे मन्न पुड सदा पड़दो रहते ते तैन रोडे च़ारे समझ न एज्जे ।

16 पन ज़ैखन भी तैना प्रभु यीशु पुड़ विश्वास केरेले, तैखन तै पड़दो दूर भोलो ।

17 प्रभु त आत्मा आए, ते ज़ैडी भी प्रभुएरो आत्माए तैडी कानून करां आज्ञादी आए ।

18 पन ज़ैखन इश्शे सेब्भी केरे बगैर पड़दे तुतरन सेई प्रभुएरू प्रकाश बांदू भोते, ज़ेन्नेरे शीशे मां, ते प्रभुएरे ज़िरिये ज़ै आत्माए, अस प्रभुएरे महिमा बाले रूपे मां थोड़े-थोड़े बदलते रातम ।

4

एल्हेरेलेइ एगार असन पुड़ एरी दया भोइ, कि असन ई खुशखबरी शुनानेरी सेवा मैल्ली, त अस दिलेरी न शारम ।

1 एल्हेरेलेइ अगर असन पुड़ एरी दया भोइ, कि असन ई खुशखबरी शुनानेरी सेवा मैल्ली, त अस दिलेरी न शारम ।

2 पन असेई शरमराँ छुपोरां कम्मां शारोन, ते न ज़लैकी सेई ज़लते, ते न परमेशेरे वचन मां मलावट केरम । पन परमेशर इश्शो गवाहे कि अस सन्न ज़ोतम, ते हर कोई गवाही देते कि इन सच्चे ।

3 पन अगर इश्शे खुशखबरी पुड़ पड़दोए, त ई नाश भोने बालां केरे लेइए ।

4 ते तैन विश्वास न केनेबालां केरे लेइ, ज़ैन केरे अक्ल इस दुनियारे ईश्वर शैताने कानी कियोरीए, ताके मसीह ज़ै परमेशेरू रूपे, तैसेरी महिमा खुशखबरारी लौ तैन पुड़ न चमके ।

5 किजोकि अस अपनो नई, बल्के यीशु मसीहेरो प्रचार केरतम, कि तै प्रभुए; अस यीशु मसीहेरे वजाई सेइं तुश्शे सेवकम ।

6 एल्हेरेलेइ कि परमेशर तै आए ज़ैनी ज़ोवं, “कि आंधेरे मरां लौ चमके,” ते परमेशेरे इश्शे दिलन मां लोअरी ज़ेरि समझ दिती, कि अस परमेशेरी महिमा पिशानम ज़ै यीशु मसीह मां लेइहोई ।

7 पन अस मितारे भांडां केरे ज़ेरम ज़ैन मां धन रखेरू, कि ई हछ्छी शक्ति इश्शे तरफां नई, बल्के परमेशेरे तरफां भोए ।

8 अस ज़ेवरे पासना दुःख त झल्लतम, पन मुशकली मां न पेम; घबरातम, पन न उमीद न भोम ।

9 सताए त गातम, पन शारे न गाम, बछ्छोडे त गातम पन नाश न भोम ।

10 अस यीशु मसीहेरी मौत अपनि जानी मां हर वक्त ज़लातम; कि ज़ैन किछ्छ अस केरतम तैसेरे ज़िरिये लोक यीशुएरी ज़िन्दगी हेरेले ।

11 किजोकि इश्शे ज़ीते सांसेइं, सदा यीशुएरे वजाई सेइं असन मौतरे खतरो भोतो थियो, कि यीशुएरी ज़िन्दगी भी इश्शे नाश भोनेबाले जानी मां बांदी भोए ।

12 अस त मौतरे खतरे मां ज़ीतम पन इसेरो नितोजो तुश्शे लेइ हमेशारी ज़िन्दगीए ।

13 ते एल्हेरेलेइ कि असन मां तैए विश्वासेरी आत्माए, “जेसेरे बारे मां पवितरशास्त्रे मां लिखेरूए, कि मीं विश्वास कियो, एल्हेरेलेइ मीं ज़ोवं” एल्हेरेलेइ अस भी विश्वास केरतम ते ज़ोतम ।

14 किजोकि अस ज़ानतम, ज़ैने प्रभु यीशु मुड़दन मरां ज़ीतो कियो, तैए असन भी यीशु मसीह मां हिसेदार सेमझतां ज़ीते केरेलो, ते तुसन सेई साथी अपने सामने हाज़र केरेलो ।

15 किजोकि सारे दुःख ज़ैना असन पुड़ आन, तुश्शे लेइ आन, ताके परमेशेरो अनुग्रह जादे करां जादे लोकन मसीह कां आने, ते बड़े लोक परमेशेरू शुक्र केरेले ।

16 एल्हेरेलेइ अस दिलेरी न शारम; अगर इश्शी बेइरीं इन्सानयत नाश भी भोए, त फिरी भी इश्शी एनत्तीं इन्सानयत रोज़ नर्वीं भोती रहतीए ।

17 किजोकि इश्शो एककी पलेरो थोड़ो ज़ेरो दुःख बड़ी ते हमेशारी महिमा पैदा केरते, ज़ेसेरी तुलना केन्वी सेइं न केरोए ।

18 ते अस त लेवरी चीज़न नई पन अलैई चीज़न लाते रातम, किजोकि लेवरी चीज़ां थोड़े दिहाड़ां केरे लेइ आन, पन अलैई चीज़ां हमेशारे लेई आन ।

5

????? ??????????? ??

1 किजोकि अस ज्ञानतम, कि ज़ैखन इश्शो जिसम ज़ै धेरतली पुड़ ते तेम्बेरो ज़ेरो आए मेरतां नाश भोलो, त असन परमेशेरी तरफां स्वर्गे मां अक भवन मैलनोए, ज़ै हथ्यां केरो बनावरो नई बल्के हमेशारोए ।

2 इस मां अस बड़ कर लातम, ते बड़ी इच्छा केरतम; कि असन एरो जिसम मैले ज़ै स्वर्गे घरेरो ज़ेरो भोए ।

3 कि ज़ैखन असन स्वर्गेरो जिसम मैल्ले त अस नगगे न लेइहोम ।

4 ते अस इस तेम्बेरे ज़ेरे घरे मां रेइतां बोझे सेइ देबोइतां कर लाते रातम; किजोकि अस दुनियारो जिसम शारनो न चाम, बल्के इन चातम कि परमेशर असन स्वर्गेरो जिसम दे, ताके ज़ै मरने वालो जिसमे तै न मरे बल्के हमेशारे ज़िन्दगी मां बेदलोए ।

5 ते ज़ैनी अस इस नव्वें जिसमेरे लेइ तियार कियोरेम ज़ै असन मैलनोए, तै परमेशेरे, ज़ैने असन ज़ेन्बरे साई देतन तेन्बरे पवित्तर आत्मा भी दित्तोरोए ।

6 असन सदा पूरू याकीने ते इन ज्ञानतम; कि ज्ञांतगर अस जिसमे मां रातम, तांतगर अस पूरभु करां अलग आम ज़ै स्वर्गे मां आए ।

7 किजोकि अस शकल हेरतां नई, पन विश्वासे सेइ ज़ीतम ।

8 एल्हेरेलेइ अस हिम्मत केरते रातम, ते जिसमे करां अलग भोइतां ज़ैखन अस मरमेले त पूरभु सेइ साथी रानू जादे रोड़ु समझतम ।

9 एल्हेरेलेइ इश्शे मनेरी उमंग ईए, कि चाए अस स्वर्गे मां तैस सेइ साथी रहम, चाए अलग इड़ी धेरती पुड़ रहम पन अस तैस पसंद एइते रहम ।

10 किजोकि ज़रूरीए, कि इश्शो सेब्भी केरो हाल मसीहेरे आदालतरे तखतेरे सामने खुल्ले, कि हर कोन्वी मैन्हु अपने रोड़ां बुरां कम्मां केरो बदलो मैल्ले ज़ैना तैने जिसमे सेइ कियोरन ।

????? ??? ??????? ???????

11 अस पूरभुएरो डर मेन्तां लोकन कां बिनती केरतम कि सच्चे पुड़ विश्वास केरन, ते परमेशर रोड़े च़ारे ज्ञानते; ते मेरी उमीद ईए, कि तुस भी अपने दिले मां असन रोड़े च़ारे ज्ञानथ ।

12 अस फिरी भी अपन बड़याई तुश्शे सामने न केरम, बल्के अस अपने बारे मां तुसन घमण्ड केरनेरो मौको देतम, कि तुस तैन जुवाब देइ बटतथ, ज़ैना मने पुड़ नई, बल्के दिखवटी गल्लन पुड़ घमण्ड केरतन ।

13 अगर कोई ज़ोते कि अस पागलम, त परमेशेरे लेइ अहम; ते अगर कोई ज़ोते कि अस रोड़े अहम त तुश्शे लेइ आम ।

14 किजोकि मसीहेरो प्यार असन मजबूर केरते; एल्हेरेलेइ कि असन याकीने कि ज़ैखन अक मैन्हु सेब्भी केरे लेइ मरो जेव त सब मेरि जे ।

15 ते मसीह एन्बरे सेब्भी केरे लेइ मरो, कि ज़ैना ज़ीते आन, तैना अग्रोवं जो अपने लेइ न ज़ीन पन तैसेरेलेइ ज़ै तैन केरे लेइ मरो ते फिरी ज़ीतो भोव ।

16 एल्हेरेलेइ अज़ेरां पत्ती अस कोन्वी दुनियारे मुताबिक न समझाम, ते अगर असेई भी मसीह दुनियारे मुताबिक ज्ञानोरो थियो त फिरी भी अज़ेरे पत्ती फिरी एरू न ज्ञानम ।

17 ते अगर कोई मसीह मां आए त तै नव्वीं सर्षट आए, पुरेनी गल्लां बीती जेई; हेरा, तैना सब नेव्वीं भोइजेइ ।

18 ते सब गल्लां परमेशेरेरी तरफन, ज़ैने मसीह भेजतां फिरी इश्शो मेल मलाप एप्पू सेइ कराव, ते लोक तैस सेइ मेल मिलाप केरन ई सेवा परमेशेरे असन सौफोरोए ।

19 मतलब परमेशेरे मसीह मां भोइतां एप्पू सेइ साथी दुनियारो मेल मिलाप कियोरोए, ते लोकां केरे पापां केरो दोष तैन पुड़ नई लोरो, ते परमेशेरे मेल मलापेरो बिस्तार असन सौफोरोए ।

20 अस मसीहेरे राजदूत अहम; मन्ना कि परमेशर इश्शे ज़िरिये बिनती करते कि तुस तैसेरो सन्देश कबूल करथ, अस मसीहेरे तरफां बिनती केरतम, कि परमेशरे सेइं साथी मेल मिलाप केरा।

21 मसीह पापे करां अनजान धियो, तैए परमेशरे इश्शे लेइ पापी ठहराव, कि अस परमेशेरी नज़री मां धर्मी बनम किजोकि मसीहे इश्शी पापां केरि सज़ा भुगतोरीए।

6

1 अस ज़ैना परमेशरे सेइं साथी कम करेनेबाले आम ई भी बिनती केरतम, कि परमेशेरो अनुग्रह ज़ै तुसन पुड़ भोरोए, ज़ैया न भोने देथ।

2 किजोकि परमेशर पवित्रशास्त्रे मां ज़ोते,

“कबूल करेनेरे वक्ते मीं तेरी शुनी,
ते मुक्तरे दिहाड़े मीं तेरी मदत की,”

हेरा, हुना तै कबूल करेनेरो वक्ते, हेरा, हुना तै मुक्तरी दिहाड़ीए।

3 अस परमेशरे सेइं साथी कम करेनेबाले केन्ची भी गल्ली मां कोई भी मौको न देम, कि इश्शी सेवाई पुड़ कोई दोष लाए।

4 पन हर गल्ली सेइं परमेशेरे सेवकां केरे ज़ेरे अपने रोड़े गुन्न बांदे केरतम, बड़े सबरी सेइं, दुःख सेइं, शारे गाने मां, मुशकलन सेइं।

5 कोड़े खाने सेइं, कैद भोने सेइं, हैल्लन सेइं मेहनती सेइं, बींझे बिशने सेइं, बरत रखने सेइं।

6 पवित्रतेई सेइं, ज्ञाने सेइं, सबरी सेइं, दयाई सेइं, पवित्र आत्मा सेइं।

7 सच्चे प्यारे सेइं, सच्चे वचने सेइं, परमेशेरे शक्ति सेइं; अस धार्मिकतारे हथियारन इस्तेमाल केरतम, देइने हथ्ये सेइं हमलो करेनेरे लेइ ते खिशड़े हथ्ये सेइं अपनो आप बचानेरे लेइ।

8 ते ज़ैखन लोक इश्शी इज़्जत केरतन या असन बेइज़्जत केरतन, ज़ैखन लोक ज़ोतन अस रोड़ेम या बुरे मैनुम, अस ईमानदारम फिरी भी लोक झूठ ज़ोतम।

9 अनजाना केरे ज़ेरेम; फिरी भी मुशूरम, मरने वालां केरे ज़ेरेम पन हेरा ज़ीतेम, मार खाने वालां केरे ज़ेरेम, पन जानी सेइं न मैरोम।

10 दुःख करेनेबालां केरे ज़ेरेम, पन सदा आनन्द केरतम, कंगालम, पन बड़े लोकन आत्मिक धनी केरतम; एरेम कि असन कां किछ् भी नईं फिरी भी सब किछ् रखतम।

11 हे कुरिन्थिस नगरेरे विश्वास लोकव, असेईं तुसन सेइं खुलतां गल्लां कमेई, अस तुसन सेइं पूरे दिले सेइं प्यार केरतम।

12 इश्शे मने मां तुश्शे लेइ बड़ी ठारे, पन तुश्शे मन्न मां नईं।

13 पन अवं बच्चे सेमझतां तुसन सेइं ज़ोताई, कि तुस भी तैसेरे बदले असन सेइं प्यार केरा।

~~~~~

14 गैर विश्वासी लोकां केरे संगती मां न गाथ, किजोकि धार्मिकता ते अधर्मेरो कुन मेल जोल? या लौ ते आंधेरो कुन साथ?

15 ते मसीहे शैताने सेइं कुन लगाव? या विश्वास करेनेबालेरो विश्वास न करेनेबाले सेइं कुन तालमेल?

16 ते परमेशरे मन्दरेरे मां मूरती केरे लेइ कोई ठार नईं, किजोकि अस त ज़ीते परमेशेरां मन्दर अहम; जेन्नेरे परमेशरे पवित्रशास्त्रे ज़ोवं,

“अवं तैन लोकन साथी रेइलो ते तैन मां चलेलो फिरेलो;

ते अवं तैन केरो परमेशर भोनोंई,

ते तैना मेरे लोक भोले।”

17 एल्हेरेलेइ परभु पवित्रशास्त्रेरे ज़िरिये ज़ोते,

“विश्वास न करेनेबालन मरां निस्सा

ते अलग राथ;

ते अशुद्ध चीज़न करां दूर राथ;

ते अवं तुसन कबूल केरेलो ।

18 ते तुशुशो बाजी भोइलो,

ते तुस मेरां मट्टां ते कुइयां भोलां,

इन सर्वशक्तिमान प्रभु परमेशेरू वचने ।”

## 7

1 किजोकि हे टलाराव परमेशेरु वादो कियोरो कि तै असन अपने बच्चां केरे रूपे मां कबूल केरेलो, त एज्जा, अस अपने आपे ते जिसमेरी ते आत्माारी सब गंदगी शुद्ध केरम, ते परमेशेरु डर मेन्तां ते इज्जत केरतां, ते परमेशेरुी बत्तां चलनेरे लेइ पूरे तरीके सेइं पवित्र ज़िन्दगी ज़ीम ।

??????????

2 असन अपने दिल मां ठार देथ, असेईं केन्ची सेइं बेइन्साफी नईं कियोरीए, न केन्चेरू किछ बिगाड़ेरूए, ते न कोई टगगोरोए ।

3 अवं तुसन दोषी बनानेरे लेइ इन नईं लगगोरो ज़ोने, किजोकि मीं इन पेइलू ज़ोरूए, कि तुस इशुशे मने मां बसोरेथ कि अस तुसन साथी मरने ज़ीनेरे लेइ तियारम ।

4 अवं तुसन सेइं बड़े दिलेरी सेइं ज़ोने लोरोईं, मीं तुसन पुइ बडू घमण्डे, अवं तसल्ली सेइं भेरोईं जोरोईं; अपने सारे दुखन मां अवं आनन्दे सेइं भरपूर राताईं ।

5 किजोकि ज़ैखन अस त्रअस शैरतां मकिदुनिया इलाके मां आए, तैखन भी इशुशे जानी चैन न भोइ, पन अस ज़ेवरे पासना दुःख झल्लते राए, बेइर लडैईं थी, अन्तर बेडि-बेडि गल्लां थी ।

6 फिरी भी उदासन तसल्ली देनेवाले परमेशेरु तीतुसेरे एजने सेइं असन तसल्ली दिती ।

7 ते न सिर्फ तैसेरे एजने सेइं पन तैसेरी तैस तसल्ली सेइं, ज़ै तैस तुसन करां मैलती थी; ते तैनी तुशुशी इच्छा ते तुशुशे दुःख ते मीं सेइं मिलनेरे जोशेरी खबर असन शुनाईं, ज़ैस सेइं होरो भी आनन्द भोव ।

8 किजोकि अगर मीं एपनी चिट्ठी सेइं तुस दुखी किये, पन तैस करां पसतेईं न, ज़ेन्चरे पेइलो पसतातो थियो, किजोकि अवं हेरताईं तैस चिट्ठी सेइं तुसन दुःख त भोव पन तै थोड़े चिरेरे लेइ थियो ।

9 हुनी अवं खुशी आईं पन एल्हेरेलेइ नईं कि तुसन दुःख पुजो, बल्के एल्हेरेलेइ कि तैस्से दुखेरे वजाईं तुसेईं पापन करां मन फिराव । किजोकि तुशुशो दुःख परमेशेरुे मेर्जीं सेइं थियो, कि इशुशे पासेरां तुसन कोई नुकसान न पुजे ।

10 किजोकि परमेशेरुे भेक्तरु दुःख एरी पसतावो पैदा केरते ज़ैस सेइं मुक्ति मैलतीए, फिरी तैस सेइं पसतानू न पे, पन दुनियारो दुःख हमेशारी मौत पैदा केरते ।

11 ते हेरा, इस्से गल्ली सेइं तुसन परमेशेरुे भेक्तरु दुःख भोव, कि तुसन केतरो जोश, उज्जर, सरक, डर, इच्छा, मघन भोनू, ते सज़ा देनेरो खियाल पैदा भोव? तुसेईं सब्नी तरीके सेइं इन सिद्ध कियूं, कि तुस इस गल्ली मां बेकसूर आथ ।

12 फिरी मीं ज़ेन तुसन जो सेखती सेइं लिखोरू थियूं, तैन न तैसेरे वजाईं सेइं लिखूं, ज़ैने बेइन्साफी की, ते न तैसेरे वजाईं सेइं ज़ैस सेइं बेइन्साफी भोइ, पन एल्हेरेलेइ कि तुशुशी सरगामी ज़ै इशुशे लेइए, तै परमेशेरुे सामने तुसन पुइ बांदी भोए ।

13 एल्हेरेलेइ असन हिम्मत मैल्ली;

ते इशुशी इस हिम्मती सेइं साथी तीतुसेरे आनन्द सेइं होरो भी आनन्द भोव किजोकि तैसेरो मन तुशुशे वजाईं सेइं हरो भोए ।

14 किजोकि अगर मीं तैसेरे सामने तुशुशे वारे मां किछ घमण्ड हिराव, त छिथोव न, पन ज़ेन्चरे असेईं तुसन सेइं सब गल्लां सन्न-सन्न जोरी थी, तेन्चरे इशुशू घमण्ड हिरानू तीतुसेरे सामने भी सन्न निस्सू ।



18 ते अस तैस सेइं साथी अक होरो विश्वासी ढूला भेजने लोरेम, जेसेरू नवं खुशखबरी शुनानेरे बारे मां कलीसियारे लोकन मां फैलोरूए ।

19 ते एतूरू नई, पन तै कलीसियां केरे लोकेईं ठहरावरो भी आए, कि इस दानेरे कम्मरे लेइ असन सेइं साथी गाए ते अस ई सेवा एल्हेरेलेइ केरतम, कि प्रभुएरी महिमा भोए, ते इन हिरानेरे लेइ कि अस यरूशलेमेरे विश्वासी लोकां केरि मद्दत चातम ।

20 अस इस गल्ली मां हुशार रातम, ते तीतुसे सेइं साथी विश्वासी लोक भेजने सेइं इस दान देनेबाले कम्मरे बारे मां जै सेवा अस केरतम, ताके कोई असन पुइ दोष न लेइ सखे ।

21 किजोकि जैना गल्लां सिर्फ प्रभुएरे नजर मां रोड़ी नई बल्के मैन्हु केरे नजरी मां रोड़ी आन, अस तैन केरि फिकर केरतम ।

22 ते अस तैन सेइं साथी अक होरो विश्वासी ढूला भी भेजरी राओरेम, जै असेईं बार-बार परखो ते बेइ गल्लन मां जोशे बालो निस्सो; पन हुनी तुसन पुइ तैस बड़ो भरोसोए एल्हेरेलेइ तै दिले सेइं जोशे बालोए ।

23 अगर कोई तीतुसेरे बारे मां पुछे, त तै मेरो साथीए, ते तुशे लेइ मेरो मद्दतगार, ते अगर इशे विश्वासी ढूलां केरे बारे मां कोई पुछे, त तैना कलीसियां केरो भेजरोए ते तैन केरि जिन्दगी सेइं मसीहेरी महिमा भोतीए ।

24 एल्हेरेलेइ अपनो प्यार तैन हिराथ, सारे कलीसियां केरे विश्वासी लोकन सबूत देथ कि इशू तैन घमण्ड जैन तुशे बारे मांए सच्चे ।

## 9

\*\*\*\*\*

1 हुनी तैस सेवार बारे मां जै यरूशलेमेरे विश्वासी लोकन जो दान देनेरे बारे मां की गातीए, मी तुसन जो लिखन जरूरीए नई ।

2 किजोकि अवं तुशे मनेरे तियैरारे बारे मां जानताई, जेसेरे वजाई सेइं अवं तुशे बारे मां मकिदुनिया इलाकेरे विश्वासी लोकां केरे सामने घमण्ड हिराताई, कि तुस अखाया इलाकेरे लोक एक्की साले करां तियार भोरथ, ते तुशे जोशे होरन भी जोश बनेवरोए ।

3 पन मी तीतुस ते दूईं होरे ढूला तुसन कां एल्हेरेलेइ भेजे, कि असेईं जैन घमण्ड तुशे बारे मां हिराव, तैन इस गल्ली मां बेफैइदे न भोए; पन जेन्चरे मी ज़ोवं; तेन्चरे तुस यरूशलेम नगरेरे विश्वासी लोकां केरे लेइ दान देने जो तियार राथ ।

4 एरू न भोए, कि अगर किछ मकिदुनिया इलाकेरे विश्वासी लोक मी सेइं साथी एज्जन, ते तुशू दान तियार न भोए, त अस तुसन पुइ भरोसेरे केरनेरे वजाई छिथोम, पन तुस असन करां भी जादे छिथोले ।

5 एल्हेरेलेइ मी विश्वासी ढूलान सेइं ई बिनती केरनि जरूरी समझी, कि तैना पेइले तुसन कां गान, ते तुशे खुल्ले दिले सेइं दान देनेरे बारे मां, जेसेरे बारे मां पेइलो वादो कियोरो थियो, तियार केरतां रखा, कि इन दबावे सेइं नई बल्के इच्छाई सेइं भोए ।

\*\*\*\*\*

6 पन गल त ईए, कि जै थोडू बेते तै कटेलो भी थोडू; ते जै हछु बेते तै हछु कटेलो ।

7 हर अक मैन्हु जेन्चरे मने मां थापेरू भोते तेन्चरे दान दे, न कुइ-कुइ केरतां, ते न दबावे सेइं, किजोकि परमेशर खुशी सेइं देने बालन पुइ खुश भोते ।

8 परमेशर जैन किछ तुसन जरूरते तैसेरो अनुग्रह देइ बटते, जैस सेइं हर गल्ली मां ते हर वक्त, सब किछ, जेसेरी तुसन जरूरत भोए, तुसन कां राए, ते हर एक्की रोइ कम्मरे लेइ तुसन कां बड़ किछ भोए ।

9 जेन्चरे पवित्रशास्त्रे मां लिखोरूए,

“परमेश्वर जैन जरूरते तैन हच्छु देते,  
जैन तै करते तैन ठीके ते तैन हमेशा रालू।”

10 आखरी, जै बनेवालो बीज, ते खानेरे लेइ रोटी देते, तै तुसन बीज देलो, ते तैस सेइं फलवन्त केरेलो, ते तुशे धार्मिकतारो फल बधालो।

11 तुसन हर गल्ली मां बरकत मैलेली जैस सेइं तुस जादे दान देनेरे काबल बनेले, ते जैखन अस तुशे हच्छे दाने तैन कां नेमले जैन जरूरते त तैना लोक परमेश्वरें शुक्रे केरेले।

12 किजोकि सेवारे पूरे करने सेइं, न सिर्फ परमेश्वरे लोकां केरो घाटो पूरो भोते, पन लोकां केरे तरफां परमेश्वरें बडू शुक्रे भोते।

13 किजोकि होरि लोकन दान देनेरी मद्दतरी सेवारू सबूत कबूल केरतां तैना परमेश्वरेरी महिमा बांदी केरतन, कि तुस मसीहेरी खुशखबरी मेन्तां तैसेरे अधीन रातथ, ते गरीब विश्वासी लोकां केरि, ते सेबी केरि मद्दत करने मां हच्छु देनू बांदू केरतथ।

14 ते तैना तुशे लेइ परमेश्वरे कां प्रार्थना केरेले; तैना तुसन सेइं प्यार केरतन, किजोकि परमेश्वरे तुसन पुड़ अनुग्रह कियरोए।

15 परमेश्वरे तैसेरे तैस दानेरे लेइ जैन समझी करां बेइर शुक्रे भोए।

## 10

### ???????? ???? ?

1 अवं तैए पौलुस जै तुशे सामने दीन आई, पन तुसन करां दूर भोताई सेखती सेइं जोताई। अवं तुसन मसीहेरी नम्रता ते नरमी याद करेइतां तुसन कां मिनत केरताई।

2 अवं ई विनती केरताई, कि तुशे सामने नझक भोइतां दिलेर न भोनू पे; जेन्त्रे अवं केतन पुड़ जैना असन दुनियारे लोकां केरे जेरे चलने बाले समझतन, बहदरी हिरानेरी खियाल केरताई।

3 किजोकि अगर अस दुनियाई मां ज़ीतम, पन फिरी भी अपने दुश्मन सेइं दुनियारे मुताबिक न लडम।

4 किजोकि इशरी लड़ईरे हथियार मैन्हु केरे नई, पन गड़ बछोइनेरे लेइ परमेश्वरेरी शक्ति।

5 ते अस खियालन, ते हर एक्की उच्ची गल्ली, जैना परमेश्वरेरी पिशानेरे खलाफ उट्टतन, खतम केरतम; ते हर एक्की खियाले कब्जे मां केरतम, ते मसीहेरो हुक्म मन्ने बालो बनातम।

6 ते तियार रातम कि जैखन तुस पूरे तरीके सेइं अपनो आप मसीहेरो हुक्म मन्नेबाले बनातथ, त अस मसीहेरे हुक्म न मन्ने बालन सजा देनेरे लेइ तियार रामेले।

7 तुस बेइयूं रूप हेरतथ, अगर केन्ची एप्पू पुड़ ई भरोसे, कि अवं मसीहेरोई, तै इन भी ज्ञाने, कि जेरो तै मसीहेरोए, तेन्त्रे अस भी मसीहेरेम आम।

8 किजोकि अगर अवं तैस अधिकारेरे बारे मां होरू भी घमण्ड हिरेई, जै प्रभुए तुशे विश्वास नाश केनेरे लेइ नई बल्के विश्वासे बढानेरे लेइ असन दित्तोरोए, त शर्मिन्दे न भोलो।

9 इन अवं एल्हेरेलेइ जोताई, कि चिट्ठी केरे ज़िरिये तुसन डराने बालो न भोई।

10 किजोकि किछु लोक ज़ोतन, “कि तैसेरी चिट्ठी त ज़रूरिन ते अस्सर करने बैलिन; पन जैखन हेरतन, त तै कमज़ोर मैन्हु आए, ते तैसेरां भाषाना बेकारन।”

11 ते जै एरू जोते, तै ई समझ रखते, जेन्त्रे ठीक इशे चिट्ठन मां इशो वचन आए, तेन्त्रे तुशे सामने इशशां कम्मां भी भोलां।

12 किजोकि असन ई दिलेरी नई कि अपनो आप तैन सेइं साथी गनम, या तैन सेइं अपनो आप मिलाम, जैना अपनि तारीफ़ केरतन, ते अपनो आप एक्की होरि सेइं तुलोइतां बेवकूफ वन्तन।

13 अस परमेश्वरेरे दित्तोरे कम्मे करां बेइर घमण्ड कधी न केरमेले, पन तैस्से हदी तगर जै परमेश्वरे इशे लेइ बनोरीए, ते तैस मां तुस भी ओरथ ते तैसेरे मुताबिक घमण्ड भी केरेले।

14 किजोकि अस एपनी हदी करां बेइर अपनो आप बधानो न चाम, जेन्चरे कि तुसन तगर न पुजनेरी हालती मां भोते, बल्के अस पेइले थिये जैना कुरिन्थुस नगरे मां मसीहेरी खुशखबरी शुनाते तुसन तगर पुज्जी जोरेम।

15 ते अस हदी करां जादे होरि केरे मेहनती पुइ घमण्ड न केरम; बल्के असन उमीदे, जेन्चरे-जेन्चरे तुशुशो विश्वास बधेलो तेन्चरे-तेन्चरे अस एपनी हदारे मुताबिक तुशुशे वजाई सेइं होरां भी बड़ां जादे कम्मां केरनेरे कावल भोले।

16 कि अस तुशुशे हदन करां सारे दूर-दूर इलाकन मां भी खुशखबरी शुनाम, इन नई कि अस होरि केरे हदां केरे अन्तर बनोरे कम्मन पुइ घमण्ड केरम।

17 पन जेन्चरे पवित्रशास्त्र ज्ञोते, जै घमण्ड केरे तै प्रभु पुइ केरे।

18 किजोकि जै अपनि बड़याई केरते, तै नई, पन जेसेरी बड़याई प्रभु केरते, तैए परमेशेरी नजरी मां रोडोए।

## 11

### \*\*\*\*\*

1 तुस होरन कबूल केरतथ जैना अपनि बड़याई केरतन, ते एल्हेरेलेइ अवं उमीद केरतां, अगर अवं थोड़ी जेरि बेवकूफी केरि त तुस झैल्ले।

2 किजोकि अवं तुसन सेइं प्यार केरताई ते तुशुशो खियाल रखताई ठीक तेन्चरे, जेन्चरे परमेशर केरते, मीं वादो कियोरोए तुसन मसीह जो देनेरे लेइ, जेन्चरे लोक पूरे तरीके सेइं समपितन।

3 पन अवं डरताई कि जेन्चरे शैताने सप्पेरे रूपे मां एइतां अपनि च्लैकी सेइं पेइली कुआन्श, हव्या भटकवरी थी, तेन्चरे तुशुशो मन तैसेरे सिधयेई ते पवित्रतैई सेइं जै मसीहे कबूल केरते भोरी लोइं भ्रष्ट न की गाए।

4 जैखन भी कोई तुसन कां एइते ते तुसन तैस यीशुएरी जैस यीशुएरो असेईं नई कियोरो एइतां, कोन्ची होरि यीशुएरो प्रचार केरते, जेसेरो प्रचार असेईं नई कियोरो: या जै आत्मा तुसन मैल्लोरी तैस करां अलग किसमेरी आत्मा तुसन मैल्ले; या जैस खुशखबरी पुइ तुसेईं विश्वास कियूं तैस करां अलग किसमेरे खुशखबरी तुसन शुनाए, त तुस तैन शिक्षान कबूल केरने मां गलतथ।

5 अवं समझताई, कि अवं कोन्ची गल्ली मां, जैना इस तरीके सेइं बर्तावं केरतन, कि तैना होरि सब प्रेरितन करां महान आन अवं भी तैन केरो जेरो रोडो प्रेरित आईं।

6 अगर अवं भाषण देने मां माहिर नई, पन मसीह ते खुशखबरारे बारे मां मीं कां ज्ञाने; बल्के मीं हर गल शिक्षालने मां अपनू ज्ञान हिरावरूपे।

7 कि मीं तुसन परमेशेरी खुशखबरी मुखत शुनाई; ते अपनो आप निकड़ो कियो, कि तुस उच्चे बोध, कुन इस मां मीं किछ पाप कियो?

8 मीं होरि कलीसियान करां दान कबूल कियूं, ताके तुशुशी सेवा मुफते मां केरि बेटि, तैस जो लूट न ज्योथ।

9 ते जैखन तुसन सेइं साथी थियो, ते मीं पेइंसेरो घाटो भोव, ते मीं केन्ची पुइ भार न छुड्डो, किजोकि विश्वासी ढलाएई, मकिडुनिया इलाकेरां एइतां मेरो घाटो पूरो कियो: ते मीं हर गल्ली मां अपनो आप तुसन पुइ भार भोने करां रोको, ते अग्रोवं जो मीं रोकेलो।

10 मसीहेरी सच्च्चाई मीं मां आए, मीं अखाया इलाके मां कोन्ची करां दान नई नेवरु, एल्हेरेलेइ अखाया इलाके मां इस घमण्डे केरने करां कोई मीं न रोकी बटे।

11 किजो मीं तुशुशो पेइसो नई नेवरो? कुन मीं एन कियूं, कि अवं तुसन सेइं प्यार न केरि? परमेशर ज्ञानते कि अवं तुसन सेइं प्यार केरताई।

12 पन जैन अवं केरताई, तैने अग्रोवं भी केरतो रेइलो; अवं तुसन करां मद्दत न नेइलो जैस सेइं अवं तैन जैना घमण्ड केरनेरो मौको चातन, कि जेरू कम अस परमेशेरे लेइ केरतम तेरहु कम तैना भी केरतन।



13 किजोकि एरे लोक झूठे प्रेरित आन, ते दगो केरतां कम केरनेबालन, ते मसीहेरे प्रेरितां केरू जेरू रूप बनाने बालेन ।

14 ते ई हैरान राने बाली गल नई किजोकि शैतान एप्पू भी महिमा बाले स्वर्गदूतां केरू रूप बनाते ।

15 ते अगर तैसेरे सेवक भी धर्मी सेवकां केरू जेरू रूप बनान, त कोई बड़ी गल नई पन तैन केरो अन्त तैन केरे कम्मां केरे मुताबिक भोनाए ।

?????????? ???? ???? ?????????? ???? ???????

16 अवं फिरी ज़ोताई, कोई मीं बेवकूफ न समझें; नई बेवकूफ समझतां मीं कबूल केरे, ताके अवं थोड़ जेरू घमण्ड केरि ।

17 ज़ैन किछ अवं ज़ोताई जेरू यीशु चाते तेरहु नई बल्के बेवकूफी सेइं ज़ोताई ।

18 ज़ैखन कि बड़े लोक इस दुनियारे लोकां केरू जेरू घमण्ड केरतन, त अवं भी घमण्ड केरेलो ।

19 तुस त समझदार भोइतां आनन्दे सेइं बेकूफां केरि झैलतथ ।

20 किजोकि ज़ैखन तुसन कोई गुलाम बनातन, या ज़ैन किछ तुसन कां आए नेते, या तुसन सेइं धोखो केरते, या सोचतन कि तैना तुसन करां बड्डेन, या तुशेरे तुतरे पुड़ थपुड़ बातन, त तुस झल्लतथ ।

21 एल्हेरेलेइ कुन तुस सोचतथ कि मीं छिथोरू लोइते किजोकि मीं तैन नई कियोरू; पन ज़ै कोई कोन्बी गल्ली मां घमण्ड केरते, अवं बेवकूफी सेइं ज़ोताई, फिरी भी घमण्ड केरताई ।

22 कुन तैन्ना इब्रानी आन? अवं भी आई । कुन तैन्ना इस्राएली आन? अवं भी आई, कुन तैना अब्राहमेरे खानदाने मरां आन? अवं भी आई?

23 कुन तैना मसीहेरे सेवक आन? (अवं पागलेरो ज़ेरो ज़ोताई) अवं तैन करां बेदूतां आईं । मीं तैन करां जादे मेहनत कियोरीए, तैन करां जादे बार अवं कैद कियोरोई, बड़े बार मीं मार बज़ोरीए, हमेशा मेरी जान मुश्किली मां पवरीए ।

24 मीं यहूदन लीडेरेईं करां पंच बार 39 कोड़े खाए ।

25 टलेइ बार मीं बेंतेईं खेइ; एक्की बार मीं पुड़ घोड़ेव कियो जेव; टलेइ बार ज़िहाज़े मां ज़ैन पुड़ अवं चढ़ोरो थियो, टलुटी जेआं, अक रात ते दिहाड़ी मीं समुन्दरे मां कट्टी ।

26 अवं बार-बार सफरे मां; दरियारे खतरन मां; डैकू केरे खतरन मां; अपने ज़ातरे खतरन मां; गैर कौमां केरे खतरन मां; नगरां केरे खतरन मां; जंगल्लेरे खतरन मां; झूठे विश्वासी लोकां केरे खतरन मां;

27 बड़े मेहनती मां ते तकलीफी मां; बार-बार बीझे बिशने मां; बार-बार बरत रखने मां; ढलुख टलिशी मां; हिवतड़े मां; ते नग्गे रानेरी हालती मां राहोरोइं ।

28 ते होरि इना गल्लां केरे अलावा ज़ैन गल्लां केरे बारे मां अवं न ज़ोईं सेन्भी कलीसिया केरे फिक् मीं रोज़ दुवातीए ।

29 ज़ैखन कोई कमज़ोर भोते अवं भी कमज़ोर भोताई । ज़ैखन कोई पापेरे पासे गाते त मेरो दिल बड़ो दुखी भोते?

30 अगर घमण्ड केरनू ज़रूरीए, त अवं अपनी कमज़ोरागी गल्लन पुड़ केरेलो ।

31 परमेशर इश्शे प्रभु यीशुएरो बाजी ज़ै सदा धने, तै ज़ानते, कि अवं झूठ नई लोरो ज़ोने ।

32 ज़ैखन अवं दमिश्क नगरे मां थियो त अरितास राज़ेरे हाकिमे अवं कैद केरनेरे मकसदे सेइं सारे नगरे मां पेरहो रखोरो थियो ।

33 ते अवं टोकरे मां शहरपनाहेरे दैरारे बत्तां दुवारी उन्डो औसालोरो थियो, ते अवं हाकिमेरे हथ्थे करां बत्तो ।

## 12

?????????? ???? ???? ?? ???????

1 अगर घमण्ड केरनू मेरे लेइ ठीक नई, फिरी भी केरनू पते; अवं प्रभुएरे दित्तोरे दर्शन ते प्रकाशेरे बारे मां ज़ोइएलो ।

2 अवं मसीह मां च़ेवधे साल पेइले टलेइयोवं स्वर्गे\* पुइ नीयो ज़ेव, चाए अवं जिसमे मां थियो या जिसमे मरां बेइर, अवं न ज़ैनी सिर्फ परमेशर ज़ानते।

3-4 अवं फिरी ज़ोताई, कि ई मैन्हु स्वर्गे तगर अकदम नेव जेव (फिरी, अवं न ज़ैनी कि इन जिसमे मां भोवं या अक दर्शन थियूं, सिर्फ परमेशरे ज़ानते), तैड़ी तैनी तैना गल्लां शुनी ज़ैना लफसन मां न ज़ोइयोन, एरी गल्लां ज़ैना मैन्हु ओटन सेइं न ज़ोई बटन।

5 एरे मैन्हु पुइ त अवं घमण्ड केरेलो, पन अपने कमज़ोरी केरे अलावा, अपने बारे मां घमण्ड न केरि।

6 किजोकि अगर अवं घमण्ड केरन् चैई भी त बेवकूफ न बेई, किजोकि अवं सज़ ज़ोइलो; पन अपने आपे एस किसमेरे घमण्ड करां रोकताई, एरू न भोए, कि ज़ेन्त्रे कोई मीं लाते, या मीं शुन्ते, मीं तैस करां भी बेद्धतां न समझे।

7 पन ज़ैना अद्बुद गल्लां परमेशरे मीं हेरेवरिन तैन केरे वजाई सेइं अवं बड़ो जादे घमण्डी न भोइ गेइ। एन्हरेलेइ तैनी मीं अक बड़ो मुशकिल मसलो तुसन सेइं बर्ताव केरनेरे लेइ दित्तोरोए (मेरी जानी मां अक कंटो)। शैतानेरे एक्की दूते मीं मड्डनेरो इरादो कियोरोए ते अवं घमण्ड केरने करां रोकरोई।

8 इसेरे बारे मां मीं प्रभु कां टलाई बार विनती की, कि मीं करां दूर भोइ गाए।

9 ते तैने मीं सेइं ज़ोवं, “मेरो अनुग्रह तेरे लेइ सुधोए; किजोकि मेरी शक्ति कमज़ोरी मां सिद्ध भोतीए।” एन्हरेलेइ अवं एपनी कमज़ोरी पुइ घमण्ड केरेलो, कि मसीहेरी सामर्थ मीं पुइ एइती राए।

10 इस वजाई सेइं अवं मसीहेरे लेइ कमज़ोरन मां, ते बेइज़तन मां, गरीबी मां, सताए गाने मां, ते मुशकलन मां खुश आई; किजोकि ज़ैखन अवं कमज़ोर भोताई, तैखन अवं मसीहेरी शेक्ति सेइं ज़ोरे बालो भोताई।

### XXXXXXXXXX XXXX XXX XXXXXXXXXXXX XXXXX

11 अवं बेवकूफ त बनो, पन अवं एरू केरनेरे लेइ तुसेईं अवं मजबूर कियो, तुसेईं त मेरी बड़याई कियोरी लोइती थी, किजोकि अगर अवं किछ भी नई, फिरी भी होरे प्रेरित ज़ैना महान आन अवं तैन केरो ज़ेरो रोडो आई।

12 मीं रोडे प्रेरितेरी पिशान भी तुशे दरमयान हर किसमेरे सबर साथी ते निशान ते बडां-बडां कम्मां, ते सामर्थएरां कम्मां हिरां।

13 अक गल थी ज़ै मीं तुसन सेइं न की, ज़ै मीं होरि कलीसियान सेइं की, यानी अवं पेइंसां केरे बारे मां तुशे लेइ बोझ न बनो। कुन इन तुसन घटिया बनाते, एरू केरने सेइं मीं तुशे खलाफ गलत कियोरू ईं तुशशी सोच गलते।

14 हेरा, अवं टलेइयोवं बार एजनेरे लेइ तियाराई, ते अवं तुसन करां कोई पेइंसां केरि मांग न रेखेलो। किजोकि अवं तुशशी जेइदाद नई, बल्के तुसन चाताई, किजोकि बच्चेइं अम्मा बाजी केरे लेइ धन अकोट्टू न लोडे कियोरू, पन अम्मा वाजेई बच्चां केरे लेइ कियोरू लोडे।

15 अवं तुशशी लेइ बड़ी खुशी सेइं खर्च केरेलो, बल्के अवं अपनू सब किछ तुसन देइलो, अवं तुसन सेइं बड़ो प्यार केरताई पन एरू लगते कि तुस मीं सेइं घट प्यार केरतथ।

16 तुसन मरां किछ मन्तन कि मीं तुसन पुइ भार नई छडोरो, पन किछ होरे सोचतन कि अवं च़लाक आई ते मीं तुसन पूरे तरीके सेइं धोखो दित्तोरोए, ज़ैन कि झूट आए।

17 मीं अपने लेइ तुसन करां पेइंसे नेनेरे लेइ तीतुस या होरो कोई इस्तेमाल नई कियोरो।

18 मीं तीतुस समझेइतां तैस साथी तै दूला भेजो, त कुन तीतुसे धोखे सेइं किछ नेव? कुन अस एक्की मकसदे सेइं न च़ले? कुन इशशां कम्मां अक्कां ज़ेरां नई।


\* 12:2 टलेइयोवं स्वर्गे: मतलब सैभा बा स्वर्गे मां ज़ैड़ी परमेशर रहते

19 हे ट्लाराव, तुस हेजू तगर इन समझतथ कि अस तुशशे सामने अपनो बचाव लोरेम केरने, अस त परमेशेरे हाज़र सेमझता मसीह मां ज़ोतम, ते सब गल्लां एल्हेरेलेइ ज़ोतम कि तुसन विश्वासे मां मज़बूत केरने लोरेम।

20 किजोकि मीं डरे, कि एरू न भोए, कि अवं एज्जी ते ज़ेन्चरे अवं चाताई, तेन्चरे तुस न भोथ; ते मीं भी ज़ेन्चरे तुस मीं चातथ तेरे लाथ, कि तुसन मां लडैई, गर्म सुभाव, सरक, खलाफत, जलन, चोगली, अभिमान ते फसाद भोन।

21 कि एरू न भोए कि ज़ैखन अवं तुसन कां दुबारां एज्जी, त मेरो परमेशर मीं छिथाए। ते मीं दुःख केरनो पे, किजोकि तुसन मरां बडेई अपने पुराने पाप नई शारोरे। ते तैस गंदे कम्मे, ते बदमाशी, ते लुचपने सेइं, ज़े तैनेई कियो, मन न फिराव।

## 13



1-2 पवित्रशास्त्रे मां इन लिखोरूए कि, “हर अक गल दूई या ट्लेइ गवाहां केरे गवाही केरे ज़िरिये सेइं पक्की की गाली।” मीं तैन लोकन हदैइयत दित्तोरीए ज़ैना पाप केरते थिये, ज़ैखन अवं दुइयोवं बार ओरो थियो। हुनी अवं फिरी तैन ते होरि सेन्भी लोकन हदैइयत देताई कि ठीक तेन्चरे ज़ेन्चरे मीं पेइलू भी कियोरूए इस चिट्ठी मां खबरदार केरताई। हुनी अवं ट्लेइयोवं बार एजनेबालो आई, ते अगर तैना हेजू भी पाप केरनो बंद नई कियोरो, तैन मरां कोई भी सज़ाई करां न बन्नेलो।

3 अवं ज़ोताई कि तुस इना गल्लां केरू सबूत चातथ, कि मसीह मेरे ज़िरिये गल्लां केरते, पन ज़ैखन मसीह तुसन सेइं बर्ताव केरते त तै कमज़ोर नई; पन तुसन मां सामर्थ आए।

4 ते कमज़ोरारे वजाई सेइं क़रूसे पुड़ चाढो त जेव, फिरी भी परमेशेरे शक्ति सेइं ज़ींतोए। अस भी कमज़ोरम, ठीक तेन्चरां, ज़ेन्चरे मसीह थियो; पन ज़ैखन अस तुसन सेइं बर्ताव केरमेले अस भी तैस सेइं साथी ज़ींते भोमेले ते असन सेइं साथी परमेशेरी शक्ति भोली।

5 अपनो आप परखा, कि तुशशो विश्वास सच्चो आए कि नई; एप्पू परखा, कुन तुसन अपने बारे मां ई पतो नई, कि यीशु मसीह तुसन मां आए, नई त तुस निकम्मे भोए।

6 पन मेरी उमीदे, कि तुस बुझले, कि अस निकम्मे नई निसोरे।

7 चाए अगर तुसन इन लेइहोते कि अस सच्चे परेरित नई, अस तुशशे लेइ परमेशेरे कां प्रार्थना केरने लोरेम, कि गलती केरनेरे बगैर सिर्फ रोडू केरा।

8 किजोकि अस सच्चेरे खलाफ किछ न केरि बटम, पन सच्चेरे लेइ केरि बटतम।

9 ज़ैखन अस कमज़ोरम, ते तुस ताकतबरथ, अस खुशी रातम, ते ई प्रार्थना भी केरतम, कि तुस विश्वासे मां सिद्ध भोते राथ।

10 एल्हेरेलेइ अवं तुशशे पिठी पतर इना गल्लां लिखताई, कि मौजूद भोइतां मीं तैस अधिकारेरे मुताबिक ज़े प्रभुए विगाइनेरे लेइ नई पन बनानेरी लेइ मीं दित्तोरोए, सेखती सेइं किछ न केरनू पे।



11 हे द्लाव ते बेइनव, खुश राथ, सिद्ध बनते राथ; एक्की होरि हिम्मत देथ; ते मेल मिलापे सेइं राथ, ते प्यार केरनेबालो ते शान्ति देनेबालो परमेशर तुसन साथी भोलो।

12 मसीहेरे प्यारे सेइं एक्की होरि जो नमस्कार केरा।

13 सब पवित्र लोक तुसन जो नमस्कार ज़ोतन।

14 प्रभु यीशु मसीहेरो अनुग्रह ते परमेशेरेरो प्यार ते पवित्र आत्माारी सन्नाती तुसन सेब्बन साथी भोए।

## गलातियों

\*\*\*\*\*

1 अवं पौलुस ई चिट्ठी तुसन लिखताई, अवं अक प्रेरिताई, अवं न मैन्हू केरे तरफां, ते न केन्ची मैनेरे जिरिये प्रेरित भोनेरे लेइ चुनोरोई, बल्के यीशु मसीह ते बाजी परमेशेरे जिरिये, जैनी यीशु मुइदन मरां जीतो कियो ।

2 ते सारे दलां केरे तरफां, जैना मीं सेइं साधिन; गलातिया इलाकेरे कलीसियां केरे लेइ ई चिट्ठी लिखताई ।

3 बाजी परमेश, ते इश्शे प्रभु यीशु मसीहेरे तरफां तुसन अनुग्रह ते शान्ति मैलती राए ।

4 इश्शे परमेश ते बाजी केरि मेज्जी सेइं यीशु मसीहे अपनो आप इश्शे पापां केरे लेइ बलिदान कियो, ताके असन इस मौजूद बुरे दुनियाई करां छुटकारो दे ।

5 तैसेरी महिमा हमेशा भोती राए । आमीन ।

\*\*\*\*\*

6 अवं हैरान भोताई, कि परमेशेरे तुस मसीहेरे अनुग्रहे मां जीनिरे लेइ कुजाए; ते तुस तैस करां एतरे जल्दी फिरतां होरि किसमेरी खुशखबरी मन्ने लाए ।

7 पन सिर्फ एक्के सच्ची खुशखबरी आए, गल ईए, कि किछ लोक एरेन, जैना तुसन धोखो देतन, ते मसीहेरी खुशखबरी बगाड़न चातन ।

8 पन अगर असन मरां कोई या कोई स्वर्गदूत भी तुसन कोई तैस खुशखबरे अलावा जै असेईं तुसन शुनोरी, शुनाए त लानती भोए ।

9 जेन्चरे असेईं पेइलू ज़ोवरूए, तेन्चरे अवं हुना फिरी ज़ोताई, कि तैस खुशखबरे अलावा जै तुसेईं कबूल कियोरोए, अगर कोई होरो खुशखबरी शुनाए, त लानती भोए ।

10 हुनी कुन अवं मैन्हू केरि मन्जूरी हासिल केरनेरी कोशिश केरताई या परमेशेरी? कुन अवं लोकन खुश केरनेरी कोशिश केरने लोरोई? विलकुल भी नई, अगर हेजू तगर लोकन खुश केरतो राताई, त मसीहेरो दास न भोथो ।

\*\*\*\*\*

11 हे दलाव ते बेइनव, अवं तुसन ज़ोताई, कि जै खुशखबरी मीं तुसन शुनाई, ई मैन्हू केरि बनोरी नई ।

12 किजोकि तै मीं न केन्ची मैन्हू करां मैलोरी, ते न मीं कोन्ची उस्तादे करां शिखोरी, बल्के यीशु मसीहे मीं पुड़ बांदी की ।

13 तुसेईं शुनोरूए यहूदी धर्मे मां पेइलो जै मेरो चालचलन थियो तै केरो थियो, कि अवं परमेशेरी कलीसियाई बड़ी सतातो थियो, ते नाश केरनेरी कोशिश केरतो थियो ।

14 ते अवं अपने धर्मे मां तैस वक्ते बड़े मेरे उमरारे यहूदन करां अग्रोवं थियो । ते अपने बुजुर्गां केरे रीतन मां जोशे मां थियो ।

15 पन परमेशेरी जैखन इच्छा भोइ, तैनी अवं मेरे ज़रमने करां पेइलो चुनो ते अपने अनुग्रह सेइं कुजाव,

16 कि मीं मां अपने मट्टू बांदू केरे कि अवं गैर कौमन मां तैसेरी खुशखबरी शुनेई; ते मीं समझनेरे लेइ होरि कोन्ची करां सलाह नी ।

17 ते न यरूशलेम नगरे मां तैन कां जेव जैना मीं करां पेइले प्रेरितन, पन अरब मुल्खे जो चलो जेव, ते फिरी किछ चिंरेरां बाद तैट्टां दमिश्क नगरे जो वापस अव ।

18 फिरी ट्लाई सालना पत्ती अवं कैफा (यानी पतरस प्रेरिते) सेइं मिलने यरूशलेम नगरे जो जेव, ते 15 दिहाड़े तैड़ी राव ।

19 पन प्रेरितन मरां प्रभुएरे द्ला याकूबेरे अलावा होरि कोन्वी सेइं न मिलो ।

20 जैना गल्लां अवं तुसन लिखताई, हेरा परमेशेरे हाज़र सेमझतां ज़ोताई, कि तैना झूठी नई ।

21 यरूशलेम नगर शारनेरां पत्ती, अवं सीरिया ते किलिकियारे मुलखे मां जेव ।

22 पन यहूदिया इलाकेरे कलीसियां केरे लोक जैना मसीह मां थिये, जैना मीं सेइं कधे न थिये मिलोरे ।

23 पन इन्ने शुन्ते रहते थिये, कि जै असन पेइलो सतातो थियो, तैए तैस्से विश्वासेरी खुशखबरी शुनाते, जैस पेइलो नाश केरतो थियो ।

24 ते जैन परमेशेरे मेरे ज़िन्दगी मां कियू तैल्हेरेलेइ तैना परमेशेरी बडीयाईं केरते रहते थिये ।

## 2

~~~~~

1 जेवधे सालना पत्ती अवं बरनबासे सेइं साथी यरूशलेम नगरे जो जेव, ते तीतुस भी मीं एप्पू सेइं साथी नीयो ।

2 अवं एल्हेरेलेइ तैडी जेव किजोकि परमेशेरे मीं गानेरे लेइ ज़ोरू थियू, जैखन अवं तैडी थियो, अवं अकेल्ले मां कलीसियारे खास बुजुर्गन सेइं मिलो ते तैन खुशखबरी समझाई, जै अवं गैर कौमन मां प्रचार केरतो ओरो थियो, ताके एरू न भोए, कि जैन किछ अवं केरतो ओरोईं ते जैन केरने लोरोईं बेफेइदू भोए ।

3 मेरो साथी तीतुस, जै यूनानीए, जेसेरो खतनो कधी न भोरो । पन जैना यरूशलेम नगर कलीसियारे खास बुजुर्ग थिये तेनेईं तै खतनो करानेरे लेइ मजबूर न कियो, बल्के तेनेईं तै कबूल कियो ।

4 ते ई गल तैन केरे लेइ परेशानी बनी, ई इन तैन झूठे दलां* केरे वजाईं सेइं भोवं, जैना छेपतां इश्शे टोली मां ओरे थी, कि तैस ऐज़ेद्री जै मसीह यीशु मां असन मैलोरीए, भेद नेइतां फिरी असन यहूदी केरे कानूनेरे गुलाम बनान ।

5 पन असेईं एक्की पलेरे भी तैन केरि शुने करां इन्कार कियो, ताके जै सन्देश असेईं तुश्शे लेइ आनो तै सञ्ज्ञी खुशखबरी बनोरी राए ।

6 तैन यरूशलेम नगरेरे कलीसियारे खास लीडरेईं मेरी शिक्षाईं मां किछ न ज़ोडू, इस सेइं मीं किछ फर्क न पे, कि तैना केरहे बुजुर्ग आन, किजोकि परमेशेरे बेइरोवं रूप हेरतां फैसलो न केरे ।

7 पन इसेरे उलट जैखन तैन बुजुर्गेईं हेरू, कि जेन्चरे परमेशेरे यहूदी लोकां केरे लेइ खुशखबरारू कम पतरसे सोंफू, तेन्चरे परमेशेरे गैर कौमां केरे लोकन खुशखबरी शुनानेरू कम मीं सोंफू ।

8 जैने परमेशेरे पतरस यहूदी केरो प्रेरित भोनेरे लेइ चुनो, तैन्ने अवं भी गैर कौमां केरो प्रेरित भोनेरे लेइ चुनो ।

9 जैना मैन्हु कलीसियारे खम्मवे समझे गाते थिये (यानी खास लीडर) मतलब याकूब, कैफा (यानी पतरस) ते यूहन्ना तेनेईं अनुग्रहेरू तैन वरदान पिशानू जैन मीं मैलोरू थियू । तेनेईं अवं ते बरनबास साथी सेमझतां ते असन सेइं हथ मिलेइतां राजी भोए । कि अस गैर कौमन मां खुशखबरी प्रचार केरम, ते तैना यहूदीन मां ।

10 तेनेईं असन कां बिनती की, कि अस यरूशलेमेरे गरीब विश्वासी लोकां केरि मद्दत केरम, जैन केरनेरी अवं बडी इच्छा केरतो थियो ।

~~~~~

11 पन जैखन कैफा (पतरस) अन्ताकिया नगर मां अवं, त मीं सेब्भी विश्वासी लोकां केरे सामने तैसेरी खलाफ की ते झाड़ दिती, किजोकि जैन तेनी कियोरू थियू तैन गलत थियू ।

\* 2:4 झूठे दलां: इना तैना यहूदी विश्वासी लोक थिये, जैना ज़ोते थिये मुक्ति हासिल केरनेरे लेइ मुसेरो कानून भी मन्नोरू लोडे, किजोकि झूठे दला तैना विश्वास न थिये केरते, कि जैन यीशुए कूरसे पुड कियू, सिर्फ तैस्से सेइं असन मुक्ति मेलतीए ।

12 एल्हरेलेइ कि याकूबेरे पासेरां किछ मैन्हु केरे एजनेरे पेडले तै गैर कौमां केरे लोकन साथी खातो थियो, पन ज़ैखन तैना आए, त खतनो कियोरे लोकां केरे डरे सेइ तैन करां हटो ते अलग भोने लव।

13 ते तैस साथी बाकी यहूदी विश्वासी लोकेई भी पाखंड कियूं, इड़ी तगर कि बरनबास भी तैन केरे संगती मां शामिल भोव।

14 पन ज़ैखन मीं तैन केरो बर्ताव हेरू, कि तैना खुशखेबारे सञ्चरे खलाफ चलतन, त मीं सेब्ही केरे सामने कैफा (पतरस) सेइ ज़ोव, “कि ज़ैखन तू यहूदी भोइतां गैर कौमन केरि ज़ेरि चाल चलतस, न कि यहूदी केरि ज़ेरि, त तू गैर कौमन यहूदी केरे रसमन पुड़ चलनेरे लेइ किजो ज़ोतस?”

XXXXXXXXXX XXXX XXXXXXXXXXXX

15 अस ज़ैना ज़मनेरे यहूदिम, ते पैपी गैर कौमां केरे ज़ेरे नई।

16 फिरी भी इन सेमझतां कि मैन्हु मूसेरे कानूनेरे कम्मन सेइ नई, पन सिर्फ यीशु मसीह पुड़ विश्वास केरने सेइ धर्मी भोते, असेई एप्पू भी मसीह यीशु पुड़ विश्वास कियो, कि अस मूसेरे कानूनेरे कम्मन सेइ नई पन यीशु मसीह पुड़ विश्वास केरने सेइ धर्मी भोए, किजोकि मूसेरे कानूनेरे कम्मन सेइ कोई धर्मी न भोलो।

17 किछ यहूदी सोचतन कि असेई पाप कियो, किजोकि असेई धर्मी भोनेरे लेइ कानून मन्नेरे बदले सिर्फ मसीह पुड़ विश्वास कियोरो, त कुन मसीहे अस पापी बनाए, नई, कधी नई।

18 किजोकि ज़ैन किछ मीं बछ्छोडू, अगर तैस फिरी बनेइ, त अपनो आप पापी बनाताई।

19 अवं त कानूने सेइ कानूनेरे लेइ मेरि जेव, कि परमेशेरे लेइ ज़ीई।

20 अवं मसीह सेइ साथी कुरूसे पुड़ चढोरोई, ते हुनी ज़ीतो न राव, पन मसीह मीं मां ज़ीतोए, ते अवं जिसमे मां हुनी ज़ीतोई, त सिर्फ तैस विश्वास सेइ ज़ीतोई, ज़ै परमेशेरे मट्टे पुड़े, ज़ैने मीं सेइ प्यार कियो, ते मेरे लेइ अपनि ज्ञान दिती।

21 अवं इस गल्लरो इन्कार न केरि कि परमेशर अपने अनुग्रहे सेइ बचते, किजोकि अगर कानून मन्ने सेइ लोक धर्मी भोथे, त मसीहे मरनेरी कोई ज़रूरत न थी।

### 3

XXXXXXXXXX XXXX XXXXXXXXXXXX

1 हे बेसमझ गलातियारे लोकव, केने तुस टरे लाए? तुशशे त मना तुशशे सामने यीशु मसीह कुरूसे पुड़ चाढो!

2 अवं तुसन सिर्फ ई सवाल पुछ्नो चाताई, कि तुसेई पवित्र आत्मा कुन कानून मन्ने सेइ हासिल कियो? बिलकुल भी नई, तुसेई खुशखबरी शुनी ते तैस पुड़ विश्वास कियूं ते पवित्र आत्मा हासिल की।

3 कुन तुस एरे बेसमझथ, कि पवित्र आत्मा रे रीति पुड़ शुरू केरतथ ते जिसमे रे रीति पुड़ खतम केरेले?

4 कुन तुसेई सब दुःख बेफैइदो झैल्ले? अवं उमीद केरताई बेफैइदो नई।

5 एल्हरेलेइ ज़ै तुसन पवित्र आत्मारू दान बडू जादे देते ते चमत्कार केरते, कुन तै कानून मन्नेरे वजाई सेइ एन केरते या तुसेई खुशखबरी शुनी ते तैस पुड़ विश्वास कियो?

6 हुनी अब्राहमेरे बारे मां सोचा “अब्राहमे परमेशेरे पुड़ विश्वास कियो ते तै तेसेरेलेइ धार्मिकता गनो जेव।”

7 एल्हरेलेइ तुसन एन ज़ान्नेरी ज़रूरते कि ज़ैना अब्राहमेरो ज़ेरो परमेशेरे पुड़ विश्वास केरनेबालेन तैन्ना हकीकति मां तेसेरी बच्चेन।

8 पवित्रशास्त्रे मां बडू पेडलू इन लिखोरूए, कि परमेशर गैर कौमन विश्वासे सेइ धर्मी बनालो, पेडले अब्राहमे ई खुशखबरी शुनाई, “कि तेरे ज़िरिये सेब्ही कौमन बरकत मैलेली।”

9 ते जैना अब्राहमेरो जेरो परमेशेरे पुड़ विश्वास केरतन, परमेशेर तैन सेबन बरकत देते जैना मसीह पुड़ विश्वास केरतन जेन्चरे तैनी अब्राहमे बरकत दिती।

10 एल्हेरेलेइ जैना लोक सोचतन कि तैना मूसेरो कानून मेन्तां धर्मी बनाए गाले, तैन पुड़ परमेशेरी लानते, किजोकि मूसेरे कानूने मां लिखोरूए, “कि जै कोई कानूने मां लिखेरे सब कानूनेरे मुताबिक न चले, तैस पुड़ परमेशेरी लानते।”

11 ई गल साफे, कि मूसेरे कानून सेइं परमेशेरे कां कोई मैन्हु धर्मी न भोए, “किजोकि जै मैन्हु परमेशेरे पुड़ विश्वास केरते, परमेशेर तैस धर्मी ठहराते ते तैस हमेशारी जिन्दगी मैलतीए।”

12 पन मूसेरे कानूनेरो विश्वासे सेइं कोई वासतो नई; पन “जै तैन मन्नेलो, तै तैन मन्ने सेइं जीतो रालो।”

13 मसीहे जै इश्शे लेइ लानती बनो, तैने अस कीमत देइतां कानूनेरे लानती करां छुटाए किजोकि पवित्रशास्त्रे मां लिखोरूए, “जै कोई कुरूसे पुड़ टंगो गालो तै लानतीए।”

14 मसीहे एन एल्हेरेलेइ कियूं, कि गैर कौमां तैसेरे जिरिये तैना सैरी बरकतां हासिल केरन, जैन केरो वादो परमेशेरे अब्राहम सेइं कियोरो थियो, ते मसीह पुड़ विश्वास केरने सेइं अस पवित्र आत्मा हासिल केरम, जेसेरो वादो तैने कियोरोए।

### RECAP RECAP RECAP

15 हे दलाव ते बेइनव, अवं आम जिन्दगरी मिसाल देने लोरोई, जैखन दूई मैन्हु केरो करार जै पक्को भोते, त न कोई तैस टालते ते न तैस मां किछ बद्धाते।

16 ते सारे वादे परमेशेरे अब्राहमे ते तैसेरे खानदाने दित्ते; पवित्रशास्त्र इन न जोए, “कि वंशां,” कि बड़ां केरे बारे मां ज़ोवं, पन एक्की मैनेरे बारे मां ज़ोवं “कि तेरू वंश इने, ते तै मसीहे।”

17 मेरे ज़ोनेरो मतलब ई आए, परमेशेरे अब्राहमे सेइं करार केरनेरां बाद 430 सालन पत्ती मूसे कानून दित्तो (ताके तैस करारे पक्को केरे), पन अस न ज़ोई बटन कि परमेशेरो करार ट्लुटो, तैए करार पक्कोए, तैए तैस पूरो केरेलो।

18 किजोकि परमेशेर असन अपनि बरकत एल्हेरेलेइ न दे कि अस मूसेरे कानूनेरे मुताबिक ज़लतम, पन तै एल्हेरेलेइ देते कि तैनी वादो कियोरोए, परमेशेरे अपने अनुग्रहे सेइं अब्राहमे बरकत दिती, किजोकि तैनी पेइलो वादो कियोरो थियो।

19 तैखन, फिरी कानूनेरो कुन मकसद थियो? तैन त पापां केरे वजाई सेइं वादे मां दित्तू, ताके तैसेरे वंश मसीहेरे एजने तगर राए, जैस सेइं वादो कियोरो थियो, परमेशेरे स्वर्गदूतां केरे ज़िरिये मूसे कानून दित्तो, जै परमेशेर ते लोकां केरि बिचवाई केरनेवालो थियो।

20 परमेशेरे एप्पू अब्राहमे सेइं वादो कियो। एल्हेरेलेइ हुनी बिचवाई केरनेवालेरी कोई ज़रूरत नई।

### RECAP RECAP RECAP

21 कुन कानून परमेशेरेरे वादां केरे खलाफे? नई, कधी नई! किजोकि अगर एरो कानून दित्तो गाथो जै हमेशारी जिन्दगी देइ बटेथो, त सच्चे धार्मिकता कानून मन्ने सेइं भोथी।

22 पन पवित्रशास्त्रे ज़ोते दुनियारे सब लोक पापेरे अधीन आन, ताके तै वादो जेसेरी बुनीयाद यीशु मसीह पुड़ विश्वास केरनोए, तैस पुड़ विश्वास केरनेवालां केरे लेइ पूरो भोए।

23 पन इस करां पेइले कि लोक मसीह पुड़ विश्वास केरन, मसीहेरे एजने करां पेइले अस यहूदी कैदे मां थिये कानून इश्शी रखवाली केरतो थियो। ते तैस विश्वासे एजने तगर जै बांदो भोनेवालो थियो, अस तैसेरे बन्धने मां रहम।

24 एल्हेरेलेइ कानून मसीह तगर पुजानेरे लेइ असन बत हिरानेवालो ते स्मभालने वालो भोव, कि अस यीशु मसीह पुड़ विश्वासे केरने सेइं परमेशेरेरे सामने धर्मी भोम।

25 पन जैखन मसीह अव ते असेई विश्वास कियूं, त असन ज़रूरत न पेई, कि कानून बत हिराए ते मद्दत केरे।

26 किजोकि तुस सब विश्वास केरने सेइं जै मसीह यीशु पुड़े, परमेशेरे बच्चेथ।

27 ते तुसन मरां जेरेइं मसीह मां अक भोनेरे लेइ बपतिस्मो नीयो, तुसेइं मसीहेरी नवीं जिन्दगी तेन्चरे लाई जेन्चरे लिगड़ा लातन।

28 हुनी मसीह मां कोई फर्क नई, चाए कोई यहूदीए या गैर यहूदीए, गुलामे या आज़ाद। कोई फर्क नई मड़दे या कुआन्शे, अस यीशु मसीह मां सब बराबर आम।

29 किजोकि तुस मसीह सेइं साथी अक आथ, त अब्राहमेरे बच्चेथ, ते परमेशेरे वादेरे मुताबिक बरकतां केरे वारस भी आथ।

## 4

1 अवं मिसाल देइतां ज़ोताई, कि वारस ज़ांतगर बच्चाए, अगर तै सेबमी चीजां केरो मालिके, फिरी भी तैस त कने गुलामे मां कोई फर्क नई।

2 पन बाजी केरे ठहरावरे वक्ते तगर सुमालने वालां ते भेन्डैरी केरे हेरगेशी मां रहते।

3 तेन्चरे अस भी ज़ैखन बच्चां केरे जेरे थिये, त दुनियारे रीति रूवाजां ते कानूनेरे गुलाम थिये।

4 पन ज़ैखन ठीक वक्त अव, त परमेशेरे अपनू मट्टू दुनिया मां भेजू, जैस एक्की कुआन्शां ज़म दित्तू, तैन यहूदन मां ज़र्मु ते तैनी कानून मन्तो।

5 ताके तैन छुटाए ज़ैना मूसेरे कानूनेरे अधीन्न थिये, ते असन तैसेरे बच्चे भोनेरो अधिकार मैल्ले।

6 ते तुस ज़ैना बच्चेथ, एल्हेरेलेइ परमेशेरे मट्टेरी आत्मा इश्शे दिले मां भेजोरीए, ज़ै आत्मा, "हे बैपू, हे बाजी," ज़ोती।

7 एल्हेरेलेइ हुनी तू गुलाम नई, पन परमेशेरो बच्चोस, ते ज़ैखन परमेशेरो बच्चोस, त तीं तैन सब मैलेलू जेसेरो वादो परमेशेरे अपने बच्चन देनेरो वादो कियोरोए।

~~~~~

8 ज़ैखन तुस परमेशर न थिये जानते, त तुसन तैन केरे गुलाम थिये, ज़ैना हकीकति मां ईश्वर अथी नई।

9 पन हुनी तुश्शो रिश्तो परमेशर सेइं आए, ते तुसेइं तै जानो बल्के परमेशेरे अस कबूल किये, ते तैन कमज़ोर ते निक्केमी पेइली गल्लां केरे पासे किजो गातथ, कुन तुस तैन केरे दुवारा गुलाम भोने चातथ?

10 मीं शुनेरूए कि तुस गैर कौमां केरे विश्वासी, यहूदी केरे दिहाइन ते महीन्न ते खास वक्ते ते सालां केरे तिहारन मन्तथ, इन सोचतां कि परमेशर खुश भोते।

11 अवं तुश्शू एन केरनेरे वजाई सेइं परेशान आई, कि एरू न भोए, कि जै मेहनत मीं तुश्शो लेइ कियोरीए ते बेफेइदी भोए।

12 हे ढलाव ते बेइनव, अवं तुसन कां बिनती केरताई, तुस अपने आपे यहूदी केरे कानूने करां आज़ाद करा, किजोकि मीं अपनो आप आज़ाद कियोरोए जेन्चरे तुस गैर कौमरे लोक पेइले आज़ाद थिये, तुस पेइले मेरे सामने बड़े रोड़े थी।

13 तुसन याद भोलू, ज़ैखन अवं पेइली बार खुशखबरी शुनाने तुसन कां अव त अवं विमार थियो।

14 ते मेरी जिसमानी हालत ज़ै तुश्शे आजमैइशरी वजा थी, तुसेइं अवं घटिया न समझो ते तुसेइं दूर न कढो बल्के एन्चरे कबूल कियो जेन्चरे परमेशेरो दूत या यीशु मसीह एप्पू।

15 ते तुश्शी तै शुशी मनानी कोरां जेई? अवं सच्चे ज़ोई बटताई, तुस मेरे लेइ सब किछ बलिदान केरनेरे लेइ तियार थिये, इड़ी तगर कि अपनि एछ्छी भी।

16 ते कुन तुसन सेइं सज़ ज़ोनेरे वजाई सेइं अवं तुश्शो बैरी भोरोई।

17 तैना झूठे उस्ताद तुसन दोस्त बनानो त चातन, पन रोड़ी नीती सेइं नई; बल्के तुसन अलग केरने चातन, कि तुस तैन केरे चले बना।

18 जोशे मां भोनू रोड़ूए, कि रोड़ी गल्लन मां हर वक्त दोस्त बनानेरी कोशिश की गाए, सिर्फ तैस वक्ते नई ज़ैखन अवं तुसन सेइं साथी राताई।

19 हे मेरे बच्चव, ज्ञातगर तुसन मां मसीहेरू रूप न बने, तांतगर अवं तुशशे लेइ जर्म देने बैली कुआन्शे जेरे तकलीफी मां राताई ।

20 अवं त चाताई कि हुनी तुसन कां एइतां मिट्ठी ज़बाना गल केरि, किजोकि मेरी समझी मां न एज्जे कि अवं तुसन सेइं कुन केरि ।

~~~~~

21 तुस ज़ैना मूसरे कानूनरे अधीन भोने चातथ, मीं ज़ोतथ, कुन कानूनेरी गल्लां शुन्नेरे लेइ तियार नईं?

22 तैस मां इन लिखोरूए, कि अब्राहमेरां दूई मट्ठां थियां; अक गुलाम कुआन्शरू, ते अक ज़ै आज़ाद थी तैसेरू ।

23 पन ज़ैन गुलाम कुआन्शरू भोव, तैन आम बच्चां केरू ज़ेरू ज़र्मू, ते ज़ैन आज़ाद कुआन्शरू भोव, तैन परमेशेरे वादेरे मुताबिक ज़र्मू ।

24 इना दूई कुआन्शां परमेशेरे दूई करां केरे रूपे मां कम केरतिन । पेइली कुआन्श हाजिरा सीने पहाड़े हिराती ज़ैडी लोकन कानून मैल्लो, ज़ैन तैन गुलाम बनातू थियूं ।

25 हाजिरा मना अरबेरू सीने पहाड़ेरी ज़ेरि आए, ज़ेसेरी तुलना मौजूद यरूशलेम सेइं केरोतीए, किजोकि तैन अज़ अपने बच्चन यानी अपने लोकन समेत गुलामी मांए ।

26 पन बेयूं यरूशलेम अब्राहमेरे कुआन्श सारारू ज़ेरूए, ते तैसेरे बच्चे गुलाम नईं । इन यरूशलेम इशशे लेइ इशशे अम्मारू ज़ेरू आए ज़ैसां विश्वास कियो ।

27 किजोकि पवित्तरशास्त्र ज़ोते,

“हे बाँझ, तीं ज़ैसां कधे बच्चे नईं ज़ावरे, खुश भो, तीं ज़ैस बच्चो ज़ानेरी तकलीफ नईं भोरी; आवाज़ उच्चि केर ते जयजयकार केर, किजोकि शैरोरारी औलाद सुहागनी करां भी जादे ।”

28 हे दलाव ते बेइनव, तुस अब्राहमेरे मट्ठे इसहाकेरे ज़ेरे आथ, ज़ैन परमेशेरे वादेरे मुताबिक ज़र्मू, अस भी परमेशेरे वादेरे मुताबिक तैसेरे बच्चे बने ।

29 ते ज़ेन्चरे तैस वक्ते ज़ै बच्चो आम बच्चां केरो ज़ेरो ज़र्मोरो थियो, तैस सतातो थियो ज़ै परमेशेरे आत्मारें मुताबिक ज़र्मोरो थियो, तेन्चरे अज़ भी अस तैन करां सताव झैल्लतम ज़ैना कानून मेन्तां परमेशेरे सामने धर्मी भोनु चातन ।

30 पन पवित्तरशास्त्र कुन ज़ोते? “गुलाम कुआन्शी ते तैसेरे मट्ठे कढ, किजोकि गुलाम कुआन्शरू मट्ठू आज़ादेरे मट्ठे साथी वारस न भोलू ।”

31 एल्हेरेलेइ हे दलाव ते बेइनव, अस गुलाम कुआन्शरे बच्चे नईं, ज़ै कानूने, बल्के आज़ाद कुआन्शरां बच्चेम, ज़ै विश्वासे ।

## 5

~~~~~

1 मसीहे अस आज़ाद कियोरेंम हुनी असन गुलामेरू ज़ेरू यहूदी केरू कानून मन्नेरी ज़रूरत नईं, अपने एस ऐज़ैदी मां बनोरे राथ, ते दुबारा अपने आपे कानून मन्नेरे गुलाम भोनेरे लेइ न देथ ।

2 हेरा, अवं पौलुस तुसन सेइं ज़ोताई, अगर परमेशेरे सामने धर्मी भोनेरे लेइ खतनो कराले, फिरी ज़ैन मसीहे कियोरू तैसेरो तुसन कोई फेइदो न भोलो ।

3 फिरी भी अवं हर एक्की सेइं ज़ोताई ज़ै इस उमीदी सेइं खतनो कराते कि परमेशेरे सामने धर्मी भोए, तैस कानूनेरो हर हुक्म मन्नो पेनोए ।

4 तुस ज़ैना कानून मेन्तां धर्मी भोने चातथ, तुसेईं अपनो आप मसीह करां अलग कियो ते परमेशेरो अनुग्रह कबूल करने करां इन्कार कियो ।

5 अवं इन ज़ोई बटताई, किजोकि असन पवित्तर आत्मारें तरफां पूरो भरोसो कि परमेशर असन धर्मी कबूल केरलो किजोकि अस मसीह पुड़ विश्वास केरतम ।

6 ते मसीह यीशु मां न खतनो, न बगैर खतनो किछ् कम्मेरोए, पन सिर्फ विश्वास जै प्यारे सेइं अस्सर करते ।

7 तुस त रोड़ी दौड़ लोरे थिये दौड़ने, तुस केनि रोके, कि सच्चने न मन्थ ।

8 एरी शिखर तुसन परमेशेरे नई दितोरी जैने तुस अपने बच्चे भोनेरे लेइ कुजोरेथ ।

9 झूठी शिक्षा थोड़े जेरे खमीररी जेरि जैन सारे सोन्नोरे अट्टे खमीर करते ।

10 अवं प्रभु पुड़ भरोसो रखताई, कि तुसन झूठी शिक्षा पुड़ विश्वास करने करां दूर रखे; पन जै तुसन परेशान करते, तै कोई कि न भोए परमेशर तैस सजा देलो ।

11 पन हे दूलाव ते बेइनव, अगर अवं लोकन प्रचार करतो भोथो कि खतनो केरनो जरूरीए, त स्ताव न गाथो । अगर अवं ई प्रचार न करतो राथो कि मुक्ति सिर्फ मसीहेरे कुरूसे सेइं, त फिरी केन्वी ठोकर न लगेथी ।

12 रोड़ भोथू कि जैना तुसन टपलातन, तैना अपनो अंग कटेथे!

13 हे दूलाव ते बेइनव, तुस आजाद भोनेरे लेइ कुजोरेथ पन एरू न भोए, कि ई आजादी जिसमानी कम्मां केरे लेइ मौको बने, बल्के प्यारे सेइं एक्की होरेरे सेवक बना ।

14 किजोकि सारो कानून इस्से एक्की गल्ली मां पूरो भोइ गाते, “कि तू अपने पड़ोसी सेइं अपनो जेरो प्यार केर ।”

15 पन अगर तुस एक्की होरि सेइं लटते ते तंग करते राथ, त खबरदार राथ, एक्की होरेरी बरबादी करेले ।

~~~~~

16 पन अवं ज़ोताई, पवित्र आत्मारो च़लाने सेइं च़लले, त तुस जिसमेरी खुवैइशां कधी पूरी न करेले ।

17 किजोकि जिसम पवित्र आत्मारो खलाफे, ते पवित्र आत्मा जिसमेरे खलाफ खुवैइश करते, ते इना एक्की होरेरे दुश्मन आन; एल्हेरेलेइ जैन तुस केरनू चातथ तैन न केरि बटथ ।

18 ते अगर तुस पवित्र आत्मारो च़लाने सेइं च़लतथ त कानूनेरे अधीन न राए ।

19 जिसमेरां कम्मां बांदन, मतलब बदमाशी, गंदा कम्मां, चपलूसी ।

20 मूरती केरि पूजा, टूनो, बैर, लड़ाई, जलन, सरक, खलाफत, फसाद, विधर्म ।

21 नफरत, नशो केरनो, नाज़, ते इन केरे जेरां होरां भी कम्मां आन, जैन केरे बारे मां अवं तुसन पेइलू ज़ोताई, जेन्च़रे पेइलू भी ज़ोवरूए, कि एरां कम्मां केरनेवाले परमेशेरे राज़ेरे वारस नई भोने ।

22 पन पवित्र आत्मारो फल प्यार, आनन्द, शान्ति, सबर, ते दया, भलाई, विश्वास,

23 नमूरता, ते बरदाश केरनू; एरां कम्मां केरे खलाफ कोई कानून नई ।

24 ते जैना मसीह यीशु मां आन, तैनेई जिसम तैसेरे खुवैइशन सेइं साथी कुरूसे पुड़ चादोरोए ।

25 अगर पवित्र आत्मां असन नर्वीं जिन्दगी दितोरीए, त पवित्र आत्मारो मुताबिक च़लम भी ।

26 अस घमण्ड न केरम, अस एक्की होरि न सरकाम, ते एक्की होरि सेइं न जलन केरम ।

## 6

~~~~~

1 हे दूलाव ते बेइनव, अगर तुसन पता च़ले कि केन्चे कोई पाप कियोरोए, त तुस जैना पवित्र आत्मारो च़लाने सेइं च़लतथ, तैस बड़े नेरमी सेइं वापस धार्मिकतारे बत्तां वापस एजनेरी लेइ मद्दत केरा, ते अपनो भी खियाल रखा, कि तुस भी तैस्से अज़मैइशी मां न पेथ ।

2 तुस एक्की होरेरी मुशकलन मां मद्दत केरा, ते एन्च़रे मसीहेरो कानून पूरो केरा ।

3 अगर कोई अपने आपे खास मैन्हु समझे ते तै सच्चने न भोए, त तै अपने आपे धोखो देते ।

4 पन हर कोई अपने कम्मे परखे, ते तैखन तैस होरि केरे बारे मां नई पन अपने बारे मां घमण्ड केरनेरो मौको भोलो ।

5 किजोकि हर कोई मैन्हु अपनो भार छ़ूलो ।

6. जैन वचनेरी शिक्षा मैलतीए, तैना सब रोड़ी चीज्जन मां शिखालनेबाले शामिल रखन ।
 7. धोखो न खाथ, परमेशर टाठन मां न उड़ाव गाए, किजोकि मैन्हु जैन किछु बेते, तैन्ने कटेलो ।
 8. किजोकि जै अपने जिसमेरे लेइ बेते, तै जिसमे सेइ विनाशेरी फसल कटेलो; ते जै आत्माेरे लेइ बेते, तै आत्मा सेइ हमेशारी जिन्दगरी फसल कटेलो ।
 9. अस रोड़ां कम्मां केरने मां हिम्मत न हारम, किजोकि अगर अस हार न मनमेले त परमेशर अपने वक्ते पुड़ असन इनाम देलो ।
 10. एल्हेरेलेइ जैड़ी तगर मौको मल्ले सेबन सेइ भलाई केरा; खास केरतां मसीही लोकन सेइ ।

?????????? ? ? ? ? ? ? ? ?

11. हेरा, मां कतरे बडे-बडे लफसन मां तुसन अपने हथ्ये सेइ लिखोरूए ।
 12. जेतरे लोक यहूदन खुश करने चातन तैना तुसन खतनो कराने लेइ ज्ञातन । तैना एन केरतन कि लोक प्रचार केरनेरे लेइ तैन न स्तान कि परमेशर लोकन सिर्फ एल्हेरेलेइ बचाते कि तैना विश्वास केरतन कि मसीह कुरूसे पुड़ मरोए ।
 13. किजोकि खतनो करानेबाले एप्पू भी सेबनी कानूने पुड़ न चलन, पन तैना चातन तुस खतनो कराथ, ताके तैना होरि यहूदी केरे सामने घमण्ड केरनेरे काबल भोन, कि तुसेई तैन केरे वजाई सेइ खतनो कियोरोए ।

14. पन मेरे लेइ इने, अगर अवं घमण्ड केरि त सिर्फ इशे प्रभु यीशु मसीह पुड़ जै इशे लेइ कुरूसे पुड़ मरो । किजोकि तैसेरे मरने सेइ अवं हुनी दुनियारे चीजां केरि इच्छां केरो गुलाम न राव, ते तैन मीं पुड़ राज करनेरी कोई शक्ति नई ।

15. किजोकि न खतनो, ते न खतनो न भोनो जरूरीए, पन जरूरी इने, कि परमेशरे तुस पवित्र आत्माेरे कम्मेरे जिरिये अक नव्वों इन्सान बनोरथ ।

16. परमेशर तैन सेबन अपनि शान्ति देलो ते तैन बरकत देलो जैना इस नियमें मन्तन, तैना परमेशरेरे लोक आन ।

17. अग्रोवं जो कोई मीं दुख न दे, किजोकि मेरे जानी पुड़ जैना दाग आन तैना हिरातन कि अवं यीशु मसीहेरो दास आई ।

18. हे द्लाव ते वेइनव, इशे प्रभु यीशु मसीहेरो अनुग्रह तुसन पुड़ भोए । आमीन ।

इफिसियों

1 अवं पौलुस परमेशेरेरी मेर्जी सेइं यीशु मसीहेरो प्रेरित आई। अवं तुसन जैना परमेशेरेरे लोक आथ ते इफिसुस नगरे मां रातथ ईं चिट्ठी लिखने लोरोई।

2 इश्शे बाजी परमेशर ते प्रभु यीशु मसीह करां तुसन अनुग्रह ते शान्ति मैलती राए।

~~~~~

3 इश्शे प्रभु यीशु मसीहेरे परमेशर ते कने बाजी केरि बडयाई भोए, इश्शो रिश्तो मसीह सेइं भोनेरे वजाई सेइं तैने असन हर लिहाजे सेइं तैना आत्मिक बरकतां दित्तोरिन, जैना बरकतां स्वर्गोरां एइतिन।

4 जेन्चरे तैने अस दुनिया बनानेरे पेइली मसीह मां चुने, कि अस तैसेरी नजरी मां प्यारे मां पवित्र ते बेइलजाम भोम।

5 किजोकि परमेशेरे असन सेइं प्यार कियो, तैनी बडे पेइले ई फैसलो कियोरो थियो कि तै असन यीशु मसीहेरे जिरिये अपने बच्चां केरे रूपे मां गोद ने, किजोकि तै इन केरुन चातो थियो।

6 अस परमेशेरेरे अनुग्रहेरे लेइ तैसेरी बडयाई केरतम, जै तैने असन मुफते मां दित्तो, किजोकि इश्शो रिश्तो तैसेरे टलारे मट्टे सेइं आए।

7 परमेशेरेरे बडे अनुग्रहेरे मुताबिक मसीहेरे खूने बगाने सेइं असन छुटकारो मैल्लो, मतलब इश्शे पाप माफ़ भोए।

8 जै तैनी सारे ज्ञान ते समझ सेइं साथी असन पुड़ बडो जादे कियो।

9 कि तैने अपनि मेरजरो भेद, अपने रोडे इरादेरे मुताबिक असन पुड़ बांदो कियो, जै तैने पूरो केरो थापोरो थियो।

10 परमेशेरेरे ठहरावरे वक्ते पुड़ तै स्वर्ग ते धेरतरी चीजन साथी आनेलो ते मसीह तैस पुड़ राज करालो।

11 मसीह सेइं इश्शो रिश्तो भोनेरे वजाई सेइं परमेशेरे अस चुने, तैन हासिल केनेरे लेइ जेसेरो वादे तैने असन देनेरे लेइ कियोरो थियो। इन बिलकुल तेन्चरे भोव जेन्चरे तैनी बडे पेइलू पूरू केरुन थापेरू थियूं ते इच्छा कियोरी थी।

12 अस यहूदी पेइले लोक आम जैनेई मसीह पुड़ उमीद रखोरि थी, ते अस चुने जे, ताके परमेशेरेरे महिमारी स्तुति केरि बटम।

13 ते तुस भी मसीह सेइं शामिल भोए जैखन तुसेईं सच्चू वचन शुनू, जै खुशखेबरां तुश्शे लेइ मुक्ति आनी, जैखन तुसेईं विश्वास कियो परमेशेर तुसन पुड़ अपनि छाप लाई, ई छाप पवित्र आत्मा आए, जै तैनी असन दित्तो, जेसेरो वादो तैनी कियोरो थियो।

14 पवित्र आत्मा भी छुटकारेरे सैयरो जेरो आए, जै पक्कू केरते कि परमेशेरे असन तै विरासत देलो जेसेरो तैनी वादो कियोरोए, ते तैनी अस अपने लोकां केरे रूपे मां धिनोरम, ताके तैसेरे महिमारी बडयाई भोए।

~~~~~

15 एल्हेरलेइ, जेइसेरू मीं शुनेरूए कि तुस प्रभु यीशु पुड़ विश्वास केरतथ ते परमेशेरेरे सेब्बी लोकन सेइं प्यार केरतथ,

16 तुश्शे लेइ परमेशेरू शुकर केरुन न शैरी, ते अपने प्रार्थनान मां तुसन याद केरताई।

17 अवं प्रार्थना केरताई कि परमेशर, इश्शे प्रभु यीशु मसीहेरे महिमा बाले बाजी, तुसन पवित्र आत्मा दे, तै तुसन अक्लमन्द बनालो ते परमेशेर तुसन पुड़ बांदो केरेलो, ताके तुस तैस पिशैनी बटथ।

18 अब ई भी प्रार्थना केरताई कि तै तुशुशे मने खोलेलो, कि तुस बुद्धथ कि इशुशे कुजानेरी कुन उमीद आए, ते केत्री महान ते महिमा बैली बरकतां केरे लेइ परमेशरे अपने लोकन जो वादो कियोरोए।

19 ते तैसेरी शक्ति इशुशे लेइ जैना अस विश्वास केरतम, केत्री महाने, तैसेरी शेक्तेर कम्मरे मुताबिक,

20 जैन तैनी मसीहेरे वारे मां कियूं, कि तैस मुडदन मरां ज़ीते केरतां स्वर्गे मां अपने देइने पासे विशालो।

21 तैड़ी तै हर किसमेरी हकौमत, ते अधिकार, ते शक्ति, ते प्रभुता, ते तैसेरी पदवी हर एक्के अधिकैरी करां तै महान आए, जैना न सिर्फ इस जहानी मां, पन एजनेबाले जहानी मां भी आए।

22 ते परमेशरे सब किछ मसीहेरे अधिकारे मां कियूं, तैनी सेबभी चीज़न पुड़ अधिकारी बनेइतां कलीसिया दित्तो।

23 कलीसिया मसीहेरी जान आए, ते तैसेरी भरपूरी जै सेबन मां सब किछ पूरू केरतीए।

2

~~~~~

1 बीतारे वक्ते मां परमेशरेरे तरफां तुसन कां नब्वीं ज़िन्दगी न थी; तुस अपने पाप ते बुरे कम्मां केरे वजाई मरोरे लोकां केरे ज़ेरे थिये।

2 तैस वक्ते तुस दुनियारे रीति पुड़ च़लते थिये, ते तुस अम्बरेरे दुष्ट आत्मा केरे अधिकैरी मुताबिक च़लते थी, ज़ेसेरी आत्मा हेजू भी परमेशरेरे हुक्म न मन्नेबाले लोकां केरे मन्न मां कम केरती।

3 एन मां अस भी सब पेइले अपने जिसमेरे खुवैइशन मां दिहाड़े कटते थी, ते जिसम, ते मनेरी मर्ज़ी पूरी करते थी, ते होरि लोकां केरे ज़ेरे स्भावे सेइं बुरे थिये ते परमेशरेरे सज़ारे अधीन थिये।

4 पन परमेशर ज़ै बड़ो दया करनेबालोए; अपने तैस बड़े प्यारे सेइं, ज़ैस सेइं तैने असन सेइं प्यार कियो।

5 ज़ैखन अस पापां केरे वजाई सेइं मरें लोकां केरे ज़ेरे थिये, तैनी असन ज़िन्दगी दित्ती ज़ैखन तैनी मसीह मुडदन मरां ज़ीतो कियो, परमेशरेरे अनुग्रहे सेइं तुसन मुक्ति मैलोरीए।

6 किजोकि तैनी अस मसीह सेइं साथी मुडदन मरां ज़ीते किये, ते स्वर्गेरे टैरन मां तैस सेइं साथी विशाले।

7 परमेशरे एन कियूं कि एजनेबाले वक्ते मां दुनियारे लोकन हिराए कि तैसेरो अनुग्रह केत्रो महान आए। ई अनुग्रह इशुशे लेइ हिराव, तैने इशुशे लेइ एन कियूं जैना अस यीशु मसीह मां आम।

8 किजोकि विश्वासेरे ज़िरिये परमेशरेरे अनुग्रहे सेइं तुसन मुक्ति मैलोरीए, ते तुसेईं अपनो आपे एप्पू नई बच्चावरो बल्के परमेशरेरे दाने सेइं तुस बच्चेरेथ।

9 ते भले कम्मन सेइं नई, एरू न भोए कि कोई घमण्ड केरे।

10 किजोकि अस परमेशरेरे बनोरेम; ते मसीह यीशु मां तैन भले कम्मां केरे लेइ पैदा कियोरेम, ज़ैना परमेशरे पेइले इशुशे केरनेरे लेइ तियार करां।

~~~~~

11 एल्हेरेलेइ याद केरा, कि तुस ज़ैना ज़रमनेरे गैर कौमरेथ, ते खतनो कियो लोक तुसन जो बगैर खतने बाले ज़ोतन।

12 तुस लोक तैस वक्ते मसीह न थिये ज़ानते, ते तुस परमेशरेरे चुनोरे इस्राएली लोक न थिये, ते तुस तैन रोड़ी चीज़न मां हिस्सेदार न थिये ज़ैन करो वादो परमेशरे यहूदी लोकन सेइं कियोरो थियो, ते न उमीद ते दुनियाई मां परमेशरे करां दूर थिये।

13 पन अक वक्त थियो कि तुस परमेशरे करां दूर थिये, पन हुनी यीशु मसीह मां तैसेरे खून सेइं नेड़े आनोरेथ।

12 किजोकि मसीह पुड़ इशशो विश्वासे, तैसेरे वजाई सेइं अस परमेशेरी मौजूदगी मां हिम्मत ते भरोसे सेइं साथी एज्जी बटतम।

13 एल्हेरेलेइ अवं बिनती केरताई कि जैना दुःख तुशशे लेइ मीं पुड़ लोरेन एजने, तैन केरे वजाई सेइं दिलेरी न शैरी, किजोकि इन सब तुशशे फैइदेरे लेइ आए।

~~~~~

14 एल्हेरेलेइ अवं तैस बाजी परमेशेरे कां जैभू केरे भारे प्रार्थना केरताई,

15 तैए आए जै स्वर्ग ते धेरेती पुड़ रानेबाले विश्वासी लोकां केरो बाजी।

16 कि तै अपने महिमारे धनेरे मुताबिक तुसन इन दान दे, कि तुस तैसेरी आत्माई सेइं अपनो एनतरीयों मैन्हु मां शक्ति हासिल केरतां मजबूत भोते गाथ।

17 ते विश्वासे सेइं मसीह तुशशे दिले मां राए, कि तुस प्यारे मां ज़ील छेडतां ते मुनीयाद छेडतां,

18 सब पवित्तर लोकन सेइं रोड्चारे समझनेरी शक्ति हासिल केरा; कि तैसेरी चौड़ाई, ते लमबाई, ते ऊँचाई, ते डुघार केतरोए।

19 ते अवं प्रार्थना केरताई कि तुस मसीहेरे तैस प्यारे सेमझी बटतथ जै समझी करां बेइरे, कि तुस परमेशेरी भरपूरी सेइं भेरोते गाथ।

20 हुनी जै एरो शेक्ति बालोए, जै इशशी बिनती ते समझी करां बडू जादे कम केरि बटते, ते तैस शेक्तेरे मुताबिक असन मां कम केरते,

21 कलीसिया मां, ते मसीह यीशु मां, तैसेरी महिमा पीडी करां पीडी तगर हमेशा भोती राए। आमीन।

## 4

~~~~~

1 अवं जै प्रभुएरी सेवा केरनेरे वजाई सेइं कैदे मां आई, तुसन कां बिनती केरताई, कि जेन्वरे परमेशेरे तुस अपन लोक भोनेरे लेइ कुजेवरेथ, तैसेरे मुताबिक जिन्दगी भी ज़ीथ।

2 मतलब सैरी दीनतां ते नम्रता सेइं साथी, ते सवर केरतां प्यारे सेइं एक्की हॉरेरी झल्लां।

3 इस कम्मे मां अपनि पूरी कोशिश केरा ताके तुस मेल मिलापे सेइं राथ, किजोकि पवित्तर आत्माए ज़िरिये तुस अक कियोरेथ।

4 अस सारे विश्वासी एक्की जानरे अंगां केरे ज़ेरे आम, ते असन सेबन अक्के पवित्तर आत्माए मैलोरोए; ते तुसन अक्के उमीद दिती, जैखन तुस परमेशेरे लोक भोनेरे लेइ चुने जे।

5 अक्के प्रभुए जै यीशु मसीहे, जैस पुड़ अस सब विश्वास केरतम, ते असेई सेबन अक्के बपतिस्मो मैल्लो।

6 ते अक्के परमेशेरे, जै सेबनी केरो बाजीए, तैए सेबन पुड़ राज़ केरते ते इशशे दरमियान कम केरते, ते असन सेबन मांए रहते।

7 पन मसीहे असन मरां हर एक्की तैसेरू कम केरनेरे लेइ अलग-अलग किसमेरी काबलीत दितीरीए।

8 एल्हेरेलेइ पवित्तरशास्त्र ज़ोते,

“जैखन तै उच्चे पुड़ चादो,

ते तैने बडे कैदी एप्पू सेइं साथी ने,

ते तैने लोकन बेड़ि बरकतां दिती।”

9 (तैसेरे उच्चे चढ़नेरो साफ मतलब ई आए, कि मसीह धेरतेरे बुनीयें ठारन मां ओरो थियो।

10 एल्हेरेलेइ मसीह बुन ओरो थियो, तैए आए जै सैरी अम्बरे करां भी उबरो जेव, मसीहे एन एल्हेरेलेइ कियू ताके सब किछ तैसेरे हज़ूरी सेइं भरपूर भोए)

11 ते तै मसीहे ज़ेने (कलीसियाई) ज़िमेबारी दिती, तैने किछ प्रेरित किछ नबी, किछ खुशखबरी शुनाने बाले, किछ रखवाले ते किछ उस्ताद चुने।

12 मसीहे अपने लोकन इना जिमेदारी एल्हेरेलेइ दित्तोरिन, कि कलीसिया जै मसीहेरी जाने तरक्की केरे।

13 जैखन कि अस सब विश्वास, ते परमेशेरे मट्टेरी पिशानी मां अक भोम, ते ज्ञांतगर अक सिद्ध मैन्हु न भोम ते मसीहेरे कदेरे अनदाजे तगर न पुजाम।

14 ताके अस अग्रोवं जो बच्चां केरे जेरे न रहम, जैना मैन्हु केरि ठगनेरी गल्लां ते च्लैकी सेइं तैन केरे कोशिशी सेइं खियालां केरि ते शिक्षारी हर एक्की बयाने सेइं उच्छड़ाए, ते इरां उरां घुमाए गाते भोन।

15 बल्के प्यारे सेइं सन्न ज़ोइतां, सेभी गल्लन मां मसीहेरे जेरे सिद्ध भोथ जै कलीसियारी क़ोडी।

16 जैस सेइं सारी जान सेभी जोड़ां केरि मट्टी सेइं साथी मिलतां, ते साथी जुड़तां तैस अस्सरेरे मुताबिक जै सेभी हिसन सेइं भोइतां, अपने आपे बद्धाते, कि तै प्यारे मां तरक्की केरतो राए।

~~~~~

17 एल्हेरेलेइ अवं इन ज़ोताई, ते प्रभु मां खबरदार केरताई कि जेन्चरे गैर विश्वासी लोकां केरे लोक अपने मनरे बेकार खियालन पुड़ चलतन, तुस अजेरे बाद तैन केरे जेरे न चला।

18 किजोकि तैना बेसमझ भोरेन, ते तै अज्ञानतारी वजाई सेइं ते सखत मनरे वजाई सेइं तैना तैस जिन्दगी करां दूर आन जै परमेशर देते।

19 ते तैना वेशर्म भोइतां, एशे मां लेगि जे, कि सेभी किसमेरां गन्दां कम्मां शोके सेइं केरन।

20 पन तुसन मसीहेरी एरी शिक्षा नई मैल्लोरी।

21 बल्के मीं पूरू याकीने कि जैखन तुसेईं यीशुएरे वारे मां अपने उस्तादन करां शुनु, त तुसेईं तैन करां सच्चि शिक्षा शिख्वी।

22 कि तुस पेइले चाल चलनेरे पुरानी इन्सानयती जै टपलाने बैली इच्छां केरे मुताबिक भ्रष्ट भोइ गातीए, खोल्ला।

23 इसेरे बदले पवित्र आत्मा तुशे खियालन ते नज़िरियो बदले।

24 परमेशेरे तुसन नव्वों स्वभाव दित्तोरिए, जै तैसेरे स्वभावेरे जेरो आए। त तुस नव्वें स्वभावेरे जेरे ज़ीथ। सच्चेरे तुस धर्मां ते पवित्र भोथ।

25 एल्हेरेलेइ झूठ ज़ोनू शैरतां हर कोई अपने पड़ोसी सेइं सन्न ज़ोए, किजोकि अस एप्पू मामेइं एक्की जानेरे अंग आम।

26 अगर तुस क्रोधे मां भोथ खबरदार राथ, कि पाप न केरथ, दिहाड़ो डुबने तगर तुशेरो क्रोध मुक्की गाए।

27 ते शैताने मौको न देथ कि तै तुशेरी अज़मैइश केरे।

28 चोरी करनेबालो फिरी चोरी न केरे; बल्के इमानदेरी सेइं अपने हथ्यन सेइं मेहनत केरे; एल्हेरेलेइ जैस ज़रूरत भोए तैस देनेरे लेइ तैस कां किछ भोए।

29 कोई गन्दी गल तुशे ज़बाना न निस्से, पन ज़रूरतेरे मुताबिक तैन्ने ज़ोथ, जैन होरि केरे लेइ विश्वासे मां मज़बूती सेइं बद्धनेरी वजा भोए। तैखन जैन तुसेईं ज़ोवं तैन लोकां केरे लेइ रोडू भोलू जैना तुशेरी शुन्तन।

30 ते जैन किछ तुस केरथ तैसेरे वजाई सेइं परमेशेरेरे पवित्र आत्मा दुखी न केरा, जैस सेइं तुसन पुड़ छुटकारेरे दिहाड़ेरे लेइ छाप दित्तोरिए।

31 सेभी किसमेरी टलइठार ते प्रकोप, ते क्रोध, सखत गल, ते तुहीन ते सारो बैर-भाव सेइं तुस दूर कियोरथ।

32 ते एक्की होरि पुड़ दया केरा, ते माफ़ करनेबाले भोथ, ते जेन्चरे परमेशेरे मसीह मां तुशे पाप माफ़ किये, तेन्चरे तुस भी एक्की होरेरे पाप माफ़ केरा।



- 1 एल्हैरेलेइ तुस परमेशेरे बच्चेथ जैन सेइं तै प्यार केरते, तैसेरे जेरे बन्नेरी कोशिश केरा ।
- 2 होरि केरे लेइ प्यारे सेइं भेरतां जिन्दगी जीथ, जेन्चरे मसीहे भी तुसन सेइं प्यार कियो; ते इशे लेइ अपनो आप रोड़ी मुशकरे लेइ परमेशेरे कां च्छेदतां बलिदान केरो ।
- 3 ते जेरू परमेशेरे लोकां केरे लेइ जरूरीए, तेन्चरे तुसन मां भी बदमाशी, ते कोन्ची किसमेरू बुरू कम न भोए, या लालचरे बारे मां गल भी न भोए ।
- 4 ते न बे शरमी, न बेंसरी गल्लां, न मेवजेरी गल्लां, किजोकि इना गल्लां शोभन्न न, बल्के तुसेईं परमेशेरू शुकर कियोरू लोडे ।
- 5 किजोकि तुस इन ज्ञानतथ, कि कोन्ची बदमाश, या भिट्टो मैन्हु, या लालची मैनेरो जै मूरती पूजा केरनेबालोए, मसीह ते परमेशेरे राज्जे मां तैसेरो कोई हिस्सो नई ।
- 6 कोई तुसन ई सल्लाह देइतां धोखो न दे, कि परमेशेरे हकीकति मां तैन सजा न देलो जैना एरे पाप केरतन ।
- 7 एल्हैरेलेइ तैन केरू साथ न रखा ।
- 8 किजोकि तुस त पेइले आंधरू थी, पन हुनी प्रभु यीशु मां लोआथ, ते लोअरे बच्चां केरे जेरे चला ।
- 9 (किजोकि लोअरो फल सेभी किसमेरी भलाई, ते धार्मिकता, ते सच्चे) ।
- 10 ते इन तोप्पां कि प्रभु कुन रोडू लगते ।
- 11 ते आंधेरां ते बेकार कम्मन मां शामिल न भोथ, बल्के लोकन इन हिराथ कि इना कम्मां बुरन ।
- 12 किजोकि गैर विश्वासी लोकां केरां छुपोरां कम्मां केरि गल केरनि भी शर्मांरी गल आए ।
- 13 जैखन लौ कोन्ची चीजी पुड़ चमकती त हर कोई लेई बटते कि इन केरू, किजोकि जैखन लौ किछ हिराती, त तै चीज एप्पू लो भोइ गातीए ।
- 14 एल्हैरेलेइ एन्चरे ज़ाव गाते,  
“हे झुलने बाला उठ  
ते मुडदन मरां जीतो भो,  
ते मसीहेरी लौ तीं पुड़ चमकेली।”
- 15 एल्हैरेलेइ रोडे च़ारे हेरा, कि केरि जिन्दगी जीने लोरेथ । बेअक्लां केरि ज़ेरि नई पन अक्लमन्दा केरि ज़ेरि जिन्दगी जीथ ।
- 16 ते मौको कीमती समझा, किजोकि दिहाडे बुरेन ।
- 17 एल्हैरेलेइ बेअक्ल न बना, पन ध्याने सेइं समझा, कि प्रभुएरी तुशे लेइ कुन मर्जीं ?
- 18 ते शराब पीने मां मतवाले न भोथ, किजोकि एस सेइं बदचलनी भोतीए, पन पवित्तर आत्मा सेइं भेरोते राथ ।
- 19 ते एप्पू मांमेइं परमेशेरां भजन ते स्तुति केरते ते आत्मिक गीत ज़ोथ, ते अपने-अपने मने मां प्रभुएरे लेइ गीत ज़ोथ ते किरतन केरते राथ ।
- 20 ते सदा सेभी गल्लां केरे लेइ प्रभु यीशु मसीहेरे नव्ये सेइं वाजी परमेशेरू शुकर केरते राथ ।
- 21 ते मसीहेरे डरे सेइं एककी होरेरे अधीन राथ ।
- ~~~~~
- 22 हे कुआन्शव, अपने-अपने मुन्शां केरे अधीन राथ, जेन्चरे प्रभुएरे ।
- 23 किजोकि मुन्श त कुआन्शरी क्रोड़ी जेन्चरे मसीह कलीसियारी क्रोड़ी, ते मसीह कलीसियारो मुक्ति देनेबालोए ज़ै तैसेरी जाने ।
- 24 जेन्चरे कलीसिया मसीहेरे अधीने, तेन्चरे कुआन्शां भी हर गल्लती मां अपने-अपने मुन्शेरे अधीन रान ।
- 25 हे मुन्शव, अपने-अपने कुआन्शन सेइं प्यार केरा, जेन्चरे मसीहे भी कलीसिया सेइं प्यार केरतां अपनो आप तैसेरेलेइ दित्तो ।
- 26 ताके तैस वचनेरे ज़िरिये पैनेरे निहाने सेइं शुद्ध केरतां पवित्तर बनाए ।

27 ते तैस अक एरी महिमा वाली कलीसिया बनेइतां एप्पू कां खडी केरे, जैस मां न कोई दाग, न धबो, न कोई एरी चीज भोए, बल्के पवित्र ते बेइलजाम भोए।

28 एन्चरे मुन्श अपने कुआन्शी सेइं अपने जानी बराबर प्यार केरे। जै अपने कुआन्शी सेइं प्यार करते, तै एप्पू सेइं प्यार करते।

29 किजोकि कोन्चे कधी अपने जानी सेइं बैर नई रखोरो, बल्के तैसेरी हेरगेश कियोरीए, जेन्चरे मसीहे भी कलीसियाई सेइं करते।

30 एल्हेरेलेइ अस मसीहेरे जानरे अंगां केरे जेरे आम।

31 जेन्चरे पवित्रशास्त्र ज़ोते “एल्हेरेलेइ मइद अम्मा बाजी शैरतां अपने कुआन्शी सेइं मिलोरो रालो।”

32 ई भेद त बड़ोए; पन अवं मसीह ते कलीसियारे बारे मां ज़ोताई।

33 पन तुसन मरां हर कोई अपने कुआन्शी सेइं एप्पू बराबर प्यार केरे, ते कुआन्श भी अपने मुन्शेरो इज्जत केरे।

## 6

### एप्पू एप्पू एप्पू एप्पू

1-3 पवित्रशास्त्र ज़ोते, “अपने अम्मा ते बाजी केरि आदर केरा, तैखन तुशू भलू भोलू ते दुनियाई मां तुशू लम्मी उमर भोली।” ई पेइलो हुक्मे जैस सेइं परमेशेरे वादो कियोरोए, त बच्चव इन तुशू लेइ रोडू आए, तुस जैना प्रभु यीशु पुइ विश्वास केरतथ, अपने अम्मा बाजी केरू ज़ोनू मन्ना।

4 ते हे बच्चन बालव, अपने बच्चन न सरकाथ, पन प्रभुएरी शिक्षा ते खबरदारी देइतां, तैन केरि हेरगेश केरा।

### एप्पू एप्पू एप्पू

5 हे गुलामाव, जैन लोक दुनियारे मुताबिक तुशू मालिकन, अपने मनरे सचैई सेइं डरते, ते थरकते, ते जेन्चरे मसीहेरो तेन्चरे तैन केरो भी हुक्म मन्ना।

6 ते मैन्हु खुश केरेने बालां केरि जेरे हिरानेरे लेइ सेवा न केरा, पन मसीहेरे दासां केरे जेरे मने सेइं परमेशेरी मेर्जी पुइ चला।

7 ते तै सेवा मैन्हु केरि नई, पन प्रभुएरी जैनतां केरा।

8 किजोकि तुस ज्ञानतथ, कि जै कोई जेरू रोडू कम केरेलो, चाए गुलाम भोए, चाए आज्ञाद; तैस प्रभु करां तेरहु इनाम मैलेलू।

9 एन्चरे हे मालिकव, तुस भी धेमकी शैरतां अपने नौकरन सेइं रोडो बर्ताव केरा, किजोकि तुस ज्ञानतथ, कि तैन केरो ते तुशू दुइयां केरो मालिक स्वर्गे मांए, ते तै केन्चेरी तरफदारी न केरे।

### एप्पू एप्पू एप्पू एप्पू

10 आखरी मां तुस प्रभुएरी शक्ति बाले शक्ति मां मजबूत बना।

11 परमेशेरे सारे हथियार बन्धा; ताके तुस शैतानेरे सारे मन्सूबां केरो मुकाबलो केरि बटतथ।

12 किजोकि इशू ई लडाई, खूने या मांस सेइं यानी मैन्हु केरे खलाफ नई, बल्के प्रधान सेइं, ते अधिकैरन सेइं, ते इस दुनियारे आंधरेरे हाकिमन सेइं ए, ते तैस दुष्टेरे आत्मिक फौजन सेइं ए जैना आसमाने मां आन।

13 एन्हेरेलेइ परमेशेरे सारे हथियार बन्धा, ताके तुस जेइस बुरे दिहाइन एजन त तुस सामनो केरि बटतथ, ते सब किछू पूरू केरतां मजबूत राथ।

14 परमेशेरे सचूचाई पटकेरी जेरि अपने कमरी सेइं बन्धा, ते धार्मिकतारी झिलम लेइतां,

15 ते पवन्न मां मेलेरे खुशखबरी शुनानेरे तियैरारे बूट लाथ।

16 ते तैन सेम्बन सेइं साथी विश्वासेरी ढाल घिन्तां मजबूत भोथ जैस सेइं तुस तैस शैतानेरे सब जलते तीर हिशेई बटथ।

17 ते मुक्तरो टोप, ते आत्मारी तलवार जैन परमेशेरे बचने, नेथ।

18 ते हर वक्त ते हर किसमे सेइं जै पवित्तर आत्मा चलाने सेइं प्रार्थना ते बिनती करते राथ, ते बीझे राथ, कि सब परमेशेरे लोकां केरे लेइ लगातार बिनती केरा ।

19 ते मेरे लेइ भी, कि मीं वचन शुनानेरे वक्त हिम्मत भोए, कि अवं दिलेरी सेइं खुशखेबराओ भेद जोई बेटि ।

20 एल्हेरेलेइ अवं शंगलन सेइं बन्धोरो राजदूतेरो जेरो सेवा करनेवालोई । प्रार्थना केरा कि जेन्चरे मीं शुनावरू लोडे, तेन्चरे अवं दिलेरी सेइं खुशखेबरी शुनेई बेटि ।

~~~~~

21 तुस भी, अवं जोई बटताई ते कुन करने लोरोई, इस सेइं बुझा । तुखिकुस जै तुसन सब किछ जोलो । तै इशशो टलारो साथीए, ते प्रभु मां वफादार सेवके ।

22 तै मीं तुसन कां एल्हेरेलेइ भेजोरोए, कि तुस इशशी हालती ज्ञानथ, ते तै तुशशे मन्न मां हिम्मत दे ।

23 अवं प्रार्थना केरताई कि इशशो बाजी परमेशेरे ते प्रभु यीशु मसीह तुसन विश्वासी लोकन शान्ति दे, ते तैना तुसन एककी होरि सेइं प्यारे मां ते मसीह पुइ विश्वासे मां बनोरे रानेरे वजा भोन ।

24 जैना इशशे प्रभु यीशु मसीह सेइं सच्चो प्यार केरतन, तैन सेब्बन पुइ अनुग्रह भोतो राए ।

फिलिपियों

1 अवं पौलुस, त कने तीमुथियुस, यीशु मसीहेरे दास आम। इशुशे तरफां सेब्मी पवित्तर लोकां केरां नंवां, जैना मसीह यीशु मां भोइतां फिलिप्पी नगरे मां रातन, रखवालन ते सेवकन समेत,
2 इशुशे बाजी परमेशर ते प्रभु यीशु मसीहे केरां तुसन अनुग्रह ते शान्ति मैलती राए।

????????? ?????????? ? ??? ?????????? ??????

3 अवं जैखन-जैखन तुसन याद करताई, तैखन-तैखन अपने परमेशेरू शुक्र करताई।
4 ते जैखन भी तुशुशे सेब्मी केरे लेइ बिनती करताई, ते हमेशा आनन्दे सेइं प्रार्थना करताई।
5 किजोकि तुस पेइले दिहैडे केरां अज तगर यीशु मसीहेरी खुशखबरी फैलाने मां मीं सेइं साथी शामिल रावरेथ।
6 ते मीं इस गल्लरो भरोसोए, कि परमेशेरु तुसन मां रोडे कम्मेरी शुरुआत कियोरीए, तैए तैस कम्मे यीशु मसीहेरे वापस एजनेरे दिहाडे तगर पूरू केरेलो।
7 इन जेइजे, कि अवं तुसन सेब्मी केरे लेइ एरू सोची, किजोकि तुस मेरे मने मां बस्सोरेथ, ते मेरे कैदे मां खुशखेबरोरे लेइ जुवाब ते सबूत देने मां तुस सब मीं सेइं साथी अनुग्रह मां मीं साथिथ,
8 इस मां परमेशर मेरो गवाहे, कि अवं यीशु मसीहेरो जेरो प्यार केरतां तुशुशे सेब्मी केरू लालच करताई।
9 ते अवं ई प्रार्थना करताई, कि तुशुशो प्यार ज्ञान ते सेब्मी किसमेरो ज़मीर सेइं हारे भी बद्धते गाथ।
10 इडी तगर तुस रोड़ी केरां रोड़ी गल्लां टलाएरी बुझा, ते मसीहेरे दिहाडे तगर सच्चे बनोरे राथ; ते टोकर न खाथ।
11 ते तैस धार्मिकतारे फले सेइं जै यीशु मसीहेरे ज़िरिये भोते, भेरोते गाथ जैस सेइं परमेशेरुी महिमा ते बड्याई भोती राए।

????????? ???? ???? ?????????? ??????

12 हे दलाव ते बेइनव, अवं सच्च ज़ोताई, कि तुस इन ज़ाना, कि मीं पुड जै बीतोरीए, तैस सेइं खुशखेबारी बडोतरी भी भोइ।
13 इडी तगर कि महाराजरी सारी फौज ते बाकी सारे लोकन मां इन बांदू भोव कि अवं मसीहेरे लेइ कैद मां आई।
14 ते प्रभु यीशु मां जैना दला आन, तैन मरां बडे मेरे कैद भोनेरे वजाई सेइं आन, तैना हिम्मत केरतां परमेशेरुो वचन बेधड़क भोइतां ते दिलेरी सेइं शुनानेरी कोशिश केरतन।
15 किछ लोक त जलन ते लडैई सेइं मसीहेरो प्रचार केरतन ते किछ लोक सच्चे दिले सेइं।
16 किछ त इन सेमझतां कि अवं खुशखेबरोरे लेइ जुवाब देनेरे लेइ ठेरावरोई प्यारे सेइं प्रचार केरताई।
17 पन तैना हारे लोक साफ दिले सेइं नई पन जलनी सेइं मसीहेरो प्रचार केरतन, इन सेमझतां कि मेरे कैद मां मेरे लेइ मुसीबत बधान।
18 त कुन भोव? सिर्फ इन, कि हर बत्तां चाए बुरे खियाले सेइं, चाए सच्चैई सेइं, मसीहेरे बारे मां खुशखबरी प्रचार भोतीए, ते अवं इस सेइं खुश आई, ते खुश भी रेइलो।

???? ???? ????? ???? ?

19 किजोकि अवं ज्ञानताई, कि तुशुशी प्रार्थनाई सेइं, ते यीशु मसीहेरी आत्मारे दाने सेइं इसेरो नितीजो मेरी मुक्ति भोली।
20 अवं त दिले सेइं इन चाताई, ते ई उमीद रखताई, कि अवं कोन्ची गल्ली मां न छिथोई, बल्के जेन्चरे मेरी बडी दिलेरी सेइं मसीहेरी बड्याई मेरे जिसमे सेइं भोती राई, तेन्चरे हुना भी भोए चाए अवं ज़ीतो रेइ या मेरीं।

- 21 किजोकि मेरे लेइ ज़ीतू रानू मसीहे, ते मरनू फैइदोए ।
- 22 पन अगर जिसमे मां ज़ीतू रानू मेरे कम्मरे लेइ फैइदेमंदे त अवं न ज़ैनी, कि केस चुनी ।
- 23 किजोकि मीं दुइयां केरे मझाटे चुने मां मुशकिल भोने लोरीए । अवं मरनू चाताई ताके स्वर्गे मां मसीह साथी रेइ बेटि, किजोकि इन बडू ज़रूरीए ।
- 24 पन तुशशी मद्दत केरनेरे लेइ मेरू ज़ीतू रानू बडू ज़रूरीए ।
- 25 एल्हेरेलेइ कि मीं इलहेरो भरोसोए ते अवं ज़ानताई कि अवं ज़ीतो रानोई, बल्के तुसन सेभन सेइं साथी रानोई ज़ैस सेइं अवं तुशशी मद्दत केरि, कि विश्वासे मां मज़बूत भोथ, ते इस मां खुश राथ ।
- 26 ज़ैखन अवं तुसन कां दुबारां एज्जी, तुसन कां जादे वजा भोली यीशु मसीह पुइ घमण्ड केरनेरी एल्हेरेलेइ ज़ैन किच्छ तै मेरे ज़िरिये केरने लोरोए ।
- 27 सिरंफ एतरू केरा कि तुशशो चालचलन मसीहेरे खुशखेबारे काबल भोए । चाए अवं तुसन एइतां हेरी, चाए न एज्जी, तुशशे बारे मां इन शुनी, कि तुस अक मन भोइतां बनारे रातथ, ते अकोट्टे भोइतां खुशखेबारे विश्वासेरे लेइ मेहनत केरते रातथ ।
- 28 ते कोन्वी गल्ली मां खलाफत केरनेबालन करां न डराथ । ई तैन केरे लेइ बरबाद भोनेरो साफ निशाने, पन तुशशे लेइ मुक्तरो, ते इन परमेशेरे तरफां आए ।
- 29 किजोकि मसीहेरे वजाई सेइं तुसन पुइ ई अनुग्रह भोव कि न सिर्फ तैस पुइ विश्वास केरा पन तैसेरेलेइ दुःख भी झैल्लां ।
- 30 ते तुसन तेन्चरे मुसीबत केरनीए, जेन्चरे तुसेईं मीं करां केरते लोरीए, ते हुना भी शुन्तन, कि अवं तेन्चरे केरताई ।

2

?????? ???? ?

- 1 अगर मसीह मां किच्छ तसल्ली ते प्यारे सेइं हिम्मत ते आत्मारी मौजूदगी, ते किच्छ दर्द ते दयाए ।
- 2 ते मेरो ई आनन्द पूरो केरा कि अक्के मन राथ ते अक्के प्यार, ते अक्के खियाल, ते अक्के सोच रखा ।
- 3 खुदगरज या झूठी बड्यैयरे लेइ किच्छ न केरा पन नर्म भोइतां एक्की होरि एप्पू करां रोडो समझा ।
- 4 तुसन मरां हर कोई सिर्फ अपने भलैइयरे लेइ न सोचे, बल्के होरि केरि भलैइयरे लेइ भी सोचे ।
- 5 जेन्चरे यीशु मसीहेरो सुभाव थियो तेन्चरे तुशशो भी भोए ।
- 6 ज़ैने परमेशेरे बराबर भोइतां भी परमेशेरे बराबर भोने अपने कब्जे मां रखनेरी चीज़ न समझू ।
- 7 बल्के अपना आप खाली केरो, ते गुलामेरू रूप धारण केरू, ते मैन्हु केरे ज़ेरो बनो ।
- 8 ते मैनेरे रूपे मां बांदो केरतां दीन केरो, ते इडी तगर हुक्म मन्ने बालो राव, कि मौत, हाँ, क़ूसेरे मौत भी झैल्ली ।
- 9 एल्हेरेलेइ परमेशेरे तै बडो महान भी केरो, ते तैस तैन नवं दिन्तू ज़ैन सेभनी नव्वन करां बड्डूए ।
- 10 कि स्वर्गे मां ते धेरती पुइ ते धेरतलरे बुने; तैना सब यीशुएरे नव्वे पुइ ज़ैधूए टेकन ।
- 11 ते बाजी परमेशेरी महिमारे लेइ हर अक ज़िभ मन्ने कि यीशु मसीह प्रभुए ।

?????? ? ? ?

- 12 ते हे मेरे ट्लारव, जेन्चरे तुस सदा हुक्म मन्ते ओरेथ, तेन्चरे हुना भी न सिर्फ मीं सेइं साथी रेइतां पन खास केरतां ज़ैखन अवं दूर भोताई फिरी भी डरते राथ ते थरकते अपने मुक्तरू कम पूरू केरते गाथ ।
- 13 किजोकि परमेशर ज़ै तुसन मां कम केरते, ते तुसन इच्छा ते शक्ति तैन केरनेरे लेइ देते, ज़ैस सेइं तै खुश भोते ।
- 14 त सब कम्मां बगैर शकैइतां ते बगैर बेंसी सेइं केरा ।

15 ताके तुस बेइलज़ाम ते शरीफ भोइतां टारे ते ढीठ लोकन मां परमेशेरे बेइलज़ाम बच्चे बना, जैन मां तुस ज़िन्दगरो वचन धिन्तां दुनियाई मां बलते दीयां केरे ज़ेरे लेइहोते रातथ,

16 कि मसीहेरे वापस एजनेरे दिहाड़े घमण्ड केरनेरी वजा भोए, कि न मेरी दौड़-धूप ते न मेरी मेहनत बेकार भोए।

17 अगर मीं तुश्शे विश्वासेरे बलिदाने या सेवारे लेइ अपनो खून भी बगानो पे, त फिरी भी अवं खुश आई, ते तुसन सेबभी साथी खुश आई।

18 तेन्चरे तुस भी खुश भोध, ते मीं साथी आनन्द केरा।

~~~~~

19 मीं परभु यीशु मां उमीदे, कि अवं तीमुथियुसे तुसन कां जल्दी भेजेलो, ताके तुश्शो हाल शुन्तां मीं शान्ति मैल्ले।

20 किजोकि मीं कां एरे ज़ेरे सुभावरो कोई नई, ज़ै साफ दिले सेइं तुश्शी फिकर केरे।

21 किजोकि सब अपने फैइदो तोपतन, न कि यीशु मसीहे।

22 पन तुसेईं तै परखो ते पिशानो भी, कि ज़ेन्चरे मट्टू वाजी साथी केरते, तेन्चरे तैनी मीं सेइं साथी खुशखबरी फैलाने मां मीं सेइं साथी मेहनत केरि।

23 ते मीं उमीदे, कि ज़ैखन मीं पतो च़ल्लेलो कि मेरी कुन हालत भोली, तैखन अवं तैस लूशी भेजेलो।

24 ते मीं परभु मां भरोसोए, कि अवं एप्पू भी जल्दी एज्जेलो।

25 पन मीं इपफरुदीतुस ज़ै मेरो ढलाए, ते मट्टतगार, ते साथी योधो ते तुश्शो दूते, ते ज़रूरी गल्लन मां मेरी सेवा टेल केरनेबालोए, तुसन कां भेजना ज़रूरी समझो।

26 किजोकि तैसेरो मन तुसन सेबन मां लगगोरो थियो। एल्हेरेलेइ बे चैन रातो थियो किजोकि तुसेईं तैसेरे बिमैरारो हाल शुनोरो थियो।

27 ते तै सच्चे विमार त भोरो थियो, इडी तगर कि मरने पुड़ थियो, परमेशेरे तैस पुड़ दया की; ते सिर्फ तैस्से पुड़ नई, पन मीं पुड़ भी, कि मीं दुःखे पुड़ दुख न भोए।

28 एल्हेरेलेइ अवं तैस भेजनेरी होरि भी कोशिश केरि, तुस फिरी तैस सेइं मिलतां खुश भोइयथ ते मेरो भी दुःख घटे।

29 एल्हेरेलेइ तुस परभु मां बड़े आनन्दे सेइं तैस सेइं मुलाकात केरा, ते एरे ज़ेरे लोकां केरि आदर केरा।

30 किजोकि तैए मसीहेरे कम्मरे लेइ अपनि जान खतरे मां छेडतां मौतरे नेडो पुज्जोरो थियो, ताके ज़ै घाटो तुश्शे तरफां मेरी सेवा मां भोव, तैस तै पूरो केरे।

### 3

~~~~~

1 हे मेरे ढलाव ते बेइनव, परभु मां आनन्दित राथ, तैना गल्लां तुसन बार-बार लिखने मां मीं त कोई कष्ट न भोए, ते इस मां तुश्शी सलामतीए।

2 तैन बुरां कम्मां केरनेबाले लोकन करां हुशार राथ, ज़ैना खुवार कुतरां केरे ज़ेरे खाने बालां आन।

3 किजोकि खतने बाले त असां आम ज़ैना परमेशेरे आत्मारे च़लाने सेइं च़लतम ते आराधना केरतम ते मसीहे यीशु पुड़ घमण्ड केरतम ते जिसमे पुड़ भरोसो न रखम।

4 पन अवं त जिसमे पुड़ भरोसो रेख्खी बटताई अगर कोन्वी होरि जिसमे पुड़ भरोसो रखनेरो वचार भोए, त अवं तैस करां भी जादे रेख्खी बटताई।

5 अठोवं दिहाड़े मेरो खतनो भोव, इस्राएल केरे कुटमे ते विन्यामीनेरे गोत्तरे मरां आई; इब्रैनी केरो इब्रानी; कानूनेरे बारे मां अगर कोई ज़ोए त फरीसी।

6 जोशेरे बारे मां अगर कोई ज़ोए त कलीसियाई सताने बालो; ते अगर कानूनेरे धार्मिकतारे बारे मां कोई ज़ोए त बेइलज़ाम।

7 पन जैना-जैना गल्लां मेरे फैइदेरी थी तैना मीं मसीहेरे खातर नुकसान सैमझोरिन ।

8 बल्के मीं अपने प्रभु यीशु मसीहेरे पिशानारी बड़यैयरे वजाई सेइं अवं सब गल्लां नुकसान समझताई, जेसेरे वजाई सेइं मीं बेड़ि चीजां केरो नुकसान उटाव, ते तैन कूड़ो समझताई, जैस सेइं अवं मसीह हासिल केरि ।

9 ते तैस मां भोइ, न कि एपनी तैस धार्मिता सेइं, जै मूसेरे कानूने सेइं ए, बल्के तैस धार्मिकता सेइं जै परमेशेरे तरफां मसीह पुड़ विश्वास केरने सेइं भोतीए ।

10 ते अवं तैस ते तैसेरे जींती भोनेरी शक्ति, ते तैस साथी दुखन मां शामिल भोई, ते तैसेरी मौतरी बराबरी हासिल केरि ।

11 ताके अवं कोन्ची रीति सेइं मुड़दन मरां जींते भोनेरे पदे तगर पुजी ।

~~~~~

12 ई मतलब नई, कि मीं हासिल करू, या अवं सिद्ध भोइ जेव, पन तैस चीजी हासिल केरनेरे लेइ दौड़ने लोरोई, जेसेरे लेइ मसीह यीशुए अवं ट्लावरो थियो ।

13 हे द्लाव ते बेइनव, मेरू इन गुमान नई कि मीं ट्लाव, पन सिर्फ अक कम केरताई, कि जैना गल्लां पत्रोवं रेइ तैन बिसरतां, अग्री गल्लां केरे पासे गाताई ।

14 निशानेरे पासे दौड़तो चलताई, ताके मीं तैन इनाम मैल्ले, जेसेरे लेइ परमेशेरे अवं मसीह यीशु मां वा कुजेवरोई ।

15 असन मरां जेतरे सिद्धन, ईए विचार रखा, ते अगर कोन्ची गल्ली मां तुशशो होरो खियाल भोए त परमेशर तैस भी तुसन पुड़ बांदो केरेलो ।

16 एल्हेरेलेइ जैडी तगर पुजोरम, तैसेरे मुताबिक चलम ।

17 हे द्लाव ते बेइनव, तुस सब मिलतां मेरी जेरि चाल चला, ते तैन केरि पिशान रखा, जैना इस रीति पुड़ चलतन जेसेरी मिसाल तुस असन मां हेरतथ ।

18 किजोकि बड़े एरी चाल चलतन, जैन केरि चर्चा मीं तुसन सेइं बार-बार की ते अज भी लेरां देइ-देइ ज़ोताई, कि तैना अपने चालचलन सेइं मसीहेरे करूसेरे बैरिन ।

19 तैन केरो अन्त विनाश, तैन केरो ईश्वर पेटे, तैना एपनी शरमरी गल्लन पुड़ घमण्ड केरतन, जमीनारी गल्लन पुड़ मन लातन ।

20 पन इशशो मूलख स्वर्ग, ते अस एक्की मुक्ति देनेबाले प्रभु यीशु मसीह स्वर्गरां बलगने लोरेम ।

21 तैए एपनी शक्ति सेइं तैस अस्सेरे मुताबिक तैना सब चीजन अपने वशे मां केरि बटते, इशशे कमजोर जिसमेरू रूप बेदलतां, अपने महिमारो जिसमेरे मुताबिक बनालो ।

## 4

1 एल्हेरेलेइ हे मेरे ट्लारे द्लाव ते बेइनव अवं तुसन सेइं प्यार केरताई, जैन मां मेरो दिल लगगोरो रहते जै मेरो आनन्द ते ताज भोए, हे ट्लारे द्लाव ते बेइनव, प्रभु मां एन्चरे मजबूत राथ ।

~~~~~

2 अवं यूआदियार छेदे केरताई, ते सुन्तुखेरे भी, कि तैना प्रभु मां अक मन रान ।

3 ते हे सञ्जे महतगार अवं तीं कां भी बिनती केरताई, कि तू तैन कुआन्शां केरि मद्दत केर, किजोकि तैनेई मीं सेइं साथी खुशखबरी फैलाने मां, क्लेमंस ते मेरे तैन मद्दत केरनेबालन समेत मेहनत की, जैन करां नंवां जिन्दगरे किताबी मां लिखोरन ।

4 प्रभु मां सदा आनन्दित राथ; अवं फिरी ज़ोताई, आनन्दित राथ ।

5 तुशशी नरमी सेब्भी मैनन् पुड़ बांदी भोए, प्रभु नेड़ोए ।

6 कोन्ची भी गल्लारी फिकर न केरा, पन हर एक्की गल्ली मां तुशशी दरखुवास, प्रार्थना बिनती सेइं शुकरे साथी परमेशेरे कां हाज़र भोन ।

7 तेखन परमेशेरी शान्ति, जै समझी करां बिलकुल बेइरे, तुशशे दिलन ते तुशशे खियालन मसीह यीशु मां बिलकुल मैफूज़ रखेली ।

8 आखरी मां, हे मेरे दूलाव ते बेइनव, जैना-जैना गल्लां सच्चिन, ते जैना-जैना आदरारे काबलन, ते जैना-जैना गल्लां पवित्तरन, ते जैना-जैना गल्लां रोड़िन, ते जैना-जैना गल्लां मने रोड़ी लेगतिन, ते जैना-जैना गुण ते जैना-जैना गल्लां तरीफेरी, तैन पुड़ ध्यान केरा।

9 जैना गल्लां तुसेई मीं करां शिखी, ते कबूल की, ते शुनी ते मीं हेरी, तैन केरो हुक्म मन्ना तैखन परमेशर जै शान्ति देनेबालोए तुसन साथी भोलो।

????? ???? ???? ?

10 अवं प्रभु मां बड़ा खुश आई कि हुनी एतरे दिहाइन पत्ती तुसन मेरे बारे मां फिरी खियाल भोव; याकीन्न तुशे शुरुआती मां इस एरो खियाल थियो, पन तुसन मौको न मैल्लो।

11 इन नई कि अवं अपनि कम्मरे वजाई सेइं ज़ोताई; किजोकि मीं इन्ने शिखोरूए कि ज़ैस हालती मां आई, तैस्से मां राजी भोई।

12 अवं निकड़ भोनु भी ज़ानताई ते बड़ू भोनु भी ज़ानताई, ते मीं हर एककी गल्ली ते सेबभी हालतन मां रज़नू, दलुखुनू ते बधनू घटनू शिखोरूए।

13 जै मीं ताकत देते तैस मां अवं सब किछ केरि बटताई।

14 फिरी भी तुसेई रोड़ू कियूं, कि मेरे दुखे मां मीं साथी भोए।

15 ते हे फिलिपियों, तुस एप्पू भी ज़ानतथ, कि खुशखबरी प्रचाररे शुरुआती मां ज़ैखन अवं मकिदुनिया अग्रोवं जेव, तैखन मीं तुस शारे ते कोन्ची होरि मेनडलारे लोकेई लेने देनेरे बारे मां मद्दत न की।

16 एन्चरे ज़ैखन अवं थिस्सलुनीके नगरे मां थियो; तैखन भी तुसेई मेरी घटी पूरी केरनेरे लेइ एककी बार नई बल्के काई बार किछ भेज़ेरू थियूं।

17 इन नई कि अवं दान चाताई पन अवं एरो फल चाताई, जै तुशे फैइदेरे लेइ बड़तो गाए।

18 मीं कां सब किछे, बल्के बड़ू जादे, जैन तुसेई इपफुरुदीतुसेरे हथ्थे भेज़ेरू थियूं, तैन मेलतां रज़ोरोई, तैन त खुशबू ते कबूल केरनेरे काबल बलिदाने, जैन परमेशरे पसंदे।

19 ते मेरो परमेशर भी अपने तैस धनेरे मुताबिक जैन महिमा सेइं यीशु मसीह मांए, तुशशी हर अक ज़रूरत पूरी केरेलो।

20 इशशो परमेशर ते बाजी एरी महिमा हमेशा भोती राए। आमीन।

????? ???? ?

21 हर अक पवित्तर मेन्हु जै यीशु मसीह मांए तैस जो नमस्कार ज़ोथ। जै दूला मीं साथीए तुसन नमस्कार ज़ोते।

22 सब पवित्तर लोकन, खास केरतां जैना महाराजरे घरानेरेन तुसन नमस्कार ज़ोतन।

23 इशशे प्रभु यीशु मसीहेरो अनुग्रह तुशशी आत्माई सेइं साथी राए।

कुलुस्सियों

??????

1 अवं पौलुस ई चिट्ठी लिखने लोरोई, अवं परमेशेरी मेर्जी सेइं मसीह यीशुएरो प्रेरित आई, ते विश्वासी दला तीमथियुस भी मीं साथी आए।

2 मसीह मां तैन पवित्र ते विश्वासी दलां केरे नंब्वे जैना कुल्लुसे नगरे मां रातन। इशे बाजी परमेशे तुसन अनुग्रह ते शान्ति देतो राए।

????????? ??????????

3 अस जैखन तुशे लेइ प्रार्थना केरतम त अपने प्रभु यीशु मसीहेरे बाजी, परमेशेरू शुक्र केरतम।

4 किजोकि असेईं शुनोरूए, कि मसीह यीशु पुड़ तुशो विश्वासे, ते तुस सेबी पवित्र लोकन सेइं तुस प्यार केरतथ।

5 तैस उमीद कियोरी चीजारे वजाई सेइं जै तुशे लेइ स्वर्गे मां रखोरीए, जेसेरे बारे मां तुसेईं तैस खुशखेबरारे सच्चे वचने सेइं शुनोरूए, जै तुसन कां पुजोरोए।

6 ते जेन्चरे दुनियाई मां भी फल आनते, ते बद्धतो गाते; मतलब जैस दिहैड़ी करां देंतू तुसेईं ते शुनु, ते सच्चेईं सेइं परमेशेरो अनुग्रह पिशानो, तुसन मां भी एरू केरि बटते।

7 तैसेरी शिक्षा तुसेईं इशे दलारे महतगार इपफरास करां हासिल की, जै इशे लेइ मसीहेरो वफादार सेवके।

8 तैन तुशे प्यारेरे बारे ज़ोवं जै होरि लोकां केरे लेइ आए, जै पवित्र आत्मा मांए तुसन दितोरोए।

9 एन्हरेलेइ जैस दिहैड़ी करां इन शुनु, त असेईं हमेशा तुशे लेइ प्रार्थना की, कि परमेशेरी आत्मा तुसन अक्ल ते मसझ दे जैस सेइं तुस तैसेरी मेर्जी पूरे तरीके सेइं समझी बटले।

10 ताके तुस तेरही ज़िन्दगी जीथ जेरि प्रभुएरे लोकन जीयोरी लोडे, ते तुस प्रभुए हर बत्तां खुश केरथ, ताके तुस लगातार हर किसमेरी भलाई करते राथ, ते परमेशेरी पिशानी मां बद्धते गाथ।

11 अवं प्रार्थना केरताई कि परमेशर अपनि महिमारे शेक्तेरे इस्तेमाल केरनेरे ज़िरिये तुसन मज़बूत केरे, ताके तुस आनन्दे ते सबरी सेइं दुख झैल्ली बटतथ।

12 बाजी परमेशेरू शुक्र केरते राथ, जैने अस इस काबल बनाए कि स्वर्गे राज्जे मां तैसेरे अपने लोकन सेइं साथी विरासती मां हिसेदार भोम।

13 किजोकि तैने अस शैतानेरे राज्जे मरां छुटेइतां अपने दलारे मट्टेरे राज्जे मां आने

14 परमेशेरे अपने मट्टेरे बलिदाने सेइं असन पापां केरि माफ़ी दिक्ती (यानी शैतानेरे राज्जे करां आज़ाद किये)।

????? ???? ?? ?? ????????? ???????

15 परमेशेर त कोई न लेई बटे, पन जैखन तैसेरू मट्टू मैन्हू वनू त तैनी परमेशर लोकन पुड़ बांदो कियो, जैन किछ परमेशेरे बनाव तैस पुड़ तैस कां सेबना जादे अधिकार आए।

16 किजोकि ई तै (मसीह) थियो जैने सब किछ बनानेरे वक्ते परमेशेरे सेइं कम कियूं, चाए अम्बरे पुड़ भोन या धेरती पुड़ भोन, लेवरी भोन या आलेई, कुन तखत भोन, या रियासतां, कुन हकौमतां भोन या अधिकार, सैरी चीज़ां तैस्से सेइं ते तैसेरेलेइ वनेइ।

17 ते मसीह सेबी चीज़ां बनाने करां पेइलो थियो, ते सब चीज़ां तैस मां बनोरी रैतिन।

18 तैए कलीसियारो प्रधाने जै तैसेरी जाने; तैए पेइलोए ते मुड़दन मरां जीतो भोने बालन मरां पेइलोए कि सेबी गल्लन मां तैए प्रधान भोए।

19 किजोकि बाजी परमेशर इस्से मां खुश भोते कि मसीह मां तैसेरे सारे सुभाव वास केरतन।

20 परमेशेरे फैसलो कियो कि अपने मट्टे भेजे, जैने अपनो खून बगाव ते कुरूसे पुड़ अपनि जान दिती। परमेशेरे सेब्भी चीजन सेइं मेल मलाप केरनेरे लेइ एन कियू। एन्चरे तैनी मसीहेरे ज़िरियो सेइं सेब्भी चीजां केरो मेल मिलाप एप्पू साथी कियो, चाए तैना धेरतरी भोन, चाए स्वर्गरी भोन।

21 ते तुस जैना पेइले परमेशेरे करां दूर थियो, ते बुरे कम्मां सेइं मने सेइं बैरी थी।

22 फिरी भी परमेशेरे अपने मट्टे यीशुएरे मैन्हु बन्ने सेइं ते कुरूसे पुड़ मौतरे ज़ियरीए तुशशो मेल कराव, ताके तुसन एप्पू कां पवित्र ते बे दाग ते बेइलजाम हज़ार केरे।

23 पन तुस मसीह पुड़ विश्वास केरनेरे मां बुनीयादरे ज़ेरे मज़बूत राथ, ते तैस खुशखेबरे उमीद पुड़ जै तुसेईं शुनोरी एन शाअथ, जेसेरो प्रचार अम्बरे करां वुन सैरी सर्ष्टि मां कियो जेव; ते ज़ैस मां अवं पौलुस सेवक बनो।

????????????????????

24 हुनी अवं तैन दुखन सेइं खुश आई, जैना तुशशे लेइ झैल्लताई, ते मसीहेरी दुखां केरि घटी तैसेरे जानारे लेइ, मतलब कलीसियारे लेइ, अपने जिसमे मां पूरी करताई।

25 जेसेरो अवं परमेशेरे इंतज़ामेरे मुताबिक सेवक बनो, जै तुशशे लेइ मीं सॉफो, ताके अवं परमेशेरे वचन पूरो-पूरो प्रचार केरि।

26 मतलब तैस भेदे ज़ै ज़माना ते पीड़न करां छप्पोरो थियो, पन हुनी तैसेरे तैन पवित्र लोकन पुड़ बांदो भोरोए।

27 ज़ैन पुड़ परमेशेरे बांदो केरनो चाव, कि तैन ज्ञान भोए होरि कौमन मां तैस भेदेरी महिमारी कीमत कुने ते तै ईए, कि मसीह ज़ै महिमारी उमीदे तुसन मां रहते।

28 जेसेरो प्रचार केरतां अस हर एककी मैन्हु ज़ोतम ते सारे ज्ञाने सेइं हर एककी मैन्हु शिखालतम, कि अस हर एककी मैन्हु मसीह कां सिद्ध केरतां पेश केरम।

29 ते एल्हेरेलेइ अवं तैसेरी शेकतेरे मुताबिक ज़ै मीं मां शेक्ति सेइं साथी अस्सर केरतीए तन मन लेइतां मेहनत भी केरतम।

2

1 अवं चाताई कि तुस ज्ञानथ, कि तुशशे ते तैन केरे ज़ैना लौदीकिया नगरे मां आन, ते तैन सेब्भी केरे लेइ ज़ैनेई अवं नई लोरोई कि अवं केन्चरे मेहनत करताई।

2 ताके तैन केरे मन्न मां शान्ति भोए ते तैना प्यारे सेइं एप्पू मांमेइं बनोरे रान, ते तैस पूरी समझरू धन हासिल केरन, बाजी परमेशेरे भेदे मतलब मसीह पिशानन्।

3 ज़ैस मां समझरे ते ज्ञानेरे सारे भण्डार छपारेन।

4 इन अवं एल्हेरेलेइ ज़ोताई, कि कोई मैन्हु तुसन लालच देने बैली चीजी सेइं धोखो न दे।

5 किजोकि अवं अगर जिसमेरे लिहाजे सेइं दूराई, फिरी भी आत्मिक लिहाजे सेइं नेडो आई, ते तुशशे रीति सेइं तुशशी हालती ते तुशशे विश्वासे ज़ै मसीह यीशु मां मज़बूती हेरतां खुश भोव।

????????????????????

6 ते ज़ेन्चरे तुसेईं मसीह यीशु अपनो प्रभु कबूल कियोरोए, तेन्चरे तैस मां चलते भी राथ।

7 ते तैस मां ज़ील छड़ते राथ ते बद्धते राथ; ते ज़ेन्चरे तुस शिखालोरेथ तेन्चरे विश्वासे मां मज़बूत भोते गाथ, ते खूब शुकूर केरते राथ।

8 खबरदार राथ कि तुसन कोई तैसेरे ज्ञाने ते धोखे सेइं शिकार न केरे, ज़ैन मैन्हु केरू रुवाजेरू ते दुनियारी पेइली शिक्षारे मुताबिके पन मसीहेरे नई।

9 किजोकि तैस मां ईश्वरत्वेरी सारी भरपूरी जानी मां एइतां वास केरती।

10 ते तुस तैस मां भेरोरेथ ज़ै सैरी हक़ोमती ते अधिकारेरी क्रोड़ी।

11 तेस्से मां तुशशो एरो खतनो भोरोए, ज़ै हाथेरो नई, मतलब मसीहेरोए खतनो, ज़ैस सेइं तुशशी पुरानी इन्सानयत अलग की गातीए।

12 ते तैस्से सेइं साथी बपतिस्मे मां दबे जे, ते तैस्से मां परमेशेरी शेक्ति पुड विश्वास केरतां, जैने ते मुडदन मरां ज़ीतो कियो, तुस भी तैस सेइं साथी ज़ीते कियो ।

13 ते तैने तुस भी, जैना अपने पापन, ते अपने जिसमेरे खतनेरे हालती मां फटरे थी, तैस सेइं साथी ज़ीते भी केरे, ते इश्शे सब पाप माफ़ केरे ।

14 ते विधि केरो तै लेख ज़ै इश्शे नव्वे पुड ते इश्शे खलाफ थियो मटाव; ते तैस क़रूसे पुड कील देइतां दूर केरो ।

15 ते तैने प्रधान्न ते अधिकैरन हारेइतां तैन केरो खुल्लो मुखल्लो तमाशो बनानवं ते क़रूसे सेइं जयजयकार भी केरू ।

16 एल्हेरेलेइ खानू पीनू या तिहार या नव्वीं चाँदनी, या आरामेरे दिहाइं केरे बारे मां तुश्शो कोई फैसलो न केरो ।

17 किजोकि सब एजने बैली गल्लां केरि छावे, पन असली चीज़ां मसीहेरिन ।

18 कोई मैन्हु दीनता ते स्वर्गदूतां केरि पूजा पसंद केरतां तुश्शो दौडरे इनामे करां दूर न रखे । एरो मैन्हु लेवहरी गल्लां मां लगगोरो रहते ते एपनी जिसमानी समझी पुड बेफैइदो फुलते ।

19 ते तैस करोड़ी टलेइतां न रखन जै मसीह आए ते जैस सेइं सारो जिसम जोइन ते पठां केरे हफाजती सेइं ते एक्की सेइं साथी ज़ुइतां, परमेशेरे तरफां बद्धतो गाते ।

???? ???? ???? ???? ??

20 ज़ैखन कि तुस मसीह सेइं साथी दुनियारे पइली शिक्षाई सेइं मरोरेथ, त फिरी तैन केरे ज़ेरे जैना दुनियाई मां ज़िन्दगी बीतातन मैन्हु केरे हुक्म ते शिक्षा सेइं,

21 ते एरी शिक्षा मां किजो रातथ कि इस सेइं नईं हरनु, एन नईं खानू, ते तैस सेइं हथ नईं लानो?

22 (किजोकि इना सब चीज़ां कम्मे मां आनते-आनते नाश भोइ गैली) ।

23 इन गल्लन मां एपनी मेज़री मुताबिक अपनि बनेवरी भक्ति सेइं, ते दीनता, ते जिसमानी कोशिश सेइं ज्ञानेरू कम त आए, पन जिसमानी खुवैइशन रोकने मां इन सेइं किछ् भी फैइदो न भोए ।

3

1 ते ज़ैखन तुस मसीह सेइं साथी ज़ीतो कियो, त स्वर्गेरि चीज़ां केरे तोपी मां राथ, जैड़ी मसीह मौजूदे ते परमेशेरे देइने पासे विशोरोए ।

2 धेरतरे नईं पन स्वर्गेरि चीज़न पुड ध्यान लाथ ।

3 किजोकि तुस त मरे, ते तुश्शो ज़िन्दगी मसीह सेइं साथी परमेशेरे मां छुपोरूए ।

4 ज़ैखन मसीह ज़ै इश्शो ज़िन्दगीए, बांदो भोलो, तैखन तुस भी तैस सेइं साथी महिमा साथी बांदे कियो गाले ।

?????? ? ???? ???? ???? ?

5 एल्हेरेलेइ अपने तैन अंगन मैरी देथ, जैना धेरती पुड आन, मतलब बदमाशी, गन्दगी, बुरे खियाल, बुरी खुवैइश ते लालचे ज़ैन मूरती पूजने बराबरे ।

6 इन केरे वजाई सेइं परमेशेरो क्रोध हुक्म न मन्ने बालन पुड एइते ।

7 ते तुस भी, ज़ैखन इन बुरैइन मां ज़िन्दगी बीताते थी, त इन केरे मुताबिक ज़लते भी थी ।

8 पन हुनी तुस भी इन सेबन मतलब क्रोध, सरक, बैर, तुहीन, गैई देनी इना सब गल्लां शारा ।

9 एक्को होरि सेइं झूठ न ज़ोथ किजोकि तुसेईं पुरानी इन्सानयत तैसेरे कम्मन समेत खोलोरीए ।

10 ते नव्वीं इन्सानयत लोरीए ज़ै अपने बनाने बालेरे रूपेरे मुताबिक ज्ञान हासिल केरनेरे लेइ नव्वी बनातीए ।

11 तैस मां न कोई यूनानी राव, न यहूदी, न बगैर खतने बालो, न जंगली, न स्कूती, न गुलाम न आज़ाद, सिर्फ मसीह सब किछ् ते सेबन मांए ।

12 एल्ह्नेरेलेइ परमेशेरे चुनोरां केरे ज़ेरे ज़ैना पवित्तर ते द्लारेन, बड़ी, ते द्ला, ते दीनता, ते नमूरता, ते बरदाशत धारण केरा।

13 ते अग्र केन्ची, केन्ची पुइ दोष लानेरी वजा भोए, त एक्की होरेरी झैल्ला, ते एक्की होरेरे पाप माफ़ केरा, जेन्चरे प्रभुए तुशे पाप माफ़ केरे, तेन्चरे तुस भी केरा।

14 इन सेब्बन करां बा प्यारे ज़ै सेब्बन सिद्धतारो पटकोए बंधा।

15 ते मसीहेरी शान्ति जेसेरे लेइ तुस अक जान भोनेरे लेइ कुजेवरे भी आथ, तुशे दिलन मां राज़ केरे, ते तुस शुकर करते राथ।

16 मसीहेरे वचन अपने दिलन मां रोडेचारे बसने देथ; ते सारे ज्ञाने सेइं एक्की होरि शिखाला, ते नसीहत देथ, ते अपने-अपने मन्न मां अनुग्रहे साथी परमेशेरे लेइ भजन ते स्तुति ते आत्मिक गीत ज़ोते राथ।

17 ते वचन या कम ज़ैन किछ भी केरा सब प्रभु यीशुएरे नव्वे सेइं, ते तैसेरे ज़िरिये बाजी परमेशेरे शुकर केरा।

~~~~~

18 हे कुआन्शव, जेन्चरे प्रभु मां जेइं जे, तेन्चरे अपने-अपने मुन्शां केरे अधीन राथ।

19 हे मुन्शाव, एपनी-एपनी कुआन्शन सेइं प्यार रखा, ते तैन सेइं सखत बर्ताव न केरा।

20 हे बच्चाव, सेब्बी गल्लन मां अपने-अपने अम्मा बाजी केरो हुक्म मन्ना, किजोकि प्रभु इस सेइं खुश भोते।

21 हे बच्चन बालव, अपने बच्चन तंग न केरा, एरू न भोए कि तैन केरि हिम्मत न द्लुटे।

22 हे सेवकाव, ज़ैना जिसमेरे मुताबिक तुशे मालिकन, सेब्बी गल्लन मां अपने मालिकां केरो हुक्म मन्ना, मैनु खुश केरनेरे बालां केरे ज़ेरे हिरानेरे लेइ नई, पन सच्चे मने सेइं ते परमेशेरे डरे सेइं।

23 ते ज़ैन किछ तुस केरतथ, तैन मने सेइं केरा, इन समझतां कि मैन्हु केरे लेइ नई पन प्रभुएरे लेइ केरतथ।

24 किजोकि तुस ज्ञानतथ कि तुसन एसेरे बदले प्रभु करां बदले मां मीरास मैल्लनीए, तुस प्रभु यीशु मसीहेरी सेवा केरतथ।

25 किजोकि ज़ै बुराई केरते, तैस एपनी बुरैइयो फल मैलनोए; तैड़ी केन्चरी तरफदारी नई।

#### 4

1 हे मालिकव, अपने-अपने गुलामन सेइं साथी इन्साफ ते ठीक-ठीक बर्ताव केरा, इन समझतां कि स्वर्गें मां तुशे भी अक मालिके।

~~~~~

2 प्रार्थना मां लगगोरो राथ, ते शुकर सेइं साथी हुशार राथ।

3 साथी इशे लेइ भी प्रार्थना करते राथ, कि परमेशर इशे लेइ शुनानेरे लेइ एरी बत खोल्ले, कि अस मसीहेरे तैस भेदेरे बारे मां ज़ोई बटम ज़ेसेरे लेइ अव क़ेदे मां आई।

4 ते तैस बांदो केरि, जेन्चरे मीं कियो लोडे।

5 वक्त कीमती समझतां बेइरन साथी सैमझदैरी सेइं बर्ताव केरा।

6 तुशे वचन सदा अनुग्रहे सेइं ते एरो लूनो भोए, कि तुसन हर एक्की मैन्हु रोडेचारे जुवाव देनो एज्जे।

~~~~~

7 द्लार द्ला ते वफादार सेवक, तुखिकुसे ज़ै प्रभु मां मेरो मदतगार, तै मेरी सेब्बी गल्लन मां तुसन ज़ोलो।

8 तै मीं एल्ह्नेरेलेइ तुसन कां भेज्जो, कि तुसन इशेरी हालतरो पतो भोए ते तै तुशे दिलन शान्ति दे।

9 ते तैस सेइं साथी उनेसिमुस भी भेजो जै वफादार ते टलारो द्दलाए ते तुसन मरांए, ते तुसन इडी तगर सैरी गल्लां ज़ोले ।

10 अरिस्तखुस जै मीं सेइं साथी कैदीए, ते मरकुस जै बरनबासेरो द्दलाए लगते । (जेसेरे बारे मां तुसन हुकम मैल्लोरो थियो कि अगर ते तुसन कां एज्जे, त तैस सेइं रोडेच्चारे बताव केरथ)

11 ते यीशु जै जो यूस्तुस ज़ोतन, तै तुसन नमस्कार ज़ोते । खतनो केरे लोकन मां सिर्फ ईए परमेशेरे राज्जे लेइ महतगार ते मेरे शैनतरी वजा राए ।

12 इपफ़रास जै तुसन मरांए, ते मसीह यीशुएरो दासे, तुसन जो नमस्कार ज़ोते ते सदा तुश्शे लेइ प्रार्थना केरते, ताके तुस सिद्ध भोइतां पूरे विश्वासे सेइं साथी परमेशेरे मेर्जी पुइ मज़बूत राथ ।

13 अवं तैसेरो गवाह आई, कि ते तुश्शे लेइ ते लौदीकिया ते हियरापुलिस वालां केरे लेइ बडी कोशिश केरतो रहते ।

14 टलारे तबीब लूका ते देमासेरू तुसन नमस्कार ।

15 लौदीकिया नगरेरे द्दलान ते नुमफास ते तैन केरे घेरे कलीसियान जो नमस्कार ज़ोथ ।

16 ते ज़ैखन ई चिट्ठी तुश्शे इडी पढी गाए, त एरू केरनू कि लौदीकियारे कलीसिया मां भी पढी गाए, ते तै चिट्ठी जै लौदीकियारां एज्जे तैस तुस भी पेइथ ।

17 फिरी अरखिप्पुसे सेइं जोइयथ कि जै सेवा प्रभु मां तीं सोंफी, तैस बडे हुशैरी सेइं पूरी केरथ ।

18 अवं पौलुस अपने हथ्थन सेइं नमस्कार लिखताई । मेरी शंगलन याद रखा; तुसन पुइ अनुग्रह भोतो राए । आमीन ।



7 पन जेन्चरे अम्मा अपने मट्टां केरि हेरगेश केरतीए, तेन्चरे असेई भी तुसन मां रेइतां नरमी हिराई ।

8 ते तेन्चरे अस तुश्शू लालन्न केरते, न सिर्फ परमेशेरी खुशखबरी, पन अपने-अपने प्राण भी तुसन देनेरे लेइ तियार थिये, एल्हेरेलेइ तुस इश्शे बड़े टलारे भोइ जोरे थिये ।

9 किजोकि, हे दलाव, तुस इश्शी मेहनत ते कष्टे याद रखतथ, कि असेई एल्हेरेलेइ रात दिहैडी कारोबार केरतां तुसन मां परमेशेरी खुशखबरी प्रचार की, कि तुसन मरां कोन्ची पुइ भार न भोए ।

10 तुस एप्पू गवाह आथ, ते परमेशर भी गवाहे, कि तुसन जैना विश्वास केरतथ, अस केरी पवित्तरता, ते धार्मिकता ते बेइलजामे सेईं राए ।

11 तुसन पतोए, कि जेन्चरे बाजी अपने बच्चन सेईं बताव केरते, तेन्चरे अस भी तुसन मरां हर केन्ची शिक्षा देते, ते दिलासो देते, ते समझते थिये ।

12 कि तुस एरी जिन्दगी जीथ जैस सेईं परमेशर खुश भोए, जै तुसन अपने राज्जे ते महिमा मां कुजाते ।

13 अस भी परमेशेरू शुक्र लगातार केरतम, कि जैखन इश्शे जिरिये परमेशेरी खुशखबरी तुसन कां पुजी जै असेईं प्रचार की, त तुसेईं ते मैन्हु केरि नई, बल्के परमेशेरू वचन सेमझतां (ते सच्चे इन परमेशेरू वचन आए) कबूल की, ते तै वचन तुसन मां जैना मसीह पुइ विश्वास केरतथ कम केरते ।

14 एल्हेरेलेइ तुस, हे दलाव, परमेशेरी तैन कलीसियां केरि जेरि चाल चलने लाए, जैना यहूदिया मां यीशु मसीह मां आन, किजोकि तुसन भी अपने लोकन करां एरो दुःख मैल्लो, जेन्चरे तैन यहूदन करां मैल्लोरो थियो ।

15 जैनेईं प्रभु यीशु ते नबी भी मारे, ते अस सताए, ते परमेशर तैन सेईं खुश नई, ते तैना सेब्भी मैन्हु केरि खलाफत केरतन ।

16 ते तैना गैर कौमन सेईं तैन केरे मुक्तेरे लेइ गल्लां केरने लेइ असन रोकतन । तैना पापे पुइ पाप केरतन ज्ञातगर परमेशर तैन सज्जा न दे, ते हुनी परमेशेरे तैन पक्को सज्जा देनेवालोए ।

### \*\*\*\*\*

17 हे दलाव, जैखन अस थोड़े चिरेरे लेइ मने मां नई बल्के वादे मां तुसन करां अलग भोरे थी, ते असेईं बड़े लालन्ने सेईं तुसन हेरनेरी बड़ी जादे कोशिश की ।

18 एल्हेरेलेइ (मतलब मीं पौलुसे) एक्की बार नई बल्के बार-बार तुसन कां एजनु चाव, पन शैतान अस तुसन कां एजनेरे लेइ रोके ।

19 भला इश्शी उमीद, या आनन्द, या बड़ीयैयूरू ताज कौन आए? इन तुस भोले जैखन प्रभु यीशु वापस एज्जेलो

20 इश्शी बड़याईं ते आनन्द तुस आथ ।

## 3

### \*\*\*\*\*

1 एल्हेरेलेइ जैखन असेईं जादे न बेलगी बटु त असेईं इन ठहराव कि अस एथेंस नगरे मां अकैल्ले रेइ गाम ।

2 ते असेईं तीमथियुस जै मसीहेरे खुशखबरी मां इश्शो दलाए, ते परमेशेरो सेवके, एल्हेरेलेइ तुसन कां भेजो, कि तै तुसन विश्वासे मां मजबूत केरे ते तुश्शी हिम्मत बधाए ।

3 कि कोई इन दुखां केरे वजाईं सेईं न घबराए, किजोकि तुस एप्पू रोडे चारे ज्ञानतथ परमेशेरे फैसलो कियोरोए, कि अस सताए गानेम ।

4 किजोकि पेइले भी, जैखन अस तुसन कां थिये, त तुसन सेईं जोते थी, कि अस सताए गानेम, ते तुस ज्ञानतथ एरू भोव भी ।

5 एल्हेरेलेइ जैखन मीं करां होरू न बेलगोव, त तुशुशे विश्वासेरो हाल ज्ञान्नेरे लेइ तीमुथियुस भेजो, किजोकि अवं डरों थियो कि एरू न भोए, कि अज्रमाने बाले (शैताने) तुस अज्रमाए त न, कि इशुशी मेहनत बेकार त न भोइ ।

\*\*\*\*\*

6 पन तीमुथियुसे जै तुसन करां इशुशे इडी अव, ते तुशुशे विश्वासेरे ते प्यारेरे बारे मां खुशखबरी शुनाई । ते ई गल भी शुनाई, कि तुस सदा प्यारे सेइं असन याद केरतथ, ते असन हेरनेरी इच्छा रखतथ, जेन्चरे अस भी तुसन हेरनेरी इच्छा रखतम ।

7 एल्हेरेलेइ हे दूलाव, अपनि सारी तंगी, ते मुसीबतन मां तुशुशे विश्वासे सेइं असन शान्ति मैल्ली ।

8 तुशुशो प्रभु पुइ मजबूत विश्वासे इशुशे लेइ अक नव्वे ज़िन्दगरे साँसेरो ज़ेरोए ।

9 ते ज़ेरो आनन्द असन तुशुशे वजाई सेइं अपने परमेशेरे सामने, तैसेरे बदले मां अस कोस तरीके सेइं परमेशेरू शुकर केरम !

10 अस रात दिहाड़ी बड़ी प्रार्थना केरते रातम, कि तुसन सेइं दुबारां मिलम, ते तुशुशी मद्दत केरम कि तुस होरि जादे मजबूती सेइं प्रभु यीशु पुइ विश्वास केरथ ।

11 ते अस प्रार्थना केरतम कि इशुशो बाजी परमेशर ते इशुशे प्रभु यीशु, बत खोल्ले कि अस तुसन कां एज्जी बटम ।

12 ते प्रभु एरू केरे, कि जेन्चरे अस तुसन सेइं प्यार केरतम; तेन्चरे तुशुशो प्यार एप्पू मांमेइं, ते सेब्बी मैनन सेइं बधे, ते तरक्की केरतो राए ।

13 ताके तै तुशुशे मन्न मजबूत केरे, कि जैखन इशुशो प्रभु यीशु अपने सब पवित्र लोकन सेइं साथी एज्जे, त तै इशुशे बाजी परमेशेरे सामने तुशुशे मन्न पवित्रता मां बेइलजाम ठहरालो ।

## 4

\*\*\*\*\*

1 आखर, हे दूलाव अस तुसन कां बिनती केरतम, ते तुसन प्रभु यीशु मां समझातम, कि जेन्चरे तुसेईं इशुशो ज़ेरो चाल चलन रखवो, ते परमेशर खुश केरनो शिखरोए, ते जेन्चरे तुस चलतथ भी, तेन्चरे तुस अग्रोव बद्धते राथ ।

2 किजोकि तुस ज्ञानतथ, कि इना हदायतां असन प्रभु यीशु करां मैलोरिन ।

3 परमेशर चाते, कि तुस पवित्र बना, मतलब बदमाशी केरने करां बच्चोरे राथ ।

4 ते तुसन मरां हर केन्चे ज्ञानेरू लोइ कि केन्चरां अपने कुआन्शी सेइं पवित्रता ते आदरी सेइं जिन्दगी जीयोरी लोइ ।

5 ते इन कम खुवैइशी सेइं नई, ते न गैर कौमां केरे ज़ेरे, जैना परमेशेरे न पिशानन ।

6 कि इस गल्ली मां कोई अपने विश्वासी दूलाए न टगो, ते न तैस पुइ हकोमत चलाए; किजोकि प्रभु इन सब गल्लां केरि सजा देलो, जेन्चरे कि असेईं पेइलू तुसन सेइं जोरू थियूं, ते खबरदारी भी दित्तोगी थी ।

7 किजोकि परमेशेरे अस अशुद्ध जिन्दगी जीनिरे लेइ नई, पन पवित्र जिन्दगी जीनिरे लेइ कुजवरेम ।

8 एल्हेरेलेइ जै कोई इना हदायतां केरो इन्कार केरते, तै मैन्हु केरो नई, पन परमेशेरेरो इन्कार केरते, जै अपनो पवित्र आत्मा तुसन देते ।

\*\*\*\*\*

9 पन विश्वासी भाईचारेरे प्यारेरे बारे मां तुसन किछ लिखनेरी जरूरत नई, एप्पू मांमेइं प्यार रखनो तुसेईं परमेशेरे करां एप्पू शिखरोए ।

10 ते सारे मकिदुनिया इलाकेरे सेब्बी दूलान सेइं साथी एरू केरतथ भी, पन हे दूलाव, अस तुसन कां छन्दे केरतम कि होरे भी बद्धते गाथ ।



11 ते जेन्चरे असेई तुसन हुक्म दित्तो, तेन्चरे तुस होरन सेइ लडाई न केरा, ते अपनू कम केरा त कने अपने लेइ कमाई केरा ।

12 ते एन्चरां तैना भी तुशशी आदर केरेले जैना विश्वासी नई, ते तुसन कोन्ची चीजारो घाटो न भोलो ।

~~~~~

13 हे द्लाव, अस न चातम, कि तुस तैन केरे बारे मां अनजान राथ जैना विश्वासी मरेन अनजान राथ, एरू न भोए, कि तुस होरि केरे जेरे शोग केरथ, जैन मरनेरां पत्ती उमीद नई ।

14 किजोकि अगर अस विश्वास केरतम, कि यीशु मरो, ते ज़ीतो भोव, त तेन्चरे परमेशर तैन भी जैना यीशु पुइ विश्वास केरतां मरे, परमेशर तैन भी यीशु सेइ साथी वापस आनेलो ।

15 किजोकि अस प्रभु यीशुएरे वचनेरे मुताबिक तुसन सेइ इन ज़ोतम, कि अस जैना ज़ीतेम, ते प्रभुएरे वापस एजने तगर बंचारे रामेले, त जैना विश्वासी मररेरिन पेइले तैस सेइ मिलमेले, फिरी अस मिलमेले ।

16 किजोकि प्रभु यीशु एप्पू स्वर्गेंरां एज्जेलो; ते ज़ोरे सेइ हुक्म देलो, तैस वक्ते प्रधान दूतेरी आवाज शुनोली, ते परमेशेरी महिमारो नइशिनगो बजो गालो, ते जैना मसीह पुइ विश्वास केरनेवाले मां मरन, तैना पेइले ज़ीते भोनेन ।

17 तैखन अस जैना ज़ीते बच्चोरे रहमेले, ते तैन सेइ साथी बिदलारी पुइ नियो गानेम, कि अम्बेरे मां प्रभु सेइ मिलमेले, ते तेइसेरां बाद अस सदा प्रभु सेइ साथी रानेम ।

18 एल्हेरेलेइ इन्ने गल्लन सेइ एककी होरि तस्सली देते राथ ।

5

~~~~~

1 हे द्लाव ते बेइनव, इसेरी ज़रूरत नई, कि वक्तन ते कालां केरे बारे जेइस प्रभु यीशु वापस एज्जेलो तुसन किच्छ लिखू गाए ।

2 किजोकि तुस एप्पू रोडे चारे ज्ञानतथ, ते जेन्चरे चोर राती एइते, तेन्चरे प्रभुएरू दुबारां एजनु भोलू ।

3 जैखन लोक ज़ोले, “कि शान्तिए, ते कोई डर नई,” त तैन पुइ अकदम विनाश एजनेओ, जेन्चरे दोज्जीती पुइ तकलीफ; ते तैना तैस मुसीबती करां न बच्चेले ।

4 पन हे द्लाव ते बेइनव, तुस त (आत्मिक) आंधरे मां नई, कि तै दिहाडी पुसन पुइ चोरेरी जेरि एज्जे ।

5 किजोकि तुस सब लोअरे बच्चे आथ, ते दीसारे बच्चे आथ, अस न रातेरम, न आंधारेरेम ।

6 एल्हेरेलेइ अस होरि केरे जेरे झुलोरे न रहम, पन बीझे रहम ते हुशार रहम ।

7 किजोकि जैना झुलोरे रातन, तैना राती झूलतन, ते जैना नशे मां रातन, तैना राती नशे मां भोतन ।

8 पन अस त दीसेरेम, विश्वास ते प्यार लेइतां कि इशशी हिफाजत भोए जेन्चरे झिलम सिपाहेरी हिफाजत केरतीए, ते मुक्तेरे उमीद लेइतां जेन्चरे सिपाही टोप लाते, खबरदार रहम ।

9 किजोकि परमेशरे अस सज़ारे ते करोधेरे लेइ नई, पन एल्हेरेलेइ चुनोरेम कि अस अपने प्रभु यीशु मसीहेरे ज़िरिये सेइ मुक्ति हासिल केरम ।

10 यीशु मसीह इशशे लेइ एल्हेरेलेइ मरो, कि अस चाए बीझे भोम, या झुलोरे भोम, सब मिलतां तैस सेइ साथी ज़ीम ।

11 एल्हेरेलेइ एककी होरि हिम्मत देथ, ते एककी होरेरी तरक्की भोनेरी ज़िरियो बना, लगातार, तुस एरू केरतथ भी ।

~~~~~

12 ते ढुलाव, अस तुसन सेइं बिनती केरतम, कि जैना तुशुशे लेइ बड़ी मेहनत केरतन, ते प्रभु मां तुशुशी अगवाईं केरनेवाले आम, ते जैना तुसन सलाह देतन, तैन केरि आदर केरा।

13 ते जैना कम्मां तैनेईं तुशुशे लेइ कियों तैन केरे वजाईं सेइं तैन केरि आदर ते तैन सेइं बड़ो प्यार केरा, ते एप्पू मांमेइं मेल मालपे सेइं राथ।

14 हे ढुलाव ते बेइनव, अस तुसन कां मिनत केरतम, कि जैना आलसी आन, तैन खबरदार केरा, जैन केरि हिम्मत घटे तैन हिम्मत देथ, तैन केरि मद्दत केरा जैना (आत्मिकता) मां कमजोरन, सेब्भी केरे लेइ वरदाशत केरनु हिराथ।

15 इस गल्लारू ध्यान रखवा, कि कोई कोन्ची सेइं बुरीयीयैरे बदले बुराईं न केरे, पन सदा भलाईं केरनेरे लेइ तियार राथ, एप्पू मांमेइं ते सेब्बन सेइं भी भलाईं केरनेरी कोशिश केरा।

16 सदा खुश राथ।

17 लगातार प्रार्थना केरते राथ।

18 हर हाले मां शुक्र केरा, किजोकि तुशुशे लेइ मसीह यीशु मां परमेशेरी ईए मर्जीए।

19 पवित्तर आत्मार कम्मन जैना लोकां केरे जिन्दगी मां भोतन तैन न रोका।

20 भविष्यवैनी केरो इन्कार न केरा।

21 सब गल्लां परखा, जैना रोड़ी भोन तैन अपनाथ।

22 सेब्भी किसमेरी बुरैईं करां बन्नोरे राथ।

????????

23 शान्ति देनेवालो परमेशेरे एप्पू तुसन पूरे तरीके सेइं पवित्तर केरे; ते तुशुशी आत्मा ते प्राण ते जिसम इशुशे प्रभु यीशु मसीहेरे दुबारां एजने तगर पूरे, ते बेइलजाम ते सुरक्षित रान।

24 तुशुशो कुजाने वालो वफादारे, तै एरू केरेलो।

25 हे ढुलाव, इशुशे लेइ प्रार्थना केरा।

26 सेब्भी विश्वासी ढुलान मसीहेरे प्यारे सेइं नमस्कार केरा।

27 अवं तुसन प्रभुएरी कसम देताईं, कि ई चिट्ठी सेब्भी विश्वासी ढुलान पेढतां शुनाईं गाए।

28 इशुशे प्रभु यीशु मसीहेरो अनुग्रह तुसन पुइ भोतो राए।

2 थिस्सलुनीकियों

??????

1 अवं पौलुस ई चिट्ठी लिखने लोरोई। सिलवानुस ते तीमुथियुस भी मीं सेइं साथी आन। थिस्सलुनीकि नगरेरे कलीसियारे विश्वासी लोकन, जैना बाजी परमेशर ते प्रभु यीशु मसीह मां आन,

2 अस प्रार्थना केरतम कि इश्शे बाजी परमेशर ते प्रभु यीशु मसीह तुसन अनुग्रह ते शान्ति दे।

????????????

3 हे द्लाव ते बेइनव, तुश्शे बारे मां असेईं हर वक्त परमेशरें शुकुर कियेरू लोडे, ते इन इश्शे लेइ ठीक भी आए। एल्हेरेलेइ कि तुश्शो यीशु मसीह पुइ विश्वास बड़ो बद्धतो गाते, त कने तुश्शो एक्की होरि सेइं प्यार केरनो भी बड़ो बद्धने लोरोए।

4 ई वजा आए, कि अस एप्पू परमेशरें कलीसियान मां, तुश्शे बारे मां घमण्ड केरतम, चाए तुसन पुइ मुसीबत या दुःख भी एज्जन, फिरी भी तुस सबरी सेइं झैलतथ, ते तुस यीशु मसीह पुइ विश्वास केरते रातथ।

5 परमेशर अपनो इन्साफ हिरानेरे लेइ ई स्ताव इस्तेमाल केरेलो, कि तुस परमेशरें राज्जेरे काबल भोथ, जेसेरे लेइ तुस दुःख भी झैलतथ।

6 परमेशरे हमेशा ठीक तरीके सेइं इन्साफे केरते, कि जैना तुसन दुःख देतन, तैन बदले मां दुःख दे।

7 तुस जैना दुःख झैलतथ, परमेशर तुसन आराम देलो ते असन भी। इन तेइस भोलू जेइस प्रभु यीशु अपने शेक्तिबाले स्वर्गदूतन सेइं साथी बेलति अगारे लप्पी सेइं साथी स्वर्गोरा एज्जेलो।

8 ते जैना लोक परमेशरे न पिशानन् त कने इश्शे प्रभु यीशुएरे खुशखेबरी न मन्न्, तैन तै सजा देलो।

9 तैना प्रभुए करां हमेशारे लेइ अलग भोले, ते तैसेरे महान शेक्तेरे हिस्सेदार न भोले। तै तैन हमेशारी सजा देइतां नाश केरेलो।

10 इना गल्लां तेइस भोली जेइस यीशु अपने लोकन करां आदर हासिल केरनेरे लेइ वापस एज्जेलो, ते जैना लोक तैस पुइ विश्वास केरतन तैना हैरान भोले। तुस भी तैन्ने लोकन मरां भोले, किजोकि जे सन्देश असेईं तैसेरे बारे मां तुसन शुनव तुसेईं तैस पुइ विश्वास कियो।

11 एल्हेरेलेइ अस लगातार तुश्शे लेइ प्रार्थना भी केरतम, कि परमेशर तुसन इस काबल बनाए, जेरि ज़िन्दगी जीनेरे लेइ तुस कुजवरे तेन्त्रेरे तुस ज़ीथ। ते ते तुसन अपने शेक्ति सेइं इस काबल बनालो कि तुस जैना रोडू केरथ ते जैना तुस केरनू चाथ, ते जैना कम तुस अपने विश्वासे सेइं केरतथ पूरू केरथ।

12 एन्त्रेरे इश्शे प्रभु यीशु मसीहरे नंवेरी तुश्शे ज़िरिये बडीयाईं भोली। ते तैसेरे ज़िरिये तुसन आदर मैलेली। इन सब किछ् इश्शे परमेशर त कने प्रभु यीशु मसीहरे अनुग्रहे सेइं भोलू।

2

????????????

1 हे द्लाव ते बेइनव, असन कां प्रभु यीशु मसीहरे वापस एजनेरे बारे मां ज़ोनेरे लेइ किछ् आए। तै वक्त एज्जेलो जेइस अस तैस सेइं साथी मिलमैले।

2 इन सोचतां तुस परेशान न भोथ या तुश्शो दिल न घबराए कि प्रभुएरी दिहाड़ी पेइली ओरिए। किछ् ज़ोई बटतन कि इन भविष्यवाणी मां या सन्देश मां या चिट्ठी मां तैन कां ओरू थियूं।

3 लोक ज़ैना इस बारे मां झूठी गल्लां ज़ोतन तैन पुड़ विश्वास न केरा। किजोकि यीशु मसीहेरे वापस एजनेरे पेइले, तै वक्त एज्जेलो ज़ेइस बड़े लोक परमेशेरे खलाफ भोले, ते फिरी अधर्मी मैन्हु बांदो भोलो। तै, तै आए ज़ै नाश भोनेरे लेइ ठहरावरोए।

4 तै अधर्मी मैन्हु परमेशेरी खलाफत केरेलो, ते तैन सब किछ्, ज़ैन लोक देबते सेमझतां आराधना केरतन, ते इन ज़ोलो ई अवं इन सेबन करां महान आई। इड़ी तगर कि तै परमेशेरे मन्देरे मां विशतां अपनो आपे जो परमेशर ज़ोलो।

5 इन न बिसरा, कि मीं बड़े वार इन गल्लां केरे बारे मां ज़ोरूए, ज़ैखन अवं तुसन सेइं साथी थियो।

6 हुन्ना तै अधर्मी मैन्हु बांदो नई भोरो किजोकि कोई आए ज़ैने तै रोकोरोए, कि तै अपने वक्ते पुड़ बांदो भोए।

7 किजोकि अधर्मी चीज़ां केरि शक्ति इस दुनियाई मां पेइली छेपतां कम केरने लोरीए, पन अक आए ज़ै तैस रोकते। ते तै तैस रोकतो रालो ज़ां तगर तै दूर न कियो गाए।

8 तैट्टां बाद तै दुष्ट मैन्हु एज्जेलो, पन वादे मां ज़ैखन प्रभु यीशु एज्जेलो, त तैस दुष्ट मैन्हु अपने ऐशेरे फुकी सेइं ते एजनेरी महिमाई सेइं मारेलो।

9 तै दुष्ट मैन्हु, शैतानेरे शेक्ति सेइं एज्जेलो। तै हर किसमेरे झूठे चमत्कार ते निशान, ते बडां-बडां कम्मां केरेलो, ताके लोक सोचन कि तै परमेशेरे ज़ै एन केरते।

10 ते तै हर किसमेरां बुरां कम्मां केरेलो, ते तैन धोखो देलो ज़ैना परमेशेरे नाश केरनेन। किजोकि तैनेई तैस सच्चे पुड़ विश्वास केरने करां इन्कार कियो, ज़ैस सेइं तैन मुक्ति मैल्लेथी।

11 एल्हेरेलेइ परमेशर तैन मां अक धोखो देनेवाली आत्मा भेजेलो ज़ै तैन सच्चे करां दूर केरेली, ताके तैना झूठे पुड़ विश्वास केरन ज़ैने तै दुष्ट मैन्हु तैन सेइं ज़ोलो।

12 परमेशर तैन सेबन्नी लोकन सज़ा देलो ज़ैनेई यीशु मसीहेरे सच्चे सन्देशे पुड़ विश्वास न कियो, पन पाप केरने सेइं खुश भोए।

~~~~~

13 हे द्वाव ते बेइनव, असेईं तुशे लेइ परमेशेरू शुक्र कियोरू लोडे। किजोकि परमेशर तुसन सेइं प्यार केरते, तैने तुस दुनिया बनाने करां पेइले चुने, कि पवित्त्र आत्माेरे पवित्त्र बनाते, ते यीशु मसीहेरे बारे मां ज़ै सच्चे सन्देशे तैस पुड़ विश्वास केरतां परमेशर तुसन मुक्ति दे।

14 ज़ै खुशखबरी असेईं प्रचार की परमेशेरे तै इस्तेमाल की, कि तुसन बचानेरे लेइ कुजाए, तुस इशे प्रभु यीशु मसीहेरी महिमाई मां शामिल भोथ।

15 एल्हेरेलेइ, द्वाव ते बेइनव, ज़ै शिक्षा असेईं तुसन दिती, ज़ैखन असेईं तुसन सेइं गल्लां की त कने चिट्ठी केरे ज़िरिये, तैस पुड़ तुस लगातार विश्वास केरते राथ।

16 अस प्रार्थना केरतम इशो प्रभु यीशु मसीह एण्, ते इशो बाजी परमेशर ज़ैने असन सेइं प्यार कियो, ते ज़ैने अपने अनुग्रहे सेइं असन हमेशारो होसलो ते पक्की उमीद दिती,

17 तैना तुसन होसलो देन, ते तुसन मजबूत केरन ताके तुस लगातार भलाई केरथ ते ज़ैन ज़ोथ तैन रोडू भोए।

3

~~~~~

1 आखरी मां हे द्वाव ते बेइनव, इशे लेइ प्रार्थना केरते राथ, कि अस प्रभु यीशुएरू वचन होरि भी बड़े टैरन शुनेई बटम, ते ज़ैना शुन्न त तैना तेन्चरे मनन ज़ेन्चरे तुसेईं मन्नु।

2 ते ई भी प्रार्थना केरा कि परमेशर असन बुरे ते दुष्ट लोकां केरे ज़िरिये नुकसान पुजाने करां वच्चेइतां रखे, किजोकि बड़े लोक ज़ैनेई प्रभु यीशुएरी खुशखबरी शुनी, ते तैनेई इस पुड़ विश्वास न कियो।

3 पन तुस प्रभु पुड़ पूरो भरोसो केरि बटतथ, तैए तुसन मज़बूत केरेलो, ते दुष्टे करां यानी शैताने करां बचालो, ताके तै तुसन कोई नुकसान न पुजेई बटे।

4 ते असन प्रभु मां तुसन पुड़ भरोसोए, कि जैन किछ् असेई तुसन केरनेरे लेइ ज़ोरूए, तुस तेन्चरे केरते ओरेथ ते एजनेबाले वक्ते मां केरते राले।

5 अस प्रार्थना केरतम, कि प्रभु यीशु मसीह तुसन इन समझनेरे काबल बनाए कि परमेशर तुस सेइं केतरो प्यार केरते, ते बरदाश केरा ज़ेन्चरे मसीहे बरदाश कियूं।

?? ?????? ???? ??

6 हे दूलाव ते बेइनव, अस प्रभु यीशु मसीहेरे दित्तोरे अधिकार सेइं तुसन ई हुक्म देतम, कि तुसन मरां हर कोई एरे दूलान ते बेइनव सेइं साथ न रखवे, ज़ैना आलसी आन त कने ज़ै शिक्षा असेई तुसन दित्ती तैस न मन्न।

7 किजोकि तुस एप्पू रोडे च़ारे ज़ानतथ, कि तुसेईं तेन्चरे ज़िन्दगी ज़ीयोरी लोडे ज़ेन्चरे असेई ज़ी, ज़ैखन अस तुसन सेइं साथी थिये, अस आलसी न थिये पन कम केरते थिये।

8 असेई कोन्चेरी रोट्टी मुफत न खाइ, पन अस मेहनत ते कष्टे सेइं रात दिहैड़ी कारोबार केरते थिये, कि अस अपने ज़रूरतां केरे लेइ तुसन पुड़ निर्भर न भोम।

9 असेई बड़ी मेहनत की, एल्हेरेलेइ नई कि असन अधिकार नई, कि तुसन हुक्म देम कि तुस इश्शी ज़रूरतां पूरी केरा। पन एल्हेरेलेइ कि असेई अपनो आप तुश्शे लेइ मिसाल बनाई ताके तुस इश्शे ज़ेरि ज़िन्दगी ज़ीथ।

10 ज़ैखन अस तुसन सेइं साथी थिये तैखन असेई तुसन हुक्म दित्तोरो थियो, कि अगर कोई कम केरने करां इन्कार केरे त तैस रोट्टी भी न देथ।

11 इश्शे शुन्ने मां ओरू आए कि तुसन मां बडे लोक एरे आन ज़ैना आलसी ज़िन्दगी ज़ीतन। तैना एप्पू कम न केरन, पन होरि केरे कम्मन मां दखल देतन।

12 एरे लोकन अस प्रभु यीशु मसीहेरे दित्तोरे अधिकारे सेइं हुक्म देतम ते समझातम, कि चुपचाप कम केरतां अपनि ज़िन्दगी ज़ीनेरे लेइ कमाई केरन।

13 ते तुस, दूलाव ते बेइनव, भलाई केरने मां हिम्मत न हारा।

14 अगर कोई इश्शी इस चिटठरे सन्देशे न मन्ने, त सेब्भी केरे सामने तैसेरी पिशान केरा, ते तैस सेइं साथ न रखवा, ताके तै छिथोए;

15 फिरी भी तैस सेइं दुश्मनेरो ज़ेरो बर्ताव न केरा, पन तैस सेइं विश्वासी सैथेरो ज़ेरो बर्ताव केरतां तैस खबरदार केरा, कि ज़ेरू तैने कियूं तैन न केरे।

????? ????????

16 हुनी अवं प्रार्थना केरताई प्रभु ज़ै शान्ति देनेबालोए, तुसन हर वक्त हर किसमे सेइं शान्ति देतो राए, ते प्रभु लगातार तुसन सेब्बन सेइं साथी भोए।

17 अवं पौलुस अपने हथ्थे सेइं नमस्कार लिखताई, इन मेरू सबूते, अवं चिट्ठी केरे आखरी मां एन्चरे लिखताई, ताके हर एक्की पतो च़ले कि ई चिट्ठी मेरे तरफां आए।

18 इश्शे प्रभु यीशु मसीहेरो अनुग्रह तुसन सेब्बन पुड़ भोतो राए।

1 तीमुथियुस

1 अवं पौलुस ई चिट्ठी लिखने लोरोई। अवं इशे मुक्ति देनेबाले परमेशे ते यीशु मसीहेरे अधिकारे सेइं परेरित आई, जैस पुड़ इशही उमीदे।

2 अवं ई चिट्ठी तीमुथियुसे जो लिखने लोरोई। हे तीमुथियुस तू मेरे मट्टे जेरू आस, किजोकि जेन्नेरे अवं विश्वास केरताई तेन्नेरे तू भी विश्वास केरतस। अवं परार्थना केरताई इशो बाजी परमेशेरे ते प्रभु यीशु मसीह तीं अनुग्रह, दया त कने शान्ति देतो राए।

~~~~~

3-4 हे तीमुथियुस जेन्नेरे तू ज्ञानतस, इफिसुस नगरे मां किछ एरे लोक आन जैना गलत शिक्षा देतन। तैना लगातार झूठी कहैनी शिक्षालतन ते पूर्वजां केरे नव्वां केरे बारे मां शिक्षालतन। जैखन अवं इफिसुस नगरे मां मकिदुनिया इलाके जो गानेरे लेइ तियार थियो, त मीं तीं जेरू थियूं कि इफिसुस नगरे मां रा ते तैन जो, कि एरी जेरि शिक्षा न देतन, जैखन तैना एरी जेरि शिक्षा देतन त लोक तैन केरे बारे मां बेंस केरतन। नितीजो ई आए, जैन कम परमेशेरे दितोरूए, शिक्षालनेबाले तैन नई लौ केरने जैन सिर्फ परमेशेरे पुड़ रेखतां भोइ सकते।

5 मेरो हुक्म देनेरो मकसद ई आए, कि तुस एक्की होरि सेइं साफ दिले ते रोडे जमीरे, ते सच्चे विश्वासे सेइं प्यार केरा।

6 झूठी शिक्षा देनेबालेई इन सैरी गल्लां केरनि बंद की ते सिर्फ बेकार बेंस केरतन।

7 ते शास्त्री बन्नु चातन, पन जैना गल्लां तैना होरन शिक्षालतन ते जैन केरो दावो केरतन तैन एप्पू भी न समझन।

8 अस ज्ञानतम, कि अगर लोक मूसेरे कानूने सही तरीके सेइं शिक्षालन त तैन रोडू आए।

9 तुस ज्ञानतथ मूसेरो कानून धर्मी मैनेरे लेइ नई। पन तैन केरे लेइ आए, जैना परमेशेरे कानूनेरो इन्कार केरन ते तैस न मनन, ते जैना परमेशेरे आराधना न केरन ते जैना लगातार पाप केरतन, ते जैना अशुद्ध आन, ते परमेशेरे आदर न केरन, ते जैना अपने अम्मा बाजी ते होरि केरे कातलिन।

10 ते कने बदमाशी केरनेबालां, मडद मडदन सेइं जिसमानी रिशतो रखनेबालां, नौकर बेचबालां, झूठ ज्ञाने बालां, ते झूठी कसम खाने बालां, ते इन केरे अलावा रोड़ी शिक्षारी खलाफ कम केरनेबालां केरे लेइ आए।

11 ई शिक्षा महान परमेशेरे महिमारे खुशखेबारे मुताबिके, ई परमेशेरे मीं होरन शुनानेरे लेइ दितोरीए।

~~~~~

12 अवं अपने प्रभु मसीह यीशुएरू शुक्र केरताई जैने मीं शक्ति दित्ती, तैने अवं वफादार सेमझतां मीं अपनि सेवा दित्ती।

13 विश्वासी बन्ने करां पेइलो अवं यीशुएरे बारे मां तुहीन केरनेबालो ते विश्वासी लोकन सताने बालो, ते तैन नुकसान पुजाने बालो थियो। पन परमेशेरे मीं पुड़ अपनि दया हिराई, किजोकि मीं हेजू यीशु पुड़ विश्वास न थियो कियोरो ते अवं न थियो ज्ञानतो कि कुन लोरोई केरने।

14 ते इशे प्रभुए अपनो बड़ो अनुग्रह लगातार हिराव। ते तैनी विश्वास ते प्यार दित्तो, किजोकि अवं तैस सेइं साथी अक भोरो थियो।

15 ई गल सच्चे, ते हर किसमे सेइं मन्ने काबल, कि मसीह यीशु असन पापी लोकन मुक्ति देने इस दुनियाई मां अव, जैन मरां सेबनना जादे पापी अवं आई।

16 पन परमेशेरे मीं पुड़ दया की, एन तैन एल्हेरेलेइ कियूं, कि मेरे जिरिये, जैने मैने होरन करां जादे बुराई की, यीशु मसीह तैस पुड़ अपनि पूरी बरदाशत हिरेई बटे, चाए मीं जैन भी कियोरू थियूं। तैन एन कियूं ताके बादे मां होरे लोक विश्वास केरन ते हमेशारी जिन्दगी हासिल केरन।

17 हुनी हमेशारो राज्जो, जै सदा ज़ीतोए ते आलाए महान परमेशेरी आदर, ते महिमा सदा भोती राए। आमीन।

18 हे मटटां तीमुथियुस, अवं इन्ना हृदायतां देने लोरोई: अवं ती तैना गल्लां याद कराताई जैना बीतोरे वक्ते मां नेवेई ती ज़ोरी थी। तू तैन गल्लां केरो इस्तेमाल हथियारां केरो ज़ेरो तैन केरे खलाफ लइनेरे लेइ केर, जैना झूठी शिक्षा देतन।

19 तू मसीह पुड़ लगातार विश्वास केर ते अपनो ज़मीर भी साफ रख। किछ् लोकेई अपने साफ ज़मीरो इन्कार कियोरोए तैसेरो नितीजो ई भोव कि तेनेई यीशु पुड़ विश्वास केरनो शारो।

20 तेन्ने मां हुमिनयुस ते सिकन्दरे, जैना मीं शैतानेरी शेक्ति मां देइतां तैन सज़ा दित्तोरीए, एस सेइ तैना इन शिखेले कि परमेशेरी तुहीन केरनि बंद केरन।

2

???????? ???? ???

1 हुनी अवं सेब्मी करां वेद्धतां इन ज़ोताई, कि बिनती, ते प्रार्थनां, ते दरखुवासां, सेब्मी मैन्हु केरे लेइ की गान।

2 राज्जां ते सेब्मी उच्चे पदे बालां केरा लेइ प्रार्थना केरा, ताके तैना असन सुखे ते बगैर खतरे सेइ ज़ीने देन ते अस परमेशेरी आराधना केरि बटतम ते होरि लोकन सेइ रोड़ा बर्ताव केरि बटम।

3 इन इशे मुक्ति देनेबाले परमेशेरो रोड़ लगते ते पसंद एइते।

4 ते इन चाते, कि सेब्मी मैनन् मुक्ति मैल्ले; ते तैना सच्चरे ज्ञाने ज्ञानन।

5 किजोकि सिर्फ अक्के परमेशेरे, ते अक मैन्हु आए ज़ै परमेशेरे ते लोकां केरो बिचवाई कराने बालो, ते तै मैन्हु यीशु मसीह आए।

6 सेब्मी लोकन पाप ते मौतरी शेक्ति करां छुटकारो देनेरे लेइ मसीहे अपनो आप बलिदान कियो। तैसेरे मौतरे ज़िरिये परमेशेरे ठीक वक्ते पुड़ सबूत दित्तु कि तै सेब्मी लोकन बचानो चाते।

7 ई वजा आए, परमेशेरे अवं खुशखबरी प्रचार केरनेबालो ते प्रेरित भोनेरे लेइ चुनो। तैने अवं गैर कौमन विश्वासेरो सच्चो सन्देश शिखालनेरे लेइ चुनो। अवं झूठ नई लोरो ज़ोने बलके सच ज़ोने लोरोई।

8 अवं चाताई, कि हर ठैरी सभान मां मडद परमेशेरे लेइ समर्पित हथ खडे केरतां बगैर सरकां ते बगैर बेंसी सेइ प्रार्थना केरन।

9 तेन्चरे मसीही कुआन्शां भी इज़्जतदार लिगड़ां लेइतां, ते अपनो आप रोड़ेचारे सजेइतां, न कि अलग-अलग किसमे सेइ दोग बनाने, ते सोन्ने, ते मोती, ते कीमती लिगड़न सेइ।

10 बलके इसेरे बदले तेनेई होरि केरे लेइ रोड़ा कम्मां केरतां अपनो आप खूबसूत लोड़े बनावरो, किजोकि परमेशेरी भक्ति केरनेबैली कुआन्शन इन शोभा देते।

11 ज़ैखन होरे लोक विश्वासी लोकन शिखालन त सेब्मी कुआन्शेई चुपचाप ते आदरी सेइ शुन्तां शिखोरू लोड़े।

12 अवं अज़ाज़त न देई कि कुआन्शां मडदन शिखालन ते तैन पुड़ अधिकार रखन। ज़ैखन तुस आराधना केरनेरे लेइ अकोट्टे भोथ त कुआन्शेई चुप लोड़े रावरू।

13 अवं इन एल्हरेलेइ ज़ोताई किजोकि परमेशेरे पेइलो आदम बनाव, तैसेरे पत्ती हव्वा बनाई।

14 होरि वजा ई आए कि कुआन्शां सप्पे करां धोखो खाव न कि आदमे, एन्चरां हव्वा परमेशेरो हुक्म दलोड़ा।

15 फिरी भी कुआन्श बच्चे ज़रमने सेइ परमेशेरे करां मुक्ति हासिल केरेली, अगर मसीह पुड़ लगातार विश्वास केरती राए, ते होरि लोकन सेइ प्यार केरती राए, ते शुद्ध त कने रोड़े तरीके सेइ बर्ताव केरे।

3

XXXXXXXXXX XXX XXXXXXXXXXX

- 1 ई गल सच्चै, कि जै कलीसियाई मां अगवो भोनो चाते, त तै आदरारे पदेरी इच्छा रखते ।
- 2 ते इन ज़रूरीए कि अगवो बेइलजाम भोए, ते तैसेरी अक कुआन्शा लोड़े, ते तै अपने आपे पुड़ केवू करेनेबालो, समझदैरी सेइं ज़ीनेबालो भोए, इज़्जतदार भोए, ते टुलाहना केरि आदर केरनेरे लेइ तियार रानेबालो भोए, ते होरि लोकन परमेशेरो सन्देश रोड़े च़ारे शिखालनेरे काबल भोए ।
- 3 तै शराबी या मार-पीट करेनेबालो न लोड़े, बल्के दया करेनेबालो लोड़े, ते लड़ाई न करेनेबालो लोड़े ते पेइंसां केरे लालज़ी न भोए ।
- 4 तै अपने घरेरो रोड़े च़ारे च़लानेबालो ते बन्दो बसत करेनेबालो लोड़े, ते तैनी अपने बच्चन शिखालोरू लोड़े कि तैना हर गल्ली मां इज़्जती सेइं तैसेरी मनन ।
- 5 ज़ैखन अगर कोई अपने घरेरो बन्दो बसत केरनो न ज़ानतो भोए, त तै परमेशेरी कलीसियारी हेरगेश केन्चरे केरेलो?
- 6 तै नव्यो विश्वासी न लोड़े, एरू न भोए अभिमान केरे ते तैस शैतानेरी ज़ेरि तैस सज़ा मैल्ले ।
- 7 ते ज़ैना लोक विश्वासी नई तैनेई भी तैसेरे बारे मां इन ज़ोरू लोड़े कि ए रोड़ो मैन्हु आए । ताके एरू न भोए कि तै घटिया भोए ते शैतानेरे ज़ाले मां फसे ।

XXXXXXXXXX XXX XXXXXXX

- 8 तेन्चरे सेवक भी तेरहे लोड़न ज़ैन केरि लोक आदर केरन । ईमानदार लोड़न, ते पीने बाले न भोन, ते एरे मैन्हु न भोन ज़ैना पेइंसां केरे लेइ किछ् भी केरि बटतन ।
- 9 पन तैन केरे ज़मीर साफ लोड़न ते ज़ै शिक्षा परमेशेरे बांदी कियोरीए, तैस पुड़ लगातार विश्वास करेनेबाले लोड़न ।
- 10 ज़ैखन कलीसियारे सेवक चुने गान त पेइलू तैन केरू चालचलन परखू गाए, कि तैन मां रोड़े गुण आन, ते केन्वी तैन मां कोई गलती न लेइहोए, त फिरी सेवकेरू कम केरन ।
- 11 एन्चरे कलीसियाई मां सेवा करेनेबालां केरि कुआन्शां भी आदरारे काबल भोन, होरन बदनाम करेनेबैली न लोड़न, पन शांत सुभावे बैली, ते सेब्बी गल्लन मां ईमानदार भोन ।
- 12 कलीसियारो सेवक अपने कुआन्शेरे लेइ वफादार लोड़े, ते बच्चां ते अपने घरेरे सारे लोकां केरो रोड़ो च़ारे हेरगेश करेनेबालो लोड़े ।
- 13 किजोकि ज़ैना सेवकेरू कम रोड़े च़ारे केरतन, तैना लोकां केरि नज़री मां इज़्जतदार भोतन । ते तैना अपने तैस विश्वासेरे बारे मां ज़ै यीशु मसीहे पुड़े बड़े दिलेरी सेइं ज़ोतन ।

XXXXX XXX

- 14 अवं तीं कां जल्दी एजनेरी उमीद रखने पुड़ भी इना गल्लां एन्हरेलेइ लिखताई ।
- 15 अगर मीं एजनेरे मां च़िर लगे, त तू ज़ानस, कि लोकेई परमेशेरेरे टब्बेरे होरि लोकन सेइं केन्चरे बर्ताव कियोरो लोड़े । इन टब्बर तैना लोकन सेइं बनोरू, ज़ैना यीशु पुड़ विश्वास केरतन ते जीते परमेशेरेरे कलीसियारेन । इना विश्वासी सच्चै शिक्षाई मज़बूती सेइं मन्तन ते सम्भालतन ज़ेन्चरे बुनीयाद ते खम्मवे इमारती सम्भालतन ते मज़बूत केरते ।
- 16 ते इस मां शक नई, अस पूरे याकीन सेइं ज़ोई बटतम, ज़ैना शिक्षां परमेशेरे बैदी की एना बिलकुल सच्चै आन, मतलब,
मसीह मैनेरे रूपे मां बांदो भोव,
पवित् आत्मा तै हर कम्मे मां धर्मी ठहराव,
स्वर्गदूतेई तै लाव,
लोकेई तैसेरे बारे मां कौमन मां प्रचार कियो,
सारे दुनियाई मरां लोकेई तैस पुड़ विश्वास कियो,
परमेशेरे तै उबरे स्वर्गे जो नीयो ।

4

????????????????????

1 पन पवित्र आत्मा साफ ज्ञाते, कि आखरी वक्ते मां किछ, लोक मसीही शिक्षाई पुड़ विश्वास केरनो बन्द करेले। तैना दुष्ट आत्मान कबूल करेले, तैना तैन बुरी बत्ती चलेली, त कने तैना लोक दुष्ट आत्मां केरि झूठी शिक्षाई पुड़ विश्वास करेले।

2 इन तैना झूठे पाखंडी लोक आन, जैना इन झूठी शिक्षान शिखालतन, तैन केरो जमीर जै रोडे ते बुरे मां फैसलो केरते मरौं आए ते जेन्चरे तात्ते लोहे सेइं तै फुकोरोए।

3 एरे लोक इन शिखालतन कि इला नई बनानो ते खानेरी किछ चीजां न लोडन खेवरी, पन परमेशरे इन खानेरी चीजां विश्वासी लोकां केरे खानेरे लेइ बनोरिन जैना सच्चि शिक्षा ज्ञानतन कि प्रार्थना केरतां खावरू लोडे।

4 किजोकि परमेशरेरी बनेवरी हर चीज रोडीए। अस परमेशेरू शुक्र केरतां सब किछ खेइ बटतम।

5 किजोकि परमेशेरे वचने, ते प्रार्थनाई सेइं शुद्ध भोते।

????????????????????

6 अगर तू दलान ते बेइनन लगातार इन्ना गल्लां याद करातो रालो, जैन केरि हृदायत मां तीं दित्तोरीए त कने विश्वासेरे सन्देशे ते तैस रोडी शिक्षाई सेइं जैस मां तू मजबूत बनावरोस जै तू मन्तो ओरोस। त तू यीशु मसीहेरो रोडो सेवक भोलो।

7 पन बनेवरी कहैनी ते बेकार कहैनी केरे वजाई सेइं वक्त बरवाद न केर जैन सेइं परमेशेरी आदर न भोए। पन तू लगातर परमेशेरी आदर केरनेबाली जिन्दगी जीनी शिखाल।

8 किजोकि जिसमानी वर्जिशी सेइं जानी फैइदो भोते, पन भेक्तेरे लेइ तियारी बडी रोडीए किजोकि इस वक्तेरी ते एजनेबाले वक्तेरी जिन्दगरो फैइदो इस्से मां आए जेसेरो वादो परमेशेरे कियोरोए।

9 ते ई गल सन्न, ते हर तरीके सेइं मन्नेरे काबल।

10 किजोकि अस मेहनत ते कोशिश एल्हेरेलेइ केरतम, किजोकि इश्री उमीद तैस जीते परमेशेरे पुड़े। जै सेम्बी लोकां केरो, ते खास केरतां विश्वास केरनेबालन मुक्ति देनेबालोए।

11 विश्वासी लोकन इना गल्लां शिखाल ते तैन ई हुक्म दे कि तैना इन मनन।

12 तू एन्चरे बर्ताव केर कि कोई भी तेरी अनादर न केरे किजोकि तू जवान आस। पन तू विश्वासी लोकां केरे लेइ इन सैरी गल्लन मां अक मिसाल बन, गलबाती मां, होरन सेइं बर्ताव केरने मां, ते होरन सेइं प्यार केरने मां, ते यीशु मसीह पुड़ विश्वास केरने मां, ते बेइलजाम जिन्दगी जीने मां ताके लोक भी एन्चरां केरन।

13 ज्ञांतगर अवं न एज्जी, तांतगर जैखन विश्वासी लोक अकोट्टे भोतन ज़ोरे सेइं पढ़ने मां, ते तैन केरो होसलो बद्धा ते पवित्रशास्तेरो मतलब शिखाल।

14 इस गल्ली याद रख जैखन बुजुर्गां केरे एक्की टोलां तीं पुड़ हथ रखोरे धिये, परमेशेरे तैन अक सन्देशे दित्तो कि तैस वरदानेरे बारे मां ज़ोन जै तैन तीं दित्तोरी। तैस वरदानेरे नज़र अनदाज न केर।

15 तैन गल्लन सोचतो रा, ते तैन मां अपनू ध्यान लेइतां रख, एन्चरे हर कोई हेरी बटेलो कि तू विश्वासे मां बद्धने लोरोस।

16 इस गल्लरू ध्यान रख कि तू केन्चरे ज़ीतस ते केन्चरे शिखालतस। इसेरो नितीजो ई भोलो कि परमेशेरे इन्साफे मां तेरे ज़िरिये तीं ते तेरे शुन्नेबालन बचालो।

5

????????????????????

1 बुद्ध मैन्हु न झिडक पन तैस एन्चरे आदरी सेइं सल्लाह दे जेन्चरे अपने बाजी, एप्पू करां निकडे मैन्हु एन्चरे सल्लाह दे जेन्चरे अपने निकडे दलाए।

2 बुढी कुआन्शन सेइं एन्चरे बर्ताव केर जेन्चरे अम्मा सेइं, ते जवान कुआन्शन सेइं एन्चरे बर्ताव केर जेन्चरे अपने वेइनी सेइं। इन साफ दिले सेइं केर।

3 तैन विधवां केरि आदर केरा, जैन केरो कोई हेरगेश करेनेबालो नईं तैन केरू ध्यान रख्खा।

4 ते अगर कोन्ची विधवारां मट्ठां या पोट्लडां या धियोडां भोन, ते तैन पेइलू अपने घरेरे लोकां केरू ध्यान रेखतां परमेशेरी भक्ति केरनि शिखोरी लोडे। ते तैना एन केरतां अपने अम्मा-बाजी ते दादा देदी केरू हक देन, किजोकि इन परमेशेरे पसंद एइते।

5 जै विधवा आए ते तैसेरो ध्यान रखनेबालो कोई नईं, ते परमेशेरे पुइ उमीद रखतीए, ते रात दिहैडी बिनती ते प्रार्थनाईं मां परमेशेरे करां मद्दत मगतीए।

6 पन जैना विधवां अपने सारो वक्त एशे मां बितैतिन तैना जिसमानी रूपे सेइं त ज्रीतिन पन आत्मिक रूपे सेइं मेरीन।

7 इन गल्लां केरो भी हुक्म दे कि तैना बेइलजाम रान।

8 पन अगर कोई अपने रिशतेदारां केरि ते खास केरतां अपने घरानेरू ध्यान न रख्खे, ते तै विश्वासे करां मुकरोरोए, ते जै विश्वास न केरे तैस करां बुरो बनोरोए।

9 तैस्से विधवारू नवं लिखू गाए, जै शठ सालन करां घट न भोए, ते अपने मुन्शे सेइं वफादार रावरी भोए।

10 ते होरे लोक तैसेरे बारे मां ज्ञानते भोन कि तैसां हमेशा रोडां कम्मां कियोरन। जेन्चरे कि, तैसां बच्चे रोडे चारे पाले, ते तैना विश्वासी लोक अपने घरे मां आने, जैना सफरे मां थिये, जेन्चरे होरि लोकां केरि सेवा कियोरी भोए, ते तैन लोकां केरि मद्दत कियोरी भोए जैना मुसीबती मां थिये, ते जैसां हर किसमेरां रोडां कम्मां कियोरां भोन।

11 पन जवान विधवां करां नब्बां न लिख, किजोकि जैखन तैन केरि जिसमानी इच्छा तैस वादे करां शेक्ति बाली भोती, जै तेनेईं विधवा रेइतां मसीहेरी सेवा करेनेरे लेइ कियोरोए, त तैना इला बनानो चैतिन।

12 दुवारां इला केरतां तैना दोषी भोतिन, किजोकि तैनेईं अपनो पेइलो वादो बरकार नईं रखोरो।

13 एन्चरे तैना घरे-घरे फिरतां आलसी भोनू शिखतिन, ते सिर्फ आलसी नईं, पन होरि केरे खलाफ गल्लां केरतिन, ते होरि केरे कम्मन मां दखल देतिन, ते तैना गल्लां जोतिन जैना न लोइन जोरी।

14 एल्हेरेलेइ अवं इन चाताईं, कि जवान विधवां इला बनान; ते तैन बच्चे भोन ते घरवार सुमालन, ते दुश्मन् बदनाम केनेरो मौको न देन।

15 किजोकि किछु जवान विधवां कुआन्शेईं परमेशेरे करां दूर भोइतां शैताने पत्ती जलनू शुरु कियोरू।

16 अगर कोन्ची विश्वास केनेबालेरी टब्बेरे मां विधवां भोन, त तैए तैन केरि मद्दत केरे न तैन केरि जिमेवारी कलीसियाईं पुइ भोए। तैखन कलीसिया तैस विधवारी मद्दत केरि बटते जेसेरो कोई न भोए।

17 जै बुजुर्ग रोडे चारे कम केरते तै आदर हासिल केनेरे ते बराबर तनखाएरे काबले, खास केरतां तैना जैना परमेशेरू वचन शुकाने, ते शिखालने मां बडी मेहनत केरतन।

18 किजोकि पवित्रशास्त्र मां इन लिखोरूए, “कि तू जोदलोरे दातेरू आशी न बेन्ध्वां,” किजोकि, “मज्जदूर अपने मज्जदूरारो हकदारो।”

19 कोई दोष कोन्ची बुजुर्ग लव गाए, त ज्ञांतगर दईं या जादे लोक न ज्ञोन कि असेईं ए पाप केरतो लावरोए, तांतगर न शुकन।

20 जैना लोक पाप केरतन तैन सेब्भी विश्वासी लोकां केरे सामने झिड़क, ताके होरे विश्वासी लोक भी डरन।

21 परमेशर ते मसीह यीशु, ते चुनोरे स्वर्गदूत हाज़र सेमझतां अवं तीं हादयत देताईं, ध्यान राए कि तू केन्चेरो इन्साफ जल्दी न केरस, ते कोन्चेरी तरफदारी न केर।

22 कलीसियारो बुजुर्ग चुनेरे बारे मां जल्दी कधे नई केरनि। ते होरि केरे पापन मां शामिल न भो, अपनो आप पवित्र बनोरो रख।

23 अग्रोवं जो पानी न पी, पन अपने पेटेरे ते अपने बार-बार बिमार भोनेरे लेइ थोड़ो-थोड़ो दाछारो रस भी कम्मे मां आन।

24 अवं जोताई कि जल्दी बुजुर्ग नई चुन्ने, किजोकि किछ लोक खुले आम पाप केरतन, इन्साफे करां पेइले भी तैना विश्वासी लोकां केरे सामने दोषी आन। हांलाकि होरि लोकां केरे पाप बांदे न भोन पन बांदे मां पिशाने गातन।

25 एन्चरे ज़ैखन लोक रोड़ां कम्मां केरतन, त तैन होरि विश्वासी केरे ज़िरिये हेरू गाते। अगर तैना तैन एक्की बारे साफ चारे लेई बटन, आखर तैना तैन पिशानेले।

6

1 जैना विश्वासी लोक गुलाम आन, तैनेई हर तरीके सेइ अपने मालिकां केरि आदर कियोरी लोड़े ताके होरे लोक परमेशेरी ते इश्शे शिक्षारी तुहीन न केरन।

2 ते जैना मालिक विश्वासी भोन, त तैन केरू मसीह पुड़ विश्वास केरनेरे वजाई सेइ तैन केरि बराबर इज्जत की गाए, बल्के तैन केरे लेइ होरू भी जादे कम कियोरू लोड़े। किजोकि इस सेइ फैइदो नेनेबाले विश्वासी आन ते तैना गुलाम तैन सेइ प्यार केरतन, इन गल्लां केरि शिक्षा दे ते इन होसलो दे कि तैना इन सब केरन।

~~~~~

3 किछ लोक इश्शे शिक्षारी खलाफत केरि बटतन, पन इना यीशु मसीहेरी रोड़ी शिक्षां आन। इना शिक्षां भेक्तरी ज़िन्दगी बद्धेतिन।

4 जै कोई अलग शिक्षालते तै अभिमानी ते तै किछ न समझे। एरे जेरे मैन्हु गैर ज़रूरी मुदां ते लफसां केरो मतलब ज़ान्नेरे लेइ होरन सेइ बेंस ते तर्क केरतन। जैन केरो नितीजो जलन, ते लड़ाई ते तुहीनरी गल्लां, ते बुरी-बुरी शक,

5 ते मैन्न मां बेफैइदी लड़ेई पैदा भोतिन, ते जैन केरे मन बुरे शक्की सेइ भेरोरेन, ते तैना लगातार होरन सेइ बेंस केरतन, ते तैना सेझी न बटथ कि सच्च कुने, तैना समझतन परमेशेरे बारे मां शिक्षा देनी कमाई केरनेरो ज़िरियोए।

6 पन इश्शे इन लेइ इन रोड़ू कि अस तैन केरम ज़ैस सेइ परमेशर खुश भोए ते जैन परमेशर असन देते तैस सेइ अस राजी भोम।

7 ते न असेई दुनियाई मां किछ आनोरू, ते न किछ नेही बटम।

8 ते अगर असन कां किछ खाने पीने ते लाने जो भोए, ते इस्से मां खुश रहम।

9 पन जै धनी भोनो चाए, तैना इन सब पाप केरतां बड़े आसान तरीके सेइ धोखो खातन, जेन्चरे जानवर ज़ाले मां फसतन तेन्चरे तैना फसतन। तैना इन केरनू चातन जैन तैन केरे लेइ बेवकूफी ते खतराए, ते एरी इच्छां तैन बरबाद ते नाश केरनेरे पासे नेतिन।

10 किजोकि पेइसां केरू लालच सेब्भी किसमेरे बुरैइ अरू वजाए, किछ लोकेई बले-बले मसीह पुड़ विश्वास केरनो शारो किजोकि तैना धनी भोनू चाते थिये, ते तैनेई तैस मैनेरो ज़ेरो बड़े तरीकन सेइ दुःख झैल्लो जै अपने आपे कोन्वी हथियारे सेइ ज़खमी केरते।

~~~~~

11 पन हे तीमथियुस, तू परमेशेरो मैनुस, तीं इन गल्लां न लोड़न कियोरी, सिर्फ जैन ठीके तैन केरनेरे लेइ हर किसमे सेइ कोशिश केर। एरी ज़िन्दगी ज़ी ज़ैस सेइ परमेशेरी आदर भोती, मसीह पुड़ भरोसो केर, होरि लोकन सेइ प्यार केर, मुश्किल वक्ते मां हिम्मत रख, ते होरि लोकन सेइ नेरमी सेइ बर्ताव केर।

12 जेन्चरे अक रोड़ो सिपाई जंगी मां लड़ेई मां हार न मन्ने, तेन्चरे तू भी परमेशेरे पुड़ भरोसो रखने मां ते तैसेरी गल मन्ने मां हार न मन्न। ते तैस हमेशारी ज़िन्दगी मज़बूती सेइ ठेमतां रख,

जेसेरे लेइ तू परमेशेरे कुजावरोस, ते जेसेरे बारे मां तीं बडे लोकां केरे सामने दिलेरी सेइं ज़ोरू थियूं कि तू मसीह पुइ विश्वास केरतस।

13 अवं तीं परमेशेरे सामने ज़ै सेबन ज़िन्दगी देते, ते मसीह यीशुएरे सामने ज़ोताई, ज़ैने पुन्तियुस पिलातुसेरे सामने रोड़ी गवाही दिती, ई हुक्म देताई।

14 ज़ैन किछ परमेशेरे तीं केरनेरे लेइ हुक्म दित्तोरो तैन सब किछ पूरू केर, ताके यीशु मसीह ज़ांतगर वापस न एज्जे तीं पुइ कोई दोष न लेई बटे तू कुन गलत केरने लोरोस।

15 सिर्फ परमेशेर तै राज़ोए ज़ै बड़यैयरे काबले, तै महान राज़ो ते महान प्रभुए, तैए मसीहे सही वक्ते पुइ बांदो केरेलो।

16 सिर्फ तैए हमेशा ज़ींतो रहते, ते तै तैस महिमा बैली लोई मां रहते ज़ैस कां कोई न एज्जी बटे। तैसेरी आदर ते शक्ति हमेशा राली। आमीन।

17 इस दुनियारे दौलतमंदन हुक्म दे, कि तैना घमण्डी न भोन ते चंचल धने पुइ उमीद न रखन, पन परमेशेरे पुइ ज़ै इश्शे सुखेरे लेइ बडू हछ्छू देते।

18 ते तैन ज़ो कि तैना अपने पेइंसे रोइ कम्मां केरे लेइ इस्तेमाल केरन ते भलाई केरने मां दौलतमंदन बनन ते हमेशा तियार रान होरन खुल्ले दिले सेइं देनेरे लेइ ज़ो।

19 एन्त्रे केरने सेइं तैना अपना रोड़ां कम्मां खजानेरे ज़ेरे जमा केरेले, ज़ैना तैन केरे लेइ एज्जेबाले वक्ते स्वर्गे मां मज़बूत मुनीयादरां ज़ेरां भोलां। ते तैना तै सच्च्ची ज़िन्दगी हासिल केरेले ज़ै हमेशेरे लेइ आए।

20 हे तीमुथियुस इस गल्ली पुइ ध्यान दे कि ज़ैन परमेशेरे तीं केरनेरे लेइ दित्तोरूए तैन्ने केर। दुष्ट ते बेकार गल्लन करां ते तैन शिक्षान करां बेंचता रा, ज़ैना परमेशेरेरी सच्च्ची शिक्षां केरि खलाफत केरतन, तैस तैना ज्ञान ज़ोतन पन तैन गलते।

21 किछ लोकेई इन झूटू ज्ञान कबूल कियोरूए, एन्त्रे केरनेरे सेइं तैनेई मसीहेरे सच्च्ची शिक्षान पुइ विश्वास केरनो शारो। परमेशेरेरो अनुग्रह तुसन सेबन पुइ भोतो राए।

2 तीमुथियुस

??????

1 अवं पौलुस ई चिट्ठी लिखने लोरोई। परमेशरे अवं यीशु मसीहेरो प्रेरित भोनेरे लेइ चुनो, ताके अवं इस सन्देशेरो प्रचार केरि कि परमेशरे यीशु मसीह पुड़ विश्वास केरनेरे जिरिये वादो कियो कि हमेशारी ज़िन्दगी देलो।

2 अवं ई चिट्ठी तीमुथियुसे लिखने लोरोई, जैन मेरे मट्ठेरू ज़ेरूए, हे तीमुथियुस अवं प्रार्थना केरताई बाजी परमेशर ते इशे प्रभु यीशु मसीह तीं अनुग्रह ते दया ते शान्ति देतो राए।

??????

3 जैस परमेशरेरी सेवा अवं अपने दादे पड़दादां केरे रीति पुड़ शुद्ध ज़मीरे सेइं केरताई, तैसेरू शुकर भोए, कि अवं अपनी प्रार्थनाना मां तीं रात दिहैड़ी याद रखताई।

4 मीं यादे ज़ैखन अस अलग भोने लोरे थिये तैखन तू केन्चरे लेरां देने लोरो थियो, ते तीं सेइं मिलनेरी बड़ी इच्छा रखताई कि ज़ैखन मिली त अवं आनन्दे सेइं भरी गोइ।

5 ते अवं तेरे अम्मा यूनीके ते तेरी नानी लोइसेरो तै सच्चे विश्वास याद केरताई। तेरो विश्वास भी तेरहो आए, ते मीं याकीने तीं मां भी आए।

6 एल्हेरेलेइ अवं तीं याद कराताई, कि तू परमेशरेरे तैस वरदाने जैन मेरे हथ रखने सेइं तीं मैल्लोरू थियूं चमका।

7 किजोकि परमेशर अस डरपोक नई बनावरे बल्के तैसेरो आत्मा इशे दिलन मज़बूत केरते, ते मद्दत केरते कि अस होरि लोकन सेइं प्यार केरम ते ताके आपे कैवू मां रखम।

8 एल्हेरेलेइ होरि लोकन परभु यीशुएरे बारे मां ज़ोने करां शरमा ते एल्हेरेलेइ शरमा कि अवं परभुएरी सेवा केरनेरे लेइ कैदे मां आई। बल्के तू परमेशरेरे तैस शेक्ति इस्तेमाल केर ते मीं सेइं साथी खुशखेबारे लेइ दुःख झलने मां शामिल भो।

9 परमेशरे असन मुक्ति दिती, ते अस पवित्तर ज़िन्दगी जीनेरे लेइ कुजाए, तैने अस एल्हेरेलेइ नई कुजवरे कि असेईं रोड़ां कम्मां कियां, किजोकि दुनिया बनाने करां पड़लो परमेशरेरो ई मकसद थियो कि तै यीशु मसीह इशे लेइ इस दुनिया मां भेजतां असन पुड़ अनुग्रह हिराए।

10 पन हुनी इशे मुक्ति देनेवाले यीशु मसीह ओरोए ते तैनी अपनो अनुग्रह हिरावरोए। तैने मौतरी शक्ति नाश की, तैने असन खुशखेबारे ज़िरिये हमेशारे ज़िन्दगरी बत हिराई।

11 इस खुशखेबारे लेइ परमेशरे अवं प्रचारक ते प्रेरित ते शिक्षा देनेवालो चुनो।

12 एल्हेरेलेइ अवं कैदखाने मां दुःख भी झैल्लने लोरोई, पन शरमेई न, किजोकि अवं मसीहे ज्ञानताई जैस पुड़ मीं विश्वास कियोरोए, ते मीं याकीने, कि जैन मसीहे दितोरू ज्ञातगर तै वापस न एज्जे तांतगर तै तैसेरी रखवाली केरि बटते।

13 जैना रोड़ी शिक्षां तीं मीं करां शुनोरिन तैन तू मिसालरे रूपे मां रख, इन तू विश्वासे ते प्यारे सेइं साथी केर, किजोकि तू मसीह यीशु सेइं साथी अक भोरोस।

14 ते तैस सच्चेरी रखवाली केर, जैन पवित्तर आत्माे ज़िरिये सेइं तीं सोंफेरू, जै असन मां रहते।

15 तू ज्ञानतस, कि आसिया इलाकेरे बड़े विश्वासी लोक जैनई अवं शारोरोई, जैन मां फूगिलुस ते हिरमुगिनेसे भी अवं शारो।

16 उनेसिफूरूसेरे घराने पुड़ प्रभु दया केरे, किजोकि तै बड़े बार मीं कां अव ते मीं होसलो दित्तो, ते मीं सेइं कैदखाने मां एजनेरे लेइ न शरमाव।

17 पन ज़ैखन तै रोम नगरे मां अव, त बड़े कोशिश सेइं तोप्तां मीं सेइं मुलाकात केरि।

18 परभु इन्साफेरे दिहाड़े अपनि महान दया उनेसिफुरूसे पुड़ हिराए। तू एण्पू रोड़े च़ारे ज़ानतस कि इफिसुस नगरे मां तैनी मेरी केतूरी मद्दत की।

2

???? ??????? ??????????? ???????

1 एल्हेरेलेइ हे मेरे मट्ठा तीमूथियुस, तू अपने आपे मज़बूत केर इन ज़ैनतां कि परमेशेरे तीं अनुग्रह दित्तोरों, ज़ै सिफ़े यीशु मसीह सेइं अक भोइतां मैलते।

2 तीं बड़े लोकां केरे सामने ज़ै मसीहेरे सन्देशी शिक्षा मीं करां शुनोरिन। एल्हेरेलेइ अवं चाताई कि तैए सन्देश तू होरि विश्वासी लोकन शिखाल, ज़ैना वफ़ादार भोन ते होरन शिखालनेरे काबल भोन।

3 बिलकुल तेन्चरे ज़ेन्चरे अक सिपाही जंगरे मैदाने मुश्किल हालातन मां सबरी सेइं झैल्लते, तेन्चरे तू भी मुश्किल हालातन मां सबरी सेइं दुःख झैल्ल ज़ेन्चरे अस यीशु मसीहेरे लेइ झैल्लतम।

4 अक सिपाही ज़ैखन फौजी मां नौकरी केरते त तै होरि किसमेरू कम न केरे, किजोकि तै अपने भरती केरनेवाले खुश केरनू चाते।

5 फिरी आखाड़े मां घुल्लने वालो अगर कानूनेरे मुताबिक न घुल्ले त तैस ताज न मैल्ले।

6 ज़ै ज़मीनदार मेहनत केरते, फसलेरे पेइले हिस्सेरो हकदार तैए भोते।

7 ज़ैन अवं ज़ोताई, तैस पुड़ ध्यान दे, ते परभु तीं सेब्मी गल्लां केरि समझ देलो।

8 लगातार याद रख कि यीशु मसीह कौने, तै दाऊदेरे खानदेनी मरां आए, ते परमेशेरे तै मुड़दन मरां जीतो कियो ते ईए खुशखबरी अवं लोकन शुनाताई।

9 अवं खुशखबरी शुनाताई एल्हेरेलेइ अवं मुजरामेरो ज़ेरो दुःख झैल्लताई, इड़ी तगर कि कैदे मां आई, पन कोई भी लोकन परमेशेरेरू वचन प्रचार केरने करां न रोकी बटे।

10 एल्हेरेलेइ अवं तैन लोकां केरे फेइदेरे लेइ दुःख झल्लताई ज़ैना परमेशेरे चुनोरिन, ताके तैना भी यीशु मसीह पुड़ विश्वास केरतां मुक्ति हासिल केरन ते हमेशारी महिमा हासिल केरन।

11 ई गल सच्चे, कि

अगर अस तैस सेइं साथी मरे त तैस साथी जीते भी भोमेले।

12 अगर अस तैसेरे वजाई सेइं दुःख झैल्लते रहले, त तैस सेइं साथी राजां केरू ज़ेरू अस भी राजां केरमेले,

अगर अस तैसेरो इन्कार केरमेले कि अस तैस न ज़ानम, त तै भी इशरो इन्कार केरेलो।

13 अगर अस मसीह सेइं साथी वफ़ादार न भोम, त तै फिरी भी वफ़ादार बनोरों रालो, किजोकि तै अपने स्भावेरे खलाफ न गेइ बटे।

???? ???????

14 ज़ैना गल्लां मीं तीं सेइं ज़ोरिन तैन तू अपने लोकन बिसरने न दे, ते परभुए गवाह रेखतां तैन खबरदार केर, कि लफसन पुड़ बेंस न केरन, ज़ैस सेइं किछ फेइदो न भोए, बल्के शुन्ने वालां केरो बड़ो नुकसान भोते।

15 बड़ी मेहनत केर ताके तू परमेशेरेरे सामने कबूल भोनेरे काबल भोस, तू एरे मैनेरो ज़ेरो भोनेरी कोशिश केर ज़ै अपने कम्मे सेइं वजाई सेइं शरमिनदा न भोए, ते ज़ै सच्चेो सन्देश ठीक तरीके सेइं शिखालतो भोए।

16 पन बेकार ते बेवकूफ गल्लन करां दूर राए, किजोकि एरी गल्लां परमेशेरे करां दूर केरतिन।

17 ते तैन केरि गल्लां मैनेरे शड़ोरे ज़खेमेरी ज़ेरि फैलतां लोकां केरे विश्वासे नाश केरतिन। ते हुमिनयुस ते फिलेतुस तैन केरे ज़ेरि आन।

18 तैनेई सच्च पुड़ विश्वास केरनो बंद कियो। तैना ज़ोतन परमेशेरे पेइले मरे विश्वासी लोक हमेशेरे ज़िन्दगरे लेइ जीते कियोरन। एसेरो नितीजो ई भोते कि किछ लोक मसीहेरी शिक्षाई पुड़ विश्वास केरनो बंद केरतन।

19 परमेशेरे लोक पक्की मुनीयादारे जेरे आन जै हिल्ले न। इस मुनीयादी पुड़ एरे लफस लिखोरन: “परभु ज्ञानते तैसेरे लोक कौन आन, ते इन भी कि जैना प्रभुएरी आराधना केरतन तैनेई बुरां कम्मां केरनां बंद कियेरां लोड़न।”

20 एककी अमीर घरे मां किछु सोन्नेरे ते चैदरां भांडां भोतन ते लेकडारां ते मितरां भोतन। माघां भांडां खास मौके पुड़ इस्तेमाल केरनेरे लेइ भोतन ते सस्तां रोज़ इस्तेमाल केरनेरे लेइ भोतन।

21 तेन्चरे विश्वासी लोक जैना अपनो आप एन सैरी बुरी चीजन करां अलग केरे त तै कीमती भांडेरो जेरो भोलो जैन खास मौके पुड़ इस्तेमाल कियूं गाते, जेसेरी जिनंदगी पवित्र भोली त तै अपने मालिकेरे इस्तेमाल भोनेरे काबल भोलो।

22 जवैनरी खुवैशन करां दूर रा, ते जैना मैन्हु शुद्ध मने सेइं प्रभुएरू नवं घिन्तन, तैन सेइं साथी धार्मिकता, प्यार, ते मेल मलापेरो पीछो केर।

23 अवं फिरी ज़ोताई तू अपनो आप बेवकूफी, ते बेफैइदी गल्लन करां दूर रा, किजोकि तू ज्ञानतस, कि तैन सेइं लडाईं भोतिन।

24 ते परमेशेरो दास लडाको न लोडे, पन सेभन दया केरनेबालो ते परमेशेरे वचनेरी रोडे च़ारे शिक्षा देनेबालो, ते जैना लोक तैसेरे खलाफ भोन तैन सेइं सबर केरनेबालो लोडे।

25 ते जैना लोक तैसेरी खलाफत केरन तैन बडे नेरमी सेइं शिखालेनेबालो लोडे, भोइ सकते परमेशर तैन लोकां केरि महत केर कि तैना मन फिरान, ते मसीहेरी सच्च़ाई पिशानन

26 ते एरे लोक दुबारां फिरी साफ तरीके सेइं सोचनेरे काबल भोले ते शैतानेरे धोखे करां जै ज़ालेरे ज़ेरोए बच़ेले। शैताने तैना फासवरे थिये कि ज़ैन तै चाते तैना तैन करां कराए।

3

????????????????????

1 ध्यान दे अवं हुन्ना कुन ज़ाने लोरोई, कि दुनियारे आखरी दिहाड़न मां बुरो वक्त एज्जोए।

2 किजोकि लोक सिर्फ अपने आपे सेइं प्यार केरेले, दौलतरे लालची, बडकां मारनेबाले, अभिमानी, होरन बेइज्जत केरनेबाले, अम्मा-बैपू केरू ज़ांनू न शुन्ने बाले, हारि केरू शुकर न केरनेबाले, अपवित्र,

3 होरन सेइं प्यार न केरनेबाले, माफ न केरनेबाले, दोष लाने बाले, अपनि इच्छान पुड़ कैबू न केरनेबाले, सखत, सच्च़े सेइं नफरत केरनेबाले।

4 धोखो देनेबाले, ढीठ, ते अभिमानी ते परमेशेरे नईं बल्के एशेरे चानेबाले भोले

5 तैना भेक्तरू रूप त बनाले पन तैस शेक्ति न मन्नेले ज़ै तैन भक्त बनाथी, एरे ज़ेरे लोकन सेइं संगती न रेखां।

6 एन्ने मां तैना लोकन, ज़ैना लोकां केरे घरन मां गेइतां बेवकूफ कुआन्शन अपने वशे मां केरतन, ज़ैन केरे मन पापे सेइं देबोइतां हर किसमेरी खुवैशन मां आन।

7 ते हेमेशा नर्वीं-नर्वीं गल्लां त शिखती रैतिन, पन तैना मसीहेरी सच्च़ी शिक्षाई कधे न सेमझी बटन।

8 इना झूठे उस्ताद मसीहेरे सच्च़े सन्देशेरे खलाफत केरतन जेन्चरे यन्नेस ते यम्ब्रेसे मूसेरी खलाफत कियोरी थी। तैन केरे मन बुरेन ते तैन केरो मसीह पुड़ विश्वास सच्च़ो नईं।

9 तैन केरि कामयाबी सिर्फ थोडे वक्तेरीए, किजोकि जेन्चरे लोकेईं यन्नेस ते यम्ब्रेस पिशानोरे थिये कि तैना बेवकूफन। तेन्चरे हर कोई इन भी पिशानेलो कि इना भी बेवकूफन।

????????????????????

10 पन हे तीमथियुस तू एप्पू रोडे च़ारे ज़ान कि अवं शिखालताई, ते अवं केन्चरे ज़ीताई, ते मेरो कुन मकसद, ते अवं कुन विश्वास केरताई। तू ज़ानतस अवं सबर केरतो ओरोईं ते सेब्मी किसमेरे लोकन सेइं प्यार केरतो ओरोईं, मीं मुसीबतां झैल्ली ते लोकेईं अवं स्तव कि मीं बडो दुःख भोए,

11 तू तैन भयानक गल्लां केरे बारे मां ज़ानतस ज़ैना लोकेईं मीं सेइं अन्ताकिया ते इकुनियुम ते लुस्त्रा नगरन मां की, ते मीं तैड़ी केरो स्तव झैल्लो। पन प्रभुए अवं तैन सेभन मरां छुटव।

12 जै कोई तैन केरनू चाते ज़ैस सेइं परमेशेरे खुश भोते ते यीशु मसीह पुड़ विश्वास केरते तै स्तव गानोए ।

13 पन दुष्ट लोक ते तैना धोखो देनेबाले होरि भी बुरी चीजां केरेले । तैना लोकन धोखो देले ते एप्पू भी होरन करां धोखो खाले ।

14 पन जैन तीं असन करां शिखोरूए तैस पुड़ लगातार विश्वास केर, ते तीं पूरू याकीन किजोकि तू असन ज्ञानतस ते असन पुड़ भरोसो केरि बटतस ज़ैनेई तीं इना सैरी गल्लां शिखैली ।

15 ते बचपनेरो तू पवित्रशास्तेरो ज्ञान्ने बालोस, ज़ैन तेरी इन समझनेरे लेइ महत केरते, कि ज़ैखन तू यीशु मसीह पुड़ विश्वास केरतस परमेशर तीं मुक्ति देते ।

16 सारू पवित्रशास्त्र परमेशेरे अगवैई सेइं लिखोरू, ते इन लोकन शिखालने लेइ महतगारे, तैन ज़ोनेरे लेइ कि ज़ैन तैनेई कियू तैन गलते, तैन केरि गोलती सुधारनेरे लेइ, ते तैन केरनेरे लेइ शिखालनेरे लेइ ज़ैन सही आए ।

17 ताके परमेशेरो मैन्हु हर किसमेरां रोड़ां कम्मां केरनेरे लेइ तियार भोए ।

4

1 ज़ैखन मसीह यीशु राज़ेरो ज़ेरो राज़ केरने एज्जेलो त तै ज़ीते ते ज़ैना मरेंन, लोकां केरो इन्साफ केरेलो, अवं तीं परमेशेरे ते मसीहे गवाह रेखतां हुक्म देताई ।

2 कि तू परमेशेरे वचन प्रचार केर, वक्त बे वक्ते तियार रा, तू लोकन ज़ैना बुरां कम्मां तैनेई कियां हिरा, तैन केरे पापां केरे लेइ तैन झिड़क पन तैन होसलो भी दे ते तैन सबरी सेइं शिखाल ।

3 किजोकि एरो वक्त एज्जोए, कि लोक रोड़ी शिक्षा न शुन्नी चाले, पन तैना अपने मेर्जी पुड़ चलनू चाले ते तैना अपने लेइ बड़े उस्ताद तोप्येले ज़ैना तैन सेइं तैन ज़ोन ज़ैन तैना शुन्नु चातन ।


4 तैना तैन करां शुन्नु न चाले ज़ैना परमेशेरे सच्चू वचन शुनातन पन तैना झूठी कहैनी शुन्नी चाले (ज़ैना मैन्हु केरि बनेवरिन) ।

5 पन तू अपना आप कैबू मां रख चाए किछ् भी की न भोए, इस मां तीं ज़ैना भी दुःख भी झैल्लने पेन त झल, खुशखबरी शुनानेरे लेइ बड़ी प्रचार केर, ते ज़ैन कम परमेशेरे तीं केरनेरे लेइ दितोरू तैन पूरे केर ।

6 अवं इना हुक्म तीं देताई किजोकि मेरी ज़िन्दगी ते परमेशेरे लेइ कम खतम भोवरूए किजोकि अवं ज्ञानताई अवं जल्दी मरेलो ।

7 मीं जंगी मां रोड़ो सिपेहेरे ज़ेरे ज़ै लड़ाई केरने मां कधी हार न मन्ने, तू भी मसीहेरे लेइ बड़ी मेहनत केरनि कधे हिम्मत न हार, मीं तैन कम पूरू कियू ज़ैन मसीह यीशुए मीं केरनेरे लेइ दितोरू धियू, मीं वफादैरी सेइं खुशखबरी प्रचार की ।

8 हुनी, प्रभुएरे मेरे लेइ स्वर्गें मां इनाम रखेरू किजोकि मीं तैस खुश केरनेबाली ज़िन्दगी ज़ीयोरीए । प्रभु ज़ै धर्मी इन्साफ केरनेबालोए मीं इन इनाम तेइस देलो ज़ेइस तै वापस इन्साफ केरनेरे लेइ एज्जेलो । पन इन इनाम सिर्फ मेरे लेइ नई, पन तैन सेब्भी केरे लेइ भी आए, ज़ैना तैसेरे एज्जनेरी बड़ी इच्छा रखतन ।



9 मीं कां जल्दी एज्जनेरी कोशिश केर ।

10 किजोकि देमासे इस दुनियारी चीज़न सेइं प्यार केरतां अवं शारो, ते तै थिस्सलुनीके नगरे जो चलो जेव, ते क्रेसकेंस गलातिया इलाके जो जेव ते तीतुस दलमतिया इलाके जो चलो जेव ।

11 सिर्फ लूका मीं सेइं साथीए, ज़ैखन तू एज्जस त मरकुसे भी एप्पू सेइं साथी एना, किजोकि तै इड़ी मेरे महत केरनेरे कावले ।

12 तुखिकुस मीं इफिसुस नगरे जो भेज़ोरोए ।

13 ज़ैखन तू एजस त तै चोगो एना जै मीं तूरोआस नगरे मां मरकुसेरे घरे रख्वोरोए। ते मेरे चर्मपत्र भी एना, खास केरतां तै जै छेल्ली केरे खेडू सेइं बनोरोए।

14 सिकन्दर ताम्बेरू कम केरनेबाले मीं बड़े बारे दुःख दित्तोरोए, प्रभु तैस तैसेरे बुरे कम्मां केरे मुताबिक बदलो देलो।

15 तू भी तैस करां खबरदार रा, किजोकि तैने इशशे शिक्षारी बड़ी खलाफत की जै मसीहेरे बारे मां आए।

16 ज़ैखन पेइले बार अवं आदालती मां अपनो आप बचाव केरनेरे लेइ जोरो थियो त कोई भी मीं सेइं साथी न थियो। पन तैना सारे मीं शैरतां चले जे, परमेशर इन तैन केरे खलाफ न गने। अवं प्रार्थना केरताई परमेशर तैन हछु माफ़ केरे।

17 पन प्रभु मेरो मद्दतगार राव, तैने मीं हिम्मत दित्ती, ते अवं यीशु मसीहेरी खुशखबरी शुनानेरे काबल भोव कि सारे गैर कौमां केरे लोक शुन्न, ते तैने अवं मौती करां एन्चरे बचाव जेन्चरे शेरे करां।

18 ते प्रभु मीं हर एक्की बुरे हमले करां बचालो ते अपने स्वर्गेरे राज्जे मां हफाजती सेइं पुजालो, सारे महिमा हमेशा-हमेशा परमेशेरी भोती राए। आमीन।



19 मेरू नमस्कार प्रिस्का ते तैसेरे घरे बाले अक्विला ते कने उनेसिफुरूसेरे घराने दे।

20 इरास्तुस कुरिन्थुस नगरे मां रावरोए, ते त्रुफिमुस मीं मिलेतुस नगरे मां बिमार शारोरोए।

21 हीवतड़ेरे पेइले एजनेरी कोशिश केर, ते यूबूलुस ते पूदेंस ते लीनुस ते क्लौदिया, ते इठेरे सारे विश्वासी लोकेईं नमस्कार भेजेरू आए।

22 अवं प्रार्थना केरताई प्रभु तीं सेइं साथी भोए, ते तैसेरो अनुग्रह तुसन सेब्बन पुड भोतो राए।

तीतुस

ॐॐॐॐॐॐ

1 अवं पौलुस ई चिट्ठी लिखने लोरोई । अवं परमेशेरो दास ते यीशु मसीहेरो परेरित आई । अवं परमेशेरे चुनारे लोकां केरे विश्वासे मजबूत केरनेरे लेइ ते तैन केरि मद्दत केरनेरे लेइ चुनोरोई, कि तैना यीशु मसीहेरी सच्च्ची शिक्षा ज्ञानन ताके तैना एरी ज़िन्दगी ज़ीन ज़ैस सेइं परमेशर खुश भोए ।

2 तैसेरो नितीजो ई भोए कि तैना परमेशेरे सेइं हमेशा रानेरी उमीद रखन, परमेशर ज़ै कद्दे झूठ न ज़ोए, तैने दुनिया बनाने करां पेइलो वादो कियोरो थियो, कि तैसेरे लोक हमेशारे लेइ ज़ीयेले ।

3 ते हुनी परमेशेरे ठीक वक्ते पुइ ई खुशखबरी असन पुइ बांदी की ज़ै अस सेभन प्रचार केरतम । इशे मुक्ति देनेवाले परमेशेरे ई ज़िमेवारी मीं दित्तोरीए ते तैसेरेलेइ इन कम केरनेरे लेइ मीं हुक्म दित्तोरोए ।

4 अवं ई चिट्ठी तीतुसे जो लिखने लोरोई । तू मेरे मट्टे जेरू आस, किजोकि ज़ेन्चरे अवं विश्वास केरताई तेन्चरे तू भी विश्वास केरतस । अवं प्रार्थना केरताई इशे बाजी परमेशर ते इशेो मुक्ति देनेवालो प्रभु यीशु मसीह तीं अनुग्रह त कने शान्ति देतो राए ।

ॐॐॐॐॐॐ ॐॐॐॐ ॐॐॐ ॐॐॐॐॐॐॐॐ ॐॐ

5 मीं तू एल्हेरेलेइ करते टैपू मां शारोरो थियो, ताके तू तैडी इशू कम पूरू केरस, ते होरि नगरन मां बुज़ुर्ग चुन ज़ेन्चरे तीं केरनेरो हुक्म दित्तोरो थियो ।

6 लीडर बेइलज़ाम लोडे ते अपने कुआन्शी सेइं वफादार लोडे, ज़ैन केरे बच्चे विश्वासी भोन ते बुरो बर्ताव केरनेवाले न भोन ते तैना अपने अम्मा बाजी केरो हुक्म मन्नेवाले भोन ।

7 किजोकि रखवालो परमेशेरो भण्डारी भोने वजाई सेइं बेइलज़ाम लोडे, न अपनि ज़लानेवालो, न सेरकलो, न शराबी, न लड़ाको, ते न पेइसां केरो लालची लोडे ।

8 पन मेहमानां केरि आदर केरनेवालो, होरि केरि भलाई केरनेवालो, अपने आपे पुइ कैवू केरनेवालो, धरमात्मा, पवितर ते अपने इच्छान कैवू केरनेवालो लोडे ।

9 ते तै यीशु मसीहेरे तैस सन्देशे पुइ ज़ै भरोसेरे काबले मजबूती सेइं विश्वास केरनेवालो लोडे, ज़ै असेई तैस शिखालोरोए । ताके तै होरन सही शिक्षाई मन्नेरे लेइ होसलो देइ बटे ते ज़ैना गलत भोन तैन सुधैरी बटे ।

10 अवं इन एल्हेरेलेइ ज़ोताई, किजोकि बड़े लोक सही शिक्षारी खलाफ केरेले, ज़ैना बेकार गल्लां शिखालतन ते होरन धोखो देतन । इन खास केरतां किछ यहुदी केरे लेइ सज़ आए ज़ैना विश्वासी बनोरेन (इना तैना लोकन ज़ैना चातन कि सारे मसीही लोक यहुदी केरे कानूने मनन, खास केरतां खतनेरे कानूने) ।

11 एन लोकन शिखालनेरी अज़ाज़त न दे, किजोकि ज़ैखन तैना इन गल्लन शिखालतन, ज़ैना तैनेई शिखेलोरी लोइन, त तै सारे टब्बरां केरे विश्वासे बरबाद केरतन । तैना इन एल्हेरेलेइ केरतन कि पेइसो कमेई बटन ।

12 अक मैन्दु क्रेत टैपेरो आए ज़ैस जो तैना अक्लमन्द ज़ोतन तैने ज़ोरूए, “क्रेतेरे लोक हमेशा झूटे, जंगली जानवरां केरो ज़ेरो बर्ताव केरनेवाले, तैना आलसी ते हमेशा अढगू खानेवाले भोतन ।”

13 इन गल्लां क्रेतेरे लोकां केरे बारे मां सच्च्ची आन । एल्हेरेलेइ तैन खबरदार केर, कि तैना यीशु मसीहेरी शिक्षाई पुइ विश्वास केरन ।

14 ते यहुदी केरि बनोवरी कहैनी ते ज़ैना लोक सच्च्चे करां दूर भोरेन तैन केरे हुक्म शुन्ने बंद केरा ।

15 जैन लोकां केरे मने मां पापी खियाल नई तैन केरे लेइ रीतरे मुताबिक सब किछ शुद्धे । पन तैन लोकां केरे लेइ जैना बुरेन ते यीशु मसीह पुड़ विश्वास न केरन तैन केरे लेइ किछ भी शुद्ध नई जैन तैना केरतन ।

16 तैना झूठे उस्ताद ज्ञोतन कि अस परमेशरे ज्ञानतम, पन तैन केरां कम्मां साफ तरीके सेइ हिरातन कि तैना तैस न ज्ञानन, किजोकि परमेशर तैन सेइ नफरत करते ते तैना हुकम न मन्नेबालेन, ते किछ भी रोडू केरनेरे काबल नई ।

2

XXXXXXXXXXXXXXXXXXXX

1 पन हे तीतुस तू विश्वासी लोकन तैन शिखाल जैन यीशु मसीहरे बारे मां सही शिक्षारे मुताबिक ठीके ।

2 बुड्डे मडदन शिखाल कि अपने आपे पुड़ कैबू केरनेबाले बनन, ते तैनेई एरो बर्ताव केरन कि लोक तैन केरि आदर केरन, ते समझदारी सेइ बर्ताव केरनेबाले भोन । ते तैना परमेशरेरे पुड़ मजबूती सेइ विश्वास केरनेबाले बनन, होरन सेइ प्यार केरनेबाले ते सबर केरनेबाले बनन ।

3 एन्चरे बुड्डी कुआन्शन शिखाल कि एरी ज़िन्दगी ज़ीन ज़ैस सेइ परमेशेरी आदर भोए । तैना होरन पुड़ दोष लाने बैली, ते पीने बैली नई, पन ते तैन ज़ो कि तैन होरन तैन शिखालन जैन रोडूए ।

4 ताके तैना जवान कुआन्शां केरे लेइ मिसाल भोन ते तैन शिखालनेरे काबल भोन कि अपने मुन्शन ते बच्चन सेइ केन्चरे प्यार केरन ।

5 ते तैना अपने आपे कैबू केरनेबैली, अपने मुन्शां केरे लेइ वफादार, ते घरेरो कारोबार केरनेबैली, भलाई केरनेबैली ते अपने-अपने मुन्शां केरे अधीन राने बैली भोन, ताके परमेशेरे वचनेरी तुहीन न भोए ।

6 एन्चरे जवान मडदन भी अक्लमन्द भोइतां ज़ीनेरे लेइ समझा ।

7 हर गल्लती मां तू हमेशा अपना आप अक मिसाल बना, ताके तैन भी एन्चरे केरन । ज़ैखन तू परमेशेरे बारे मां शिखालस त रोडे मकसदे सेइ शिखाल । एन्चरे लोक तेरी आदर केरेले ।

8 ते जैन सच्चरे तैन शिखाल ते जेसेरी आलोचना न भोए, ताके तेरे दुश्मन छिथोन, किजोकि फिरी कोई बुराई नई भोनी जेसेरी तैना खलाफ केरि बटन ।

9 जैना विश्वासी गुलाम आन तैन शिखाल कि हमेशा अपने मालिकां केरि गल मनन । तैन ज़ो कि तैन केरन ज़ैस सेइ तैन केरे मालिक खुश भोन ते कम्मेरे बारे मां शिकायत न केरन ।

10 चोरी न केरन, पन इन साबत केरन कि तैना हमेशा ईमानदारन, ताके लोक तैन केरे रोडे बर्ताव हेरन ते जैन तैना केरतन तैन लोकां केरे लेइ, इश्शे मुक्ति देनेबाले परमेशेरो सन्देश शुन्नेरी वजा भोली ।

11 किजोकि परमेशेरे सेबभी लोकन मुक्ति देनेरे लेइ अक बत देइतां अपना अनुग्रह हिराव ।

12 परमेशर अपने अनुग्रहरे ज़िरिये असन शिखालते, परमेशर असन शिखालते कि अस तेरहो बर्ताव न केरम ज़ैस सेइ ते खुश भोए । जेन्चरे गैर विश्वासी चीज़ां केरू लालच केरतन तुस एरू न केरा, तुस ज़ातगार इस दुनियाई मां आथ, अक्लमन्द ते धर्मी लोकां केरो ज़ेरो ते एरो ज़ेरो बर्ताव केरा ज़ैस सेइ परमेशर खुश भोते ।

13 अस तैस अनोखी दिहैडरी उमीदी मां रातम, कि जेइस इश्शो महान परमेशर ते मुक्ति देनेबाले यीशु मसीह महिमाई सेइ साथी वापस एज्जेलो ।

14 एने यीशु मसीहे अपना आप इश्शे लेइ बलिदान कियो ताके असन पापेरे शेक्ति करां छुटकारो दे, ताके अस शुद्ध भोम ते तैसेरे अपने लोक बनम जैना रोड़ां केरतन ।

15 इना गल्लां शिखाल ते अपना पूरो अधिकार इस्तेमाल केर, ते अपने शुन्नेबालन होसलो दे ते झिड़क दे । कोई तीं घटया न समझे ।

3

????? ??????

1 विश्वासी लोकन याद करा, कि हाकिमां ते अधिकैरी केरे अधीन रान, ते तैन केरो हुक्म मन्न, ते हमेशा रोडो केरनेरे लेइ तियार रान।

2 कोन्वी बदनाम न केरन, लडाके न भोन, पन नर्म सुभावेरे भोन, ते सेब्बी मैनन् सेइ साथी बेडि नेरमी सेइ रान।

3 किजोकि अस भी पेइले बेअक्ल ते हुक्म न मन्नेवाले थिये ते लोकेई असन धोखो दित्तोरो थियो। बडे खुवैइशां ते एशेरे केरनेरे गुलाम थिये, इशशी जिन्दगी दुष्टे ते जलनी सेइ भेरोरी थी ते एक्की होरि सेइ नफरत करते थिये।

4 पन फिर भी इशशे मुक्ति देनेवाले परमेशेरे असन लोकन पुड़ दया ते प्यार हिराव।

5 तैने अस इशशे पापां केरि सज़ाई करां बच्चाए एल्हेरेलेइ नई कि असेई रोडां कम्मां कियोरां थियां, पन तैसेरे दयारे वजाई सेइं। तैन इशशे पाप धोइतां असन नंक्वू ज़र्म दित्तू ते पवित्तर आत्मा देनेरे ज़िरिये असन नक्वीं जिन्दगी दित्ती।

6 परमेशेर पवित्तर असन मुफते मां दित्तो कि इशशे जिन्दगी मां शेक्ति सेइ कम केरे, किजोकि यीशु मसीह इशशो मुक्ति देनेवालो बन्नेरे लेइ इशशे पापां केरे लेइ मरो।

7 परमेशेर इन कियू ताके तै अपने अनुग्रहे सेइ अपने नज़री मां धर्मी बनाए, ताके अस तैसेरे बच्चे बनम ते पूरे तरीके सेइ हमेशा तैस सेइ साथी रानेरे उमीदी सेइ केरम।

8 ई गल सच्चे, अवं चाताई कि तू इन शिक्षान पुड़ ज़ोर दे ताके सब ज़ैना परमेशेर पुड़ भरोसो रखतन ते अपनो आप रोडू केरनेरे लेइ सॉफेले, इना शिक्षां सेब्बी केरे लेइ रोड़ी ते फ़ैदामंद आन।

9 पन बेवकूफी वंस ते पूर्वजां केरे नक्वां केरे बारे मां, ते लडाई ते तैन ते मूसेरे कानूनेरे बारे मां लडाई करां दूर रा, किजोकि तैन सब बेकार ते बेफ़ैदू आए।

10 ज़ैना लोक कलीसियाई मां फिरके बनानेरी वजा बनतन, कम से कम दूई बार तैन खबरदार केर कि तैना एन न केरन, तैट्टां बाद अपनो वक्त तैन पत्ती बर्बाद न केर।

11 तुस ज़रूर ज़ैनी बटतथ एरो ज़ेरो मैन्हु ज़ैनी बुज़झतां गलत बत्तां ज़लते, ते तैन अपना बुरां कम्मां इन साबत केरतन कि तैना पापिन।

????? ?????? ? ? ??????

12 अवं अरतिमास या तुखिकुसे तुसन कां भेज़नेरे लेइ बिस्तार बनाने लोरोई, ज़ैखन तैन मरां अक तीं कां पुज़ते त निकुपुलिस नगरे मां मीं सेइ मिलनेरी पूरी कोशिश केर, किजोकि मीं तैड़ीए हिवतडो कटनो थापोरोए।

13 ज़ैखन जेनास शास्त्री ते अपुल्लोस तैट्टां गानेरे लेइ तियार भोन त ज़ेतूरू भोइ बटे तैन केरि मद्दत केर, ताके तैन कोन्वी भी चीज़री घटी न भोए।

14 सिर्फ़ इन नई, बल्के तू विश्वासी लोकन शिक्षा देतो रा, कि तैना रोडां कम्मां केरन ताके तैन लोकां केरि मद्दत केरन ज़ैन ज़रूरत आए। इस सेइ तैन केरि मद्दत भोली कि तैना एक्की मकसदे सेइं जिन्दगी जीन।

15 सारे विश्वासी लोक ज़ैना मीं सेइ साथी आन तींजो नमस्कार ज़ोतन। इशशे विश्वासी सैथी लोकन ज़ैना असन सेइ प्यार केरतन तैन नमस्कार। अवं प्रार्थना केरताई प्रभु तुसन सेब्बन पुड़ अनुग्रह केरतो राए।

फिलेमोन

??????

1 अवं पौलुस ई चिट्ठी लिखने लोरोई। अवं कैदे मां आई किजोकि अवं यीशु मसीहेरे बारे मां प्रचार करताई। हे फिलेमोन तीं इशुसे ढूला तीमुथियुस ते मेरे तरफां नमस्कार। तू इशुसे ढूलारो दोस्तस आस ते जेन्चरे अस मसीहेरे लेइ कम करतम तेन्चरे तू भी करतस।

2 अवं इशुसी विश्वासी बेइन अफफिया ते इशुसे सैथी अरखिप्युस जै सिपेहेरे जेरो प्रभुएरी सेवा करते, ते तैन कलीसियारे लोक जैना तेरे घरे मां अकोट्टे भोतन, तैन भी लिखने लोरोई,

3 अवं प्रार्थना करताई, इशुसे बाजी परमेशर ते प्रभु यीशु मसीह तुसन पुइ अनुग्रह केरे ते तुसन शान्ति दे।

????????????????????

4 अवं जैखन भी तेरे लेइ प्रार्थना करताई, तेरे लेइ अवं परमेशेरू शुक्र करताई।

5 किजोकि मीं प्रभु यीशु मां तेरे विश्वासेरे बारे मां ते परमेशेरें लोकां केरे लेइ तेरे प्यारे बारे मां शूनु।

6 अवं प्रार्थना करताई तेरी संगती जै विश्वासी लोकन सेइं साथीए, तुशुसे तैन रोइ चीजां केरे ज्ञान्नेरें जिरिये जैना परमेशेरें दितोरिन बद्धती गाए। इन मसीहेरे महिमारे लेइ भोतू राए।

7 किजोकि हे ढूला, अवं तेरे प्यारे सेइं जै तू मीं करतस बड़ो खुश आई, ते मीं बड़ो होसलो भोव, एल्हेरेलेइ कि तेरे प्यारे जिरिये होरि परमेशेरें लोकन भी होसलो मैल्लो।

????????????????????

8-9 अवं तीं किछु केरनेरे लेइ पुछुताई जैन तीं कियोरू लोडे। अवं मसीहेरो दितोरे अधिकारे इस्तेमाल करतां इन केरनेरे लेइ हुकम देइ बटतो थियो, पन अवं न केरेलो। इसेरे बदले मां, अवं बल्हे चारे जोताई कि तू इन केर, किजोकि अस एक्की होरि सेइं ते परमेशेरें लोकन सेइं प्यार करतम। अवं पौलुस हुनी सियाने मैनेरे रूपे मां तीं पुछुतई, अवं लोकेई कैदे मां बंद कियोरोई किजोकि अवं यीशु मसीहेरी सेवा करताई।

10 अवं उनेसिमुसेरे लेइ मिनत करताई जैन मेरे लेइ मट्ठेरू जेरूए। तैन मसीह मां मेरू मट्ठू इडी कैदखाने मां बनू।

11 तै बीतोरे वक्ते मां तेरे लेइ केन्ची कम्मरो न थियो, पन हुनी तेरे त कने मेरे दुइयां केरे बडे कम्मरोए।

12 अवं उनेसिमुसे तीं कां वापस भेजने लोरोई, तैस सेइं अवं पूरे दिले सेइं प्यार करताई।

13 अवं ज्ञातगर खुशखबरी प्रचार केरनेरे वजाई कैदखाने मां आई तांतगर तैस अपनि मद्दत केरनेरे लेइ इडी एप्पू सेइं साथी रखनो चातो थियो। ताके तै तेरे ठैरी मेरी मद्दत केरे, किजोकि अवं ज्ञानताई तू मेरी मद्दत करनि चातस।

14 पन मीं तेरी मेज्जीं बगैर किछु भी केरनू न चाव, अवं चाताई तू ई मेरी मद्दत केर, किजोकि तू इन केरनेरे लेइ खुश आस ते एल्हेरेलेइ नई कि अवं इन केरनेरे लेइ दबाव बनाने लोरोई।

15 शैइद परमेशेरें उनेसिमुस एल्हेरेलेइ तीं करां नशुशने दित्तो, ताके तै मसीह पुइ विश्वास केरे, ते तैसेरो नितीजो ई भोए कि तै हमेशा तीं सेइं साथी राए।

16 पन हुनी तै तेरो गुलाम नई, बल्के गुलामे करां भी बेद्धतां आए। तै हुनी तेरो ढूलारो विश्वासी ढूला आए। अवं तैस सेइं बड़ो प्यार करताई, पन तीं तैस अपने गुलामेरे रूपे मां होरो भी प्यार कियोरो लोडे किजोकि तै मसीह मां अक ढूलाए।

17 अगर तू मीं शामिल समझतस, त जैखन उनेसिमुस वापस तीं कां एज्जे त तैस एन्चरे कबूल केर जेन्चरे मीं।


18 ते अगर तैने किछ तेरो नुकसान कियोरोए, या तेरे किछ पेइंसां केरो कर्जो भोए त अवं तैसेरे बदले देइलो ।

19 अवं पौलुस अपने हथ्यन सेइं लिखताई, कि अवं तीं एप्पू वापस देइलो, तू इन पेइलू ज्ञानतस, अगर मीं तेरी मदत न भोथी कियोरी त तीं अपने आपे सेइं न भोथू मैलोरू, मेरो कर्जो जै तीं पुडे तै तेरी अपनि जिन्दगी आए ।

20 हे मेरे दलारे दोस्त, साथी विश्वासी भोनेरे वजाई सेइं इन मेरे लेइ केर ते मसीह मां मीं खुश केर ।

21 मीं ई चिट्ठी लिखोरीए, किजोकि मीं याकीन कि जैन केरनेरे लेइ ज़ोरू तैन तू केरेलो । हकीकति मां अवं ज्ञानताई तू तैस करां भी बडू जादे केरेलो, जैन केरनेरे लेइ मीं ज़ोरूए ।

22 ते अक होरि गल, तू अपने घरे मां मेरे लेइ अक कमरो तियार केर । किजोकि मीं उमीदे परमेशर तुशे प्रार्थनां केरो जुवाब देलो ते तीं कां फिरी एजने देलो ।



23 इपफ्रास, जै यीशु मसीहेरी खुशखबरी प्रचार केरनेरे वजाई सेइं मीं साथी कैदीए तै तीं नमस्कार ज़ोते ।

24 ते मरकुस ते अरिस्तर्खुस ते देमास ते लूका जैना प्रभुएरू कम मीं सेइं साथी केरतन तीजो नमस्कार ज़ोतन ।

25 इशे प्रभु यीशु मसीहेरो अनुग्रह तुसन पुड भोतो राए । आमीन ।

2

1 एल्हेरेलेइ, जैना गल्लां असेई शुनोरिन, तैन पुड़ असेई होरो भी मन लेइतां ध्यान कियेरू लोडे, कोस्कोई एरू न भोए, कि असां टेपलोइतां तैन करां दूर चले गाम।

2 किजोकि जैन वचन परमेशरे स्वर्गदूतां केरे जिरिये जोरू थियूं, तैन सच्चू सावत भोवं, ते हर एक्की पाप करेनेबाले ते हुक्म न मन्नेबाले सजा मैल्ली।

3 त असन भी सजा मैलेली, अगर अस एत्री महान मुक्ति करां बे खबर राए त। जेसेरे बारे मां पेइले प्रभुए एप्पू जोरूए, ते जैन चलेई एन प्रभु करां शुनोरू थियूं तैन केरे जिरिये असन याकीन भोवं कि एन सच्चू आए।

4 परमेशरे भी निशान ते चमत्कार ते बड्डां-बड्डां कम्मां केरे जिरिये ते अपने मेरजरे मुताबिक लोकन पवित्र आत्मारे जिरिये वरदान देइतां इन सावत कियूं।

XXXXXXXXXXXXXXXXXXXX

5 परमेशरे एजन बैली दुनिया जेसेरे बारे मां अस ज़ोने लोरेम, स्वर्गदूत केरे अधीन मां न की पन प्रभु यीशुएरे अधीन की।

6 बल्के पवित्रशास्त्रे मां कोस्कोई केन्चे परमेशरे सेइ एन जोरूए,
“मैन्हु कुन चीजे, जेसेरे बारे मां तू सोचतस?

या इन्सान कौने, कि तू तैसेरी फिकर केरतस?

7 तीं तै शेक्ति मां किछ वक्तेरे लेइ स्वर्गदूतन करां थोडो ज़ेरो घट कियो,

ते तीं तैस राज़ेरी ज़ेरि महिमा ते आदर दित्तोरीए, ते तैस अपने हथ्यां केरे कम्मन पुड़ अधिकार दित्तो।

8 तीं तैस सेब्भी चीज़न पुड़ अधिकार दित्तोरोए,”

जैखन सब किछ तैसेरे अधिकारे मां कियूं,

ते किछ भी बाकी न रखू, जैन तैसेरे अधीन न भोए। पन असां हुन्ना तगर सैरी चीज़ां तैसेरे अधिकारे मां न लहम।

9 पन असां यीशु लहतम, जै स्वर्गदूतन करां किछ वक्तेरे लेइ निकडो कियोरो थियो, ताके तै परमेशरेरे अनुग्रहे सेइ सेब्भी केरे लेइ अपनि जान दे। किजोकि यीशुए दुख वरदाश कियो ते मरो, ते हुनी अस ज़ानतम कि तैस महिमा ते आदर दित्तोरीए।

10 परमेशरे सब किछ बनाव, ते तै सब किछ अपने लेइ सुमैलतां रखते। परमेशरे ठीक कियूं जैन तैनी दुखेरे जिरिये यीशु सिद्ध कियो, ताके तै बडे लोकन महिमा मां पुजाए। किजोकि यीशु ही आए जै असन मुक्तेरे पासे नेते।

11 किजोकि पवित्र करेनेबालेरो ते पवित्र भोने वालां केरो बाजी अक्के, एन्हरेलेइ यीशु तैन जो दूला बेइन ज़ोने करां न शरमाए।

12 पन मसीह परमेशरे सेइ ज़ोते,

“अवं अपने लोकन इन ज़ोएलो कि तीं मेरे लेइ इन कियोरूए

ते तैन केरे सभाई मां तेरे नव्वेरू गीत ज़ोइलो।”

13 ते फिरी तै ज़ोते,

“अवं तैस पुड़ भरोसो रेखेलो।”

ते फिरी तै ज़ोते,

“अवं तैन लोकन सेइ साथी भोनोई, ज़ैना परमेशरे मीं दित्तोरेन।”

14 किजोकि ज़ेन्चरे परमेशरेरे बच्चे, मैन्हु आन, तेन्चरे यीशु भी तैन केरो ज़ेरो मैन्हु बनो। परमेशरे एन एल्हेरेलेइ कियूं ताके तैसेरे मौतरे ज़िरिये शैताने बरबाद केरे ज़ैस कां मौतरो अधिकार थियो।

15 ते एन्चरे तैनी तैना आज़ाद किये ज़ैना मौतरे डरे सेइ सेरी उमरी गुलामेरे ज़ेरे ज़ीते थिये।

16 किजोकि प्रभु यीशु स्वर्गदूतां केरि नई बल्के अब्राहमेरे वंशरी मद्दत करते।

17 एल्हेरेलेइ यीशु मसीहे हर गल्ली मां मैन्हु केरो जेरो बन्नु जरूरी थियूं, ताके सेब्भी केरे पापां केरे बलिदानेरे लेइ परमेशेरे सामने दया करनेवालो ते ईमानदार महायाजक बने ।

18 किजोकि यीशुएरी अजमैइश कीजेई ते तैनी एप्पु दुःख झैल्लोरोए, एल्हेरेलेइ तै तैन लोकां केरि मद्दत केरि बटते, जैना आजमैइशरो सामनो केरतन ।

3

????????????????

1 एल्हेरेलेइ हे विश्वासी दूलाव ते बेइनव, तुस परमेशेरे स्वर्गं मां तैस सेइं शामिल भोनेरे लेइ कुजोरथ । एल्हेरेलेइ परभु यीशुएरे बारे मां ध्यान देथ जै इश्शे लेइ परमेशेरो बिस्तार आन्ने बालो दूत ते महायाजक आए जेसेरो अस इकारा केरतम ।

2 यीशु परमेशेरे लेइ वफादार थियो, जैनी तै ठहरावरो थियो, जेन्चरे मूसा भी परमेशेरे लोकां केरि सेवाई मां वफादार थियो ।

3 किजोकि घर बनानेवालो घरे करां जादे इज्जतरे काबल समझो गाते, तेन्चरे यीशु भी मूसा करां जादे इज्जतरे काबल समझो जेव ।

4 किजोकि हर घरेरो कोई न कोई बनानेवालो जरूर भोते, पन जैनी सब किछु बनावं तै परमेशेरे ।

5 मूसा त परमेशेरो सेवक भोने सेइं परमेशेरे घरेरे लोकन मां वफादार राव । ताके तैना गल्लां केरि बटे, जैना परमेशेरे एजनेवाले वक्ते मां ज़ोनेवालो थियो ।

6 पन मसीह मट्टू भोनेरे वजाई सेइं परमेशेरे लोकां केरू मुखतियारे, ते असां तैसेरे लोकम, शर्त एने कि असां तैस दिलेरी ते उमीदी मजबूत रखम, जैस पुइ असां भरोसो केरतम ।

????????????????

7 बस्सा पवित्र आत्मा ज़ोते,
“अगर अज़ तुस परमेशेरी आवाज़ शुनथ ।

8 त अपने दादे पड़दादां केरे ज़ेरे तैसेरो हुक्म मन्ने करां इन्कार न केरथ,

ज़ैखन तैनेई परमेशेरे खलाफ खलाफत की,

ते जेन्चरे तैस दिहाड़े तुशे दादे पड़दादेई ज़ेइस तैना सुनसान ठैरी मां थिये, तैनेई परमेशेरी अजमैइश की ।

9 तैड़ी तुशे दादे-पड़दादे 40 सालन तगर मेरां महान कम्मां हेरनेरे बाद भी,
अवं चनोती देइतां अजमाव ।

10 एल्हेरेलेइ अवं तैस वक्तेरे लोकन पुइ क्रोधे भोव,

ते मीं ज़ोवं, तैना हमेशा मेरो इन्कार केरतन,

ते ज़ैन केरनेरो मीं हुक्म दित्तोरोए तैन केरने करां इन्कार केरतन ।

11 एल्हेरेलेइ मीं अपनी सरकी मां कसम खाइ,

कि तैना तैस ठैरी कधे दाखल न भोले ज़ैडी अवं तैन आराम देथो ।”

12 हे दूलाव ते बेइनव खबरदार राथ, तुसन मरां केन्चरो दिल एत्तरो बुरो ते बेईमान न भोए, कि ज़ै तैस ज़ीति परमेशेरे करां दूर केरे ।

13 पन ज़ांतगर ते दिहाड़ी ज़ैस जो अज़ ज़ोतन, रोज़ एक्की होरि हिम्मत देते राथ, एरू न भोए कि तुसन मरां कोई पापेरे धोखे मां एइतां परमेशेरे लेइ सखत दिल न भोइ गाए ।

14 किजोकि अगर असां अपने पेइले विश्वासे पुइ अपने मौती तगर लगातार मजबूत रातम, त अस अकोट्टू कम केरने मां मसीह सेइं साथी ज़ुइतम ।

15 जेन्चरे पवित्रशास्त्रे मां लिखेरूए,

“अगर अज़ तुस तैसेरी आवाज़ शुनथ त तुस

अपने दिले सखत न केरा, त अपने दादे पड़दादां केरे ज़ेरे तैसेरो हुक्म मन्ने करां इन्कार न केरथ,

ज़ैखन तैनेई परमेशेरे खलाफ खलाफत की ।”

16 तैना लोक कौन थिये, जैनेई परमेशेरी आवाज़ शुन्तां भी तैसेरे खलाफ खलाफत की? तैना सब लोक तैना थिये जैना मूसेरे ज़िरिये मिस्र मुलखे मरां निसोरे थिये।

17 तैना कौन लोक थिये, जैन सेइं परमेशर 40 सालन तगर कुरोधे राव? तैना लोक तैना थिये, जैनेई पाप कियो ते मेरतां तैन केरि लाशां सुनसान ठैरी मां रेइ जेई।

18 जैखन परमेशेरे कुरोधे मां कसम खाइ, कि तैना तैस ठैरी कधे दाखल न भोले जैड़ी अवं तैन आराम देथो, हकीकत मां तै तैन केरे बारे मां ज़ोतो थियो जैनेई हुकम न थियो मन्नोरो।

19 बस्सा, असन हुनी पतो लगो, कि तैना विश्वास न केरनेरी वजाई सेइं तैड़ी दाखल न भोइ सके।

4

एल्हरेलेइ ज़ैखन परमेशेरो ए वादोए कि असां तैस आरामे मां दाखल भोइ सकतम, ते असेई खबरदार राहेरू लोडते, ताके कोस्कोई एरू न भोए, कि तुसन मरां कोई तैस मां दाखल भोने करां एरो रेइ गाए।

1 एल्हरेलेइ ज़ैखन परमेशेरो ए वादोए कि असां तैस आरामे मां दाखल भोइ सकतम, ते असेई खबरदार राहेरू लोडते, ताके कोस्कोई एरू न भोए, कि तुसन मरां कोई तैस मां दाखल भोने करां एरो रेइ गाए।

2 किजोकि जेन्चरे असेई यीशु मसीहेरी खुशखबरी शुनी, तेन्चरे इस्राएली लोकेई भी आरामेरे ठैरी दाखल भोनेरी खुशखबरी शुनोरी थी। पन तेनेई तैस पुड़ विश्वास न कियो, एल्हरेलेइ ते सन्देश तेन केरे लेइ बेफेइदो भोव।

3 पन असेई जैनेई विश्वास कियो, परमेशेरे तैस वादो कियोरे आरामे मां दाखल भोतम, जेन्चरे परमेशेरे ज़ोरू थियूं,

“मीं अपने कुरोधे मां कसम खाइ,

कि तैना तैस ठैरी कधे दाखल न भोले जैड़ी अवं तैन आराम देथो।”

परमेशेरे एन एल्हरेलेइ नई ज़ोरू, किजोकि हेजू तगर आरामेरी ठार तियार न थी, पन तै ठार दुनिया बनानेरे वक्ते करां तै तियार आए।

4 किजोकि परमेशेरे सत्तोवं दिहैडारे बारे मां पवित्रशास्त्रे मां एन्चरे ज़ोरू आए,

“परमेशेरे अपना सब कम्मां खतम केरतां सत्तोवं दिहाड़े आराम कियो।”

5 ते अस भी इन पढतम कि तैनी वादे मां ज़ोवं,

“एना मेरे आरामेरे ठैरी कधी दाखल न भोले।”

6 तैना इस्राएलेरे लोक जैनेई पेडली ई खुशखबरी त शुनी, पन आरामेरे ठैरी दाखल भोने मां कामयाब न भोए, किजोकि तेनेई परमेशेरे हुकम न मन्ने। पन हुन्ना भी किछ् लोकां केरे लेइ आरामेरे ठैरी दाखल भोनेरे लेइ मौको आए।

7 एल्हरेलेइ परमेशेरे कोई होरो वक्ते अपने आरामेरे ठैरी मां दाखल भोनेरे लेइ ठहरावरो, तै वक्त अज़ आए, इश्शे दादे पड़दादेई खलाफ केरनेरे बड़े सालना बाद परमेशेरे दाऊदरे ज़िरिये ज़ोवं, जेन्चरे तैने ज़ोवं

“अगर अज़ तुस तैसेरी आवाज़ शुनथ,

त अपनो दिल सखत न केरा।”

8 अगर यहोशूए तैना लोक आरामे मां दाखल करावरे भोथे त वादे मां परमेशेरे होरि दिहैडारे बारे मां गल न थी केरनि।

9 एल्हरेलेइ परमेशेरे लोकां केरे लेइ एरी ठार तियार आए जैड़ी तैना पूरे तरीके सेइं आराम केरि बटतन। तैना तेन्चरे आराम केरेले जेन्चरे परमेशेरे सत्तोवं दिहाड़े आराम कियोरो थियो।

10 किजोकि जै कोई परमेशेरे आरामे मां दाखल भोते त तै परमेशेरो ज़ेरो अपने कम्मन पूरे केरतां आराम केरते।

11 एल्हरेलेइ एज्जा अस भी तैस आरामेरी ठैरी मां दाखल भोनेरी कोशिश केरम, ताके कोई भी मैन्हु इस्राएली लोकां केरे ज़ेरो हुकम न मेन्तां तैस आरामेरी ठैरी दाखल भोने करां रेइ न गाए।

12 किजोकि परमेशेरू वचन ज़ींतू ते शेक्ति बालू आए, ते हर दई धारण बैली तलवारी करां भी जादे तिख्वू आए। ते तैन प्राण ते आत्माई गहराई तगर च़ीरते, ज़ेन्चरे तिख्वी तलवार जोडन ते हेडी केरे अन्तरीयो मासे वारां पार च़िरतां निसतीए ते दिलेरे खियाल ते मैनेरो इरादो भी ज्ञानते।

13 दुनियारी कोई भी चीज़ परमेशेरी नज़री करां छुप्पोरी नई, बल्के तैसेरे सामने सब चीज़ां खुल्ली ते बेदिन, ते असेई तैस, ज़ैन किछ भी अपने पूरे ज़िन्दगी मां कियेरू तैसेरो हिसाब देनो पेनोए।

??????

14 बस्सा, एज्जा अस अपने विश्वासे पुड़ मज़बूत रहम। किजोकि इश्शो अक महान महायाजके, ज़ै स्वर्गे मां जोरोए, यानी परमेशेरू मट्टू यीशु।

15 किजोकि इश्शो महायाजक इश्शी सेरी कमज़ोरी समझते। किजोकि शैताने तै सेब्मी गल्लन मां इश्शो ज़ेरो अजमाव, पन तैनी कोई पाप न कियो।

16 एल्हेरेलेइ एज्जा असां दिलेरी सेइं, अनुग्रह देनेवाले परमेशेरे तखतेरे सामने ज़लम, ताके तै असन पुड़ अनुग्रह ते दया केरे ते ज़रूरतरे मौके तै इश्शो मद्दत केरे।

5

1 परमेशेरे हर महायाजक इस्राएली लोकन मरां चुनो, ते परमेशेरे महायाजक, लोकां केरि तरफां अपनि सेवा केराने लेइ ठहराए, ताके तैना लोकां केरे मैफरे लेइ च़दतल ते पापां केरू बलिदान च़ाढ़न।

2 किजोकि अक याजक एप्पू बेडि गल्लन मां कमज़ोरे, एल्हेरेलेइ तै बेसमझ, ते टेपलोरे लोकन नेरमी सेइं बर्ताव केरि बटते।

3 किजोकि तै एप्पू कमज़ोरे, एल्हेरेलेइ तैस न सिर्फ लोकां केरे पापां केरे लेइ, बल्के अपने पापां केरे लेइ भी बलिदान च़ाढ़नेरि ज़रूरत भोतीए।

4 कोई मैन्हु अपने लेइ महायाजकेरी पदवी अपने आपे सेइं हासिल न केरि सखे, ज़ांतगर तै हारूनेरो ज़ेरो परमेशेरी तरफां कुजाव न गाए।

5 तेन्चरे मसीहे भी महायाजक बेनतां अपनि आदर न की, बल्के परमेशेरे तैस आदर दित्ती ज़ैखन तैने ज़ावं,

“तू मेरू मट्टू आस,

अज़ अवं इन बांद् केरताई तू मेरू मट्टू आस।”

6 एल्हेरेलेइ परमेशर फिरी एक्की होरि टैरी ज़ोते,

“तू मेलिकिसिदकेरो *ज़ेरो

हमेशारे लेइ याजक आस।”

7 यीशुए एक्की मैनेरी ज़ेरि ज़िन्दगी गुज़ारनेरे दिहाइन मां फुकैरी-फुकैरी ते लेरां देइ-देइ परमेशेरे कां प्रार्थना ते बिनती की, ज़ै तैस मौती करां बच्चेइ सकतो थियो, ते परमेशेरे लेइ तैसेरे भेक्तेरे वजाई सेइं परमेशेरे तैसेरी फरयाद शुनी।

8 ते परमेशेरू मट्टू भोइतां भी तैनी दुख झैल्लतां हुक्म मन्नो शिखो।

9 ज़ैखन तैनी तैन सब कियू ज़ैन तैनी कियेरू लोइतू थियू, त तै तैन केरे लेइ हमेशारे लेइ मुक्तेरो ज़िरयो बनो, ज़ैना तैसेरे हुक्म मन्तन।

10 ते तैस परमेशेरी तरफां मेलिकिसिदकेरी ज़ेरि महायाजकेरी पदवी मैल्ली।

??????

11 असन कां इस बारे मां ज़ोनेरे लेइ बडू किछ आए, पन तुसन समझानू मुशिकले, किजोकि तुस समझाने मां सुसतथ।

* 5:6 मेलिकिसिदक: मेलिकिसिदक अब्राहमेरे वक्ते महायाजक ते हकोमत केनेवालो थियो

12 द्रासले मां अज्र तगर तुस गुरू बनोरे लोडते थिये, किजोकि तुसन विश्वास कियोरे बडू त्रिर भोरुए। पन हुन्ना त ज़रूरत इस गल्लरीए कि कोई मैन्हु तुसन परमेशेरे वचनेरी शुरुआतरी गल्लां दुबारां शिखाले। तुस तैन बच्चां केरे ज़ेरेथ ज़ैन हेजू दुद्ध पीतन ते शुरी रोट्टी न खेइ बटन।

13 ज़ै दुद्ध पीते, तै हेजू बच्चो भोते, किजोकि तैस नई पतो सही कुने ते गलत कुने।

14 पन शुरी रोट्टी तैन केरे लेइ भोचे ज़ैना विश्वासे मां बड्डेन, ते अपने तजरबे सेइ इस कावल भोरेन, कि रोडे ते बुरे मां फ़रक सेमझी सखन।

6

1 एल्हेरेलेइ एज्जा अस मसीहेरे बारे मां शुरुआतरी शिक्षारी गल्लां बार-बार दोरहानेरे बगैर अस सिधतारे पासे च़लते रहम। ते मौतारे पासे नेनेबाले कम्मन करां मन फिराम ते परमेशेरे पुइ विश्वास केरनो,

2 बपतिस्मे ते हथ रखनेरी शिक्षारे बारे मां, ते मुडदां केरे ज़ीते भोनेरे बारे, ते हमेशारे इन्साफेरे बारे मां दुबारा गल न केरम।

3 एज्जा अस परिपक्व विश्वासी बनम! अगर परमेशर अज़ाज़त दे त असां इन केरमेले।

4 ज़ैना लोक अपने विश्वास शारतन तैन फिरी मनफिरानेरे पासे केन्चरे आने गान? तैनी एककी बारे परमेशेरी सच्च़ाई पिशानोरी थी, ते तैन स्वर्गोरां वरदाना मैलोरां थियां ते तैनेई होरन सेइ साथी पवित्तर आत्मा हासिल कियोरो थियो।

5 तैनेई मैसूस कियोरू थियूं कि परमेशेरू वचन रोडू आए, ते तैनेई एजनेबाले ज़मानेरी शक्ति मैसूस कियोरी थी।

6 ते हुनी तैनेई अपने विश्वासे शारोरो! एल्हेरेलेइ तैन मनफिरानेरे पासे आनु मुशकिले, किजोकि तैना एप्पू परमेशेरे मट्टे फिरी कुरूसे पुइ च़ाढ़ने लोरेन! ते लोकां केरे सामने तैसेरी बेइज़ी केरने लोरेन।

7 ज़ैन लोकन रोडी शिक्षा मैलोरीए तैना तैस ज़मीनेरे ज़ेरे आन ज़ैस पुइ झैडी लगगीती रातीए। अगर ज़मीन रोडीए त ज़िमदारेरे लेइ रोडी फसल देचे, ते तैस परमेशेरी तरफां बरकत मैलचे।

8 होरे लोक तैस ज़मीनेरे ज़ेरे आन ज़ैस मां कंटे ते झैल्लां लगतन ते तै कोन्ची कम्मेरी नई। ते परमेशर तैस ज़मीनी फिटकार देनेबालोए ते आखरी मां तैस अग्गी मां बरबाद केरेलो।

9 हे मेरे टलारे दूलाव ते बेइनव, हालांकी असां एरी गल्लां ज़ोतम फिर भी अस विश्वास केरतम कि एन तुशशे लेइ नई। इशशो भरोसोए कि तुस रोडी गल्लां केरे लेइ आथ ज़ैना मुक्तेरे ज़िरिये एइतिन।

10 किजोकि परमेशर बेइनसाफ नई कि ज़ै तुशशू कम ते प्यार बिसरी गाए, ज़ै तुसेई तैसेरे लोकां केरि सेवा केरनेरे ज़िरिये तैसेरेलेइ हिरावरोए। ते परमेशर याद केरेलो कि तुस हेजू भी तैन केरि मद्दत केरने लोरेथ।

11 इशशी इच्छा ई आए कि तुस ज़ांतगर ज़ीतेथ रोडो बताव केरते राथ, इन पक्कू केरनेरे लेइ कि तुशशी उमीद सच्च़ भोली।

12 तैखन तुस आलसी न बनेले। पन तुस तैन केरे ज़ेरे च़ललेले ज़ैना अपने विश्वास ते सबरोरे वज़ाई सेइ परमेशेरे वादां केरे बारस भोले।

XXXXXXXXXX XXX XXXX

13 ज़ैखन परमेशर अब्राहमे सेइ वादो कियोरो थियो त कसम केरनेरे लेई तैस करां बड्डो कोई न थियो, एल्हेरेलेइ तैनी अपनि ही कसम कमाइतां ज़ोव,

14 "अव ती सच्च़े बरकत देइलो, ते तेरू वंश बेशुमार बधेइलो।"

15 एल्हेरेलेइ अब्राहम तैन वादन हासिल केरनेरे लेइ सबरी सेइ इंतज़ार केरतो राव।

16 मैन्हु त एप्पू करां बडां केरे नच्वेरी कसम केरतन ते एन्चरे तैन हर मसलेरो हल कसम केरतां खतम भोते।

17 एल्हेरेलेइ परमेशेरे भी कसम खाइ, एन केरने सेइ तैनी तैन लोकन जैन सेइ वादो कियोरो थियो, इन हिरानू चाऊ कि जै वादो तैनी कियोरोए तै पूरो केरेलो ।

18 त इड़ी दूई गल्लां आन तैसेरो वादो ते तैसेरी कसम, जैना कधे न बेदलोने ते तैन केरे बारे मां परमेशेरे कधे झूठ न जोए । एल्हेरेलेइ अस जैना तैसेरे सहारे मां ओरम त जै उमीद असन दित्तोरीए, तैस मां अस बनोरे रहम, ते अस बड़े जादे जोशे मां आम ।

19 इश्शी उमीद प्राणा केरे लेइ पक्की आए तै टेली न बटे ते ई असन परमेशेरे करां भटकने न दे, बल्के ई असन परमेशेरे मन्देरे मां महा पवित्तर ठैरी पुजातीए ।

20 जैड़ी यीशु इश्शे लेइ मेलिकिसिदक महायाजकेरो जेरो हमेशारे महायाजक बेनतां इश्शे लेइ बत हिराने बालेरो जेरो दाखल भोव ।

7



1 ई मेलिकिसिदक शालेमरो राजो ते परमप्रधान परमेशेरो याजक थियो, जैखन अब्राहम राजन मैरतां वापस ओरो थियो, त मेलिकिसिदके तैस सेइ मिलतां तैसेरी बड़ी आदर की ते तैस बरकत दित्ती ।

2 अब्राहमे तैस तैन सेबमी चीजां केरो दशोवं हिस्सो दित्तो जैना तैनी कब्जो केरतां ऐनोरी थी । मेलिकिसिदकेरो नंब्वेरो मतलब धार्मिकतारो राजो आए, ते शालेमरो मतलब शैन्तरो राजो ।

3 तैसेरो न कोई बाजी, न अम्मा, न तैसेरू कोई वंशे, न तैसेरी ज़रमनेरे बारे मां न तैसेरे मरनेरे बारे मां लिखोरूए । तै परमेशेरे मट्टेरो जेरोए तै हमेशारे लेइ याजक बनोरो रहते ।

4 पन हुनी इस पुड़ ध्यान देथ मेलिकिसिदक केत्रो महान थियो । जैस पूर्वज अब्राहमे कब्जो कियोरी चीजां केरो दशोवं हिस्सो दित्तो ।

5 मूसेरे कानूनेरे मुताबिक जैना लेवेरे खानदाने मरां थिये यानी जैना याजक ठहराए गातन, तैन हुक्म दित्तो जोरोए कि तैना इस्राएली लोकन यानी अपने लोकन करां दशोवं हिस्सो नेन, हालांकी तैना भी अब्राहमेरी वंशे मरां आन ।

6 पन मेलिकिसिदके जै लेवी केरे वंशे मरां न थियो फिरी भी अब्राहमे करां दशोवं हिस्सो नीयो, ते तैस बरकत दित्ती जैस सेइ परमेशेरे वादो कियो थियो ।

7 अस पक्कू ज्ञानतम कि जै बरकत देते तै बरकत मैलने बाले करां महान आए ।

8 ते याजक जैना दशोवं हिस्सो नेतन तैना तैन मैन्हु आन जैना मरतन, पन मेलिकिसिदक एन करां भी महान आए, किजोकि पवित्तरशास्त्र ज़ोते कि तै ज़ीतो आए ।

9 बल्के अस ज़ोई सकतम कि लेवी भी जै दशोवं हिस्सो नेते, अब्राहमेरे ज़िरिये मेलिकिसिदक जो दशोवं हिस्सो दित्तो ।

10 एल्हेरेलेइ कि जैस मौके मेलिकिसिदके लेवेरे पूर्वज अब्राहमे सेइ मुलाकत की, तैस मौके लेवी ज़रमोरो भी न थियो ।



11 इना लेवी याजकेरे आधारे पुड़ कानून इस्राएली लोकन दित्तोरो थियो, अगर लेवी ते याजकेरू कम ठीक थियूं, त अलग किसमेरे याजकेरू बांदू भोनू ज़रूरी न थियूं, जै मेलिकिसिदकेरो जेरो आए । पन हारूनेरो जेरो नई ।

12 किजोकि जैखन याजकेरी पदवी बेदलोतीए त कानूनेरू बेदलोनु भी ज़रूरीए ।

13 असां इना सैरी गल्लां मसीहेरे बारे मां ज़ोने लोरेम जै होरि गोत्रेरे मरां आए, ते तैस गोत्रेरे मरां केन्चे बलिदान केरनेरे ठैरी याजकेरी सेवा नई कियोरी ।

14 किजोकि इन अस ज्ञानतम, कि इश्शो प्रभु यहूदारे गोत्रेरे मरां थियो । ते मूसा एस गोत्रेरे मरां याजकेरे पेदवरे बारे मां कोई गल नई कियोरी ।

15 मेलिकिसिदकेरो जेरो अक होरो भी याजक एजने सेइ इन होरू भी साफ भोते ।

16 किजोकि यीशु कानूनेरे हुक्मेरे मुताबिक याजक लोडतो थियो, पन तै नाश न भोनेबैली ज़िन्दगरे शेक्तेरे ज़िरिये महायाजक बनो ।

17 किजोकि तैसेरे बारे मां परमेशेर पवित्रशास्त्रे मां ई गवाही देते, “कि तू मेलिकिसिदकेरे ज़ेरो हमेशारे लेइ याजक आस ।”

18 एन्हरे मूसरो कानून कमज़ोर ते बेफल भोनेरे वजाई सेइं हुनी कम न केरि बटे ।

19 (किजोकि मूसरे कानूने कोई गल्ली सिद्ध न केरि बटी) पन हुनी असन कां अक रोड़ी उमीदे ज़ेसेरे ज़िरिये सेइं असां परमेशेरेरे सामने एज्जी बटतम ।

20 ते परमेशेर भी तैस वक्ते कसम खाइ ज़ैखन तैनी यीशु महायाजक बनाव ।

21 किजोकि होरे याजक त बगैर कसमा याजक बनाए, पन ज़ैखन यीशु, परमेशेरेरी तरफां याजक बनाव त तैनी ज़ावं,

“अवं, प्रभु कसम खाताई, कि तू हमेशा याजक रालो

ते अवं अपने मने कधी न बेदलेलो ।”

22 एन्हरेलेइ यीशु ज़मानत देते कि पुरानो करार नव्वे करारे करां रोड़ो भोलो ।

23 ते अक फर्के, किजोकि पेइले बड़े याजक बेनतां आए, पन तैना सब मरे ते तैनेई लगातार याजकेरू कम न केरि बट्ट ।

24 पन यीशु आखरी तगर रानेबालो याजके ते एन्हरेलेइ तैसेरी ठैरी होरो कोई याजक न रखवो गाए ।

25 एन्हरेलेइ ज़ैना लोक यीशुएरे ज़िरिये सेइं परमेशेर कां एइतन, यीशु तैन पूरी-पूरी मुक्ति देइ बटते, किजोकि तै तैन केरे लेइ बिनती केरनेरे लेइ हमेशा ज़ीतोए ।

26 एन्हरेलेइ असन एरे ज़ेरो महायाजक ज़रूरी थी, ज़े इश्शे ज़रूरतन पूरी केरे, ज़े पवित्र, निष्कपट ते शुद्ध, ते पैपन करां अलग भोए ते ज़े परमेशेर स्वर्गे जो नेवरो भोए ।

27 ते होरि महायाजक केरू ज़ेरू यीशु ज़रूरी नई, कि पेइले अपने पापां केरे लेइ ते फिरी अपने लोकां केरे पापां केरे लेइ रोज़ बलिदानां चाढ़े, किजोकि यीशुए सेब्भी लोकां केरे पापां केरे लेइ एक्की बार अपना आप बलिदान केरतां एरू बलिदान चाढ़ू ज़ैन हमेशारे लेइ आए ।

28 किजोकि मूसरो कानून त तैन मैनन् महायाजक भोनेरे लेइ ठहराते ज़ैना सिद्ध नई, पन मूसरे कानूनेरे बाद परमेशेर कसम खेइतां अपनू मट्टू ठहराव ते तैसेरू मट्टू हमेशारे लेइ सिद्ध महायाजक बनोरोए ।

8

???? ???? ???? ??

1 ज़ैना गल्लां हुन्ना अस ज़ोने लोरिम तैन मरां सेभना बड्डी गल ई आए कि इश्शे एरो महायाजक, ज़े स्वर्गे मां परमेशेरेरे महिमा बाले तखतेरे देइने पासे विशोरोए ।

2 ते ज़े तैस महा पवित्र ठैरी ते तैस सञ्जे तेम्बु मां सेवा केरते, ज़े केन्चे मैने नई बल्के परमेशेर खड्डो कियोरोए ।

3 किजोकि हर महायाजक पापां केरे मैफरे लेइ चढतल ते बलिदान चाढ़नेरे लेइ ठहराव गाते, एन्हरेलेइ ज़रूरी आए, कि इश्शे महायाजके (यीशु) कां भी किछ् चाढ़नेरे लेइ भोए ।

4 ते अगर यीशु दुनियाई मां भोथो त कधे कोई याजक न थियो भोनो, किजोकि इड़ी मूसरे कानूनेरे मुताबिक चढतल चाढ़नेरे लेइ याजक आन ।

5 इना याजक ज़ैना कम केरतन, तैना सिर्फ स्वर्गेरी चीज़ां केरि नकल ते सैयोए, पन ज़ैना चीज़ां स्वर्गे मां आन । एन्हरेलेइ ज़ैखन मूसा तेम्बु बनानेरी तियेरी मां थियो, त परमेशेर तैस हदैइयत दिती, “हेर ज़े नमूनो मीं तीं पहाड़े पुइ हिरावरो थियो तैसेरे हिसाबे सेइं तू सैरी चीज़ां बना ।”

6 पन हुनी जै महायाजकेरी सेवा यीशु दित्तोरी तै पुराने याजकेरे सेवाई करां बड़ी बड़डीए, किजोकि तै जैना गल्लां केरि बिचवाई केरते तैना पुराने करारे करां भी उच्ची आन, ते वादन पुड़ तैसेरी बुनियादे।

7 किजोकि अगर पेइले करारे मां कोई खांमी न भोथी त होरो करार केरनेरी कोई जरूरत न थी भोनी।

8 पन परमेशर लोकन पुड़ दोष लेइतां ज़ोते,
“तक्का प्रभु ज़ोते कि तै दिहाड़ी एज्जी राहोरीए,
इस्राएलेरे लोक ते यहूदारे लोकन सेइं साथी नव्वो करार केरेलो।

9 ए तैस करारेरो ज़ेरो न भोलो जै मीं तैन केरे दादे पड़दादन सेइं तैस दिहाड़े कियोरो थियो।
जैखन मीं मिसरे मरां तैन कढनेरे लेइ तैन केरो हथ ठमोरो थियो,
किजोकि प्रभु ज़ोते कि तैना मेरे तैस करारेरे मुताबिक वफादार न राए,
एल्हेरेलेइ मीं भी तैन केरे पासे कोई ध्यान न दित्तु।

10 प्रभु ज़ोते कि जै करार अवं इस्राएलेरे लोकन सेइं तैस मौके केरेलो तै ईए,
कि अवं अपने कानून तैन केरे मन्न मां छुडेलो,
ते तैन केरे दिलन मां लिखेलो,
ते अवं तैन केरो परमेशर भोलो ते तैना मेरे लोक भोले।

11 ते केन्ची ए जरूरत न भोली कि अपने पुड़ोसन,
या अपने रिशतेदारन ए शिक्षा दे कि प्रभु पिशाना,
किजोकि निकडे करां बड़डे तगर सब मीं पिशानेले।

12 एल्हेरेलेइ अवं तैन केरे अधर्म माफ़ केरेलो,
ते तैन केरे पापन फिरी कधे याद न केरेलो।”

13 जैखन परमेशर नव्वो करारे कमाव त पेइलो करारे पुरानो बनाव, ते जै चीज पुरानी ते कमजोर भोती तै जल्दी खतम भोतीए।

9

1 पेइले करारेरे मुताबिक भी परमेशरेरी आराधना केरनेरे नियम थिये; ते आराधना केरनेरे लेइ मैन्हु केरि बनोरी अक ठार थी।

2 यानी अक तेम्बु बनोरो थियो, ते तैसेरे दूई हिस्से थिये, पेइले हिस्से मां अक दीवट (दीयो), मेज़ ते चैदोरी रोट्टी रेखोरी भोती थी, तैस हिस्से जो पवित्तर ठार ज़ोते थिये।

3 ते होरि हिस्से मां पड़दे पतोंरां तै ठार थी, तैस हिस्से जो परमपवित्तर ठार ज़ोते थिये।

4 एसमां सोन्नेरी तै बलिदान केरनेरी ठार थी जैस पुड़ खुशबूदार चीज़ां बालते थिये, ते ज़ेवरे पासन सोन्ने सेइं पलेटोरो करारेरो सुंदुख थियो। ते तैस सुंदुख मां मन्ने सेइं भेरतां अक सोन्नेरू भांड थियुं, ते कने हारूनेरी तै सोटी थी जैस पुड़ पट्लां लगगोरां थियां ते दूई घोड़ां केरि सलेटां थी, जैस पुड़ दश हुक्म लिखोरे थिये।

5 एस सुंदुखेरे बेइयें पासे महिमा बाले करूब* बनोरे थिये, जैना परमेशरेरी मौजूदगी हिराते थिये। तैना अपने-अपने फगन सेइं तैस ठैरी सैयो केरि रावरे थिये, जैड़ी पाप माफ़ कियोरे थिये। पन हुनी इन गल्लन रोडे च़ारे ज़ोनेरो वक्त नईं।

6 एना सब चीज़ां एस तरीके सेइं तियार केरनेरे बाद, याजक तेम्बेरे तैस पेइले हिस्से मां रोज़ गाते, ताके सेवारू कम पूरू केरन।

7 पन परमपवित्तर ठैरी मां सिर्फ़ महायाजक साले मां सिर्फ़ एक्की बार गाते। ते तै भी खून धिन्तां ताके अपनि ते अपने लोकां केरे पापां केरे लेइ बलिदान च़ाढ़े, जैना तैनेई अनजाने मां किये।

* 9:5 करूब सोन्नेरे फगन बाले प्राणी

8 एस नियमें सेइं पवित्तर आत्मा इन हिराते, कि ज्ञांतगर पेइलतो तेम्बु आए, तांतगर परमपवित्तर ठैरी गानेरी बत बंदे ।

9 ते इन सब किछ्छ इस वक्तरे लेइ अक मसाले, एस सेइं एन बांदू भोते कि जै चंद्रतल ते बलिदान याजक परमेशरे जो चादते थिये, तैस सेइं आराधना करनेवालां करो ज़मीर रोइं चारे शुद्ध न भोए ।

10 तेन करो तलक सिर्फ खाने पीनेरे चीज ते अलग-अलग शुद्ध भोनेरे रसमन सेइं भोतो थियो । इन सिर्फ जिसमानी रसमां आन, इन तैखन तगर लागू भोतन ज्ञांतगर परमेशरे नव्वों नियाम न बनाए ।

XXXXXXXXXXXXXXXXXXXX

11 पन ज़ैखन मसीह इश्शो महायाजक बेनतां अव, त तै रोड़ी चीजां घिन्तां अव ज़ैना हुन्ना मौजूद मान । तै स्वर्गें मांजो परमेशरे हज़ूरी मां जेव । ते तै हज़ूरी एक्की महान ते सिद्ध तेम्बेरो ज़ेरि आए, ज़ै मैन्हु केरे हथ्यां केरे ज़िरिये सेइं नई बनोरो ते न दुनियारो ।

12 ज़ैखन मसीह तैस तेम्बु मांमेइं भोइतां पवित्तर ठैरी दाखल भोव, त तैनी थावां ते बछ्छां करो खून नई, बल्के अपनो खूनेरे ज़िरिये एक्की फेरे पवित्तर ठैरी दाखल भोव ते असन इश्शे पापन करां हमेशारे लेइ छुटकारो दित्तो ।

13 किजोकि ज़ैखन थावां ते दांतां करो खून ते बछ्छां केरि मांजन अपवित्तर लोकन पुड़ छक्के गाने सेइं तैना लोक जिसमानी तरीके पवित्तर मन्ने गाते थिये,

14 त मसीहे सनातन आत्मारे ज़िरिये सेइं अपनो आप परमेशरे कां बगैर पापेरू बलिदान केरतां चादू, ते तैसेरो खून असन इश्शे ज़मीरे तैन कम्मन करां होरो भी जादे पवित्तर केरेलो, ज़ैन करो तलक मौती सेइं ए, ताके अस ज़ीते परमेशरेरी आराधना केरम ।

15 एहे वजा आए कि परमेशरे अपने ते दुनिया मझाटे मसीह बिचवाई बनेइतां तैसेरे ज़िरिये सेइं अक नव्वो करार बनावरोए, ताके ज़ैना परमेशरेरे कुजोरेन तैना हमेशारी बरकत हासिल केरन ज़ेसेरे लेइ परमेशरे तैना कुजोरेन । किजोकि पेइले दित्तोरे करारेरे अधीन कियोरे पापन करां तैन आजाद केरनेरे बदले मां मसीह मरोए ।

16 किजोकि वसीयतरे सिल्लले मां वसीयत देनेवालेरी मौत साबत भोनी ज़रूरीए ।

17 एल्हरेलेइ वसीयत देनेवालेरे ज़ीते दम्मं तगर वसीयत कम्मैरी न भोए, पन तैसेरे मरनेरे बाद तै वसीयत पक्की भोतीए ।

18 एहे वजा आए कि पेइलो करार भी खूनेरे बगैर नई कियोरो ।

19 एन्चरां ज़ैखन मूसा सैरी लोकन कानूनेरो अक-अक हुक्म शुनाव, त तैनी थावां ते बछ्छां करो खून पैनी मां मिलाव, ते फिरी लाल उन्ना ते जूफा सेइं एन्तां कानूनेरी किताबी ते सैरी लोकन पुड़ छिड़को ।

20 ते ज़ोवं कि, “ए तैस करारेरो खूने ज़ेसेरो हुक्म परमेशरे तुश्शे लेइ दित्तोरोए ।”

21 एन्चरे तैनी तेम्बु पुड़ ते आराधना केरनेरी सैरी चीजन पुड़ खून छिड़को ।

22 किजोकि मूसे कानूनेरे मुताबिक लगभग सैरी चीजां खूने सेइं पवित्तर की गोइचन, ते ज्ञांतगर खून न बगाव गाए, तांतगर पाप भी माफ़ न भोन ।

XXXXXXXXXXXXXXXXXXXX

23 त फिरी ए ज़रूरते कि तैना चीजां ज़ैना स्वर्गेरी नकल आन, तैना जानवरां केरे बलिदाने सेइं शुद्ध की गान । पन स्वर्गेरी चीजन इन करां भी जादे रोडे बलिदाने सेइं शुद्ध भोनेरी ज़रूरते ।

24 किजोकि मसीह मैन्हु केरे बनेवेरे घरे मां ज़ैन सच्चे पवित्तर ठारारी नकले, दाखल नई भोरो, बल्के स्वर्गें मां दाखल भोव ज़ैडी तै इश्शे लेइ परमेशरे कां हाजरे ।

25 यहूदी करो महायाजक पवित्तर घरे मां हर साल होरि करो यानी जानवरां करो खून नेइतां गाते, पन मसीह अपने आपे बार-बार बलिदान केरनेरे लेइ न गाए ।

26 वरना दुनियारे शुरू करां लेइतां हुन्ना तगर तैस बार-बार दुख झैलनो पथो; पन हुनी जुगरे आखरी मां तै बांदो भोवं, ताके अपने बलिदाने सेइं पाप दूर करे।

27 ते जेन्चरे सेइं मैनेरू मरनु ते एक्की बार इन्साफेरू भोनु पक्कुए।

28 तेन्चरे सेइं मसीहे भी बड़े लोकां करे पाप सैलतां गानेरे लेइ एक्की बार बलिदान भोव, ते दुवारां पापां केरू बलिदान देनेरे लेइ नई, बल्के तैन मुक्ति देनेरे लेइ एज्जेलो, जैना तैसेरे इंतजारे मां आन।

10

~~~~~

1 मूसरो कानून एजने बैली रोड़ी चीजां करो सिर्फ अक सैयोए, न कि असली रूपे। एल्हेरेलेइ एक्की किसमेरां बलिदानां जैना हर साल ज़ादां गातन, तैना परमेशरे कां एजने बालन कथे भी सिद्ध न केरि सखन।

2 अगर केरि सखेथां, त कुन तैन केरू ज़ादनु बंद न भोथू? एल्हेरेलेइ अगर आराधना करनेवाले एक्की बारे हमेशारे लेइ पवित्तर भोइ गाथे, त तैन केरो ज़मीर तैन पापी न बनाथो।

3 पन तैना बलिदानां तैन लोकन हर साल याद करातन कि तैना पापिन।

4 किजोकि मुमकिन नई, कि दांतां केरो ते थावां केरो खून पापे दूर केरि सके।

5 एल्हेरेलेइ ज़ैखन मसीह दुनियाई मां ओरो थियो, त तैनी परमेशर सेइं ज़ोरू थियू,

“तीं बलिदान ते ज़दतल न चाई,  
बल्के तीं मेरे लेइ अक जान तियार की।

6 तू न भस्म भोनेवाले बलिदाने सेइं, ते न पापेरे बलिदाने सेइं खुश भोव।”

7 तैखन मसीहे ज़ोवं, “हे परमेशर, हेर, अवं तेरी इच्छा पूरी केरनेरे लेइ ओरोई, जेन्चरे मेरे बारे मां पवित्तरशास्त्रे मां लिखोरूए।”

8 पेइले त तै ज़ोते, न तीं कोई बलिदान ते न कोई ज़दतल चाई, ते न भस्म भोनेवालू बलिदान ते न पापेरू बलिदान चाव, ते न तैन सेइं तू खुशी भोव, हालांकी एना बलिदानां मूसरे कानूनेरे मुताबिक दितां गातन।

9 फिरी तै एन ज़ोते, “हेर, अवं तेरी मर्जी पूरी केरनेरे लेइ ओरोई,” एन्चरे तै पेइले सारे बलिदानन हटाते ताके तैन केरे ठैरी मसीहेरे बलिदाने रखे।

10 परमेशरेरी मर्जी ई थी, कि यीशु मसीहेरे जिसम एक्की बार बलिदान भोने सेइं अस हमेशारे लेइ पवित्तर भोम।

11 पेइले करारेरे मुताबिक हर याजक बलिदान केरनेरे ठैरी खड़े भोइतां रोज सेवा केरतन, ते एक्की किसमेरां बलिदानां बार-बार ज़ादतन, जैना पापे कधी भी दूर न केरि सखन।

12 पन मसीह ज़ै इशशो महायाजके, इशशे पापां केरे लेइ एक्की बार बलिदान भोइतां परमेशरेरे देइने पासे गेइतां बिशशी जेव।

13 तैड़ी तै तैस वक्तेरो इंतजारे करेने लोरोए, कि परमेशर तैसेरे दुश्मन पूरे तरीके सेइं हाराए।

14 तैनी एक्की बलिदाने सेइं जैना लोक पवित्तर कियोरेन, तैना हमेशारे लेइ सिद्ध कियोरेन।

15 पवित्तर आत्मा भी एस गल्लरी गवाही देते। पेइलू त एन ज़ोते कि

16 “प्रभु ज़ोते, कि ज़ै करार अवं

तैन दिहेइना बाद अपने लोकन सेइं केरेलो तै ईए,

अवं अपने कानून तैन केरे मन्न मां छुडेलो

ते तैन केरे दिलन मां लिखेलो।”

17 ते फिरी एन भी ज़ोते कि, “अवं तैन केरे पाप ते बुरां कम्मां माफ़ केरेलो, ते फिरी कधी याद न केरेलो।”

18 बस्सा, ज़ैखन तैन केरे पापां केरि माफ़ी भोइजेइ, त फिरी पापां केरे लेइ बलिदानेरी ज़रूरत नई।

~~~~~

19 एल्हरेलेइ द्लाव ते बेइनव, असन यीशुएरे खूनेरे ज़िरिये सेइ मन्देरे परमपवित्र टारी मां दाखल भोनेरी दिलेरी भोरीए।

20 यीशुए इशे लेइ अक नव्वीं ते ज़िन्दगी देनेबाली बत खोलरोरीए, जै तैनी पड़दे मां यानी अपने जिसमे मां मौतरे ज़िरिये इशे लेइ बनाई।

21 ते एल्हरेलेइ इशो एत्रो महान याजक जै परमेशेरे घरेरो मुखतियारे।

22 त एज्जा अस सच्चे दिले सेइ ते पूरे विश्वासे सेइ, ते एरो जमीर जै खूनेरे तेप्पेइ सेइ पापेरे एसासे करां पवित्र कियोरे, ते एरो जिसम नेइतां जै साफ पैनी सेइ धोवरोए, परमेशेरे कां नेम।

23 ते अस एपनी उमीदरो इकरार रोड़ेचारे टलेइतां रखम, किजोकि जैनी असन सेइ वादो कियोरोए तै सच्चोए।

24 ते असेई इस गल्लारू ध्यान लोड़े रखोरू कि अस केन्चरे प्यार ते रोड़ां कम्मां केरे लेइ एककी होरेरी हिम्मत बधाम।

25 ते एककी टैरी अकोट्टू भोनु न शारम, जेन्चरे होरे लोक केरतन बल्के अस एककी होरि हिम्मत देथ, तुस जैस हिसाबे सेइ परमेशेरे दुबारे एजनेरी दिहेड़ी नेइते लातथ तैस्से हिसाबे सेइ जादे एन गल्लन पुड़ चलते भी राथ।

26 किजोकि अगर अस सच्च पिशानेरां बाद, जैनी बुझतां पाप केरम त पापां केरे लेइ कोई बलिदान बाकी नई रावरू।

27 हाँ, परमेशेरे इन्साफ ते भयानक अग जै परमेशेरे दुश्मन् भस्म केरेली तै बाकी आए।

28 जैखन मूसेरे कानून न मन्नेबाले, दई या टलाई मैन्हु केरे गवाही देने सेइ तैस मैन्हु बगैर दया केरतां मौतरी सजा दिती गातीए।

29 त तै मैन्हु केतरी सजारो लैईक भोलो, जैनी परमेशेरे मट्टू पावन हैठ दलेन्चू, ते करारेरो खून जैस सेइ तै पवित्र ठहरावरो थियो, तै अपवित्र समझो। ते पवित्र आत्मारी बेइजती की, जेसेरे ज़िरिये असन अनुग्रह मैलते।

30 किजोकि अस ज्ञानतम, तैनी ज़ोरू थियू, “बदलो घिन्नो मेरू कम्मे, अवं एप्पू बदलो देइलो।” ते फिरी तैनी एन भी ज़ोवं, “परभु अपने लोकां केरि इन्साफ केरेलो।”

31 ज़ीते परमेशेरे हथ्यन मां गानू बड़ी खतरनाक गल्ले।

32 पन तैना पेइले दिहाड़े याद केरा, जैखन तुसन मसीह पिशानेरी लौ मैल्ली, ते तैसेरे बाद तुसेई बेइइ मुशकलातां केरो दैटतां मुकाबलोइ कियो।

33 यानी कधे त तुस लोकां केरे तुहीन केरने सेइ ते मुसीबती सेइ तुस तमाशो बने, ते कधी तुसेई होरे मुसीबत बरदाशत केरते लाए ते तुसेई तैन केरू साथ दित्तू।

34 किजोकि तुसेई कैदन सेइ हमदरदी की, ते अपनो माल भी लुट्टानो खुशी सेइ कबूल कियो। किजोकि तुस ज्ञानते थिये कि अक बड़ी बड़ड़ी खास मलकियत तुसन कां आए जै हमेशेरे लैई आए।

35 एल्हरेलेइ तुस हिम्मत न हरा, किजोकि तैसेरो फल बड़ो बड़ोए।

36 तुसेई बेइइ सबरी सेइ कम कियेरू लोड़ते, ताके तुस परमेशेरी मर्ज़ी पूरी केरतां तै चीज हासिल केरि सखथ जेसेरो तैनी वादो कियोरोए।

37 किजोकि जेन्चरे पवित्रशास्त्रे मां लिखोरू आए, “हुनी थोड़ु चिरि बाकी आए,

कि एजनेबालो एज्जेलो ते चिरि न लाएलो।

38 पन मेरे धर्मी लोक मीं पुड़ विश्वासे रखने सेइ ज़ीते राले,

अगर तैना मीं पुड़ विश्वास केरने करां पत्रोवं हटन त मेरो दिल तैन पुड़ खुश न भोलो।”

39 पन अस हटने बाले नई, कि परमेशेरे पुड़ विश्वास केरने करां पत्रोवं हटम ते नाश भोम, बल्के अस विश्वास केरनेबाले आम, ताके इशे प्राण बचाए गान।

11

??????????

- 1 हुनी विश्वास उमीद कियोरी चीजां केरू याकीन, ते अलैई चीजां केरू सबूते ।
- 2 इश्शे दादे पड़दादन भी एरो विश्वास थियो । एल्हेरेलेइ परमेशर तैन पुड़ खुश भोव ।
- 3 विश्वासे सेइं असन पतो लगते कि दुनियारी हर चीज परमेशरेरे वचने सेइं बनोरीए । एल्हेरेलेइ जैन किछ् अस लहतम, तैन लेइहोने बैली चीजन सेइं नई बनोरोए ।
- 4 विश्वासे सेइं आदमेरे मट्टे हाबिले अपने बड्डे दला केने केरां रोडू बलिदान परमेशरेरे लेइ च्चादू । जेसेरी वजाई सेइं परमेशरे तैसेरू बलिदान कबूल कियू, ते तैसेरे बारे मां गवाही दिती, कि हाबिल धर्मी मैन्हु आए । हालांकी हाबिल मेरि जोरोए, फिरी भी अस तैसेरे विश्वासेरे जिरिये परमेशरे पुड़ भरोसो केरनो शिखतम ।
- 5 विश्वासे सेइं हनोक नव्वेरो मैन्हु मौती करां पेइलो ज्रीतो स्वर्गे जो नीयो, ते तैसेरो पतो न चलो, किजोकि परमेशरे तै स्वर्गे जो नीयोरो थियो, तैसेरे उबरे गाने करां पेइले तैसेरे हके मां गवाही दितीरी थी, कि तैनी परमेशर खुश कियो ।
- 6 किजोकि विश्वासेरे बगैर परमेशर खुश केरनो नामुमकिने, बस्सा रोडू एने कि परमेशरे कां एजने बालन विश्वास कियोरो लोडे कि परमेशर आए, परमेशर तैन जैना तैस सच्चैई सेइं तोपतन फल देते ।
- 7 विश्वासे सेइं नूहे तैन गल्लां केरे बारे मां जैना एजनेबाले वक्ते मां भोनी बैली थी, परमेशरेरे तरफां हुक्म मैलतां परमेशरेरे प्यारे सेइं तैस पुड़ अमल कियू, ते अक किशती बनाई जैस मां तैसेरू सारू टब्बर बच्च, एन केरने सेइं तैनी सारी दुनिया मुज्रंम बनाई ते एप्पू तैस धार्मिकतारो बारस बनो जै विश्वासे सेइं हासिल भोचे ।
- 8 विश्वासे सेइं जैखन परमेशरे अब्राहम, जैस जगाई गाने जो परमेशरे तै कुजोरो थियो, त तै हुक्म मेन्तां तैस जगाई चलो जेव, जै जगाई वादे मां परमेशर तैस विरासतरो जेरो देनेबालो थियो । हालांकी तै एन भी न थियो ज्ञानतो कि अवं कोरां चलोरोई, फिरी भी चलो जेव ।
- 9 विश्वासेरे जिरिये सेइं तै परमेशरेरे कियोरे वादेरे मुताबिक तैस मुलखे मां परदेशी केरो जेरो तेम्बन मां गेइतां बस्सो । ते तैस सेइं साथी तैसेरू मट्टू इसहाक ते तैसेरू पोद्लडू याकूब भी राए, तैन भी परमेशरे करां तैए वादो मैलो ते तैना भी तेम्बन राए ।
- 10 किजोकि अब्राहम तैस नगरेरे इंतजारो मां थियो (जैन स्वर्गे मांए) जेसेरी मुनीयाद सदारे लेइ आए, जेसेरो तियार केरनेबालो ते बनानेबालो परमेशरे ।
- 11 विश्वासे सेइं सारा दोज्जींती भोनेरी ताकत हासिल की, हालांकी तै उमरारे हिसाबे सेइं बच्चो ज्ञानेरे काबल न थी राहोरी, सारा एन याकीन थियू कि वादो केरनेबालो परमेशर अपनी वादो पूरो केरेलो ।
- 12 जेइस अब्राहम बड्डो बुड्डो थियो ते बच्चे पैदा केरनेरे काबल न थियो, अम्बरेरे तारां केरे ते समुदरेरी रेतारे बराबर एतूरू हच्छु वंश पैदा भोव ।
- 13 एन सेब्भी लोकेई परमेशरे पुड़ भरोसो कियो ते मेरि जे, ते तैन तै कोई चीज न मैल्ली जेसेरो वादो परमेशरे कियोरो थियो, तैनेई समझू कि परमेशर एन एजनेबाले वक्ते मां केरेलो, ते तैना इन भी समझते थिये, कि तैना ज़मीनी पुड़ परदेशी ते मुसाफर आन ।
- 14 जैना एरी गल्लां ज़ोतन तैन सेइं एन साबत भोते, कि तैना अज तगर अपने मुलखेरी तलाशी मां आन ।
- 15 अगर तैना तैस मुलखेरो खियाल रखते भोथे जैस मरां तैना ओरे थिये, त तैना वापस गेइ बटते थिये ।
- 16 पन असलीती मां तैना एक्की रोडे स्वर्गेर मुलखेरे उमीदी मां थिये, एल्हेरेलेइ परमेशर तैन केरो परमेशर जुवाने सेइं खुश भोव, एल्हेरेलेइ तैनी तैन केरे लेइ अक नगर तियार कियोरोए ।

17 विश्वासे सेइं अब्राहमे अपने इम्तिहानेरे मौके अपने मट्ठे इसहाकेरू बलिदान देने करां न टलो, जैन तैस परमेशेरे वादे कबूल करने बढ मैलोरो थियूं, तैस्से अकैल्ले मट्ठे बलिदान करने जो तियार भोइ जेव ।

18 हालांकी परमेशेरे तैस सेइं ज़ोरू थियूं, “कि इसहाकेरे वंशे सेइं तेरे वंशेरू नवं रालू ।”

19 किजोकि अब्राहमे याकीन थियूं, कि परमेशेरे कां मुड्ढन ज़ीते केरनेरी शक्ति आए, एल्हेरेलेइ लेइ जेन्चरे परमेशेरे इसहाक मुड्ढन मरां फिरी वापस आनो ।

20 विश्वासे सेइं इसहाके अपने दुइये मट्ठन याकूबे ते एसावे आशिवांद दित्तो, कि एजनेवाले वक्ते मां तैना वादे पूरे भोले ।

21 विश्वासे सेइं याकूबे मरते वक्ते यूसुफेरे दुइये मट्ठन बरकत दित्ती ते अपने सोटरे सहारे सेइं परमेशेरेरी आराधना की ।

22 विश्वासे सेइं यूसुफे मरते बार पूरे याकीन सेइं ज़ोरू थियूं, इस्राएली लोक मिस्र मुलख शारेले । ते तैन हुक्म दित्तोरो थियो कि जेइस तैना मिस्र मुलखे मरां निसेले त तैना तैसेरी हेड्डी साथी नेन ।

23 विश्वासे सेइं मूसेरे हाज बव्वेई तैसेरे जरमनेरां पत्ती ट्लाई महीन्न तगर छेपेइतां रख्खो, किजोकि तेनेई हेरू कि तै बच्चो खासे, ते तैना राज़ेरो हुक्म टलोइने करां न डरे ।

24 विश्वासे सेइं मूसा बड्डे भोइतां फ़िरौनेरे कुइयरू मट्ठू* बन्ने करां इन्कार कमाव ।

25 पापेरे थोड़े दिहाड़े आनन्देरी ज़िन्दगी गुज़ारनेरे बजाहे तैनी परमेशेरे लोकन सेइं साथी मिलतां दुख झैलनो चुनो ।

26 तैनी मसीहेरे लेइ दुख झैलनो मिसरेरे खज़ानन् करां जादे दौलत समझी, किजोकि तै ज़ानतो थियो कि तैस स्वर्गे मां इनाम मैलनूए ।

27 विश्वासे सेइं तैनी राज़ेरे सरकरो डर न कियो, बल्के मिस्र मुलख छैडी दित्तो, एल्हेरेलेइ तैनी समझोरू थियूं जेन्चरे तैनी न लेइहोने बाले परमेशेरे लाहू ।

28 विश्वासे सेइं मूसे इस्राएली लोकन हुक्म दित्तो कि तैना फ़सह तिहारेरी दिहाडी बनानी ते गबडेरो खून दारन छिड़कन, ताके मौतरो स्वर्गदूत ज़ै परमेशेरेरी तरफां भेजोरोए इस्राएलेरे पेइले मट्ठन न मेरी बटे ।

29 विश्वासे सेइं इस्राएली लोक लाल समुन्देरे मांमेइं एन्चरे लंघे जेन्चरे शुक्कोरी ज़मीनी पुइमेइं पार निस्से, पन ज़ैखन मिसरेइं तैट्टां पार लंघनेरी कोशिश की त तैना डुबतां मेरि जे ।

30 किजोकि इस्राएली लोकेई परमेशेरे पुइ विश्वास कियो, ते सत दिहैइन तगर यरीहो नगरेरे चक्कर लाए (जेन्चरे परमेशेरे ज़ोरू थियूं) ते दिवार डुल्लनी ।

31 विश्वासे सेइं राहाब वेश्या परमेशेरे हुक्म न मन्ने बालन साथी नाश न भोइ; एल्हेरेलेइ कि तैसां इस्राएली जासूस शैन्ति सेइं अपने घरे मां आने ज़ैना छेपतां यरूहो नगरे हेरने ओरे थिये ।

32 हुनी होरू किछ ज़ोनेरी ज़रूरत नई । हुनी मीं कां वक्त नई कि एरे ज़ेरे लोकां केरे बारे मां ज़ोई, जेन्चरे गिदोन, बाराक, शिमशोन, यिफतह, दाऊद, ते शमूएल ते होरे नबी ।

33 तेनेई विश्वासे सेइं राष्ट्रजां ज़ीतां, ते धार्मिकतारां कम्मां कियां ते वादो कियोरी चीजां हासिल की, ते शेरैई तैना न खाए ।

34 अग्गां तैना न फुके, ते तलवारी सेइं तैना न मारे जे, ज़ैखन तैना कमज़ोर थिये तैखन तैन ताकतबर बनाए, ते जंगी मां भी बहादर निस्से, ते तेनेई दुश्मना केरि फौज निशानी ।

35 विश्वासे सेइं किछ कुआन्शन अपने मुओरे लोक ज़ीतो मैल्ले, किछ मार खांते-खांते मेरि जे । ते तेनेई अपना विश्वास शारनो न चाव, तैसेरे बदले मां तेनेई कैद रानू मन्ज़ूर कियूं, एल्हेरेलेइ तैना मरनेरां बाद फिरी ज़ीते भोन, ते तैन रोड़ी ज़िन्दगी मैल्ले ।

* 11:24 फ़िरौनेरे कुइयरू मट्ठू: किजोकि फ़िरौन राज़ेरे कुइयां मूसो पालोरो थियो तांए तैस जो फ़िरौनेरे कुइयरू मट्ठू ज़ोते थिये ।

36 किछ्छ लोकां केरो मज़ाक बनाव जेव, किछ्छ लोकन कोड़े बाए, ते किछ्छ शंगलन सेइं बंधे ते कैदखाने मां छुडे ।

37 ते किछ्छन घोड़ेईं बेईं; ते आरे सेइं चिरे, ते तलवारी सेइं मारे जे । तैना गरीब थिये, तैन दुःख दित्तो जेव ते तैन सेइं बुरो बर्ताव कियो जेव । तैना भैडडां छैल्ली केरि खाड़ी लेइतां इरां उरां नश्रते थिये ।

38 तैना जंगलन ते पहाड़न ते कुदहन मां ते धेरतरे खडन मांमेइं हंठते थिये ।

39 इन बुरू संसार तैन विश्वासी लोकां केरे काबल न थियूं, तैन सेब्भी केरे विश्वासेरे वजाईं सेइं परमेशर तैन पुड़ खुश भोव, पन तैन, तैन मैल्लू जेसेरो वादो परमेशरे कियोरो थियो ।

40 किजोकि परमेशरे कां न सिर्फ तैन केरे लेइ बल्के इशरो लेइ रोड़ी योजनाए । परमेशरे तैन शुद्ध बनानो चाते, पन सिर्फ असन सेइं साथी ।

12

CHAPTER 12

1 एल्हेरलेइ जैखन गवाहां केरे एतरो बड़डो घाने असां घेरोरेम, त अस भी सैरी रकावटां ते तैस पापे दूर केरम जै असन उलझाते, ते तैस दौड़ी जै असेईं दौवइनीए बल्हे सेइं दौवइम ।

2 एज्जा अस विश्वासे मां पवित्र करनेवाले यीशु पुड़ नज़र रखम, जैनी तैस खुशारे लेइ जै तैसेरी नज़री मां थियो, बेइजतरी परवाह न की, बल्के कूरुसेरो दुख झैल्लो ते परमेशरेरे तखतेरे देइने पासे गेइतां विश्वा ।

3 तुस एस गल्ली पुड़ खियाल केरा, कि अपने खलाफत करनेवाले जैनी पैपी केरि तरफां केतरो दुख झैलो, ताके वेदिल भोइतां हिम्मत न हैरी ।

4 तुसेईं पापे सेइं लइते-लइते हेजू तगर एतरो मुकाबलो नईं कियोरो कि तुसेईं अपनो खून बगावरो भोए ।

5 ते तुसेईं तैन समझानू बिसरी छुइइ, कि जैस मां तुसन जो मट्टां ज़ोवं, “कि हे मेरे बच्चव परमेशरेरे हुकमे एरे न समझा ।

ते जैखन प्रभु तीं झिड़के त शारनेरे ज़ेरे मैसूस न केर ।

6 किजोकि जैस सेइं परमेशर प्यार करते तैस झिड़ते भी, ते जैस तै अपनू मट्टू बनाते तैस सोटेईं भी वाते ।”

7 ए हदैइत तुशरो समझनेरे लेइए, एस बल्हे सेइं बरदाशत केरा, परमेशर तुसन अपना मट्टां सेमझतां बर्ताव करते, किजोकि तैन कौन जेरू मट्टूए जैस तैसेरो बाजी समझाए नन्ना?

8 पन अगर तुसन सुधारे न गाथ जैस शामिल त तुस न गैर औलाद भोनेथ न की अपना मट्टां ।

9 एसेरे अलावा जैखन इशरो जिसमानी बाजी सुधारते रहते थिये ते अस तैन केरि इज्जत करते राए, त कुन आत्मां केरो बाजी यानी परमेशरेरी जादे इज्जत न केरम ताके ज़ीते राम ।

10 इशरो जिसमानी बाजी त थोड़े दिहाड़ां केरे लेइ अपनी समझरे मुताबिक असन सुधारते रहते थिये, पन परमेशर इशरो फेइदेरे लेइ असन सुधारते ताके असां तैसेरी पवित्रतेईं मां शामिल भोम ।

11 एसमां शक नईं कि जैखन केन्वी हदैइत की गाचे त तै खुशी नईं, बल्के बड़ बुरू बुझते, पन जैखन तै बले-बले पक्को भोइ गाते त तैस वादे मां धर्मी बेनतां चेंनरो फल मैलते ।

CHAPTER 12

12 बस्सा एपनी कमज़ोर पैखड़न ते कमज़ोर जैन्धु मज़बूत केरा ।

13 ते अपने पावन सिधी बत्तां चलाथ ताके टोट्टे टपलोए न ते तैना बेझोन ।

14 सेब्बन सेइं मेल मिलापे सेइं राथ, ते तै पवित्रताईं हासिल करनेरी हर वक्त कोशिश केरा जेसेरे बगैर कोई प्रभु न लेईं सके ।

15 खबरदार एरू न भोए कि कोई मैन्हु परमेशरेरे अनुग्रह करां रेइ गाए, एरू न भोए कि कोई ट्लिट्टू जील लगगे ते तुसन परेशान केरे ते होरे लोक भी भिटे भोइ गान ।

16 ते न कोई मैन्हु तुसन मां बदमाशी करनेवालो भोए, या एसावेरो ज़ेरो अधर्मी न बने, ज़ैनी एक्की बार रोट्टी खानेरे लेइ अपने बड्डे भोनेरू हक बेचतां छुइ।

17 किजोकि तुस ज्ञानतथ कि बादे मां ज़ैखन तैनी तै बरकत हासिल करनेरी कोशिश की, त तैस न मैल्ली, तैस अपनि नियत बदलनेरो मौको न मैलो हालांकी तै लेरां देइ-देइ तैस तोपनेरी कोशिश करतो राव।

18 तुस तैस पहाड़े कां नेडे नई ओरे, ज़ैस सेइं तुस हुरी सकते थिए, तैन पहाड़ अगगी सेइं फुकोत् थियूं ते अंधगुबारी ते बड़ो तूफान थियो।

19 तैड़ी नइशिगेरी शोर ते ज़ोने शुनाने बालेरी एरी आवाज़ शुनोती थी, कि ज़ैखन लोकेई ते आवाज़ शुनी त मिनत करने लगे, कि असन सेइं होरि गल्लां न केर।

20 एल्हरेलेइ कि तेनेई ते हुक्म बरदाशत न केरि बटो, “अगर कोई जानवर भी एस पहाड़े सेइं हुरेलो त ते घोड़ेई बैइतां मारो गालो।”

21 ते नज़ारो एत्रो खतरनाक थियो कि मूसे ज़ोवं, “अवं डरने ते थरकने लोरोई।”

22 बल्के तुस सिय्योनेरे पहाड़े ते ज़ीते परमेशरेरे नगर यानी स्वर्गेरे यरूशलमे मां लखेइं स्वर्गदूतन कां खुशी मनाने ओरथ।

23 ते तुस परमेशेरी पेइले बच्चां केरि सभाई मां ते कलीसियाई मां ओरथ, एना तैना लोकन ज़ैन केरां नच्चां स्वर्गे मां लिखोरेन, तुस इन्साफ करनेवाले परमेशेरे कां ओरथ, ते धरमी केरि आत्मन कां ओरथ, यानी तैन कां ज़ैना सिद्ध कियोरेन।

24 तुस नव्वे करारे बिचवाईं करनेवाले यीशु ते तैसेरे छिड़कोरे खूने कां ओरथ, ज़ै हाबिलेरे खूने केरां रोड़ी गल्लां ज़ोते।

25 खबरदार राथ, तुस परमेशर ज़ै तुसन सेइं गल्लां करते तैसेरो इन्कार न केरथ, किजोकि ज़ैनेई ज़मीनी पुड़ हदैइत करनेवालेरो इन्कार कियो त तैना न बच्चे, त अगर अस स्वर्गे हदैइत करनेवालेरो इन्कार केरमेले त केन्चरे बंचमेले?

26 तैखन तैसेरी आवाज़ी सेइं धरती हिली जेई पन तैनी ई वादो कियोरोए कि, “एक्की फेरे फिरी अवं सिर्फ ज़मीन नई बल्के अम्बरे भी हिलेइलो।”

27 तैसेरू “एक्की फेरे फिरी” ज़ोने सेइं साफ पतो लगते की पैदा कियोरी चीज़ां ज़ैना हिलचन तैना खतम भोनिन ताके ज़ैना हिलन नन्ना तैना रैनिन।

28 ज़ैड़ी असन तैन राज़ मैलने लोरूए ज़ैन हिलनेरू नई त एज्जा अस तैसेरू शुक्र केरम ते हिम्मत केरम कि, अस परमेशेरी आराधना परमेशेरे डरे सेइं केरि बटम ज़ैस सेइं तै खुश भोए।

29 किजोकि इशशो परमेशर भस्म करनेबैली अगारो ज़ेरोए।

13

CHAPTER 13

1 एक्की होरि सेइं दूला ते बेइनां केरो ज़ेरो प्यार करते राथ।

2 बखले लोकां केरि खातरदारी केरा, किजोकि एरू करने सेइं किछेई अनजाने मां स्वर्गदूतां केरि खातरदारी कियोरीए।

3 कैदन याद रखा, मन्ना कि ज़ेन्चरे तुस एप्पू भी तैन सेइं साथी कैद आथ, ते ज़ैन सेइं बुरो बर्ताव भोते तैन भी याद रखा, इन सेमझतां मन्ना कि ज़ेन्चरे तुसन सेइं बुरो बर्ताव भोव।

4 इला बनानो सेब्मी लोकन मां इज्जतरी गल समझी गाए, ते कुआन्श ते मडद एक्की होरेरे लेइ वफादार रान, किजोकि परमेशर बदमाशी करने ते नाजाइज़ रिशते रखनेवालां केरो इन्साफ केरेलो।

5 अपने आपे दौलतरे लालचे करां दूर रखा, ते ज़ैतूरू तुसन कां आए तैस्से मां राज़ी राथ, किजोकि परमेशेरे एप्पू एन ज़ोरूए, “अवं तीं करां कधे भी दूर न भोइलो, ते न कधे तीं शैरेलो।”

6 एल्हरेलेइ अस दिलेरी सेइं ज़ोईं सकतम कि, “प्रभु मेरो मद्दत करनेवालोए, अवं डेरि नन्ना इन्सान मेरू कुन बगौड़ी सकते?”

7 ज़ैना तुशशे अगुवे थिये, तैन याद रखा, ज़ैनेई तुसन परमेशेरू बच्चन शुनावरू थियूं, इस गल्ली पुड़ ध्यान देथ, कि तैना केरी ज़िन्दगी गुज़ैरतां ज़ले जे, ते ज़ेरो विश्वास तैन थियो तुस भी तैन केरो ज़ेरो विश्वास केरा।

8 यीशु मसीह हीज ते अज़ बल्के हमेशारे लेइ अक्कां ज़ेरोए।

9 अलग-अलग किसमां केरि शिक्षाई सेइं न टेपलोथ, रोडू एन्ने कि तुशशो दिल परमेशेरें अनुग्रहे सेइं मज़बूत राए, न कि एरो परहेजें खाने सेइं, ज़ेसेरे खाने बालन कोई फैइदो न मैलो।

10 इशशी अक एरी बलिदान करनेरी ठारे, तैस मरां तैन खानेरी कोई अज़ाज़त नई ज़ैना तेम्बु मां सेवा केरतन।

11 किजोकि महायाजक ज़ैन जानवरां केरो खून मन्दरे मां परमपवित्र ठैरी मां पापेरे बलिदानेरे लेइ नेतो थियो, तैन केरो बाकी जिसम ज़ैडी इस्राएली लोक रहते थिये तैट्टां बेइर फुकते थिये।

12 एल्हेरेलेइ, यीशुए भी लोक एण्पू अपने खूने सेइं पवित्र केरनेरे लेइ यरूशलेम नगरे करां बेइर दुःख झैल्लो ते मरो।

13 एल्हेरेलेइ, एज्जा अस भी यहूदी केरि रसमन शैरतां यीशु पुड़ विश्वास केरम ते तैसेरो ज़ेरो दुःख ते निन्दा झैल्लम।

14 किजोकि ई दुनिया इशशू हमेशारू घर नई, पन अस एजनेबाले घरेरे इंतज़ारे मां आम ज़ैन एजनेबाले वक्ते मां इशशू भोल्।

15 एल्हेरेलेइ असां यीशुएरे ज़िरिये परमेशेरें लेइ तारीफरू बलिदान ज़ादम, यानी ज़ैखन अस अपने शब्दन सेइं इकारर केरतम कि यीशु इशशो प्रभु आए।

16 पन भलाई केरनि ते ज़ैन ज़रूरते तैन केरि मद्दत केरा, किजोकि परमेशर एरे ज़ेरे बलिदान्न् सेइं खुश भोते।

17 अपने अगुवां केरो हुक्म मन्ना, ते तैन केरे अधीन राथ, किजोकि तैन केरे ज़िमेदारी कि तैना प्राणा केरि रखवाली केरन, ते एस कम्मेरो तैनेई परमेशेरें हिसाब भी देने पेनोए। अगर तुस तैन केरो हुक्म मन्नेले त तैना अपनू कम खुशी सेइं केरेले त तुसन फैइदो भोलो, पन अगर तैस कम तकलीफ बुझेले त तुसन कोई फैइदो न भोलो।

18 इशशे लेइ प्रार्थना केरते राथ, असन याकीने इशशो ज़मीर साफे, ते अस हर हिसाबे सेइं नेक नीती सेइं ज़िन्दगी गुज़ारनी चातम।

19 अवं तुसन कां बिनती केरताई कि मेरे लेइ प्रार्थना केरा, कि अवं फिरी लूशी तुसन कां एज्जी सेखी।

20 हुनी शान्ति देनेबालो परमेशर, ज़ैनी भैइडां केरो महान रखवालो मतलब प्रभु यीशु मसीहे, इशशे प्रभु हमेशारे करारेरे खूने सेइं मुइदन मरां ज़ीतो कियो,

21 तुसन हर रोडे कम्मे मां सिद्ध केरे, ज़ैस सेइं तुस तैसेरी मर्जी पूरी केरथ, ते ज़ैन किछ परमेशेरें पसंद एइते तैस यीशु मसीहेरे ज़िरिये असन मां केरे, ते मसीहेरी बइयाई हमेशा-हमेशा भोती राए, आमीन।

22 हे दूलाव ते बेइनव, अवं तुसन कां बिनती केरताई कि मेरी तुस तैना गल्लां सवरी सेइं शुना, ज़ैना मीं तुशशे हिम्मत बद्दानेरे लेइ लिखोरिन, किजोकि ई चिट्ठी ज़े मीं तुसन लिखी बड़ी नई।

23 ताके तुसन पतो लगगे कि इशशो विश्वासी दूला तीमुथियुस कैदेरां छुटोरोए, ते अगर ते जल्दी अव, त अस दुइये तुसन सेइं मिलमेले।

24 अपने सेब्मी विश्वासी लोकन ते सेब्मी पवित्र लोकन जो इशशू नमस्कार ज़ोथ। इतालिया मुलखेरे विश्वासी लोकेई तुसन जो नमस्कार ज़ोरूए।

25 तुसन सेब्बन पुड़ परमेशेरें अनुग्रह भोतो राए, आमीन।

याकूब

??????

1 अवं याकूब, जै परमेशर ते प्रभु यीशु मसीहेरे दास आईं। अवं तैन 12 यहूदी गोत्रां केरे विश्वासी लोकन जैना तितर बितर भोइतां सारे दुनियाई मां रातन, तैन जो नमस्कार लिखताईं।

?????? ?? ?????????

2 हे मेरे दूलाव ते बेइनव, जैखन तुसन पुड़ अलग-अलग किसमां केरि अजमैइशां एज्जन, त एस खुशारी गल समझा,

3 किजोकि तुस ज्ञानतथ, तुशे विश्वासेरे परखे गाने सेइं इन साबत भोते, कि तुस हेजू तगर भी परमेशरे पुड़ भरोसो रखतथ, ते तुस मुशकलन सबरी सेइं झल्लेले।

4 पन मुशकलन मां सबर केरनि शिखा, कि तुस आत्मिकता मां मजबूत ते सिद्ध भोते गाथ, ते तुसन मां कोन्ची रोड़ी गल्लरी घटी न भोए।

5 पन अगर तुसन मरां कोन्ची अक्लारी घटी भोए, त तै परमेशरे करां मग्गे, जै बगैर दोष लेइतां सेबन खुशी सेइं देते, त मग्ने बाले दिती गाली।

6 पन विश्वासे सेइं मग्गे, ते शक न केरे। किजोकि शक केरनेबालो समुन्दरेरी छेल्ली केरो जेरोए, जैना हवाई सेइं चेलतिन ते उछड़तिन।

7 एरो मैन्हु इन न समझे, कि मीं प्रभु करां किछु मैलेलू।

8 ई मैन्हु दूमन्नोए ते एपनी सैरी गल्लन मां चंचल आए।

???? ?? ???? ?

9 गरीब विश्वासी दूला खुश भोए, किजोकि परमेशरे तैसेरी आदर कियोरीए।

10 ते धनी विश्वासी अपने घटिया हालती पुड़ खुश भोए, किजोकि घासेरे फूडोवेंरो जेरो मिटी गातो।

11 दिहाडो निसते बड़ी धुप पेतीए, ते घासे शुकाते, ते तैसेरू फूडोवें झैड़ी गाते, ते तैसेरी शोभा गाती रहतीए; तेन्चरे दौलतमन्द दूला भी अपने कम्न मां मैरी गानेन।

???? ?? ???? ?

12 धने तै मैन्हु, जै अजमैइशी मां मजबूत रहते; किजोकि तै अपनो विश्वास साबत केरतां जिन्दगरू तैन इनाम हासिल केरेलो, जेसेरो वादो प्रभुए तैन सेइं कियोरोए, जैना तैस सेइं प्यार केरतन।

13 जैखन कोन्चेरी अजमैइश भोए, त तै इन न ज्ञोए, कि मेरी अजमैइश परमेशेरी तरफां भोतीए। न बुरी गल्लन सेइं परमेशेरी अजमैइश भोइ बटतीए, ते न तै बुरी गल्लन सेइं केन्चेरी अजमैइश केरते।

14 पन हर कोई अपने खुवैइशन मां खिचोइतां, ते फेसतां अजमैइशी मां गाते।

15 ते फिरी बुरू केरनेरी खुवैइशरो नितीजो ई भोते, कि मैन्हु बुरी चीजां केरतन, ते आखरी मां तैन हमेशारी सजा मैलतीए।

16 हे मेरे टलारे दूलाव ते बेइनव, धोखो न खाथ।

17 किजोकि हर रोड़ वरदान, ते हर रोड़ दान इशे वाजी परमेशेरे तरफां आए, जैनी सैरी लोआं (यानी दिहाडी चाँदनी, तारे) बनेइं। परमेशर हमेशा अक्कां जेरो आए, तै छावरो जेरो न बेदलो।

18 तैन अपने मेर्जी सेइं असन सच्चेरे वचने जिरिये सेइं नव्वीं जिन्दगी दिती, ताके अस तैसेरी सन्ननाई मरां फसलारे जेरे पेडले फल भोम।

?????? ?? ?? ???? ?

19 मेरे ट्लारे द्लाव ते बेइनव, ई गल तुस ज्ञानतथ, एल्हेरेलेइ हर कोई मैन्हु शुन्नेरे लेइ हुशार ते ज़ोने मां पत्तरोवं भोए, ते सरकी मां ढिल्लो भोए ।

20 किजोकि ज़ैखन मैन्हु सरकी मां भोए त तै धार्मिकतारू कम न केरि बटे ज़ैस सेइं परमेशर खुश भोए ।

21 एल्हेरेलेइ सारी गंदगी ते दुष्ट दूर केरतां, तैन परमेशेरू वचन नेरमी सेइं कबूल केरे, ज़ैन दिले मां छुइइ जेव, ज़ैन तुशुशे प्राणन मुक्ति देइ बटते ।

22 पन परमेशेररे वचने पुइ च़लनेबाला बना, ते सिर्फ शुन्ने वाले नई, ज़ैना अपने आपे धोखो देतन ।

23 किजोकि ज़ै परमेशेरू वचन शुन्ने वालो भोए, ते तैस पुइ च़लने वालो न भोए, त तैस मैनेरो ज़ेरोए, ज़ै अपनू तुतर शीशे मां हेरते ।


24 ते तै अपनो आप हेरतां च़लो गाते, ते तैखने विसरते कि अवं केरो थियो ।

25 पन ज़ै मैन्हु कानूने ध्यान सेइं पढते, ज़ै पूरे तरीके सेइं असन आज़ादी देते, सिर्फ शुन्ने न पन तेन्चरे कम केरते, तै अपने कम्मे मां बरकत हासिल केरेलो ।

26 अगर कोई अपनो आप भक्त समझे, ते अपनि ज़िभी कैवू मां न रखे, तै अपने आपे धोखो देते, ते तैसेरी भक्ति बेफ़ैददी आए ।

27 इशुशे बाजी परमेशेररे नेड़े शुद्ध ते रोड़ी भक्ति ई आए, कि वे सहारां ते विधवां केरे मुसीबती मां खबर नी गाए, ते अपनो आप दुनियारे बुरे सुभावेरे अस्सेरे करां दूर रखम ।

2



1 हे मेरे द्लाव ते बेइनव, इशुशो महिमा वालो प्रभु यीशु मसीहेरो विश्वास तुसन मां तरफ़दारी सेइं न भोए ।

2 अगर अक मैन्हु सोन्नेरे छल्ले ते रोड़ां लिगड़ां लेइतां तुशुशे झुण्डे मां एज्जे ते अक गरीब भी मेलां लिगड़ां लेइतां एज्जे ।

3 ते तुस तैस रोड़े लिगड़न बालेरू तुतर हेरतां ज़ोथ, “तू इड़ी रोड़ी टैरी विश,” ते तैस गरीबे सेइं ज़ोथ, “कि तू इड़ी खड़ो रा, या इड़ी तल्ले विश ।”

4 त कुन तुसेईं भेद भाव न कियो, ते बुरे खियाले सेइं इन्साफ़ केरनेबाले न भोए?

5 हे मेरे ट्लारे द्लाव ते बेइनव शुना, कुन परमेशेर दुनियारे गरीब न चुने, कि विश्वासे मां धनी भोन, ते तैस राज़जेरे बारस भोन, जेसरो वादो तैने तैन सेइं कियोरोए ज़ैना तैस सेइं प्यार केरतन ।

6 पन तुसेईं तैस गरीबेरी बेइज़ती की, कुन धनी लोक तुसन पुइ ज़ुलम न केरन? ते कुन तैना तुसन आदालतन मां घसीटी-घसीटी न नेन?

7 कुन तैना तैस रोड़े नब्बेरी तुहीन न केरन जेसेरे तुसन जो ज़ोतन?

8 फिरी भी तुस पवित्रशास्त्रेरे इस वचनेरे मुताबिक, कि “तू अपने पड़ोसी सेइं अपनो ज़ेरो प्यार केर,” सच्च़े तैस राज़-कानून पूरो केरतथ, त रोड़ू केरतथ ।

9 पन अगर तुस तरफ़दारी केरतथ, त पाप केरतथ; ते मूसेरो कानून तुसन पापी ठहराते ।

10 किजोकि अगर कोई मूसेरे सारे कानूने पुइ च़लते, ते एक्की गल्लनी पुइ न च़ेलि बटो त तै सेब्मी गल्लन मां दोषी भोते ।

11 एल्हेरेलेइ कि ज़ैने इन ज़ोवं, कि “तू बदमाशी न केरां,” तैने इन भी ज़ोवं, “तू खून न केरां” एल्हेरेलेइ अगर तीं बदमाशी न की, पन खून कियो फिरी भी तू मूसेरे कानूने पुइ च़लने वालो न भोव ।

12 तुशुशी गल्लां ते बर्ताव तैन लोकां केरे ज़ेरो भोए, ज़ैन केरो इन्साफ़ आज़ादी देनेबाले कानूनेरे मुताबिक भोलो ।

13 किजोकि ज़ैने दया न की तैसेरो इन्साफ बगैर दयाई सेइं भोलो। दया इन्साफे करां भारी भोतीए।

~~~~~

14 हे मेरे दूलाव ते बेइनव, अगर कोई जोए कि मीं यीशु मसीह पुइ विश्वासे, पन होरि केरे लेइ रोड़ां कम्मां न केरतो भोए, त तैस सेइं कुन फैइदो? कुन एरो विश्वास तैस मुक्ति देइ बटते?

15 अगर कोई विश्वासी दूला या बेइन भोए ज़ैन लिगड़ा केरि ज़रूरत भोए, ते तैन रोज़ खाने जो न भोए।

16 ते तुसन मरां कोई तैन सेइं जोए, “खुशी सेइं गाथ परमेशर तुसन बरकत दे,” तुस गर्म राथ, ते रज्जा; पन ज़ैना चीज़ां जानरे लेइ ज़रूरिन तैना तैन न दे, त कुन फैइदो?

17 तेन्चरे विश्वास भी, अगर रोड़े कम्मन सेइं न भोए, त अपने सुभावे मां मरौए।

18 बल्के कोई जोई बटते कि, “तीं विश्वासे, ते अवं रोड़ां कम्मां केरताई।” पन अवं ज़ोताई तू अपनो विश्वास मीं रोड़ां कम्मां केरे बगैर हिरा, ते अवं अपनो विश्वास रोड़े कम्मन सेइं तीं हिरालो।

19 तीं विश्वासे कि अक्के परमेशरे, तू रोड़ू केरतस, भूतां भी विश्वास केरतन, ते थरकतन।

20 पन हे निकम्मे मैन्हु तू इन न ज़ानस, कि रोड़े कम्मन बगैर विश्वास मरौए।

21 ज़ैखन इश्शे पूर्वज अब्राहमे अपनू मट्टू इसहाक बलिदान केरनेरे ठैरी पुइ च़ादू, त कुन तै कम्मन सेइं धर्मी न भोव?

22 तीं हेरू कि विश्वासे तैसेरे कम्मन सेइं साथी अस्सर कियोरोए, ते कम्मन सेइं विश्वास सिद्ध भोव।

23 ते पवित्रशास्त्रेरो ई वचन पूरो भोव, “कि अब्राहमे परमेशरे पुइ विश्वास कियो, ते तै तैसेरेलेइ धार्मिकता गनो जेव,” ते तै परमेशरेरो दोस्त भोव।

24 ते तुसेईं हेरू कि मैन्हु सिर्फ विश्वासे सेइं नई, बल्के कम्मन सेइं भी धर्मी भोते।

25 तेन्चरे राहाब वेश्यां भी ज़ैखन तैसां बिस्तार देनेवाले लोक अपने घरे मां रखे, ते होरि बत्तां वापस भेज्जे, त कुन कम्मन सेइं धर्मी न भोइ?

26 ते ज़ेन्चरे जान आत्मा बगैर मर्री आए, तेन्चरे विश्वास भी रोड़े कम्मन बगैर मरौए।

### 3

~~~~~

1 हे मेरे दूलाव ते बेइनव, तुसन मरां बड़े परमेशरेरे वचनेरे उस्ताद न भोन, किजोकि तुसन पतोए, कि इश्शो उस्तादां केरो इन्साफ जादे सेखती सेइं भोलो।

2 अस बड़े बार गेलती केरतम, ज़ै ज़ोने मां गलती न केरे, तैए सिद्ध मैनुए, ते सारे जानी कैवू केरते।

3 ज़ैखन अस अपने कैवू मां केरनेरे लेइ घोड़ां केरे ऐशी मां लगाम लातम, त अस तैन केरि सारी जानी भी फेरी सखम।

4 हेरा, पेनेरां जिहाज़ां भी, अगर बडां भोतन, ते तेज हवाई सेइं ज़लां गातन, फिरी भी एक्की निकड़ी पतवारी सेइं ज़लानेवालो अपने मेज़ीं सेइं फिराते।

5 तेन्चरे ज़िभ भी, अगर अक निकड़ो अंगे, ते बेड़ि-बेड़ि घमण्डेरी गल्लां केरती, तक्का, थोड़ी ज़ेरि अगगी सेइं केतरे बड़े-बड़े जंगले मां अग लाई गातीए।

6 ज़िभ भी अक अगारी ज़ेरीए, ज़िभ इश्शे जानी मां अक बुरो हिस्सो आए, ते सैरी जानी पुइ कलंक लातीए, ते जिन्दगरी दुनियाई मां अग लातीए, ते नरकेरी अगगी सेइं बलती रहतीए।

7 हर किसमां केरे जंगली जानवर, चुड़ौलू, ते पेटेरे भारे बाले जीप जन्तू ते दरियारे जानवर त इन्सानेरे हथ्ये एज्जी बटतन ते ओरे भी आन।

8 पन ज़िभी मैनु मरां कोई भी कैवू मां न केरि सके, तै अक एरी बलाए ज़ै कथे रुके न, तै सप्येरे ज़ेहरेरे ज़ेरीए नुकसान देने वालीए।

????????????????

13 तुस ज़ैना इन ज़ोतथ, “कि अज़ या कालां अस कोन्वी होरि नगर मां गेइतां अक साल बीतामेले, ते बुपार केरतां फैइदो उठामेले।”

14 ते इन न ज़ानथ कि कालां कुन भोल्, शुना, तुशशी ज़िन्दगी आए कुन? तुस त भाखेरे ज़ेरेथ, ज़ै थोडे च़िरे लेइहोते, ते फ़िरी गैइव भोते।

15 एल्हरेलेइ तुसेई इन ज़ोरू लोडे, “अगर प्रभु चाए, त अस जीते रहमेले, ते इन या तैन कम भी केरमेले।”

16 पन हुनी तुस अपने अभिमाने पुइ घमण्ड केरतथ, एरू सब घमण्ड बुरू भोते।

17 एल्हरेलेइ ज़ै कोई भलाई केरनि ज़ानते ते न केरे, तैसेरेलेइ ई पापे।

5

????????????????

1 हे दीलतमंदव विश्वासी लोकव, शुना, तुस अपने एजनेबाले दुखेरे लेइ ज़ोरे-ज़ोरे लेरां देथ।

2 तुशशू धन नाश भोवं ते तुशशे लिगइन खर लगगे।

3 तुशशे सोन्ने चैदी मोरञ्जो लगगे, ज़ेइस परमेशरे तुशशो इन्साफ़ केरेलो त ई मोरञ्जो तुशशे खलाफ़ गवाहेरो ज़ेरो भोलो, ते अगारो ज़ेरो तुशशू मास फुकेलो, तुसेई आखरी युगे मां धन अकोट्टू कियू।

4 तक्का, ज़ैन मज़दूरेई तुशशां ऊडारां कट्टां, तैन केरि ते मज़दूरी ज़ै तुसेई तैन न दिती, चिन्डां मारने लोरीए, ते फसल कटने बालां केरि फरयाद फौजरे परमेशरे शुनोरीए।

5 तुस धेरती पुइ एश केरने मां लगगोरो राए, तुसेई सिफ़ अपने सुखेरे लेइ ज़िन्दगी ज़ी, एल्हरेलेइ तुसेई अपनो आप तैस दिहाडरे लेइ तियार कियोरोए ज़ेइस परमेशर तुशशो इन्साफ़ केरेलो।

6 तुसेई धर्मी दोषी बनेइतां मारो, तै तुशशे सामनो न केरे।

????????????????

7 ते हे दूलाव ते बेइनव, प्रभुएरे एजने तगर सबरी सेइं बलगा, हेरा, ज़मीनदार कीमती फसलरे कीमती फलेरे उमीदरो पेइली ते आखरी झैडी भोने तगर सबरी सेइं बलगते।

8 तुस भी तेन्चरे सबरी सेइं बलगा, ते अपने दिले मज़बूत केरा, किजोकि प्रभुएरू एजनु नेइए।

9 हे दूलाव ते बेइनव, एक्की होरि पुइ दोष न लाथ ताके तुसन पुइ भी दोष न लाव गाए, हेरा, हाकिम नेडे ते एजनेरे लेइ तियारे।

10 हे दूलाव ते बेइनव, ज़ैन नेबेई प्रभुएरे नंवे सेइं गल्लां की, तैन सबर केरनेरो अक नमूने समझा।

11 हेरा, अस बलगने बालन जो धन ज़ोतम, तुसेई अय्यूबेरे सबरारे बारे मां शुनोरूए, ते प्रभु करां तैसेरो ज़ै प्रतिफल भोव तैने भी बुझू, ज़ैस सेइं प्रभुएरी बड़ी महरबानी ते दया बांदा भोतीए

12 पन हे मेरे दूलाव ते बेइनव, सेभन करां बड्डी गल ईए, कि कसम न खाथ, न स्वर्गेरी न धेरतरी, न होरि कोन्वी चीज़री, पन तुशशी गल हांएरी हाँ, ते न एरी नां भोए, फ़िरी परमेशर तुसन सज़ा न देलो।

????????????????

13 अगर तुसन मां कोई दुखी भोए त तै प्रार्थना केरे, अगर खुश भोए, त परमेशेरां भजना ज़ोए।

14 अगर तुसन मां कोई रोगी भोए, त कलीसियारे बुजुर्गन कुजाए, ते तैना प्रभुएरे नंवे सेइं तैस पुइ तेल मेलतां तैसेरेलेइ प्रार्थना केरन।

15 ते विश्वासेरी प्रार्थनाई सेइं रोगी बन्नेलो ते प्रभु तैस बज्जालो, ते अगर तैने पाप कियोरे भोले त परमेशर तैस माफ़ केरेलो।

16 एल्हरेलेइ तुस एक्की होरेरे सामने अपने-अपने पाप मन्ना, ते एक्की होरेरे लेइ प्रार्थना केरा, ज़ैस सेइं तुस बेज्जाथ, धर्मी मैनेरे प्रार्थनारे अस्सरे सेइं बडू किछ् भोइ बटते।

17 एलिय्याह भी इशशो ज़ेरो दुःख सुख झैल्लने वालो मैन्हु थियो, तैने दिले सेइं प्रार्थना की, कि झैड़ी न भोए, ते सडे टलाई साल झैड़ी न भोइ ।

18 फिरी तैने प्रार्थना की, त अम्बेरां झैड़ी भोइ, ते धेरती पुड फसल भोइ ।

19 हे मेरे द्वाव ते वेइनव, अगर कोई विश्वासी परमेशेरी सच्ची शिक्षा मन्नी शारे, ते कोई तैस मनफिरानेरे लेइ मद्दत केरे,

20 त तै इन बुझे, कि जै कोई कोन्वी भटकोरे पैपी मनफिरानेरे लेइ मद्दत केरे, त तै एक्की प्राणे (मैन्हु) मौती करां बज़ालो, ते परमेशर तैसेरे बडे पाप भी माफ़ केरेलो ।

1 पतरस

1 अवं पतरस यीशु मसीहरो परेरित आई, अवं ई चिट्ठी परमेशेरे चुनोरे लोकां केरे लेइ लिखने लोरोई, ज़ैना परदेशी केरे ज़ेरे पुन्तुस, गलातिया, कप्पदूकिया, आसिया ते बितूनिया इलाकां केरे अलग-अलग नगरन मां तितर-बितर भोइतां रातन ।

2 बाजी परमेशेरे बड़ो पेइलो ई फैसलो कियोरो थियो कि तुस तैसेरे लोक भोथ त कने तै तुसन पवित्तर आत्मारे कम्मरे ज़िरिये पवित्तर बनाए । तैने एन एल्हेरेलेइ कियूं ताके तुस यीशु मसीहरी मन्नथ ते तैसेरे खूनेरे ज़िरिये सेइं शुद्ध भोथ । अवं प्रार्थना केरताई कि परमेशर तुसन अनुग्रह ते शान्ति जादे करां जादे दे ।

3 इश्शे प्रभु यीशु मसीहरे बाजी ते परमेशेरू शुक्र भोए, परमेशेरे असन पुइ महान दया केरतां असन नर्वीं ज़िन्दगी दिती । किजोकि परमेशेरे यीशु मसीह मुइदन मरां जीतो कियो त कने तैने अस पूरी उमीदी सेइं ज़ीनेरे काबल बनोरेम, मतलब असन तैन चीजां हासिल केनेरी पूरी उमीदे, ज़ैन केरो देनेरो वादो परमेशेरे असन सेइं कियोरोए ।

4 अस तैस विरासती हासिल केनेरो इंतज़ार केने लोरेम ज़ै परमेशेरे इश्शे लेइ तियार कियोरीए । कोई भी तैन चीजन कधी बरबाद न केरि बटे । किछ भी तैस खराब केरि बटे । तैना चीजां कधी भी पुरैनी न भोली ते तैन केरि खूबसूरती कधे न घटेली । परमेशेरे इना चीजां तुश्शे लेइ स्वर्गे मां रेखोरिन ।

5 परमेशर तुसन अपने महान शेक्तेरे ज़िरिये सेइं सम्भाले, किजोकि तुस यीशु पुइ विश्वास केरतथ । तै तुसन यीशु मसीहरे वापस एजने तगर सम्भलतां रखेलो । तेइस तुस ज़ानेले कि परमेशेरे तुस पापे करां ते मौती करां पूरे तरीके सेइं बचावरेथ ।

6 तुसेईं इन सेब्मी चीजां केरे बारे मां खुश भोरू लोडे, चाए हुना किछ वक्तेरे लेइ अलग-अलग किसमेरी मुसीबतां तुसन दुखी केरतिन ।

7 इन मुसीबतां केरो मकसद ई आए कि इन बांदू भोए कि तुस सच्चे परमेशेरे पुइ विश्वास केरतथ । तुश्शो यीशु मसीह पुइ विश्वास केरनो सोन्ने करां भी जादे कीमतीए । ज़ेन्चरे नाश भोनेबालू सोन्नु अग्गी सेइं परखू ते शुद्ध कियूं गाते, तेन्चरे अगर तुश्शो विश्वास अगारे ज़ेरे अज़मैइशन सेइं परखनेरे बाद भी मज़बूत रहते त ज़ेइस यीशु मसीह फिरी एज्जेलो, परमेशर तुसन जो शाबाश ज़ोलो, महिमा ते आदर देलो ।

8 तुसेईं यीशु मसीह कधे नई लवरो, पन फिरी भी तुस तैस सेइं प्यार केरतथ । तुस हुना तैस न लाथ पन तुस तैस पुइ विश्वास केरतथ । एसेरो नितीजो ई आए, कि तुस बडे खुश आथ । तुस एत्रे खुश आथ कि लफज़न मां बियांन न केरोए ।

9 तुस एल्हेरेलेइ खुश आथ किजोकि परमेशर तुश्शे प्राण पापेरे सज़ाई करां बचाने लोरोए । इन यीशु मसीह मां तुश्शे विश्वासेरू इनामे ।

10 ई मुक्ति किछ एरी थी ज़ेसेरे बारे मां नबी बडू ज़ाननू चाते थिये । तैनेई ज़ोवं केन्चरे परमेशर तुसन पुइ अनुग्रह केरतां बचालो ज़ेसेरे काबल तुस न थिये, तैनेई बड़ी जांच पइताल की, कि तैन जुवाब मैल्ले ।

11 मसीहरो आत्मा तैन मां थियो ते तैन सेइं ज़ोने लोरो थियो कि मसीहे केन्चरे दुःख झैल्लेलो ते तैट्ठां बाद तैस महान आदर दिती गाली । एल्हेरेलेइ तैना इन खोज केरतां तोपने लगे कि सच्चे मसीह कौन भोलो ते इन केइस भोलू ।

12 पन परमेशेरे इन अपने गल्लां ज़ोनेबालन सेइं ज़ोवं, कि तैन केरो सन्देश तैन केरे अपने आपेरे लेइ नई, पन तुश्शे लेइ आए । तै सन्देश यीशु मसीहरे बारे मां खुशखबरी आए, ज़ै तुसेईं इस वक्त

शुनी। परमेशे स्वर्गो पवित् आत्मा भेजो कि लोकां केरि मद्दत केरे कि तैना तुसन खुशखबरी शुनान। इन सब एतू हैरान करनेबालू ए कि स्वर्गाद्दत भी इन हेरनेरी बड़ी इच्छा रखतन।

~~~~~

13 एल्हेरेलेइ अपने मन तियार केरा ते अपने आपे कैबू मां रखवा। तैस मुक्तरी उमीद रखवा जै तुसन अनुग्रहे सेइं तेइस मैलनी जेइस यीशु मसीह दुबारा इस दुनियाई मां एज्जोए।

14 परमेशे मन्ना किजोकि तुस तैसेरे बच्चेथ। बुरां कम्मां न केरा जैना तुस बुरी इच्छाई सेइं केरते थिये जेइस तुस परमेशेरे सञ्चाई न थिये जानते।

15 पन हुनी तुस जैन किछ् केरतथ तैस मां पवित् भोथ, जेन्चरे परमेश पवित् जैने तुस अपने बच्चे भोनेरे लेइ चुनोरेथ।

16 किजोकि पवित्शास्त्रे मां परमेशे जोवरू ए “पवित् बना, किजोकि अवं पवित् आई।”

17 जैखन तुस प्रार्थना केरतथ तुस परमेशे जो बाजी ज़ोतथ। पन याद रखवा तै तरफदारी न केरे। एल्हेरेलेइ जैखन तुस इस दुनियाई मां परदेशी केरे जेरे रातथ त तुसेईं तैसेरी बड़ी इज्जत कियोरी लोडे।

18 किजोकि तुस जानतथ, बीतोरे वक्ते मां तुस बेकार तरीके सेइं जीते थिये जेन्चरे तुशो दादे-पड़दादे जीते थिये। पन हुनी तुस बेकार जिन्दगी करां छुटावरेथ, तुस नाश भोनेबाले सोन्ने चैदी सेइं नईं घिन्नोरे,

19 पन मसीहेरे कीमती खूने सेइं घिन्नोरेथ, मसीह जै शुद्ध ते सिद्ध गबडेरो जेरोए।

20 दुनिया बनाने करां पेडले परमेशे इन ठहरावरू थियू कि यीशु मसीह मुक्ति देनेबालो भोलो। पन तै इन आखरी दिहाइन मां इस दुनियाई मां अव ताके तुशशी मद्दत केरे।

21 यीशु मसीह जैन कियू तैसेरे वजाई सेइं तुस हुनी परमेशे पुड़ विश्वास केरतथ, तैए आए जैने यीशु मसीह मुड़दन मरां जीतो कियो ते तैस आदर दिती ताके तुशो विश्वास ते उमीद परमेशेरे पुड़ भोए।

22 किजोकि तुस सन्न मन्नेरे जिरिये शुद्ध कियोरेथ, ते हुनी तुसेईं विश्वासी सैथन सेइं इमानदेरी सेइं प्यार कियोरो लोडे। तुसेईं एक्की होरि सेइं गहराई ते पूरे दिले सेइं प्यार कियोरो लोडे।

23 किजोकि तुसन परमेशेरेरी तरफां नब्वीं जिन्दगी मैलोरी। तुसेईं ईं जिन्दगी एरी चीजी सेइं नईं हासिल कियोरी जै नाश भोली। पन तैस सेइं जैन हमेशा रालू। मतलब परमेशेरे जीते ते हमेशा रानेबाले वचने सेइं मैलोरीए।

24 किजोकि पवित्शास्त्र ज़ोते “सारे लोक घासेरे जेरे आन ते तैन केरि शोभा जंगली फूडोंवेरी जेरीए। घास शुक्की गालो ते फूडोंव झेडी गालू।

25 पन प्रभुएरू वचन सदा बनोरू रालू, ते वचन मसीहेरे बारे मां खुशखबरी जैन तुसन शुनव जेवं।”

## 2

~~~~~

1 एल्हेरेलेइ सब किसमेरी बुरो सलूख केरनो शारा। होरन धोखो न देथ, पाखंड न केरा। ते होरन सेइं जलन न केरा। होरि केरे बारे मां बुरी गल्लानं न ज़ोथ।

2 जेन्चरे नव्वे ज़मारे बच्चे अपने अम्मारो खालिस दुद्धेरी इच्छा रखतन, तेन्चरे तुस भी परमेशेरे वचन शिखनेरे लेइ इच्छा रखवा जैस सेइं तुस आत्मिक तरीके सेइं मज़बूत बनेले। फिरी आखरी मां परमेश पवित्शास्त्रे बुरी चीज़न करां पूरे तरीके सेइं बचालो।

3 जेन्चरे पवित्शास्त्र ज़ोते, “तुसेईं तजरबे सेइं जानेरूए कि प्रभु भलो आए।”

4-5 तुस प्रभु यीशु कां ओरेथ। तै खास घोड़ेरे जेरोए जै घरेरे बुनियादी मां लोरोए, पन तै जीतो घोडे। बडे लोकेईं तै रद कियो, पन परमेशेरे ते चुनो ते बडो कीमती मन्नो। जेन्चरे लोक घोड़न सेइं घर बनातन, तेन्चरे परमेश पवित्शास्त्रे एक्की एरे झुण्डे मां शामिल भोनेरी वजा बनाने लोरोए, जैस मां

परमेशेरो आत्मा रहते, ताके तुस जैन यीशु मसीहे इशे लेइ कियोरूए तैसेरे वजाई सेइं याजक बना, जैना बलिदाना चादतन, तुस भी तैन केरां जेरां रोडां कम्मां केरथ जैन सेइं परमेशर खुश भोते ।

6 एल्हरेलेइ जेन्चरे परमेशर पवित्रशास्त्रे मां ज्रोते, “तक्का, अवं अक मैन्हु सिष्योन नगरे मां रखने लोरोई ।

जै कूनेरो खास ते चुनोरो घोड़े,

तै अक कीमती घोड़ो जेरो जै मुनीयादी मां रखबोरोए ।

ते जै तैस पुड़ विश्वास केरेलो तै कोन्ची भी तरीके सेइं शरमिनदो न भोलो ।”

7 तुस जैना यीशु मसीह पुड़ विश्वास केरतथ ई घोड़ तुशे लेइ बड़ो कीमतीए । पन पवित्रशास्त्र तैन लोकां केरे बारे मां ज्रोते जैना विश्वास न केरन,

“जै घोड़ राज मिस्त्रेई इस्तेमाल केरनो न चाव,

तैए घरेरे मुनीयादरो खास घोड़ भोव,”

8 ते पवित्रशास्त्र फिरी ज्रोते,

“ई घोड़ लोकां केरे बिछुड़नेरी वजा भोलो ।

ई अक चट्टाने जै तैन बिछोड़ेली ।”

तैना एन्चरे बिछुड़तन किजोकि तैना परमेशेरे सन्देश मन्ने करां इन्कार केरतन । तैन सेइं इन भोनेरे लेइ परमेशर इन थापेरू थियूं ।

9 पन तुस तैन केरे जेरे नई किजोकि तुस परमेशेरे चुनोरे लोक आथ, परमेशर जै राजोए, तुस तैसेरे याजक आथ, तुस एरे लोक आथ जैनई अपनो आप परमेशेरे सोंफोरोए, ते परमेशेरे अपने लोक आथ । तैने तुस आंधरे मरां बड़े लोई मां कुजावरेथ, ताके तुस परमेशेरे महान कम्मां केरे बारे मां एलान केरथ ।

10 तुशे बारे मां होशे नेवे जैन ज़ोरू तैन सच्चे,

“तुस पेइले परमेशेरे लोक न थिये पन हुनी तुस परमेशेरे लोक आथ ।

तुस पुड़ पेइले परमेशेरी दयाई न थिये ज्ञानते पन हुनी ज्ञानतथ,

किजोकि तैने तुसन पुड़ अपनि दया हिरावरीए ।”



11 हे ट्लाराव, तुस इस दुनियाई मां परदेशी ते मुसाफरां केरे जेरे ज़ीने लोरेथ, अवं तुसन खबरदार केरताई, कि तुस जिसमेरी सैरी पापी खुवैइशन करां दूर राथ, किजोकि तैना हमेशा तुशे आत्मार खलाफ लेइतिन ।

12 जैना लोक परमेशेरे पुड़ विश्वास न केरन तैना तुशे च़ेवरे पासन रहतन, तैना ज़ोले तुस गलत केरने लोरेथ । तुस एरी रोड़ी ज़िन्दगी ज़ीथ कि लोक तुशे रोडां कम्मां हेरतां तैस दिहाड़े ज़ेइस यीशु मसीह दुबारा एज्जो परमेशेरी बडयाई केरेले ।



13 प्रभुएरे इज्जतर खातर, मैन्हु केरे ठहरावरे हर एककी अधिकारेरे अधीन राथ, किजोकि ई प्रभुएरी इच्छा आए, हकोमत केरनेबालेरे अधीन एल्हरेलेइ राथ किजोकि तै बड़ो खास अधिकारी आए ।

14 ते हाकिमेरे भी अधीन भोथ, किजोकि राजो तैस बुरां कम्मां केरनेबालन सज़ा देने लेइ ते रोडां कम्मां केरनेबालां केरि तारीफ़ केरनेरे लेइ इस्तेमाल केरते ।

15 किजोकि परमेशेरी मर्जी ईए, कि तुस रोडां कम्मां केरतां तैना बेवकूफ़ लोकन जैना परमेशेरे न ज्ञानन, तुशे खलाफ़ दोष लाने करां रोकथ ।

16 हुनी तुस पापेरे गुलाम नई किजोकि तुस इशे प्रभु यीशु मसीहेरे ज़िरिये आज्ञाद कियोरेथ । पन अपनि ई आज्ञादी बुरे कम्मां केरे लेइ इस्तेमाल न केरा, पन तुस भला कम्मां केरे ज़िरिये इन हिराथ कि तुस सच्चे परमेशेरे दास आथ ।

17 सेन्धी केरि आदर केरा, अपने विश्वासी साथी लोकन सेइं प्यार केरा, परमेशेर करां डरा, हकोमत केरनेवालेरी इच्छत केरा।

???? ???? ???? ??

18 हे घरन मां कम केरनेवाले सेवकव, तुस जैना विश्वासी आथ अपने मालिकां केरे हुक्म मन्ना ते हमेशा तैन केरि आदर केरा। इन न सिर्फ दया केरनेवालन सेइं केरा, बल्के जैना दया न केरन तैन सेइं भी।

19 किजोकि अगर अस बगैर गलती केरतां दुःख झैल्लतम त अस जानतम कि परमेशेर सब किछु जानते ते परमेशर असन सेइं खुश भोते।

20 किजोकि अगर तुसेईं पाप केरतां मार खाइ त तुशुशी कोई बड़याई नईं कि तुसेईं सजाईं मां सबर की। पन अगर भलाई केरतां दुःख झैलतथ ते सबर केरतथ त इस सेइं परमेशर खुश भोते।

21 परमेशेर तुसन कुजानेरी अक वजा ई भी आए कि तुस तैसेरेलेइ दुःख झैल्ला, मसीह भी तुशुशे लेइ दुःख झैल्लतां तुसन अक मिसाल दिती। तुसेईं भी तेन्चरे कियोरू लोडे जेन्चरे मसीहे कियूं।

22 पवित्तरशास्त्र ज्ञोते, तैने कधी पाप नईं कियोरु। तैने कधी झूठ नईं ज़ोवरू।

23 ज़ैखन लोकेईं यीशु बेइच्छत कियो, त तैने तैसेरे बदले मां तैना बेइच्छत न कियो। ज़ैखन लोकेईं तैस दुःख दित्तो त तैने बदले मां तैन दुख न दित्तो, बल्के तैने परमेशेर पुड़ भरोसो कियो कि ते तैसेरी मद्दत केरे। तै जानतो थियो कि परमेशर हमेशा धार्मिकताई सेइं लोकां केरो इन्साफ केरते।

24 ज़ैखन मसीह मरो, त तैसेरे जानी पुड़ इशुशे पापां केरे लेइ तैस कूरुसे पुड़ सजा दिती। तैन एन कियूं कि अस पाप केरनो बंद केरम ते धार्मिकतारी ज़िन्दगी ज़ीनी शुरू केरम। तैसेरे ज़खम ज़ैना तैनी झैल्ले तैन केरे वजाई सेइं अस बेच्छोए।

25 तुस पेइले टेपलोरी भैड्डां केरे ज़ेरे थिये, पन हुनी तुस मसीह कां वापस ओरेथ ज़ै तुशुशे प्राणा केरो पुहाल ते रखवालोए।

3

???? ? ? ?

1-2 हे कुआन्शव, तुस भी अपने मुन्शां केरे अधीन राथ। एल्हेरेलेइ अगर इन मां कोई एरो भोए ज़ै परमेशेररे वचने न मनतो भोए, तुशुशे ज़ीनिरे तरीके सेइं तुशुशे बगैर ज़ोने तैन केरे विश्वास केरनेरी वजा भोली। तैना तुशुशे रोडे ते पवित्तर बर्ताव हेरतां मसीह पुड़ विश्वास केरेले।

3 ते तुशुशी सजावट दिखावेरी न भोए, मतलब अलग-अलग किसमे दोग बनानो, ते सोन्नेरे गेहने, या किसमां-किसमां केरां लिगडां लाना।

4 बल्के तुस अपने गुना केरे ज़िरिये अपनो आप खूबसूरत बनाथ ज़ै तुसन करां दूर न गाए, मतलब नेरमी ते शांत स्भावे सेइं ज़ै परमेशेररे लेइ बडो कीमती आए।

5 ते पेइले जुमाने मां पवित्तर कुआन्शां भी, ज़ैना परमेशेर पुड़ उमीद रेखती थी, तैना अपनो आप इस तरीके सेइं सजैती ते अपने-अपने मुन्शां केरे अधीन रैती थी।

6 जेन्चरे सारा अब्राहमेरे अधीन रहती थी ते तैस ज़ो मालिक ज़ोती थी, ते तुस भी अगर भलाई केरथ, ते केन्वी किसमेरे फिकरन सेइं न डरथ त सारारे कुइयां केरि ज़ेरि भोली।

7 तेन्चरे हे मुन्शव, तुस भी समझदेरी सेइं कुआन्शन सेइं ज़िन्दगी बीताथ ते इन याद रख्वा कि तैना तुसन करां कमज़ोरन, एल्हेरे तुसेईं तैन केरि आदर कियोरी लोडे, किजोकि तुस दुइये तैस वरदानेरे हिसेदार आथ ज़ैन परमेशर तुसन अनुग्रहे सेइं दितोरू आए, तै हमेशारी ज़िन्दगी आए। एरू केरा ताके ज़ैखन तुस प्रार्थना केरथ त परमेशर तुशुशी प्रार्थना शुने।

???? ? ? ? ? ? ? ? ?

8 आखरी मां अबं तुसन इन ज़ोताई, तुसेईं सेभईं अक मन भोवरू लोडे ते एक्की होरि सेइं हमदेरदी केरा ते एक्की होरि सेइं दला बेइनां केरो ज़ेरो प्यार केरा, ते एक्की होरि पुड़ दया केरा, एक्की होरेरे लेइ नर्म बना।

9 बुरैइदारे बदले बुराई न केरा, गैई केरे बदले गैई न देथ, पन इसेरे बदले बरकत देथ, किजोकि परमेशेरे तुस होरन बरकतां देनेरे लेइ कुजावरेथ। अगर तुस इन केरतथ, त परमेशर तुसन भी बरकतां देलो

10 किजोकि पवित्तरशास्त्र ज़ोते, “अगर कोई मैन्हु ज़िन्दगरो आनन्द नेनो चाते, ते रोडे दिहाडे हेरने चाते त तेनी ध्यान लोडे दित्चोरू कि बुरी गल्लां न ज़ोए। ते तैनी होरन धोखो न लोडे दित्तोरो।

11 ते बुरू केरनू बंद कियोरी लोडे बल्के तैनी रोडू कियोरू लोडे। होरन सेई मेल मिलापे सेई ज़िनेरे लेइ मेहनत कियोरी लोडे।

12 किजोकि प्रभु तैन लोकां केरू ध्यान रखते ज़ैना तैन्ने केरतन ज़ैन सही आए, ते तै हमेशा तैन केरि प्रार्थना शुन्नेरे लेइ तियार रहते। पन परमेशर तैन केरे खलाफ कम केरते ज़ैना बुरू केरतन।”

13 अगर तुस हमेशा भलू केरनेरी कोशिश केरथ, त फिरी कोई भी तुसन हकीकति मां नुकसान न पुज़ेई बटे।

14 अगर अस धार्मिकतारे स्भावरे वजाई सेई दुःख झैल्लम, त अस सच्चे धन भोले, पन अगर कोई असन डराते त तैस करां डरू न लोडे ते न घबरावरू लोडे।

15 पन इसेरे बदले, तुसेई मसीहेरी आराधना अपने ज़िन्दगरे प्रभुएरे रूपे मां कियोरी लोडे। ते ज़ै कोई तुसन तुशे उमीदरे बारे मां किछ पुच्छे ज़ैस मां सारे विश्वासी शामिल आन, त तैस जुवाव देनेरे लेइ हमेशा तियार राथ, पन नेरमी ते आदरी सेई।

16 हमेशा तैन्ने केरा ज़ैन सही भोए। तैखन अगर लोक तुशे लेइ बुरू ज़ोले त तैना मसीह सेई तुशे रित्तो भोनेरे वजाई सेई तुशे रोडो बर्ताव हेरेले त तैना छिथोले।

17 किजोकि इन रोडू आए अगर इशशां रोड्वां कम्मां केरे वजाई सेई अस दुःख झैल्लम, अगर इशे लेइ परमेशेरी इच्छा ई आए। इन इशे वुरां कम्मां केरे वजाई सेई दुःख झैल्लने करां बडू रोडूए।

18 अवं इन ज़ोताई, मसीहे भी इशे पापां केरे लेइ दुःख झैल्लो ते मरो। तै एककी बारे मरो ते तैस दुबारा मरनेरी ज़रूरत नई। तै अक धर्मी मैन्हु धियो ज़ै पापी लोकां केरे लेइ मरो ताके तै असन परमेशेरे कां आने। तैनेई तैसेरो जिसम मारो पन तै पवित्तर आत्माेरे शेक्तेरे ज़िरिये ज़ीतो कियो


19 तैट्टां बाद तैसेरी आत्मा तैन आत्मान खुशखबरी शुनाने जेई, ज़ैना परमेशेरे तैस टैरी कैद कियोरिन ज़ैडी मरे लोकां केरि आत्मा रैती थी।

20 इन तैन मैन्हु केरि आत्मा आन ज़ैनेई बडे पेडले परमेशेरो हुक्म न धियो मन्नोरो। ज़ैखन नूह किशती बनाने लोरो धियो, त परमेशेरे बडे सबरी सेई बलगू कि तैना पापन करां मन फिरान। पन सिर्फ अठ तैस भयानक तूफाने करां बचे।

21 पुराने वक्ते मां तैन केरि मुक्ति हुना इशे लेइ ज़ैखन अस बपतिस्मो नेतम मिसाले। ज़ैस पैनी मां अस बपतिस्मो नेतम तैन इशे जानरो मैल दूर न केरे, पन ई अक निशान आए कि असेई परमेशेरे करां माफ़ी मगोरीए ताके इशे मन असन परेशान न केरे। असन माफ़ी मैल्ली बटतीए किजोकि यीशु मसीह मेरतां ज़ीतो भोवरोए,

22 ते तै स्वर्गं जो जोवरो। तैडी हुनी तै परमेशेरे देइने पासे खास टैरी, तैडी तै सारे स्वर्गदूतन ते अधिकैरन ते शेक्तेन पुड़ राज केरने लोरोए।

4



1 एल्हेरेलेइ ज़ैखन मसीहे जिसमे मां भोइतां दुःख झैल्लो, त ज़ेन्नेरे तैसेरो स्भाव धियो तेन्नेरे तुस भी दुःख झैल्लनेरे लेइ तियार भोथ। किजोकि अगर तुस मसीहेरे लेइ दुःख झैल्लनो चातथ त तुसेई पाप न केरनेरो फैसलो कियो।

2 नितिजो ई भोलो, कि तै मैन्हु बाकी अपनि ज़िन्दगी मैन्हु केरे पापी खुवैइशां केरे मुताबिक इस दुनियाई मां न ज़ीयोले पन तै तैन्ने केरेलो ज़ैन परमेशर तैस करां करानो चाते।

3 किजोकि बीतोर वक्ते मां तुस गैर विश्वासी लोकां केरे ज़ेरे आनन्द केरने मां वक्त बर्बाद केरते थिये, ते तुस अपनि ज़िन्दगी एश केरने मां, बुरी खुवैइशन मां, ते तैन केरे तिहारन मां, शराब पीने मां ते नाचें मां, ते तैन केरि मूरती केरि पूजाई मां ज़ैन सेइं परमेशर नफरत केरते बीताते थिये।

4 एल्हेरेलेइ तुशशे पुराने दोस्त हैरान भोतन, ज़ैखन तुस तैन केरे बुरी गल्लन मां ज़ैना तैन केरतन शामिल न भोथ, तांए तैना तुशशे बारे बुरू-भलू ज़ोतन।

5 पन एक्की दिहाड़े तैनेई ज़रूर परमेशरेरे सामने इन्साफेरे लेइ खडू भोनू पेनूए। ते परमेशर तैन मरां हर एक्की ज़ैन तैनेई इस धेतली पुइ कियोरू तैसेरे बारे मां पुछ्लेलो। परमेशर ज़ीते ते मुइदां केरो इन्साफ केरेलो।

6 ईए वजा आए कि मुइदन भी मसीहेरे बारे मां खुशखबरी शुनाई। तैन केरे जिसम भी एन्चरे मरे ज़ेन्चरे सारे मैन्हु मरतन। पन हुनी तैना आत्माई मां परमेशरेरे सेइं साथी हमेशा ज़ीइले।

~~~~~

7 सेब्मी गल्लां केरो अन्त जल्दी भोने बालोए, एल्हेरेलेइ साफ तरीके सेइं सोचा ते अपने आपे पुइ कैवू केरा ताके तुस प्रार्थना केरी सकतथ।

8 सेभन करां रोड़ी गल ईए, कि एक्की होरि सेइं ईमादैरी सेइं प्यार केरा, किजोकि अगर तुस लोकन सेइं प्यार केरेले त तुस तैन केरि गेलती भी माफ़ केरनेरे लेइ तियार भोले।

9 ज़ैखन लोक तुशशे घरन मां एजन त बगैर कोन्ची शिकायतां तैन केरू स्वागत केरा।

10 हर एक्की परमेशरे करां वरदान मैलोरूए ते तैनी तैन वरदान होरि केरि मद्दत केरनेरे लेइ इस्तेमाल कियोरू लोडे। तैनेई तैना काई किसमां केरां वरदानां इस्तेमाल कियोरां लोइन ज़ैना परमेशरेरे अपने अनुग्रहे सेइं दितोरन।

11 अगर तुसन कां प्रचार केरनेरू वरदाने त तुसेईं परमेशरेरू वचन प्रचार कियोरू लोडे। अगर तुसन कां होरि लोकां केरि मद्दत केरनेरू वरदाने त तैस शेक्ति सेइं केरा ज़ै परमेशरे तुसन दितोरीए। फिरी सब किछ् ज़ैन तुस केरेले तैस सेइं यीशु मसीहेरे ज़िरिये परमेशरेरी महिमा भोली। सारी महिमा ते शक्ति हमेशा-हमेशा तैसेरीए। आमीन।

~~~~~

12 टलारव, ज़ैना दुःख तुस झैल्लने लोरथ तैन केरे बारे मां हैरान न भोथ किजोकि तुस मसीहेरे आथ। पन इना चीज़ां इन हिरानेरे लेइ भोनेरे लोरिन कि तुस सच्चे परमेशरे पुइ विश्वास केरतथ की नई। एल्हेरेलेइ इन न सोचा कि तुसन सेइं नव्वीं गल भोने लोरीए।

13 पन इसेरे बारे मां खुश भोथ, कि ज़ैना दुःख मसीहे मैल्ले तुस भी तैन मां शामिल भोए। एल्हेरेलेइ ज़ैखन मसीह दुबारा एज्जेलो त सेब्मी लोकन पुइ अपनि महिमा बांदी केरेलो, त तुस बड़े खुश भोले।

14 फिरी अगर मसीहेरे नव्वेरे लेइ तुशशी तुहीन भोतीए, त तुस धन आथ। किजोकि परमेशरेरे महिमा बालो आत्मा तुसन मां रहते।

15 तुसन मरां कोई मैन्हु खूनी ते चोर, या कुकर्मी भोने, या होरि केरे कम्मन मां दखल देनेरे वजाई सेइं दुख न झैल्ले।

16 पन अगर मसीही भोने सेइं दुःख झैल्लतथ त शरमाए न, पन इस गल्लेरे लेइ परमेशरेरी बडीयाई केरे किजोकि तुस विश्वासी आथ।

17 किजोकि इन्साफेरो वक्त ओरोए, ते तै इशशो विश्वासी लोकां केरो इन्साफ पेइलो केरेलो, तैन डरानेवैली गल्लां केरे बारे मां सोचा ज़ैना तैन सेइं भोनिन, ज़ैना खुशखबरी पुइ विश्वास न केरन ज़ै परमेशरेरे तरफां एइतीए।

18 ज़ेन्चरे पवित्रशास्त्र ज़ोते,

“अगर धर्मी मैनेरे लेइ मुक्ति हासिल केरनि बड़ी मुशकलीए, त बुरे ते पापी मैन्हु पक्के नाश भोनेन!”

19 एल्हेरेलेइ जैना परमेशेरी मेरजरे मुताबिक दुःख झैल्लतन, तैनेई तैस पुइ लगातार भरोसो कियोरो लोडे जैने तैना बनाए। परमेशर हमेशा तैन केरते जैन केरनेरो वादो तैनी कियोरोए ते तै लगातार तैन केरेलो जैन रोडूए।

5

XXXXXXXXXX XX XXXXXXXXXXX XXXX XXXXXXXX

1 अवं साथी बुजुगन सेइ इन ज़ोनू चाताई किजोकि अवं तुशशो ज़ेरो आई। मीं एप्पू तैना दुःख हेरोरेन जैना मसीहे बडे पेइले झैल्ले। जैखन तै दुबारां एज्जेलो, त अवं तैसेरे महिमा मां शामिल भोनोई। अवं तुशशो साथी बुजुगं भोने सेइ तुसन कां ई बिनती केरताई,

2 जेन्चरे पुहाल अपनि भैडडां हेरतन, तुस भी तेन्चरे हर एक्केरी हेरगेश केरा, जैना परमेशेरे तुशशे रखवेली मां रखोरेन। इन अपने मेर्जी सेइ केरा किजोकि परमेशर इन चाते। तुस इन एल्हेरेलेइ न केरा कि तुसन पुइ दबाव बनाव गाते। ते इन कम एल्हेरेलेइ न केरा कि तुस कमाई केरनि चाथ, पन इस इच्छाई सेइ केरा कि तुस परमेशेरी ते लोकां केरि सेवा केरनि चातथ।

3 ते जैना लोक तुसन सॉफे तैन पुइ हकोमत न केरा, बल्के तैन केरे लेइ रोड़ी मिसालां बना।

4 ते जैखन यीशु मसीह जै इशशो प्रधान पुहालेरो ज़ेरोए, वापस एज्जेलो त तै तुसन तैन इनाम देलो ज़ेसेरी शोभा कधे खतम न भोली।

5 तेन्चरे हे जवान लोकव, तुस भी बुजुगां केरे अधीन राथ, तुस सारे एक्की होंरेरी मद्दत बडे नर्म स्भावे सेइ केरा। किजोकि कोई पवित्रशास्त्रे मां पेढी बटते “परमेशर घमण्ड करेनेबालां केरि खलाफ केरते, पन तै तैन केरे लेइ रोडो आए जैना दीन आन।”

6 एल्हेरेलेइ अपनो आप परमेशेरे कां दीन बनाथ तै तुशशी हफाजत केरनेरे लेइ शेक्ति बालोए, ज़ैस सेइ तै तुसन ठीक वक्ते पुइ आदर दे।

7 परमेशेरे अपने परेशैनी ते फिकरां केरे बारे मां ज़ोथ, किजोकि तैस तुशशु ध्यान आए।

8 खबरदार राथ, ते बींझे राथ, किजोकि तुशशो दुश्मन शैतान तुसन पुइ हमलो केरनेरे लेइ तियारे, कि तुस परमेशेरे मन्नु शारा। तै गर्जनेबाले शेरे ज़ेरो तोपने लोरो कि केस मारे ते खाए।

9 तुस विश्वासे मां मज़बूत भोइतां तैसेरो मुकाबलो केरा, तैन विश्वासी लोकन याद रख्खा जैना दुनियारे अलग-अलग टैरन मां आन, तैना भी तुशशो ज़ेरो दुःख झैल्लने लोरेन।

10 हुनी परमेशर जै सारे अनुग्रहे सेइ भेरतां, तैने अस हमेशारी महिमा मां शामिल भोनेरे लेइ चुनोरेम किजोकि इशशो रिशतो यीशु मसीह सेइ आए। थोडे वक्तेरे दुःख झैल्लनेरे बाद परमेशर तुसन सही बनालो ताके तुसन मां कोई गलती न राए, तै तुशशे दिलन मज़बूत केरेलो ताके तुस मज़बूती सेइ तैस पुइ विश्वास केरथ।

11 तै शेक्ति सेइ हमेशा राज़ केरेलो। आमीन।

XXXXXXXXXX

12 मीं सिलवानुसरे मद्दती सेइ ई निकड़ी ज़ेरि चिट्ठी लिखी ते तुसन जो भेज़ी, अवं तैस ज्ञानताई तै मसीह मां वफादार दला आए, मेरे लिखनेरो मकसद ई आए कि तुशशो होसलो बधेई ते याकीन दवेई कि जै तजरबो तुस केरने लोरोरेथ तै सच्चे परमेशेरे अनुग्रहोरो अक हिस्सो ए, इस अनुग्रहे मां मज़बूती सेइ बनोरे राथ।

13 बाबैल नगरेरे विश्वासी जैना परमेशेरे चुनोरेन ठीक तेन्चरे जेन्चरे तुस चुनोरेथ, तैना तुसन जो नमस्कार ज़ोतन। मरकुस जै मेरे मट्टेरो ज़ेरोए तुसन जो नमस्कार ज़ोते।

14 मसीहेरे प्यारे सेइ एक्की होरि जो नमस्कार केरा। अवं प्रार्थना केरताई परमेशर तुसन सेब्बन जैन केरो रिशतो मसीह सेइ साथी शान्ति दे।

2 पतरस

????????????

1 अवं शमोन पतरस, यीशु मसीहेरो दास ते पूरैरित आई, अवं तुश्शे सेब्बी केरे लेइ लिखने लोरोई, तुस भी तैस कीमती विश्वासे मां शामलथ जै अस केरतम, ई विश्वास असन यीशु मसीह, इश्शे परमेशर ते मुक्ति देनेवाले जिरिये दित्तो जेव, जै असन धर्मी बनाते।

2 अवं पुरार्थना केरताई जेन्चरे तुस परमेशरेरे ते प्रभु यीशुएरे ज्ञाने मां बद्धते गाथ, परमेशरे तुसन अनुग्रह ते शान्ति जादे करां जादे दे।

????????????????????

3 परमेशर अपने शक्ति सेई असन तैन सब दितोरू जैन असन परमेशरे खुश केरनेरी जिन्दगी जीनेरे लेइ लोइते। इन भोइ बटते किजोकि अस परमेशरे ज्ञानतम कि तैने अस अपने महिमा ते अपने रोडे गुना केरे मुताबिक तैसेरे लोक भोनेरे लेइ कुजोरेम।

4 इन सेब्बी केरे जिरिये परमेशरे असन महान ते कीमती वरदानां दितोरन जैन केरो तैनी वादो कियोरो थियो, इन वरदानां इस्तेमाल केरतां अस दुनियारी बुरी इच्छान करां बेची बटतम, जैना लोकन नाश केरतिन, ते अस परमेशरेरे स्भावे मां शामिल भोइ बटतम।

5 एल्हरेलेइ तुसेई न सिर्फ यीशु पुइ विश्वास कियोरो लोडे, बल्के होरि केरे लेइ भलाई केरनेरे लेइ सखत मेहनत भी कियोरी लोडे, तुसेई न सिर्फ तैन कियोरो लोडे जैन रोडू भोए, बल्के तुसेई एरे लोक बनोरू लोडे जैना ज्ञातन समझदैरी सेई केन्चरे बर्ताव केरतन,

6 तुसेई सिर्फ इन न लोडे ज्ञानोरू कि समझदैरी सेई केन्चरे बर्ताव केरतन, पन तुसेई अपनो आप कैवू भी कियोरो लोडे, तुसेई न सिर्फ अपनो आप कैवू मां लोडे कियोरो, बल्के मुसीबत मां सबर भी कियोरी लोडे, तुसेई न सिर्फ मुसीबत मां सबर कियोरी लोडे बल्के तुसेई एरी जिन्दगी भी जीयोरी लोडे जैस सेई परमेशर खुश भोए।

7 तुसेई न सिर्फ एरी जिन्दगी जीयोरी लोडे जैस सेई परमेशर खुश भोए, बल्के तुसेई एक्की होरि विश्वासी लोकन सेई अपने टब्बरेरे लोकां केरो जेरो प्यार भी कियोरो लोडे, तुसेई एक्की होरि सेई न सिर्फ अपने टब्बरेरे लोकां केरो जेरो प्यार कियोरो लोडे बल्के तुसेई सैरी लोकन सेई प्यार कियोरो लोडे।

8 अगर तुस एन्चरे जीले त तुस इश्शे प्रभु यीशु मसीह ज्ञानेले ते तुस इस्तेमाल भोनेवाले ते फलदार भोले।

9 पन अगर कोन्वी मां इना गुण न भोन त तै एरे मैनेरो जेरोए जै कानोए, ते तैने बिसरोरूए कि परमेशरे ते तैसेरे पुराने पापन करां साफ कियोरोए।

10 एल्हरेलेइ हे द्वाव ते बेइनव, एन्चरे कम केरनेरे लेइ होरि जादे मेहनत केरा, जैस सेई तुस अपनो आप साबत केरा कि परमेशरे तुस हकीकति मां तैस पत्ती चलनेरे लेइ चुनोरैथ ते तैसेरे लोक भोनेरे लेइ चुनोरैथ। अगर तुस इना गुणा केरे मुताबिक केरेले त तुस कधी मसीह पुइ भरोसो केरनो न शारैले।

11 ते परमेशर भी तुसन तैस राज्जे मां बडे जोशे सेई कबूल केरेलो जैडी यीशु मसीहे, जै इश्शो प्रभु ते इश्शो मुक्ति देनेवालोए, तै राजेरो जेरो हमेशा राज केरेलो।

????????????

12 चाए तुस इना सैरी गल्लां ज्ञानतथ, ते सच्चि शिक्षा तैस मां तुस मजबूती सेई बनोरै रातथ, जै लोकेई तुसन शिखालोरी, अवं तैन केरे बारे मां लगातार याद किरैइलो।

13 अवं ज्ञानताई ज्ञांतगर अवं जीतोई, तैन केरे बारे मां लगातार तुसन ज़ोनू सही आए, ताके तुस तैन न बिसरथ।

14 किजोकि अवं ज्ञानताई, अवं जल्दी मरनोई, किजोकि इशे प्रभु यीशु मसीहे मीं एल्हेरे बारे मां साफ ज़ोवरूए।

15 एल्हेरेलेइ अवं इना गल्लां केरे बारे मां ज़ोनेरी बडी कोशिश केरताई, ताके तुस मेरे मरनेरां पत्ती इना सैरी गल्लां याद केरि बटथ।

~~~~~

16 ज़ैखन असेई प्रेरितेई तुसन अपने प्रभु यीशु मसीहेरी शक्ति ते एजनेरी खबर शुनावरी थी, त असेई च़लैकी सेइ बनेवरी कहैनी न ज़ोई बल्के असेई मसीहेरी तैस महिमारे बारे मां ज़ोवं ज़ै असेई अपने एच्छेई सेइं लाई।

17-18 ज़ैखन अस तैस सेइं साथी पवित्र पहाड़े पुड़ थिये ज़ैखन बाजी परमेशेरे तैस आदर ते महिमा दिती। तैस वक्ते परमेशेरे करां तैस महान महिमाई मरां आवाज़ आई, “इन मेरू ट्लारू मट्टए ज़ैस सेइं अवं खुश आई।” असेई एप्पू ई आवाज़ स्वर्गोरां शुनी।

19 अस नेबी केरू वचन भी ज्ञानतम, ज़ैन तैनेई मसीहेरे बारे मां ज़ोवं तैन बिलकुल सच्च़े, तैना इस बारे मां पक्कू केरतन ज़ैन असेई तुसन तैसेरे वापस एजनेरे बारे मां शिखालू। तुसेई तैना गल्लां ध्याने सेइं शुनोरी लोड़न, ज़ेन्च़ेरे दीयो आंधरे मां बलते ते लोकन सही बत्तां गानेरे लेइ मद्दत केरते, इन वचन तुशशी इन ज़ान्नेरे लेइ मद्दत केरेलू कि सच्च़ कुने। तुसेई तैन वचन रोड़े च़ारे शुनोरे लोड़न ज़ांतगर इशो प्रभु यीशु मसीह वापस न एज्जे। तैसेरू एजनू एरू भोलू ज़ेन्च़ेरे नंवे दिहैड़ी ली भोली, ते तै झेझेरे तारेरो ज़ेरो भोलो। तैस वक्त तैसेरी लौ तुशशे दिलन मां चमकेली त कने तुसन पुड़ परमेशेरे बांदी केरेली।

20 पन इन ज़रूरी कि तुस नेबी केरू वचन ज़ैन तुस पवित्रशास्त्रे मां पढतथ, तैन वचन तैन केरे अपने खियाल नई।

21 किजोकि कोई भी भविष्यवाणी मैन्हु केरे मेर्ज़ी सेइं न भोइ, पन भक्त लोक पवित्र आत्मा अगवैई सेइं परमेशेरे तरफां सन्देश ज़ोते थिये।

## 2

~~~~~

1 ते ज़ेन्च़ेरे बड़े पेइले इसराएली लोकन मां झूठे नबी थिये, तेन्च़ेरे तुसन मां भी झूठे उस्ताद भोले। तैना बल्हे च़ारे तुसन मां एज्जले ते परमेशेरे बारे मां नाश केनेबालू झूठ ज़ोले। इडी तगर तैना मसीहेरो इन्कार केरेले कि तै प्रभु नई ज़ैने तैना पापन करां आज़ाद किये। एन्च़ेरे केने सेइं तैना एप्पू पुड़ विनाश आनेले।

2 परमेशेरे बड़े लोक तैन इन झूठे उस्तादां केरे बुरे कम्मां केरि नकल केरेले, ते तैन बुरां कम्मां केरे वजाई सेइं सच्च़े बतावे खलाफ बुरी गल्लां ज़ोले।

3 इना उस्ताद बड़े लालच़ी भोले ते तैना तुसन बनेवरी कहैनी शुनेइतां तुसन धोखो देले, ताके तुसन करां पेइंसो हासिल केरन। परमेशेरे बड़े पेइले ई फैसलो कियारो कि तैन सज़ा दे ते तै इन केनेरे लेइ तियार भी आए, तैसेरे एजने मां किच्छ भी च़िर नई, ते तैन केरो विनाश बलगतोए। तै पक्को तैन नाश केरेलो।

4 तुस ज्ञानतथ बड़े पेइले किच्छ स्वर्गदूतेई परमेशेरो हुक्म न मन्नो, ज़ैन तैनेई कियू तैसेरेलेइ परमेशेरे तैन सज़ा दिती। तैने तैना नरके मां छ़ड्डे, ते तैस दिहैड़ी तगर आंधरे मां कैद किये ज़ांतगर ते तैन केरो इन्साफ न केरे ते तैन सज़ा न दे।

5 तुस इन भी ज्ञानतथ ज़ैना लोक बड़े पेइले इस दुनियाई मां ज़ीते थिये तैनेई परमेशेरो डर न मन्नो, परमेशेरे तैन केरां बुरां कम्मां नज़रानदाज़ न कियां। बल्के तैनी पानी भेजतां तैन सज़ा दिती ज़ैस मां सारी धरती छ़प्पी ते तैना सारे नाश भोए। पन तैन तैन मरां नूहे समेत अठ लोक बचाए, ज़ैने धार्मिकतारो प्रचार कियो।

6 परमेशेरे सदोम ते अमोरा नगरन सजा दिती, तैना भस्म भोइतां मांजन बना, एन केरतां परमेशेरे लोक खबरदार किये, कि जैना तैसेरे हुक्म न मनन तैन सेइं भी एरू भोल्तू।

7 पन सदोम ते अमोरा नगरन नाश केरने करां पेइले तैने धर्मी लूत नगरे करां बेइर कढो ते बच्चाव। लूत तैन लोकन सेइं खुश न थियो किजोकि तैना कोई भी कानून न थिये मन्ते ते बेशर्म कम्मां केरते थिये।

8 (लूत धर्मी मैन्हु थियो, पन तै रोज तैन बुरे लोकन मां रातो थियो, एल्हेरेलेइ जैन बुरी गल्लां तै शुनतो थियो ते हेरतो थियो तैन सेइं तैसेरो रोडो दिल बडो दुखी भोतो थियो)।

9 इन सैरी गल्लां जैना परमेशेरे कियोरिन इन हिरैतिन कि प्रभु परमेशर अपने धर्मी लोकन तैन केरे मुसीबतरे वक्त तैन सम्भालेलो, ते इन्साफेरे दिहाडे तगर बुरे लोकन सजा देतो रातो।

10 परमेशर तैन झूटे उस्तादन पक्की सजा देलो, जैना इना गल्लां अपने गलत ते बुरी खवैइशन सेइं केरतन, ते तैना परमेशेरे अधिकारे जै तैन पुडे घटया समझतन, ते तैना ढीठ ते घमण्डी आन। तैना स्वर्गेरे प्राणेरी केरे बारे मां बुरू ज़ोने करां न डरन।

11 स्वर्गदूतां केरे बारे मां सोचा, तैना तैन झूटे उस्तादन करां बडे शेक्ति बालेन। तैना जैखन इन झूटे उस्तादन पुड़ परमेशेरेरी हज़ूरी मां दोष लातन, त गलत ज़बान इस्तेमाल न केरतन।

12 पन इना झूटे उस्ताद जंगली जानवरां केरे ज़ेरन, इना जानवर न ज्ञानन केन्चरे सोचोरू लोडे तैन केरो मकसद सिर्फ ट्लानू ते मारनू भोते। इन लोक भी जैन तैन केरे मने मां एइते तैन केरतन, ते जैन गल्लन न समझन तैन केरे बारे मां बुरू ज़ोतन, तैना पक्के नाश भोनेन।

13 तैन नाश भोन् तैन केरे कियोरि नुकसानेरो इनामे। तैन भर दूपार्न एश केरनो रोडो लगते, तैना तुसन मां कलंक ते दाग आन। इडी तगर कि तैना तुसन सेइं धामन मां खातन-पीतन फिरी भी धोखो देने मां खुश भोतन।

14 तैना जैस कुआन्शी भी लातन तैस सेइं बदमाशी केरनि चातन। तैना पाप केरने लेइ मौके तोपने कधी न शारन। तैना तैन लोकन धोखो देतन जैना मसीह पुड़ मजबूती सेइं विश्वास न केरन ते तैन पापे मां नेतन। तैन केरि जादे करां जादे बुरी इच्छां केरे वजाई सेइं परमेशर तैन सजा देलो।

15 तैनेई सही केरनू बंद कियोरूए, ते तैनेई तेन्चरे बुरां कम्मां केरनां शुरू कियां जेन्चरे बडे पेइले बओरेरे मट्टे बिलामे कियोरं थियां। तैनेई बुरी चीज़ां केरतां पेइंसे कमाने पसंद किये।

16 परमेशेरे तै तैसेरे बुरैइरे लेइ डांटो जै तैनी कियोरी थी, तैसेरे गेधां मैन्हु केरि भाषाई मां गल की ते नवी गलत केरने करां रोको।

17 इन झूटे उस्ताद शुक्कोरे खूआं केरे ज़ेरे बेकार आन, ते तैना बेफैइदी बिदलारे ज़ेरे आन, जैस झइ भोने करां पेइले हवा दूर उडारती। परमेशेरे तैन केरे लेइ एरी ठार तियार कियोरी जै बिलकुल आंधरीए।

18 जैखन तैना लोकन शिखालतन त तैना बेकार ते घमण्डी लफ़ज इस्तेमाल केरतन, तैना लोकन ज़ोतन कि तैना बेइज़त चीज़ां केरि बटतन जैना तैन केरे जिसम केरने चातन, तैना लोकन धोखो देइतां पाप करातन जैना इस किसमेरी बुरी जिन्दगी करां बच्चोरेन।

19 तैना तैन लोकन सेइं ई वादो केरतन अगर तैना तैन केरि मनन, त तैना जैन चातन तैन केरि बटतन, किजोकि तैन केरो कोई मालिक नई। पन इन सच्चे, तैन एप्पू भी अपने बुरे रूवाजां केरे गुलामन, किजोकि जै कोई चीज़ केरनेरो आदी त तै तैस केरनेरो गुलाम बनते।

20 जैखन लोकेई यीशु मसीह तैन केरो प्रभु ते मुक्ति देनेबालोए पिशानो, त तैना दुनियारे बुरैई करां छुटोरे थिये। पन तैना फिरी तैन बुरी चीज़ां केरने मां शामिल भोए ते तैना बुरी चीज़ां तैन केबू केरतन, ते तैन केरि आखरी हालत पेइली हालती करां भी बुरी भोइ।

21 ज़ोनेरो मतलब ई आए, किजोकि जैन लोकेई मसीह पुड़ विश्वास केरनो शारो, परमेशर तैन, तैन लोकन करां जादे सजा देलो, जैनेई कधे विश्वास नई कियोरो, तैन लोकां केरे लेइ रोडू भोथू

?????? ?? ??????? ???

14 एल्हेरेलेइ, हे ट्लारव, जेन्चरे तुस तैस दिहैडी बलगने लोरेथ जेइस परमेशर इस दुनियारो इन्साफ केरलो, त तुस पूरी कोशिश करा कि तुस शैन्ति सेइं परमेशरेरे नजरी मां शुद्ध ते वेइलजाम भोथ ।

15 ते इश्शे प्रभुएरे सबरारे वारे मां सोचा तैने तुसन मौको दित्तो, कि तुस एजनेवाले इन्साफे करां बन्नथ । इन इश्शे ट्लारे विश्वासी सैथे पौलुसे भी तुश्शे लेइ तैस समझारे मुताबिक अपने चिट्ठी मां लिखोरू जै परमेशरे तैस दित्तोरिए ।

16 तैने अपने सैरी चिट्ठन मां जैना तैने विश्वासी लोकन जो लिखी, इना सैरी गल्लां तुसन लिखी । पन किछ तैसेरी लिखोरी गल्लां समझनी मुश्किल आन । तैन लोकां केरे लेइ जैनेई रोडे चारे नई पदोरू जैन इस वारे मां पक्को पतो नई कि तैना कुन विश्वास केरतन, तैना गलत तरीके सेइं इन मुश्किल गल्लां केरे मतलब कढतन, जेन्चरे तैना पवित्तरशास्त्रेरी किछ गल्लां केरो गलत तरीके मतलब समझातन । एन्चरे केरने सेइं तैना अपनो आप इस काबल बनातन कि परमेशर तैन नाश केरे ।

17 एल्हेरेलेइ, हे ट्लारव तुस पेइले ज्ञानतथ कि इना गल्लां भोनिन, एल्हेरेलेइ तुस हुशार राथ ताके जैना लोक कानूने न मनन तैना तुसन झूठ ज़ोइतां धोखो न देन, ते तुस सेच्चरी गल्लन विश्वास केरनो शारथ ।

18 पन तुस इश्शे प्रभु ते मुक्ति देनेवाले यीशु मसीहेरे अनुग्रह ते ज्ञाने मां बद्धते गाथ । तैसेरी महिमा हुन्ना भी भोए, ते हमेशा भोती राए । आमीन ।

1 यूहन्ना

?????????? ???

1 अस तैस एककी वचनेरे (मैनेरे) बारे मां लिखने लोरेम जै ज़िन्दगरो वचन आए, जै शुरु करा थियो, जै असेई शुनो, ते जै अपनि एछ्छेई सेइ लाव, बल्के जै असेई ध्याने सेइ लाव, ते तैस सेइ अपने हथ लाए।

2 (ई ज़िन्दगी बांदी भोइ, ते असेई लाई, ते अस तैसेरी गवाही देतम, ते तुसन तैस हमेशारी ज़िन्दगरी खबर शुनातम, जै बाजी सेइ साथी थी, ते असन पुइ बांदी भोइ)।

3 जैन किछ् असेई यीशुएरे बारे हेरू ते शुनू तैसेरी खबर तुसन भी देतम, एल्हेरेलेइ कि तुस भी असन सेइ साथी शामिलत, ते इशशी ई शामिलत बाजी सेइ साथी, ते तैसेरे मट्टे यीशु मसीह सेइ साथीए।

4 ते इना गल्लां अस एल्हेरेलेइ लिखतम, कि इशशी खुशी पूरी भोए।

???? ???? ?????

5 जै खबर असेई प्रभु यीशु करां शुनी, ते तुसन शुनातम, तै ईए; कि परमेशर लोअरो ज़ेरो शुद्धे, ते तैस मां किछ् भी आंधरू (बुराई) नई।

6 अगर अस ज़ोम, कि तैस सेइ साथी इशशी शामिलते, ते फिरी आंधरे मां चलतम, त अस झूठेम, ते सच्चे पुइ न चलम।

7 पन अगर ज़ेन्चरे परमेशर लोई मांए, तेन्चरे अस भी लोई मां जीम, त एककी होरि सेइ शामिल रातम ते तैसेरे मट्टे यीशु मसीहेरो खून असन सेबमी पापन करां शुद्ध केरते।

8 अगर अस ज़ोम, कि असन मां कोई पाप नई, त अपने आपे धोखो देतम, ते असन मां सच्चे नई।

9 अगर अस अपने पाप मन्तम, त तै इशशे पाप माफ़ केरने, ते असन सेबमी अधर्मे करां शुद्ध केरने मां वफादार ते धर्मीए।

10 अगर अस ज़ोम कि असेई पाप नई कियोरो, त परमेशरे झूठो ठहरातम, ते तैसेरू वचन असेई कधी कबूल नई कियोरू।

2

???? ???? ?????? ?????????? ??

1 हे मेरे टलारे बच्चव, अवं इना गल्लां तुसन एल्हेरेलेइ लिखताई, कि तुस पाप न केरा, ते अगर कोई पाप केरे, त बाजी परमेशरे कां इशशो अक मद्दतगारे, मतलब धर्मी यीशु मसीह।

2 तै इशशे पापां केरो छुटकारेरे लेइ बलिदान भोव, ते सिर्फ इशशे लेइ नई, बल्के सैरी दुनियारे पापां केरे लेइ भी।

3 अगर अस तैसेरे हुक्मन मन्म, त इस सेइ अस समझे गाले कि अस तैस ज्ञानतम।

4 जै कोई इन ज़ोते, "कि अवं तैस ज्ञानताई," ते तैसेरे हुक्मन न मन्ने, तै झूठोए, ते तैस मां सच्चे नई।

5 पन जै कोई तैसेरे वचने पुइ चलते, त तैस मां सच्चे परमेशेरो प्यार सिद्ध भोरोए, असन इस सेइ पतो चलते, कि अस तैस मां आम।

6 जै कोई इन ज़ोते, कि अवं तैस मां बनोरो राताई, त तैनी तेन्चरे ज़ीयोरू लोडे ज़ेन्चरे यीशु मसीहे ज़ीयोरूए।

????????? ?????

7 दूलाख, अवं तुसन कोई नंब्वो हुक्म न लिखी, पन तैए पुरानो हुक्म जै पेडलो तुसन मैल्लो; ई पुरानो हुक्म तैन वचने, जैखन तुसेई मसीह पुड विश्वास कियुं।

8 फिरी भी अवं तुशे लेड नंब्वो हुक्म लिखताई, किजोकि एन सच्च आए, जैन मसीह मां ते तुसन मां भी लेडहोवं, किजोकि अन्धकार मिटतो गाते ते सच्चैरी लो हुनी चमकने लोरीए।

9 जै इन ज्रोते, कि अवं लोई मां आई ते विश्वासी दूलाए सेई बैर रखते, तै हेजू तगर आंधरे मां आए।

10 जै कोई अपने दूलाए सेई प्यार करते, तै लोई मांए, तैसेरेलेड पाप केरनेरे लेड कोई वजा नई।

11 पन जै कोई अपने दूलाए सेई बैर रखते, तै आंधरे मांए, ते तै आंधरे मां जलते; ते न ज्ञाने, कि कोरां गाते, किजोकि आंधरे तैसेरी एछूछी कैनी कररिन।

12 हे बच्चाव अवं तुसन एल्हेरेलेड लिखताई, कि यीशु मसीहेरे नंब्वे सेई तुशे पाप माफ भोए।

13 हे बुजुर्गव अवं तुसन एल्हेरेलेड लिखताई, कि जै शुरू करां आए तुस तैस ज्ञानथ, हे जवानव, अवं तुसन एल्हेरेलेड लिखताई कि तुसेई तैस शैताने पुड ज्ञीत हासिल करीए, हे बच्चाव अवं तुसन एल्हेरेलेड लिखताई कि तुसेई बाजी परमेशर पिशानो।

14 हे बाजव, अवं तुसन एल्हेरेलेड लिखताई, कि जै पेडलोए तुसेई पिशानो, हे जवानव, अवं तुसन एल्हेरेलेड लिखताई, कि तुस मजबूतथ, ते परमेशेरू वचन तुसन मां बनोरू रहते, ते तुस शैताने करां ज़ीतोरेथ।

????????????????????????????????

15 तुस न दुनियाई सेई ते न दुनियारी चीजन सेई प्यार केरा, अगर कोई दुनियाई सेई प्यार करते, त तैस मां बाजी परमेशेरु प्यार नई।

16 किजोकि जैन किछ दुनियाई मां आए, मतलब जिसमेरी खुवैडश, ते एछूछी केरि खुवैडश ते जिन्दगरू घमण्ड, तैन बाजी परमेशेरु तरफां नई पन दुनियारे तरफां।

17 दुनिया ते तैसेरी खुवैडश दुइये मिटती गैतिन, पन जै परमेशेरु मेर्जी पुड जलते, तै सदा बनोरो रालो।

????????????????????????????????

18 हे बच्चाव, ई आखरी वक्ते कि मसीह वापस एज्जोए, ते जेन्चरे तुसेई शुनोरूए, कि मसीहेरी खलाफत केरनेबालो एज्जोबालोए, तैसेरे मुताबिक हुना भी बडे मसीहेरी खलाफत केरनेबाले उठोरेन, इस सेई अस ज्ञानतम, कि ई आखरी वक्ते कि मसीह वापस एज्जोए।

19 तैना मसीहेरी खलाफत केरनेबाले लोक निस्से त असने मरां, पन तैना असन मरां न थिये, किजोकि अगर असन मरां भोथे, त असन सेई साथी राथे, पन निस्से एल्हेरेलेड कि इन बांदू भोए कि तैना सब असन मरां नई।

20 पन मसीहेरे ज़िरिये तुसन पवित्र आत्मा दित्तोरोए, तैसेरे वजाई सेई तुस सब सच्च ज्ञानतथ।

21 मीं तुसन एल्हेरेलेड नई लिखोरू, कि तुस सच्च न ज्ञानथ, पन एल्हेरेलेड, कि तैस ज्ञानतथ, ते एल्हेरेलेड कोई झूठ, सच्चैरे पासेरां नई।

22 झूठो कौने? सिर्फ तै, जै यीशुएरू मसीह भोनेरो इन्कार करते, ते मसीहेरी खलाफत केरनेबालो तैए आए, जै बाजी परमेशेरु ते कने मट्टेरो यानी यीशुएरो इन्कार करते।

23 जै मट्टेरो इन्कार करते तैस कां बाजी परमेशर भी नई, जै मट्टे मन्ते, तैस कां बाजी परमेशर भी आए।

24 जैखन तुसेई यीशु मसीह पुड विश्वास कियुं, तुसेई जै सच्चैरी शिक्षा शुरू करां शुनोरोए, तैए तुसन मां बनोरी राए, त तुस भी मट्टे मां, ते बाजी परमेशेरु मां बनोरे राले।

25 ते जेसेरो वादो परमेशेरु कियोरोए, तै हमेशारी ज़िन्दगीए।

26 मीं इना गल्लां तुसन तैन करां खबरदार रानेरे लेड लिखी, जैना लोक तुसन झूठी शिक्षारे ज़िरिये टपलातन।

27 ते तुश्शू तैन अभिषेक, जैन तैसेरे तरफां केरूए, तुसन मां बनोरू रहते; ते तुसन एल्हेरी ज़रूरत नई, कि कोई तुसन शिखाले। बल्के जेन्चरे तैन अभिषेक जैन तैसेरे तरफां कियोरूए, तुसन सब गल्लां शिखालते, ते इन सच्चे, ते झूठ नई, ते जेन्चरे तैने तुसन शिखालोरूए, तेन्चरे तुस तैस मां बनोरे रातथ।

????????????

28 हे बच्चव, तैस मां बनोरे राथ, कि जैखन इन बांदू भोए, त असन दिलेरी भोए ते अस तैसेरे एजने पुड़ तैसेरे सामने शरमिनदे न भोम।

29 अगर तुस ज्ञानतथ, कि मसीह धर्मीए, त इन भी ज्ञानतथ, कि जैना धार्मिकतारां कम्मां केरतन, तैना परमेशेरे बच्चेन।

3

1 हेरा वाजे परमेशेरे असन सेइं केरो प्यार कियो, कि असन जो परमेशेरे बच्चे ज़ोन, ते अस अहम भी, एल्हेरेलेइ दुनियारे लोकेई अस न पिशाने कि अस परमेशेरे बच्चेम, किजोकि तैनेई वाजी परमेशर भी न पिशानो।

2 हे ट्लारव, हुनी अस परमेशेरे बच्चेम, ते हेजू तगर इन बांदू नई भोरू, कि अस केरे भोनेम! इन ज्ञानतम, कि जैखन यीशु मसीह बांदो भोलो त अस भी तैसेरे जेरे भोमेले, किजोकि तैस तेरहे लहमेले जेरो तै आए।

3 ते जै कोई भी मसीह पुड़ ई उमीद रखते, तै अपनो आप तेरहो पवित्तर केरते, जेरो मसीह पवित्तर आए।

4 जै लगातार पाप केरतो रहते, तै मूसेरे कानूनेरो इन्कार केरते, ते पाप त कानूनेरो इन्कार केरनो।

5 ते तुस ज्ञानतथ, कि यीशु मसीह एल्हेरेलेइ अव, कि पापन दूर केरे, ते तैस मां पाप नई।

6 जै तैस मां बनोरो रहते, तै लगातार पाप न केरे, जै लगातार पाप केरते, तै न समझे कि मसीह कौन आए, ते न तैसेरो तैस सेइं रिशतोए।

7 ट्लारे बच्चव, केन्चरे धोखे मां न एजाथ, जै धार्मिकारां कम्मां केरते, तैए मसीहेरो जेरो धर्मीए।

8 जै कोई लगातार पाप केरते, तै शैतानेरे तरफांए, किजोकि शैतान शुरुआती करां पाप केरतो ओरोए, परमेशेरू मट्टू एल्हेरेलेइ अव, कि शैतानेरे कम्मन खतम केरे।

9 जैना परमेशेरे बच्चेन तैना लगातार पाप न केरन, किजोकि परमेशेरो सुभाव तैन मां बनोरू रहते, ते तैना पाप केरि न सकन, किजोकि तैना परमेशेरे बच्चेन।

10 इस्से सेइं परमेशेरे बच्चे, ते शैतानेरे बच्चे पिशीनोतन, जैना धार्मिकता कम्मां न केरन, तैना परमेशेरे सेइं नई, ते न ते जै अपने द्वाए सेइं प्यार न केरे।

??????

11 जै खबर तुसेईं पडली शुनी, तै ईए, कि अस एक्की होरि सेइं प्यार रखम।

12 ते आदमेरे मट्टेरे कैनेरे जेरे न बनम, जै तैस शैताने सेइं थियो, ते जैने अपनो द्वाला मारो, ते तै कोस वजाई सेइं मारो! एल्हेरेलेइ कि तैसेरां कम्मां बुरां थियां, ते तैसेरे द्वालाएं कम्मां रोड़ां थियां।

13 हे द्वालाव, अगर दुनियारे लोक तुसन सेइं बैर केरते त हैरान न भोथ।

14 अस ज्ञानतम, कि अस मौती करां पार भोइतां जिन्दगी मां पुजोरेम, किजोकि अस द्वालान सेइं प्यार रखतम। जै प्यार न रखे, तै मौतेरे हालती मांए।

15 जै अपने द्वालाए सेइं बैर केरते, तै खूनी आए, ते तुस ज्ञानतथ, कि कोन्ची खूनी मां हमेशारी जिन्दगी न राए।

16 असेईं प्यार इस्से सेइं ज्ञानो, कि यीशु मसीहे इश्शे लेइ अपने प्राण दिते, एल्हेरेलेइ इश्शो भी द्वालां केरे लेइ प्राण देने फज्र।

17 पन जैस कां दुनियारी जेइदाद भोए, त तै अपने द्वालाए जैस ज़रूरत भोए, तैस हेरतां तैस पुड़ तरस खानो न चाए, त तैस मां परमेशेरो प्यार केन्चरे बनोरो रेइ बटते?

18 हे ट्लारे बच्चव, अस सिर्फ वचन ते जुवानी सेइ नई, पन कम्मन ते सच्चे सेइ भी प्यार केरम ।

~~~~~

19 ज़ेखन अस होरन सेइ प्यार केरमेले एस्से सेइ अस ज्ञानमेले, कि अस सच्चेरेम, ते ज़ैस गल्ली मां इश्शो ज़मीर असन दोष लाए, तैसेरे बारे मां अस तैसेरे सामने अपने-अपने मने याकीन देइ बटमेले ।

20 किजोकि परमेशर इश्शे मने करां बड़डोए, ते सब किछ् ज्ञानते ।

21 हे ट्लारव, अगर इश्शो मन असन दोष न दे, त असन परमेशरेरे सामने दिलेरी भोतीए ।

22 ते ज़ैन किछ् अस मगतम, तैन असन तैस करां मैलते, किजोकि अस तैसेरे हुक्म मन्तम, ते ज़ैन तैस पसंदे तैन केरतम ।

23 ते तैसेरो हुक्म ईए कि अस तैसेरे मट्ठे यीशु मसीहेरे नव्हे पुड़ विश्वास केरम ते ज़ेन्चरे तैने असन हुक्म दित्तो तैसेरे मुताबिक एक्की होरि सेइ प्यार केरम ।

24 ते ज़ैना परमेशरेरो हुक्म मन्तन, तैना परमेशरे मां, ते परमेशर तैन मां बनोरो रहते, ते इस्से सेइ, मतलब तैस पवित्तर आत्मा सेइ ज़ै तैने असन दित्तोरोए, अस ज्ञानतम, कि तै असन मां बनोरो रहते ।

## 4

~~~~~

1 हे ट्लारव, हर एक्की मैनेरू याकीन न केरा ज़ै दावो केरते कि परमेशरेरी आत्मा तैस मां आए, बल्के आत्मां अज़माथ कि तै परमेशरेरी तरफांए कि नई; किजोकि बड़े झूठे नबी दुनियाई मां निसोरेन ।

2 परमेशरेरी आत्मा तुस इस रीति सेइ पिशैनी बटतथ, कि ज़ै आत्मा इन मन्ने, कि यीशु मसीह जिसमे मां ओरोए तै परमेशरेरे तरफांए ।

3 ते ज़ै आत्मा यीशु न मन्ने, तै परमेशरेरे तरफां नई, ते तैए मसीहेरी खलाफत केरनेवाली आत्माए, ज़ेसेरे बारे मां तुसेई शुनोरू, कि तै एजने वालीए, ते अज़ भी दुनियाई मां आए ।

4 हे ट्लारे बच्चव, तुस परमेशरेरे लोक आथ, ते तुसेई तैन झूठन पुड़ ज़ीत हासिल कियोरीए, किजोकि पवित्तर आत्माारी शक्ति ज़ै तुसन मांए तै शैतानेरे शेक्ति करां बड़डी, ज़ै दुनियाई पुड़ राज़ केरते ।

5 तैना झूठे नबी दुनियारेन, एल्हेरेलेइ तैना दुनियारी गल्लां ज़ोतन, ते दुनियारे लोक तैन केरि शुन्तन ।

6 अस परमेशरेरेम, ज़ै परमेशरे ज्ञानते, तै इश्शी शुन्ते, ज़ै परमेशरे न ज्ञाने तै इश्शी न शुने, एल्हेरेलेइ अस तैस आत्माई ज़ै सज़ ज़ोतीए ते ज़ै आत्मा झूठे ज़ोतीए पिशानतम ।

~~~~~

7 हे ट्लारव, अस एक्की होरि सेइ प्यार केरम; किजोकि प्यार परमेशरे करां आए, ज़ै कोई प्यार केरते, तै परमेशरेरो बच्चोए, ते परमेशरे ज्ञानते ।

8 ज़ै होरन सेइ प्यार न केरे, तै परमेशरे न ज्ञाने, किजोकि परमेशर प्यारे ।

9 ज़ै प्यार परमेशरे असन सेइ केरते, तै इस सेइ बांदो भोव, कि परमेशरे अपनू अकैल्लू मट्ठू दुनियाई मां भेज़्, कि तैस पुड़ विश्वास केरने सेइ असन हमेशारी ज़िन्दगी मैल्ले ।

10 प्यार इस सेइ नई कि असेई परमेशरे सेइ प्यार कियो, पन इस मां आए, कि तैने असन सेइ प्यार केरो, ते इश्शे पापां केरे छुटकारेरे लेइ अपनू मट्ठू भेज़् ।

11 हे ट्लारव, ज़ेखन परमेशरे असन सेइ एरो प्यार कियो, त असेई भी एक्की होरि सेइ प्यार कियोरो लोडे ।

12 परमेशर कधी केन्चे नई लवरो; अगर अस एप्पू मामेई प्यार रखम, त परमेशर असन मां बनो रहते; ते तैसेरो प्यार असन मां सिद्ध भोरोए ।

13 इस सेइं अस ज्ञानतम, कि अस परमेशेरे मां बनो रातम, ते परमेशर असन मां, किजोकि तैने असन अपने आत्माई मरां दिती।

14 ते असेई हेरू भी, ते गवाही भी देतम, कि बाजी परमेशेरे, मट्टू दुनियाई मां मुक्ति देनेबालो केरतां भेजोरोए।

15 जै इन मन्ते, कि यीशु परमेशेरेरू मट्टूए, परमेशर तैस मां बनोरो रहते, ते तै परमेशेरे मांए।

16 ते जै प्यार परमेशर असन सेइं करते, ते असेई ज्ञानो, ते असन तैस पुड़ विश्वासे, परमेशर प्यारे, जै प्यारे मां बनोरो रहते, ते परमेशर तैस मां बनोरो रहते।

17 इस सेइं प्यार असन मां सिद्ध भोव, कि असन इन्साफेरे दिहैडी दिलेरी भोए, किजोकि जेरो तै आए, तेरे अस भी दुनिया मां अहम।

18 प्यारे मां डर न भोए, बल्के सिद्ध प्यार डरे दूर करते, किजोकि डेरो रिशतो सजाई सेइं भोते, ते जै डरते, तै प्यार मां सिद्ध नई।

19 अस परमेशेरे सेइं ते होरन सेइं एल्हेरेलेइ प्यार केरतम, कि पेडलो परमेशेरे असन सेइं प्यार कियो।

20 अगर कोई ज़ोए कि, “अवं परमेशेरे सेइं प्यार केरताई,” पन अपने दूलाए सेइं वैर रखे, तै झूठोए, किजोकि जै विश्वासी दूलाए सेइं जै तैने लोरोए प्यार न केरे, त परमेशेरे सेइं भी जै तैने लवरो नई, प्यार न केरि सके।

21 ते तैस करां असन ई हुकम मैलते, कि जै अपने परमेशेरे सेइं प्यार केरते, तै विश्वासी दूलाए सेइं भी प्यार केरते।

## 5

1 जेसेरो ई विश्वासे कि यीशु ही मसीहे, तै परमेशेरेरो बचोए, ते जै परमेशेरे सेइं प्यार केरते, तै तैस सेइं भी प्यार केरते, जैना परमेशेरे बच्चेन।

2 जैखन अस परमेशेरे सेइं प्यार केरतम, ते तैसेरे हुकमन मन्तम, त इस सेइं अस ज्ञानतम, कि अस परमेशेरे बच्चेन सेइं प्यार केरतम।

3 अस परमेशेरे हुकम मेन्तां तैस प्यार हिरातम, ते तैसेरे हुकम मुशकलन नई।

4 किजोकि जै परमेशेरो बचोए, तै दुनियाई पुड़ ज़ीत हासिल केरते, ते तै ज़ीत जैस सेइं दुनियाई पुड़ ज़ीत हासिल केरतम तै इश्शो विश्वासे।

5 दुनियाई पुड़ ज़ीत हासिल केरनेबालो कौने, सिर्फ तै जेसेरो ई विश्वासे, कि यीशु, परमेशेरेरू मट्टूए।

*~~~~~*

6 ईए तैए, जै पैनी ते खूनेरे ज़िरिये ओरो थियो; मतलब यीशु मसीह, तै न सिर्फ पैनी सेइं, बल्के पैनी ते खूने दुइयां केरे ज़िरिये ओरो थियो। ते ई आत्मा जै गवाही देतीए, किजोकि तै सच्चे।

7 ते गवाही देनेबाले टलाई आन

8 आत्मा, ते पानी, ते खून, ते टलेइयां केरि एककी गल्ली पुड़े गवाही देतन।

9 जैखन अस मैन्हू केरि गवाही मन्तम, त परमेशेरेरी गवाही त तैस करां भी बड्डीए, कि तैने अपने मट्टेरे बारे मां गवाही दिती।

10 जै परमेशेरे मट्टे पुड़ विश्वास केरते, तै अपने आपे मां ई गवाही रखते, जैने परमेशेरे पुड़ विश्वास न कियुं, तैने तै झूठो ठहराव, किजोकि तैने तैस गवाही पुड़ विश्वास न कियो, जै परमेशेरे अपने मट्टेरे बारे मां दितीरीए।

11 ते तै गवाही ईए, कि परमेशेरे असन हमेशारी ज़िन्दगी दिती, ते ई ज़िन्दगी तैसेरे मट्टे मांए।

12 जेसेरो रिशतो मट्टे सेइं आए तैस कां ज़िन्दगीए, ते जेसेरो रिशतो परमेशेरे मट्टे सेइं नई, तैस कां हमेशारी ज़िन्दगी भी नई।

*~~~~~*

13 मीं तुसन, जै परमेशेरे मट्टेरे नंवे पुङ्ग विश्वास केरतो भोए, एल्हेरेलेइ लिखताई, कि तुसन पतो लग्गे, कि हमेशारी ज़िन्दगी तुशशीए।

14 ते असन परमेशेरे सामने ई दिलेरी भोतीए, तै ईए; कि अगर अस तैसेरे मेर्जी सेइं किछ् मगतम, त तै इशशी शुनते।

15 ते अगर अस ज्ञानतम, कि जैन किछ् अस परमेशे करां मगतम, तैन असन मैलते।

16 अगर कोई विश्वासी दूलाए कोई एरो पाप केरतो लाए, जेसेरो नितीजो मौत न भोए, त बिनती केरे, ते परमेश तैसेरेलेइ, जैने एरो पाप कियोरोए जेसेरो नितीजो मौत नई, ज़िन्दगी देलो। पाप एरो भी भोतेए जेसेरो नितीजो मौते, एसेरे बारे मां अवं प्रार्थना केरनेरे बारे मां न ज़ोई।

17 सेब्भी किसमेरी बुराई त पापे पन एरो भी पापे, जैरेरो नितीजो मौत नई।

18 अस ज्ञानतम, कि जैना परमेशेरे बच्चेन, तैना लगातार पाप न केरन, पन परमेशेरू मट्टू यीशु तैस बच्चाते, ते शैतान तैसेरू किछ् न केरि सके।

19 अस ज्ञानतम, कि अस परमेशेरे सेइं अहम, ते सारी दुनिया तैस शैतानेरे कब्जे मां आए।

20 ते इन भी ज्ञानतम, कि परमेशेरू मट्टू यीशु मसीह इस दुनियाई मां ओरूए, ते तैने असन समझा दित्तोरीए, कि अस सच्चे परमेशेर पिशानम, ते अस तैस मां जै सच्चे मां आए, मतलब तैसेरे मट्टे यीशु मसीह मां बनोरे रातम, सच्चो परमेशेर ते हमेशारी ज़िन्दगी ईए।

21 हे बच्चव, हर अक तैस चीज़ी करां दूर राथ, जै तुशशे दिले मां परमेशेरेरी ठार नेतीए।

## 2 यूहन्ना

????????

1 अवं यूहन्ना कलीसियारो बुजुर्गां, तैस बेइन ते तैसेरे बच्चन ज़ैना परमेशरे चुनोरेन ई चिट्ठी लिखने लोरोई। ज़ैन सेइ अवं सच्चो प्यार करताई। सिर्फ अवं नई पन तैना सारे ज़ैना सच्चे ज्ञानतन तुसन सेइ प्यार करतन।

2 अस तुसन सेइ प्यार केरतम किजोकि अस सच्चो शिक्षाई पुड़ विश्वास केरतम, ते अस तैस शिक्षाई हमेशारे लेइ मन्ते राले।

3 बाजी परमेशर ते तैसेरे मट्टू यीशु मसीह असन अनुग्रह, दया, शान्ति देन। इना सब इशे लेइ आए अस ज़ैना सच्चे मन्तम ते एक्की होरि सेइ प्यारे केरतम।

??????

4 अवं बड़ा खुश भोव, ज़ैखन मीं तेरे किछ बच्चां केरे बारे मां शुनू कि तैना परमेशरेरे बच्चां चलने लोरेन, तैना तैन्ने केरने लोरेन ज़ैन इशे बाजी परमेशरे असन केरनेरे लेइ ज़ोरूए।

5 हुनी हे बेइन, अवं तीं कां मिनत करताई, असेई एक्की होरि सेइ प्यार कियोरो लोडे, ई अक नव्वो हुकम नई पन अक आदेशे ज़ै अस तैस वक्ते करां ज्ञानतम, जेइसेरू असेई यीशु मसीह पत्ती चलनू शुरु कियोरूए।

6 सच्चो प्यार ई आए ज़ैखन अस परमेशरेरे हुकम मन्तम। जेइसेरू तुसेई यीशु मसीह पत्ती चलनू शुरु कियोरू तेइसेरू तुसेई शुनेरू कि परमेशरे हुकम दित्तोरो, कि हमेशा एक्की होरि सेइ प्यार कियो लोडे।

7 अवं इन एल्हेरेलेइ ज़ोताई, किजोकि बडे लोक ज़ैना होरि लोकन झूठी शिक्षारे ज़िरिये धोखो देतन। तैना दुनियारे अलग-अलग टैरन मां जोरेन। तैना ज़ोतन यीशु मसीह मैनेरे रूपे मां नई ओरो, अगर कोई मैन्हु एन्चरे ज़ोते, त तै मसीहेरो खलाफत केरनेबालोए ज़ै हमेशा लोकन धोखो देते।

8 एल्हेरेलेइ तू अपने बारे मां खबरदार रा कि तैना लोक तीं धोखो न देन। ज़ै मेहनत परमेशरेरे सेवारे लेइ तीं की तै बेफैइदी न भोए, पन तुस तैना सैरी बरकतां हासिल केरेलो ज़ैना देनेरो वादो परमेशरे तुसन सेइ कियोरोए।

9 अगर कोई मैन्हु मसीहेरी शिक्षाई पुड़ लगातार न चले पन तैस मां होरू किछ ज़ोडते त तैसेरो रिशतो परमेशरे सेइ साथी नई, तैस कां परमेशर नई। पन अगर कोई मसीहेरी शिक्षाई मां बनोरो रहते, तैसेरो रिशतो बाजी परमेशर ते तैसेरे मट्टे यीशु मसीह सेइ भी आए।

10 अगर कोई तुशे सभाई कां एज्जे, ते मसीहेरे बारे मां ईए शिक्षा न दे, त तैस न अपने घरे मां एज्जे देथ, ते न तैस नमस्कार करतां होसलो न देथ।

11 किजोकि ज़ै कोई एरे मैन्हु जो नमस्कार करते, तै तैसेरे बुरे कम्मन मां शामिल भोते।

??????

12 बेइ गल्लां आन ज़ैना अवं तुसन सेइ ज़ोनी चाताई, पन अवं तैना एन्चरे चिट्ठी मां लिखनी न चैई। पन मीं उमीदे कि अवं तुसन कां एज्जेलो ते अस आमने-सामने भोडतां गल्लां केरमेले, तैखन अस पूरे तरीके सेइ खुश भोले।

13 तेरी चुनोरी बेइनारे बच्चे इड़ी ज़ैना परमेशरेरे चुनोरेन नमस्कार ज़ोतन।





## यहूदा

XXXXXXXXXXXXXXXXXXXX

1 अवं यहूदा यीशु मसीहरो सेवक ते कने याकुवेरो निकडो दला आई। अवं यहूदा ई चिट्ठी तुसन लोकन लिखने लोरोई, जैना परमेशेरे कुजवरथ कि तैस पुड़ विश्वास केरथ। बाजी परमेशर तुसन सेइं प्यार केरते ते यीशु मसीहेरे जिरिये तुस सुरक्षित आथ।

2 अवं प्रार्थना केरताई कि परमेशर तुसन दया ते शान्ति ते प्यार जादे करां जादे दे।

XXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXXX

3 हे टुलारव, अवं लिखनेरे लेइ हर मुमकिन कोशिश केरि रावरो थियो तैस (मुक्तेर) नंवे ज़िन्दगरे बारे मां जै यीशु मसीहेरे जिरिये परमेशेरे तरफां मैलतीए, जैस मां अस शामिल आम। पन हुना अवं इन जरूरी समझताई कि तुसन इस चिट्ठेरे जिरिये होलसो देई, ताके तुस मसीही विश्वास बनोरो रखनेरे लेइ बड़ी मेहनत केरि बटथ, परमेशेरे ई विश्वास अपने सेन्नी लोकां केरे लेइ एक्की बार दित्तोरुए, ते ई न बेदलोए।

4 किछ लोक जैना यीशु मसीह पुड़ विश्वास केनेरो दिखावो केरतन तैना तुशे कलीसियान मां शामिल भोरन। तैना परमेशेरी आदर न केरन ते तैना ई गलत शिक्षा देतन, कि परमेशेरे इशे पाप माफ़ कियोरन ते अस अधर्मी ज़िन्दगी जी बटतम। तैना यीशु मसीहरो इन्कार केरतन, जै इशे अक्के मालिक ते प्रभुए। बड़े पेइले पवित्रशास्त्र ज़ोते, परमेशेरे एरे ज़ेरे लोकन सज़ा देलो।

5 पन अगर तुसेई सब गल्लां एक्की बार ज़ैनोरिन, फिरी भी अवं तुसन इना गल्लां याद करैनी चाताई, कि प्रभुए इस्राएली लोक गुलैमी मरां आज़ाद किये, ते मिस्र मुलखे मरां कठे पन वादे मां तैने तैना मारे ज़ैनेई सुनसान ठारी मां तैस पुड़ विश्वास न कियो।

6 तुसेई तैन स्वर्गदूतां केरे बारे मां सोचोरु लोइ ज़ैना अपने पदे पुड़ खुश न थिये, जै परमेशेरे तैन दित्तोरु थियो, पन तैनेई स्वर्ग घर शारू; परमेशेरे तैना कधी न टलुटने बैली शंगलन सेइं बंधतां वुन आंधरे मां तैस महान दिहेड़ी तगर रखोरन, ज़ेइस तै तैन दोषी बनालो।

7 इना इस्राएली ते स्वर्गदूतां केरु ज़ेरु इन भी याद रखवा कि सदोम ते अमोरा नगरां ते कने आसेपासेरे नगरां केरे रानेबाले लोकन सेइं कुन भोवं। लोक अधर्मी भोए ते हर किसमेरी बदमाशी केरनेबाले थिये। एल्हेरेलेइ परमेशेरे तैना अगारे ज़िरिये भस्म किये। ज़ैन तैन सेइं भोवं ई तैन झूठे उस्तादां केरे लेइ खबरदारी आए कि तैन भी हमेशेरे अगारे ज़िरिये सज़ा मैल्लनीए।

8 तेन्चरे इना अधर्मी लोक ई दावो केरतन कि परमेशेरे दर्शने मां ज़ोवरु अधर्मी ज़िन्दगी ज़ीतां तैना अपने जिसम अशुद्ध केरि बटतन, ते कोन्वी भी एप्पु पुड़ अधिकार रखनेरी अज़ाज़त न देन ते तैना महिमा वाले स्वर्गदूतां केरे बारे मां बुरी गल्लां ज़ोतन।

9 पन इड़ी तगर कि परधान स्वर्गदूत मीकाईले इन अधर्मी लोकां केरु ज़ेरु न कियू। ज़ैसन शैतान ते मीकाईल मूसा नेवरी लाश दबनेरे अधिकारेरे बारे मां बेंस भोइ, त मीकाईल स्वर्गदूते कां इन लोकन करां जादे अधिकार भोनेरे वावजूद भी तैने शैताने बुरी गल्लां ज़ोइतां दोषी न ठहराव, इसेरे बदले तैने इन ज़ोवं, कि “प्रभु तीं डाँटे।”

10 पन इना लोक तैन चीज़ां केरे खलाफ गलत ज़वान इस्तेमाल केरतन ज़ैन तैना न समझन। ते ज़ैन चीज़न तैना समझतन तैन लैट्टे जानवरां केरे ज़ेरे केरतन, एना चीज़ां केरतां तैना अपने आप नाश केरतन।

11 तैन पुड़ अफ़सोस! किजोकि तैना आदमेरे मट्टे कैनेरो ज़ेरो बुरो सलूख केरतन, ज़ैने अपने दूला मारो। तैना जल्दी ज़ेन्चरे बिलामे पेइसो कमानेरे लेइ लोकन करां पाप कराव तैनेई भी तैए गलती की, ते ज़ेन्चरे करोह नाश कियो किजोकि तैने (मूसेरे खलाफ) खलाफत की, तेन्चरे तैना लोक भी नाश किये गाले किजोकि तैना भी प्रभुएरे खलाफ खलाफत केने लोरन।

12 जैखन इना लोक धामन मां खातन जैना तुस प्रभुएरो प्यार याद केरनेरे लेइ बनातथ, त तैना समुन्दरेरी छेपोरी शफड़ां केरे जेरे खतरनाक आन, जैना तुसन डोबनेरी वजा बेनि बटतन। तैना तैन बेशर्म पुहालां केरे जेरे आन जैना सिर्फ अपनो खियाल रखतन। तैना बगैर पैने बिदलारारे जेरेन जैन हवा उडारतीए, तैना शेरारे बेफल बुट्टां केरे जेरे आन. जैना ज़ीलना उखडोरेन ते दुइये तरीकेई सेइं मरेन।

13 जेन्चरे समुन्दरेरी मज़बूत छेल्ली गंदी शैमफ एनतिन, तेन्चरे इना लोक बेशर्म कम्मां केरतन। तैना किछ तारां केरे जेरे आन जैना सिद्धे वत्तां न चलन, तैना सही बत न हिरान। प्रभुए तैन केरे लेइ अक ठार रखोरि जे पूरे तरीके सेइं आंधरीए जैडी तैनेई हमेशारे लेइ रानू पेनु।

14 ते हनोक जे आदमेरे सतोवं पीड़ी मरां थियो, तैने इन अधर्मी लोकां केरे बारे मां भविष्यद्वाणी की। तैने ज़ोवं “हेरा, प्रभु अपने बेशुमार पवित्र स्वर्गदूतन सेइं साथी एज्जेलो।

15 कि सेब्बी लोकां केरो इन्साफ केरे, ते तैन केरे सेब्बी बुरां कम्मां केरे बारे मां जैना तैनेई परमेशेरे खलाफ कियोरन ते सैरी बुरी गल्लां जैना तैनेई तैसेरे खलाफ कियोरिन तैन केरे बारे मां तैन दोषी बनालो।”

16 इना लोक हमेशा परमेशेरे खलाफ ज़ोतन ते होरि केरि गेलती कढतन। तैना अपने मनेरे मेरजरे मुताबिक लगातार बुरां कम्मां केरतन। तैना अपने बारे मां घमण्ड केरतन ते अपने फैइदेरे लेइ होरि केरि चापलूसी केरतन।

### ?????? ?? ?????

17 पन हे ट्लारव, तुस तैन गल्लन याद रखा; जैना गल्लां इश्शे प्रभु यीशु मसीहेरे प्रेरितेई पेइली ज़ोरिन।

18 तैना तुसन सेइं ज़ोते थियो, “कि आखरी दिहाइन मां एरे लोक भोले जैना प्रभु ते तैसेरे लोकां केरो मज़ाक बनाले। इना तैना लोक आन जैन केरि ज़िन्दगी तैन केरे बुरी इच्छा केरे कैबू मां आए।”

19 इना तैना लोक आन जैना तुसन अलग-अलग टोलन मां बंटतन, तैन केरि बुरी इच्छा तैन ज़लैतिन ते तैन कां परमेशेरो आत्मा नई।

20 पन हे ट्लारव, तुस एक्की होरेरी मद्दत केरते राथ कि बडे पवित्र सच्चे मां बद्धथ जैन तुस विश्वास केरतथ। तुसेई पवित्र आत्माे शेक्तेरे अगवैई सेइं प्रार्थना कियोरो लोडे।

21 तुसेई लगातार इन जैनतां ज़ीयोरू लोडे कि परमेशर तुसन सेइं प्यार केरते, जेन्चरे तुस बलगने लोरेथ जेइस इश्शो प्रभु यीशु मसीह अपने दयाई मां तुसन हमेशारी ज़िन्दगी देलो।

22 तैन लोकन पुड़ दया केरा जैन नई पतो कि तैना कोस शिक्षाई पुड़ विश्वास केरन।

23 किछ होरे लोक जैन तुस ज़ानतथ कि नरके मां ज़लोरेन। तैन जल्दी खिचतां हमेशारी अग्गी मरां बच्चाथ। हेज् भी होरन पुड़ दया केरा। हांलाकि, ध्यान देथ तैस्से पापे दुबारा न केरा। तुस तैन केरे पापन सेइं अज़मैइशी मां न पेथ, ते तैना पाप केरनेरे ज़िरिये अपनो आप दागदार न केरा।

24 परमेशर तुश्शी हफ़ाज़त केरनेरे बाले ताके तुस पापेरी ज़िन्दगी ज़ीतां धोखो न खाथ। तै महिमा बालो परमेशर तुसन एप्पू कां आन्नेरे ते तुसन बेकसूर ते खुशी सेइं भरनेरे काबले।

25 तैए अक परमेशरे जेने यीशु मसीहेरे ज़िरिये असन मुक्ति दित्ती, इश्शो प्रभु यीशु लोकन परमेशेरी आदर केरने ते तैसेरी बडयाई केरनेरी वजा बनाते। ताके तैना इस गल्लनी पिशानन कि तैस कां शुरू करां हुन्ना ते हमेशारे लेइ शक्ति ते अधिकार आए। आमीन।

## यीशु मसीहेरो प्रकाशितवाक्य

०० ००००००० ०००० ०००० ०००

1 यीशु मसीहेरो प्रकाशितवाक्य, जै परमेशेर तैस एल्हेरेलेइ दित्तो कि तै अपने सेवकन तैना गल्लां हिराए, जैन केरू जल्दी भोनू जरूरीए। यीशु मसीहे अपनो स्वर्गदूत भेजतां तैसेरे जिरिये अपने दास यूहन्ना इना गल्लां जोई,

2 अवं यूहन्ना तैन सब लिखने लोरोई जैन मीं लवं, अवं इस मां परमेशेरू वचन ते यीशु मसीहेरी सच्चरी शिक्षारी गल्लां लिखने लोरोई जैना तैनी मीं सेइं जोई।

3 परमेशर तैन सेन्नी लोकन बरकत देलो जैना इस भविष्यवैनरे वचने पढतन, ते कने जैना शुन्तन ते इस मां लिखोरी गल्लन मन्तन, किजोकि इन गल्लां पूरी भोनेरो वक्त नेडो ओरोए।

4 अवं यूहन्ना आसिया इलाकेरे सत कलीसियान जो लिखने लोरोई। परमेशर जै आए ते जै हमेशा थियो, ते जै एजनेबालो आए; ते तैन सत आत्मां केरे तरफां जैना तैसेरे तखतेरे सामनेन तुसन अनुग्रह ते शान्ति मैलती राए।

5 ते यीशु मसीहेरे तरफां, जै वफादार गवाह ते मुडदन मरां जींतो भोने बालन मरां पेइलोए त कने धेरतेरे राजां केरो प्रधाने तुसन अनुग्रह ते शान्ति मैलती राए। यीशु मसीहे असन सेइं प्यार कियो, त कने तैने अपने खूने सेइं अस पापन करां छुटाए।

6 तैने अस अक राज ते अपने बाजी परमेशेरी सेवा केरनेरे लेइ याजक भी बनाए; तैसेरी महिमा ते हकोमत हमेशा भोती राए। आमीन।

7 हेरा, मसीह बिदलारी सेइं साथी एजनेबालोए, ते हर कोई तैस लाएलो, बल्के जैना लोक तैसेरे मौतरे लेइ जिमेवार थिये, तैना भी तैस लाएले, ते धेरतेरे सारे लोक जोरे-जोरे सेइं लेरां देले। हाँ इन भोल्। आमीन।

8 परभु-परमेशर जोते, “अव्वे अलफा ते ओमेगा आई, (मतलब पेइलो ते आखर) अवं तै आई, जै आए, जै हमेशा थियो, ते जै एजने बालोई, ते बडो शक्ति बालोई।” तै इन जोते,

०००००० ००००००० ०००० ००००

9 अवं यूहन्ना तुशुशो विश्वासी दला, ते कने यीशु मसीहेरे लेइ दुःखन मां, परमेशेरे राज्जे मां, ते सबरी मां तुसन सेइं साथी शामिल। अवं पतमुस नव्वेरे टैपू पुइ परमेशेरू वचन शुनानेरे त कने यीशुएरी गवाही देनेरे वजाई सेइं कैद थियो।

10 हफतेरे पेइले दिहाडे पवित्तर आत्मां अवं अपने कैव मां कियो, मीं एप्पू पत्तर अक आवाज इन जोते शुनी। तै आवाज नइशिगेरी उच्ची आवजरी जेरि थी।

11 “जैन किछ तू लातस, तैस किताबी मां लिखतां सत नगरां केरे कलीसियान कां भेज, मतलब इफिसुस, स्मुरना, पिरगमुन, थुआतीरा, सरदीस, फिलदिलफिया ते लौदीकिया नगरन मां आन।”

12 तैखन जै मीं सेइं गल्लां केरने लोरो थियो तैस हेरनेरे लेइ तक्कू; ते पत्रोवं फिरतां मीं सोन्नेरे सत दीवट लाए।

13 ते तैन दीवटां केरे मझाटे मडदेरो जेरो कोई लाव, तैने पवन तगर लम्मो चोगो लोरो थियो, ते तैसेरे छैती पुइ सोन्नेरो पटको बंधोरो थियो।

14 तैसेरे दोग्गे पुइ तैसेरे बाल छिती उन्नी या हिवेरे जेरे थियो। तैसेरी एच्छी अगारे लपारी जेरि बेलती थी।

15 ते तैसेरे पाव भेट्ठी मां गर्म कियोरे पितलरे जेरे चमकते थिये, ते जैखन तैन गल की तैसेरी आवाज बडे जेरे सेइं थी, जेन्चरे बडे दरियां केरि जेरि जैना बडे जेरे सेइं चलतन।

16 ते तै अपने देइने हथ्ये मां सत तारे घिन्तां थियो, ते तैसेरे मुखे सेइं दईं धारण वाली तलवार निसती थी, तैसेरू तूतर एरू चमकतू थियूं, जेन्चरे दिहाडो भर-दुपारेईं चमकते ।

17 जैखन मीं तै लव, त तैसेरे पावन पुड़ मुड़देरो जेरो पेव, ते तैने मीं पुड़ अपनो देइने हथ रखतां इन ज़ोवं, “डर न, अवं पेइलो त कने आखरी आईं ।

18 ते ज़ीतो भी अवं आईं, अवं एक्की बार मरों थियो, पन हुनी अवं ज़ीतोईं ते अवं हमेशा ज़ीतो रानोईं । मीं मौती पुड़ ते पाताले पुड़ जै मरें लोकां केरि ठारे अधिकारे ।

19 एल्हेरेलेइ ज़ैना गल्लां तीं हेरी ते ज़ैना गल्लां भोइ रेवरिन, ते ज़ैना इट्टां वाद भोने बैलिन, तैना सब लिख ।”

20 मतलब तैन सत तारां केरो भेद ज़ैना तीं मेरे देइने हथ्ये मां लोरे थिये, ते तैन सत सोन्नेरे दीवटां केरो भेद, ते सत तारे सत कलीसियां केरे स्वर्गदूतन, ते तैना सत दीवट सत कलीसियान ।

## 2

\*\*\*\*\*

1 तैने मीं सेइं इन भी ज़ोवं: “इफिसुस नगरेरे कलीसियारे स्वर्गदूते जो ई सन्देश लिख कि, ‘अवं ते आईं जै सते तारे अपने देइने हथ्ये मां घिन्तां फिरताईं, ते सोन्नेरे सत दीवटां केरे मझाटे फिरताईं, अवं इन जोताईं:

2 अवं तेरां कम्मां, तेरी मेहनत, ते तेरू सबर ज्ञानताईं । ते इन भी, कि तू बुरे लोकन बर्दाश न केरि बटस; त कने तैन ज़ैना अपनो आप प्रेरित ज़ोतन पन आन नईं, तैना तीं परखे ते तैना झूठे निस्से ।

3 अवं इन भी ज्ञानताईं मेरे नंब्वेरे खातर तीं सबरी सेइं दुःख झैल्ले ते तीं मेरी सेवा केरनि न शारी ।

4 पन मीं तेरे खलाफ इन ज़ोनूए कि ज़ेरो प्यार तीं मीं सेइं विश्वास केरनेरे वक्ते मां कियोरो थियो इस वक्ते मां न केरस ।

5 याद रख तू बिछड़ने करां पेइलो कोड़ि थियो । तू पाप केरने करां मनफिरा ते तेरही ज़िन्दगी ज़ी ज़ेरि पेइलो विश्वास केरनेरे वक्ते ज़ीतो थियो । अगर तू मन न फिरालो त अवं तीं कां एइतां तेरू दीवट तैस ठारां पुटेलो ।

6 पन हाँ तीं मां ई गल त आए, कि तू नीकुलइयां\* केरे कम्पन सेइं नफरत केरतस, ज़ैन सेइं अवं भी नफरत केरताईं ।

7 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते, जै ज़ीत हासिल केरे, अवं तैस, ज़िन्दगरे बुटे मरां फल खानेरे लेइ देइलो जै ज़िन्दगी देते, जै परमेशेरे स्वर्ग लोके मांए ।”

\*\*\*\*\*

8 तैने मीं सेइं इन भी ज़ोवं, “स्मुरना नगरेरे कलीसियारे स्वर्गदूते जो ई सन्देश लिख, जै पेइलो ते आखरीए; जै मरों थियो ते हुनी ज़ीतो भोरोए, तै इन ज़ोते:

9 अवं ज्ञानताईं कि तू स्तव गातस ते तू गरीब आस, पन आत्मिक गल्लन मां तू धनी आस । अवं इन भी ज्ञानताईं कि ज़ैना लोक ज़ोतन कि तैना परमेशेरे चुनोरे (यहूदी) लोकन, पन तैना असलीती मां नईं । तैना तुशे बारे मां बुरी गल्लां ज़ोतन, पन हकीकति मां तैन केरो रिशतो एरे टोली सेइं आए जै शैतानेरी ।

10 ज़ैना दुःख तीं झैल्लने पेनेन तैन करां न डर । शैतान तुसन मरां किछ् लोकन टलुइतां कैद करालो ताके तैना परखे गान । ते तुसन दश दिहाइन तगर बडो दुःख झैल्लनो भोलो । पन मीं पुड़ विश्वास केरनो न शार, चाए जान भी देनी पे, किजोकि अवं तेरे ज़ीतरे लेइ हमेशेरे ज़िन्दगरू इनाम देइलो ।

\* 2:6 नीकुलइयां: ए पंथ थियो तैना शिखालते थिये कि विश्वासी लोक अधर्मी ज़िन्दगी ज़ी सकतन ते मूर्ती केरि पूजा केरि सकतन ।

11 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते, जै ज़ीते, तैस दुइयोवं मौतीं सेइं नुकसान न पुजेलो । ”

~~~~~

12 तेने मीं सेइं इन भी ज़ोवं, “पिरगमुन नगररे कलीसियार स्वर्गदूते जो ई सन्देश लिख, ‘अवं तै आईं ज़ैस कां दुई धारण वाली तिखवी तलवारे, अवं इन ज़ोताईं:

13 अवं इन ज़ानताईं, कि तू तैड़ी रातस ज़ैडी शैतान राज़ केरते, तू मीं सेइं साथी ईमानदार राव, त कने तू मीं पुड़ विश्वास केरनो कधे न शारस । तीं इड़ी तगर विश्वास कियो ज़ेइस मेरो वफादार गवाह अन्तिपास तैनेईं तैस टैरी मारो, ज़ैडी शैतान राज़ केरते ।

14 पन मीं तेरे खलाफ किछ गल्लां ज़ोनिन, किजोकि तू तैन केरि खलाफत न केरस ज़ैना तुशे कलीसियाईं मां झूठी शिक्षा देतन तेन्चरे ज़ैन बिलामे बीतोरे वक्ते मां शिखालू । बिलामे बालाक राज़े शिखालू कि इसराएली लोकां केरि अज़मैइश केरे ताके तैना पाप केरन । तैने शिखालू कि तैना मूरतन पुड़ बलिदान कियोरी चीज़ां खान ते वदमाशी केरन ।

15 तेन्चरे तुसन मां किछ लोक एरे आन ज़ैना नीकुलइयां केरि शिक्षा मन्तन ।

16 ते मनफिरा, नईं त अवं तीं कां जल्दी एजतां तैन लोकन सेइं तैस तलवारी सेइं लेडेलो ज़ै मेरे ऐशेरां निसतीए ।

17 जै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते; ज़ैना लोक ज़ीत हासिल केरन, तैन अवं छुप्पोरो मन्ने मरां देइलो, त कने अवं तैन अक छितो घोड़ भी देइलो; तैस घोड़े पुड़ अक नवं लिखोरू भोलू, ज़ैस तैसेरे हासिल केरनेबालेरी अलावा होरो कोई न ज़ानेलो । ”

~~~~~

18 तेने मीं सेइं इन भी ज़ोवं, “थुआतीरा नगररे कलीसियार स्वर्गदूते जो ई सन्देश लिख कि, ‘अवं परमेशेरू मट्टू ज़ेसेरी एछ्छी अगारी ज़ेरिन, त कने ज़ेसेरे पाव कीमती पीतलारे ज़ेरन, अवं इन ज़ोताईं:

19 अवं तेरे कम्मन, तेरे प्यारे, विश्वास, सेवा त कने सबरी ज़ानताईं, ते इन भी ज़ानताईं, कि तेरां आखरी कम्मां पेइले कम्मन करां बेद्धतन ।

20 पन मीं तेरे खलाफ इन ज़ोनुए, कि तू तै कुआन्श इजेबेल राने देतस; ज़ै अपनो आप नबिन ज़ोतीए, ते मेरे दासन बदमाशी केरने त कने मूरतन कां ज़ादोरू खानू शिखैलतां टपलातीए ।

21 मीं तैस मनफिरानेरे लेइ मौको दित्तो, पन तैसा अपने बदमाशी केरने करां मन न फिरानो चाव ।

22 हेरा, एल्हेरेलेइ अवं तैस विमार केरेलो; ते ज़ै तैस सेइं बदमाशी केरेलो अगर तैना भी तैन कम्मन करां मन न फिराले, त तैन बड़े मुसीबती मां छेडेलो ।

23 ते अवं तैसेरे बच्चन मैरेलो; ते तैखन सब कलीसियां बुझेली कि दिल त कने मनरो परखने बालो अवं आईं; ते अवं तुसन मां हर एक्की तैसेरे कम्मां केरे मुताबिक बदलो देइलो ।

24 पन तुस थुआतीरा नगररे बाकी लोकन सेइं, ज़ैना तैस शिक्षाईं न मन्न्, ज़ैन गल्लन जो तैना शैतानेरी डुगी गल्लां ज़ोतन न ज़ानन्, इन ज़ोताईं, कि अवं तुसन पुड़ होरो बोझ न रेखवी ।

25 पन हां, ज़ैन तींकांए तैस मेरे एजने तर टेमतां रख ।

26 ज़ैना लोक ज़ीत हासिल केरन, ते ज़ै मेरे इच्छारि मुताबिक आखरी तगर केरतो राए, अवं तैस सेरी कौमां केरे लोकन पुड़ अधिकार देइलो ।

27 अवं तैस तेरहो अधिकार राज़ केरनेरे लेइ देइलो ज़ेरो मेरे बाजे मीं दित्तोराए । तैन केरू राज़ लोहेरू ज़ेरू मज़बूत भोलू ज़ैन ट्लुटे न, ते तैन केरे दुश्मन मित्तेरे भाण्डां केरे ज़ेर चूर-चूर भोले ।

28 अवं तैन केरि ज़ीत हिरानेरे लेइ तैन झेझेरो तारो भी देइलो ।

29 ज़ै समझनू चाते तै ध्याने सेइं शुने कि परमेशेरो आत्मा कलीसियान सेइं कुन ज़ोते । ”



18 एल्हरेलेइ अवं तीं सलाह देताई, कि अग्गी मां तौरू सोन्नु मीं करां ने, कि धनी भोस; ते छित्तां लिगडां ने, कि तीं अपने नग्गे पनेरी शर्म न भोए; ते अपने एच्छी केरे लानेरे लेइ कजल ने, कि तू लास।

19 अवं जैन-जैन सेइं प्यार केरताई, तैन शिखालताई ते सज्जा देताई ताके तैना रोडे बनन। एल्हरेलेइ भलाई केने मां लगगोरो रा, ते पापन करां मनफिरा।

20 हेर, तेरे दिले मां एजनेरे लेइ अवं जेन्चरे कोई घेरू दार गुडकाते अवं तेन्चरे आई; अगर तू मेरी आवाज श्रुन्तां अपनो दिल खोल्लस, त अवं अन्तर एज्जेलो ते अस एप्पू मांमेइं संगती केरमेले।

21 जै ज़ीते, अवं तैस एप्पू सेइं साथी अपने तखते पुड़ बिशैलेलो, जेन्चरे अवं भी ज़ीत हासिल केरतां अपने बाजी केरे तखते पुड़ बिशरोई।

22 जै समझनू चाते तै ध्याने सेइं शुने कि परमेशरो आत्मा कलीसियान सेइं कुन ज़ोते।”

## 4



1 इना गल्लां हेरनेरां पत्ती, मीं स्वर्गे मां अक दार खुल्लोरू लाव। ते मीं सेइं कोई गल्लां केने लाव ई तैए थियो जैने मीं सेइं पेइली गल्लां की, तैसेरी आवाज नडशिनगेरे ज़ेरि थी। तैने मीं सेइं ज़ोवं, “इड़ी बा एई: अवं तीं तैना गल्लां हिरैइलो, जैन केरू इन गल्लां केरे पत्ती पूरू भोनू ज़रूरीए।”

2 अकदम पवित्तर आत्मां अवं अपने कैबू मां कियो; ते मीं स्वर्गे मां अक तखत लाव ते तैस तखते पुड़ कोई बिशरो लाव।

3 ते जै तैस तखते पुड़ बिशरो थियो, तै यशब ते मानिक कीमती घोडां केरो ज़ेरो लेइहोतो थियो। ते तैस तखते ज़ेवरे पासन भुन्जल्लैठ थी, जै मरकत घोड़ेरी ज़ेरि लेइहोती थी।

4 तैस तखतेरे ज़ेवरे पासन चोव्ही तखत थिये; ते तैन तखतन पुड़ चोव्ही बुजुर्ग छित्तां लिगडां लेइतां बिशरो थिये, ते तैन केरे दोगन पुड़ सोन्नेरां ताजां थियां।

5 ते तैस तखते मां बिजली ते गुड़ने ते तखतेरे सामने अगारे सत दीवट बलने लोरे थिये, इन परमेशरेरे सत आत्मा आन।

6 ते तैस तखतेरे सामने शीशेरो साफ समुन्दर थियो जै बरफारो ज़ेरो थियो, ते तखतेरे मझाटे ते तखतेरे ज़ेवरे पासन प्राणी थिये, तैन केरे सैरे जानी पुड़ एच्छी-एच्छी थी।

7 पेइलो प्राणी शेररो ज़ेरो थियो, ते दुइयोवं प्राणी दाँतेरो ज़ेरो, टलेइयोवं प्राणी मैनेरो ज़ेरो थियो, ते ज़ेवरोवं प्राणी उडरने वाले उकावरो ज़ेरो थियो।

8 ते ज़ेवरे परेणी केरां शा-शा फंगां थियां ते तैन पुड़ एच्छी थी इड़ी तगर कि फंगन अन्तर भी एच्छी थी, तैना रात दिहाड़ी बगैर आरामे इन ज़ोते रातन,

“पवित्तर, पवित्तर, प्रभु-परमेशर, सर्वशक्तिमान,  
जै थियो, जै आए, ते जै एजनेबालोए।”

9-10 जै तखते पुड़ बिशरो जै हमेशा-हमेशा ज़ीतोए, तैना प्राणी तैसेरी महिमा ते आदर ते शुकर केरेले, जैखन चोव्ही बुजुर्ग तखतन पुड़ बिशने वाले कां मथ्यो टेकेले, ते तैसेरी आराधना केरेले। ते तैना अपना-अपना ताजां तखतेरे सामने इन ज़ोइतां रखेले:

11 “हे इश्रे प्रभु-परमेशर, तींए सैरी चीजां बनेइ।

तेरे मेर्जी सेइं सब चीजां बनेइ जेई ते वजूदे मां एई।

एल्हरेलेइ तूए महिमा, आदर ते शेक्तेरे काबलस।”

## 5



1 जै तखते पुड़ बिशरो थियो, मीं तैसेरे देइने हथ्ये मां अक किताब लाई, जै अन्त्रमेईं त कने बेइरमेईं लिखोरी थी, ते ते सत मोहरां लेइतां बन्द कियोरी थी।



2 फिरी मीं अक ताकतबर स्वर्गदूत लाव, जै ज़ोरे ज़ोरे सेइं ई प्रचार केरतो थियो। “इस किताबोरो खोल्लने ते इसेरी मोहरां ट्लोइनेरे काबल कौने?”

3 पन न स्वर्गे मां, न धेरती पुइ न धेरतारे बुन कोई तैस किताबी खोल्लने या तैस पुइ नजर केरनेरे काबल मैलो।

4 ते अवं ज़ोरे-ज़ोरे सेइं लेरां देने लव, किजोकि तैस किताबेरे खोल्लनेरे या तैस पुइ नजर केरनेरे काबल कोई न मैलो।

5 तैखन तैन बुजुर्गन मरां एक्के मीं सेइं ज़ोवं, “लेरां न दे, तक, तै ज़ैस जो यहूदारे गोतुरेरो शेर ज़ोतन, जै दाऊद राज़ेरे खानदाने मरांए तैने तै किताबी खोल्लनेरे ते सत्ते मोहरां ट्लोइनेरे लेइ शैतान हारावरोए।”

6 तैखन मीं तखत ते ज़ेवरे प्राणी त कने तैन बुजुर्गां केरे मझाटे अक मारोरू गबडू लाव। तैसेरां सत शिन्गां ते सत एछ्छी थी; इना परमेशेरी सते आत्मान, जैना सैरी धेरतली पुइ भेजोरिन।

7 गबडे अगगर एइतां ज़ै तखते पुइ विशोरो थियो तैसेरे देइने हथ्थे मरां तै किताब नेही।

8 ते ज़ैखन तैने किताब नेही, त तै ज़ेवरे प्राणी ते चोब्ही बुजुर्ग तैस गबडेरे सामने झुके; ते हर केन्वेरे हथ्थे मां बर्वत ते धूपे सेइं भरोरे सोन्नेरे कटोरे थियो, इना पवित्र लोकां केरि प्रार्थनान।

9 त तैना इन नंवू गीत ज़ोने लगे,

“तीं कां अधिकारे कि तू मोहरन ट्लोइस ते इस किताबी खोल्लस,  
किजोकि तीं मेरतां अपने खूने सेइं परमेशेरे लेइ हर एक्की कुले मरां, हर भाषाई मरां,  
हर लोकन मरां, ते कौमी मरां लोक धिन्नोरेन।”

10 “तीं तैना राज़े बनाए, तीं तैना याजक बनाए ज़ैना इश्ये प्रभु परमेशेरे लेइ सेवारू कम केरन, ते तैना धेरती पुइ राज़ां केरू ज़ेरू राज़ केरतन।”

11 मीं दुबारा तक्कू, त मीं बेशुमार स्वर्गदूतां त ज़ेवरे प्राणी ते बुजुर्गां केरि आवाज़ शुनी ज़ैना तखतेरे ज़ेवरे पासन थियो।

12 तैना ज़ोरे सेइं ज़ोते थी, “मारोरू गबडू समर्थ, धन, ज्ञान, शेक्ति, आदर, महिमा, ते कने शुकरेरे काबले।”

13 फिरी मीं स्वर्गे मां ते धेरतली पुइ त कने धेरतलेरे बुन, ते समुन्देरी सब चीज़ां, ते सब किछ ज़ैन तैन मांए, इन ज़ोते शुनु कि, “जै तखते पुइ विशोरोए तैसेरू त कने गबडेरू शुकर, आदर, महिमा ते राज़, हमेशा राए।”

14 ते ज़ेवरे प्रेणेई आमीन ज़ोवं, ते बुजुर्गेई मथ्यो टेको।

## 6

### 22 222222 222222

1 फिरी मीं लाव, कि गबडे तैन सत मोहरन मरां अक खोल्ली; ते तैन ज़ेवरे प्रेणेन मरां एक्केरी गुइनेरी ज़ेरि आवाज़ शुनी कि, “एई।”

2 ते मीं नजर की, ते अक छित्तो घोडोए, ते तैसेरे सुवारे कां धनक थियूं, ते तैस अक ताज दित्तू, ते तै ज़ीतो निस्सो कि होरि भी ज़ीत हासिल केरे।

3 ज़ैखन गबडे दुइयोवं मोहर खोल्ली, त मीं होरो प्राणी इन ज़ोते शुनु कि, “एई।”

4 फिरी अक होरो घोडो निस्सो, ज़ै लाल रंगोरे थियो; ते तैसेरे सुवारे ई अधिकार दित्तो, कि धेरतली पुइं मेल-मिलाप सल्ले, ताके लोक एक्की होरि मारन; ते तैस अक बड्डी तलवार दित्ती।

5 ते ज़ैखन गबडे ट्लेइयोवं मोहर खोल्ली, त मीं ट्लेइयोवं प्राणी इन ज़ोते शुनु कि, “एई।” ज़ैखन मीं तक्कू त अक कालो घोडो निस्सो;

6 ते मीं तैन ज़ेवरे प्रेणेन मरां मैनेरी ज़ेरि ई गल ज़ोते शुनी, कि दीनारो गेहुं, “ते दीनाररे ट्लाई सेर जौं, तेल, ते कने दाछोरो रसेरो नुकसान न केरथ।”

7 ज़ैखन तैन ज़ेवरोवं मोहर खोल्ली, त मीं ज़ेवरोवं प्राणी इन ज़ोते शुनो कि, “एई।”

8 ते मीं नज़र की, ते हेरा, अक हेइदलो घोड़ोए; तैसेरे सूवारेरू नवं मौते, ते पाताल तैस पत्ती-पत्तीए, ते तैन ई अधिकार मैल्लो कि धेरती पुड़ रानेबाले लोकन मरां हर जेवरो मैन्हु मारन, कि तैना तैन तलवारी सेइं मारन, ते दलुखी सेइं मारन, ते बुरी बिमैरी सेइं मारन, ते तैन जंगली जानवरन सेइं भी मारन ।

9 जैखन गवडे पंचोंव मोहर खोल्ली, त मीं बलिदान केरनेरी ठारी करां बुन आत्मा लेई, जैना परमेशेरे वचनेरे वजाई सेइं, ते तैस गवाहेरी वजाई सेइं जै तैनेईं दित्तोरी थी, कि यीशु मसीह तैन केरो प्रभुए मारोरो थियो ।

10 ते तैनेईं बडे ज़ोरे सेइं हक देइतां ज़ोवं, “हे पवित्तर, ते सच्च्रे प्रभु; तू केइस तगर इशशो इन्साफ न केरेलो? ते धेरतलरे रानेबालन सेइं इशशे खूनेरो बदलो केइस नेलो?”

11 ते तैन सेभन छित्तां लिगडां दित्तां, ते तैन सेइं ज़ोवं, कि थोडे चिरेरे लेइ आराम केरा, ज़ांतगर तुप्रशे संगी दास, ते विश्वासी साथी. जैना तुप्रशे ज़ेरे मारे गानेन, तैन केरि भी गिनती पूरी न भोए ।

12 जैखन गवडे शेइयोवं मोहर खोल्ली, त मीं हेरू, कि अक बड़ो भुंजल अव; ते दिहड़ो कमलेरो ज़ेरो भोव, ते चांदनी पूरी खूनेरी ज़ेरि भोइ ।

13 ते अम्बरेरे तारे धेरतली पुडां झडे जेन्चरे बडे तूफाने सेइं फेगरे बुटे मरां कच्च्रे फल झइतन ।

14 ते अम्बर एरू घिशकू, जेन्चरे बरको पलेटोते ते हर अक पहाड़, ते टैपू, अपने-अपने ठारां घिशके ।

15 ते धेरतलरे राजे, प्रधान, सरदार, धनी ते समर्थि लोक, ते हर अक दास, ते हर अक आज़ाद पहाड़ां केरे कुढन मां, ते शफडन मां छप्पे ।

16 ते पहाड़न, ते शफडन सेइं ज़ोने लाए, “कि असन पुड़ झइ; ते असन तैसेरे ऐशी सेइं जै तखते पुड़ विशोरोए ते गवडरे सरकी करां छुपा ।

17 किजोकि तै खतरनाक दिहाड़ी एज्जेली जेइस परमेशर ते गवडू हर एक्की सज़ा देले, ते कोई भी तैस झैल्लनेरे काबल नई ।”

## 7

144000

1-2 इसेरां पत्ती मीं दुनियारे जेवरे कूनन पुड़ जेवर स्वर्गदूत खडे लाए । तैन स्वर्गदूतन दुनियाई मां आफत फैलेइतां नुकसान पुजानेरे लेइ परमेशेरे करां अधिकार हासिल कियोरो थियो, चाए धेरती पुड़ या समुन्दरे पुड़ । तैनेईं दुनियारे जेवरे कूनन करां हवान टेमतां रख्खी ताके धेरतली, या समुद्र, या कोन्वी बुटे पुड़, हवां न ज़ले । ते मीं अक होरो स्वर्गदूत पूर्वरां एइतो लाव । तैस कां अक महोर थी जै हमेशा जीते परमेशेरे तरफां थी । तैने जेवरे स्वर्गदूतन सेइं ज़ोरे सेइं ज़ोवं:

3 “ज़ांतगर अस अपने परमेशेरे दासां केरे कुपाए पुड़ मोहर न लाम तांतगर तैना आफतां तैन पुड़ न एजन, ते धेरतली, समुन्दर ते कने बुटन नुकसान न पुजान ।”

4 ते जैन पुड़ मोहर कीजेई, मीं तैन केरि गिनती शुनी, कि इस्राएलेरी खानदानेरे गोद्लन मरां अक लख चुरतैली हज़ारन पुड़ महोर कीजेई ।

5 यहूदारे गोद्लन मरां 12 हज़ारन पुड़ मोहर लाई, रूबेनेरे गोत्रे मरां 12 हज़ारन पुड़; गादेरे गोत्रे मरां 12 हज़ारन पुड़ ।

6 अशेरेरे गोद्लेरे मरां 12 हज़ारन पुड़; नप्तालेरे गोत्रे मरां 12 हज़ारन पुड़; मनशेरेरे गोत्रे मरां 12 हज़ारन पुड़ ।

7 शमीनेरे गोत्रे मरां 12 हज़ारन पुड़; लेवेरे गोत्रे मरां 12 हज़ारन पुड़; इस्साकारेरे गोत्रे मरां 12 हज़ारन पुड़ ।

8 जबूलनेरे गोत्रे मरां 12 हज़ारन पुड़; यूसुफेरे गोत्रे मरां 12 हज़ारन पुड़, बिन्यामीनेरे गोत्रे मरां 12 हज़ारन पुड़ मोहर लाई जेई ।

144000

9 इसेरां पत्ती मीं मैन्हु केरि भीड़ लाई ज़ैस कोई गेनि न थियो बटतो । तैना हर कुले मरां, हर कौमी मरां, ते हर भाषाई मरां ओरे थिये । तैना तखतेरे ते गबड़ेरे सामने खड़े थिये । तैनेई छित्तां लिगडां लोरो थियां, ते सैभेई अपने हथ्थन मां तैसेरे आदरारे निशानेरे रूपां मां खजूरेरी डैलडी घिन्तां थिये ।

10 ते तैना लोक बड़े ज़ोरे सेई ज़ोती थिये, “मुक्तेरे लेइ इश्शे परमेशेरे ज़ै तखते पुड़ विशोरोए, ते गबड़ेरू जयजयकार भोए ।”

11 ते सारे स्वर्गदूत ज़ैना तखतेरे ज़ेवरे पासन ते बुजुर्गां केरे ज़ेवरे पासन थिये ते ज़ेवरे प्रेणेई तैनेई मथ्यो टेको, ते परमेशेरे कां मथ्यो टेकतां ज़ोवं,

12 “आमीन, इश्शे परमेशेरेरी स्तुति, ते महिमा, ते ज्ञान, ते शुक्र ते आदर, ते समर्थ, ते शक्ति हमेशा बनोरी राए । आमीन ।”

13 इन गल्लन पुड़ बुजुर्गन मरां एक्के मीं सेई ज़ोवं; “इना छित्तां लिगडां लेइतां कौन? ते कोट्टां ओरेन?”

14 मीं तैस सेई ज़ोवं; “हे मालिक, तूए ज्ञानतस ।” तैने मीं सेई ज़ोवं; “इना तैना आन, ज़ैना तैस बड़े मुसीबती मरां निसोरेन; तैनेई अपना लिगडां गबड़ेरे खूने सेई धोइतां छित्तां केरन, ज़ेसेरो मतलब तैन केरे पाप दूर किये ।”

15 “एल्हेरेलेइ तैना परमेशेरे तखतेरे सामनेन, ते तैसेरे मन्दरे मां रात दिहाड़ी तैसेरी सेवा केरतन; ते ज़ै तखते पुड़ विशोरोए, ते तैन मां रालो ते तैन केरि रक्षा केरेलो ।

16 ते तैना फिरी दलुखोरे ते दलिशोरे न भोले: ते तैना दिहाड़े सेई ते कोन्ची भी गेरमी सेई न फुकोले ।

17 किजोकि गबड़ू ज़ैन तखतेरे मझाटे, तैन केरि रखवाली केरेलू; ते तैन लोकन ज़िन्दगरे पैनी कां नेलू, ते परमेशर तैन केरे एच्छे छी केरां सब ऐंखरू पुछेलो ।”

## 8

????? ???? ? ? ???? ???? ???? ?

- 1 ज़ैखन गबड़े सतोवं मोहर खोल्ली, त स्वर्ग मां अध्ये घंटे तगर खामोशी राई ।
- 2 मीं तैन सत स्वर्गदूत ज़ैना परमेशेरेरे सामने खड़े रहतन, लाए, ते तैन सत नइशिंगे दित्ते जे ।
- 3 फिरी अक होरो स्वर्गदूत सोन्नेरू धूपदान घिन्तां अव, ते बलिदान केरनेरी ठारी कां जेव; ते तैस बडो धूप दित्तो, कि सेब्भी पवित्तर लोकां केरि प्रार्थनान सेई साथी तैस सोन्नेरे बलिदान केरनेरी ठारी पुड़ ज़ै तखतेरे सामने चाढ़े ।
- 4 ते तैस धूपेरो तू परमेशेरेरे लोकां केरि प्रार्थनान सेई साथी स्वर्गदूतां केरे ज़िरिये परमेशेरेरे सामने पुजो ।
- 5 तैखन स्वर्गदूत धूपदान नेइतां तैस मां बलिदान केरनेरी ठारारी अग भरी, ते धेतली पुड़ छड़ी, ते गुडनेरी आवाज ते बिजली ते भुंजल भोने लाए ।

?? ???? ?

- 6 ते तैना सते स्वर्गदूत ज़ैन कां सत नइशिनगे थिये, बज़ानेरे लेइ तियार भोए ।
- 7 पेइले स्वर्गदूत नइशिनगों बज़ाव, ते खूने सेई मिलोरी आण ते अग धेरतली पुड़ शारी; ते धेरतली दलेइन मरां अक हिस्सो फुकोई, ते बुट भी अक तीयाही फुकोए, ते सब नीलो घास भी फुकोव ।
- 8 हुइयोवं स्वर्गदूते नइशिनगों बज़ाव, त किछ ज़ेन्चरे बड़डे पहाड़ेरू ज़ेरू अगगी सेई फुकोत्त समुन्दरे मां शारू; ते समुन्दर अक तीहाई खून भोव ।
- 9 ते अक तीहाई जानवर ज़ैना समुन्दरे मां रहते थिये मेरि जे, ते समुन्दरेरेरां अक तीहाई ज़िहाज़ां तुबा भुआं ।

10 टलेइयोवं स्वर्गदूते नइशिनगो बज्राव, ते अक बडडो तारो जै दीयेरो ज़ेरो बलतो थियो, स्वर्गोरां टलुटो, ते दरियां केरे एककी तीहाई पुइ, ते पैन्न पुइ पेव ।

11 ते तैस तारेरू नवं नागदौनाए, ते अक तीहाई पानी नागदौनारू ज़ेरू टलिटू भोवं, ते बडे मैन्हु तैस पैनेरे टलिटू भोने सेइ मेरि जे ।

12 ज़ेवरोवं स्वर्गदूते नइशिनगो बज्राव, ते दिहाडो अक तीहाई, ते चेंदनरी अक तीहाई ते तारां केरि एककी तीहाई पुइ हलचल पेई, इडी तगर कि तैन केरो अक तीहाई हिस्सो आंधरो भोव ते दिहैडरी एककी तीहैई मां लौ न राई, ते तेन्त्रे राती मां भी ।

13 ज़ैखन मीं हेरू, त अम्बेरे मझामेई अक उकाव उडरते ते ज़ेरे सेइ इन ज़ोते शुनु, “कि तैन टलाई स्वर्गदूतां केरे नइशिनगेरे आवाजारे वजाई सेइ ज़ैना बज्राने हेजू बाकिन, धेरतली रानेबालन पुइ अफ़सोस! अफ़सोस! अफ़सोस!”

## 9

1 ज़ैखन पंचोवं स्वर्गदूते नइशिनगो बज्राव, त मीं स्वर्गोरां धेरतली पुइ अक तारो झइतो लाव, ते तैस अथाह कुण्डेरी चाबी दित्ती ।

2 तैन अथाह कुण्ड खोल्लू, ते कुण्डे मरां एककी भेटठारो ज़ेरो तू निस्सो, ते कुण्डेरे तूए सेइ दिहाडो ते अम्बर आंधरू भोइ जेव ।

3 ते तैस तूए मरां धेरतली पुइ टिट्टां निस्सां, ते तैन धेरतलरे बिच्चू केरि ज़ेरि ताकत दित्ती जेई ।

4 ते तैन सेइ ज़ोवं, कि न धेरतलरे धासे, न केन्वी नीलारे, न केन्वी बुट्टे नुकसान पुज्रान, सिर्फ तैन मैन्न ज़ैन केरे कुपाए पुइ परमेशेरी मोहर नई ।

5 ते तैन मारनेरे लेइ नई, पन पंच महीन्न तगर लोकन दुःख देनेरो अधिकार दित्तो, ते तैन केरो दुःख एरो थियो, ज़ेन्त्रे बिच्चू केरे डस मारने सेइ मैन्न भोते ।

6 तैन पंच महीन्न मां मैन्हु मरनू चाएले, पन तैना न मेरि बटेले । तैना मरनेरी इच्छा रखेले पन तैना कोन्वी भी तरीके सेइ मरनेरी बत न मैलेली ।

7 तैना टिट्टां जंग केरनेरे लेइ तियार घोडां केरे ज़ेरां लेइहोतां थियां, तैन केरे दोगन पुइ सोनरां ताजां केरू ज़ेरू किछ् लेइहोतू थियूं; तैन केरां तुतरां मैन्हु केरे तुतरां केरां ज़ेरां थियां ।

8 ते तैन केरे बाल कुआन्शां केरे ज़ेरे लम्मे थिये, ते तैन केरे दंत शेरां केरे ज़ेरे मज्रबूत थिये ।

9 ते तैने लोहेरी ज़ेरि झिलम लोरी थी, ते तैन केरे फंगां केरि आवाज एरी थी ज़ेन्त्रे रथां केरि ते लडैई मां दौइते बडे घोडां केरि ।

10 तैन केरां पूछ्डां बिच्चू केरां ज़ेरां थियां, ते तैन मां डस थियो, ते तैन पंच महीन्न तगर मैन्न दुःख पुज्रानेरी ताकत थी, तै ताकत तैन केरे पूछ्इन मां थी ।

11 अथाह कुण्डेरो दूत तैन पुइ राज़ो थियो, तैसेरू नवं इब्रानी भाषाई मां अबदोन, ते यूनानी भाषाई मां अपुल्लहोने, ज़ेसेरो मतलब नाश केनेबालो ।

12 पंच महिन्ना बाद पेइली आफत बीती जेई, ते इट्टां पत्ती दूई बल्के दूई करां जादे आफतां एजने बैलिन ।

13 ज़ैखन शेइयोवं स्वर्गदूते नइशिनगो बज्राव ते ज़ै सोन्नेरे बलिदान केरनेरी ठार परमेशेरे सामने, तैसेरे ज़ेवरे कूनन मरां मीं एरी आवाज शुनी ।

14 ज़ेन्त्रे कोई शेइयोवं स्वर्गदूत सेइ ज़ोने लोरोए ज़ैस कां नइशिनगो थियो, “कि तैन ज़ेवरे दूत ज़ैना बडे दरियाए फराते कां बन्दरोए, तैन खोल्ल ।”

15 तैखन तैना ज़ेवरे दूत खोल्ले, तैना पेइले तियार भोरे थिये, त इस घेडी, ते दिहाडे, ते महीने, ते सालेरे लेइ तैन बलगनेरे लेइ ज़ोरू थियूं, ते हुनी ई वक्त अव, कि तैना दुनियारे लोकन मरां अक तीहाई लोक मारन ।

16 ते तैन केरे फौजरी गिनती बी करोड थी ज़ैना घोइन पुइ सुवार थिये, मीं तैन केरि गिनती शुनी ।

17 ते मीं इस दर्शनं मां घोडे ते तैन केरे एरे सुवार लेइहोए, जैन केरि झिल्लमां अगारे जेरि लाल, ते नीले ते हेडले रंगेरे जेरे थी, ते तैन घोडां केरि करोडी शेरं केरे करोडी केरि जेरि थी, ते तैन केरे ऐशेरं अग ते तू ते गन्धक निसती थी।

18 इन टलेइ आफतन सेइं जैना इना आन, अग, तू, ते कने गन्धक, जै तैन घोडां केरे ऐशी मरां निसती थी; तैन सेइं अक तीहाई लोक मेरि जे।

19 तैन घोडां केरि ताकत तैन केरे ऐशी, ते कने तैन केरे पूछइन मां थी, किजोकि तैन केरां पूछइं सप्पां केरां जेरां थियां, ते तैन केरे पूछइं केरि करोडी भी थी, ते तैने सेइं तैना दुःख भी पुजाते थिये।

20 ते होरे मैन्हू जैना तैन आफतन सेइं न थी मरे, ते तैनेई मूरती केरि पुजा केरनि न शारी, जैना तैनेई सोन्ने, पितल, ते कन्ने घोड़, लेकडरे बनेइं। तैना मूरती न लहन, न शुन्न, न जेलि बटन, ते तैनेई भूतां केरि आराधना केरनि भी न शारी।

21 ते तैनेई, खून, टूनो, बदमाशी, ते कने ज़ोरी केरने करां मन न फिराव।

## 10

XXXXXXXXXXXXXXXXXXXX

1 फिरी मीं अक होरो ताकतवर स्वर्गदूत बिदलार पलेटतां स्वर्गों एइतो लाव, तैसेरे दोगगे पुड़ भुन्जल्लैठ थी, ते तैसेरू आशी दिहाडेरू जेरू ते तैसेरे पाव अगारे खम्मबेरे जेरे थिये।

2 तैने अपनो देइने पाव समुन्दरे पुड़ रखो, ते खिशडो धेरतली पुड़ रखो, ते तैसेरे हथ्ये मां अक निकडी किताब खोलोरी थी।

3 तैनी स्वर्गदूते बडे ज़ोरे सेइं ज़ोवं, तैसेरी आवाज शेररे गर्जनेरी जेरि थी। ते ज़ैखन तैने ज़ोरे सेइं चिन्ड मारी, त सत आवाजेईं जुवाब दितो, जैन केरि आवाज गुडनेरी जेरि थी।

4 ते ज़ैखन मीं सते गुडनेरी आवाज शुनी, त अवं लिखनेबालो थियो, त मीं स्वर्गों ई आवाज शुनी, “कि जैना गल्लां तीं गुडनेरी जेरि शुनोरिन, तैन छेपोरी रख, ते तैन न लिख।”

5 ते जै स्वर्गदूत मीं समुन्दर ते धेरतली पुड़ खडो लोरो थियो; तैने अपनो देइने हथ स्वर्गेरे पासे खडो कियो।

6 ते जै हमेशा ज़ीतोए ते ज़ैने स्वर्ग, धरती त कने समुन्दर ते ज़ैन किछ तैन मांए बनोरूए, तैनी तैसेरी कसम खेइतां ज़ोवं, “हुनी होरि कोन्ची चीज़रो इंतज़ार नई। हुनी सब पूरू कियू गालू।”

7 बल्के ज़ैखन सतोवं स्वर्गदूत नइशिनगो बजालो, त परमेशेररो तै मकसद पूरो भोलो जै तैसेरे नेबेईं ज़ोरोए, ज़ैनेई तैसेरी सेवा की, पन तैने होरि लोकन तैसेरो पतो लगने न दितो।

8 मीं फिरी दुबारां स्वर्गों तैए आवाज शुनी। तैस आवाजां मीं सेइं ज़ोवं, तैए फिरी मीं सेइं गल्लां केरने लाव; “कि गा, जै स्वर्गदूत समुन्दर ते धेरतली पुड़ खडोए, तैसेरे हथ्ये मरां खुलोरी किताब ने।”

9 ते मीं स्वर्गदूत कां गोइतां ज़ोवं, “ई निकडी किताब मीं दे।” तैने मीं सेइं ज़ोवं, “यां इस खा, ते ई तेरे पेटे टलइट्टी त केरली, पन तेरे ऐशी मैछी करां भी जादे मिट्टी लगली।”

10 ते मीं ते निकडी किताब तैस स्वर्गदूत करां नेइतां खाइ, तै मेरे ऐशी मां मैछरी जेरि मिट्टी लगगी, पन ज़ैखन मीं तै खाइ, ते तैस सेइं मेरू पेट टलिटू भोवं।

11 तैखन मीं सेइं इन ज़ोवं, “तीं बडे लोकन, कौमन, भाषान, ते कने राजन पुड़, फिरी दुबारां भविष्यवाणी केरनि भोली।”

## 11

XXXXXXXXXXXX

1 फिरी मीं नापनेरे लेइ अक निराठी दित्ती, ते तैने मीं सेइं ज़ोवं, “उठ परमेशेररे मन्दरे ते बलिदान केरनेरी ठार नाप, ते ज़ैना लोक तैडी मेरी आराधना केरने लोरिन तैन गन।

2 पन मन्दरेरे बेइरयो अंगन न नाप, किजोकि एन तैन लोकां केरे लेइ आए ज़ैना मीं पुड़ विश्वास न केरन, ते तैना तैस पवित्तर नगर यरूशलेमे 42 महीन्न तगर तुबा केरेले।

3 तैस वक्ते अवं अपने दुइये गवाहन ई अधिकार देइलो, तैना टाट यानी मातमेरां लिगडां लेइतां 1260 दिहाइन तगर मेरे सन्देशेरू एलान केरन ।”

4 तैना दूई गवाह, जैन केरे बारे मां बड़े पेइले केन्चे जैतूनेरे दूई बुट ते दूई दीवट\* केरि मिसाल दित्तोरि थी जैना परमेशेरे सामने रहतन जै धेरतरे लोकां केरो प्रभुए ।

5 ते अगर कोई तैन नुकसान पुजानो चाए, त तैन केरे ऐशी मरां अग निस्तां तैन केरे दुश्मन भस्म केरतीए, ते अगर कोई तैन नुकसान पुजानो चाए, त जरूर तै इस्से तरीके सेइ मारे गाले ।

6 परमेशेरे तैन अधिकार दित्तोरि, कि तैना सन्देश एलान केरनेरे दौरान अम्बर बंद केरन (यानी झड़ी रोकन) । तैन ई भी अधिकार मैल्लो पानी खूनेरू जेरू लाल बनान, ते इन भी कि जैखन तैना चान धेरतली पुड़ हर किसमेरी आफत एनी बटतन ।

7 ते जैखन तैना दूई गवाह परमेशेरे सन्देशेरू एलान केरतां झाडेले, त तैए हैवान जै अथाह कुण्डे मरां निसेलो, तैन सेइ लेइतां तैन करां जीतिलो ते तैन मारेलो ।

8 ते तैन केरि लाशां तैस महान नगर यरूशलेमेरे सड़की मां राली जैड़ी तैन केरो प्रभु कूरुस पुड़ चाढोरि थियो, जेसैरी तुलना सदांम नगर ते कने मिस्रे मुल्खे सेइ कियोरिए ।

9 ते सब लोकन, कुलन, भाषान ते कने कौमन मरां लोक तैन गवाहां केरि लाशां सडे ट्लाई दिहाइन तगर हेरते राले । ते तैना लोक तैन केरि लाशन कोन्वी भी दबने न देले ।

10 ते धेरतलेर रानेबाले, तैन केरे मारने सेइ खुश ते मधन भोले, ते तैन केरे हेरने बालन बड़े डरेले ।

11 ते सडे ट्लाई दिहाइना पत्ती परमेशेरे तरफां जिन्दगरी सांस तैन मां आई, ते तैना खड़े भोए, ते जैनेई तैना दुबारां जीते लाए तैना बड़े डेरि जे ।

12 एसेरां बाद, तैन दूई मैनेई स्वर्गेरां अक ज़ोनेबालो उच्ची आवाजी मां ज़ोते शुनो, “कि इड़ी बा एज्जा!” जैखन तैन केरे दुश्मन हेरनेरे लोरे थिये तैना तैन केरे सामने बिदलारी पलेटतां स्वर्गे मांजो ज़ले जे ।

13 फिरि तैस्से वक्ते यरूशलेम नगरे मां अक बड़ो भुंजल अव, ते नगरेरे इमारतां केरो दशोवं हिस्सो झड़े; ते तैस भुंजले सेइ 7000 मरे, ते होरे जैना बचोरे थिये तैना बड़े डरे, ते तैनेई स्वर्गेरे परमेशेरी बडीयाई की ।

14 दुइयोवं आफत बीती जेई, हेरा, टलेइयोवं आफत एजने बालीए ।

~~~~~

15 जैखन सतावं स्वर्गदूते नइशिनो बज्रव, त मीं स्वर्गे मां बड़ी ज़ोरे सेइ आवाज शुनी, “हुनी इस दुनियाई मां कोई राज केरनेबालो नई सिर्फ इश्शो प्रभु-परमेशर ते तैसेरो चुनोरो मसीह, ते तै हमेशेरे लेइ राज केरेलो ।”

16 ते चोब्ही बुजुर्ग जैना परमेशेरे सामने अपने-अपने तखते पुड़ बिशोरे थिये, परमेशेरे कां मथ्यो टेकतां,

17 इन ज़ोने लाए:

“हे सर्वशक्तिमान प्रभु-परमेशर, तू जै आस, ते जै थियो, अस तेरू शुक्र केरतम, कि तीं हुन्ना महान शक्ति हिराई, ते तीं धेरती पुड़ राज केरनू शुरु कियोरूए ।

18 होरि कौमां केरे लोकेई तीं पुड़ क्रोध कियो, ते तेरो प्रकोप अव, ते तै वक्त ओरोए कि मरां केरो इन्साफ कियो गाए, ते ई वक्त भी आए, कि तेरे दास नेबन ते सारे लोकन जैना तेरे आदर केरतन जैना कमज़ोरन ते जैना ताकतवरन तैन तू इनाम देस,

ते तैस्से वक्ते तैन नाश केरस जैना धेरतूरे नाश भोनेरी वजा थिये ।”

19 परमेशेरू जैन मन्दर स्वर्गे मांए, तैन खोल्लू, ते तैसेरे मन्दरे मां करारेरो सन्दूख लेइहोव, ते बिजली ते आवाज ते गुड़ने ते भुंजल आए, ते बड़ी-बड़ी आण पेई ।

* 11:4 जैतूनेरे दूई बुट ते दूई दीवट जक. 4:1-3, 11-14

12

?????? ??

1 जैखन तैन बीती जेव, त फिरी अम्बरे मां अक बड़ो आजीव निशान लेइहोव। मतलब अक कुआन्श जै चाँदनी पुड़ खड़ी आए ते तैसां जैना लिगड़ां लोरन तैना दिहाड़े जेरां लेइहोतन। ते तैसेरे अपने दोगे पुड़ ताज लोरू थियूं जैस पुड़ 12 तारे थियो।

2 ते दोज्जींती भोइ, ते चिन्डां मारती थी; किजोकि तैस बच्चो ज्ञानेरी तकलीफ थी।

3 ते अक होरो निशान अम्बरे मां लेइहोव, ते हेरा; अक बड़ो लाल अजगर (यानी शैतान) थियो, तैसेरी सत क्रोड़ी ते दश शिन्गां थियां, ते तैसेरे दोगन पुड़ सत ताजां थियां।

4 ते तैसेरे पूछड़ां अम्बरेरे तारां करि अक तीहाई ज़मीनी पुड़ आनी, ते तै अजगर तैस कुआन्शरे सामने खड़ो भोव जै दोज्जींती थी, कि जैखन तै बच्चो ज्ञाए त तै बच्चे तैस खाए।

5 तैखन तैस कुआन्शां मटटू जाऊं, तैन अजगरे न खेइ बट्ट किजोकि तैन अकदम परमेशरे ते तैसेरे तखते कां आनू जेव। तैन मटटू सारी कौमन पुड़ लोहरे डण्डे सेइं राज करेलू।

6 ते ई कुआन्श जंगले जो नशशी, जैड़ी परमेशरेरे तरफां तैसेरेलेइ अक ठार तियार कोयोरी थी, कि तैड़ी 1260 दिहाइन तगर तैसेरी हेरगेश की गाए।

7 फिरी स्वर्गे पुड़ लड़ाई भोइ, मीकाईल ते तैसेरे स्वर्गदूत अजगरे सेइं लड़ने लेइ निस्से, ते अजगर ते तैसेरे दूतन सेइं लड़े।

8 अजगरे लड़ाई हारी, ते फिरी तैना स्वर्गे मां न रेइ बटे।

9 एल्हेरेलेइ ते तै तैसेरे दूत धेरती पुड़ शारे, तैए बड़ो अजगर, ई तैए जै बड़े पेडले सपेरे रूपे मां बांदो भोरो थियो, जेसेरू नवं शैतान या दोष लानेबालोए। तैए आए जै दुनियारे लोकन धोखे देने लोरोए।

10 फिरी मीं स्वर्गेरां ई बड़ी आवाज़ एइती शुनी, “कि हुनी परमेशर अपने लोकन बचालो! हुनी ते अपनि शक्ति इस्तेमाल करेलो ते राजेरू जेरू राज करेलो! हुनी तैसेरो मसीह दुनियाई पुड़ अधिकार रखलो! किजोकि हुनी शैतान इश्शे परमेशरेरे हज़ूरी मां खड़ो न रेइ बटेले कि इश्शे साथी सेवकन पुड़ रात दिहाड़ी दोष लाए। ते स्वर्गे मरां शारो जोरोए।

11 ते तैनेई गबड़ेरे खूनेरे वजाई सेइं ते अपने गवाहरे वचनेरे वजाई सेइं, तैस पुड़ ज़ीत हासिल की, ते तैनेई अपने प्राण टलारे न समझे, इड़ी तगर की मौतरी भी परवाह न की।

12 एल्हेरेलेइ तुस सब जैना इड़ी स्वर्गे मां रहने बालेथ खुश भोथ। पन हे धेरतली ते कने समुन्दरे मां रानेबालव तुसन पुड़ अफ़सोस! किजोकि शैतान बड़े क्रोधे सेइं तुसन कां एजनेबालोए, किजोकि ते ज्ञानते कि तैसेरो आखरी वक्त एजनेबालो।”

13 ते जैखन अजगरे समझू, कि अवं ज़मीनी पुड़ जो शारोरो, त तैस कुआन्शी पत्ती दौड़ो जैसां मटटू ज़ावरू थियूं।

14 पन परमेशरे तैस कुआन्शी उकाबेरां दूई बड़ड़ां फंगां दितां, कि अजगरे करां उडरतां जंगले मां तैस ठैरी पुजे, जैड़ी सड़े टलाई सालन तगर तैसेरी हेरगेश भोरी थी, ताके तैड़ी अजगर न पुज़ी बटे।

15 फिरी अजगरे तैस कुआन्शी पत्ती अपने ऐशी सेइं दरियारू जेरू पानी शारू, कि तैस इस दरियाए सेइं रूड़ए।

16 तैस कुआन्शरी मद्दत केरनेरे लेइ ज़मीना तैन पानी पियूं जैन तैस अजगरेरे ऐशी मरां निसोरू थियूं।

17 ते अजगर कुआन्शी जो सेरकोव। एल्हेरेलेइ तैने कुआन्शरे औलादी सेइं लड़ाई केरनेरू एलान कियूं। तैना लोक जैन परमेशरे हुकमन मन्तन, ते यीशुएरी दित्तोरी शिक्षाई पुड़ ज़लतन।

18 तैखन अजगर जेव, ते समुन्दरेरे वन्ने पुड़ खड़ो भोव।

13



1 मीं अक हैवान समुन्दरे मरां निसतो लाव, तैसेरां दश शिन्गाँ ते सत कुरोडी थी; तैने शिन्गान पुड़ दश राजमुकट ते तैसेरे दोगन पुड़ परमेशेरी तुहीनरां नंवां लिखोरां थियां।

2 जै मीं हैवान लाव, तै इलाघेरो जेरो थियो; ते तैसेरे पाव इछेरे पावां केरे जेरे थियो; ते तैसेरू आशी शेरेरे एशेरू जेरू थियूं, ते अजगरे तैस हैवाने अपनि शेक्ति दित्ती ते राज केरनेरे लेइ तैस अधिकार दित्तो।

3 मीं तैस हैवानेरे करोडन मरां एक्की पुड़ अक एरो जखम लाव, जेन्चरे तै मरने पुडे; फिरी तैसेरो मारनेवालो जखम रोडो भोव, ते सारे धेरतलरे लोक हैरान भोए, ते तैस हैवाने पत्ती चलने लगे।

4 ते तैन सेम्भी लोकेई तैस अजगरेरी पूजा की, किजोकि तैने हैवाने अपनो अधिकार दित्तोरो थियो। ते इन ज़ोइतां कि, “इस हैवानेरो जेरो कौने? हैवाने सेइं कौने लेइ बटते?”

5 परमेशेरे तैस हैवाने अज़ाज़त दित्तोरी थी कि अपने अधिकारे पुड़ घमण्ड केरे ते एन्चरे परमेशेरी तुहीन केरे। परमेशेरे तैस 42 महीन्ना तगर ई अधिकार रखनेरे लेइ अज़ाज़त दित्ती।

6 तै हैवान परमेशेरी तुहीन केरने लगे, कि तैसेरे नंवेरे खलाफ, ते जैडी परमेशर रहते ते स्वर्गे मां रानेवाले सेम्भी लोकां केरे खलाफ तुहीन केरने लगे।

7 परमेशेरे तैस हैवाने अज़ाज़त दित्तोरी थी, कि परमेशेरे लोकन सेइं लड़े, ते तैन करां जीते, ते तैस हर कुले, सारे लोकन, भाषान, त कने कौमन पुड़ अधिकार दित्तो जेव।

8 ते धेरती पुड़ रानेवाले सेम्भी लोकेई तैसेरी पूजा की। सिर्फ तैनेई न की जैन केरां नंवां जिन्दगरे किताबी मां दुनिया बनाने करां पेइले लिखोरां थियां। तै किताब गबड़ेरी जिन्दगरी किताबे जैन बलिदानेरे लेइ मारू ज़ोव।

9 जै समझनू चाते तै ध्याने सेइं शुने।

10 जैना कैद भोनेन, तैना कैद भोले, जैना तलवारी सेइं मरेलो, ज़रूरीए तैना तलवारी सेइं मरेले, परमेशेरे लोकां केरि सबर ते विश्वास इस्से मांए।

11 फिरी मीं अक होरो हैवान धेरतली पुड़ां निसतो लाव, तैस गबड़ेरे जेरां दूई शिन्गाँ थियां, पन जैखन तैन ज़ोव त तैसेरी आवाज़ अजगरेरे ज़ेरि थी।

12 ई दुइयोवं हैवान पेइले हैवानेरो सारो अधिकार इस्तेमाल केरते। दुइयोवं हैवाने धेरती ते तैस पुड़ रानेवालन करां पेइले हैवानेरी पूजा कराते जेसेरो मारनेवालो जखम ठीक भोरु थियो।

13 दुइयोवं हैवान बड़े-बड़े निशान हिरातो थियो, इडी तगर कि मैन्हु केरे सामने अम्बेरां ज़मीनी पुड़ अग भेजतो थियो।

14 दुइयोवं हैवाने परमेशेरे अज़ाज़त दित्ती कि तै पेइले हैवानेरे सामने चमत्कार हिराए। एन चमत्कारां केरे ज़िरिये तैनी दुनियारे सारे लोक टपलाए। तैने तैन पेइले हैवानेरी मूरती बनानेरो हुक्म दित्तो, जै तलवारी सेइं मारोरो थियो पन फिरी जीतो भोरुए।


15 दुइयोवं हैवाने परमेशेरे अज़ाज़त दित्तोरी थी कि तै पेइले हैवानेरी मूरती बनाए ते तै जीतोए, ताके तैस हैवानेरी मूरती गल्लां केरि बटे ते जैना तैस हैवानेरी पूजा न केरने तैना मारे गान।

16 दुइयोवं हैवाने सारे लोकन सेइं जबरदस्ती की, जैना खास आन ते जैना खास नई, अमीर, गरीब, आज़ाद, गुलाम आन, कि तैना पेइले हैवानेरे नंवेरी मोहर देइने हथ्थे या कुपाए पुड़ लान।

17 जैस पुड़ छाप मतलब तैस हैवानेरू नव या तैसेरो नंवेरो अंक भोए, त तैसेरे अलावा होरो कोई लेन देन न केरि सके।

18 इस समझनेरे लेइ अक्ल ज़रूरीए। जैस अक्ल भोए, तै इस हैवानेरो अंक जमा केरे, किजोकि तै मैनेरो अंके, ते तैसेरो अंक 666 आए।

14



1 एसेरे बाद, मीं किछ्छ लाऊं, मीं गबडू सिय्योन पहाडे पुड खडू लाऊं । ते तैस सेइं साथी 144000 लोक थिये, जैन केरे कुपाए पुड तैसेरू ते कने तैसेरे बाजेरू नव लिखोरू थियू ।

2 ते स्वर्गोरां एरी आवाज शुनोई, जै बडे पैनेरी ते बडे गुडनेरी जेरि आवाज थी, ते जै आवाज मीं शुनी; तै एरी थी जेन्चरे कोई सारंगी बाजाने बालो सारंगी बजाने लोरोए ।

3 144000 लोक तखतेरे सामने, ते प्राणी ते कने बुजुर्गां केरे सामने खडे थिये; तैना अक नव्वू गीत जोने लोरे थिये, तैन गीत सिर्फ तैन लोकेईं शिखोरू थियू । तैना लोक इना आन जैना सिर्फ इस दुनियाई मां रानेबाले लोकन मरां परमेशरे छुटोरे थिये ।

4 इना तैना लोक आन, जैना कुआन्शन सेइं अशुद्ध नईं भोरे, पन कुवारेन, इना तैना आन, जेरां भी गबडू गाते तैना भी तैस पत्ती बलतन, इना त परमेशरेरे लेइ पेइले फल भोनेरे लेइ मैनु मरां घिने जोरेन ।

5 तैनेईं कधी झूट नईं जोरू, ते तैना बेइलजामन ।

????????????

6 फिरी मीं अक होरो स्वर्गदूत अम्बरे मझामेईं उडरतो लाव जैस कां धेरतली पुड रानेबालां केरि हर अक कौम, कुल, ते कने भाषारे लोकन शुनानेरे लेइ हमेशारी सुशखबरी थी जै कधे न बेदलोए ।

7 तैने बडे ज़ोरे सेइं ज़ोवं, “परमेशरे करां डरा; ते तैसेरी बडयाईं केरा; किजोकि तैसेरो इन्साफ केरनेरो वक्त पुजोरोए, ते तैसेरी आराधना केरा, जैन स्वर्ग, धरती, समुन्दर, पैनेरे नाग बनोरेन ।”

8 फिरी तैसेरां पत्ती अक होरो स्वर्गदूत इन ज़ोतो अव, “कि झडू, तैन बाबेल नगर झडू, तैने सारे कौमन अपनि शराबी पियाईं, जेसेरो मतलब ईं आए कि तैने सैरी लोकन मूरती केरि पूजा केरनि शिखाली ।”

9 फिरी एसेरां पत्ती अक होरो स्वर्गदूत बडे आवाजी सेइं इन ज़ोतो अव, “कि जै कोई इस हैवाने ते तैसेरी मूरतरी पूजा केरे, ते अपने कुपाए या अपने हथ्ये पुड तैसेरी छाप लाए ।

10 परमेशर तैन टलिठी शराबी पियालो जैस मां पानी न भोए मिलावरू जेसेरो मतलब परमेशरे तैन सेइं बडे क्रोधे मां आए ते तैन पुड दया न केरेलो, तैना लोक अग ते गन्धकेरे दुखे मां छडे गाले, जैखन परमेशर तैन सजा देतो भोलो त पवित्तर स्वर्गदूत गबडू लालू ।

11 ते तैन केरे दुखेरो तू सदा उठतो रालो, ते जैना तैस हैवाने ते तैसेरे मूरतरी पूजा केरेले, ते जैना तैसेरे नव्वेरी छाप नेतन, तैन रात दिहाड़ी चैन न मैलेलो ।”

12 एल्हेरेलेइ परमेशरेरे लोकां केरे लेइ ज़रूरी आए कि जैना भी दुःख तैन पुड एज्जन तैन सबरी सेइं झैल्लन, परमेशर जैन केरनेरो हुक्म तैन दे तैनेईं तैन कियोरू लोडे, ते तैनेईं यीशु पुड विश्वास केरनो न लोडे शारोरो ।

13 मीं स्वर्गोरां ईं आवाज शुनी, “लिख; जैना मुडदे परभु मां मरतन, तैना धन आन ।” पवित्तर आत्मा पक्कू केरते, “तै ज़ोते, तैन सच्चे । हाँ किजोकि तैना अपने मेहनती करां आराम हासिल केरेले, ते जैन तैनेईं कियू तैसेरे बदले तैन इनाम मैलेलू ।”

????

14 फिरी मीं अक छिती बिदलार लाईं, ते तैस बिदलारी पुड मैनेरू जेरो कोई विशोरो लाव, तैसेरे दोगे पुड सोन्नेरू ताज ते हथ्ये मां तिखी इलातीए ।

15 फिरी अक होरो स्वर्गदूत मन्दरे मरां निस्तां, तैने जै बिदलारी पुड विशोरो थियो, तैस बडे ज़ोरे सेइं ज़ोवं, “कि अपनि इलाती बला किजोकि कटनेरो वक्त ओरोए ।”

16 ते जै बिदलारी पुड विशोरो थियो, तैने धेरतली पुड अपनि इलाती लाईं, ते धेरतली फसल केटोईं ।

17 फिरी अक होरो स्वर्गदूत तैस मन्दरे मरां निस्सो, जै स्वर्गे मांए, ते तैस कां भी तिखी इलाती थी ।

18 फिरी एक्की होरे स्वर्गदूत ज़ैस अग्गी पुड़ अधिकार थियो, बलिदान केरनेरी ठारी मरां निस्सो, ते ज़ैस कां तिखी इलाती थी, तैस सेइं ज़ोरे सेइं ज़ोवं; “अपने तिखे इलैइती लेइतां धेरतलरी दाछ कटी; किजोकि तैसेरी दाछ पकोरीए।”

19 ते तैने स्वर्गदूत धेरतली पुड़ अपनि इलाती रख्खी, ते धेरतलरे दाछारे फल केटतां, अपने परमेशरेरे परकोपेरे बडे रसेरे कुण्ड मां छुडी।

20 ते नगरेरे बेइर तैस रसेरे कुण्डे मां दाछ दुलेन्वी, ते रस कुण्ड मरां एतरो खून निस्सो कि घोड़ा केरे लगामी तगर पुजो, ते 100 कोसे तगर रूडो।

15

???? ???? ???? ???? ?????????

1 फिरी मीं स्वर्गे मां अक बड्डो ते आजीब निशान लाव, मतलब सत स्वर्गदूत ज़ैन कां आखरी सत आफतां थी, किजोकि तैन केरे भोने पुड़ परमेशरेरो क्रोध मुकेलो।

2 तैखन मीं समुन्दरेरू ज़ेरू किछ लाव ज़ैन शीशेरू ज़ेरू चमकतू थियूं ते अग भी तैस मां मिलोरी थी। मीं तैना लोक भी लाए ज़ैना हैवाने न थिये हैरेई बटोरो, तैन लोकेई हैवान ते तैसेरे मूरतरी पूजा न थी कियोरी। ते तैन पुड़ तैस हैवानेरे नंब्वेरे अंकरी महोर न थी लोरोरी। तैना तैस शीशेरे समुन्दरेरे वन्ने पुड़ ते सारंगी घिन्तां खडे भोए ज़ै परमेशरे तैन दित्तोरी थी।

3 तैना परमेशरेरे दास मूसेरू गीत, ते गबडेरू गीत ज़ोते थी,

“हे सर्वशक्तिमान प्रभु-परमेशर,
ज़ैना कम्मां तीं कियां तैना बड़ा महान ते आजीब आन,
तू सेब्मी कौमां केरो राजोस,
तैन सब ज़ैन तीं कियूं तैन सही ते धर्मी आए।”

4 “हे प्रभु,

सेब्मी लोकेई तेरी आदर की,
ते तैना सारे तेरे नंब्वेरी इज्जत केरतन,
किजोकि तूए सिर्फ पवितरस।

सैरी कौमां केरे लोक हर राज्जन मरां तीं कां एज्जले,
तैना तेरी आराधना केरेले किजोकि तेरे धर्मी कम्मां बड़ां मशूर आन।”

5 ज़ैखन तैन लोकेई गीत ज़ोताई खतम कियां, त मीं स्वर्गे मां मन्दर खोलोरू लाव। तैन एरू थियूं ज़ेन्बरे तेम्बु।

6 ते तैना सत स्वर्गदूत ज़ैन कां सत आखरी आफतां थी, तैना तैस मन्दरे मरां निस्से। तैनेई छित्तां चमकतां लिगडां लोरां थियां ते तैनेई अपने छैती पुड़ सोन्नेरी पेट्टी बेन्धोरी थी।

7 ते तैन ज़ेवरे प्रैणन मरां एक्के सत्ते स्वर्गदूतन हमेशा ज़ीते रानेबाले परमेशरेरे प्रकोपे सेइं भरोरे सत सोन्नेरे कटोरे दित्ते।

8 ते परमेशरेरी महिमा, ते तैसेरे शेक्तेरे वजाई सेइं मन्दर तूए सेइं भरोई जेव, ते ज़ां तगर तैन सत्ते स्वर्गदूतेई सते आफतां खतम की, तांतगर कोई मन्दरे मां न गेइ बटो।

16

???????????? ???? ? ? ?

1 तैट्टा पत्ती मीं मन्दरे मां कोई ज़ोरे सेइं तैन सत स्वर्गदूतन सेइं ज़ोतो शुनो कि, “गाथ, परमेशरेरे सज़ारे सते कटोरे दुनियारे लोकन पुड़ उलटाथ।”

2 ते पेइले गेइतां अपनो कटोरे धेरतली पुड़ उलटव। ते तैन मैन्हु केरे ज़ैन पुड़ हैवानेरी छाप थी, ते ज़ैना लोकेई तैसेरी मूरतरी पूजा केरते थी, एक्की किसमेरे बुर ते दुःख देनेबालो फोडे निस्से।

3 ते दुइयोवें अपनो कटोरो समुन्दरे पुड़ उलटव, ते तै मुडदां केरे खूनेरो जेरो बनो, ते समुन्दरे सारे जानदार मरे।

4 ते टलेइयोवें स्वर्गदूते अपनो कटोरो दरियान ते पैनेरे नागन पुड़ उलटव, ते सारू पानी खून बन्नु।

5 ते जैस स्वर्गदूते पैनी पुड़ अधिकारे मीं तै परमेशरे सेइं इन ज़ोते शुनो कि,
“हे पवित्तर परमेशर, तू जै आस, ते हमेशा करां थियो, तीं कां एन्चरे इन्साफ केनेरू हक्के।

6 किजोकि तैनेईं तेरे लोक ते तेरे नबी मारे ते तैन केरो खून बगोरो थियो,
एल्हेरेलेइ तीं हुना तैन खून पीने जो दित्तो।

इन इनामेरे रूपे मां तैन केरे लेइ ठीक आए।”

7 फिरी मीं बलिदान केनेरी ठारी मरां ईं आवाज़ शुनी कि,
“हाँ सर्वशक्तिमान परभु-परमेशर, तेरो इन्साफ सही ते कने सच्चो आए।”

8 ते च़ेवरोवें स्वर्गदूते अपनो कटोरो दिहाड़े पुड़ उलटव, ते दिहाड़े जादे गर्म भोनेरी अज़ाज़त दित्ती कि तैस सेइं लोक फुकोन।

9 ते लोक तैस बड़े सेके सेइं फुकोए, ते तैना लोक परमेशेरी तुहीन केने लाए, किजोकि तैए आए जैस कां सैरी आफतन पुड़ अधिकारे। फिरी भी तैन लोकेईं अपने पापन करां मन न फिराव, ते फिरी भी तैनेईं परमेशेरे महिमारे इकरार न कियो।

10 ते पंचोवें स्वर्गदूते अपनो कटोरो तैस हैवानेरे तखते पुड़ उलटव ते तैसेरे सारे राज़े मां आंधरू भोवें। ते लोक दुखे सेइं मरे ते अपनि-अपनि जिभ चापने लाए।

11 ते अपने दुखे ते फोड़ां केरे वजाईं सेइं स्वर्गेर परमेशेरी तुहीन की; ते अपने-अपने कम्मन करां मन न फिरव।

12 श्रेइयोवें स्वर्गदूते अपनो कटोरो बड़े दरिया फराते पुड़ उलटव ते तैसेरू पानी शुक्की जेव एसेरो नितीजो ईं भोव कि पूबेरे राज़े अपनि फौज घिन्तां पार जे।

13 एसेरां पत्ती मीं टलाई भूतां मैन्डू केरे रूपे मां लाए। अक अजगरेरे ऐशी मरां निस्सू, ते अक पेइले हैवानेरे ऐशी मरां निस्सू, ते अक दुइयोवें हैवानेरे ऐशी मरां निस्सू, जै जो झूटो सन्देश ज़ोते।

14 इन भूतन कां चमत्कार केनेरी काबलीत थी ते तैना दुनियारे सारे मुलखां केरे राज़ केनेबालन अकोट्टे केने चले ताके तैना परमेशरे सेइं लडन, ईं ते दिहाड़ी आए ज़ेइस परमेशर भूतन नाश केरेलो ते अपने लोकन मुक्ति देलो।

15-16 तैन भूतेईं हकोमत केनेबाले ते तैन केरि फौज एक्की ठैरी अकोट्टी की ज़ैस जो इब्रानी भाषाईं मां हर-मगिदोन ज़ोतन। एल्हेरेलेइ यीशुए ज़ोरूए, “इस शुना। मेरू एजनु अचानक च़ोरेरू ज़ेरूए। धने तै मैन्हु ज़ैखन अवं एज्जी त तै बींझो रहते, ते अपने लिगडन तियार रखते। फिरी तै नगगो न भोलो, ते फिरी तैस लोकन मां गाने सेइं शर्म न भोली।”

17 ते सतोवें स्वर्गदूते अपनो कटोरो हवाई पुड़ उलटव, ते मीं स्वर्ग मां मन्दरे मरां परमेशरे तखते पुड़ां ईं बड़ी आवाज़ शुनी कि कोई ज़ोने लोरोए, “सब किछ्छ पूरू भोवें।”

18 फिरी बिजली, ते आवाज़, ते गुडने लाव, ते अक एतरो बड़ो भुंजल अव, कि ज़ेइसेरे मैन्हु इस धेरतली पुड़ पैदा भोरोरेन, तेइसेरो अज़ तगर एरो भुंजल कधी नईं ओरो।

19 ते तैस महान बाबेल नगरेरे टलाई टुकड़े भोए, ते दुनियारे कौमां-कौमां केरे सारे नगर बर्बाद भोए। ताके परमेशर तै वादो पूरो केरे ज़ै तैने बाबेल नगरेरे लोकन सज़ा देनेरे लेइ कियोरो थियो। ईं सज़ा परमेशर पक्की देलो। परमेशर तैन ट्लिठी शराबी पियालो ज़ैस मां पानी न भोए मिलावरू ज़ेसेरो मतलब परमेशरे तैन सेइं बड़ो क्रोधे मां आए ते तैन पुड़ दया न केरेलो।

20 तैस वक्ते हर अक टैपू समुन्दरे मां डुबो; ते कोई भी पहाड़ न राऊं।

21 ते अम्बेरां मैनन् पुड़ मन-मन आण पेईं, ते एल्हेरेलेइ कि ईं आफत बड़ी भारी थी, लोकेईं आनहरी आफतेरे वजाईं सेइं परमेशेरी तुहीन की।

17



1 जैन सत स्वर्गदूतन कां तैना सत कटोरे थिये, तैन मरां एडतां एक्के मीं सेइं ज़ोवं, “इरां एई, अवं तीं तैस बड़े वेश्यारी सज़ा हिराताई, ज़ै बड़े पैन्न पुड़ विशोरीए।

2 ज़ैस सेइं धेरतलरे राजेईं बदमाशी की, ते धेरतली पुड़ रानेबाले तैसेरे बदमैशरे शराबी सेइं मसत भोरे थियो।”

3 तैखन आत्मा अवं अपने कैवू मां कियो ते स्वर्गदूते अवं सुनसान टैरी मांजो नेव। तैड़ी मीं अक कुआन्श हैवाने पुड़ सुवार लाई, जेसेरी सत करोड़ी ते दश शिंगां थियां, तैसेरे जान परमेशेरी तुहीन करनेरे नव्वन सेइं ढकोरी थी।

4 तैस कुआन्शां बैगनी ते लाल लिगड़ां लोरो थियां, ते सोन्नेरे ते कीमती मेनी ते मोतन सेइं सजोरी थी, ते तैसेरे हथ्ये मां अक सोन्नेरो कटोरो शराबी सेइं भेरतां थियो, ज़ै भिट्टे कम्मन ते बदमैशरे कम्मन हिराते।

5 ते तैसेरे कुपाए पुड़ इन नवं लिखोरू थियूं, “भेद-बड़ो बाबेल धेरतलरी वेश्यां ते भिट्टी चीज़ां केरि अम्मा।”

6 ते मीं तै कुआन्श परमेशेरे लोकां केरो खून ते यीशुएरे गुवाहां केरो खून पीने सेइं मसत भोती लाई, ते अवं तैन लेइतां हैरान भोव।

7 तैने स्वर्गदूते मीं सेइं ज़ोवं; “तू किजो हैरान भोव? अवं तीं सेइं इस कुआन्शरो, ते तैस हैवानेरो भेद ज़ोताई, ज़ैस पुड़ तै सुवारे, ते ज़ेसेरी सत करोड़ी ते दश शिनगन।

8 ज़ै हैवान तीं लाव, ई पेइलो थियो, पन हुनी नईं रानो, ते अथाह कुण्डरां निसेलो ते परमेशर तैस पूरे तरीके सेइं नाश केरेलो, ते ज़ैना लोक इस दुनियाईं मां ज़ीने लोरेन ज़ैन केरां नव्वां परमेशरे दुनिया बनाने करां पेइले जिन्दगरे किताबी मां नईं लिखोरां, तैना इस हैवान हेरतां हैरान भोले, ई हैवान पेइलो ज़ीतो थियो ते हुनी ज़ीतो नईं पन फिरी एज्जेलो।

9 इन समझनेरे लेइ ज़ानी मन ज़रूरीए, तैना सत पहाड़न, ज़ैन पुड़ तै कुआन्श राज़ केरतीए।

10 ते तैना सत राज़े भी आन, पंच त मेरि जोरेन, ते अक हेजू ए; ते अक आखरी हेजू नईं ओरो, पन ज़ैखन तै एज्जेलो त थोड़े च़िरेरे लेइ राज़ केरेलो।

11 ते ज़ै हैवान पेइलो थियो, ते हुना नईं, तै एप्पू अठोवं राज़ोए; ते तैन सत्तन मरां पैदा भोव, ते आखरी मां तैस राज़े हमेशारी सज़ा मैलेली।

12 ते ज़ैना दश शिंगां तीं पेइलां लां, तैना दश राज़ेन, ज़ैनेईं हेजू तगर राज़ शुरु नईं कियोरू। तैन दश राज़ेन हैवाने सेइं साथी राज़ केनेरो अधिकार दित्तो ज़ेव, पन तैन राज़ केनेरे लेइ थोड़ो वक्त दित्तो।

13 इना सब अक मन भोले, ते तैना अपनि-अपनि शक्ति ते अधिकार तैस हैवान देले।

14 इना गबड़े सेइं लड़ेले, ते गबड़ू तैन पुड़ ज़ीत हासिल केरेलू; किजोकि तै राज़ां केरो राज़ो ते पूरभूं केरो पूरभू आए। तैस पत्ती चलने बाले तैना आन ज़ैना परमेशेरे कुजोरेन ते चुनोरेन, ते ज़ैना तैस सेइं साथी ईमानदार आन।”

15 फिरी तैने स्वर्गदूते मीं सेइं ज़ोवं, “कि ज़ैन पानी तीं पेइलू लोरो थियूं, ज़ैस पुड़ तै वेश्या विशोरी थी, ए दुनियारे सारे कौमन हिराती, ज़ैना बड़े मुलखन मरां ते भाषान मरां आन।

16 तै वक्त एज्जेलो ज़ेइस हैवान दश राज़न सेइं ज़ैना तैस सेइं साथी आन, तैस वेश्याईं सेइं बैर रखेले, तैना तैस पुड़ हमलो केरेले ते तैस नग्गी केरेले तैसेरू किछ् मास खाले, ते बाकी फुकेले।

17 किजोकि परमेशर तैन केरे मन्न मां इन छ़ड़ेलो, कि तैना तैसेरी मर्ज़ी पूरी केरेले; ते ज़ांतगर परमेशेरू वचन पूरू न भोए, तांतगर अक मन भोइतां अपनू राज़ हैवाने देन।

18 ते तै कुआन्श, ज़ै तीं लोरीए तैन बड़ू नगरे, ज़ैन धेरतलरे राज़न पुड़ राज़ केरते।”

18

XXXXXXXXXXXXXXXXXXXX

1 इट्टा पत्नी मी अक स्वर्गदूत स्वर्ग मरां एइतो लाव । तैस कां बडो अधिकार थियो, ते एल्हेरेलेइ तैसेरे वडे चमकने वाले महिमा सेइं सारी धरतली लौ बनी ।

2 तैने ज़ोरे सेइं ज़ोवं,
“कि डुल्ली बाबेल नगरी डुल्ली, ते भूतां केरे रानेरी ठार, ते हर एककी भूतेरो अड्डो,
ते हर एककी दुष्ट ते भिट्टे चड्डोलोवेरो अड्डो बीती जेव ।

3 किजोकि तैसेरे बदमेशरे शराबी सेइं सब कौमां मसत भोइ,
ते धेरतलरे राजेई तैस सेइं बदमाशी की,
ते धेरतलरे बुपारी तैसेरे एशेरे वजाई सेइं अमीर भोइ जे ।”

4 फिरी मीं स्वर्गंरां अक हारि आवाज शुनी,
“हे मेरे लोकव तुस तैस मरां निस्सा ताक तुस तैसेरे पापन मां शामिल न भोथ,
ते तैसेरी आफतन मरां कोई भी तुसन पुइ न एज्जे ।

5 किजोकि तैसारे पाप बडे आन ज़ेन्चरे कि अगर ढेर लाव गाए त अम्बरे तगर पुजोरेन,
ते परमेशरे तैसेरी बुराई नई विसरोरी ज़ै तैसां कियोरी आए ।

6 ज़ेन्चरे तैसां लोकन सेइं कियूं तेन्चरे तैस सेइं भी केरा ।

तैना दुःख ज़ैना तैसां लोकन दित्ते तैस दुगने देथ,
तैसां लोक अपने बुरां कम्मां केरो स्वाद चखनेरे लेइ प्रभावित किये,
तै परमेशेरी दुगनी सरक मैसूस केरनेरे लेइ भी बनाई जेई ।

7 ज़ेत्त्री तैसां अपनि बडयाई की, ते एश किये, तेतरी तैस तकलीफ ते दुःख देथ,
किजोकि तै अपने मने मां ज़ोतीए, अवं रानई, विधवा नई; अवं विधवारि दुखे मां कथे न गोइली ।

8 एल्हेरेलेइ तैसेरे घमण्डेरे वजाई सेइं तैस पुइ अचानक आफतां एज्जेली ।
अचानक तैस पुइ विमारी, दुःख ते कने काल साथी एज्जेलो । ते तै अगगी मां भस्म की गाली,
किजोकि प्रभु-परमेशर शक्तिमाने ते तै तैस सज़ा देलो ।”

9 ते दुनियारे राजे ज़ैनेई तैस सेइं बदमाशी ते एश कियोरे थिये, ज़ैखन तैना तैसेरे फुकोनेरो तू लाएले त तैसेरेलेइ ढा छुडेले, ते छाती कुटेले ।

10 ते तैना डरेले कि तैना भी तैसेरे सज़ाई मां टलेइयोनेन, ते दूर खडे भोइतां ज़ोले,
“हे महान नगरी, बाबेल! हे मज़बूत नगरी, हाय! हाय!
एककी सेइती मां तीं सज़ा मैल्ली ।”

11 “ते धेरतलरे बुपारी तैसेरेलेइ लेरां देले ते मिनत केरेले किजोकि हुनी कोई तैन सेइं लेन देन न केरेलो ।

12 तैन केरू सामान बडे किसमां केरू थियूं । सोनू चाँदी, जुवाहर, मोती । ते मलमल, बैजनी, रेशमी, ते लाल लिगडां थियां, ते कने किसमां-किसमां केरि खुशबूदार लकड़ी, ते हथीदंतेरी हर किसमेरी चीज़ां, ते कीमती लकड़ी, पितल, लूहाँ, संगमरमरेरे किसमां-किसमां केरि चीज़ां,

13 ते दालचीनी, मसाले, धूप, गन्धरस, लोवान, मदिरा, तेल, मैदो, गेहुं, बेछी-दांत, भैड्डां-छेल्ली, घोडे, रथ, गुलाम, ते कने मैन्हु केरे प्राण ।

14 ते बुपारी तैस सेइं ज़ोले, ज़ैना चीज़ां तीं बेई तैना हुनी न रैली, ज़ैना खुशबूदार चीज़ां तीं पसंद की, तैना सैरी चीज़ां ज़ैना तीं अपनो जिसम खूबसूत बनानेरे लेइ इस्तेमाल की, तैना सैरी तीं गवेई ते हुनी तैना न मैल्लन ।

15 इन चीज़न सेइं बुपारी ज़ैना तैसेरे वजाई सेइं अमीर भोरे थी, तैसेरे दुखेरे डरे सेइं दूर खडे भोले, ते लेरां देइतां ते तडफते ज़ोले,

16 अफ़सोस! अफ़सोस! ई बडी नगरी ज़ै मलमल, बैजनी, लाल लिगडां लेइतां थी,

ते सोन्नु, ते जुवाहर ते मोतन सेइं सजोरी थी,

17 एक्की सैइती मां तैसेरू एरू धन बरबाद भोवं, ते सब मांझी, ते मुसाफर, ते मल्लाह, ते जेतरे समुन्दरे मरां कमाई कमातन तैना सारे दूर खडे भोए ।”

18 जैखन तैना तैस नेगरारे फुकोनेरो तू लाएले त ज़ोरे सेइं ज़ोले, इस महान नेगरारी ज़ेरि कोई नगरी नई ।

19 ते अपने-अपने दोगगे पुड़ धूड मलेले, ते लेरां देते ते कर लाते चिन्डां मैरतां ज़ोले, “अफ़सोस! अफ़सोस! ई बड़ी नगरी ज़ेसेरी दौलती सेइं समुन्दरेरां सब ज़िहाज़न वाले धनी भोरे थी,

एक्की सैइती मां उज़डे ।

20 तुस ज़ैना स्वर्गे मां रातथ, ते परमेशेरे लोकव,

ते प्ररितव, ते कने नेबव, ज़ैन तैस सेइं भोवं तैसेरे वजाई सेइं खुश भोथ,

किजोकि परमेशेरे तैस नेगरारे इन्साफ कियोरो किजोकि तैसां तुसन सेइं बुरू कियोरू थियूं ।”

21 फिरी एक्की ताकतवर स्वर्गदूते बडे चेकारे पाठेरो ज़ेरो अक घोड छूवा, ते इन ज़ोइतां समुन्दरे मां शारो, कि बड़ी नगरी बाबेल एन्बरे बछोड़ी गाली, ते फिरी कधे तैसेरो पतो न मैलेलो ।

22 ते सारंगी बज़ानेबाले, ते गीतां ज़ोनेबाले, ते बेइशोई बज़ानेबाले, ते नडशिनगों बज़ानेबालां केरि आवाज़ फिरी तीं मां कधी न शुनोली, ते फिरी केन्ची पेशेरो करीगिर तीं मां न मैलेलो; ते चक्की ज़लनेरी आवाज़ तीं कधे न शुनोली ।

23 ते लोक दीयेरी लौ फिरी तीं मां न बालेले, ते लाड़ेरी ते लैड़ारी आवाज़ कधे तीं मां न शुनोली; किजोकि तेरे बुपारी धेरतली पुड़ प्रधान थिये, ते तेरे दूने सेइं सब कौमां टेपलोवरी थी ।

24 परमेशर बाबेले सज़ा देलो किजोकि सारे नेबी ते परमेशेरे लोकां, ते धेरतली पुड़ सब मारोरां केरो खून तैस्से मांए ।

19

1 ताकतवर स्वर्गदूतेरे ज़ोइतां झाइनेरां बाद, मीं स्वर्गे मां बडे लोकां केरि भीड़ उच्चे आवाज़ी मां इन ज़ोते शुनी,

“हल्लिलूय्याह*! मुक्ति, महिमा, शक्ति इश्शे परमेशेरेरीए ।

2 तैसेरी बडयाई भोए किजोकि तैसेरे सारे फेसले सही ते ठीक आन । तैने मशूर वेश्यारो इन्साफ कियो तैसां दुनियारे लोक पाप केरनेरे लेइ प्रभावित किये । परमेशर तैस बदलो देलो किजोकि तैसां ज़िरिये परमेशेरे दास मारोरेन ।”

3 फिरी दुइयोवं बार तैनेई ज़ोवं,

“हल्लिलूय्याह! ते तैसेरे फुकोनेरो तू सदा ज़लतो रालो ।”

4 ते चोन्ही बुज़ुर्गेई ते ज़ेवरे परेगेई परमेशेरे कां मथ्यो टेको; ज़ै तखते पुड़ बिशोरो थियो, ते ज़ोवं, “आमीन! हल्लिलूय्याह!”

5 ते तैखन मीं ज़ोते शुनो, ते परमेशेरे तखते मरां अक आवाज़ आई, तैने ज़ोवं,

“तुस इश्शे परमेशेरे दास आथ ज़ैना तैसेरी आदर केरतथ,

कुन निकडे, कुन बडडे, तुस सब तैसेरी तारीफ़ केरा ।”

6 फिरी मीं बड़ी भीड़ारी, ते बडे पैनेरी आवाज़ शुनी, ते गुडनेरी ज़ेरि आवाज़ शुनी,

“हल्लिलूय्याह! कि प्रभु इश्शो परमेशर, सर्वशक्तिमान राज़ केरते ।

7 एज्जा अस खुश ते मगन भोम, ते तैसेरी बडयाई केरम;

किजोकि गबड़ेरो इला पुज़ोरोए, ते तैसेरे लैड़ां अपनी आप तियार केरोए ।

8 ते तैस साफ ते चमकदार महीन मतलब मलमल लानेरो अधिकार दितो;”

* 19:1 हल्लिलूय्याह: परमेशेरी बडयाई भोए

किजोकि तैस महान मलमलेरो मतलब परमेशेरे लोकां केरां धर्मेरां कम्मन ।

9 ते स्वर्गदूते मीं सेइं ज़ोवं, “इन लिख, कि धन आन तैना, ज़ैना गबड़ेरे ड्लाएरे धामी मां कुजोरेन ।” फिरी तैने मीं सेइं ज़ोवं, “इना गल्लां ज़ैना परमेशेरे ज़ोई सन्न आन ।”

10 ज़ैखन मीं शुनु, अवं ज़ै मीं सेइं गल्लां लोरो थियो केरने तैसेरी आराधना केरनेरे लेइ तैस कां झुको तैने मीं सेइं ज़ोवं, “मेरी आराधना न केर, तै परमेशेरे ज़ेसेरी आराधना कियोरी लोडे । अवं भी परमेशेरो दास आई, ज़ेन्नेरे तू त तेरे विश्वासी साथी आन ज़ैना यीशुएरो अपने परभुएरे रूपे मां इकरार केरतन ।” ई सञ्जाई यीशुए बांदी कियोरी ज़ै लोकन शक्ति देती कि परमेशेरे वचनेरू एलान केरन ।

????? ?????? ??????

11 फिरी मीं स्वर्ग खुल्लू लाव; तेई मेरे सामने छितो घोडो थियो; ते तैस पुड़ अक सुवार थियो, ज़ै वफादार, ते झूठ न ज़ोए; ते ज़ैन परमेशेरी नज़री मां सही आए तैसेरे मुताबिक इन्साफ ते परमेशेरे दुश्मन्न सेइं लड़ाई केरते ।

12 तैसेरे एछुछी अगारे लपारी ज़ेरि थी, ते तैने बड़ां ताजां लोरो थियां; ते तैसेरू नवं तैस पुड़ लिखोरूए, तैसेरो मतलब सिर्फ तैए ज़ानतो थियो ।

13 तैनी खने मां डुबोरू लिगड़ लोरो थियूं, तैसेरू नवं परमेशेरू वचने ।

14 ते स्वर्गेरी फौज छिते घोड़न पुड़ सुवारे; ते तैना छिते ते साफ मलमल लेइतां तैस पत्ती पत्तीन ।

15 ते कौमी-कौमी मारनेरे लेइ तैसेरे ऐशी मरां अक तिखी तलवार निसतीए, ते तै लोहरे सोटे सेइं तैन पुड़ राज़ केरेलो, ते तै सर्वशक्तिमान परमेशेरे बड़े प्रकोपेरी खालिस शराबी सेइं दाछु दलेन्नेलो ।

16 ते तैसेरां लिगड़न ते ज़ंधी पुड़ इन नवं लिखोरूए, “राज़ां केरो राज़ो ते पूरभुं केरो पूरभु ।”

17 फिरी मीं अक स्वर्गदूत दिहाड़े पुड़ खडो लाव, ते तैने बेड़ि आवाज़ी सेइं अम्बरे मां उडने वाले च़डोलन सेइं ज़ोवं, “एज्जा परमेशेरे बड़े धामी मां शामिल भोनेरे लेइ अकोट्टे भोथ ।

18 ज़ैस सेइं तुस राज़ां, पूरधानां, ताकतबर लोकां, घोड़ां ते कने तैन केरे सवारां, आज़ादां, गुलामां, निकड़े, बडे, सेन्भी लोकां केरू मास खाथ ।”

19 फिरी मीं हैवान लाव ज़ै समुन्दरे मरां ओरो थियो, ते धेरतलरे राज़े ते कने तैन केरि फौज तैस घोड़ेरे सुवार ते तैसेरी फौजी सेइं लड़नेरे लेइ अकोट्टी लाई ।

20 ते तै पेड़लो हैवान ते तैस सेइं साथी तै झूठो नबी टलाव, ज़ैने तैसेरे सामने एरे निशान हिरावरो थियो, ज़ेसेरे ज़िरिये तैने तैना सारे लोक टपलाए, ज़ैनेई तैस हैवानेरी छाप नेवरी थी, ते ज़ैना तैसेरी मूतरी पूजा केरते थिये, इन दुइये ज़ीते तैस अगारे झीली मां छुडे जे, ज़ै गन्धके सेइं बलतीए ।

21 ते बाकी लोक तैस घोड़ेरे सवारेरी तलवारी सेइं ज़ै तैसेरे ऐशी मरां निस्सती थी मारे जे; ते चुड़ोलू तैसेरे मासे सेइं रेज़्जी जेआं ।

20

1000 ?????? ?????? ????

1 फिरी मीं अक स्वर्गदूत स्वर्गेरां एइतो लाव; ज़ेसेरे हथ्ये मां अथाह कुण्डेरी चाबी ते कने अक बड़्डी शंगल थी ।

2 तेने तै अजगर टलाव ज़ै बड़े पेइले सप्पेरे रूपे मां लेइहोरो थियो ज़ेसेरू नवं शैतान भी आए । तेने तै टलेइतां हज़ार सालेरे लेइ बन्धो ।

3 ते तै अथाह कुण्डे मां शैरतां बन्द कियो ते तैस पुड़ मोहर लई; कि तै हज़ार साल पूरे भोने तगर कौमा-कौमां केरे लोकन फिरी न भटकाए; इसेरां पत्ती ज़रूरे, कि थोडे ज़िरेरे लेइ खोल्लो गाए ।

4 फिरी मीं किछु तखत लाए ते ज़ैना लोक तैन पुड़ बिशशेरे थिये ते तैन राज़ केरनेरो अधिकार दित्तो; ते तैन केरि आत्मा भी लेई, ज़ैन केरि क्रोडी एल्हेरेलेइ कटोरी थी कि तैना यीशु मसीह

अपनो परभू मन्तन ते परमेशेरे वचने पुड विश्वास केरतन, ते ज़ैनेई तैस हैवानेरी, ते तैसेरे मूरतरी पूजा न थी कियोरी, ते तैसेरी महोर अपने कुपाए ते हथ्यन पुड न थी। तैना ज़ीते भोइतां मसीह सेइं साथी हज़ार सालन तगर राज़ केरेले।

5-6 इना लोक पेडले आन ज़ैना ज़ीते किये गाले ते तैना धन ते पवित्तर आन। दुइयोवं मौतरी तैन पुड कोई शक्ति न भोली। तैना परमेशेरे लेइ याजक भोले ते मसीह तैन सेइं साथी हज़ार साल राज़ केरेलो, ज़ांतगर तैना हज़ार साल पूरे न भोन तांतगर होरे मरे लोक ज़ीते न किये गाले।

???????? ???? ?

7 ज़ेखन हज़ार साल खतम भोनेबाले भोले त स्वर्गदूत शैताने तैस ठैरारा हथरां छुडेलो ज़ैडी ते बन्धोरो थियो।

8 ते तैन कौमन ज़ैना सैरी दुनियार्ई मां आन धोखो देनेरे लेइ निस्सेलो। तैन कौमन जो गोग ते मागोग ज़ोतन। शैतान तैन तैस ठैरी आनेलो ज़ैडी ते तैन सेइं लडेलो। तैन केरि गिनती समुन्दरेरे रती बराबर भोली।

9 शैतानेरी फौज सारे दुनियार्ई मां गाली, तैना तैस नगरे घेरेले ज़ैस सेइं परमेशर प्यार केरते ते ज़ैडी तैसेरे लोक रहतन, परमेशेरे तरफां स्वर्गोरां अग तैन सेबन भस्म केरेली।

10 ते तैन केरो गुमरा केरनेबालो शैतान अग ते गन्धकेरे समुन्दरे मां शारो गालो, ज़ैस मां तै हैवान ते कने झूठो नबी भी भोलो, तैना रात दिहाड़ी हमेशा दुखे मां राले।

???? ???? ? ? ? ? ? ? ? ?

11 फिरी मीं अक बडडो छित्तो तखत ते ज़े तैस पुड बिशोरो थियो लाव, जेसेरे सामनेरां धरती ते अम्बर नशू, ते तैन केरे लेइ टार न मैल्ली।

12 फिरी मीं निकडे बडे ज़ैना मरे थिये तखतेरे सामने खडे लाए, ते किताबां खोल्ली जेई; ते फिरी अक होरि किताब खोल्ली; मतलब ज़िन्दगरी किताब खोल्ली; ते ज़ेन्चरे तैन किताबन मां लिखोरू थियू, तैन केरे कम्मां केरे मुताबिक मुडदां केरो इन्साफ कियो।

13 ते समुन्दरे तैना मरे मेन्हु दित्ते ज़ैना तैस मां थी, ते मौतां ते पाताले ज़ैना तैस मां मरे थिये दित्ते; ते तैन मरां हर एक्केरो तैन केरे कम्मां केरे मुताबिक इन्साफ कियो।

14 ते मौत ते पाताल भी अगारे समुन्दरे मां शारू, ई अगगारो समुन्दरे त दुइयोवं मौते।

15 ते ज़ेसेरू भी नवं ज़िन्दगरे किताबी मां लिखोरू न मैल्लू, तै अगारे समुन्दरे मां शारो जेव।

21

???? ???? ? ? ? ? ? ? ? ?

1 फिरी मीं नंवू अम्बर ते नव्वी धेरतली लाई, किजोकि पेडलू अम्बर, ते पेइली धेरतली न थी रावरी, ते समुन्दर भी न राव।

2 फिरी मीं पवित्तर नगर नंवू यरूशलेम स्वर्गेरां परमेशेरे करां एडतू लाव, ते तैन तैस लैडारू ज़ेरू थियू, ज़ै अपने लाडरे लेइ तियार भोरी भोए।

3 फिरी मीं परमेशेरे तखते मरां कोई उच्ची आवाजी सेइं इन ज़ोते शुनो, “अजेरां बाद परमेशर मैन्न सेइं साथी रालो, ते तैसेरू घर तैन लोकन मां भोलू, ते तैना तैसेरे लोक भोले, ते परमेशर एण्यू तैन, अपने लोकां केरे रूपे मां कबूल केरेलो ते तैना लोक तैस अपनो परमेशर कबूल केरेले।

4 ते तै तैन लोकां केरे एछ्छी केरां सब ऐखरू पुछ्छेलो; ते तैट्ठां पत्ती मौत न राली, ते न दुःख, न मातम, न मुसीबत राली; पेइली गल्लां बीती जेई।”

5 ज़े तखते पुड बिशोरो थियो तैने ज़ोवं, “कि तक, अवं सब किछ् नंवू केरताई।” फिरी तैने ज़ोवं, “कि लिख, किजोकि इना वचन विश्वासेरे काबल ते सञ्जे आन।”

6 फिरी तैने मीं सेइं ज़ोवं, “सब किछ् पूरू भोवं, अवं अलफा ते ओमेगा, पेडलो ते आखरी आई, अवं ट्लिशोरे ज़िन्दगरे पेनेरे नागन मरां मुखत देइलो।

7 जै ज्रीत हासिल केरे, तैए इन चीजां केरो बारस भोलो; ते अवं तैसेरो परमेशर भोलो, ते तैन मेरू मट्टू भोलू ।

8 पन डरपोक, विश्वास न केनेबाले, भिटे, खुनी, बदमाशी केनेबाले, जैदू केने बाले, मूरती केरि पूजा केनेबाले ते सब झूठां केरो हिस्सो तैस समुन्दरे मां मैलेलो जै अगगी ते गन्धकी सेइं बलतो रहते, ई दुइयोवं मौते ।”

????? ??????

9 फिरी तैन सत स्वर्गदूतेई जैनेई सत आखरी आफतन सेइं भरोरे कटोरे मैनन पुड़ उलटावरे थिये, तैन मरां एक्के मीं कां एइतां ज़ोवं, “इरां एई, तीं अवं लैडे जै जल्दी गबडे सेइं इला बनाली हिराताई ।”

10 परमेशेरे आत्मा अवं अपने कैबू मां कियो ते स्वर्गदूते अवं एक्की बड्डे ते उच्चे पहाडे पुड़ नेव, ते पवित्तर नगर यरूशलेम स्वर्गोरां मरां परमेशेरे करां एइतो हिरव ।

11 परमेशेरी महिमा तैस मां थी, ते तैसेरी लौ बडे कीमती घोड़ां, मतलब बिल्लौरे जेरे यशवे बराबर साफ थी ।

12 तैस नगरेरे च़ेवरे पासन बड़ी उच्ची दिवार थी, ते तैसेरां 12 दारां ते दारन पुड़ 12 स्वर्गदूत थिये; ते तैन पुड़ इस्राएली केरे 12 गोत्रां करां नब्वां लिखोरां थियां ।

13 पूर्वरे पासे ट्लाई दारां, उत्तरेरे पासे ट्लाई दारां, दखिनेरे पासे ट्लाई दारां, ते पश्चिमेरे पासे ट्लाई दारां थियां ।

14 ते नगरेरे दिवारारी 12 मुनीयादां थी, ते तैन पुड़ गबडेरे 12 प्रेरितां करां 12 नब्वां लिखोरां थियां ।

15 ते जै मीं सेइं गल्लां केरतो थियो, तैस कां नगर, ते तैसेरे दारन ते तैसेरे दिवारन नापनेरे लेइ अक सोन्नेरो गज़ थियो ।

16 ते तैस नगरेरे च़ेवर पास थिये, ते तैसेरी लमवाई चोड़ाअरे बराबर थी, ते तैने तैस गजे सेइं नगर नापू, त सडे 750 कोस निस्सी, ते तैसेरी लमवाई, ते चौड़ाई, ते ऊंचाई बराबर थी ।

17 तैसेरां बाद स्वर्गदूते दिवारारी ऊंचाई नापी । तैने एन्चरे नापी ज़ेन्चरे मैन्हु चीजां नापतन, तै दिवार 66 मीटर उच्ची निस्सी ।

18 ते ते दिवार कीमती घोडन सेइं बनोरी थी जैस जो यशव ज़ोतन, नगर खालिस सोन्ने सेइं बनोरू थियू, जैन साफ चमकते शीशेरू ज़ेरू भोए ।

19 ते तैस नगरेरी मुनीयादारे घोड़ हर किसमेरी कीमती घोडन सेइं सज़ावरी थी, पेइली मुनीयाद यशबेरी दुइयोवं नीलमणेरी टलेइयोवं लालड़ी, च़ेवरोवं मरकते,

20 पंचोंव गोदेक, शेइयोवं माणिक्ये, सतोवं पीतमणि, अठोवं पेरोजे, नावोवं पुखराजे, दशोवं लहसनिए, यारोवं धूमरकान्त, बारोवं याकूतेरी थी ।

21 ते 12 दारां, 12 मोती करां थियां, अक-अक दार, एक्की-एक्की मोती सेइं बनोरू थियू, ते नगरेरी सडक साफ शीशेरी ज़ेरि खालिस सोन्नेरी थी ।

22 मीं कोई मन्दर न लाव, किजोकि सर्वशक्तिमान प्रभु-परमेशर, ते गबडू तैड़ी नगरे मां आए । एल्हेरेलेइ मन्देरी कोई ज़रूरत नई ।

23 ते तैस नगर मां दिहाड़ो ते चैदनेरे लोअरी ज़रूरत नई, किजोकि परमेशेरे महिमा सेइं तैस मां लौ भोइ रावरीए, ते कने गबडू तैसेरो दीयोए ।

24 ते कौमां-कौमां केरे लोक तैसेरी लोई मां राले, ते धेरतलरे राजे अपनि-अपनि धन दौलत तैस नगरे मां आनेले ।

25 तैस नगरेरां दारां सारे दिहैड़ी खुल्लां भोलो ते कधी बंद न भोलां । किजोकि तैड़ी कोई रात न भोली ।

26 दुनियारे लोक दुनियारे कौमां केरि सैरी खूबसूत चीजां ते धन दौलत तैस नगरे मां आनेले ।

27 ते तैस मां कोई भिट्टी चीज या गन्दु कम करेनेबालो या झूठ बनानेबालो, केन्वी भी तरीके सेइं अन्तर न गालो; पन सिर्फ तैना लोक जैन केरां नंवां गबड़ेरे ज्जिन्दगरे किताबी मां लिखोरां भोलां ।

22

1 फिरी तैने मीं बिल्लौरैरे ज़ेरो अक चमकतो ज्जिन्दगरे पैनेरो दरिया हिराव, ज़ै परमेशरेरे ते गबड़ेरे तखते करां निस्तां तैस नगरेरी सड़की तगर मझामेईं निसतो थियो ।

2 ते दरियोरे इस पासे ते उस पासे, ज्जिन्दगरो बुट थियो, तैस मां 12 किसमां केरे फल लगते थियो, ते तै हर महीने फलतो थियो; ते तैस बुटेरे पट्लान सेइं कौमां-कौमां केरे लोक बेज्जोते थी ।

3 फिरी तैड़ी लानत न भोली ते परमेशर ते गबड़ेरो तखत तैस नगर मां भोलो, ते तैसेरे दास तैसेरी सेवा केरेले ।

4 ते तैना परमेशरेरे आमने सामने लाएले, ते परमेशेरू नवं तैन केरे कुपाए पुड़ लिखेरू भोलू ।

5 ते फिरी रात न भोली, ते तैन दीयो ते दिहाड़ेरी ज़रूरत न भोली, किजोकि प्रभु-परमेशर तैन लौ देलो, ते तैना हमेशा राज़ केरेले ।

~~~~~

6 फिरी स्वर्गदूते मीं सेइं ज़ोवं, “इना गल्लां विश्वासेरे कावल ते सज़्जीन, ते प्रभु ज़ै नेवी केरे आत्मा केरो परमेशरे, तैने अपने स्वर्गदूत एल्हेरेलेइ भेजे, कि अपने दासन तैना गल्लां ज़ैन केरू जल्दी भोनू ज़रूरीए हिराए ।”

7 “हेर, अवं जल्दी एजने बालोई, परमेशर तैन सेब्बन बरकत देते ज़ैना इस किताबेरे सन्देशे पुड़ ध्यान देतन ।”

8 अवं तैए यूहन्ना आई, ज़ै इना गल्लां शुन्तो, ते लहतो थियो, ते ज़ैखन मीं शुनु, ते लाऊं, त ज़ै स्वर्गदूत मीं इना गल्लां हिरातो थियो, अवं तैस कां मथ्यो टेकने लाव ।

9 ते तैने मीं सेइं ज़ोवं, “हेर, एरू न केर; किजोकि अवं तेरो, ते तेरे विश्वासी सैथी नेवी ते इस किताबरी गल्लां केरे मन्ने बालां केरो संगी दासाई; परमेशरे कां मथ्यो टेक ।”

10 फिरी तैने मीं सेइं ज़ोवं, “इस किताबेरे भविष्यवैनेरे गल्लन केरो भेद छुपेइतां न रख, किजोकि वक्त नेडोए ।

11 ज़ै बुरू केरते, तै बुरू केरतो राए; ते ज़ै भिट्टो, तै भिट्टो बनोरो राए; ते ज़ै धर्मी, तै धर्मी बनोरो राए; ते ज़ै पवित्रे तै पवित्रे बनोरो राए ।”

~~~~~

12 फिरी प्रभु यीशुए ज़ोवं, “अवं जल्दी एज्जेलो । अवं एज्जी रावरोई ज़ैन लोकेईं कियूं तैसेरे मुताबिक इनाम देनेरे लेइ या सज़ा देनेरे लेइ ।

13 “अवं अलफा ते ओमेगाई, पेइलो ते आखरी, शुरुआत ते अन्त आई ।”

14 धने तै, ज़ै अपना लिगड़ा धोते, किजोकि तैस ज्जिन्दगरे बुटे कां एजनेरो अधिकार मैलनोए, ते तै दारां केरे बत्तां गेइतां नगर मां दाखल भोलो ।

15 पन कुतरां, जैदू केरनेबाले, बदमाशी केरनेबाले, खून केरनेबाले, मूरती केरि पूजा केरनेबाले, हर कोई झूठेरो चाने बालो, ते कने झूठ बनानेबालो बेइर राले ।

16 “मीं यीशुए अपने स्वर्गदूत एल्हेरेलेइ भेजो, कि तुसन अगर कलीसिया मां इन गल्लां केरे बारे मां गवाही दे, अवं दाऊदेरू ज़ील, वंश, ते झेझरो चमकतो तारोई ।”

17 परमेशेरी आत्मा ते गबड़ेरी लाड़ी यीशु सेइं ज़ोतिन, “तू ज़रूर एई!” ते शुने बाले भी ज़ोन, “एई!” ज़ै टलिशोरो भोए, तै एज्जे ते ज़ै कोई चाए पानी ने ज़ैन मुफ्ते मां ज्जिन्दगी देते ।

~~~~~

18 अवं हेर एक्की ज़ै इस किताबरी भविष्यवैनेरी गल्लां शुनते गवाही देताई, कि अगर कोई मैन्हु इन गल्लन मरां किछ् बधाए, त परमेशर तैना आफतन ज़ैना इस किताबी मां लिखोरिन, तैस देलो ।

19 ते अग्र कोई इस भविष्यवैनरी कितावरी किच्छ गल्लां कढे, त परमेशर तैस ज़िन्दगरे बुटे ते पवित्र नगर मरां ज़ेसेरे बारे मां इस किताबी मांए, तैसेरो हिस्सो कढेलो ।

20 ज़ै इन गल्लां केरि गवाही देते, तै इन ज़ोते, “हाँ अवं जल्दी एजने बालोई ।” आमीन । हे प्रभु यीशु एई!

21 प्रभु यीशुएरो अनुग्रह परमेशरेरे लोकन सेइं साथी राए । आमीन ।